


Yus Papí: Shuarjai
Yus Yamaram Chicham
Najanamu



New Testament in Shuar (EC:jiv:Shuar)

Yus Papí: Shuarjai Yus Yamaram Chicham Najanamu

New Testament in Shuar (EC:jiv:Shuar)

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
fb10d1f0-e2d5-5d8e-8a74-10846708c857

Contents

| | |
|----------------------------|-----|
| MATEU | 1 |
| MÁRKUS | 42 |
| RÚKAS | 68 |
| JUAN | 112 |
| TÚRAMU | 143 |
| RÚMANAM | 185 |
| 1 KURINTIUNAM | 202 |
| 2 KURINTIUNAM | 219 |
| KARASEANAM | 230 |
| IPISIUNAM | 237 |
| JIRIPIUSNUM | 243 |
| KURUSENAM | 247 |
| 1 TISARÚNIKIANAM | 251 |
| 2 TISARÚNIKIANAM | 255 |
| 1 TIMIUTÉUN | 258 |
| 2 TIMIUTÉUN | 263 |
| TITIUN | 267 |
| JIRIMIÚÑKAN | 270 |
| ISRAERNUM | 271 |
| SÁNTIAK | 284 |
| 1 PÍTIUR | 289 |
| 2 PÍTIUR | 295 |
| 1 JUAN | 298 |
| 2 JUAN | 303 |
| 3 JUAN | 304 |
| JÚTAS | 305 |
| APUKARÍPSIS | 307 |

Yúsan Shiir Chichamen MATEU aarmia nu

Jesukrístu weątrí
(Rúkas 3.23-38)

¹ Jesukrístu weątrí ju áiniawai. Tura ashí nankaamas ti uunt weąt Tawitcha Apraámsha áiniawai.

² Apraáma uchirí Isak. Tura Isaka uchirí Jakup. Jakupa uchirísha Jutá ni yachijjai.

³ Tura Jutá uchirín Páresan tura SaranCHA Tamar jurermiayi. Páresa uchirísha Esum, nuna uchirísha Aram.

⁴ Nuna uchirísha Aminiatáp. Nuna uchirísha Nasuñ. Nuna uchirísha Sarmuñ.

⁵ Sarmuñka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isai.

⁶ Nuna uchirísha uunt akupin Tawit. Uunt akupin Tawitia uchiríncha Sarumúnkan Patsepa jurermiayi. Patsepasha emka Uriasa nuweeyayi.

⁷ Sarumúnka uchirí Rupuam. Nuna uchirísha Apías. Nuna uchirísha Asa.

⁸ Asa uchirísha Jusapát. Nuna uchirísha Juram. Nuna uchirí Usias.

⁹ Usiasa uchirí Jutam. Nuna uchirí Akas. Nuna uchirí Esekías.

¹⁰ Esekiasa uchirí Manasés. Nuna uchirí Amuñ. Nuna uchirí Jusias.

¹¹ Jusiasa uchirí Jekunías ni yachi armia nujai. Nuñ Papirúnianmaya shuar Israer shuaran mesetjai nupetkar Papirúnia nunkanam achirar júkiarmiayi.

¹² Nu ukunmanka Jekuniasa uchirí Saratiár akiiniamiayi. Tura nuna uchirí Surupapír.

¹³ Surupapíra uchirí Awiut. Nuna uchirí Iriakím. Nuna uchirí Asur.

¹⁴ Asura uchirí Satuk. Nuna uchirí Akim. Nuna uchirí Eriut.

¹⁵ Eriuta uchirí Ereasár. Nuna uchirí Matan. Nuna uchirí Jakup.

¹⁶ Jakupa uchirí Jusé Marí áishriya nu. Marisha Jesusan jurermiayi. Nu Jesuska shuáran uwemtikartin asa Kristu tu anaikiamuiti.

¹⁷ Tuma asamtai Apraámnumiá Tawitnium Jesusa weątrí katurse (14) áiniawai. Tawitni-umiasha Papirúnianam jukimiunma nujsa katurse weąt áiniawai. Papirúnianam jukimiun-mayasha Kristunam ataksha katurse áiniawai.

Jesukrístu akiiniamu
(Rúkas 2.1-7)

¹⁸ Jesukrístu akiiniamu júnis ámiayi. Ni nukurí Marí Jusejai anajmanairuyayi. Tura tsaniatsain Yusa Wakanj ajaprumtikiamiayi.

¹⁹ Ajaprukmetaisha Jusé Marin iniatsaatsuk nin ajapatniun enentáimpramiayi. Tura ti péñker asa aya iniaiatniun wakerimiayi aents nékainiatsain.

²⁰ Nuna tu enentáima pujáj, mesekranam Yusa suntarj tari chicharuk tímiayi “Juséa, ame weątrum Tawitchakait. Tuma asam Marijjai nuatnaikiatin ashamkaip. Uchin jurertatna nuka Yusa Wakanjniuiti.

²¹ Uchin áishmankan takustatui tura nuna naarj *JESUS* anaikiattame. Ashí ni shuárin ni tunaarjya uwemtikartin asa Jesus anaikiatniuiti” tímiayi.

²² Yus ni etserniurjjai yaunchu timia nu uminkiatu tusa nu túrunamiayi. Juna áamtikramiayi:

²³ “Nuwa natsa ajapruktatui tura uchin takustatui. Nuna náarisha Emanuéer anainiaktatui.” Tu áarmaiti.

Emanuéersha nu chichamnum “Yus iijjai pujuwiti” tawai.

²⁴ Jusesha mesekranmaya shintiar Yusa suntarj timia núnsan Marin nuatkamiayi.

²⁵ Tura uchin júreatsain tsaninchamiayi. Tura jurermatai uchin Jesus anaikiamiayi.

2

Ti neka apach Jesusan eąkarmiania nu

¹ Jutá nunkanam Pirin pépru ana nuñ Jesus akiiniamiayi. Nujsa nú nunka akupniurj Irutisauyayi. Akiiniamtai ti neka apach nantu tátainmaaniya Jerusaréñ péprunam táarmiayi.

² Taar inintruiniak “¿Israer shuara úunt akupniurj tuñ akiiniat? tiarmiayi. Nantu tátainmaani pujaati ni yaarj wáinkiamji. Tura tikishmatratatui tusar winiaji” tiarmiayi.

³ Irutis nuna antuk nusháa enentáimpramiayi. Tuma asamtai ashí Jerusaréñnumiá shuarsha antukar nusháa enentáimprarmiayi.

⁴ Irutis nuikia ashí Israer-patri uuntríncha tura yaunchu akupkamun jintinniuncha untasukarmiayi. Tura Kristu akiiniatniurín inintrusmiayi.

⁵ Tutai chichainiak “Jutía nuñkanam Pirin pepru ana nuñ akiiniatniuiti, tiarmiayi. Yaunchu Yúsnan etserin tu áaruiti:

⁶ “Jutía nuñkanam, Pirin pepru, ishitiápchich ana nuyá nekas uunt akupin winittiwai. Nii ashí Israer shuaran, Wíi shuar ásar matai, péñker wáinkiatwai,” tawai Yus.” Tu tiarmiayi.

⁷ Nuna tuñiakui Irutis ti neka apachin úusan, urutía yaa emka wáinkiamarum tusa aniasarmiayi.

⁸ Nuyá Pirinnum akupeak “Nuñ werum uchi péñker inintrusrum wáinkiatarum. Tura wáinkiarum ujatatarum. Wisha werin tikishmátuutaj” tímiayi.

⁹⁻¹⁰ Tutai ti neka apach wearmiayi. Tura yaa, yajaya wáinkiamiania nu, tuke eem wémiayi. Tura yaan wáinkiar ti wararsarmiayi. Tura nú yaa uchi pujumia nuñ ejeniarmiayi.

¹¹ Jeá wayawar uchincha ni nukurí Marijjai wáinkiamiai. Tura uchin tikishmatrarmiayi. Nuyá ni kajuntríyan kurincha, mirá kunkuinniasha, chíkich kunkuinniasha súsararmiayi.

¹² Nuyá mesekranam Yus “Irutisajni weerap” tutai chíkich jintianam wakеткиarmiayi.

Ejiptunam pisaamu

¹³ Ti neka apach waketrantai Yusa suntari mesekranam Jusen ujakmiayi. “Nantakim uchi ni nukuríjjai Ejiptu nuñkanam jukim nuñ pujustá. Irutis uchin máataj tusa eaktatui. Tura ukunam ankant ajasmatai ujaktajme” tímiayi.

¹⁴ Tutai Jusé kurat shintiar nú káshik uchincha nukuríjjai Ejiptunam jukimiayi.

¹⁵ Irutis jáatsain nuñ pujusarmiayi. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi:

“Ejiptunmayan winia Uchirun untukmajai.”

Tu áarmiayi.

Irutis uchin máawarat tusa akupkamu

¹⁶ Irutissha ti neka apach nin ananka yajá waketran nekáa ti kajekmiayi. Ti kajek ashí áishmanchin Pirinnumsha tura yantamach pujuarmia nunasha maawaarat tusa akupkamiayi. Ti neka apach ujakmia nuna enentáimias ashí jimiará uwin takakun tura nú uchichin máawarat tusa akupkamiayi.

¹⁷ Nuka Yusnan etserin Jeremías aarmia nu uminkiamiayi. Juna áarmiayi:

¹⁸ “Ramá nuñkanam ti úutainiak uur ajainiawai. Raker ti uutu asa atsankrachminiaiti ni uchirí jákarmatai.” Tu áarmiayi.

¹⁹ Tura Irutis jakamtai Yusa suntari mesekranam Jusen ujakmiayi.

²⁰ “Uchin máataj tiarmia nuka jákarai. Yamaikia ataksha uchi ni nukuríjjai jukim Israer nuñkanam wakеткиiai” tímiayi.

²¹ Tutai Jusé nantaki uchincha nukuríjjai jukin Ejiptunmayá Israer nuñkanam wakеткиiai.

²² Túrasha Irutisa uchirí Arkiráu Jutía nuñkanam uunt akupin ajasan nekáa nuñ wétinian aránkamiayi. Mesekranmasha ujakma asa nuñ pujutsuk Kariréa nuñkanam wémiayi.

²³ Nuñ jeá Nasarét péprunam pujusmiayi. “Nasarétnumiá átatui” Yusnan etserin yaunchu tu etserkamu nuñai uminkiamiayi.

3

Imiakratin Juan atsamunam etserkamiania nu

(Márkus 1.1-8; Rúkas 3.1-9, 15-17; Juan 1.19-28)

¹ Nuyá imiakratin Juan Jutía nuñkanam aents atsamunam etserki támiayi.

² “Enentáim yapajátarum. Tsawant ishichik ajasai Yus juñ akupin ajastin.” Tu etserkamiayi.

³ Nú Juan kan yaunchu Yúsnan etserin Isayas juna áarmiayi:

“Shuar atsamunam aents untsumui. Untsumuk “Atumí enentáí Uunta jintí iwiartur tarum tura naka awajsatarum” tawai.” Tu áarmiayi.

⁴ Nu Juan sha kamiyu ure najantramun entsauyayi. Emenmamkesha nuapeyayi. Tura yutai-tútkriátsnasha chiníjjai yúuyayi.

⁵ Tura Jerusarén péprunmayá shuarsha tura ashí Jutía nuñkanmayá shuarsha Jurtan entsanam matsamiarmia nú shuarsha mash Juáñkan tariarmiayi ni chíchamen anturkatai tusar.

⁶ Tura ni tunaarín paant etserkarmatai Juan Jurtan entsanam imiainiarmiayi.

⁷ Juansha Pariséuncha Satuséuncha imiatti tusa wininian wániak tímiayi “Napia áaniutirmincha, ¿ya atumniasha ti asutniátniunmayá uwempratniuncha ujatmakmarum? tímiayi. Asutiátin tsawant ishichik ajasai.

⁸ Tuma asamtai enentáim yapajíámuítkiuin^ñkia péñker wekaamurmíjjaj paant iniakmas-tarum.

⁹ Atumsha “Iikia Apraám weeitji” tu enentáimtumásairap. Nujaj uwemprashtatrumé. Yus wakerakka ju kayan Apraáman tirañki najankainti, tímiayi.

¹⁰ Numi ajaktinia áintsan^ñ kampuwarín jacha atuttsamuiti. Tura numi péñker nereatsna nuka tsupikia jiniium apeamu ártatui.

¹¹ Wikia aya entsajain^ñ imiajrumé atumi enentáí yapajíáwakrumin. Antsu winia ukuru^ñ winiana nuka péñker awajtamsataj tusa imiantinia áanis tura jía áanis Yusa Wakanin enketramprattarume. Wijjaj nan^ñkaamantu asamtai wikia tsuntsumpruan ni sapatrínkisha atitrachminiaitjai.

¹² Aruusa nerejaj túruinia áintsan^ñ átatui. Awajtiutairín achikiuiti tura nujaj saepen awajittitaiwai. Tura neren péñker ikiustatui, antsu saepenka jiniium apeattawai. Nu jisha tuke kajinchaiti.” Tu tímiayi Juan.

Juan Jesusan imiaimiu amia nu

(Márkus 1.9-11; Rúkas 3.21-22)

¹³ Nuyá Jesus Kariréa nun^ñkanmayá winis Jurtañ entsanam támiayi Juan imiatti tusa.

¹⁴ Juan^ñsha emka nakitiak Jesusan tímiayi “Ame winia imiatminiaitme. Túrutamniaitmeshá žurukamtaí winia tarutnium?” tímiayi.

¹⁵ Tura Jesus tímiayi “Ántsan^ñ asati yamaikia. Núnisrik ashí Yus akupkamu umirkatnui^ñtji.” Tutai Juan iniaisamiayi.

¹⁶ Tura Jesus imiani entsaya jíinkímtai nayaimp' uranmiayi. Tura Yusa Wakaní yámpitsa áintsan^ñ Jesusan tarimiayi. Niisha wáinkíamiayi.

¹⁷ Túramtai nayaimpinmayá Yus chichaak “Júka winia Uchiruiti. Ti aneamuiti. Ti shiir enentáimtajai” tímiayi.

4

Uunt iwianch Jesusan anañkataj tímiania nu

(Márkus 1.12-13; Rúkas 4.1-13)

¹ Nu túrunamtaí Yusa Wakaní Jesusan iwianchjaj nekaptamtiksattsá aents atsamunam jukimiayi.

² Nu^ñ kuarenta (40) tsawant, káshisha tsawajsha yurumsuk pujak tsukarmiayi.

³ Nu^ñ uunt iwianch Jesusan nekapsataj tusa tarí tímiayi “Nekas Yusa Uchirínkiumka ju kaya apatuk najanata.”

⁴ Tutai Jesus tímiayi “Yus-Papiniium áarmaiti:

“Aents aya apatkujain^ñ iwiaku pujuschamniaiti. Antsu Yus táman enentáimtuiniak nekas iwiaku pujusartatui” tawai” tímiayi.

⁵ Tutai uunt iwianch Jerusarén^ñ péprunam jukí Yusa Uunt Jee cháikin^ñ iwiak

⁶ tímiayi “Nekas Yusa Uchirínkiumka juyá akaikim iniaata. Kame Yus-Papiniium áarmaiti: “Yus ni suntarín akatar akúptúrmaktatui. Nawemin kayanam ajiintsun^ñ wen^ñkurmaktatui” tawai” tímiayi.

⁷ Tutai Jesus tímiayi “Núnisan^ñ Yus-Papiniium áarmaiti:

“Ame Úntrum Yus “Nekapsataj” tíip” tawai” tímiayi.

⁸ Ataksha uunt iwianch naint yakí wájakmanum iwiakmiayi tura nuyá ashí nun^ñkanmayá péprun shiira nuna iniaiktusmiayi.

⁹ Tura tímiayi “Winia tikishmatrurakminkia júna mash amastatjai.”

¹⁰ Tutai Jesus tímiayi “Werumta, uunt iwianchi. Yus-Papiniium aarma awai:

“Ame Úntrum Yúsak tikishmatrata tura Niñki shiir awajsata” tawai” tímiayi.

¹¹ Tutai uunt iwianch Jesusan ikiuak wémiayi. Túramtaí Yusa suntari^ñ tariar atsumamurín súsarimiayi.

Jesus Kariréa nun^ñkanam etserkamiania nu

(Márkus 1.14-15; Rúkas 4.14-15)

¹² Juan^ñ sepunam enketui taman antuk Jesus Kariréa nun^ñkanam wémiayi.

¹³ Tura Nasarét péprunam pujutsuk Kapernáum péprunam we pujusmiayi. Kapernáumsha Kariréa antumianka kánmatkaríjn^ñ pujumiayi. Ti yaunchusha Jakupu uchirí Sapurúnsha tura Niptarísha nu nun^ñkanak nu^ñ pujustaitsar achikiaruyayi.

¹⁴ Jesus nuna túramtai yaunchu Yúsnan etserin Isayas aarmia nu uminkiamiayi. Júna áarmiayi:

¹⁵ “Sapurúnsha Niptarísha nayaantsanam tíjiuch^ñ Jurtañ entsa amainini nun^ñkan achikiarmiayi. Nuka Kariréaiti Israer-shuarcha matsatainia nu^ñ.

¹⁶ Nu aents kiritniunam pujuiniayatan ti tsáapninian wáinkiarimiayi. Jákatniunam pujuiniái tsáapin tsáapnirmiyai.” Tu áarmaiti.

¹⁷ Nuyá Jesus étserek tímiayi “Tunaarum enentáimturum enentáim yapajíátarum. Ju nunkanam Yus akupkatin tsawant ishichik ajasai.”

Jesus kuaru aents namakan achinian ni unuiniamurí ajasarat tusa achikmiania nu (Márkus 1.16-20; Rúkas 5.1-11)

¹⁸ Jesus Kariréa antumianka kánmatkarin wesa jimiará áentsun nuámtak yáchinniun wáinkíamiayi. Chikichik Antresauyayi, chikichcha Semunkauyayi. Nu Semun núnisan Pitru náartiniuyayi. Namakan achin ásar namakan nekajai naníkiak yujaarmiayi.

¹⁹ Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamá namak achíarmena núnisan shuaran-éau awajsatjarne.”

²⁰ Tutai ni nekarin ikiukiari Nin nemariarmiayi.

²¹ Nuyá ishichik wésan ataksha nuámtak yachinniun wáinkíamiayi. Jakupu Juanjai mai Sepetéu uchiirí árimiayi. Niisha kanunam enkemsar ni nekarin ni aparíjiai iwiarainiai pujuriarmiayi. Tura Jesus “Nemartusta” tutai

²² nu chichamaik kanuncha tura aparincha ikiukiari Jesusan nemariarmiayi.

Jesus untsurí shuaran jintintiamiania nu (Rúkas 6.17-19)

²³ Ashí Kariréa nunkanam Jesus Israer-shuar iruntainiam etserki wémiayi. Yus ju nunkanam akupkatin chichaman etserkamiayi. Tura untsurí sunkurjai jáinian ashí tsuárimiayi.

²⁴ Ashí Siria nunkanam Jesus tsuákratman nekaawar ashí nánkamas sunkurjai wáitin armia nuna Jesusan tsuarti tusa itiararmiayi. Ashí jaancha, najaimiancha, yajauch wakantrukuncha, wáuruncha, tampemaroncha Jesus tsuárimiayi.

²⁵ Tura untsurí shuar Jesusan nemariarmiayi. Kariréa nunkanmayasha, Tekapuris-numiasha, Jerusarén péprunmayasha, Jutía nunkanmayasha, Jurtan entsa amainiyasha Jesusan nemariarmiayi.

5

Náinnium Jesus etserkamu

¹ Jesus untsurí shuar káunkarun wáiniak náinnium waka nuí pujusmiayi. Tura ni unuiniamurísha taar pujusarmiayi.

² Nuyá Jesus júnis unuiniamiayi.

Warastin ainia nu

(Rúkas 6.20-23)

³ “Ame wakanim atsumamu nekamarum kakaram ajasrum warastarum. Tuma asarum Yus akupeamunam pachiinniuitrame.

⁴ Kúntuts pujarum nu warastarum. Yus atsantamprattarme.

⁵ Péechach enentáimtumarmena nu warastarum. Yus ashí nunkan amastatrume.

⁶ Eseer wekasataj tusa aya kitiamarum nu warastarum. Yus imiktamprattarme.

⁷ Waitnenkratniutiram warastarum. Yus waitnentramprattarme.

⁸ Péñker enentáimniutiram warastarum. Yus wáinkíattarme.

⁹ Chicham iwarin árum nu warastarum. Yusa uchiirí turamartatui.

¹⁰ Péñker túrakrumin yajauch awajtamainiakui warastarum. Yus akupeamunam pachiinniuitrame.

¹¹ Wíi shuar asakrumin katsekramainiakui, itit awajtamainiakui, tura ashí tsanumprutmainiakui warastarum.

¹² Núnisan yaunchu Yúsna etserin armia nunasha túrawarmiayi. Túramtai shiir enentáimkiuram warastarum. Nayaimpiniam ti péñker akinkíattarme’ tímiayi.

Ju nunkanam átum tsáapninia ántsarum tura weeya ántsarum árum

(Márkus 9.50; Rúkas 14.34-35)

¹³ ‘Átumka ju nunkanam wee ana ántsanketrame. Tura wééaitiat jeakchaitkunka míchuiti. ¿Nusha itiuir yuámniak ati? Antsu ántrait. Tuma asantai áá najatai tepet tusar ajapashinkiait’ tímiayi.

¹⁴ ‘Átumka ju nunkanam shiripkia ántsanketrame. Náinniumka pepru úumkachminiaiti.

¹⁵ Núnisan shiripik ekeemakam kajunnum enkeatsme. Antsu yakí sukúatsmek ashí jeanam ana nu paant atí tusam.

¹⁶ Núnisan atumsha Yusjai péñker túramu paant atí. Tura ashí aents nuna iisar niisha Yus Apan shiir awajstartatui’ tímiayi.

Yaunchu akupkamun pachis Jesus unuiniamiania nu

¹⁷ 'Muisais akupkamuncha tura yaunchu Yúsnan etserin etserkarmia nuna ántar awajsat-tawai" turutiirap. Antsu nuna Wikia umiktaj tusan táwitjai.

¹⁸ Nekasan tájarme. Ashí túrunatniua nu amúatsaj̄n nu akupkamu ishichkisha yapá-niáshtatui. Nayaimpisha tura nuṅkasha tuke amúatsaj̄n nu akupkamusha amuukashtatui.

¹⁹ Nu asamtai shuar chikichik akupkamun, yúpichuch ana nunaksha, umirchakka tura chikich shuaran umirkashtinian unuiniakka Yus nekas akupin paant ajastatna nūj nú shuar uunt áhattawai. Antsu ashí shuar akupkamun umiana nu tura chikich shuaran umirkatniun unuiniama nusha Yus nekas akupin paant ajastatna nūj, nu shuarka uunt átatui.

²⁰ Tuma asamtai Yus akupeamunam pachiinkiataj tákumka Pariséuj̄aj̄ nan̄kaamas tura akupkamu jintinniuuj̄aj̄ nan̄kaamas eseera wekasatniuitrume' tímiayi.

Kajeamun pachis Jesus unuiniamiania nu

(Rúkas 12.57-59)

²¹ 'Yaunchu tiniu armia nu ántichukaitrum: "Maṅkartuawairap. Maṅkartana nuka asutniátniuiti" tiniu ármiai.

²² Tura Wisha tájarme: Shuar ni yach̄in aya kajerakka nusha asutniátniuiti. Ni yach̄in kátseka nuka akupniunam j̄unaktiniaiti. Tura ni yach̄in "netsé" tákun̄ka jinium akup-nakminiaiti.'

²³ 'Tuma asamtai Yus susataj tusan wakerakum tura ame yatsum ámin itit enentáimturman enentáimpramka,

²⁴ suamu nūj ikiuakum emka ame yatsum werim niij̄aj̄ iwiarata. Turam waketkim Yus suam nu susata.'

²⁵ 'Shuar úuntnum júramkuinkia jintian̄ wesam niij̄aj̄ iwiarata úuntnum ejetamsaj̄n. Túrachakminkia úuntnum surutmaktatui tura niisha suntarnum surutmaktatui tura sepunam en̄ketmattawai.

²⁶ Tura nekas tajai, nūj en̄kemamka ashí rearchisha akikmachkumka j̄inkisshatme' tímiayi.

Tsanirmatniun pachis Jesus unuiniamiania nu

²⁷ 'Yaunchu tiniu armia nu ántichukaitrum: "Tsanirmawaip."

²⁸ Tura Wisha tájarme: Shuar nuw̄an tsanirmataj tu iiska nūj̄kia ni enentáin tsanirmayi.'

²⁹ 'Tuma asamtai ame j̄imi tunaanum yajauch awajtamkuinkia ukuinkiam yajá ajap-ata. Ashí ame ayashim jinium esaatsaj̄n aya chikichik ayashmi muchitmar̄j̄ emesratin péṅkeraiti.

³⁰ Ame ewejmesha untsuurmetiat tunaanum ajunmakuinkia tsupikiam yajá ajap-ata. Ashí ame ayashim jinium esaatsaj̄n aya chikichik ayashmi muchitmar̄j̄ emesratin péṅkeraiti.'

Nuw̄aj̄apatniun pachis Jesus unuiniamiania nu

(Mateu 19.9; Márkus 10.11-12; Rúkas 16.18)

³¹ 'Núnisan̄ yaunchu tiniu ármiai: "Shuar ni nuar̄in ajapatniun wakera nuka papí najana susati."

³² Tura Wisha tájarme: Shuar ni nuar̄in tsanirmachun ájapeakka nuw̄an tsanirmamtiki-aiti. Tura ajapamuj̄aj̄ nuatnaiyakka nuka tsanirmaiti.'

Jesus aya nekasa nu titinian unuiniamiania nu

³³ 'Núnisan̄ yaunchu tiniu ármiai: "Yusa naar̄j̄ pachisan turattajai" tákumka nekas takamt-suk umiktiniaitme."

³⁴⁻³⁷ Tura Wisha tájarme: Áyatik "Ee" tákumka tura "Atsá" tákumka wáitrutsuk nuke titiá. Támena nu nekas umiktaj takum ame nú arant pachistiniaitkiumka nuka yajauchiiti, iwianchnumiáiti. Ti nekas tajai tusam nayaim pachischatniuitme. Nuka Uunt Yus pujutainti. Nuṅkasha pachischatniuiti Yusa tarimtaij̄j̄ asamtai. Jerusaren̄ péprusha pachis-chatniuiti Uunt Akupin pujutai nūj asamtai. Múukmesha pachischatniuitme. Chikichik intiashkesha pújusha mukusasha awajssachminiaitme. Áyatik nekasa nu páchitsuk titiá.'

Iikkiatniun pachis Jesus unuiniamiania nu

(Rúkas 6.29-30)

³⁸ 'Yaunchu tiniu armia nu ántichukaitrum: "Shuar máanikiar̄ j̄i apujtukka niisha apujtuk-tiniaiti. Tura naj̄ akarkasha ni naj̄sha akarkatniuiti."

³⁹ Tura Wisha tájarme: Yajauch shuar taritirairap. Antsu ame yapimin ijiutmamtai áatú yapimsha tsan̄katkata.

⁴⁰ Tura pushirmin jurutramkitiaj tákuiasha sakurmesha susata.

⁴¹ Tura káarkancha chikichik kirumitruk jurutkitia túramkui ámeke jimiará kirumitru ejeeta.

⁴² Seatmana nu susata. Ikiatmakuisha páchitsuk ikiasta.'

Nemasri aneetniun Jesus unuiniamiania nu
(Rúkas 6.27-28, 32-36)

⁴³ 'Núnisañ tiniu armia nu ántichukaitrum: "Ame shuarum aneeta tura nemasrumka kajerkata."

⁴⁴ Tura Wisha tájarme: Nemasrum aneetarum. Yajauch chichartamna nusha shiir awajsata. Nakitramana nusha nawamkata. Tura katsekramainiana nu tura yajauch awajtamainiana nusha Yus áujtusarta.

⁴⁵ Atumsha nu túrakrum atumí Aparí nayaimpiniam pujana nu túrana áitkiasrumek túarme. Iista, Yus yajauch shuarnumsha péñker shuarnumsha tsáapin awajmatkiatsuk. Núnisañ yumincha yajauch shuar pujuiniamunmasha péñker shuar pujuiniamunmasha yútmuktiksuk.

⁴⁶ Aya atumin anenmainia nuke aneakmesha ¿yaki akirmakat? Yajauch shuarsha nuna túrin ániawai.

⁴⁷ Aya ame yatsumek shiir chichaakmekka ¿warí péñkerak túram? Yus-shuarchasha nuna túrin ániawai.

⁴⁸ Nu asamtai atumí Aparí Yus nayaimpiniam pujana nujai métek ti péñker átiniaitrume.'

6

Péñker túratniun Jesus unuiniamiania nu

¹ 'Ashí íimiainiañ aya shuar iirsarti tusarum Yusna nu takasairap. Tu takaakrumniñkia Yus Apa nayaimpiniam pujana nu penké akirmakchattarme.

² Nu asamtai shuar atuma nu yayiyakmekka ashí shuar ujakairap. Anañkartin ainia nuka iruntainmasha tura pepru jintí wekasasha ashí íimiainiañ shiir túrajai tusar nuna túrin ániawai. Junasha "péñker túrawai" tu enentáimturati tiniu ásar Yus akíatsañ aya tu enentáimturmajaiñ akinkiaruiti, nekas tajai.

³ Antsu átumka atumainia nu yayiyakmekka penké úukam túrata. Chikichkisha nu yaiñman nekaashti.

⁴ Úukam túrakminkia ame Apa Yus uukman wainia nu, nuna akirmaktatui.'

Yus áujtsatniun Jesus unuiniamiania nu
(Rúkas 11.2-4)

⁵ 'Atumsha Yus áujeakrumsha ántar chichamtin ainia núnis áujisairap. Nu shuarka iruntainmasha tura pepru jintísha shuar iirsarti tusa wajakiar Yúsan áujin ániawai. Nekasan tájarme, Yus akíatsañ aya nu iismajaiñ akinkiaruiti.

⁶ Tura ame Yus áujeakmekka ame kuárturmin wayam waiti epenim nuí amek ame Apa Yus áujsa. Nuna ame Apa Yus uuka túram waitma asa akirmaktatui.'

⁷ 'Yus áujeakmesha ántaram esaram áujsaip. Yúsan nékainiatsna nuka "Esaram áujeakuinkia Yus anturtuktatui" tu enentáimainiawai.

⁸ Niijjai métek ajasairap. Átumka seatsrumniñ Yus Apa átum atsumamun nékawai.

⁹ Nu asamtai Yus áujkaram júnis titiniaitrume:

'Aparu Yus, nayaimpiniam pujamna nu, ii Aparíñme. Ame náarmincha shuar ántar pachischarti.

¹⁰ Ashí áentsnum ame akupkatin tsawantrum wari jeati. Ame wakeramuram nayaimpiniam umíkma ana núnisañ ju nuñkanmasha uminkiatí.

¹¹ Aparu, ii yurumkarí ashí tsawant amasta.

¹² Tura winia nemasrun tsañkurajna núnismek, Aparu, winia tunaaru tumashrjsha tsañkurturta.

¹³ Tunáa wakeruktin tsañkatrukaip. Antsu ashí tunaanumiá uwemtikurrta. Tuke ashí áents akupkamniaitme. Núnisam Amesha tuke ti kakarmaitme. Tura ti shíraitme. Tuma asakmin seajme. Nuke atí.'

¹⁴ 'Amesha chíkich shuar yajauch awajtamka nu tsañkureakminkia Yus Apa nayaimpiniam pujana nu amincha tsañkurtamprattawai.

¹⁵ Tura chíkich tsañkureachkumniñkia Yus Apasha ame tunaarmincha tsañkurtamprashtatui.'

Ijiarmatniun pachis Jesus unuiniamiania nu

¹⁶ 'Ijiarmarum Yus áujkurmasha wake mesekrum susuntrairap. Anañkartin shuar chíkich shuar "ijjarmaiti" tu enentáimtusarti tusa tuma ániawai. Nekasan tájame, Yúska akíatsañ aya nujai akikma ániawai.

Yus seakmin suramsattawai

(Rúkas 11.9-13; 6.31)

⁷ ‘Yus seakrumin suramsattawai. E̅akrumka wainkiattarme. “Winiajai” tákurmin awajintiamattarme.

⁸ Seana núnaka su̅iniawai. E̅ana nuka wáiniui. “Winiajai” tuinia núnaka awajiniawai.’

⁹ ‘Ame uchiram apatkun seatmakui ¿kayaash súsaintiam?’

¹⁰ Tura namakan seatmakui ¿napíash súsaintiam?’

¹¹ Nuikia átum yajauchitirmesha atumi uchiřj p̅eñker ana nu tuke súuchakaitrum. Nuna nan̅kaamas nuikia seakrumniñkia atumi Aparj̅ nayaimpiniam pujana nu p̅eñker ana nuna suramsashtatuak.’

¹² ‘Júnaka Muisaissha Yúsnan etserniusha akupenawai: “Chíkich ámin túrutatí tusa wak-erakmekame sha núnismek túratá.” Tu akupenawai.’

Wan̅karam jintiasha tura yupikiach jintiasha

(Rúkas 13.24)

¹³⁻¹⁴ ‘Wan̅karam jintia awai. Wayatniusha yúpichuchiiti. Nujs̅ha untsurj̅ wáiniawai. Tura nusha men̅kakatniunam jeawai. Túras̅ha chíkich jintia awai. Nusha yupikiach asa itirchataiti. Wayatniurj̅sha yupikchiiti. Nujs̅ ishichik wáiniawai. Tura nusha iwiaaku pujustinnium jeawai. Tuma asamtai tuke iwiaaku pujustaj tákurmeka yupipitin jintia achiktarum.’

Nerejai numi nekaatainti

(Rúkas 6.43-44)

¹⁵ ‘Aneartarum. Wáitruiniak “Wi Yúsnan étserjai” tuinia nu írunui. Pátatek murikíua áinis yúpichura áiniawai tura ni enentájn̅ nekas úunt-yawá áinis áiniawai. Pátatek shiir chichaini-awai tura ni enentájn̅ yajauch piakuiti.

¹⁶ Atumsha túramujaj̅ nin nekaatniutrum. Naranmayá shuiya júukchamniaiti. ¿Tsachik-sha kushin̅kiapen nerektatuak?’

¹⁷ Núnisan̅ p̅eñker numia nu tuke p̅eñkeran nereatsuk. Tura yajauch numia nu yajauchin nereatsuk.

¹⁸ P̅eñker numi yajauchin nereatsui. Núnisan̅ yajauch numi p̅eñkeran nereatsui.

¹⁹ Yajauch numi ajakar tsupirar jiniun apeashtinkiait.

²⁰ Tuma asamtai wáitrin̅ ainia nuka túramujaj̅ nekanattawai.’

Ashikia Yus akupeana nu j̅eachartatui

(Rúkas 13.25-27)

²¹ ‘Aya winia Apar̅ nayaimpiniam pujana nuna wakeramurj̅n umirin̅ ainia nuke Yus akupeamunam pachiinkartatui. Chíkichka “Uuntá, Uuntá” turutainiyat̅ nayaimpiniam j̅eachartatui.

²² Amuukatin̅ tsawant̅ jeamtai untsurj̅ turutiartatui “Uuntá, Uuntá, ame náaram pachisar ashí nun̅kanam etserkachmakaj̅’. Ame náarmesha pachisar yajauch wakan̅cha j̅iiki akup-kamji. Tura ame náaram pachisar aentsti tujintiamu túramji” turutiartatui.

²³ Nujs̅ chichainiakui “Werumtarum. Pen̅ke nekachuitj̅arme. Aya yajauchitrum” títiatjai.’

P̅eñker ukurma tura yajauch ukurma

(Rúkas 6.47-49; Márkus 1.22)

²⁴ ‘Shuar winia chichamprun̅ antuk umirkañka nu shuar ti p̅eñker enentáimniuiti. Niisha ju̅ shuarjaj̅ méteketete. J̅e̅a jeamuk kayanam ukurmai.

²⁵ Tura yumi ti yutuk entsa nujan̅kruamai tura nase ti kakaram umpuimiai. Túmain̅ pukukachmai ni ukurmarj̅ kayanam ukuamu asamtai.

²⁶ Tura shuar winia chichamprun̅ antuk umirtukchañka ju̅ shuara núnisan̅ enentáimchaiti. J̅e̅a jeamuk náikminiam ukurmai.

²⁷ Tura yumi yutuk entsa nujan̅kruamai tura nase ti kakaram umpuimiai. Túmakui j̅e̅a mash saanaki iniaamai” tímiayi Jesus.

²⁸ Jesus nuna tinia amukmatai ashí shuar ti enentáimprarmiyai.

²⁹ “Yusa kakarmarj̅ijaj̅ unuitiamtsujik. Israer-shuara jintinniurj̅nkia núnis unuiniainiat-sui” tiarmiayi.

8

Jesus tunamarun tsuarmiania nu

(Márkus 1.40-45; Rúkas 5.12-16)

¹ Jesus muraya támatai untsurj̅ shuar Nin nemariarmiayi.

² Nujs̅ shuar tunamaru Jesusan̅ jearin̅ tikishmatramiyai. Tura tímiayi “Uuntá, wakerak-meka tsuáramniaitme.”

³ Tutai Jesus uwejejai antin “Wakerajai. Penker ajasta” timiayi. Tutai tunamaru ni tunamarmarj penker ajasmiayi.

⁴ Tura Jesus timiayi “Pai, penke etserkaip. Ayatik Israer-patrj iniakmamsam Muisais timia nu susata ashí shuar nekaawarti tusam.”

Jesus suntara uchirin tsuarmiania nu
(Rúkas 7.1-10)

⁵ Jesus Kapernáum péprunam wayamtai apachi suntara kapitiántrj Nin tarimiayi.

⁶ “Uuntá, timiayi. Winia uchir tampemaru jeá tepes ti wait ajáa tepawai” timiayi.

⁷ Jessusha “Ayu, winin tsuartaajai” timiayi.

⁸ Tutai kapitián timiayi “Uuntá, Ame ti nankaamaku asam winia jearuj wayachminiaitme. Ayatik “Penker ajásti” tákumin winia uchir penker ajatrustatui.

⁹ Iista, winiasha akuptuiniatsuk tura wisha suntaran akupenatsjak. Juna “Wetá” takui wéawai. Tura chikichnasha “Winitia” tutai winiawai. Tura takartinian “Ju túratá” tutai umíawai.”

¹⁰ Kapitián nuna tutai Jesus ti enentáimiuk Nin nemarainian timiayi “Nekasan tájarne, Israer-shuar Yúsan timiatrus enentáimtin atsawai.

¹¹ Maa, yajaya untsurj shuar Yus akupeana nuj jeawar Apraámjajsha Isakjajsha Jakupajsha iruntrar yurumáwartatui.

¹² Tura Israer-shuar Yúsnum jeamnia áiniayat aq kiritniunam ajapnawartatui. Nuji ti úutin tura ti wáitsatin átatui.”

¹³ Nuyá Jesus kapitiánin chicharuk “Jeemjin waketkitia. Nekas enentáimtusú asakmin uchiram penker ajatramsattawai” timiayi. Túramtai ni uchirj nu chichamtaik penker ajatsamiayi.

Jesus Pitru tsatsarin tsuármiania nu
(Márkus 1.29-31; Rúkas 4.38-39)

¹⁴ Jesus Pitru jeen we Pitru tsatsarin tsuemujaj jaa tepan wáinkiamiayi.

¹⁵ Tura ni uwejen antinmatai tsuemun michatramiayi. Tura nuwá nantakin ashí ajamsarmiayi.

Jesus untsurj jáinian tsuármiania nu
(Márkus 1.32-34; Rúkas 4.40-41)

¹⁶ Kashi ajasmatai yajauch wakantrukarun Jesusan itiararmiayi. Tura nu yajauch wakanin chikichik chichamjai chicharas jiki akupiarmiayi. Ashí jáiniancha tsuármarmiayi.

¹⁷ Yúsnan etserin Isayas “Ii pimpirmarincha ii sunkurincha jurutramkimiaji” yaunchu timia nu uminkiatu tusa nu túrunamiayi.

Jesus nemarsatin
(Rúkas 9.57-62)

¹⁸ Shuar untsurj Jesusan káutkarmatai “Entsa amain katinjai” timiayi.

¹⁹ Nuji Israer-shuara jintinniurj Jesusan tarj timiayi “Uuntá, Ámin páchitsuk nemarsatniun wakerajme.”

²⁰ Tutai Jesus timiayi “Kujanchmasha ni wáarin takaktsuk. Chinikisha pasunken takakt-suk. Tura Wi Yúsnumiágitiatan tepestiniur atsawai.”

²¹ Nin nemarniusha timiayi “Uunta, emka winia aparun iwiarsan ikiuuttajai.”

²² Tura Jesus “Nemartusta, timiayi. Wakannium jaka ainia nu jakan iwiarsarti” timiayi.

Nasesha entsasha Jesusan umirkarmiania nu
(Márkus 4.35-41; Rúkas 8.22-25)

²³ Nuyá Jesus ni unuiniamurjijaj uunt kanunam enkemámiayi.

²⁴ Nuji nase ti kakaram umpuimtai antumian ti tamparintin ajasmiayi. Tura entsa kanunam yarán piákmiai. Tuma ain Jesus kanunam kanar tepemiayi.

²⁵ Nuyá ni unuiniamurj kúrashim Jesusan ishintiarar tiarmiayi “Uuntá, wayaji. Kakaram ajachkumninikia jakattaji.”

²⁶ Jesus timiayi “¿Urukamtai timiá ashamarum, Yus enentáimtutskesha?” Nuyá wajaki nasencha entsanacha chicharkamiayi. Tutai mash miaaku ajasmiayi.

²⁷ Nuna ísar ni unuiniamurj ti enentáimsarmiayi. Tura tiarmiayi “Jusha ¿warí áentsuit? Nasesha entsasha Nin umirainiatsuk” tiarmiayi.

Jatara nunkanam Jesus yajauch wakantrukun tsuármiania nu
(Márkus 5.1-20; Rúkas 8.26-39)

²⁸ Nuyá Jesus entsá amaini katin Jatara nunkanam jeamiayi. Nuji jimiará shuar yajauch wakantruku tuke iwiartainium pujj Jesusan tariarmiayi. Mai yajauch wakantruku ásar ti kajen ármiai. Tuma asamtai shuar nu jintianam nankaamachu ármiai.

²⁹ Niisha Jesusan wáinkiar kakantar tiarmiayi “¿Warí pujuram iijjaj, Jesusá, Yusa Uchirjá. Tsawant jeatsajin in amukratkataj tusamek taum?” tiarmiayi.

³⁰ Nuñ arant kuchi untsurí shushunmak yujaarmiayi.

³¹ Yajauch wakancha Jesusan seainiak “Jijiki akupkartakmeka kuchiniam wayatin tsankatkartukta” tiarmiayi.

³² Tutai Jesus “Pai, wetarum’ tímiayi. Yajauch wakancha shuara enentáiya jinkiar kuchiniam enkemáwarmiayi. Túramtai kuchi wáurkiar arau utsanamiayi. Nuyá entsá iniankar jakerarmiayi.

³³ Kuchi wáinniusa nuna ashamkar péprunam tseke wéarmiayi. Nuñ jeawar ashí túrunamun etserkarmiayi. Yajauch wakantrukun pénger ajasmancha etserkarmiayi.

³⁴ Nuyá ashí nú peprunmaya shuar Jesusan inkiuntai tusar ashinkiararmiayi. Tura inkiunkar ni nunkeya waketkiti tusar seawarmiayi.

9

Jesus emearun tsuármiania nu

(Márkus 2.1-12; Rúkas 5.17-26)

¹ Nuyá Jesus kanunam enkemar antumian amaini katinmiayi. Tura nuñ ni péprurin Kapernáumnum jeamiayi.

² Nuñ jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásarमतai Jesus jaan tímiayi “Uchirú, kakaram ajasta. Ashí ame tunaarum tsankuramuiti.”

³ Takui Israer-shuara jintinniuri yajauch enentáimprar “Juka Yúsan ti yajauch chicharui” tiarmiayi.

⁴ Tu enentáimainian Jesus nekáa tiarmiayi “¿Urukamtai imiá yajauch enentáimprum.

⁵ Tua imiá yúpichuchit. Shuara tunaarun tsankuratin yúpichuchikiai. Tura emearun “Nantakim wekasata” títin yúpichuchikiai?

⁶ Wi Aents Ajasua núchakaitiai. Ju nunkanam Wi tunaan asakátratnuiitjai. Wátsek, nu nekaatarum tusan juna iniakmastatjai.” Nuna tinia emearun “Wajaktia, tepetairam jukim jeemjin wetá” tímiayi.

⁷ Tutai emearu tsuámar nantaki ni jeen wémiayi.

⁸ Tura nuna ashí aents wáinkiar Yus kakarman shuáran susa asamtai ashamkar Yúsan shiir enentáimtusarmiayi.

Jesus nemartusat tusa Mateun achíawai

(Márkus 2.13-17; Rúkas 5.27-32)

⁹ Nuyá Jesus wémiayi. Nuñ wesa Mateun kuit jútainium pujan wáiniak “Nemartusta” tímiayi. Tutai Mateu nuna ikiuak Jesusan nemarmiayi.

¹⁰ Nú ukunmasha Mateu jeen yurumuk pujaj yajauch armia nu Israer-shuar untsurí káunkar Jesusa unuiniamurijjai irunar yurumiarmiayi.

¹¹ Paríséusha nuna ísar Jesusa unuiniamurin aniasarmiayi “¿Urukamtia atumí Uuntri kuitia achinjaisha tunaarinnuijajsha irunar yuruma?”

¹² Tura Jesus nuna antuk tímiayi “Pénger ainia nuka tsuákratniun atsumainiatsui. Antsu jainia nu tsuákratniun atsumainiawai.

¹³ Werum ju aarma unuimiutarum:

“Murik maam Winia surusum nujaj “máakete” tátsujai. Antsu waitnenkartutain wakerajai,” Yus-Papinium tu áarmaiti.

Wikia “pénkeraitjai” tuínian untsuktaj tusan táchaitjai. Antsu tunáa shuar ni enentáin yapajíáwarat tusan táwitjai” tímiayi.

Ijiamatniun Jesusan aniasarmiania nu

(Márkus 2.18-22; Rúkas 5.33-39)

¹⁴ Nuyá imiakratin Juanka unuiniamurj Jesusan tariar aniasarmiayi. “¿Urukamtai iikia tura Paríséusha ijiammaj’ tura ame unuiniamurmeka ijiamainiatsui?” tiarmiayi.

¹⁵ Jesus ayak tímiayi “Nuatma nampernum ipiaamu ainia nu ¿ajakra uutu wayamniakait? Yamái-nuatu pujakuí úutchamin ániawai. Núnisaj Wi pujakuí ijiamashtin ániawai. Tura tsawant jeattawai nuatua áintsan Wi junaktatjai. Antsu nuikia ijiamawartatui’ tímiayi.

¹⁶ Mamuru pushí jaanakmatái yamaram tarach anujtukchatniuiti. Túramka nijiam yamaram tarach sumpeak mamushan chiníkiá nuna nanakamas jagktatui.

¹⁷ Nijiamanch yamáí nawar nuap najanamú arutnum yaraachminiaiti. Túramka kariák nuap najanamun ijiamatniuiti, nijiamchisha ukaratniuiti, tura nuap najanamusha yajauch ajastiniaiti. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai pénger ártatui.”

Jesus Jairu nawantrıncha tura chikich nuwan̄ncha tsuármiania nu
(Márkus 5.21-43; Rúkas 8.40-56)

¹⁸ Jesus nuna taj̄ Israer-shuara uuntrī Jesusan tarí tikishmatar tímiayi “Winia nawantr jarutkayi, tura Ame winim ewejmij̄aj̄ antintrukaminkia ataksha nantaktiatui.”

¹⁹ Tutai Jesus ni unuiniamur̄ij̄aj̄ wajakiar niij̄aj̄ wearmiayi.

²⁰ Tura jintiá weenaj̄ nuwá tuse (12) uwitin numpá ájapeak wáitias pujú asa Jesusa ukurinī amainian̄ ni pushir̄in antin̄miayi.

²¹ “Áyatik ni pushir̄in antin̄naka péñker ajastatjai” tu enentaimpramiayi.

²² Nuna nekáa Jesus ayantar nuwan̄n tímiayi “Shiir enentáimprata, nawantru. Yus shiir enentáimtusú asam péñker ajasume.” Nu chichamtaik ni jáamur̄i péñker ajasmiayi.

²³ Nuyá Jesus uunta j̄eēn jeamiayi. Tura nūi charaatum ajainiancha tura jakan iwiansatai tusar péeman umpuiniiancha wáiniak

²⁴ tímiayi “Aá j̄iin̄tratarum. Nuwáchikia jákachai antsu aya kanarai.” Penké jakan nékayat túratata nuna neka asa “aya kanarai” tímiayi. Takui aents Nin wishikrarmiayi.

²⁵ Tura nuna ashí j̄iir̄ Jesus jeá wayá nuwáchin uwejn̄um achik iniantkimiayi. Túram nantakmiayi.

²⁶ Nu túramu ashí nu nun̄kanam etsernarmiayi.

Jesus kusurun j̄imiaran tsuármiania nu

²⁷ Nuyá Jesus wéakui j̄imiará shuar j̄īi kusuru untsunki weriarmiayi. “Uuntá, ii Uuntrī Tawit ame weatrum asamtai in waitneñkarturta” tiarmiayi.

²⁸ Jesus jeá wayam̄tai j̄īi kusuru tariarmiayi.

Tura Jesus aniasar “¿J̄una túramniaiti túrutrumek?” tímiayi.

Niisha “Ee, Uunta” tiarmiayi.

²⁹ Tuñiakui Jesus ni j̄īin̄ antinkiar tímiayi “Átum nekas enentáim̄tarmena núnisan̄ túrunati.”

³⁰ Nuj̄aj̄ j̄īi péñker ajasarmiayi. Nuyá Jesus “Etserkairap. Shuar penké nekáwar̄ain̄” tímiayi.

³¹ Támaiatiat j̄īinkiar Jesus túramun ashí nu nun̄kanam etserkarmiayi.

Jesus chichachun péñker awajsamiania nu

³² Nuyá wenaj̄ shuar yajauch wakantru ku chichachun Jesusan itiararmiayi.

³³ Tura Jesus yajauch wakanin̄ j̄īiki awemam̄tai nu chichachu chichakmiayi. Ashí nuna ísar ti enentáim̄prarmiayi. Tura tiarmiayi “Yáunchusha Israer nun̄kanam j̄uj̄aj̄ métek túramu penké atsuwiti.”

³⁴ Antsu Pariséuka yajauch enentáim̄tuiniak tiarmiayi “Nu shuar iwianchi uuntrī kakarmar̄ij̄aj̄ yajauch wakanin̄ j̄īiki akupeawai.”

Jesus shuuran waitnentawai

³⁵ Jesus ashí péprunam we ni iruntair̄in wayá “Yus akupeana nūi en̄kemátarum” tu etsermiayi. Tura ashí nán̄kamas sun̄kur̄j̄aj̄ jáiniancha tsuármiai.

³⁶ Shuuran ísar murik wáinchatia núnis̄ pimpikiar tura kúntuts pujuinia asamtai waitnen̄trarmiayi.

³⁷⁻³⁸ Nuyá ni unuiniamur̄in̄ tímiayi “Jū aents Yus-Chicham ujaktiniait̄ji Yus-shuar ajasarat tusar. Nu takat ti núkap awai tura takarin ishichik ániawai. Nu takatka júuktinia áintsan̄kete. Júuktin̄ tsawant̄ jeam̄tai takau táasmatai takamtikin̄ ujaktin̄ átsuk takau akupkat tusa. Atumsha núnis̄rumek Yus seatarum ni shuar̄in̄ akupak áentsun̄ júukarat tusarum.”

10

Jesus tuse (12) unuiniamur̄in̄ achikmiayi tuke nemarsatniun
(Márkus 3.13-19; Rúkas 6.12-16)

¹ Nuyá Jesus tuse (12) unuiniamur̄in̄ achik Yusa kakarmar̄in̄ súsarmiayi yajauch wakanin̄ shuara enentáiȳa j̄īiki akupkatniun. Núnisan̄ ashí sun̄kur̄j̄aj̄ jáinian̄ tsuáartinian̄ susamiayi.

² Jū ániawai Jesus tuse (12) unuiniamur̄in̄ achikiarmia nu: Emka Semuñ núnisan̄ Pitru náartiniuyayi. Nuyá ni yach̄i Antres. Nuyá nuám̄tak yáchintin̄ Jakupusha Juansha, Sepetéu uchir̄i armia nu.

³ Nuyá Jiripi, Parturumí, Tumas, Mateu. Mateusha kuítian̄ achiniuyayi. Arpeu uchir̄i Jakupusha. Ripiu núnisan̄ Tateu náartiniuyayi.

⁴ Ásump̄i Semun̄sha nuyá Jútas Iskariúti Jesusan ukunam surukmia nu. Nu tuse (12) achikma ármiayi.

Jesus ni unuiniamur̄in̄ etserkarti tusa akupkarmiania nu
(Márkus 6.7-13; Rúkas 9.1-6)

⁵ Nu tuse (12) unuiniamurj̄n Jesu júnis chicharak akupkarmiayi. “Israer-shuarcha matsatmanum weerap. Samaria nuñkanam péprunam weerap.

⁶ Antsu Israer-shuar murikiua áinis Yusaŷj̄yá wáakarú ainia nu weritiarum.

⁷ “Tsawant ishichik ajasai Yus j̄j̄ nuñkanam akupin ajastin” tu etserki wetarum.

⁸ Tunamarusha chíkich sunkurj̄aj̄ jainia nusha tsuarterum. Jakasha iniantkítarum. Yajauch wakancha shuara enentáŷj̄yá j̄j̄iki awematarum. Nu túratin kuitchaj̄aj̄ kakaram susamuitrume, tuma asamtai atumsha ashí ánrarmek túratarum.’

⁹ ‘Kurisha ashí kuitcha jukiirap.

¹⁰ Úyuncha jukiirap. Sapatcha tura ushukrustincha jukiirap. Antsu chikichik pushí jukítarum. Takau asakrumin yurumkan ajampramsartin áiniawai.’

¹¹ ‘Péprunam jearmesha péñker shuar wáinkiarum nuŷ wayarum tuke nuñ pujstarum.

¹² Nu jeanam wayamsha “Ju jea shiir atí” titiá.

¹³ Nekas péñker shuaraitkiun̄ka shiir ajasarti. Antsu nu shuar péñker itiarmachkuñka shiir ajascharti.

¹⁴ Tura náñkamsan̄ atumin awáintiamainiachkuñkia anturtamainiachkuñkia nuyá j̄j̄inkítarum. Nu shuar yajauch ásarmatai j̄j̄inkirum atumí naweyá nuñka japimiarum ikiukítarum. Ni tunaarj̄ aents nekaawarat tusarum túratarum.

¹⁵ Nu shuaran nekapsatin tsawant jeamtaí Yus asutiáshtatuak. Sutum péprunmayá shuara nan̄kaamas Kumura péprunmayá shuarnasha nan̄kaamas Yus asutiáttawai nu shuaran’ tímiayi.

Yajauch awajsatniun ujakmiania nu

¹⁶ ‘Aneartarum. Wisha murik yawanum akupkatniua áintsanak akupeajrume. Tuma asamtai shiir nawamkartin áyatrum aneartarum.

¹⁷ Yajauch shuarj̄aj̄ aneartarum. Akupniunam juramkiartatui. Israer-shuar iruntainiam asutiamawartatui.

¹⁸ Wíi shuar asakrumin uuntnumsha tura nuyá akupniunmasha juramkiartatui. Núnisrum akupniuncha tura Israer-shuarchancha winia chichamur ujaktatrume.

¹⁹ Tura akupniunam surutmakakrumnisha wariniak títiáj tu enentáimprairap. Nuŷ uuntj̄aj̄ chichaakrumin Yus títinian j̄j̄intinramattarme.

²⁰ Nuñkia átum enentáimmiáj̄aj̄ chichaschattarme antsu atumí Aparj̄ Yusa Wakanj̄ atumin chichamtikramsattarme.’

²¹ ‘Shuar ni yachj̄incha máawarti tusa suruktatui. Apasha ni uchirj̄in surukartatui. Uchisha ni aparj̄in máawarti tusa surukartatui.

²² Tura Wíi shuar asakrumin mash muŷj̄ramkartatui. Tura tuke katsuntea nu uwemprat-tawai.

²³ Chikichik péprunam yajauch awajtamainiakui chíkich péprunam pisartarum. Wi Aents Ajasuitj̄aj̄. Tuma asan nekasan tájarme, átum Israer-shuar mashi ujatsrumniñ wantinkiat-tajaj̄.’

²⁴ ‘Unuiniamuka nin unuiniana nuna nan̄kaamaschaiti. Takarniusha ni uuntrj̄ nan̄kaamaschaiti.

²⁵ Unuiniamuka nin unuinia nuj̄aj̄ métek ajaska maak. Takarniusha ni úuntrj̄j̄aj̄ métek ajaska maak. Wátsek, Winia atumí úuntrj̄in “Iwianchí uuntrj̄” túrutainiakui atumniasha nuna nan̄kaamas yajauch turamtatui.’

Yúsak ashamkatniuiti

(Rúkas 12.2-9)

²⁶ ‘Tuma asamtai aentska ashamkairap. Ashí uŷkma nu paant nekanattawai.

²⁷ Ishishmasan kiritniunam ujaajrumna nu, tsawáŷ kakantrarum etserkatarum.

²⁸ Aya ayashin main ainia nu ashamkairap. Wakanin máachmin áiniawai. Antsu wakan-niasha ayashniasha mai j̄j̄inium emesarmnia asamtaí Yus ashamkatarum.’

²⁹ ‘Jimiará chíñki peñké ishichik kuitj̄aj̄ surukmin áiniawai. Túmaitiat Yus tsan̄kateachkuñkia nuñká jaka iniainiatsui.

³⁰ Ame intiashmisha mash nekapmarmaiti.

³¹ Nu asamtaí jákatin ashamkairap. Yusj̄aj̄ átumka ti untsurj̄ chíñkij̄j̄aj̄ nan̄kaamas péñkerchakaitrum.’

Jesus natsantrashtiniaiti

(Rúkas 12.8-9)

³² ‘Ashí shuar ashí íimiainiain̄ Winia natsantruiniatsna núnaka Winia Apar yakí nayaimpiniam pujana nuŷ natsantrashattaj̄aj̄.

³³ Antsu shuar íimiainiain̄ Winia natsantra núnaka Wisha yakí nayaimpiniam winia Apar pujana nuŷ natsantrattaj̄aj̄.’

Jesusa chichamejaj shuar akannartatui
(Rúkas 12.51-53; 14.26-27)

³⁴ ‘Ashí shuar nawamnaikiar shiir pujusarat tusan ju nunkanam táchaitjai. Nuna túrat tusarum enentáimturairap. Antsu wi tamaajaj shuar péñker ajasarmatai yajauch shuar nin nakitrartatui.

³⁵ Shuar ni aparín nakitrattawai. Nuwasha nukurín nakitrattawai. Najatísha tsatsarín nakitrattawai.

³⁶ Tuma asa shuar ni shuarjjaj nemasrintin ártatui.’

³⁷ ‘Shuar ni aparíncha nukuríncha Wijjaj nankaamas aneakka Wíi shuar áchamniaiti. Núnisan ni uchiríncha nawantríncha nankaamas aneakka Wíi shuar áchamniaiti.

³⁸ Tura ashí wáitsatniun surimiatsuk ni krúsrín yanaki juki nemartachkunka Wíi shuar áchamniaiti.

³⁹ Aya jú nunkanam péñker pujustaj tana nu ni iwiaakmarín emesrattawai. Tura Winia anentu asa jú nunkanam péñker pujustinian páchiatsna nu tuke shiir pujustatui.’

Akinkiatin
(Márkus 9.41)

⁴⁰ ‘Atumin itiaarma nuka Winia itiaaru. Tura itiaarea nuka Winia akuptukmia nunasha itiaawai.

⁴¹ Yúsnan etserniuncha Yúsnumia winiá asamtai itiaakka etserin akínkiáttana nujaj métek akínkiáttawai. Péñker shuárnasha péñker asamtai itiaakka péñker shuar akínkiáttana nujaj métek akínkiáttawai niisha.

⁴² Uchíncha Wíi shuar asamtai entsá michan shikirak súsanpa imiá nekas nusha akínkiáttawai.’ Tu tímiayi Jesus.

11

Imiakratin Juan Jesusaj shuaran akupkamina nu
(Rúkas 7.18-35)

¹ Tura tuse (12) unuiniamurín Jesus tinia akupkar Niisha nú nunka péprunam we Yus-Chichaman jintiak etserkamiayi.

² Tura Juan sepunam enkemas Kristu túramun antukmiayi. Antuk ni unuiniamurín jímiarun Jesusaj akupkamiayi.

³ Tura Jesusan aniasarmiayi “¿Nekas ame Kristu Yus akupkamu tátinia nukaitiam. Kame chikichak nákastataj?”

⁴ Tutai Jesus tímiayi “Waketkirum ashí ántarmena nusha wáintrumna nusha Juan ujaktarum.

⁵ Kusurusha wáinmainiawai. Shutuapsha wekainiawai. Tunamarusha péñker ajainiawai. Empekarusha ántuiniawai. Jákarusha nantainiawai. Tura kuítrinchamasha uwempratin chicham ujakmaiti. Nu ujaktarum.

⁶ Túrasha yawetsuk Winia tuke shiir enentáimturna nú shuar shiir átatui.” Jesus nuna tutai waketkiarmiayi.

⁷ Waketkiarmatai shuar káunkarun Jesus Juánkan pachis áujmatmiayi. “Shuar atsamunmasha ¿warí werimiarum? Pintiu nase umpúam atúu we juní we ajana nuka ¿ístai tusarumek wémarum? Kame Juanška nú shuarchaiti.

⁸ Nuikia ¿warí werimiarum. Shuar péñker iwiarmampra ístai tusarmek wémarum? Warí, péñker iwiarmampraka uunta jeen pujuiniatsuk.

⁹ Nuikia ¿warí werimiarum. Yúsnan etserniuk werimiarum? Maa, túrachmashiuram. Túrasha Juanška yaunchu etserniu nankaamas enentáimtustiniati.

¹⁰ Yaunchu Yus-Papinium áarmaiti:
“Winia akatramurun amijni emka akupeajai ame jintimin iwiarat tusa.”
Juan nu akatramuítai.

¹¹ Nekasan tájarme, shuar imiakratin Juanjaj nankaamas uunt atsuwiti. Tuma ain Yus akupeamunam pachiinia nu shuarnaka, nekasmianchancha, Juanjaj nankaamas shiir enentáimtustiniati. Tuma asamtai nuj pachiinkiatin enentáimpratarum.’

¹² ‘Kakaram shuarka imiakratin Juan támia nú tsawantnumia Yus akupeamunam ti pachiinkiatniun wakeruiniak kakarmajaj pachiinkiatniun enentáimiainiawai.

¹³ Juan pujumia nú yaunchu ashí Yúsnan etserin armia nusha tura Muisais akupkamusha Yus akupin ajastinian etserkarmiayi.

¹⁴ Yaunchu Yúsnan etserin “Kristu táatsain Eriás tátiniaiti” tímiayi. Tura nekaatin wakerakrumka Juan nu Eriásaiti.

¹⁵ Antuktin jeakrumka nekaatarum.’

¹⁶ Ju áentsnasha ¿warijjai métek nakumkataj? Uchijjai métek áiniawai. Ni ajjjai iruntrar nakurustaj táyatan túniawai

¹⁷ “Námpera áinis nakurustaitсар peem umpuarji túrasha jantsemáchurme. Nuyá iwariarsatniua áinis nakurustaitсар iwiarekur kantamtai kantamáji túrasha átum úutcharme.”

¹⁸ Atumsha núnisaitrume. Kame Juan núkap yurumtsuk nijiamchincha úmutsuk wekaimiayi. Túmakui átumka “Yajauch wakanrukuiti” tímiarme.

¹⁹ Nuyá Wisha Aents Ajasu támajai. Tura yurumeakui tura úmakui “Ti yurumin ti nampenaiti. Ashí yajauch shuaran amikrinti” túrutrume. Wátsek, wi túramujai Yus nekas nékamu nekanattawai.”

Yajauch péprunmayá shuaran chicharkamiania nu
(Rúkas 10.13-15)

²⁰ Nuyá tujintiamun túramiania nú peprunmayá shuaran pachis Jesus chicharkamiayi. Tuma aij nuyá shuar ní enentáin yapajjácharu asamtai juna chicharkamiayi.

²¹ “Wáinkiatá, Kurasin péprunmayá tiram, Petsaitia péprunmayá tirmesha. Nuí aents tujintiamun ti túraitjai. Tiru péprunmasha Setun péprunmasha nu tujintiamu túramuitkiunpia yanchu ní enentáin yapajjáwaraayi. Túrawar kúntuts pujutai pushín entsarar yun kunim ajakiaráayi.

²² Tura Wisha tájarne, nekapsatin tsawant jeamtai Yus atumin tí asuttiamattarme. Tirunmayá shuaran nankaamas tura Setunnumia shuaran nankaamas asuttiamattarme.’

²³ “Tura atumsha Kapernáum péprunmayá tirmesha, ashí nankaamas nankaamantu ajastin enentáimtumarme. Antsu ashí emestamprattatui. Atumijn aents tujintiamun ti túraitjai. Sutuma péprunam nu tujintiamu túramuitkiunpia nu pepru yamaisha tuke áayi.

²⁴ Tura Wisha tájarne, nekapsatin tsawant jeamtai Yus Sutumanmayá shuar nankaamas atumin asuttiamattarme.”

“Winin ayampratarum” tímiania nu
(Rúkas 10.21-22)

²⁵ Nuyá Jesus tímiayi “Shiir enentáimtajme, Aparu, ashí nayaimpisha nunkaasha Úuntrinme. Tuma asam Ame túram nu ti unuimiaru enentáimtumainia nuyá úukuitme antsu uchichia áinis nankaamantu enentáimtumainiatsna nú shuar paant awajtusuitme.

²⁶ Ame, Aparu, núnis wakera asam túraitme.’

²⁷ “Winia Apar ashí surusuiti. Wisha ní Uchirí asamtai Winia nékarui. Tura chích Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai.

²⁸ Ashí pimpikniutirmesha itiurchat pujarmena nusha Winí winitiarum. Túrakrumninka ayamtikrattajrume.

²⁹ Wi kajechu asa tura péejchach enentáimin asamtai Winí winirum unuimiarum. Winia chíchamur ántakrum umiakrumninka atumí wakaní ayamprattawai.

³⁰ Atumin akuptaj nú túratin yúpichuchiiti. Káarkasha Wi súajrumna nu wampuchiiti” tímiayi Jesus.

12

Jesusa unuiniamurí ayampratin tsawantaj trikiu neren pakaarmiania nu
(Márkus 2.23-28; Rúkas 6.1-5)

¹ Nuyá Jesus ayampratin tsawantaj ajanman ajapenin nankaamamiayi. Ni unuiniamurisha tsukarar trikiu neren majasar yukí wekasarmiyai.

² Pariséu shuarsha nuna wáinkiar Jesusan aniasarmiyai “Iista, ame unuiniamuram ayampratin tsawantaj túratin surimkiamua nuna túruiniawai.”

³ Tutai Jesus tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum.

⁴ Yusa Uunt Jeen wayá Yus iniaktusma tantan yuámiayi. Nu tantasha aya Israerpatrik yúatin asamtai Tawitniasha tura ní nemarín ana nunasha suritkiamuyayi. Túmaín yúawarmiayi.

⁵ Muisais akupkamunam aarma nu áujsachukaitrum. Israerpatrikia ayampratin tsawantaj takainiyatan nusha tunaachuiti.

⁶ Nekas tájarne, yamá Yusa Jeen enentáimtustinia nuna nankaamas Wíniaka Aents Ajasuitjiana nu, nekas enentáimtursatniuitrume.

⁷ Yus-Papinium tawai:

“Murik maam Winia surusum nujai “maakete” tátsujai. Antsu waitnenkartutain wakera-jai.”

Nu chícham nekas nékaitkiurmeka yamá túrarmena núnisrum tunáa túrachu ánrarum súmamtikiachainrume.

⁸ Wi Aents Ajasu asan ayampratin tsawantan Úuntrintjai.”

*Shuara uwejé jakan Jesus tsuármiania nu
(Márkus 3.1-6; Rúkas 6.6-11)*

⁹ Jesus nuyá wé Israer-shuar iruntainiam wayamiayi.

¹⁰ Nuǰ shuar ámiayi ni uwejé jaka. Tura Jesusan ántar nekapsatai tusa wakeruinia ásar aniiniak “¿Ayampratin tsawantaj jaa shuar tsuarminkiaiti?” tiarmiayi.

¹¹ Tutai Jesus tímiayi “Atumsha atumí murikrǰ ayampratin tsawantaj waǰanam akaiki iniamtai jusatai tusarum wéchaintrupash.

¹² Antsu shuarka murikjaj nankaamaschakait. Tuma asantai ayampratin tsawantajsha péñker ana nu túramniaiti.”

¹³ Tínia iniaias áishmanǰan uwejé jakan tímiayi “Uwejém takuitia.” Tutai uwejé takuǰ chikich uwejéjaj métek péñker ajasmiaiyi.

¹⁴ Nuna túramtai Pariséu shuarsha aǰ jǰinkiar Jesus itiurak máawaintajǰ tusar chichaman najatiarmiayi.

Isayas Jesusnan tímia nu uminkiamiayi

¹⁵ Jesus nin máatniun nekaama nuyá jǰinkimiayi tura wéakui untsurǰ shuar nemariarmiayi. Untsurǰ jǰainiancha tsuámiayi.

¹⁶ Tsuar “etserkairap” tínia akupiararmiayi.

¹⁷ Yaunchu Yúsnan etserin Isayas tímia nu uminkiaiti tusa túrunamiayi. Niisha juna áarmiayi:

¹⁸ “Jǰúiti Wi achikmaj nu. Niisha Wi tájana nuna umin asantai ti aneakun Niijǰaj waraajai. Winia Wakanru kakarmarǰn takamtsuk susattajai. Túramtai winia uwempratin chichamprun ashí Israercha nunkanmasha etserkattawai.

¹⁹ Jiakchattawai tura kakaram chichaschattawai. Winia anturtukarat tusa péprunam weak untsukchartatui.

²⁰ Akupin ajatsuk shuar pintiu punua núnis pimpiru ainia nuna kúpitsuk yáǰntatui. Núnisǰn shuar jǰi yama ikiapámu áinis kakarmachu ainia nuna ikiajniatsuk ikiakártatui. Tura ashí nupetak ti péñker kakaram akupin ajastatui.

²¹ Tura Israer-shuarchasha Nin nekas enentáimtusartatui.”

*Jesusan “iwianchi uuntri kakarmarǰjaj túrawai” tiarmiania nu
(Márkus 3.19-30; Rúkas 11.14-23; 12.10)*

²² Nuyá Jesusan shuar yajauch wakantrukun itiararmiayi. Nu shuar jǰi kusurusha chichachusha ámiayi. Tura Jesus tsuármatai paant ímsamiayi tura chichakmiayi.

²³ Nuna wáinkiar shuar shiir enentáimprar tiarmiayi “¿Tawitia uchirǰ pampanku inianǰnamu uwemtikkiartin tátnia nuáshit?”

²⁴ Tura Pariséu shuarsha nuna antukar yajauch enentáimtuiniak tiarmiayi “Juka iwianchi kapitiántrǰn Pirsepún umirniuiti. Tuma asa nuna kakarmarǰjaj yajauch wakanin jǰiki akupeawai.”

²⁵ Jesus tu enentáimainian neka asa tímiayi “Nú nunkanmaya shuar nuamtak kajernaiyakuǰnkia nú nunka wari meserchattawak. Núnisǰn nuamtak shuar ní shuarǰjaj mánainiakka amunaikchartatuak.

²⁶ Núnisǰn íwianch nuamtak jǰiki akupnainiakka máanaikiar wárik amuukashtatuak.

²⁷ Kame Wi Pirsepú iwianchi kakarmarǰjaj iwianchin jǰiki akupeakuǰnkia atumí uchirǰsha ¿yana kakarmarǰjajǰn jǰiki akupena? Ni túramurǰjaj átum awajirma neka-matarum.

²⁸ Wi Yusa Wakaní kakarmarǰjaj yajauch wakanin jǰiki akupea asantai atumsha Yusa akupeamurǰ atumǰjǰn jeartamarmena nu nekaatniuitrume.”

²⁹ ‘Iista. Shuar kakaram shuara kuǰtrǰn kasarkatin wakerakka emka kakarman jinǰkiá aya túraǰ ni jǰen wayá kasarkamniaiti. Wi íwianchin jǰikniajaj uunt iwianch nupetkamua nu nekaamniaiti.’

³⁰ ‘Wǰjaj tsanǰn pujatsna nuka winia nemasruiti. Núnisǰn Winia yáintsuna nu aya itiuurchat nájateawai.’

³¹ ‘Tuma asantai tájarme, Ashí shuar tunáa túruinia nusha yajauch chichainia nusha tsǰnkuratin awai. Antsu Yusa Wakanǰn yajauch chicharin ainia nuka tsǰnkurashstiniaiti.

³² Winisha Aents Ajasuitǰjana nuna yajauch chichartuinia nú shuarsha tsǰnkuramniaiti. Tura Yusa Wakanǰn yajauch áujmataina nuka péñké tsǰnkurachminiaiti. Ju nunkanmasha tura ukunmasha tsǰnkurnarchattawai’ tímiayi.

*Ni nerejaj numi nekaamniaiti
(Rúkas 6.43-45)*

³³ Yutai numi péñkeran nereawai. Tseas numisha yajauchin nereawai. Ni nerejaj numi nekaamniaiti. Núniskete atumjaj.

³⁴ Tseas wenunniutirmesha, ¿atumsha ititurak imiá yajauchitirmesha péñker chichamsha chichastarum? Shuar ni enentáin enentáimna nuna chichaawiti.

³⁵ Péñker shuar péñker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti.

³⁶ Tura Wisha tájarme, nekapsatin tsawant jeamtai ashí enentáimtsuk chichakma nuna Yúsán paant ujakartatui.

³⁷ Iis, ame chichammijaj nekanattarme. Péñker chichakuitkiunka sumamashtatme. Tura péñker chichakchaitkiunka sumamattame.”

*Nu shuar yajauch ásar iniakmamun seawarmiania nu
(Márkus 8.12; Rúkas 11.29-32)*

³⁸ Pariséu shuarsha Israer-shuara jintinniurjsha Jesusan chicharuk “Uuntá, ame Yúsaiyáitjai tusam nayaimpinmaya kakarmajaj iniakmamun túrata, iisha wáinkiatiai” tiarmiayi.

³⁹ Tutai Jesus tímiayi “Shuar yajauch tura Yúsán enentáimtachu ásar nayaimpinmaya iniakmamun seainiawai. Tuma asamtai, áyatik yaunchu Junas túrunamu iniakmastiniiai.

⁴⁰ Junas menaintiu kashi menaintiu tsawantcha namaka ampujen enkemsamiayi. Núnisnak Wí, Aents Ajasu asan, menaintiu kashi menaintiu tsawantcha nuñká jakan tepestatjai.

⁴¹ Júnás Níniwi péprunmaya shuaran Yus-Chichaman etserkamtai nu shuar ni tunaarjñ enentáimtsar ni enentáin yapajíawarmiayi. Tura juí yamá Junasa nankaamas etserin pujawai. Wiitjai nusha, tura anturkachuítrome. Tuma asamtai nekapsatin tsawant jeamtai Níniwinmaya shuar juyá shuaran súmamtikiawartatui.”

⁴² Yaunchu nuwá yajaya shuaran únt akupniurjyayi. Nu nuwá Sarumún ti neka asamtai nin anturkataj tusa tarimiayi. Tura juí yamá Sarumúnjaj nankaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran súmamtikiawartatui’ tímiayi.

*Yajauch wakan jíiki akupkamuitiat wáketna nu
(Rúkas 11.24-26)*

⁴³ Shuara enentáiya yajauch wakan jíinkin yumi penké yútatsna nuj wéawai. Tura nuj péñker pujustinian wáinkiach ataksha waketkitniun enentáimiu.

⁴⁴ “Wí jíinkimij nuj waketkittijai” tawai. Tura waketki shuara enentáin péñker iwiaramu tura ankantán wáiniak

⁴⁵ ni aín siati (7) iwianchin níijaj nankaamas yajauchin itíá shuara enentáin enkemáwartatui. Túrunamtai nu shuar nuiki núna nankaamas yajauch ajastatui. Núnisan juyá shuar túrunawartatui’ tímiayi Jesus.

*Jesusa yachí, Jesusa nukurí
(Márkus 3.31-35; Rúkas 8.19-21)*

⁴⁶ Jesus nu shuarjaj tuke chichaak pujaj ni nukurjsha ni yachjsha tariarmiayi. Tura aá wajasar Níijaj chichastaj tiarmiayi.

⁴⁷ Túramtai Jesusan ujakar “Ame nukusha yatsumsha aá wajasar chichastaj turamainiawai” tiarmiayi.

⁴⁸ Chichaman ujakmia nuna Jesus tímiayi “¿Ya ainia winia nukursha winia yatsursha?”

⁴⁹ Nuyá ni unuiniamurjñ iniakmas tímiayi “Ju áiniawai winia nukur tura winia yatsursha.

⁵⁰ Ashí shuar winia Apar nayaimpiniam pujana nu wakeramun umiinia nu winia yatsur winia umar winia nukur áiniawai” tímiayi.

13

Untsurí métek-taku chichamjaj Jesus unuiniamiania nu

*(1) Atsaamin atsaampramiayi
(Márkus 4.1-9; Rúkas 8.4-8)*

¹ Nu tsawantaj Jesus ni jeeya jíinkin antumianka kánmatkarjñ pujusmiayi.

² Tura ti untsurj shuar káunkarmatai kanunam enkemar nuj pujusmiayi. Shuarsha antumianka kánmatkarjñ pujusarmiayi.

³ Túrunawarmatai untsurj métek-taku chichamjaj unuiniamiayi. “Atsaamin atsaamprataj tusa jíinkimiai, tímiayi.

⁴ Atsaamki wesa arakrj jintia písunmasha iniaarmai. Tura chiniki tariar yuawarmai.

⁵ Chikichcha kaya írunmanum iniaarmai. Nuñka ishichik asamtai wárik tsapainiarmai.

⁶ Tura nantu etsantramtai péñker kankáprúrcharu asa sukuam káararmai.

⁷ Chikichcha jaŋkí nupanam iniaarmai. Tura jaŋki wárik tsakar nupetak ajakramai.

⁸ Chikichcha péŋker nuŋkanam iniaarmai. Nusha péŋker nerekar chíkich siansha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai.

⁹ Kuishim ákuŋkia antuktarum” tímiayi.

“¿Urukantai aya métek-taku chichamjai jintiam?” aniasarmiania nu (Márkus 4.10-12; Rúkas 8.9-10)

¹⁰ Nuyá ni unuiniamurin Jesusan taruntar aniiniak “¿Urukantai aya métek-taku chichamjai ju shuar unuiniam?” tiarmiayi.

¹¹ Tutai Jesus tímiayi “Urukuk ju nuŋkanam Yus akupin ati, nuka yaunchu nekanach-miayi. Tura yamaikia Yus ashí nuna atumin paant iniakturmawai. Antsu chíkich nuna nekaachmin ániawai.

¹² Kame núkap takakna nu shuar nú nukap patatnaktatui tura ti núkap takustatui. Antsu ishichik takakna nuka ishichik takakuk juruktiniaiti. Núnisan Yusna ti nekarum nú núkapka yúpichuch nekaattarme. Tura ishichik nekarum wárik kajinmatkittiarame.

¹³ Tuma asamtai aya métek-taku chichamjai unuiniajai. Nú shuarka íniayatan wáiniiniatsui. Ántuiniayatan ántachua núnis nekainiatsui. Túmainiak Winia nekarainiatsui.

¹⁴ Nujaj yaunchu Yúsnan etserin Isayas timia nu uminkiaiti. Juna tímiayi:

“Ti ántayatrur anturkashtatrome. Wáiniatrumsha nekaashtatrome.

¹⁵ Ju shuara enentái kátsuram ásar péŋkera nuna nakitiainiawai. Nu asamtai péŋker ántuiniatsui, jjiisha pusá áinis ániawai. Túrachkuŋka paant nekaawarainti, tura nekas antukarainti, tura enentájjaj enentáimias Winia tsuarat tusa tarutiarainti.”

¹⁶ Tura átumka paant waŋkia asarum péŋker anta asarum shíiraitrume.

¹⁷ Nekasan tájarme, untsurj Yúsnan etserniusha tura péŋker shuarsha átum yamá wáintrum nuna wáinkiatniun wakeruiniayatan wáinkiacharmiaiyi. Tura átum yamá ántarme nuna antuktinian wakeruiniayatan antukcharmiaiyi’ tímiayi.

Jesus atsaampramu chichaman paant jintintiamiania nu (Márkus 4.13-20; Rúkas 8.11-15)

¹⁸ Ayu, antuktarum. Atsaampramu chichaman paant jintintiatjarme.

¹⁹ Árak jintia písunam iniaararma nuka shuar Yus-Chichaman ántayatan ni enentájn ikuiniatsna núiti. Tura íwianch nu Yus-Chicham ni enentájn atsaampramu áinis antukman kajinmatkiawai.

²⁰ Árak kaya írunmanum iniaarma nuka shuar Yus-Chichaman antuk waras umirainia núiti.

²¹ Tura núkap kaŋkaprurcharu ásar katsuiniatsui. Antsu itiuichatan ínkiuiniak tura Yus-Chichaman wakeruiniá ásarmatai chíkich yajauch áujmatam wárik iniaisar ikuiniawai.

²² Árak jaŋkí nupanam iniaarma nuka shuar Yus-Chichaman antuk emka umirniua núiti. Tura ju nuŋkanam írunna nuna tuke páchiniak ni kuítríncha ti enentáimtuinia ásarmatai ashí Yus-Chichaman enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentájn takasma atsawai.

²³ Tura árak péŋker nuŋkanam iniaarma nuka shuar Yus-Chichaman antuk péŋker umirainia núiti. Tura péŋker nerenawai. Chíkich siaŋ (100) nerekarma núnis chikichcha sesenta (60) nerekarma núnis chikichcha trainta (30) nerekarma núnis ániawai” tímiayi Jesus.

(2) Yajauch nupá trikiunam atsaamkamau

²⁴ Jesus ataksha ju métek-taku chichaman áujmatsamiayi. “Shuar Yus akupeamunam pachiŋkiartin júnisaiti. Shuar péŋker arakan, trikiun ni nuŋken araamai.

²⁵ Tura ashí kanararmatai nemasrj kashi taa trikiu arakmanum yajauch nupan aratak ikuikmiai.

²⁶ Trikiu tsapakar nereakui nuyá yajauch nupasha nusháa nereku asa ti paant ajasmai.

²⁷ Nuna ísar takainia nu ni úmtrin weri tiarmai “Uunta, ¿péŋker arak araachmakam. Itiura juŋsha yajauch nupasha tsapakuit?”’

²⁸ Tutai nérentin timiai “Winia nemasur arakuiti.”’

“Takui ni takarniurj tiarmai “¿Yajauch nupan uwerat tusam wakeramek?”’

²⁹ Tutai timiai “Atsá, uwerairap. Yajauch nupá uweaj tukamarum trikiu uweniirum.

³⁰ Iniaisatarum. Antsu métek tsakakti. Júuktin tsawant jeamtai winia takartinian emka yajauch nupan uwer irumar jinkiawarat tusan akupkartatjai. Tura áesawartatui. Tura trikiu neren júukar péŋker ikuisarar tusan akupkartatjai” timiai” tímiayi Jesus.

*(3) Mustasa jin̄kiái**(Márkus 4.30-32; Rúkas 13.18-19)*

³¹ Jesus ataksha métek-taku chichaman áujmatsamiayi. “Shuar Yus akupeamunam pachiinkiertin mustasa jin̄kiáiya áintsan̄kete. Shuar péñker nun̄ken araamai.

³² Mustasa jin̄kiáikia imiá uchichiitiat tsapái tsakaakka ashí numichijjái nan̄kaamas uunt ajawai. Ti uunt asantai chin̄ki ni kanawen pasun̄mainiawai” tímiayi Jesus.

*(4) Karin en̄ketatin**(Rúkas 13.20-21)*

³³ Núnisan̄ chikich métek-taku chichaman áujmatsamiayi. “Shuar Yus akupeamunam pachiinkiertin karinia áintsan̄kete. Nuwá nijiamchiniam karinia en̄kea mashí páchimiawai. Tura nu mash karim̄tikiawai” tímiayi.

*Jesus aya métek-taku chichamjain̄ jintintiamiania nu**(Márkus 4.33-34)*

³⁴⁻³⁵ Ashí nuna Jesus métek-taku chichamjain̄ áujmatsamiayi. Yaunchu Yúsnan etserin timia nu uminkiatí tusa túramiayi. Etserin juna áarmiayi:

“Métek-taku chichamjain̄ áujmattiatjai. Yámankam̄taiknumiá nékashtain̄ etserkattajai” tu áarmiayi.

Nu asantai aya métek-taku chichamjain̄ áujmatmiayi Jesus.

Jesus yajauch nupá tr̄kiunam atsamkamun paant awajsamiania nu

³⁶ Nuyá shuaran ikiukin Jesus jeá támiayi. Túramtai ni unuiniamurj̄ tariar “Yajauch nupá áujmatmena nu paant awajsata” tiarmiayi.

³⁷ Tutaí Jesus tímiayi “Wi Aents Ajasuit̄jai. Wi péñker arakan atsaamkaitjai.

³⁸ Ashí nun̄ka aja áintsaiti. Péñker jin̄kiái Yus-shuaran Yus akupea nuna nakumeawai. Yajauch nupá iwianchna ainia nuna nakumeawai.

³⁹ Tura íwianch ii nemasr̄i asa yajauch nupán arakuiti. Tura nun̄ka amúamunam Yusa suntarj̄ arakan júuktinia áintsan̄ shuaran yaruaktatui.

⁴⁰ Yajauch nupá irur jin̄ium áesatniua áanis nun̄ka amúamunam túrunattawai.

⁴¹⁻⁴² Nūj Wi Aents Ajasu asan winia suntarun akupkattajai. Tura ashí tunaan túruinia nunasha tura chikichan tunaanum útsuinia nunasha mash irurar jin̄ium apeawartatui. Nūjsha ti úutin ti wáitsatniusha átatui.

⁴³ Antsu péñker túruinia nuka ti shiir wincha ajaras ni Aparj̄ akupeana nūj etsa núnis tsáapnin ajasartatui. Wats, kuishim átsuk. Antukta.’

(5) Kuit wáinkiamu

⁴⁴ “Shuar Yus akupeamunam pachiinkiatin kuit nun̄ká ūukma áintsan̄kete. Shuar nu kuitin wáiniak nūn̄ ataksha ūukmai. Tura ti waras waketki nu kuit niiniu atí tusa ashí ni takakman suruk nu nun̄kan sumakmai.’

(6) Kaya shiirmach ti kuitia nu

⁴⁵ “Shuar Yus akupeamunam pachiinkiatin júnisaiti. Shuar kayachin ti shírman eak wekaana áintsan̄kete.

⁴⁶ Tura kayan ashí nan̄kaamas kuit jeean wáiniak waketki ashí takakna nuna suruk nu kayan niiniu atí tusa súmawai.’

(7) Neka

⁴⁷ “Shuar Yus akupeamunam pachiinkiertin júnisaiti. Shuar nekajain̄ namakan achía áintsan̄kete. Nekan nayaantsanam ajuntak niisháa namakaim achíawai.

⁴⁸ Tura nekanam nemarmatai kukar j̄iki, nūj péñker namaknasha chan̄kinnium chumpiniawai. Tura yajauch namaknaka ajapenawai.

⁴⁹ Núnisan̄ átatui nun̄ka amúamunam. Yusa suntarj̄ taar Yus-shuaran tura íwianch shuaran akantrattawai.

⁵⁰ Tura íwianch shuarnaka uunt jin̄ium apeattawai. Nūjsha ti úutin ti wáitsatin átatui.” Nuna ashí ni unuiniamurj̄jain̄ áujmatsamiayi Jesus.

Yamá nekamujaj̄isha tura yaunchu nekamujaj̄isha Yus-shuaran yáintiniaiti

⁵¹ Jesus nuna tinia amuk “¿Ju mash antukmek?’ tímiayi.

Tutaí ni unuiniamurj̄ “Ee, Uunta, ashí antukji” tiarmiayi.

⁵² Tuiniakui Jesus tímiayi “Shuar ashí Yúsnan péñker unuimiaruka aents kuitriniua áintsan̄kete. Ni ikiutairj̄ya yamarmancha yaunchu sumakmancha jusamniaiti. Núnisan̄ nu shuar yamá nékamujaj̄isha tura yaunchu nékamujaj̄isha Yus-shuaran yáintiniaiti.”

*Jesus Nasarétnum waketkimiania nu**(Márkus 6.1-6; Rúkas 4.16-30)*

⁵³ Jesus nu métek-taku chichaman áujmatas amuk nuyá wémiayi.

⁵⁴ Tura nu péprurin Nasarétnum jeá Israer-shuar iruntainiam wayá unuiniamiayi. Tura nuyá shuar antukar tí enentaimprarmiayi. Tura “¿Jusha tuǵ imiá unuimiaruit, tiarmiayi. Itiurak aents tujintiamun túramniait?

⁵⁵ Juka karpintíru uchirinchukait. Nukurísha Marichukait. Tura ni yachísha Jakupu, Jusé, Semun, Jútas ániatsuk.

⁵⁶ Tura ni umajsha iijjaj írutra pujuiniatsuk. ¿Nuikia itiura mash neka?” tiarmiayi.

⁵⁷ Túrawar Jesusan itiurchat enentáimturarmiayi.

Túramtai Jesus chicharuk “Yúsnan etserniun ashí shuar péñker anturainiawai, antsu aya nuna nuñkeyañka ni shuaríñkia nin anturainiatsui” tímiayi.

⁵⁸ Tura nú shuar Jesusan enentáimtuiniachu asamtai aentsti tujintiamun aya ishichik túramiayi.

14

Imiakratin Juan jakamu

(Márkus 6.14-29; Rúkas 9.7-9)

¹ Kariréa nuñkanam Erutis akupniuyayi. Tura Jesus túramuncha antukmiayi.

² Tura ni írutramurin tímiayi “Nuka imiakratin Juan jakamunmayá nantaki túrawai auka. Tuma asa aents tujintiamun túrawai” tímiayi. Kame Erutis Juan kan maa asa tímiayi.

³⁻⁴ Akupin Erutis ni yachí Jiripi nuwen Jirutíasan akintrukmatai Juan Erutisan “Ame yatsumi nuwé akintrukchatniuíme” tímiayi. Tutai Erutis Juan kan achik jirujaj jínkiá sepunam enkeatarum tusa akupkamiayi.

⁵ Niisha Juan kan máataj tukamaj aentsun ashamiarmiayi. Ashí aents “Juan Yúsnan etserniuíti” enentáimtuiniakui ashammiai.

⁶ Tura akupin Erutis akiiniamu tsawantrj jeamtai nú námpertin Jirutíasan nawantrj ashí ipiaamu pujuiniamunam jantsemamiayi. Túramtai Erutis shiir enentáimtak

⁷ “Ame ashí wakeram nu seattia, tímiayi. Nekasan amastatjai, Yussha iirui” tímiayi.

⁸ Tutai nu nuwäch emka ni nukurj akatramu asa Erutisan chicharuk “Imiakratin Juan kan muuké tsupikiam amamkunam enkeram surústá” tímiayi.

⁹ Tutai Erutis wake mesekmiayi. Túrasha “nekas Yus iirui” tiniu asa tura ni amikrisha antukaru asamtai umikmiayi.

¹⁰ Ni suntarin sepunmayan Juan kan muuken tsupik itiarti tusa akupkamiayi.

¹¹ Tura amamkunam itiar nuwächin súsarimiayi. Tura niisha ni nukurj susamiayi.

¹² Nuyá Juan kan írutramurj tariar ayashí jukiar iwiarsarmiayi. Túrawar Jesusan ujawearmiayi.

Jesus senku mir (5000) áishman kan ayuramiania nu

(Márkus 6.30-44; Rúkas 9.10-17; Juan 6.1-14)

¹³ Jesus nuna antuk Niñki ni unuiniamurijjaj kanunam enkemar arant aents atsamunam wémiayi. Túrasha nuna aents nekaawar kukarak weriarmiayi Jesusan.

¹⁴ Kanunmayá jínijaj tukamaj untsurj áentsun wáinkiamiayi. Tura wáiniak waitnentrarmiayi. Tura jáiniancha tsuáramiayi.

¹⁵ Kjakui ni unuiniamurj Nin tariar tiarmiayi “Kjawai, Uunta. Tura shuar tjiich pujaaka atsawai. Ju aents akupkarta. Péprunam wear sumak yuuewerti” tiarmiayi.

¹⁶ Tutai Jesus tímiayi “¿Urukamtaik wearat? Antsu atumek ayuratarum.”

¹⁷ Tutai tiarmiayi “Íikia takaktsuji. Aya senku (5) tantachik jimíarchik namakchijjaj takakji.”

¹⁸ Tuíniakui Jesus “Wats, nu itiantiarum” tímiayi.

¹⁹ Tinja aents chírichriniam pujusarti tusa akupkamiayi. Nuyá senku (5) tantancha jímíar namaknasha achik nayaimpiniam íimias Yúsan yumínsamiayi. Tura puur ni unuiniamurj aents ayuratarum tusa súsarimiayi.

²⁰ Ashí yurumáwar jémararmiayi. Tura nuyasha puunaruka tuse (12) chan kin tíarmiayi.

²¹ Nuǵ yurumáwarmia nusha nuwasha uchisha nekapmatsuk senku mir (5000) aya áishman árimiayi.

Jesus entsá pátatek wekasamiania nu

(Márkus 6.45-52; Juan 6.16-21)

²² Nuyá Jesus ni unuiniamurj kanunam enkemprarum amain émaa ajatarum tusa akupkarmiayi. Niisha áentsun akupkarmiayi.

²³ Akupkarsha naint waka Yúsan áujumiayi. Káshisha nuǵ Niñki tuke pujumiayi.

²⁴ Tura antumiañ tí wan karam asamtai kanu ajapén ajasmatai nase tukumma entsa tamarukmiayi.

²⁵ Tsawaana aj níi tuke wenaj Jesus entsá pátatek wekas pujuiniamunam jeamiayi.

²⁶ Tura ni unuiniamurj entsá pátatek wekaan wáinkiar ti sapijmiakarmiayi. Tura ashamainiak “wakanchashit” tiarmiayi.

²⁷ Tuíniakui Jesus tiarmiayi “Kakaram ajastarum. Wiitjai. Ashamprukairap.”

²⁸ Takui Pítiur chicharuk tímiayi “Uunta, Ámetkumka nuj wekasa jeatin untsurkata.”

²⁹ Takui Jesus tímiayi “Wats, winitíá.”

Tutai Pítiur kanunmayá akaikin Jesus wajana nuj jeataj tusa entsá pátatek wekasamiayi.

³⁰ Tura ti nasen násentun nekáa ashankamiayi. Ashama asa entsá wayamiayi. Tura “Uuntá, achirkata” tu untsummiayi.

³¹ Nu chichamtaik Jesus uwejnnum achik júak “Maa, Yus imiá ishichik enentáimtuschamek” tímiayi.

³² Tura kanunam enkemáwarmatai nasesha menkakamiayi.

³³ Túramtai kanunam enkemarmia nusha Jesusan tikishmatar chicharuk “Nekas ame Yusa Uchirjme” tiarmiayi.

*Jesus Jinisarítiumiq shuaran tsuármiania nu
(Márkus 6.53-56)*

³⁴ Tura amainj katinjkiar Jinisarít nunkanam jearmiayi.

³⁵ Tura nuyá aents Jesusan nekaawar nu nunkanam ashí ujanairarmiayi. Túrawar jaancha ni pujamunam itiararmiayi.

³⁶ Ni pushirinkisha antiñtai tusar seawarmiayi.

15

*Shuáran yajauch awajeana nuna Jesus jintintiamiania nu
(Márkus 7.1-23)*

¹ Nuyá Jerusaréñ péprunmayá Pariséusha yaunchu akupkamu jintinniurisha Jesusan tariar aniasarmiayi

² “¿Urukantai ame unuiniamuram ii uuntri yaunchu jintintrarmia nuna uminiatsu? Iis, ikijmiatskesha yurumáiniawai” tiarmiayi.

³ Tuíniakui Jesus aniasarmiayi “¿Urukantai atumsha Yus akupkamu umirtsuk aya aents akupkamu umiirum?”

⁴ Iis, Yus tíchamkia:

“Ame apa, nukusha shiir enentáimtustarum.” Tura “Shuarsha ni aparjñcha nukurjñcha katsekka nu shuar jakati” tíchamkia.

⁵⁻⁶ Antsu átumka tárume “Shuar ashí niiniu írúnna nuna mash “Yúsnaiti” takui nuikia nujaj ni aparjñcha nukurjñcha yáinçhamniaiti, tárume. Nin yáinçhian nakitiak ayatik “Ashí winia áiniana nu Yusna asamtai yáinçhamniaitjame” titiniayi” tárume. Núnisrum tákuram Yus akupkamu iniaisarum aya aents akupkamu umiirume, tímiayi.

⁷ Antra chichamtiniaitrume. Yúsnan etserin Isayas yaunchu nekas atumin áartampramiayi juna:

⁸ “Jü aents ni wenejaj shiir awajtuiniawai, tura ni enentáj jeachat pujuiniawai.

⁹ Tura tukeneasan shiir awajtuiniawai. Aentsu chichamen jintintiniayiat “Yusa chichamente” tuiniawai.” Tu áarmiayi” tímiayi Jesus.

¹⁰ Tinia shuaran untsuk tiarmiayi “Jü antukrum péñker nekaatarum.

¹¹ Aents yúana nuka shuáran yajauch awajsashtatui. Antsu wenunmayá jünia nuka shuáran yajauch awajeawai” tímiayi.

¹² Nuyá ni unuiniamurj Jesusan tariar “Maa, Pariséu ame chichammin antukar ti itirchat enentáimpraraí” tiarmiayi.

¹³⁻¹⁴ Tuíniakui Jesus tímiayi “Ikiuktiarum. Kusuru áintsan áiniawai. Tura kusuruncha jintintiniawai. Mai kusuru ásar mai wáanam akaiki iniaawartatui. Wats, ajanam nupá áintsan áiniawai. Tura ashí winia Apar nayaimpiniam pujana nu araachmaka takamtsuk uwe ajapamu átatui” tímiayi Jesus.

¹⁵ Takui Pítiur Jesusan tímiayi “Nu métek-taku chicham paant awajsata.”

¹⁶ Tutai Jesus tímiayi “¿Atumsha nekaachurmek.

¹⁷ Enentáimprachurmek? Ashí wenunam wayaana nu wakenam wéatsuk. Tura nuyá iniañkastiniaiti.

¹⁸ Antsu wenunmayá jünia nu enentáinmayá jünia asa áentsun yajauch awajeawai.

¹⁹ Enentáinmayá ashí yajauch enentáimsatin jüniainiawai. Mankartuatiñusha, chikicha nuwé kasamkatniusha, tsanirmatniusha, kasamkatniusha, wáitruatniusha, yajauch áujmatsatniusha

²⁰ ashí nu áiniawai nekaska shuáran yajauch awajeana nu. Tura ikijmiatsuk yurumátniuka shuáran ni enentáin yajauch awajeatsui” tímiayi.

Nuwa Israer-shuarcha Jesusan enentáimtusmiania nu
(Márkus 7.24-30)

²¹ Jesus nuyá jiinki Tiru péprunmasha Sitiun péprunmasha wémiayi.

²² Tura nu nuñkanmayá nuwá Jesusan tarí tímiayi “Uunta, uunt akupin Tawit ame weatrum asamtai winia waitnentrurta. Nawantur yajauch wakantruksa asa ti wáitrutawai” tímiayi.

²³ Tura Jesus ájkchamiayi. Tura nu unuiniamurj tariar “Awemata, tiarmiayi. Tuke untsunki apapétmaji” tiarmiayi.

²⁴ Nuyá Jesus tímiayi “Aya Israer-shuarnum menkakarú áinia nuna eáktinian Yus akup-tukuíti.”

²⁵ Túrasha nuwá tikishmatar tímiayi “Uunta, waitnentrurta.”

²⁶ Tutai Jesus tímiayi “¿Uchi apatkurj jurukir yawá susamniakait?” tímiayi.

²⁷ Tutai nuwá tímiayi “Nekas, Uunta, tame. Tura yawasha ni aentsrj yurumainiakui nunká iniaarun yúniatsuk.”

²⁸ Takui Jesus tímiayi “Maku, nekas Winia enentáimtusaitme. Ame wakeram núnisañ atí” tímiayi. Tura nu chichamaik ni nawantrj péñker ajasmiayi.

Jesus untsurj jáinian tsuararmiania nu

²⁹ Jesus nuyá jiinki Kariréa antumianka káanmatkarin waketkímiayi. Tura naint waka nuj pujusmiayi.

³⁰ Nuj untsurj aents Nin tariar shutuapnasha kusuruncha chichachuncha tsupirkamuncha chikich jáiniancha itiararmiayi. Túrawar nawenam aeprusarmiayi. Túram tsuararmiayi.

³¹ Nuna ísar chichachusha chichainiakui, tsupirkamusha péñker ajainiakui, shutuapsha péñker wekainiakui, kusurusha wáinmainiakui, ti shiir enentáimprarmiayi. Yus ni áentsrin Israeran yáimatai shiir yumiñsarmiayi.

Jesus kuaru mir (4000) áishmankan ayuramiania nu
(Márkus 8.1-10)

³² Nuyá Jesus ni unuiniamurj untsukar tiarmiayi “Ju aentsun waitnentainiajai. Warí, menaintu tsawant Wijijai yurumsuk yujainiatsuk. Ayurtsuk ni jeen akupkachminiaitjai. Jintia pimpiki wáitsartatui.”

³³ Ni unuiniamurj tiarmiayi “Túrasha, Uunta, ¿shuar atsaasha tuyañ yurumak imia sumaktajj ju aents ayurawartincha?”

³⁴ Jesus aniasarmiayi “¿Urutma tanta takakrum?”

Tutai niisha “Siati (7) tanta nuyá ishichik namak takakji” tiarmiayi.

³⁵ Nuyá aents nunká pujusarti tusa akupkamiayi.

³⁶ Tura siati tantan achik namaknasha achik nuyá Yúsan yumiñsamiayi. Tura puur aents ayuratarum tusa ni unuiniamurj susamiayi.

³⁷ Ashí yurumáwar jemaramiayi. Tura puunaru siati chan kin tiarmiayi.

³⁸ Tura nuj yurumáwaruka nuwasha uchisha nekapmatsuk aya áishmankak kuaru mir (4000) áirmiayi.

³⁹ Nuyá Jesus áentsun akupak kanunam enkemar Maktara nunkanam wémiayi.

16

Pariséusha Satuséusha iniakmamurj in Jesusan seawarmiania nu
(Márkus 8.11-13; Rúkas 12.54-56)

¹ Pariséusha tura Satuséusha Jesusan nekapsatai tusar tariarmiayi. Túrawar “Ame Yúsaiyáitkiunka kakarmarmijai nayaimpinnmayá iniakmasta, iisha wáinkiatái,” tiarmiayi.

² Tutai Jesus tímiayi “Átumka “Kapaaku péetar kíntiamkui kashin esatrurtatui” tíniuitrume.

³ Túrasha “Te ajas kapaaku péetar tsawaakui yumi yajauch átatui” tíniuitrume. Tura nekasaiti. Maa, átumka nayaim ísrum ju nunkanam túrunattana nu nékarme. Antsu Yus yamá jü nunkanam tura nuka nékatsrume. Ántrairume.

⁴ Aents yajauch ásar tura Yusan enentáimtachu ásar kakarmajaj iniakmamun wakeruiniawai. Túrasha áyatik Junas túrunamia nuke iniakmastiaini” tímiayi. Tinia ikuak wémiayi.

Pariséusha Satuséusha jintintiaia nu aneartinaiai
(Márkus 8.14-21)

⁵ Tura entsá amaini katiñkiar ni unuiniamurj tantan júkitniun kajinmatkiarmiayi.

⁶ Nuyá Jesus tímiayi “Wáinkiatarum, Pariséusha Satuséusha wakaprutai takakainia nújajisha aneartarum.”

⁷ Tutai ni unuiniamurj tiarmiayi “Ii tanta itiachakrin tátsuk.”

⁸ Jesus nuna antuk tímiayi “¿Urukamtai tanta itiachji tunaiyarum. Yusa kakarmari kajinmatkintrumek.

⁹ Senku tantajai túramiaj nu kajinmatkintrumek. Senku mir (5000) áishmanġan ayuramtai untsurġ chaŋkin tiármia nu enentáimtsurmek.

¹⁰ Tura siati tantajai kuartru mir (4000) áishmanġan ayuramtai nuna ishichik chaŋkin tiármia nu kajinmatkintrumek.

¹¹ Itiurak imiá nékatsrum? Wi Pariséu wakaprutairġsha Satuséu wakaprutairġsha eartarum tákun penké tantan tátsujai” tímiayi.

¹² Nuna Jesus takui ni unuiniamurġsha nekaawarmiayi. Penké tantaa wakaprutairġn tichamiayi antsu Pariséusha Satuséusha unuiniatairġn tímiayi.

Pítiur Jesusan Yus anaikiamun paant ujakmiania nu

(Márkus 8.27-30; Rúkas 9.18-21)

¹³ Tura Sesaria-jiripiunam jeawar Jesus ni unuiniamurġn aniasarmiayi “Aents Ajasuitjiana juña zyaiti turutainiawa Winia?”

¹⁴ Niisha ayak tiarmiayi “Chíkich, imiakratin Juánkaiti turamainiawai. Chíkichka, Eriásaiti turamainiawai. Chíkichcha Jeremiasaiti, chíkichcha chíkich aents Yúsnan etserniuiti turamainiawai” tiarmiayi.

¹⁵ Tutai nincha aniiniak “¿Atumsha yaithi túrutrum?” tímiayi.

¹⁶ Semuġ Pítrusha “Ámetme Kristu, Yus Anaikiamu. Nekas iwiaaku Yusa Uchirġnme” tímiayi.

¹⁷ Tutai Jesus tímiayi “Shiiraitme Junasa uchirġ Semuġka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame.

¹⁸ Tura Wisha tájame, ame Pítruitme, kayach tútaim. Nu kayanam jeġ jeamtinia áintsan Yushuaran ekenin tsakatmartatjai. Túramtai jákatniusha tura Yusa nemasrġsha nu jeamman pukukchattawai.

¹⁹ Yus akupeamu yawincha amastatjai. Ju nuŋkanam jġnkiatniusha atíatniusha amasmaiti. Tuma asamtai ame ju nuŋkanam suritiam nu nayaimpinmasha suritniaktatui. Tura ju nuŋkanam tsanġateam nu nayaimpinmasha tsanġkatnaktatui” tímiayi.

²⁰ Nuna tinia Jesus ni unuiniamurġn Krístitai nu etserkairap tinia akupkarmiayi.

Jesus Nin máatniun etsertumakmiania nu

(Márkus 8.37-9.1; Rúkas 9.22-27)

²¹ Nuyá Jesus juna unuiniatġn nuŋkammiayi. “Wi Jerusarġnum wétniitjai. Nuġ Israer-shuara úuntrġsha, Israer-patri úuntrġsha, Israer-shuara jintinniurġsha ti wáitkiarsartatui. Nuyá mantuawartatui túrasha menaintiú tsawantġ nantaktatjai.”

²² Takui Pítiur arantach jukí chicharuk tímiayi “Uunta, nuka penké áchatniuiti. Áminkia túrutmacharminiaiti.”

²³ Jesus ayanmatar Pítrun tímiayi “Werumta, Satanása. Yajauch awajtame. Ámeka Yus wakeramu enentáimtsume. Antsu jġ nuŋkanam enentáimainia áinis enentáimme.”

²⁴ Nuyá Jesus ashí ni unuiniamurġn tímiayi “Shuar Winia nemartustaj tusa wakerakka ni wakeramurġn iniais ni krusġ yanaki Winia nemartusti.

²⁵ Shuar áyatik péŋker pujustaj tákupka nu shuar uwemtsuk jakattawai. Antsu jákatniuitkuisha péŋker pujustinian enentáimtsuna nú shuar nekas iwiaakman wainkiattawai.

²⁶ Wats, shuar ashí jġ nuŋkanam írunna nuna sumakka tura nujġ ni wakanġ émesek ¿itiurak péŋker pujustġ? Shuara wakanġ emesramu ¿ashí jġ nuŋkanam írunna nujġ iwiaranniakait?

²⁷ Wi Aents Ajasu asan, winia Aparu kakarmariġġai tura ni suntariġġai tana ashí shuaran ni takasmajġ métek akiktatjai.

²⁸ Paant tájarne, shuar juġ wajainia ju játsuk Wi akupin ajasmatai wáitkiartatui” tímiayi.

17

Jesus nushá iira ajasmiania nu

(Márkus 9.2-13; Rúkas 9.28-36)

¹ Nuyá sais (6) tsawant nanġaamasar Pítrunġha, Jakupunġha, tura ni yachġ Juannasha níniak júkiar Jesus náinnium yakí wakamiayi.

² Nuġ Jesus nusháa iira ajattsarmiayi. Ni yapisha etsayġ áinis wincha ajasmiai. Ni pushirġsha ti puju jġitsumir ajasmiai.

³ Nuġsha Muisaisnasha Eriasnasha Jesusġai chichainian wáinkiarmai.

⁴ Nuyá Pítiur Jesusan tímiayi “Uunta, ti shiir pujaji juġ. Wakerakminkia menaint áakmaktai, Áminiu chíkichik tura chíkich Muisaisnasha, tura chíkichcha Eriasná.”

⁵ Tura Pítur tu auju wajái yurañkim ti puju amuamiayi. Tura nu yuranminmaya chichaman antukarmiayi. “Juka winia aneamu Uchiruiti, tímiayi. Nin ti shiir enentáimtajai. Nii péñker anturkatarum” tímiayi. Tu chichasmiayi Yus.

⁶ Nuna ni unuiniamurj antukar ti ashamkar pákea ajakiarmiayi.

⁷ Túrunawarmatai Jesus táriar antin “Ashamkairap, nantaktiarum” tiarmiayi.

⁸ Tura pañkainiar ímiaj tukamá aya Jesusan wáinkarmiayi.

⁹ Nuyá náinniumiá akainiak Jesus tiarmiayi “Átum ísurmena nu penké etserkairap. Wi Aents Ajasu asan jakamunmaya nantaatsain etserkairap’ tímiayi.

¹⁰ Nuyá ni unuiniamurj Jesusan aniiniak “¿Urukamtai in jintintramin “Kristu táatsain Erías emka tátiniati” tuinia?” tiarmiayi.

¹¹ Tuíniakui Jesus áikmiayi “Nekas Erías tátiniati. Tura nii mash iwiarattawai.

¹² Kame nekas Erías táwiti tura nin nekaacharmai. Antsu aents wakeriarmia nuna túrawar yajauch awajsarmiayi. Núnisan Winiasha, Aents Ajasu ain, wáitkiarsartatui.”

¹³ Nuna takui ni unuiniamurj imiakratin Juánkan áujmatui, tu enentáimprarmiayi.

Jesus iwianchin jiki akupkamiania nu

(Márkus 9.14-29; Rúkas 9.37-43)

¹⁴ Ataksha aents matsatmanum jeawarmatai shuar Jesusan tarí tikishmatramiayi.

¹⁵ Tura tímiayi “Uuntá, winia uchir waitnentrutata. Wainchi tukum ti wáitniuiti. Jini-umsha patamniuiti. Entsasha iniainaiti.

¹⁶ Ame unuiniamurmíncha itiarjiai túrasha tujinkiarai.”

¹⁷ Takui Jesus ashí tímiayi “Maa, Yus penké enentáimtichuitrume. Imiá úmichuitrume. ¿Wi atumin katsuntu ajatniukaitjarum? Wats, uchi itiaritjarum’ tímiayi.

¹⁸ Itiarim Jesus yajauch wakanin jiki akupkamiayi uchi ayashíniá. Túramtai nu chichamaik péñker ajasmiayi.

¹⁹ Nuyá urum ni unuiniamurj Jesusaj niñki pujusar áujmatainiak “¿Urukamtai yajauch wakan jiktin iikia tujinkiamaj?” tiarmiayi.

²⁰ Tuíniakui Jesus tiarmiayi “Yus nekas enentáimtachu asarum tujinkiarume. Túmaitiat nekasaiti mustasa jiníkiái timiá uchichitiat ti uunt tsakaatsuk. Núnisan Yus ishichikisha enentáimtakrumka nu naint ékemkata tutai nu naint túrunattawai. Penké tujinkiashtatrume Yus nekas enentáimtakrumka.

²¹ Kame nu yajauch wakan jiki akupkatniuka ijiarmam Yus áujsatniuiti.”

Ataksha Jesus ni játniun ujakmiania nu

(Márkus 9.30-32; Rúkas 9.43-45)

²² Jesus ni unuiniamurjijai Kariréa nunkanam wekas juna ujakarmiayi. “Wi Aents Ajasu asan, aentsnum surunkattajai tura mantamnattajai.

²³ Túrutawarmatai menaintiú tsawantaj nantaktiatjai.” Tura ni unuiniamurj nuna antukar ti kúntuts enentáimprarmiayi.

Jesus ankantaitiat akiktinia nuna akikmakmiania nu

²⁴ Jesus ni unuiniamurjijai Kapernáum péprunam jeawarmiayi. Tura kuítian achin Pítrun tariar aniasarmiayi “¿Atumi uuntrj Israer-patrin akiktinia nuna akínkaiit?”

²⁵ Tutai Pítur “Ee” tímiayi.

Tura Pítur jeá wayá chichaatsain Jesus emka tímiayi “Chíkich nunkanmaya akupin zyana kuítrijain takainia. Ni shuaríniunkek atantainia. Antsu yajaya shuárnan atantainiatsuk. Nekaschak, Semunká?”

²⁶ Tutai Pítur “Nekas yajaya shuárnan atantainiawai” tímiayi.

Jesus tímiayi “Nuikia ni shuarj ankant ániawai. Iisha núnisrik nu akiktin ankantaitji.

²⁷ Túrasha iturchat enentáimprarin tusar akiktai. Ame tsau jukim entsá wetá. Túram emka namak japikim iwiankam nuj kuit wáinkiatame. Nu jukim Winiasha áminiusha akikmakta.”

18

“¿Ya imiá nankaamantuit?” tunaiyarmiania nu

(Márkus 9.33-37; Rúkas 9.46-48)

¹ Nu tsawantaj ni unuiniamurj tariar Jesusan aniasarmiayi “Yus akupeemunam pachinia nu zyana imiá nankaamantu áminiaiit?”

² Nuna tuíniakui Jesus uchin untuk ajapen awajtusar

³ tímiayi “Tí nekasan tájarme, atumí enentáimtaiirj yapajjarum uchia áinis ajachkurmeke Yus akupeemunam pachinikiachminiaiittrume.

⁴ Nu asamtai ju uchia áinis péechach enentáimtumana nuka Yus akupeana nuj nekas nankaamantu ajasminiaiiti.

⁵ Nú arantcha Winia anentuk uchin itiaana nú shuar Winiasha itiaareawai' tímiayi.

Tsumainti yajauch túrumtikiatin
(*Márkus 9.42-48; Rúkas 17.1-2*)

⁶ 'Shuar ju uchin Winia umirtana nuna tunaanum ajuarmatainǵia nuna túratsajñ niisha kuntujén kayajajǵi jñkjar nayaantsanam ajapen kunanam ajunmaitkiunǵa maak ainti, tímiayi.

⁷ Ju nunǵanam tunáa iniaatai írúnuk tuke itiuřhataiti. Antsu shuar chikichan tunaanum ajuarka tí itiuřhatan inǵiunǵatui' tímiayi.

⁸ 'Nu asamtai ame uwejem tura nawem tunaanum ajunmatniuitkiunǵia tsupikiam ajapata. Kame muntuch pujustin tura ukunam nayaimpiniam wétin péñkeraiti. Antsu kajinkiashtin jinium takamtsuk jeatniuka imiá yajauchiiti.

⁹ Núnisanǵ ame jimi tunaanum ajunmatniuitkiunǵia ukuinkiam ajapata. Kame chikichik jijiǵajǵi pujusam nayaimpiniam wétin péñkeraiti. Antsu jinium mai jñntiuk wétin imiá yajauchiiti' tímiayi.

Murik meñkaaka áujmatsamu
(*Rúkas 15.3-7*)

¹⁰ 'Uchi ainia nu nakitraitrap. Yusa suntarǵ nin wáinkiatniua nu winia Aparuj tǵiuch pujuiniawai.

¹¹ Kame wi Aents Ajasu asan, meñkaakarun eǵktajtsan táwitjai.'

¹² 'Enentáimpratarum. Shuar sian (100) murikiun takakuitiat chikichik meñkakamtaí untsurǵ meñkakacharun náinnium matsaak, meñkakan eǵushtatuak.

¹³ Wáinkiasha untsurǵ meñkakacharua nujaj nanǵaamas waraschattawak.

¹⁴ Núnisanǵ atumi Aparǵ nayaimpiniam pujana nu, nu uchi chikichikisha meñkakacharti tawai' tímiayi.

Yus-shuarti tsañkurnairatin
(*Rúkas 17.3*)

¹⁵ 'Chikich Yus-shuar ámin yajauch túrutmakuǵnia nii werim áusata. Tura ámechik werim ame yatsumjajǵi chichasta. Anturtamkuǵnia ame yátsum yáñkiume.

¹⁶ Tura anturtamchakuǵnia nuyá chikichik shuar jimiará shuarsha jukim ataksha weritia. Túram ataksha áujnaisatarum, niisha paant nekaawarat tusam.

¹⁷ Túrasa yatsum tuke ántachkuǵnia Yus-shuar iruntainiam iwiainiakta. Túrasa yatsum tuke ántachkuǵnia Yus-shuarcha núnisanǵ enentáimtusta nu shuar.'

¹⁸ 'Nekasan tájarme, ju nunǵanam suritiam nu nayaimpinmasha suritniaktatui. Tura ju nunǵanam tsañkateam nu nayaimpinmasha tsañkatnaktatui.'

¹⁹ 'Núnisnak tájarme, ju nunǵanam pujusrum jimiará Yus-shuairam métek enentáimprarum winia Apar nayaimpiniam pujana nu seakrumniǵnia wakerarmena nuna suramsattarme.

²⁰ Jimiar menaintiusha Yus-shuar Winia enentáimturuk iruntrarmatai Wisha nuǵi niijǵajǵi pujajai' tímiayi Jesus.

²¹ Takui Pítiur weri Jesusan aniasmiayi "Uuntá, winia yatsur yajauch awajtakui ¿urutma tsañkuratniuitaj. Siátikik tsañkuratniuitaj?"

²² Jesus aiyak "Siátik tátsujme, antsu iniannatsuk tsañkuratniuitme" tímiayi.

Takakmau tsañkurachun pachis áujmatsamiania nu

²³ Tuma asa Jesus Yus akupeamunam pachiinkiaru tsañkurnairartiniaiti tusa ju métek-taku chichaman áujmatuk tímiayi, "Uunt akupin takarǵin tumashin akirkarat tusa untsukar-mai.

²⁴ Yama nanǵkamuk tí nukap tumashmakua nuna untsukmai. Akikmakchamnia tí tumashmakuyi.

²⁵ Tura nu takakmau kuitrǵ atsakui uunt akupin "Yajasma áitkiasrum nuǵrtiuk uchirtiuk ashí waririntiuk surukturum, timiai. Nu kuitjajǵi akirkati" timiai.

²⁶ Tutaí nu takakmau uunt akupniun tikishmatar seak timiai "Uunta, waitneasam náarsatá. Auka, mash akiktatjame."

²⁷ Uunt akupin waitmentar mash tsañkur anǵkant akupkamai.

²⁸ Tura nú chichamaik nú takakmau jiinki ni ajn inǵiunǵmai. Nú ajsa nin ishichik tumashiǵyi. Tura tsékeñki suwenam achik chicharuk timiai "Wari akirkata tumashitmena nu."

²⁹ Tura ni aj nin tikishmatar timiai "Waitneasam náarsatá. Auka, mash akiktatjame" timiai.

³⁰ Túrasa nakitramai. Antsu tsañkurtsuk sepunam eñkeamai ashí akirkati tusa.

³¹ Chíkich takakmau nuna wáinkiar ti kúntuts enentáimtuiniak uunt akupniun ashí etser-tukarmai.

³² Nuna antuk uunt akupin untuk itia timiai “Yajauchiitme. ¿Winia “waitnenrurtra” túrutkumin tsankurachmakjam?

³³ Amesha núnismek ame ajm tsankuratniuitme” timiai.

³⁴ Tinia uunt akupin kajekmai. Tura ashí tumashin akikmatsuk asutniati tusa suntar-num surukmai.”

³⁵ Jesus nuna áujmatas amúak tímiayi “Núnisañ winia Apar nayaimpiniam pujana nu atumin túrutmattarme atumi yachj nekas enentáijjai tsankureachkurminkia.”

19

*Jesus nuwá ajapatniun áujmatsamiania nu
(Márkus 10.1-12; Rúkas 16.18)*

¹ Jesus nuna tinia ikiuak Kariréa nunkanmayá wémiayi. Tura Jurtañ entsa amain Jutía nunkanam jeamiayi.

² Untsurj aents nemariarmiayi tura jáiniancha péñker awajsamiayi.

³ Nuñ Pariséu Jesusan nekapsataj tusar aniasarmiayi “¿Shuar ni nuwen itiurchat akui ajapamniakait?”

⁴ Tutai Jesus tímiayi “¿Átumka Yus-Papí áujkachukaitrum? Yámankamtaik Yuska shuáran áishmañkan nuwancha najanamiayi tawai.

⁵ Tuma asamtai áishmañ ni aparjñ ni nukurjñ ikiuki ni nuweñjaj tsaniñ chikichik ayashtinia áinis ajasartatui, tu áarmaiti, tímiayi.

⁶ Tuma asa jímiarcha antsu chikichik ayash áiniawai. Tuma asamtai shuar Yus apatkamia nuna, aents akankashtiniaiti’ tímiayi.

⁷ Takui tiarmiayi “Nuikia ¿urukamta papí áarar nuwá ajapatniun Muisais tsankatkamia?”

⁸ Tutai Jesus tiarmiayi “Tímia ántichu asakrumin nuwá ajapatniun tsankatkamiayi. Túrasha émkaka núnischauyayi.

⁹ Wi tájarme, shuar ni nuwen chikichjaj pujuschan ajapeakka tura chikichan nuatkunja tsanirmayi. Chíkich áishmañsha nuwá ajapamun nuátkanja nusha tsanirmayi” tímiayi.

¹⁰ Takui ni unuiniamurj tiarmiayi “Nuikia áishmañ ni nuwé penké ikiukchamniatki-iuñkia nuátkachminiaiti.”

¹¹ Jesus tiarmiayi “Nu chichamnaka mash antukchamin áiniawai. Antsu Yus nuna umiktin susamua nuke antukmin áiniawai.

¹² Chíkich chíkich nuatkachmin áiniawai. Chíkich nuátkachmin akiiniawaru áiniawai. Chikichcha aentsjaj nuátkachmin najanaru áiniawai. Chikichcha nuátainiatsui Yus akupeamu takatan takastinian. Juna antuktinian jeáka antukti.”

*Jesus uchin shiir awajsamiania nu
(Márkus 10.13-16; Rúkas 18.15-17)*

¹³ Nuyá Jesusan uchin itiariarmiayi. Nin antñ Yúsan áujtusarat tusar wakariarmiayi. Túruiniakui ni unuiniamurj chicharkarmiayi.

¹⁴ Túruiniakui Jesus tímiayi “Uchi Winí winitin tsankatkatarum. Suritkiairap. Kame ju uchia áintsañ péjchach áinian nunak Yus akupkamniaiti.”

¹⁵ Tinia uchin miniakas nuyá wémiayi.

*Kuítrintin Jesusjaj chichasmiania nu
(Márkus 10.17-31; Rúkas 18.18-30)*

¹⁶ Shuar natsa Jesusan tarin aniasmiayi “Uuntá, péñkeraitme. Tuma asam turuttia ¿warinia túrakna tuke iwiaaku átataj?” tímiayi.

¹⁷ Tutai Jesus nin enentáimtikrataj tusa tímiayi “¿Urukamta péñkeraitme túrutam. Shuar péñkerka atsatsuk. Aya Yúskechukait? Wats, tuke iwiaaku pujustaj tákumka akupkamumírkartá.”

¹⁸ Tutai shuar “¿Tuna nekas umirkatniuitiaj?” tímiayi.

Takui Jesus tímiayi “Mañkartuawaip, tsanirmawaip, kasámkáip, chíkich shuar tsanumpruraip,

¹⁹ ame apa nukusha umírkata, ame shuárum ame ayashim aneamna nútiksamek aneeta.”

²⁰ Tutai natsa tímiayi “Núnaka úchichik mash umiki tsakaruitjai. Nuyasha ¿warí táatrusa?” tímiayi.

²¹ Takui Jesus tímiayi “Nekas péñker átaj tákumka, weme ame kuítrum kuítrincha ainia nu sú sartá. Tura nayaimpiniam kuítrintin ajastatme. Nuyá Winia nemártústá” tímiayi Jesus.

²² Tura natsa nuna antuk kúntuts wémiayi ti kuítrintin asa.

²³ Nuyá Jesus ni unuiniamurjñ tiarmiayi “Nekasan tájarme, kuítrintin Yus akupeamunam pachiinkiatin ti itiurchataiti.

²⁴ Ataksha tájarme, kamiriuka kawái nan̄kaamas uunt asa auja jijn wayachminiaiti. Núnisan̄ kuítrintin Yus akupeamunam pachiinkiatin ti itiurchataiti.”

²⁵ Ni unuiniamurjñ nuna antukar antúu ajarmiayi. Túrawar aniniainiarmiayi “¿Nuikia yaki uwempramniait?”

²⁶ Tuñiakui Jesus ashí ísar tímiayi “Aents uwempratniun nekas tujintiainiawai antsu Yuska ashí tujintiatsui.”

²⁷ Nuyá Pítiur tímiayi “Uuntá, iikia ashí ikiukchajik Ámin nemarsatai tusar. ¿Warjñ wáinkiattají iisha?”

²⁸ Jesus tímiayi “Nekasan tájame, ukunman̄ka ju nuñka yamaram ajastatui. Aents Ajasu asan, Wisha nuj, uunt akupin ajastatjai tura atumsha winia nemartusutirmeka Wijjaj métek akupin ajastatume ashí Israer-shuar akupkatin.

²⁹ Tura shuar ni jeencha, yachincha, umajincha, aparincha, nukurjincha, nuarjincha, uchirincha, tura nuñkencha Winia anentu asa ikiukin wekaakka, nu shuar nii ikiukmia núnisan̄ yamaisha ti untsurj wáinkiatatai tura ukunmasha tuke shiir pujustatui Yusjaj.

³⁰ Untsurj yamá penkerj áiniana nu ukunam ukunmaani pujusartatui, tura yapajjajwar yamá ukunmayá áiniana nu ukunam emka pujusartatui” tímiayi Jesus.

20

Jesus takarniun pachis áujmatsamiania nu

¹ Yus akupeamunam pachiinkiatin júnisaiti. Nuñka nérentin ni araamurjñ júuktaj tusa káshik iniartaj tusa júnkimiaiyi.

² Chikichik tenariu kuit jean tsawant takamtsuk akiktajrume tusa chichas ni araamun júuktinian akupkarmiayi.

³ Nantu takuntajsha ataksha jijnki shuar yujan wáiniak

⁴ timiai “Atumsha winia arakur júuktin yáintkiatarum. Shiir akiktajrume.” Tutai wearmai.

⁵ Ataksha tutupin aj nuyá áankúsha jijnki, núnisan̄ tinia akupkarmai.

⁶ Ataksha nantu patamsaj júnkimiai. Tura shuaran yujan wáiniak “¿Urukamtai takamtskesha áani pujarum?” timiai.’

⁷ “Warí, iincha iniatmainiatsji” tiarmai.’

⁷ “Tuñiakui timiai “Atumsha winia nuñkaruj takautarum. Péñker akiktajrume.”

⁸ “Kirit ajátekiáj takatrjñ wáinniun timiai “Takatan takasaru untsukam akikiarta. Kiaraj nan̄kamawaru emka akikiarta. Túram káshik nan̄kamawarujaj amuktá” timiai.

⁹ Takui nantu patamsa aj nan̄kamawaru wayawarmatai chikichik tenariu kuit jean ashí akikiarmai.

¹⁰ Mash uminramtai nuyá emka nan̄kamawaru wayawar “nuna nan̄kaamas achikchatjash” tu enentáimsarmai. Tura chikichik tenariu kuit jean achikiarmai.

¹¹ Achikiar nérenniun ittiurchat enentáimturarmai.

¹² Tura tiarmai “Iikia ashí tsawant nantujaj wáitsachjik. Ju shuarsha nantu patamsa aj nan̄kamawaruka penké ishichik takasaraí. Túrasa iijjaj métek akikiarume” tiarmai.

¹³ Tutai nérentin chikichikiniak iniakmas timiai “Úmpá, penké kasartsujme. Káshik chikichik tenariu kuit jeá chichasar iijjaj iwiarachjik, timiai.

¹⁴ Pai, ame kuítrum achikiume. Nantu patamsaj takasuncha amijjaj métek akiktinian wakerajaj.

¹⁵ Warí, winia kuítrujaj wi wakeramun túrachminkaitaj. Antsu wi tsan̄ka asamtai ¿yajauch enentáimturmek?” timiai.’

¹⁶ Núnisaiti Yus-shuarum. Émkaru áinia nu uku ártatui. Tura ukuyá áiniana nu, emka ártatui. Untsurj ípiaamu áiniawai tura ishichik achikma áiniawai.” Tu áujmatsamiayi Jesus.

Jesus ataksha ni jákatniurjñ etserkamiania nu

(Márkus 10.32-34; Rúkas 18.31-34)

¹⁷ Jesus Jerusarénnum jintiá wesa ni unuiniamurjñ akankin tiarmiayi

¹⁸ “Ístarum, Jerusarénnum wéajai. Nujsa Israer-patri úuntrjñ tura ni jintinniurjincha Winia surutkartatui. Nujsa, wi Aents Ajasu ajñ, “mantamnatí” túrutartatui.

¹⁹ Tura apachniun surutkartatui. Nuñ katsekrukar, awattiar krúsunum máawarti tusar túrutawartatui. Túrasa jakayatan menaintiú tsawantaj nantaktiatjai” tímiayi.

Jakupu tura Juañka nukurj Jesusan seamiayi

(Márkus 10.35-45)

²⁰ Nuyá Jakupusha Juansha, mai Sepetéu uchirí, nukurjijaj tariat Jesusan tikishma-trarmiayi. Tura nukurj Jesusan waitnentrurarat tusa seamiayi.

²¹ “¿Warí wakeram?” tímiayi Jesus.

Tutai nuwá tímiayi “Ame uunt akupin ajastatmena nuj winia uchir chikichik untsuurnu-maani chikichcha menaanmaani akupkarti tusam apujsarta.”

²² Takui Jesus tiarmiayi “Atum seatrumna nu nékatsrume. ¿Wi wáitsattajna nujai métek túramniakaitrum? Wi wáitsatniun yapá umartinia áinis umartiniaitjai. Núnisañ wáitsatniujai imiaitniua áintsan imiantiniaitjai. ¿Nú piniñnumiá umarminkiaitrum. Núnisañ imian-minkiaitrum?”

Tutai “Páchitskea” tiarmiayi.

²³ Tuíniakui Jesus tímiayi “Ayu. Winia piniñkruya umartatrum. Wi imiantiatjana nujai imiantiatrum. Antsu Wijai tsaninkia pujustinniaka Wikia íschatniuitjai, antsu winia Apar iwiarturu áinia nuna nuj apujsattawai” tímiayi.

²⁴ Chíkich tias (10) unuiniamurj nuna antukar nu jímiaran kajerarmiayi.

²⁵ Túmainiakui Jesus untsukar tiarmiayi “Ju nékarme, apachniúmka kapitíán ajasar ni shuarjñ nérenniua áinis ti akupenawai. Ni úuntrjsha waantu enentáimsar “wítjai akupniun” tu enentáimtikiainiawai.

²⁶ Antsu atumjainkia núnis áchatniuiti. Nañkaamaku ajastaj tákuñka chikicha yaintrj átiniaiti.

²⁷ Ame kapitíántrum ajastaj tákuñka ashí shuara yaintrj ajásti.

²⁸ Wisha Aents Ajasuítiatan, Winia yáintkiarat tusan táchaitjai antsu shuáran yáintaj tusan táwitjai. Untsurj shuaran tunáa tumashrjñ akikmatkataj tusan jákatniuitjai. Nuna tarimjai” tímiayi Jesus.

*Jímiar jji kusurun Jesus tsuármiania nu
(Márkus 10.46-52; Rúkas 18.35-43)*

²⁹ Jirikiú péprunmayá wénakui untsurj aents Nin nemariarmiayi.

³⁰ Nuj jintiá yantam jímiar jji kusuru pujuarmiayi. Jesus wéawai taman antukar kakantar untsukarmiayi. “Uuntá, uunt akupin Tawitia Uchirjñchukaitiam. Waitnentrurta” tiarmi-ayi.

³¹ Tuíniakui “Takamatsatarum” tiarmiayi.

Tútaisha nú nañkaamas untsukarmiayi. “Uuntá, Tawitia Uchiriá, waitnentrurta” tiarmiayi.

³² Tuíniakui Jesus wajas jji kusurun untsukar aniasarmiayi “¿Warí itiurtukat tusarum wakerutarum?”

³³ “Uuntá, iimtiaí tusar wakeraji” tiarmiayi.

³⁴ Tuíniakui Jesus nin waitnentrar ni jjiñ antiñkiarmiayi. Nu chichamaik ímiar niisha Jesusan nemariarmiayi.

21

*Jesus Jerusaréñnum wayqmiania nu
(Márkus 11.1-11; Rúkas 19.28-40; Juan 12.12-19)*

¹ Jerusaréñnum nuntumsar Petpajái péprunam jeawarmiayi. Nusha Uriwiu náinnium ayamchiiyayi. Nuj jeawar Jesus ni unuiniamurjñ jímiaran akupeak tímiayi

² “Tíjjuch péprunam wérum umpuuru umpuuruchijjai jñnkiamu wáinkiatarme. Nu atiarum itartitiarum.

³ Tura aents “Urukamtai áitkiarum” túramkurminkia “Uunt wakerawai, tura wárik awainkittiwai” titiarum” tímiayi.

⁴ Tura nusha yaunchu Yúsnan etserin aarmia nu umínkiatí tusa tímiayi. Júnis áarmiayi:

⁵ “Ashí Israer-shuarnum ju etserkatarum:

“Íistarum, atumi Akupniurj, péjchach ajas umpuuruchiniam ekeemak winitramprume.

Péjchach asa káarak áintstai umpuuru uchirjñ ekeemak winitrámtatrum,” titiarum.”
Tu áarmaiti.

⁶ Tutai nu jímiar unuiniamurj wear Jesus timia núnisañ túrawarmiayi.

⁷ Umpuuruchin nukurtiuk itiararmiayi. Tura ni pushirjñ áitkiarum Jesus entsamkamiayi.

⁸ Shuar untsurj ásar ni wéamunam pushirjñ áitkiarmiayi. Chikichcha nuká jurukar ni wéamunam áeprurarmiayi.

⁹ Shuar untsurj eem wearmia nusha tura uku winiarmia nusha kakantar untsumiarmi-ayi. “Juna weatrj uunt akupin Tawit asamtai nañkaamakuiti. Yusa náarjñ winiana ju íi Uuntrjñti. Shiir atí. Nayaimpinmasha Yus shiir awajsatai.” Tu untsumiarmiayi.

¹⁰ Jesus Jerusaréñnum wayamtai ashí shuar ti enentáimainiak “¿Jusha yait?” tiarmiayi.

¹¹ Chikichcha “Yúsnan etserin Jesusaiti, tiarmiayi. Nasarét pepru Kariréa nunñkanmayaiti” tiarmiayi.

*Yusa Uunt Jeen suruktinian Jesus surimkiamiania nu**(Márkus 11.15-19; Rúkas 19.45-48; Juan 2.13-22)*

12 Nuyá Jesus Yusa Uunt Jeen wayá kuítian súruiniak tura súmainiak pujan akúprámiayi. Kuítian yapajinia misaríncha ayanturmiayi tura yampitsa súruinia kutan̄krjncha núnisan̄ ayanturmiayi.

13 Nuyá tímiayi “Yus-Papinium árchamukait,

“Yusa Jeenka Yus aujtai jé̄aiti.” Antsu átumka kasa matsamtajya nútikiarme” tímiayi.

14 Nūi Yusa Jeen jii kusurarusha shutuapsha Jesusan tariarmiayi. Túramtai tsuárarmiayi.

15 Tura Israer-shuar pátrisha tura Israer-shuara jintinniurjsha aents tujintiamun Jesus túrakui íisar kajerarmiayi. Nu arantcha uchi Yusa Jeen “Juna wēat̄ri uunt akupin Tawit asamtai nan̄kaamakuiti” untsumainiakui Jesusan ti kajerarmiayi.

16 Tura tiarmiayi “¿Ju uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí juna tana jūka áujsachukaitrum. J̄unis tawai,

“Uchisha kuírchisha Yusa náarjn imiá shiir awajtusarat tusa Yus tsan̄katkai.” Tu áarmaiti.

17 Nuna tinia ikiuniak Jerusaré̄numiá̄ j̄iinki Petania péprunam we nūi kanarmiayi.

*Jesus iikiu numin yumin̄kramiayi**(Márkus 11.12-14, 20-26)*

18 Kashin tsawāar Jerusaré̄num waketas Jesus tsukaarmiayi.

19 Iikiu numi jintiá yantam wajan wáiniak akaktajtsa werimiayi. Tura werí aya núminiak wáinkiamiayi. Túra numin tímiayi “Atakka nerechattame.” Takui nu chichamaik káarmiayi.

20 Nuna wáiniak ni unuiniamur̄i ti enentáimprar aniasarmiayi “¿Urukaku imiá wárik jaka?”

21 Tuíniakui Jesus tiarmiayi “Nekasan tájarme, Yus nekas enentáimtakrumka, “nekaspash túrat” táchakrum iikiun túrajna nusha túramniatrum. Tura nu arantcha nu naint “Ékemtam nayaantsanam iniānta” tutai túrunattawai.

22 Ashí Yus áujeakum seamna nu, Yus nekas enentáimtakum seakmeka, wáinkiáttame” tímiayi.

*Yusa kakarmarijai Jesus takasmania nu**(Márkus 11.27-33; Rúkas 20.1-8)*

23 Yusa Uunt Jeen Jesus wayá unuiniamiayi. Turaj Israer-patri uuntri tura Israer-shuara úuntrijsa Jesusan tariar aniasarmiayi “¿Yana chichamejai jū túram. Ya jū túratniuncha akuptamkai?” tiarmiayi.

24 Tutai Jesus tiarmiayi “Wisha aniastaj tusan wakerajrume. Jū áirkakrumniñkia Wisha yana chichamejai túraj nuna ujaktatjarme.

25 Wats, ¿ya imiakratin Juan̄kan akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkamiayi” tákurniñkia “¿urukamtai enentáimtichuitrum?” túramtatji.

26 Kame “shuar akupkaiti” tákurnisha ashí aents mantamattaji. Warí, ashí niisha Juan̄ Yúsnan etserniuyi tuíniatsuk” tiarmiayi.

27 Nuyá Jesusan “Nékatsji” tiarmiayi.

Tutai Jesussha āiniak “Wátsek, Wisha núnisnak akuptukua nuna ujachattajrume” tímiayi.

Jimiará uchi tiarmia nuna áujmatsamiania nu

28 Jesus unuinia tiarmiayi “Enentáimpratarum. Shuar uchin jímieran takakuuyi. Nuna chikichkin chicharuk timiai “Uchirú, arakur júuktin yamá wetá.”

29 ‘Tutai uchi “Atsá, nakitiajai” timiai. Tayat urum enentáimiar takaumai.’

30 ‘Nuyá apar̄i chikichnasha werí núnisan̄ timiai.’

‘Tutai uchi “Apawa, páchitsuk wetajai” timiai, túrasha wéchamai.’

31 ‘¿Tú ni apar̄i wakeramun umirkama?” tímiayi Jesus.

Tutai “Emkaa nu” tiarmiayi.

Tuiniakui Jesus tímiayi “Nekasan tájarme, yajauch shuar ainia nu tura tsanirma ainia nusha átumka pachiiintsrumniñ nii emka Yus akupeamunam pachiiinkiatatui.

32 Iis, imiakratin Juan̄ pé̄nker wekasatniun etserkamiayi, túrasha antukchamarume. Antsu yajauch shuar ainia nu tura tsanirma ainia nu umirkarmiayi. Nusha wáinkiaiatrum atumi tunaan̄i enentáimturhamarme’ tímiayi.

*Yajauch takaun áujmatsamiania nu**(Márkus 12.1-12; Rúkas 20.9-19)*

33 ‘Jū chikich áujmatmasha antuktarum. Nunká nérentin uwa ajan ajammai. Tura wenuimiai. Uwa neketaincha najanamai. Kumpin jēancha najanamai. Tura mash pé̄nker iwiar shuar wáitrukarti tusa apujkimiai. Tura niñkia yajá nun̄kanam wemai.

³⁴ Tura júuktin tsawant jeamtai juuk nakak akúptúrkartí tusa chíkich takarniurj akupkamai.

³⁵ Tura nuj pujuinia nu, akupkamun achikiar chikichnaka katsumkar, chikichnasha máawar, chikichnasha kayajaj tukurar máawarmai.

³⁶ Túrawarmatai nérentin takarniun nuna nankaamas akupramai. Ataksha nuj pujuarmia nu núnisañ túrawarmai.

³⁷ Amúamunam ni uchirín akupeak “Winia uchir asamtai umirkachartimpiash” timiai.

³⁸ Túrasha nu takau nérenniu uchirín wáinkiar “Nuna aparj jakamtai juna mashi júkishtatuak, tiarmai. Maatai, túrar ii nérentin ajastai” tiarmai.

³⁹ Tiar achikiar arant júkiar nuj máawarmai.”

⁴⁰ Tinia Jesus aniasarmiayi “Nunká nérenniurj taa nu takaun ¿itiurkatin?” tímiayi.

⁴¹ Tutai tiarmiayi “Nu shuar ti yajauch ásmatai waitnantsuk máawartatui. Tura nu ajan chíkich takauun neren akanak nin susamnia nuna apujstatawai” tiarmiayi.

⁴² Tuñiakui Jesus tímiayi “Átumka Yus-Papikia ¿penkek áujchaitrum? Júnis áarmaiti:

“Jea jeamin utsankarmia nú kaya ashí kayajaj nankaamas apujsamuiti. Núnaka ii Uuntrj Yus túraiti. Iisha ísar ti enentáimtaji.” Tu áarmaiti.

⁴³ Tuma asamtai tájarne, Yusna írúnna nu wáinkiatárum tusa suramsamuitiat atumíya junas chíkich aents súnastatui. Niisha awantukiartatui.

⁴⁴ Tura shuar nu kayan tukumainia nuka kupintrartatui. Tura nu kaya shuarnum iniarka tsai tsai awajsattawai auka” tímiayi Jesus.

⁴⁵ Israer-patri uuntrjsha Paríséusha Jesus áujmatman antukar “in túramji” tusar achiktaj tiarmiayi.

⁴⁶ Tura ashí aents “Jesus Yúsnan étserei” tuinia ásmatai nin ashankarmiayi.

22

Métek-taku chichamjaj nuatnaiyamun Jesus áujmatsamiania nu

¹ Jesus ataksha áujmatuk juna tímiayi:

² “Yus akupeamunam pachinikiartin júnis enentáimpramniaiti. Uunt akupin ni uchirj nuáteakui nampermamai.

³ Túrak ni takarniurj ipiaamautarum tusa akupkarmai. Tura ipiaamusha nakitrarmai.

⁴ Ataksha chíkich takarniuncha ipiaamakrum ju titiarum tusa akupkarmai. ““Mash yurumkan iwiarajaj, tawai, titiarum, timiai. “Waakasha máatarum tusan akupkarjai, tawai. Ajaermancha máatarum tusan akupkajaj, tawai. Ashí nuatnaiyamunam winiarti,” tawai” titiarum” timiai.

⁵ Támaitiat nú ipiaamusha nakitrarmai. Chikichik ni nunken wemai. Chikichcha kuítian suruktinian wemai.

⁶ Chikichcha ipiaakratniun achikiar yajauch awajsarmai, tura chikichnaka máawarmai.

⁷ Túramtai uunt akupin ti kajek, ni suntarj mash máatarum túrarum ni jeé mash ekeemáktárum tusa akupkarmai.

⁸ Nuyá ataksha ni takarniurj akupkamai. “Nuatnaikiatin jisat mash iwiamamuiti, timiai. Tura nu ipiaamu winichmin armái.

⁹ Tuma asamtai pepru jintí werum ashí shuar náñkamas wáintrum nu ipiaatarum” timiai.

¹⁰ Takui takarniurj jínkiar pepru jintin wajainian, yajauch shuarnasha péñker shuarnasha, ashí ipiaawarmai. Túramtai jeé piákmai.”

¹¹ Nuyá uunt akupin ipiaamun ísartaj tusa wayamái. Nu j shuarn péñker iwiamamprachun wáinkiamai.

¹² Tura timiai “Umpá, ¿urukamtai nuatnaiyamunam entsatai pushj entsatsuk wayam?” Tutai nu áishman tákamtak pujusmiayi.

¹³ Nuyá uunt akupin yurumka ajaaman timiai “Achikrum nawenmasha uwejunmsha jinjiarum aa jínkrum kiritniunam ajapatarum. Nuñsha ti úutin ti wáitsatin átatui” timiai.

¹⁴ Kame untsurj ipiaamu áiniawai antsu ishichik achikma áiniawai.”

Uunt akupin Sésar akiktinia nu

(Márkus 12.13-17; Rúkas 20.20-26)

¹⁵ Nuyá Paríséu chichaman najatawar uyumtikiatai tusar tiarmiayi.

¹⁶ Túrawar ni shuarincha tura akupin Erutisa nemarniurjsha Jesusan akuptukarmiayi. Kame akupin Erutis uunt akupin Sésara kuitri wáinin asamtai nu apachniasha akupkarmiayi. Niisha jeariar Jesusan tiarmiayi “Uuntá, amesha nekas chicham chichaame. Nu nékaji. Chíkich shuar tuinia nu ántutsuk nekasam Yus-Chicham jintíame. Shuar shiir enentáimturarat tusam jintiatsme, tiarmiayi.

¹⁷ Tuma asamtai ju nekaatai tusar wakeraji. ¿Uunt akupin Sésar akikminkiait?” tiarmiayi.

¹⁸ Jesus ni yajauch enentájjaj aníam nekáa tiarmiayi “Aya shiir chichamtniaitru me. ¿Urukamtai uyumatkiarkatin wakerutarum? tímiayi.

¹⁹ Wats, Sésar akiktinia nú kuit ititartiarum.” Takui chikichik kuítian itiariarmiayi.

²⁰ Nuna iis Jesus aniasarmiayi “¿Jui yana yapimpiait tura yana naari áarmait?”

²¹ Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susatarum. Tura Yusna nusha Yus susatarum” tímiayi.

²² Tura nuna antukar ti enentáimprarmiayi. Tura ikiuniak wearmiayi.

Jesusan jakamunmayá nantaktinian aniasarmiania nu

(Márkus 12.18-27; Rúkas 20.27-40)

²³ Nu tsawantajk Satuséusha Jesusan tariarmiayi. Satuséuka jakamunmayá nantakchat-niuiti tuíniawai. Nuna tiniu ásar juna Jesusjai áujmatsarmiayi.

²⁴ “Uuntá, Muisais juna áartampramijai, “áishman uchin yajutmatsuk jakamtañkia ni yachi nu nuwan nuatak ni yachin yajutmátrati,” tu áarmiayi, tiarmiayi.

²⁵ Ayu, íi shuarnum siati (7) yáchtintin áarmiayi. Iwiajri nuatak uchin yajutmatsuk jakamiayi. Tura wajen ni yachin ikiurkimiayi.

²⁶ Tura niisha nuatak uchin yajutmatsuk jakamiayi. Tura chikichcha núnisañ jakamiayi. Tura chikichcha siati armia nu ashí nuatkar jákarmiayi.

²⁷ Nuyá nuwasha jakamiayi.

²⁸ Jakamunmayá nantakiar ¿yaki nekas ni aishri ati? Ashí nin nuatkacharmakia” tiarmiayi.

²⁹ Tuíniakui Jesus tímiayi “Yus-Chichamsha nékachkuram tura Yusa kakarmarjsha nékachkuram nantaktin atsawai tákuram ti awajiar me.

³⁰ Nekaatarum. Jakamunmayá nantakiaruka nuatkachartatui. Antsu Yusa suntari nayaimpiniam pujuinia núnisar nuartichu pujusartatui.

³¹ Túrasha jakamunmayá nantakiartatna nu nekaatajtsa wakerakrumka ju enentáimstarum. Muisais aarma nu áajsachukaitrum. Júnisan áarmiayi:

³² “Witjai Apráama Yúsrinjai, Isaka Yúsrinjai, Jakupu Yúsrinjai.” Tu áarmiayi.

Watek, Yuska jaká Yúsrinchuiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruitai Yusjai iwiaaku pujuiniak nantakmin áiniawai” tímiayi.

³³ Ashí aents nuna antukar nu jintintiam ti enentáimprarmiayi.

Yus akupkamu imiá enentáimtustinia nu

(Márkus 12.28-34)

³⁴ Satuséu Jesusan ajktinian tujinkiamatai Pariséu nuna antukar iruntrararmiayi.

³⁵ Tura chikichik Pariséu jintintin asa Jesusan uyumtikiataj tusa aniasmiayi

³⁶ “Uuntá, ¿túa Yus akupkamu imiá nankaamas enentáimtustiniat?”

³⁷ Tutai Jesus tímiayi “Júiti: “Ame Yúsrum ashí enentáimjai aneeta. Ashí ame wakanmijajsha tura tuke enentáimtusam aneeta.” Tu áarmaiti, tímiayi.

³⁸ Núiti emka ashí akupkamu nankaamas enentáimtustinia nu.

³⁹ Chikichcha jujaj métek-taku awai. Nusha tawai: “Ame írtramuram ame ayashim aneamna nútiksamek aneeta.”

⁴⁰ Nu jimiir akupkamu umirkam ashí Muisais akupkamia nusha tura ashí Yúsnan eterin unuiniararmia nusha umirkattame” tímiayi.

Kristu Tawit weeaitiat Yusa Uchirinti

(Márkus 12.35-37; Rúkas 20.41-44)

⁴¹ Tura Pariséu tuke irunar pujuiniakui

⁴² Jesussha aniasarmiayi “Kristu tutai ¿ya weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

⁴³ Tuíniakui Jesus tiarmiayi “Nuikia ¿urukamtai Tawit, Yusa Wakani “titia” tutai, Kristun “winia Úuntur” tímia? Iis, Tawit juna tímiayi:

⁴⁴ “Uunt Yus winia Úuntru juna tímiayi: “Akupin pujutainium, winia untsuuruinj, pujusam náarsata. Ashí ame nemasrumin nupetkan Ámin umirtamkarti tusan amastatjai” tímiayi Yus.” Tu tímiayi Tawit.

⁴⁵ Watek, Tawit Kristun “winia Úuntur” tajsha ¿itiurak ni pampanmari áti?” tímiayi Jesus.

⁴⁶ Nuna takui penkesha áikcharmiaiyi. Túrawar atakka uyumantikiatai tusar aniascharmiaiyi Jesusan.

23

Jesus Pariséuncha Israer-shuara jintiniurinha “yajauchitru me” timiania nu

(Márkus 12.38-40; Rúkas 11.37-54; 20.45-47)

¹ Jesus ni unuiniamurinjcha tura ashí shuárnasha tiarmiayi

² “Israer-shuara jintinniurjsha tura Pariséusha Muisais akupkamun paant ujatmaini-awai.

³ Tuma asamtai tuinia nu umirkatarum. Túrasha ni túruinia nu jumamkiirap. Nu shuar shiir chichainiyat nusháa túrin áiniawai.

⁴ Ti itirchat ana nusha akupeenak ti emeram entsaktinia áintsan áentsun apujtuiniawai. Túrasha chikichik uwejejáisha ishichkisha takuitniun nakitiainiawai.

⁵ Aya shuar írsarti tusar ashí túruiniawai. Ashí shuar péñker enentáimturarti tusar Yus-Papin nijiajncha tura kunturjncha ti wan̄karam awajsar anujak yujainiawai. Tura nu arantcha pushirj sasariarman ashí shuarjaj nan̄kaamas esaram awajas wekainiawai.

⁶ Nampernumsha péñker iwiamunam pujustinian wakeruiniawai. Iruntainmasha nan̄kaamantu ajasa pujustinian wakeruiniawai.

⁷ Jintia wekainiaksha ashí aents áujtuiniak “Jintínkiartiniá” turutiarti tusa wakeruiniawai’ tímiayi.

⁸ “Túrasha átumka ashí shuar “Jintínkiartiniá” turutiarti tusa enentáimsashtiniaitrume. Átumka nuámtak yáchintrume. Átumka chikichik jintinkiertin ni naari Kristu takakrume. Nu asamtai “Jintínkiartiniá” túramcharmin áiniawai.

⁹ Ju nan̄kanmasha shuar “Aparú” tíirap. Chikichik nayaimpiniam pujana nu atumi Aparinti.

¹⁰ Atumi uuntrj aya Kristuk asamtai “Uuntrú” túramcharmin áiniawai.

¹¹ Antsu átum írutkamunmaya uunta nuka peejchach átiiaiti.

¹² Shuar nan̄kaamantu ajastaj tákuinkia Yus nin péjchach awajsattawai. Antsu péjchach ana nuna Yus nin nan̄kaamaku awajsattawai’ tímiayi.

¹³ ‘Maa wáinkiatárum jintinniutirmesha, Pariséutirmesha. Ántrarum shiir chichamtini-aitrume. Yus akupeamunam wayatín waiti epenniuitrume. Atumsha wayatsuk chikichcha wayataj tuinia nusha suritniuitrume.’

¹⁴ ‘Maa wáinkiatárum jintinniutirmesha, Pariséutirmesha. Ántrarum shiir chichamtini-aitrume. Wajé jee atankiurum aents enentáimturarain̄ tusarum ti esaram Yus áujtiniuitrume. Túrin asarum átum ti asutiniátniuitrume.’

¹⁵ ‘Maa wáinkiatárum jintinniutirmesha, Pariséutirmesha. Ántrarum shiir chichamtini-aitrume. Nun̄kanmasha nayaantsamasha yajá wekainiuitrume chikichik shuar wini nemarkusat tusarum. Tura atumi nemark ajasmatai atumjaj nan̄kaamas tunáa sumamamnia awajearme.’

¹⁶ ‘Wáinkiatárum átumka. Jintinkiertiniaitiatrum nékachu asarum kusurua áiniuitrume. Ju jintiarne: “Shuar nekasan tajai tusa Yusa Jeeñ páchiakka nii tana nuna umitsuk ikiukmini-aiti. Antsu nekasan tajai tusa Yusa Jeeñ kuri ana nuna páchiakka ti nekass umiktiniaiti” tíniuitrume.

¹⁷ Nétsétrume. Yúsjaínkia ashí kuri ánrachukait. Antsu Yusa Jeeñ írunna nuka aya nuin ikiusma asa Yusna ajasuiti. Tuma asamtai kurijjaj nan̄kaamas Yusa Jeeñ enentáimtustiniaiti. Enentáimcha asarum kusurua áinin wáakuitrume.

¹⁸ Nu arantcha tíniuitrume: “Shuar nekasan tajai tusa naman̄-maar-Yus-sútain páchiakka nii tana nuna umitsuk ikiukminiaiti. Antsu Yús-sutainiam naman̄ patasman páchiakka ti nekass umiktiniaiti” tíniuitrume.

¹⁹ Nétsétrume. Pen̄ké naman̄ Yusjaj ánrachukait. Aya Yús-sutainiam patasma asa nu naman̄ enentáimtuschatniukait. Enentáimcha asarum kusurua áinin wáakuitrume.

²⁰ Enentáimpratarum. Shuar nekasan tajai tusa Yús-sútain páchiakka aya sútainiak páchiatsui antsu sútaincha tura nu patasmancha máí-metek páchiawai.

²¹ Núnisan̄ shuar Yusa Jeeñ páchiakka aya nunak páchiatsui antsu Yus nu jeanam pujú asamtai nunasha páchiawai.

²² Núnisan̄ shuar nayaimpin páchiakka Yus pujutainchsetrume. Pen̄ké naman̄ Yusjaj ánrachukait. Aya Yú tura Yus nu pujana nunasha páchiawai.’

²³ ‘Maa wáinkiatárum jintinniutirmesha, Pariséutirmesha. Ántrarum shiir chichamtini-aitrume. Kumintsu nukessa, anisa nukessa, menta nukessa tias (10) akantram chikichik akankamu Yus súwitrum. Nuka péñkeraiti, ikiukchatniuiti. Túramaitiat nekass péñker túratniua nu túrutusk ikiuwitrum. Yus nekass enentáimtustinchha, waitnentáimturatincha tura tuke péñker túratniusha enentáimtsuk ikiuwitrum.’

²⁴ Átumka jintinkiertiniaitiatrum nékachu asarum kusuru áiniuitrume. Kutanam yajasmach enketu wáinkiumeka júwitrum. Túrayatrum kamiriu wáinkiumeka kawai nan̄kaamas úunt aín̄ takamtsuk kújawitrum.’

²⁵ ‘Maa wáinkiatárum jintinniutirmesha, Pariséutirmesha. Ántrarum shiir chichamtini-aitrume. Átumka tsapasha pinijnsha íntiaian̄ nijatsuk aya pátatek nijawitrum. Núnisrum

pátatek shiir awajmamniutrume tura enentáiminkia kasamkatniusha tura chíkichna wakeruktincha nujaj piákuitrume.

²⁶ Kusuru áiniuitrume, Paríséutirmeá. Antsu emka initiaanĭ tsapasha pininsha nijjaktarum. Túrakrumniĭkia pátatesha mai péñker átatui. Núnisrum atumsha atumi enentáin ana nu shiir awajсарum pátatesha shiir átatrume.'

²⁷ 'Maa wáinkiatarum jintinniutirmesha, Paríséutirmesha. Ántrarum shiir chichamtini-aitrume. Iwiarsamu pújujaj yakarak shiir awajsamua áiniuitrume. Aanĭ shiir ániawai. Tura initkia jaká ukunchĭjjaj piákuiti.

²⁸ Núnisaitrume atumsha. Chíkich shuar ísmaka ti shiira áiniuitrume. Túrasha atumi enentáinkia ashí mujmĭai piákuiti.'

²⁹ 'Maa wáinkiatarum jintinniutirmesha, Paríséutirmesha. Ántrarum shiir chichamtini-aitrume. Yaunchu Yúsnan etserin iwiarsamunam átumka shiir enentáimtakrum jea jeamkaitrume. Tura péñker shuar yaunchu jákarusha shiir enentáimturtaĭ tusarum ni iwiarsamu shiir awajearme.

³⁰ Túrakrum ju tĭniuitrume: "líkia yaunchu ii weatĭrĭjjaj pujaitkiurkia Yúsnan etserin máatin yáimkiachaĭji."

³¹ Nujaj ti paant chichaarme atumsha. "Íi weatĭrĭ Yúsnan etserniun máawar tunáa túrin ármĭayi" tárume. Tura "Yáimkiachaĭji" táyatrum, atumsha métek túrin asarum "Nĭjjaj méteketĭji" tárume.

³² Wats, atumi weatĭrĭ nanĭkamawarmĭa nu átum amuktatrume' tĭmiayi Jesus.

³³ 'Napia áiniuitrume. Shuar aya yajauch awajniuitrume. Túmatirmesha Yús tunáa shuaran jinĭum akupkartatna nuyá ĭitiurak uwempratarum?

³⁴ Untsurĭ shuaran akuptuktatĭarme. Yúsnan etserniuncha, ti nekanĭcha, jintinkĭartĭniasha akuptuktatĭarme. Tura atumsha chíkich máattarme, chíkĭchcha krúsum ajinĭtrarum máattarme, chíkĭchcha iruntai jeanĭnam asutiáttarme, tura chíkĭchcha ashí nunĭkanam áinĭtrattarme.

³⁵ Nu tura asarum péñker shuara numpé puarma nujaj átum sumamattarme. Yámankamtaik Apir ti penĭker shuáraitai máamuyayi. Tura ukunam Perekĭasa uchĭrĭ Sakarĭas atumi uunĭtrĭ Yusa Jee ámanum namañ-maar-Yús-sutai ajapén aténkamunam máawarmĭayi. Wats, Apir máamunmayá Sakarĭas máamunam ashí péñker shuar ti unĭsurĭ máamujaj sumamattarme.

³⁶ Nekasan tájarme, yamáĭ pujuinia nú shuar ashí nujaj sumamawartatui' tĭmiayi Jesus.

*Jerusarénnumiĭq shuaran Jesus aneak útmĭania nu
(Rúkas 13.34-35)*

³⁷ Jerusarénnumiĭqĭirmeá, Yúsnan etserin máiniaitrume. Yus akatar akupturmakmasa kayajaj tukuram máiniaitrume. Túrin árumniĭ waitnentajrume. Atash ni uchĭrĭn weaana áitkĭasnak weartĭnian wakerimĭarme, tura nakĭtramarme.

³⁸ Íistarum. Ame pépruram ajapamuiti.

³⁹ Tura "Yusa náarĭjn winiana nu, shiir atĭ" tĭtiatrumna nu tsawant jeatsajĭn penĭké wáitkĭashtatrume. Nuna tájarme" tĭmiayi Jesus.

24

*Yusa Uunt Jee saanaktĭnian Jesus ujakmĭania nu
(Márkus 13.1-2; Rúkas 21.5-6)*

¹ Jesus Yusa Uunt Jeeĭa ĭiinki weaj ni unuĭniamurĭ nin tariar Jeeĭn iniaktusar áujmatsarmĭayi.

² Tura Jesus tiarmĭayi "Nu mash yamáĭ wáinĭrume. Tura nekasan tájarme ukunmanĭka mash saanaktiatui. Chíkĭchĭk kayaksha ekenĭtramurĭ atsuttawai" tĭmiayi.

*Amúamu tsawant nekaatĭn
(Márkus 13.3-23; Rúkas 21.7-24; 12.22-24)*

³ Nuyá Uriwiu náinnium wear niĭnĭki nuĭ pujasar ni unuĭniamurĭ Jesusan aniasarmĭayi "ĭNusha urutaik túrunat'. Tura ame tátinĭcha tura nunĭka amuukatĭn tsawant jeakuĭsha warĭjjajĭn nekaattaj'? Nu uĭatĭkata" tiarmĭayi.

⁴ Tuĭniakui Jesus tĭmiayi "Aneartarum, ananĭkramawairap.

⁵ Untsurĭ shuar winia náarun pachisar "wi Krĭstuitĭjai" tiar unĭsurĭ shuaran ananĭkawartatui.

⁶ Tĭ unĭsurĭ meset chicham antuktatrume túrasha sapijmiakairap. Núnisaĭn átinĭiaiti nunĭka amúatsajĭn.

⁷ Apachcha chíkich nuṅkanmaya apachjai máaniawartatui. Tura ti tsukasha átatui. Sunṅursha ti pampartatui. Uṣsha ti uṛkartatui. Nuka untsurj nuṅkanam ashí túrunawartatui.

⁸ Nujai ti wáitsatin aya yama naṅkamui' tímiayi.

⁹ 'Nuyá atumniasha yajauch awajserti tusa surutmakartatui. Tura mantamawartatui. Tura winia naar pachia asakrumin ashí shuar mujramkartatui.

¹⁰ Nu tsawantaj untsurj shuar Yúsan iniaisartatui. Túrawar nuamtak mujñiainiak surunairartatui.

¹¹ Untsurj shuar wáitruiniak "wi Yúsnan etserniuitjai" tiartatui. Túrawar untsurj shúáran nusháa enentáimtikrartatui.

¹² Tura tunáa ti ákui nuamtak anenaichartatui.

¹³ Tura shuar ashí nuna tuke katsuntra nu uwemprattawai.

¹⁴ Ashí aents nekaawarat tusa Yus-Chicham ashí nuṅkanam etsernaktatui. Túramtai amuukatin tsawant jeattawai' tímiayi.

¹⁵ Shuar juna áujea nu enentáimprati. Kame Jesus tímiayi "Yúsnan etserin Taniar mujmi-amtik tuke emesratin ana nuna yaunchu aar etserkamiayi. Nuka Yusa Jeeṅ wantinkiamtai

¹⁶ ashí shuar Jutía nuṅkanam írúnna nu, muranam pisararti.

¹⁷⁻¹⁸ Ti wárik pisartin asamtai shuar jea yakí pujaksha tura shuar ajanam wekaakusha jea waketi warirj jukitijá tichati. Antsu nuyañ wárik pisarti.

¹⁹ Nu tsawantaj nuwá ajamtincha tura kuírchin takaku ainia nusha ti wáitsartatui.

²⁰ Ayampratin tsawantajsha tura michá nántutincha nu pisartin tsawant áchatu tusarum Yus seatarum.

²¹ Maa, nu tsawantaj ti wáitsatin átatui. Ti yáunchusha núnisaṅ wáitsatin atsuuyayi. Ukunmasha atsuttawai.

²² Nu wáitsatin ti esarmaitkiuñkia chikichkísha uwemprachainti. Tura Yus nu wáitsatniun wárik amumtikiattawai. Shuar Niiniu ajasarat tusa achikma ainia nu uwemprarat tusa wárik amumtikiattawai' tímiayi.

²³ "Tura atumin "Júiti Kristu," tuñiakuisha tura "Nuṅ pujawai" tuñiakuisha anturkairap.

²⁴ Untsurj shuar Krístuitjai tusar wantinkiertatui. Untsurjsha "Yúsnan etserniuitjai" tiartatui. Tura shúáran anaṅkataj tusar aents tujintiamun iniakmasartatui. Tura ti kakarman túruiniak Yús-shuarnasha anaṅkamin ániakuñkia anaṅkawarainti.

²⁵ Túrunatsaiṅ nuna emka ujaajrume.

²⁶ Tuma asamtai "Iis, Kristu nuṅ aents atsamunam pujawai" túramainiakuisha nuṅ wéerap. "Juṅ úumak pujawai" tuñiakuisha anturkairap.

²⁷ Núnisaṅ úumkan táchattajai. Peem péetuk ti wárik ashí nuṅkanam wáinkiachminkiait. Núnisnak wi Aents Ajasuka winiakun paant wantinkiatjajai.

²⁸ Wats, jaka tepaana nuṅ chuan káutkachartatuak' tímiayi.

Kristu tátinri

(Márkus 13.24-37; Rúkas 21.25-33; 17.26-30, 34-36)

²⁹ "Ti wáitsatin naṅkaamasmatai ti wárik tsawáṅ nantu kajinkiatawai. Tura kashí nantusha etsantrashtatui. Yaasha ashí muchitrattawai. Nayaimpiniam kakaram ainia nusha peantrartatui.

³⁰ Nuñkia Wi Aents Ajasuka, tátiniur paant átatui. Tura ashí nuṅkanmaya aents Wi winiáṅ wáitkiar asuttiamattaji tusar útiartatui. Wisha ti kakaram tura Yusa wincharijjai yurañminiam winiáṅ wáitkiartatui.

³¹ Yusa suntarjñ kachu kakaram umpuarterum tinia akupkamtai nu suntar ashí nuṅkanmaya ashí Yús-shuarnan, Yus achikma ásmatai, írurartatui' tímiayi.

³² 'Iikiu numirj nakumea nu nekaatarum. Ni nuken eteakui "esat nantu jeatemayi" tátsurmek.

³³ Núnisaṅ ashí ju wáinkiuirmeka "amuukatin tsawant nekas jeatemayi" títiniaitrumek.

³⁴ Nekasan tájarne, yamá aents pujuinia nu amúatsaiṅ ashí túrunattawai.

³⁵ Nuṅkasha nayaimpisha amuukartatui antsu winia chichamur amuukashtatui' tímiayi.

³⁶ "Tura nu túrunatin tsawant nekanachminiaiti. Yusa suntarjñsha nékainisui. Wisha Yusa Uchirñtiatnak nékatsjai. Antsu aya winia Aparuk nékawai' tímiayi.

³⁷ "Wi tátiniur jeamtai yaunchu Nuai pujumia nú tsawantin túrunamia núnisaṅ átatui.

³⁸ Nu tsawantin, tuke amaartsaiṅ, aya júnisaṅ aa asamtai yurumuk umamar pujuarmiayi. Nuatnainiarmiayi. Ni nawantrjñcha nuatmamtikiarmiayi. Tura tumá pujuiniaṅ Nuai uunt kanunam enkemamtai

³⁹ nu aents tuke nékainiatsaiṅ ama amaarak mash amuukarmiayi. Núnisaṅ átatui Wi tátin jeamtai.

⁴⁰ Nu tswantajk jimiara shuar ajanam pujuttawai. Chikichik junaktiatui tura chikichikia ikiunkittiwai.

⁴¹ Núnisan jimiara nuwa shana nekeak pujuttawai. Chikichik junaktiatui chikichicha ikiunkittiwai' tiamiyi.

⁴² 'Nu asamtai atumsha iwiarnarum pujustarum. Nekaachminiaiiti uruk aintsuk tar-itjiarum.

⁴³⁻⁴⁴ Tuma asamtai aneara pujustarum. Wi nekaachmanum tatin júnisan enentáimpranniaiiti. Shuar ju kashi kasa tatinian nekaanka kánutsuk kasa táawaj tusa iwiarnar nákasainti. Núnisrum aneara pujustarum.'

Pénker takamtikniuncha yajauch takamtikniuncha Jesus áujmatsamiania nu (Rúkas 12.41-48)

⁴⁵ 'Shuar pénker uminian tura pénker enentáimniun áujmatsattajai. Nuna uuntri yaja irauweak "Yurumátin jeamtai winia takartin ayuratarum" tichanpiash.

⁴⁶ Nu takamtikniuncha ni uuntri taa takatrin tiamirusan túran tariñkia shiir enentáimtusainti.

⁴⁷ Nekasan tájame, umin asamtai ni uuntri ashí ni waririn wáitrukát tusa takatan susattawai.

⁴⁸⁻⁴⁹ Antsu úuntur wau táchattawai tusa takamtikin ni uuntri yáintrin yajauch awajeak tura takatsuk aya yurumátiniun tura nampektinian wararkunka nu takamtikin yajauchiiti.

⁵⁰ Turaj ni uuntri aya aneachma taa nu takamtikniun, yajauch asamtai,

⁵¹ ti kakaram asutiattawai. Yajauch shuar pujuinia nu akupkattawai. Nujsa ti wáitiak ti úuttiatiui' tiamiyi Jesus.

25

Jesus tias (10) nuwan áujmatsamiania nu

¹ 'Yus akupeamunam pachiinkiatin júnis átatui. Nuatnaikiatin jisat akui tias nuwa natsa kantiran akaawar nuátkattana nu áishman kan inkiun jeá itiatui tusar wearmai.

² Senku nuwa enentáimcha armai. Tura chikich senku nuwa enentáimin armai.

³ Enentáimcha arma nú nuwa aya akaamunak juñiak amuukamtaí yaraatniun asuitin júkicharmai.

⁴ Antsu chikich senku núwaka akaamuncha juñiak tura ataksha amuukamtaí yaraatniun asuitin júkiarmai.

⁵ Tura júnkiarmatai nuatkatin áishman wari taachkui karj pujakui kanararmai.

⁶ Nuyá kashi ajapén shuar untsukum "Pai nuatkatin winiawai. Werirum inkiunjarum" timiai.

⁷ Tu untsumon antukar nantakiar kantiran akaatai tusar pujursarmai.

⁸ Nuyá senku nuwa enentáimcha arma nu, chikich nuwa enentáimniun tiarmai "Incha atumi asuitirj ishichik ajamprusaitia. Ii kantirjsha kajiniawai."

⁹ 'Tutai chikich senku nuwa tiarmai "Atsá, warí incha jeartamchattaji. Tura atumnia penké jeashtatui. Nekaska surutainium werum sumaka utumtarum" tiarmai.'

¹⁰ 'Tura nuyá senku nuwa enentáimcha arma nu, asuitian sumak utitai tusar wéaraj ukunam nuatkatin áishman tamai. Túramtai enentáimin nuwa arma nuka nuatnaikiatin námpernam nuatkatniujaj wayawarmai. Túramtai wáitin epeniarmai.

¹¹ Tura epeniaraj enentáimcha nu táarmai. Tura tiarmai "Úuntá, waiti uratritia."

¹² 'Tu untsumainiakui nu uunt kajerak chichak "Cha, zyátsukaitrum? Penké nekatsjarne" tiarmai."

¹³ Jesus nuna áujmatas umik tiamiyi "Aents Ajasuitjai tura tatin tsawantrusha tura uruk ain tátaj nusha nékatsrume. Tuma asarum tuke iwiarnarum pujustarum' tiamiyi.

Kuit susamun áujmatsamiania nu

¹⁴ 'Núnisan Wi tatin júnisaiiti. Shuar chikich nunkanam wéak, ni takarniurjn untsukar ni kuítrin akanak súsarmai.

¹⁵ Chikichiniak senku mir (5.000) kuítian susamai. Chikichnasha jimiara mir (2.000) kuítian susamai. Tura chikichnasha chikichik mir (1.000) kuítian susamai. Nii takastin jearma nujai métek súsarmai. Tura ikiuak yaja wemai.

¹⁶ Takarjn senku mir kuítian achikmia nujai takakmas ataksha senku mir kuítian patak-mai.

¹⁷ Chikichcha núnisan jimiara míran achikmia nujai takakmas ataksha jimiara míran patakmai.

¹⁸ Tura chikich shuar ni uuntri kuítrin chikichik míran achikmia nuna waja taur úukmai.'

¹⁹ Nuyá ukunam nu shuara uuntri támai. Tura kuítian súkiarma nujai itiuirkarmakit tusa untsukarmai.

²⁰ Emka senku mir kuítian achikmia nu tamai. Nuyá ni úuntriñ chíkich senku mir patakman suak timiai “Uuntá, senku mir kuit surusmame. Pai, atak senku míran patasmajai.”

²¹ “Takui ni uuntri timiai “Ti péñker takakmauwitme. Nekas uminiaitme. Ishichkijajisha ti péñker takakma asakmin ti núkap yamaikia amastatjai. Winí wayam wijjai ti shiir warasta” timiai.’

²² “Nuyá chíkich shuar jimiará míran achikmia nu tarí timiai “Uuntá, jimiará mir surusmame. Pai, ataksha jimiará míran patasmajai.”

²³ “Takui ni uuntri timiai “Ti péñker takakmauwitme. Nekas uminiaitme. Ishichkijajisha ti péñker takakma asakmin ti núkap yamaikia amastatjai. Winí wayam wijjai ti shiir warasta” timiai.’

²⁴ “Nuyá chíkich shuar chikichik míran achikmia nu tarí timiai “Uuntá, ti kajen asakmin tura araachiatam tura atsaamprachiatam júurtukturum tiniu asakmin

²⁵ sapijmiakun ame kuítrumniaka nuñká táutran úukmajai. Pai, júúiti ame surukmiam nu” timiai.’

²⁶ “Takui ni uuntri timiai “Ámeke yajauchiitme. Aya nákiitme. Wi araachiatan tura atsaamprachiatan júurtukturum tiniuitme túrutsumek.

²⁷ Tu enentáimkiumka çurukamtai kuit-iruntainiam ikiurtuschamam? Nuikia wi táakun patasan achikiájai” timiai.

²⁸ Nuna tinia nuñ wajainian tiarmai “Ju shuar chikichík mir kuit atankirum tias mir kuítian takaka nu susatarum.

²⁹ Kame núkap takakna nú shuar ataksha patatnastatui tura ampiniartatui. Antsu ishichik takakna nusha ishichik takakuitiat jurunkittiawai.

³⁰ Ju umichu shuarsha aq kiritniunam ajapatarum. Nuñ ti wáitiak ti úuttiatui” timiai”. Tu áujmatsamiayi Jesus.

Akantratin áatna nu

³¹ Jesus áujmatuk tímiayi ‘Aents Ajasuitjiana nu ashí akupin ajasan Yusa suntarij éñkekma winittijai. Tura Uunt Akupin asan shiir pujutairuj pujustatjai.

³² Túramtai ashí nunkanmayá aents Winia irunturartatui. Túrunawarmatai akantrartatjai. Murikiu wáinin kachurtinian tura kachurtichujai akanea nútisanak shuáran akantrattajai.

³³ Tura kachurtichunka, péñkera nuna, untsuuruinj awajsartatjai. Tura kachurtinniaka, yajauchia nuna, menaaruiñ awajsartatjai.

³⁴ Túran nekas Uunt Akupin asan untsuuruinj wajainian títiatjai “Atumniaka winia Apar shiir awajtamsaitrume. Wi akupeajna nuñ winitiarum. Yus nuñkan najanamia tímianai átum nuñ warastinian tsankatramkamiarme.

³⁵ Kame Wi tsukamá wekaj ayurtuamiarme. Kitiama wekajisha umartin surusmiarme. Wait ajá wekajsha itiaararum ajamprusmiarme.

³⁶ Pushir atsajsha átumka surusmiarme. Jaa tepajsha íráimiarme. Sepunam enketajsha tarum íráimiarme” títiatjai.

³⁷ Tutai untsuuruinj wajainia turutiartatui “Uuntá, çurutia tsukamá wekaamnisha ayuramaj. Urutiá iisha kitiama weká wainkiarsha umartincha amasmaj.

³⁸ Tura urutia wait ajá wekaamnisha tura pushiram mamurmataisha iisha amasmaj.

³⁹ Urutia iisha jaa tepamin tura sepunam enketmin wainkiarsha winitir íimijaj?” turutiartatui.’

⁴⁰ “Turutainiakui Wi Uunt Akupin asan tiartatjai “Nekasan tájarme, ashí ju wí shuar péejchachisha waitnentramarum nu Winia anentakum túraitrume” tiartatjai’ tímiayi.

⁴¹ ‘Wi Uunt Akupin asan menaaruiñ wajainian tiartatjai “Atumsha yajá wetarum. Yajauchijjai yumiñkramuitrume. Yus uunt iwianchi ni suntarijjajai tuke kajinkiashtin jinium apeatniua nuñ wétatrume atumsha.

⁴² Átumka Wi tsukamaj ayurtuachmarme. Kitiamaisha umartin suruschamarme.

⁴³ Wait ajá wekajsha ikiatrachmarme. Pushirun imiamprajsha entsartin suruschamarme. Jaa tepajsha tura sepunam enketajsha íraichmarme” tiartatjai.’

⁴⁴ “Tutai niisha turutiartatui “çurutia, Uuntá, tsukamakmesha, kitiamakmesha, wait ajaknisha, pushiram imiampramsha, jáakmesha, tura sepunam wait ajá pujamniasha iisha winitir yáinchamaj?” turutiartatui.’

⁴⁵ ‘Wi Uunt Akupin asan tiartatjai “Nekasan tájarme, Ashí Wí shuar, péejchachisha waitnentrachmarum nuñ Winiasha túrutachuitrume” tiartatjai.

⁴⁶ Nu shuarka tuke wáitsatniunam weartatui. Tura Yus achikma ainia nusha tuke iwiaaku Yusjai pujustinnium weartatui” tímiayi Jesus.

26

Jesus achiktin chichaman jurusarmiania nu

(Márkus 14.1-2; Rúkas 22.1-2; Juan 11.45-53)

- ¹ Jesus ashí nuna tinia umik ni unuiniamurjín tiarmiayi
² “Atumsha nékarme, Paskua jisat jeatin jimiarchik tsawant ajasai. Nuǐ Wi Aents Ajasu asamtai krúsnum máawarti tusar surutkartatui” tímiayi.
³ Nuyá Israer-patri uuntrisha Israer-shuara jintinniurisha Israer-shuara úuntrisha Kaipiasa jeen áarin iruntrarmiayi. Kaipiassha Israer-patri uuntriyayi.
⁴ Nuǐ ananǵatin chichamǵaj Jesus achikiar maatai tusar chichaman jurusarmiayi.
⁵ Tura tiarmiayi “Jístatin túrachminiaiti aents téetet ajarajín tusar.”

Nuwá Jesusan kunǵuinian ukatramiania nu

(Márkus 14.3-9; Juan 12.1-8)

- ⁶ Jesus Petania péprunam pujus tunamaru Semunǵa jeen pujumiayi.
⁷ Nuǐ pujaj nuwá ti kuit jeá kunǵuinian arapástru tutai kaya najanamunam piakun itiamiayi. Tura Jesus misanam yurumátaj tusa pujan tarí nu kunǵuinian ukatramiai.
⁸ Túramtai ni unuiniamurǐ nuna ísar kajerkar tiarmiayi “¿Urukamtai au kunǵuin imiá kúitniasha áantrasha wasurea?
⁹ Antsu ti kuitǵaj suruk shuar kúitrincha ainia nuna yáítskesha” tiarmiayi.
¹⁰ Jesus tuinian anturak tiarmiayi “¿Urukamtai ju nuwá yajauch enentáimtarum? Túrutana ju ti péǵkeran túrayi.
¹¹ Kúitrincha tuke atumǵaj pujushtatuak. Antsu Wikia atumǵaj tuke pujushtatjai.
¹² Ju nuwá kunǵuinǵaj ukatruraj júka, Wi iwiarnastin asamtai áitkíarayi.
¹³ Nekasan tájarme, ashí nunǵkanam uwempratín chicham etsernakui tuke ju nuwá pachinias etsernaktatui. Túramtai ni túramurǐ kajinmankishtatui” tímiayi.

Jútas Jesusan surukmiania nu

(Márkus 14.10-11; Rúkas 22.3-6)

- ¹⁴ Nuyá Jesus tuse (12) unuiniamunmayá chikichik ni naarǐ Jútas Iskariúti Jesusan suruktaj tusa Israer-patri uuntrǐin wémiayi.
¹⁵ Tura jeari tímiayi “Jesusan achikía amakui ¿urutmá akirkaintrum?” Takui trainta (30) kúitian akikiarmiayi.
¹⁶ Nu akikiam Jútas itiurak Jesusan súsaraintaj tu enentáimias wekaimiayi.

Kristu jakamu enentaimtustín námper

(Márkus 14.12-25; Rúkas 22.7-23; Juan 13.21-30; 1 Kurintianam 11.23-26)

- ¹⁷ Wakapruachu tantan yurumáinia nú námper yama nanǵamkui Jesusa unuiniamurǐ tariar aniasarmiayi “¿Tui paskua námper iwiaarakrin yurumátam?” tiarmiayi.
¹⁸ Tuíniakui Jesus tímiayi “Péprunam wetarum. Nuǐ chikichik shuara jeen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamurǵaj ame jeemǐin yurumátajai” tawai” titiarum” tímiayi.
¹⁹ Tutai ni unuiniamurǐ wear Jesus timia nuna umikiar paskua nampertín yurumátniun iwiararmiayi.
²⁰ Tura kashi ajasáǐ Jesus ni tuse (12) unuiniamurǵijai misanam yurumuk pujumiayi.
²¹ Nuǐ yurumáiniaǵ Jesus tiarmiayi “Nekasan tájarme, átum pujarmena júyá chikichik Winia surutkattawai.”
²² Nuna takui ti kúntuts enentáimprar mai aní awajiararmiayi “Uuntá, ¿wiáshitiaǵ?”
²³ Mai tu awajenam Jesus tiarmiayi “Wi nú pininnumanǵ jimiartukan yuajna ju Winia surutkattawai.

²⁴ Wi Aents Ajasu asan Yus Chicham tana nujaj métek túrunattajai. Túrasha shuar Winia surutkattana nuka ti asutniátin asa akiinmainchu ajakuiti” tímiayi.

²⁵ Nuyá Jútas suruktaj tana nu Nin tímiayi “Uuntá nuikia ¿wiáshitiaǵ?”

Takui Jesus tímiayi “Ee, nekas ámetme.”

²⁶ Tura yurumuk pujuiniaǵ Jesus yurumkan achik Yúsan yumǐnsamiayi. Tura puur ni unuiniamurǐin suiniak tímiayi “Ju yuatarum. Júka winia ayáshruiti.”

²⁷ Nuyá pininǵian achik Yúsan yumǐnsamiayi. Tura suiniak tiarmiayi “Jusha ashí umartarum.

²⁸ Júka winia numparuiti. Tura winia numpar puármatai, yamaram chicham nekas uminkiatatawai tawai. Tura puármatai untsurǐ shuara tunaarǐn tsanǵurattawai.

²⁹ Tura ataksha átum Yus akupea nuǐ jeatsrumnin ju uwa yumǐrin umarchattajai. Tura tsawant jeamtai atumǵaj Yus akupeana nuǐ yamarman umartatjai” tímiayi Jesus.

Pítur natsantratniua nuna Jesus ujakmiayi

(Márkus 14.26-31; Rúkas 22.31-34; Juan 13.36-38)

³⁰ Yús-kantan kantamáwar umikiar Uriwiu náinnium wearmiayi.

³¹ Nuǐ Jesus tímiayi “Ju kashi átum Winia ashí natsantrurtatrum. Kame Yus-Papinium áarmaiti “Murikiu wáinnium mantuattajai túram murik pisarartatui.” Tu áarmaiti.

³² Tura nantakin Kariréa nunkanam Wi ém kattajai átum wéatsumin.”

³³ Takui Pítiur tímiayi “Chikich natsantramainakuisha wikia túrashtatjai.”

³⁴ Tutaí Jesus tímiayi “Nekasan tájame, ju kashi atash shiniatsajñ menaintiú natsantrurtatme.”

³⁵ Pítiur tímiayi “Maa, Ámijiaí métek mántuiniakuisha penksha natsantrashtatjame.” Ashí ni unuiniamurǐ núnisan tiarmiayi.

Jesus Jitsemaní ajanam Yúsán áujsamiania nu

(Márkus 14.32-42; Rúkas 22.39-46)

³⁶ Nuyá Jesus ni unuiniamurǐjiaí Jitsemaní náartin ajanam jeá tímiayi “Juǐ pujusrum náarsatarum. Aranta aǐ wena Yúsán áujsatjai.”

³⁷ Tinia Pítruncha tura mai Sepetéu uchirǐ jukǐ wémiayi. Nuǐsha ti kúntuts enentáimiuk wake mesekmiayi.

³⁸ Nuyá Jesus tímiayi “Ti kúntuts jakamnia enentáimjai. Átumsha juǐ pujusrum Wijiaí métek iwiáa pujutarum.”

³⁹ Tinia Jesus arantach we nuǐ tikishmar tsuntsuma Yúsán áujeak tímiayi “Winia Aparú, Wi túrunatniua nu nusháa iwiarmaniatkiuinǐkia ju wáitsatniua nu tsankatrukaip. Tura Wi wakeraj núniska áhati antsu Ame wakeram núnis ati” ájuk tímiayi.

⁴⁰ Nuyá ni menaintiu unuiniamurǐ pujuiniamunam waketǐ kanú pujuinian jeariar Pítrun tímiayi “Átumka chikichik úraksha Wijiaí iwiáa pujutin çtujinkirmek?

⁴¹ Iwiáa pujusrum Yus áujsatarum. Tunáa nupettamkairap. Enentáimin ti wakerini-aitrume túrasha ayashim pimpiruiti.”

⁴² Tinia ataksha we Yúsán áujeak tímiayi “Winia Aparú, Wi imiá nekasan wáitsatniuitkiuinǐkia nuǐkia Ame wakeramna nu ati.” Tu áujsamiayi.

⁴³ Nuyá ataksha taa ni menaintiu unuiniamurǐ tarimiayi. Tura karǐ ti nupeteam ataksha kanú pujuarmiayi.

⁴⁴ Túmainiakui nin ikiukin ataksha áujmia núnisan Yúsán áujsataj tusa waketkimiyai.

⁴⁵ Áujas umik ni unuiniamurǐ pujamunman wémiayi. Tura tiarmiayi “Antsu yamaikia karnarum ayampratarum. Ura jeayi. Wi Aents Ajasu ain, tunaarintin shuarnum surunkatin jeayi.

⁴⁶ Wari nantaktiarum. Wéartai. Súrutna nu winiawai” tímiayi.

Jesusan achikiarmiania nu

(Márkus 14.43-50; Rúkas 22.47-53; Juan 18.2-11)

⁴⁷ Jesus tu chichaj Jútas támiayi. Nusha ni unuiniamurǐyayi. Nujaisha untsurǐ shuar puniajaisha tura numijjaisha winiarmiayi. Nu shuaran Israer-patri uuntriḥsha Israer-shuara úuntriḥsha akupka ármiai.

⁴⁸ Jútas, Jesusan sura, tuke Jesusaj jeatsuk nu shuaran tiarmiayi “Wi miniakkan mukunattajna núiti. Nu achiktarum.”

⁴⁹ Nu asantai Jesusan tarǐ “Winiajai Uuntá” tinia mukunamiayi.

⁵⁰ Takui Jesus tímiayi “Amikrú, çwarǐ winitiam?” Nuyá achikiar Jesusan júkiarmiayi.

⁵¹ Nuǐ chikichik Jesusa tsaniakmarǐ ni puniarǐn ukuiniak shuara kuishǐn tsupirkamiayi. Nu shuarsha Israer-patri uuntri takarniurǐyayi.

⁵² Túramtai Jesus tímiayi “Puniarum enkeata. Ashí puniajaj máanainia nusha puniajaj mantamnashtatuak.

⁵³ Wi wakeraknaka winia Aparun timiá untsurǐ suntarǐn seakui páchitsuk akupturkainti. çNu nékatsmek?

⁵⁴ Tura nuna túramtaingǐkia Yus-Chichamnum tana nu uminkiachainti” tímiayi.

⁵⁵ Nuna tinia Jesus nu shuaran tiarmiayi “Átum kasá achiktaj tawa nútksarum puniajaisha numijjaisha tarutniurme. Kame ashí tsawantaj Yusa Jeen atumjaj pujusan Yus-Chichaman etsermiajai. Nuǐsha achirkachmarme.

⁵⁶ Antsu yamaikia yaunchu Yúsán etserin áararmia nu uminkiatǐ tusarum jútikrarme.” Tu tímiayi Jesus.

Nuyá ni unuiniamurǐ Jesusan Níniak ikiuiniak pisararmiayi.

Israer-patri uuntriñ Jesusan júkiarmiania nu

(Márkus 14.63-65; Rúkas 22.54-55, 63-71; Juan 18.12-14, 19-24)

⁵⁷ Shuar Jesusan achikiarmia nusha Kaipiasaj júkiarmiayi. Nusha Israer-patri uuntriḥyayi. Nuǐsha Israer-shuara jintinniurǐsha Israer-shuara uuntriḥsh armia nusha irunar matsamarmiayi.

⁵⁸ Tura Pítiur árantak Jesusan nemarkin uuntri jeen aari jeamiayi. Tura suntarjai tsanin pujusmiayi Jesusan ituurkartin tusa.

⁵⁹ Tura Israer-patri úuntri sha Israer-shuara úuntri sha tura ashí naamka uunt armia nusha Jesusan wait-chichamjai súmamtikiatai tusar áujmatarmiayi.

⁶⁰ Untsurí shuar ántar tsanumpruiniakuisha máatin chichaman nekaracharmiayi. Nuyá jimirá shuar tsanumpruiniak

⁶¹ tiarmiayi “Ju áishman chichaak “Yusa Uunt Jeen yumpuwaran ataksha menaintiú tsawantin jeaminiaitjai,” tu chichamai” tiarmiayi.

⁶² Nuyá Israer-patri uuntri wajaki Jesusan tímiayi “¿Áimtsumek. Turamainia nusha anturammek?”

⁶³ Túrasha Jesus tuke áimchamiayi. Túmakui Israer-patri uuntri chicharuk “Nekas iwiaaku Yusa náarjin tájame nekasa nu táchakminkia Yus írmastatui. ¿Ame Krístukaitiam. Yusa Uchirínkaitiam? Paant etsérkatá” tímiayi.

⁶⁴ Tutai Jesus tímiayi “Ee, ame támena núitjai. Tura ataksha atumin tájarme, wi Aents Ajasu asan ti kakaram Yusa untsuuriní pujai wáitkiáttarme. Tura yuranminiam winiajsha wáitkiáttarme” tímiayi.

⁶⁵ Nuyá Patri uuntri nuna antuk ti kajek ni pushiri jaak tímiayi “Ju áishman ni chichamejai Yúsán nekas yajauch chicharniuiti. Nuyásha ¿warí atsumaji? Atumsha Yúsán yajauch chicharu antukcharumek.

⁶⁶ ¿Waritia enentáimprum?”

Tutai “Sumamayi. Mantamnati” tiarmiayi.

⁶⁷ Tiar usukiawarmiayi yapiniam. Tura awattiararmiayi.

Chikichcha yapiniam awati wishikiainiak tiarmiayi

⁶⁸ “Ame Krístuchukaitiam. ¿Ya awattama? Ítsuk nekaata.” Tu chichariarmiayi.

Pítiur Jesusan natsantramiania nu

(Márkus 14.66-72; Rúkas 22.56-62; Juan 18.15-18, 25-27)

⁶⁹ Nu túmain Pítiur aa pujai nuwa chikichik jeari tímiayi “Amesha ju Kariréanmayá Jesus tutaajjai wekaichamkam.”

⁷⁰ Tutai Pítiur ashí ántuiniamunam tímiayi “Nékatsjai. ¿Warittsuk chichaam?”

⁷¹ Nuna tinia jínkitiaj tusa wéaj chíkich shuar wáiniak nuí pujuinian tiarmiayi “Au áishman sha Nasarénumia Jesusjai wekainiuiti.”

⁷² Tutai Pítiur ataksha tímiayi “Nekasan tájarme, ju áishman kan penké nékatsjai.”

⁷³ Árusan nuí pujuarmia nu Pitrun tariar tiarmiayi “Nekas amesha aujai wekaimiame. Warí, chichammijjai páantaiti.”

⁷⁴ Tutai Pítiur “nekas Yus írui” taku tímiayi “Nu áishman kan penké nékatsjai.” Nuna taj atash shiniukmiayi.

⁷⁵ Túramtai Pítiur Jesus nuik tímia nuna enentáimpramiayi. “Atash shiniatsain menaintiú natsantrurtatme” tímiayi Jesus. Pítiur nuna enentáimiar jiinki we ti úutmiayi.

27

Piratuj Jesusan júkiarmaniania nu

(Márkus 15.1; Rúkas 23.1-2; Juan 18.28-32)

¹ Kashin tsawarmatai Israer-patri uuntri sha Israer-shuara úuntri sha Jesus maatai tiarmiayi.

² Tiar Jesusan jin kiawar apachi uuntrin Punsu Piratuj júkiarmaniayi.

Jútas máamamiania nu

³ Jútas Jesusan suruk tura máatai tuínian antuk enentáimiar trainta kuítian Israer-patri uuntrin cha Israer-shuara úuntrin cha awantukiarmiayi.

⁴ Tura tímiayi “Nu áishman tunaarinchán máatarum tusan surukan wi sumamajai.”

Takui tiarmiayi “Nusha íjijajsha warí urukatín. Nuka amek íschatniukaitiam.”

⁵ Tinia Jútas nuí Yusa Uunt Jee kuítian utsan ikiuak nuyá we kajempramiayi.

⁶ Nuyá Israer-patri uuntri nu kuítian júukar tiarmiayi “Ju kuit shuar sumakma asamtai Yusa kuítrijjai irurchamniaiiti.”

⁷ Tura nuamtak áujmatsar “nun ka sumaktai” tiar Nuwe Najantai nun kan sumakarmiayi jajaya shuar nuí iwíarsatniun.

⁸ Shuar sumakma kuitjai sumakma asamtai yamaisha Numpá Nun ka tuke tuíniawai.

⁹⁻¹⁰ Nujai yaunchu Yúsán etserin Jeremías timia nu uminkiamiayi:

“Uunt Yus turutmia núnisan túrawarmiayi. Israer-shuar trainta kuítian seawarmatai nuna akantrar nujai Nuwe Najantai nun kan sumakarmiayi.” Tu áarmiayi.

*Piratu Jesusan aniasmiania nu**(Márkus 15.2-5; Rúkas 23.3-5; Juan 18.33-38)*

11 Jesusan apachi úuntriin ejeniarmatai nii aniasmiaiyi “¿Nekasmek Israer-shuara uunt akupniuríntiam?”

Tutai Jesus “Ame támena núitjai’ tímiayi.

12 Nuyá Israer-patri úuntrijsa Israer-shuara úuntrijsa súmamtikia Jesus pachischamiayi.

13 Nuyá Piratu tímiayi “Ashí yajauch chichartamainia nu ¿anturmammek?”

14 Tútaisha Jesus penké áimkiachmiayi. Túmakui akupin ti enentáimiar títinian nekaachmiayi.

*Piratu Jesusan “mantamnati” tímiania nu**(Márkus 15.6-20; Rúkas 23.13-25; Juan 18.39-19.16)*

15 Jísat tsawantin apachi uuntri Israer-shuar shiir enentáimprarat tusa sepunam enketun shuar wakeramun jíiki ankant akupniuyayi.

16 Nuí sepunam tunáa shuar Parapás náartin pujumiayi. Ashí shuar nékarmiaiyi.

17 Tuma asamtai Piratu Israer-shuar iruntrarun aniasmiaiyi “¿Yana ankant akupkat tusarum wakerarum. Parapásnak akupkattaj; Kristu tutai Jesusnak akupkattaj?” tímiayi.

18 Kame Israer-shuar ántar kajerainiak ni itiarman nekaamiayi.

19 Tura Piratu nuna inintrak pujaj ni nuarí chichaman akuptukmiayi. “Ju péñker áishman súmamtikiatniujaj pachiiinkiaip. Mesekranam nii áitkiatniun nekaan wáitsan tsawarjai” tímiayi.

20 Túrasha Israer-patri úuntrijsa Israer-shuara úuntrijsa “Parapás ankant wetí, tura Jesus mantamnati” títiarum tusar shuáran akatrarmiaiyi.

21 Apachi akupniurí ataksha aniasmiaiyi “Ju jimiará áentsun ¿yana ankant akupkat tusarum wakerarum?”

Tutai “Parapás” tiarmiayi.

22 Tutai aniasmiaiyi “Jesusnasha. Yusa Anaikiamurí Kristu tuinia nunasha, ¿itiúrkáttaja?”

Tutai ashí “Krúsnum máatá” tiarmiayi.

23 Tuíniakui Piratu tiarmiayi “¿Warí yajauchinia túrait?”

Tutai kakantar untsumuk “Krúsnum máatá” tiarmiayi.

24 Tura Piratu Jesus uwemtikrachminiaitkiui antsu ashí shuar charaatum ajainiakui entsa uturtíiarum tusa seamiayi. Tura ashí íimiaiainí ikíjmiak tímiayi “Ju péñker áishman máatniunam wikia pachiiintsujai. Antsu atumek íistarum.”

25 Tutai ashí shuar tiarmiayi “Iik ii shuarjijaj ju áishman máatin íistaji.”

26 Nuyá Piratu Parapásan ankant akupkamiayi. Tura Jesus asutiárum krúsnum máatárum tusa akupkamiayi.

27 Nuyá akupin pujutai jeanam akupniu suntari Jesusan júkiar ashí suntaraim irunturarmiayi.

28 Tura pushiri áitkiar akupin entsatain kapaaku pushin áentsrarmiayi.

29 Múuknúmsha tawaspan janí najanamun etsemtikiarmiayi. Tura karisun akupniu numirja áaniun untsuuríni ataksarmiayi. Túrawar wishikiainiak tikishmatrar tiarmiayi “Israer-shuara uunt akupniurjime.”

30 Tiar usukiarmiayi. Tura karisun jurukiar múuknum awatiarmiayi.

31 Tura núkap wishikrar kapaaku pushin áitkiar ni pushirín áentsrarmiayi. Nuyá krúsnum maatai tusar júkiarmiayi.

*Jesusan krúsnum máawarmiania nu**(Márkus 15.21-32; Rúkas 23.26-43; Juan 19.17-27)*

32 Jesusan júki wésar Serini nunkanmaya shuaran, ni naarí Semun, Jesusa krúsriin jurukit tusar achikiarmiayi.

33 Nuyá Kúrkutanam ejeniarmiayi. Kúrkutaka, shuar chichamjainkia, muuka ukunch tútainti.

34 Nuí Jesusan umutai yapájaj pachimpra najanamun áartaj tusar súsarmiayi. Tura Jesus apas iis umarchamiayi.

35 Krúsnum ajinrurar suntar yáki Jesusa pushirín jukit tusar nakurusar awakmakua nuna súsarmiayi. Nújainkia yaunchu Yúsna etserin áarmia nu uminkiamiayi:

“Winia entsarmanur akantrarmiayi tura nakurusar awakmakua nuna winia pushirun súsarmiayi.” Tu áarmiayi.

36 Nuyá wáinkiatái tusar pujursarmiayi.

37 Tura urukamtai máamuit ashí aents nekaawarti tusa áarman muuknumaani anujtukarmiayi. **JUJTI JESUS, ISRAERA UUNT AKUPNIURI**
Tu áarmauyayi.

³⁸ Núnisan̄ Nijjaj métek jimiara kasa chikichkin untsuurnumanj tura chikichnasha menaanmanj krúsnum máawarmiayi.

³⁹ Shuar nuj nan̄kaamainiak muuke pēatar wishikiainiak

⁴⁰ tiarmiayi “Ame Yusa Uunt Jee sáakim menaintiú tsawantim jeamtatjai tichakaitiam. Nekas Yusa Uchir̄ntkiumka krúsnumiá akaikim uwemprata” tiarmiayi.

⁴¹ Núnisan̄ Israer-patri úntr̄isha, Israer-shuara jintinnir̄isha, Pariséusha, Israer-shuara úntr̄isha, Jesusan wishikiainiak nuamtak tiarmiayi

⁴² “Chikichnaka uwemtikraiti tura Nín̄kikia uwemtsui. Israera Uunt Akupniur̄ntkiun̄ka krúsnumiá akaikimtai nekas enentáimtustatji.

⁴³ “Yúsán nekas enentáimtiniaitjai” tawai. Wátsek, Yus nekas Nin aneakka uwemtikrati. “Wi Yusa Uchir̄ntjai” turamchamkaj” tiarmiayi.

⁴⁴ Kasá shuarsha Nijjaj ajintruam armia nusha Nin wishikrarmiayi.

Jesusa jakamuri

(Márkus 15.33-41; Rúkas 23.44-49; Juan 19.28-30)

⁴⁵ Nuyá tutupin āi tee ajasmiayi. Túrunayat ataksha āan̄ku tsáapin ajasmiayi.

⁴⁶ Nuni āi Jesus kakantar untsumkamiayi. “Eri, Eri, rama sapaktani tiamiayi. Nusha shuar chichamjain̄kia “Yusrú, Yusrú, çurukamtaí ajapa ikiurkiniam?” tawai.

⁴⁷ Shuar nuj wajarmia nusha nuna enentáimtsuk antukar tiarmiayi “Yaunchu Yúsán etserniun Eriasan untsuawai.”

⁴⁸ Tura chikichik tséken̄ki we uruchin itiamiayi. Tura churuinian ajamper sapapjaj ijiú mukunati tusa susamiayi.

⁴⁹ Tura chikichcha wishikeak tiarmiayi “Iniáísatá, Eriás tarí uwemtikratpiash.”

⁵⁰ Jesus ataksha kakantar untsumak nuyá jakamiayi.

⁵¹ Nu chichamaik Yusa Uunt Jee tarach ajamu yakiniyá achik nuñkaani tsej jaanakmiayi. Nuñkasha úurkamiayi. Kayasha jakukarmiayi.

⁵² Núnisan̄ iwiarsamusha uraniarmatai untsur̄j Yus-shuar jákarusha nantakiarmiayi.

⁵³ Nusha emka Jesus nantakmiatai niisha nantakiar iwiarsamun ikiukiar Yusa péprur̄in Jerusar̄ēnum wayawarmatai untsur̄j shuar wáinkarmiayi.

⁵⁴ Nuyá suntar Jesusan wáinkarmia nusha tura ni kapitian̄tr̄isha nuñka úurkamtai nuyá chikichcha ashammai ajasmatai ti sapijmiakarmiayi. Tura tiarmiayi “Jú áishmañ nekas Yusa Uchir̄nti.”

⁵⁵ Nujsha nuwá Jesusan nemariarmia nu, arant wajasar, ii wajaarmiayi. Nusha Kariréanmaya pataatukiar Jesusan yain̄ki ejeniarmiayi.

⁵⁶ Nujaj Máktaranmaya Marisha, Sepetéu nuwésha, tura chikich Marisha áirmiayi. Chikich Marikia Jakupuncha tura Jusenchá nukur̄iyayi.

Jesus iwiarsamu

(Márkus 15.42-47; Rúkas 23.50-56; Juan 19.38-42)

⁵⁷ Kiaraj shuar ti kūtrintin Arimatéu péprunmaya ni naari Jusé támiayi. Nusha Jesusan enentáimtinuiyayi.

⁵⁸ Nii Piratuj we Jesusa ayashin seamiayi. Nin súsarat tusa Piratu akupkamiayi.

⁵⁹ Túram Jusé Jesusa ayashin krusnumiá jusa ti pé̄nker tarachjaj penuarmiayi.

⁶⁰ Tura kaya wáa táurmanum yamaram amia nuj iwiarsamiayi. Ni iwiarsatin táumtikramunam Jusé iwiarsamiayi. Iwiaras kaya uuntjaj etektuk ikiuak wémiayi.

⁶¹ Nuishá Máktaranmaya Marisha tura chikich Marisha iwiarsamunam naka ii pujuarmiayi.

Jesus iwiarsamun suntar wáinkarmiania nu

⁶² Nú kíaraj̄in ayampratim tsawantna mash iwiarnakui Israer-patri úntr̄isha Pariséusha Piratuj wearmiayi.

⁶³ Tura tiarmiayi “Uuntá, nu wáitrin áishmañ iwiaaku pujus “Menaintiú tsawant jakan nantaktiatjai” tniuyi.

⁶⁴ Nu asamtai iwiarsamunam menaintiú tsawant suntar wáinkariat tusa akuptukta. Ni unuiniamur̄j kashi tariar tura ni ayashin kasamkar “Pai, nantakni” shuáran tiar̄aj̄in. Jujain̄kia nuna nan̄kaamas shuáran anañkawarainti” tiarmiayi.

⁶⁵ Tutai Piratu tiarmiayi “Nuj suntar takakrume. Werum iwiarsamu urakchamnia pé̄nker wáinkiatárum.”

⁶⁶ Tutai wear iwiarsamun urankashti tusar etektukma in̄kiunmanum serajaj yakarar ni áarmar̄in anujtukarmiayi. Tura suntarnasha awajtukiarmiayi.

28

*Jesusa nantakmiari**(Márkus 16.1-8; Rúkas 24.1-12; Juan 20.1-10)*

¹ Ayampratin tsawant nan̄kaamasmatai tumiñtin yama tsawaana āi Máktaranmayā Mar-
isha chíkich Marij̄j̄j̄i iwiarsamu iyutai tusar wearmiayi.

² Tumaj Yusa suntarī nayaimpinmayā iwiarsamun tarī kaya atutkamun urak nūj̄ pujus-
miayi. Túmakui nun̄ka ti ú̄urkamiayi.

³ Yusa suntarīsha pēemiā tímiatrus wíinchauyayi. Pushirīsha ti pujū áuyayi.

⁴ Tura iwiarsamun wáiniarmia nú suntarsha nuna wáinkiar ashamainiak ti
kurañkarmiayi. Jaká áinis ajasarmiayi.

⁵ Nuyá nayaimpinmayā suntar nuw̄an tímiayi “Ashamkairap. Jesus krúsnum máawarmia
nu ēatsrumek.

⁶ Jūinkia pujatsui. Nii timia núnis̄an̄ nantakniuiti. Pai, áepsarma nu ítiarum.

⁷ Wárik wérum ni unuiniamur̄j̄ “Jesus jakamunmayā nantakni tura wari Kariréanam
wétatui. Nūj̄ werirum wáinkiáttarme” titiarum. Wats, nunak tájai” tímiayi.

⁸ Tutai nu nuw̄a iwiarsamunmayā wárik jíinkiar ashamainiyat ti warasar tsekē
waketkiarmiayi ni unuiniamur̄j̄n ujaktai tusar.

⁹ Tumaj Jesus wantintukarmiayi. Tura “pujarmek” takui Jesusan tariar tikishmatrar
nawencha miniakrusar shiir awajsarmiayi.

¹⁰ Túram Jesus tiarmiayi “Ashamprukairap. Werum winia yatsur ujatruktarum.
Kariréanam weartí. Nūj̄ wear wáitkiartatui. Tu ujaktarum” tímiayi.

Suntar etserkarmiania nu

¹¹ Nuw̄a wéarmatai iwiarsamu wáinin suntarsha péprunam wéar Israer-patri úuntriñ ashí
túrunamun ujakarmiayi.

¹² Niisha nuna antukar Israer-shuara úuntriñj̄j̄j̄i áujmatsatai tusar wearmiayi. Áujmatsar
suntaran ti kuít akikiar

¹³ tiarmiayi “Atumsha éterkuram “Kashi kanararin ni unuiniamur̄j̄ taar Jesusa ayashin
kasamkarmai” titiarum.

¹⁴ Tura akupin átum kanarman nekamtaisha niñj̄j̄j̄i ii iwiarattaji atumin yajauch awaj-
tams̄ain̄ tusar” tiarmiayi.

¹⁵ Nuyá suntarsha kuítian achikiar tiarmia nuna tímiatrus̄an̄ titiái tusar wéarmiayi. Tura
tuke yamaisha Israer-shuar tu túrunaiti tuñiawai.

*Jesus ni unuiniamur̄j̄n akatar akupkarmiania nu**(Márkus 16.14-18; Rúkas 24.36-49; Juan 20.19-23)*

¹⁶ Nuyá ni auntse (11) unuiniamur̄j̄ Kariréanam wéarmiayi. Tura Jesus timia nú nainnium
jeawar

¹⁷ nūj̄ Jesusan wáinkiar tikishmatrarmiayi. Kame chíkichka Jesusashit tuñiayat Nin
wáinkiar tikishmatrarmiayi.

¹⁸ Nuyá Jesus tíjiuch tantá tímiayi “Ashí nayaimpinmasha nun̄kasha akupkatniun kakar-
man surusuiti.

¹⁹ Tuma asamtai ashí nun̄kanam werum ashí shuar jintintiarum Wíi shuar awajsa-
tarum. Túrarum Yus Apa náariñj̄j̄j̄i, Yus Uchi náariñj̄j̄j̄i, tura Yus Wakan̄j̄ náariñj̄j̄j̄i imiaitiarum.

²⁰ Ashí atumin Wí akatramajrum nu nútiksarmek umiktin unuiniartarum. Tura jū
nekaatarum: Tuke tsawant̄aj̄ ikiutsuk atumj̄aj̄ pujuttaj̄aj̄” tímiayi Jesus.

Yúsan Shiir Chichamen

MÁRKUS aarmia nu

Imiakratin Juanka etserkamurj

(Mateu 3.1-12; Rúkas 3.1-9, 15-17; Juan 1.19-28)

¹ Juǵ Jesukristunu shiir chicham nańkameawai. Jesukristu Yusa Uchirinti.
² Yuska imiakratin Juankan pachis ni etserniurin Isayasan ti yaunchu ni Papirijn juna áamtikramiayi:

“Iisiana, ame wéamurmın emka weti tusan winia akatramurun akupeajai. Niisha ame jintimin iwiarattawai.

³ Niisha aents atsamunam untsumuk juna títiatui: “Uunta jinti iwiarturtarum; naka awajsatarum.”

Nuke áarmaiti.

⁴ Wats, aents atsamunam imiakratin Juan imiaittsa pujus étseruk, “tunaarun Yus asakarurat” tusarum, enentáim yapajjárurum imiantiarum” tímiayi.

⁵ Anturkatai tusar ashí Jutía nunċanamaya shuar tura Jerusarén peprunmaya shuarsha Nijn tariarmiayi. Taar, ni tunaarın ujakarmatai, Juan Jurtan entsanam imiainiarmiayi.

⁶ Juansha kamiriu ure najantramun entsauyayi. Emenmamkesha nuapeyayi. Tura chinijjai yutai-títikriatsnasha yuuyayi.

⁷ Niisha áentsun ujaak tímiayi “Wijjainkia nańkaamas ana nu winia ukuruj winittiwai. Niisha nekas ii Uuntri asamtai, wikia tsuntsumpruan ni sapatrj jinċiamurjinkisha atitrahminiaitjai.

⁸ Wikia entsajain aya ayashmin imiaajrume, antsu Nińkia imiantinia áanis Yusa Wakanj atumj enentáin enċetramprattarme” tímiayi.

Juan Jesusan imiaimiania nu

(Mateu 3.13-17; Rúkas 3.21-22)

⁹ Juan áentsun imiak pujurainiaj, Jesuska Nasarét pepru Kariréa nunċanam ana nuyá jinki Juankan tarimiayi. Tura Juan Jurtan entsanam Jesusan imiaimiayi.

¹⁰ Nuin, Jesus entsaya jiiuiuk, nayaimpin uranniun wáinkiamiayi. Tura Yusa Wakanj yámpitsa núnin najanar Nijn taarun wáinkiamiayi.

¹¹ Tura nayaimpinmaya chichaamun juna antukmiayi, “Ámeke winia aneamu Uchiruitme. Ámin shiir enentáimtajme.”

Unt iwianch Jesusan anańkataj tímiania nu

(Mateu 4.1-11; Rúkas 4.1-13)

¹² Nuyá wárik Yusa Wakanj Jesusan atsamunam jukimiayi.

¹³ Tura nuj, yajasma yujamunam, kuarenta tsawant pujumiayi. Nu juj uunt iwianch Satanás naartin Jesusan nekapsataj tusa pujurmiayi. Túramtai Jesusan wáinkiatiai tusar nayaimpinmaya suntar tariarmiayi.

Kariréa nunċanam ni takatrin Jesus nańkammiania nu

(Mateu 4.12-17; Rúkas 4.14-15)

¹⁴ Ukunam, Juankan sepunam enkeawarmatai, Jesuska Kariréa nunċanam Yusa akupeamurj pachis shiir chichaman etserki támiayi.

¹⁵ “Tsawant jeayi. Shuarnum Yusa akupeamurj jeatemai. Tuma asamtai, yaunchu enentáimsamuram yapajjárurum, Uwempratin Chicham umirkatarum” tu etserkamiayi.

Jesus namakan achinian ni unuiniamurj ajasat tusa kuaru achikmiania nu

(Mateu 4.18-22; Rúkas 5.1-11)

¹⁶ Jesus Kariréa antumianka kánmatkarjın wekas, namakan achinian Semunasha ni yachj Antresnasha nekan ajuntuk pujuinian wáinkiamiayi.

¹⁷ Wáiniak “Nemartustarum, tímiayi. Namak achiamena nútiksanak áentsun-ęęu Yusna arti tusan awajsatjarne” tímiayi.

¹⁸ Tura nuyanka ni nekarjın ajapa ikiiniak Jesusan nemarsarmiayi.

¹⁹ Nuyasha Jesus ishichik arantach wesa, Sepetéu uchirjın Jakupun ni yachjın Juánnasha kanunam ni nekarjın apăa pujuinian wáinkiamiayi.

²⁰ Wáiniak, nemartusta tusa untukarmiayi. Tutai ni aparjıncha, ni aparj takarniurjıncha kanunam ikiiniak Jesusan nemarsarmiayi.

*Jesus iwianchin áishmannumiá j̄iki akupkamina nu
(Rúkas 4.31-37)*

²¹ Nuyá Kapernáum péprunam jeawarmiayi. Nui Israer-shuara ayampratin tsawantrī jeakui Jesus Israer-shuar iruntainiam wayá Yus-Chichaman unuiniamiayi.

²² Tura ni jintinniur̄i jintintiarmia nuna iniankas uunt chichamjaī Jesus jintiakui ni chichamen anturkar ti enentáimprarmiayi.

²³ Nuisha nu iruntainiam áishman iwianchruku ámiayi. Niisha untsumuk

²⁴ “¿Warī itiurtamkattsamea incha taum, Nasarénumiá Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiayi.

²⁵ Tutai, Jesus kakantar chicharuk “Takamátsatá. Ni enentáiyā j̄inkitia, tájame” tímiayi.

²⁶ Tutai iwianch áishman kan ukurak ajakniñkiar untsamak kakaar aā j̄inkimiayi.

²⁷ Nuna wáinkiar, ashamkar nuámtak aniniaisarmiayi. “¿Ausha warinkit. Yamaram chicham warī chichamait? Ju Jesuska timiá kakaram asa ímia iwianchin akupeatsuk. Iisiana umirainiatsuk” tiarmiayi.

²⁸ Tura ti wárik nu túrunamu ashí Kariréa nunkanam antunkamiayi.

*Jesus Semunka tsatsar̄in tsuármiania nu
(Mateu 8.14-15; Rúkas 4.38-39)*

²⁹ Nuyá Israer-shuara iruntaī jeeniā j̄inki Jesuska Jakupujaī Juanjajsha we, Semun̄ ni yachī Antresjaī pujuarmia nuī jeawarmiayi.

³⁰ Semunka tsatsarī tsuer peaknum jaa tepemiayi. Núnaka wárik Jesusan ujakarmiayi.

³¹ Nuñkia Jesus werī uwejnun achik iniantkimiayi. Tura nu chichamaik michatramiayi. Michatar, péñker ajas, Jesusnasha ni nemarniur̄incha ayurawarmiayi.

*Untsurí jaan Jesus péñker awajsarmiania nu
(Mateu 8.16-17; Rúkas 4.40-41)*

³² Nu tsawantaj̄ kjaraj, ashí jáinian, iwianchrुकuncha Jesusan itiararmiayi.

³³ Tura ashí nú péprunmayā shuar taar wáitiniam Jesusan káutkarmiayi.

³⁴ Untsurí̄ shuáran ch̄ikich sunkuraim jáinian Jesus tsuararmiayi. Tura iwianchrुकun armia nuna enentáiyān iwianchin̄ j̄irkiarmiayi. Jesuska iwianch nékamu asa, winia náarun ántar pachisarain̄ tusa suritkiarmiayi.

*Kariréa nunkanam Jesus Yus-Chichaman etserkamiania nu
(Rúkas 4.42-44)*

³⁵ Nuyá kashin káshik tsawaq̄tsain̄ Jesus nantaki Yúsān áuj̄sataj tusa j̄inki atsamunam wémiayi.

³⁶ Tura Semun̄ ni amikr̄ijjaī Jesus wemaanum wéarmiayi.

³⁷ Nin wáinkiar “Ashī shuar Ámin eátmainiawai” tiarmiayi.

³⁸ Tutai Jesus chichaak “Ch̄ikich péprunmasha arantach wetai. Nuī Yusa chichamē etserkatai; nuna túrattsan táwitjaī” tímiayi.

³⁹ Nuna tī ashí Kariréa nunkanam Israer-shuar iruntaī jeanam etseras wekaimiayi; tura núnisan̄ iwianchniashā j̄iki akupkini wekaimiayi.

*Tunamaru shuaran Jesus tsuármiania nu
(Mateu 8.1-4; Rúkas 5.12-16)*

⁴⁰ Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmekā tsuaratin̄ tuj̄inratsme.”

⁴¹ Jesus nin waitnentak uwejējaī antiñmiayi. Antiñ “Wakerajme. Péñker ajasta” tímiayi.

⁴² Nu chichamaik, Jesus chichakmatai, ni sunkur̄i menkakamiayi. Tura péñker ajasmiayi.

⁴³ Túrunamtaī Jesus kakantar chicharuk

⁴⁴ akupeak “Wáinkiatá, nánkamsam etseraip, tímiayi. Antsu weme, Israer-patrirmin iniakmamsata. Túram ashí aents ame péñker ajasmarumin nekaawarat tusam, Muisais aar akupkamina nu umikiam súsatin̄ ana nu susata” tímiayi.

⁴⁵ Tura etserkaip támaitiat, j̄inki ni túrunamur̄in mash etseramiayi. Tura nuna etserka asamtai, péprunam, aents irunmanum wétinian Jesus nakitramiayi, antsu aā atsamunam pujumiayi. Tura ashí nunkanmayā Jesusan tariarmiayi.

2

*Jesus emearun péñker awajsamiania nu
(Mateu 9.1-8; Rúkas 5.17-26)*

¹ Kapernáum péprunam Jesus ukunam ataksha wémiayi. Jeamtai, ni jeen̄ pujan nekaawarmiayi.

² Tuma asamtai shuar wárik ti untsurí káutkarmiayi. Ti untsurí asamtai, jeá piakmiayi; wáitinmasha ankantchayuyai. Jesuska Yus-Chichaman nu aentsun ujaak pujurmiayi.

³ Nuiŋkia ni amikrĭn emearun kuartru shuar tampumpuawar júkiar Jesusan itiararmiayi.

⁴ Tura jeawar, untsurí shuar írunu ásamtai jeá wayatniun tujinkarmiayi. Tuma ásar, yakiníni wakar jeá urakar, áaŋkawar, tampunam ni amikrĭn Jesus pujamunam awain-tuawar itiararmiayi.

⁵ Tura niisha Jesus nekas tsuártatui tu enentámmiarĭn Jesus nekáa emearun chicharuk, “Uchirú, ame tunaarumka tsanċuramuiti” tímiayi.

⁶ Israer-shuara jintinniurĭsha nuna antúu pujuarmiayi. Tura ni enentájjaj enentáimsar, ⁷ “¿Jusha urukamtai emearun tu chichara? Yúsan imiá yajauch chicharui. Wari, yaki tunaan asakarminiait; aya Yúsak tunaan asakarchamniakait” tu enentáimsarmiayi.

⁸ Jesuska ni enentámmiarĭn nekarawar “¿Urukamtia átum tu enentáimprum? tímiayi.

⁹ Emearu, tunaarum tsanċuramuiti tĭtinjaj, emearu, wajakim tampuram entsakim wekasata tĭtinjaj ¿tuá imiá yúpichuchit?

¹⁰ Wats wi, Aents Ajasu asan Yusa kakarmarjjaj shuara tunaarĭ tsanċuramniaitjiana nuna paant iwiaintiuktajrume” tímiayi. Nuna tinia emearun chicharuk

¹¹ “Wajaktia, tájame; túram tampuram jukim jéemĭn wetá” tímiayi.

¹² Nu chichamaik emearu wajaki, tampurĭn júki, ashí ímiainiaĭn jĭnkimiayi.

Nuna túrunamtai ashí ashamkarmiayi. Tura “jútikiamu penké wáinchaitji” tiar Yusa náarĭn uunt awajarmiayi.

Jesus Riwin untsukmiania nu
(Mateu 9.9-13; Rúkas 5.27-32)

¹³ Nuyá ukunam Jesus antumiaĭnum waketkimiayi. Tura ashí shuar káunkarmatai jĭntintiawarmiayi.

¹⁴ Tura jĭntintiawar amuk, akupin akitiai jeanam naŋkaamak, Arpeu uchirĭn Riwin pu-
jan wáinkiamiayi. Wáiniak “Nemartusta” tímiayi. Tutai Riwi wajaki Jesusan nemarsamiayi.

¹⁵ Chíkich tsawant, Riwishá Jesusan ni jeen itiaiamiayi. Tura untsurí kuĭtian-juu shuarsha, yajauch shuarsha Jesusjaj ni unuiniamurĭjjajisha ashĭ nuim misanam pujuarmiayi.

¹⁶ Tura kuĭtian-juu shuarsha yajauch shuarsha Jesusjaj irunar yurumáinian wáinkiar, Pariséu jintinniurĭsha Israer-shuara jintinniurĭsha Jesusa unuiniamurĭn aniasarmiayi. “¿Urukamtai ame úntrum Jesus, kuĭtian-juu shuarjaj tura yajauch shuarjajisha yuruma?” tiarmiayi.

¹⁷ Jesus nuna antuk tímiayi “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pénkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiayi.

Yurumtsuk Yus áujisatniun Jesusan aniasarmiania nu
(Mateu 9.14-17; Rúkas 5.33-39)

¹⁸ Juanċa unuiniamurĭsha Pariséu unuiniamurĭsha yurumtsuk Yúsan áujarmiayi. Túmakui chíkich shuar Jesusan tariar chicharainiak, “Juanċa unuiniamurĭsha, Pariséu unuiniamurĭsha yurumtsuk Yúsan áujainiatsuk; ¿ame unuiniamurmeka urukamtai yurumtsuk áujainiatsuk?” tiarmiayi.

¹⁹ Tutai Jesus chichaak, “¿Nuatma nampernum ipiaamu ainia nu ijiarmawartiniak ainia? Yama nuatu pujakui ni amikrĭ warainiak ijiarmachartin ainiaiawai. Núnisaj winia unuiniamur, Wi pujakui, warainiak yurumtsuk pujuschartin áiniawai.

²⁰ Tura tsawant jeattawai, Winia jurukiartin. Nuiŋkia winia unuiniamur ijiarmawartai” tímiayi Jesus.

²¹ Tura nuyá juna tímiayi ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chinċiá nuna naŋkaamas jáaktatui.

²² Nijiamanch yamá nawar nuap najanamu arutnum yaraachminiaiti. Túramka wakaprua kariak nuap najanamu ijiakratniuiti. Tura nijiamanch ukarattawai. Nuap najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiayi.

Trikiu neren yuawarmiania nu
(Mateu 12.1-8; Rúkas 6.1-5)

²³ Chíkich ayampratin tsawantaj Jesus ajanmanĭ ajapén naŋkaamarmiayi. Tura ni unuiniamurĭ trikiu neren majúkiar wearmiayi.

²⁴ Nuna wáinkiar Pariséu Jesusan chicharainiak “¿Warí, urukamtai ame unuiniamuram ayampratin tsawant takastin surinkiamu ajsha takainia?” tiarmiayi.

²⁵ Tutai Jesus tímiayi “Íi uuntri Tawitia túramuri Yús-Papinium áujtsachukaitrum. Niisha ni nemarniurjsha tsukamainiak, ni yurumkarí atsakui, túrawarmia nu áujtsachukaitrum.

²⁶ Apiatár Yusnan pujurniu uuntri pujaj Uunt Tawit Yusa Jéen wayamiayi. Tura Tawitkia, patri nankaamas uunt asa, pátrichuitiat, iniaktusma tantan, aya patri yútainiak, yuamiayi; tura ni nemarniurjcha ajamsamiayi. Nu áujtsachukaitrum, tímiayi.

²⁷ Ayampratin tsawantaj túrashtinian umirkashtimpiash tusa Yuska aentsun najanach-miayi. Antsu aents ayamprarat tusa Yus ayampratin tsawantan tesamiayi.

²⁸ Wisha, Aents Ajasu asan imia ayampratin tsawantan Nerenniurjntjai” tímiayi.

3

*Uweje jakan Jesus tsuármiania nu
(Mateu 12.9-14; Rúkas 6.6-11)*

¹ Ataksha chíkich tsawantaj Israer-shuar iruntainiam Jesus wayamiayi. Nuí shuar ámiayi, ni uweje jaka.

² Tura tunáan túrayi titiai tusar wakeruiniak “ayampratin tsawantaj tsuártimpiash” tusar, Pariséu shuarsha Jesusan ii pujuriarmiayi.

³ Nuñkia Jesus uweje jaka shuaran chicharuk “Ajapén wajasta” tímiayi.

⁴ Nuñkia mamikmaun chicharuk “¿Ayampratin tsawantaj péñker túratin yajauch túratniujaj tuá imiá péñkerait. Shuar uwemtikratin máatniujaj tuá imiá péñkerait?” tímiayi.

Nuna takui niisha pachischarmia.

⁵ Tura Jesus kajek nin iyarmiayi; tura ni enentáin kátsuram ásarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniakmasmatai ni uweje jaruku ataksha péñker ajatsamiayi.

⁶ Nuyá Pariséu shuar jíinkiar, Jesus maami tusar Erutis shuarjaj áujmatsarmiayi.

Untsurí shuar Jesusan káutkarmiania nu

⁷ Nuyá Jesus ni unuiniamurijjaj antumiannum wémiayi. Kariréa nunkanmayaj untsurí shuarsha Jesusan nemariarmiayi.

⁸ Untsurí nunkanmayasha káunkarmiayi. Jutía nunkanmayasha, Jerusarén péprummayasha, Itiumia nunkanmayasha, Jurtañ entsa amainiasha, Tiru tura Setun pepru pujuinia nú nunkanmayasha, untsurí shuar ni túramuriñ nekaawar, Jesusan káutkarmiayi.

⁹ Untsurí káunkar chanuntawarajñ tusa Jesus ni unuiniamuriñ kanuram inianáastarum tusa seamiayi.

¹⁰ Kame untsurí shuaran Jesus nuik tsuaru asamtai, jaa shuar nuí káunkarmiania nu Jesusan antañtaj tusar shitianainiakui nuna seamiayi.

¹¹ Tura iwianchrukusha Jesusan wáinkiar tikishmatrarmiayi. Untsumainiak “Ame nekas Yusa Uchirínme” tiarmiayi.

¹² Tura nuna etserkairap tusa Jesuska kakantramiayi.

Jesus tuse shuaran anaikiarmiania nu

(Mateu 10.1-4; Rúkas 6.12-16)

¹³ Nuyá Jesus náinnium wakamiayi. Tura anaikiatniun wakerimia nú shuaran untsukmi-ayi. Tura niisha Jesusan weriarmiayi.

¹⁴ Tura Niijjaj wekasar Yus-Chichaman unuiniartinian tuse shuáran anaikiarmiayi.

¹⁵ Tura sunkur tsuártinian, iwianchcha jíiki akupkatniun ni kakarmariñ súsarmiayi nú shuaran.

¹⁶ Ju shuáran anaikiamu ármia: Semun, Jesus chíkich naarin Pítiur apujtusmiania nu;

¹⁷ Sepetéu uchirí Jakupu, ni patai Juánsha; ipiamtajaj métek kakaram ásarmatai nuna mai “Puanérjís” naari susamiayi. Nusha shuar chichamjajñkia “ipiamta nuke” tawai.

¹⁸ Nuyá Antressha, Jiripi, Parturumi, Mateu, Tumas, Arpeu uchirí Jakupu, Tateu, ásump Semun,

¹⁹ Jútas Iskariúti. Jesusan ukunam surukmia nú Jútasauyayi. Anaik amukmatai jeá waketrarmiayi.

Yusa Wakanñ yajauch chicharna nu

(Mateu 12.22-32; Rúkas 11.14-23; 12.10)

²⁰ Waketkiarmatai, ti untsurí shuar taarmatai takatñ ti akui, yurumátniun jeacharmiayi.

²¹ Jesusa shuárjsha nuna nekaawar Jesus ti itiurchat pujus wáurtsuash tu enentáimsar jukitiai tusar nu jeganam jeariarmiayi.

²² Nuyá Israer-shuara jintinniurj Jerusarénnunumia táarmiania nu, Jesusan áujmatainiak “Pirsepú enkea asa iwianchrukuiti. Tuma asa uunt iwianchi kakarmarjijai iwianchin jiki akupeawai” tiarmiayi.

²³ Tutai Jesus winitiarum tusa nin untsukmiayi. Tura enentáimtkrataj tusa juna tímiayi: “¿Iwianch Satanáskesha itiu ajapmamatijn?

²⁴ Chikichik nú nunkanmayá shuar nuámtak kajernaiyakuinkia, nu nunka wari meserchattawak.

²⁵ Nuámtak shuar ni shuarjijai kajernaiyakuinkia nu shuarsha amunaikchartatuak.

²⁶ Núnisan ¿Satanáskesha ni suntarjijai máaniakka itiuurak tuke pujusarat? Amunaikiartatui.

²⁷ Nánkamas shuar kakaram shuara jeen wayá, nérenniun jinkiatsuk ni kuítrjn kasarkachminiaiti. Antsu nérenniun jinkiá ni kuítrjn kasarkamniaiti.

²⁸ Nekas tájarme, shuar tunáa ashí túruiniana nuka tsankuramniaiti. Winiasha winia Aparnasha yajauch áujmatusha tsankuramniaiti.

²⁹ Antsu Yusa Wakanín yajauch áujmatna nuka tsankurachminiaiti; antsu nu shuar niniki tuke sumamattawai.”

³⁰ “Jesuska iwianchrukuiti” tuíniakui Jesus nuní tímiayi.

*Jesusa yachj Jesusa nukurj
(Mateu 12.46-50; Rúkas 5.19-21)*

³¹ Nuyá ni yachj ni nukurjijai taar aa wajasar, Jesusan untsukat tusa akupkarmiayi.

³² Shuar Jesusan téntak pujuarmia nu tiarmiayi “Iis, nukusha, yatsumsha aa wajasar untsurmainiawai.”

³³ Tutai Jesus chichaak “Ya ainia winia nukursha yatsursha” tímiayi.

³⁴ Nin téntakar pujuarmia nuna iis “Júiti winia nukurka, yatsurka, tímiayi.

³⁵ Shuar Yusa wakeramurjn uminiana nu winia yatsuruiti, winia umaruiti, winia nukuruíti” tímiayi.

4

*Atsaamin atsaampramiania nu
(Mateu 13.1-9; Rúkas 8.4-8)*

¹ Nuyá jinki antumianka yantamen Jesus ataksha unuiniartinian juarkimiayi. Tura untsurj shuar irunrarmatai, kanunam enkempramiayi. Shuarsha antumianka káanmatkarin pujuarmiayi.

² Jesuska métek-taku chichamjai ti jintintiarumiayi. Jintintiuk juna tímiayi:

³ “Antuktarum. Atsaamin atsaamprataj tusa jinkimiai.

⁴ Atsaamkui ni arakrj jintiá iniararmai. Chínki yakiya káutkar yuawarmai.

⁵ Chikichcha kaya irunmanum iniararmai, nunka ishichik ámanum. Tura nunka ishichik asamtaí wárik tsapainiarmai.

⁶ Tura etsa etsantar sukuám kancape atsa asamtaí káararmai.

⁷ Chikichcha janjki nupanam iniararmai. Janjkiasha tsapainiar kanjar ajakrarmai; túram nerecharmai.

⁸ Chikichcha pénger nunkanam iniararmai. Tura tsapainiar nerecharmai, chikich trainta, chikich sesenta, chikich sian nerecharmai.

⁹ Kuishim ákuinkia antuktarum” tímiayi.

(Mateu 13.10-17; Rúkas 8.9-10)

¹⁰ Untsurj wearmatai, ishichik Niijai juakarmiania nu, ni tuse unuiniamurijjai aniasarmiayi “¿Ame jintintiamna nusha warimpiait?” tiarmiayi.

¹¹ Tutai Jesus chichaak “Yuska ni akupeamurjn atumin paant nekamtikramattsa wakerutmarme. Antsu chikich shuarka aya métek-taku chichamjai jintintiawartatui.

¹² Íniyatañ wáinkiacharat tusa, antukarsha nekaacharat tusa, umirtsuk ni tunaarj tsankurnacharat tusa túrtatawai” tímiayi.

(Mateu 13.18-23; Rúkas 8.11-15)

¹³ Tura tímiayi “Wi jintintiajrumna nú métek-taku chicham nekaachurmek. Nu nékachurmeka ¿itiurak chikich métek-taku chichamsha nekaatarum?

¹⁴ Atsaamniua nuka Yus-Chichaman étserna nuna nakumui.

¹⁵ Jinkiá jintiá iniaarua nuna chikich shuar ántuiniamun nakumui. Nu shuar chichaman ántuiniawai. Tura antukarmatai Satanás wárik tarí ni enentájn atsaampramun jurawai.

¹⁶ Chikich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai.

¹⁷ Tura ni kan̄kape atsakui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura ch́kích iturchatan wáinkiar Yúsajya kanainiawai.

¹⁸ Ch́kích ántuiniamuka jan̄kí nupanam atsaampramua núniskete. Nu shuar Yus-Chichaman ántuiniawai.

¹⁹ Ántuiniayat jū nun̄kanam ana nuna ti páchiniawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáin Yus-Chicham ana nuna kan̄kar emen̄katui. Tuma asamtai nerektinian tujintiainiawai.

²⁰ Tura ch́kích ántuiniamusha péñker núnkanam atsaampramua núniskete. Nú shuarsha Yus-Chichaman antukar umiiniawai. Tura nerenawai, ch́kích shuar trainta, ch́kích shuar sesenta ch́kích shuar siansha nerenawai.'

*Ūukma ana nu paant nekanattawai
(Rúkas 8.16-18)*

²¹ Nuyá Jesus jūna tímiayi '¿Shuar shiripkin ekeemak itiā pitiaknum en̄keattawak. Peaknum wakenam ikiustatuak? Atsá. Antsu misanam ekentsashtinkiait.

²² Núnisan̄ ashí ūukma ana nu ukunam paant nekanattawai. Tura núnisan̄ yamá ishishmasa chichasmasha ukunam paant nekanattawai.

²³ Kuishim ákuin̄kia antuktarum.'

²⁴ Tura nuyá tímiayi 'Ántarmena nu esetrarum enentáimsarum antuktarum. Urutá péñkerak enentáimsatarum, núnisan̄ Yuska ámin nekaatniun suramsattarme, tura nú núkap patatramsattarme.

²⁵ Tuma asamtai shuar núkap takakna nu patatnastatui. Antsu ch́kích shuar ishichik takakuk jurunkittiawai.'

Yusa akupeamurī júnisaiti

²⁶ Nuyá Jesus ch́chaak jūna tímiayi 'Yusa akupeamurī júnisaiti. Shuar jin̄kiaian atsaampratniua núniskete.

²⁷ Jin̄kiaian atsaamar, untsurí kanar, tsawar, uruksanpi tusa nákawai. Tura itiura tsapainia núnaka nékatsui.

²⁸ Kame jin̄kiaiā nun̄kanam init aku nin̄ki tsapaatsuk; emka nukareawai, nuyá tuyureawai tura nujamar katsuawai.

²⁹ Túruna káakmatai júuktin tsawant jeayi tusar jūniawai.'

(Mateu 13.31-32; Rúkas 13.18-19)

³⁰ Ataksha Jesus tímiayi '¿Yusa akupeamurī warijiāin̄kí nakumkataj. Warijiāin̄kí métek-takuit?

³¹ Mustasa jin̄kiaiā araamua nujaī métek-takuiti. Nu jin̄kiaisha ashí nan̄kaamas ishi-tiupchichiti.

³² Tura araam tsapá̄i ashí nan̄kaamas uunt ajawai; tura tsen̄keakmarisha kámpuram asamtai nūj mikintranam chin̄kisha shiir ayamainiawai.'

(Mateu 13.34-35)

³³ Núnisan̄ Jesus untsurí métek-taku chichamjaī Yus-Chichaman ujaamiayi. Nii nekaatniun jearmia nunak ujaamiayi.

³⁴ Ch́kích shuaran aya métek-taku chichamjaī ujaamiayi; antsu ni unuiniamurījiāi Nin̄ki pujus ashí paant jintinrarmiayi.

Nasencha, entsan̄cha Jesus imijiánmia nu

(Mateu 8.23-27; Rúkas 8.22-25)

³⁵ Nu tsawantaī etsa akaikimtai Jesus ni unuiniamurīn chicharainiak "Entsa amain katintai" tímiayi.

³⁶ Tutai kanunam en̄kemprarmiayi. Ch́kích shuarnaka káanmatkanam ikiukiarī Jesusan kanunam pujan júkiarmiayi. Ch́kích kanunmayasha atampriarmiayi.

³⁷ Tura nasesha ti nasenkatasa nan̄kammiayi; ch́chimi kanunam yaráná piáktasa ajamiayi.

³⁸ Jesuska kanú sen̄karin̄ atamprus kanú tepemiayi. Tura, ni unuiniamurī Jesusan ishintiak chicharuk "Uunta ii wayajnia jūka pachitmatismek" tiarmiayi.

³⁹ Tutai Jesus nantaki nasen kakantramiayi. Entsan̄cha chicharuk "Takamatsata. Miaku ajasta" tímiayi. Tutai nasesha men̄kakamiayi, entsasha miaaku ajasmiai.

⁴⁰ Túrunamtai Jesus ni unuiniamurīn chicharainiak "¿Urukamtai ashamarum? Itiura Yus nekas enentáimtatsrum" tímiayi.

⁴¹ Tura imiāi ashamainiak "¿Maa jūsha yait? Nasesha entsasha nin umirainiatsuk" tunaiyarmiayi.

5

*Jataranmayan iwianchrukun Jesus tsuármiania nu**(Mateu 8.28-34; Rúkas 8.26-39)*

- 1 Nuyá antumiañ amaini Játara nuñkanam jeawarmiayi.
- 2 Jesus kanunmaya jinkimtai áishmañ iwianchruku, shuar jakáa iwiartainiumiá wárik taa Jesusan inkiunmiayi.
- 3 Nu shuar iwiartainium tuke pujuyayi. Tura jirujainkia nin jinkiaatniun tujinkiararmiayi.
- 4 Jirujaj nawenmasha, uwejunmasha tuke jinikiau ármiai. Túramaitiat jinkiaarman tsuriar tepet-tepet awajmiayi. Tura ti kakaram asamtai nin nupetkachminiuyayi.
- 5 Tuke tsawajsha káshisha, iwiartainiumsha murasha kayajaj ijiunmak untsumuu wekainiuyayi.
- 6 Tura yajayan wáiniak Jesusan tseke tarimiayi; tura tikishmatramiayi.
- 7-8 Túrunamtai Jesus chicharuk “Iwianchiá, ni enentáiya jinkitia, tájame” tímiayi.
- Takui iwianch kakantar chichaak “¿Winiasha urukamtai tarutnium, Uunt Nañkaamaku Yusa Uchirj Jesúsá? Yus iirmanum wáitkiarsaip, tájame” tímiayi.
- 9 Takui Jesus tímiayi “¿Ame náarmesha yait?”
- Tutai niisha ayak “untsurj ásar wikia Untsurj-suntar tu anaikiamuitjai” tímiayi.
- 10 Nuna tj amik, nu nuñkanmaya akuptukajin tusa Jesusan ti seamiayi.
- 11 Nujsa nainnium nuntumas untsurj kuchi shushunmak matsamarmiayi.
- 12 Tuma asamtai, kuchiniam enkemátin tsankatrukta túsar Jesusan seawarmiayi.
- 13 Tuiniakui Jesus “ayu” tímiayi. Takui iwianch áishmañkajiniá jinkiar kuchiniam enkemáwarmiayi. Kuchisha ti untsurj, jimiará mir (2.000) áchiawash. Ashí mash nánatanam iniaawar antumiañnum iniañkarmiayi. Nujsa entsá kjakar jakerarmiayi.
- 14 Túrunamtai kuchin wáinin pisarar péprunmasha shuarnumsha nuna etserarmiayi. Tuma asamtai iyutai túsar ashintiukarmiayi.
- 15 Túrawar Jesusaj jeawarmiayi. Jeawar áishmañ yaunchu iwianchrukun yamaikia péñker ajasan pushirjin entsar pujan wáinkiararmiayi. Wáinkiar ashamkarmiayi.
- 16 Tura waketkiar kuchi túrunamuncha iwianchruku péñker ajasmancha mash et-serkarmiayi.
- 17 Tuma asamtai ni nuñkeya jiiinki wetá tusa seawarmiayi. Jesus kanunam enkemamtai áishmañ nuik iwianchruku amia nu Jesusan chicharuk
- 18 “Wi Ámijjai tuke tsaninñkian wekasatjai” tímiayi.
- 19 Tura núnaka Jesus suritkiarmiayi. “Antsu ame jeejin, áminiurmjin weme, ashí Uunt Yus túrutma nu tura waitnentrampra nusha ujakarta” tímiayi.
- 20 Tutai áishmañsha wémiayi. Tura antsu Tekapuris nuñkanam Jesus nin péñker awajsamia nuna ashí shuaran ujakmiayi. Nu nuñkanmaya shuarka nuna antukar ti enentáimprarmiayi.

*Jimiará jaan Jesus tsuármiania nu**(Mateu 9.18-26; Rúkas 8.40-56)*

- 21 Ataksha Jesus kanujaj katinmatai, aents untsurj Nin irunturarmiayi. Jesuska antumiañka káanmatkarj wajamiayi.
- 22 Tura Israer-shuar iruntaj jea náampruku, ni naarj Jairu, támiayi. Taa, Jesusan wáiniak, piniakum tepersamiayi.
- 23 Piniakumar ti seak, “Winia nawantur jarutui. Winitia, túram péñker ajasat tusam uwejmijjai antinrukta. Nuñkia jarutkashtatui” tímiayi.
- 24 Tu tímiatai Jesus niijjai wémiayi. Tura untsurj shuar wena ásar Nin chánuarmiayi.
- 25 Nuj pachitkia nuwá ti jaa wémiayi. Niisha tuse uwi nunpan ajapeak wáitias pujuyayi.
- 26 Ti untsurj tsuakratin nincha iisu armiayi. Tura iyamsha ti wáitias pujuyayi. Tura ni kufrincha ashí ajapaitiat tsuámarchauyayi; antsu tsuamsha nu arant ajauyayi.
- 27 Nu nuwasha, Jesus túramun antuku asa, ni ukuurinj amainiañ ni pushirjin antinmiayi.
- 28 “Wi aya ni pushirjin antinñaka péñkerapi ajasaintjia” tu enentáimiar túramiayi.
- 29 Tura Jesusa pushirjin antin nú chichamaik numpa ájapman menkakamiayi. Péñker ajasman ayashijn nekapramiayi.
- 30 Tura nuñ Jesúska, ni kakarmarjijaj tsuarman nekapmampramiayi. Tura nuna nekáa, ayantar chichaak “¿Yaki winia pushirun antinrukta?” tímiayi.
- 31 Tutai ni unuinimurj tiarmiayi, “Untsurj Ámin antinmainiasha ¿urukamtai “yaki winia antintkia” tame?”
- 32 Tura Jesus, yaki túruta tusa ashí ímpramiayi.
- 33 Nuñkia nuwasha, ni ayashin túruna nuna nekáa, ti ashamak kuraimiayi. Tura Jesusan jearj tikishmatramiayi. Tura ni túrunamurjin ashí paant ujakmiayi.

³⁴ Takui Jesus nin chicharuk “Nawantru, Winia nekas enentáimtursa asakmin, péñker awajtamisaitme. Shiir wetá, tura tuke péñker pujusta” tímiayi.

³⁵ Tura Jesus nuna tuke chichas pujaj, iruntai jea uuntrj jeenia tariarmiayi. Tariat chicharainiak “Ame nawantrum jakayi. ¿Urukamtai Unuikiartin tuke itit awajsatam?” tiarmiayi.

³⁶ Tura Jesuska, nii tiarmia nuna ántayat, núnaka pachitsuk, iruntai jea uuntrj chicharuk “Ashamkaip; áyatik nekas enentáimtursata’ tímiayi.

³⁷ Tura Nijijaj wétinian aya Pítruncha, Jakupuncha ni yachj Juanjaj tsankatkarmiayi.

³⁸ Iruntai jea uuntrj jeen jeawar, áentsun charaatum ajainian, útainian untsumuk ajainiancha Jesus wáinkiamiayi.

³⁹ Tura nuwach penké jakan nékayat, wayá nin chicharuk “¿Urukamtai timiá útrum, tura wa wa ajarum? Nuwach jákachai, antsu kanarai” tímiayi.

⁴⁰ Nuna takui wishikrarmiayi. Tura Jesus ashí jjiir akupkarmiayi. Áyatik nuwachj aparjñ, nukurjñcha tura Nijijaj táaruncha nuwachj tepamurjñ jukimiayi.

⁴¹ Tura wayawar Jesuska nuwachj uwejen achik tímiayi “Taritia kumi.” Nusha shuar chichamjainkia “nawantrú nantáktiá” tawai.

⁴² Nuwach tuse uwí takakuya nu, nú chichamaik nantaki wekasamiayi. Túramtai nuj pujuarmiania nu ti enentáimprarmiayi.

⁴³ Jesuska chichaak “Atumsha penké etserkairap’ tímiayi. Tura “nuwach ayuratarum” tímiayi.

6

Jesus Nasarénum pujusma

(Mateu 13.53-58; Rúkas 4.16-30)

¹ Jesus nuyá jjiñki ni nuñken waketkimiayi. Ni unuiniamurjsha nemariarmiayi.

² Nujsha ayampratin tsawant jeamtai Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. “¿Jusha tuj unuimiaruit. Ni nekaat-niurjñcha yaki susait. Tura aentsti tujintiajnian nuna Niisha itiurak tura?”

³ Jusha karpintiruchukait; Marii uchirjñchukait. Ni yachjsha Jakupusha, Jusesha, Jútassha, Semunsha nékatsjik. Tura ni umajsha juj iijjaj pujuiniatsuk” tiarmiayi. Túrawar Nin nekas enentáimtustinian tujinkiararmiayi.

⁴ Túrasha Jesus nin chicharuk “Yúsnan etserniun chíkich nuñkanmayan̄ka shiir anturaini-awai. Antsu ní nuñkeyan̄ka, ní shuarsha anturainiatsui” tímiayi.

⁵ Tura nujsha, ni nuñkenkikia aentsti tujintiamun túratniun tujinkiamiayi. Antsu jaancha aya ishichik ni uwejejai antjñ tsuármiai.

⁶ Tura nekas enentáimtacham “¿urukamtai nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuiniakní wekaimiayi.

Yus-Chicham etserkatarum tusa Jesus ni unuiniamurjñ akupkarmiania nu

(Mateu 10.5-15; Rúkas 9.1-6)

⁷ Tuse unuiniamurjñ untzuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmarjñ súsararmiayi.

⁸ Tura chicharuk “Jintia yurumátniusha jukiirap, uyuntrumjñincha kuitcha en̄kearum jukiirap. Antsu aya áanik mashtun̄ jukiirum wetarum.

⁹ Sapat uwekatarum, tura entsartincha jímiar jukiirap, tímiayi.

¹⁰ Tura jea wayarmena nujñ pujustarum; pujá-pujakuarum nuyá chíkich peprunmasha wetarum.

¹¹ Tura nápkamas aents atumin awaintiamainiachkuisha, anturtamainiachkuisha, nuyá jjiñkirum, nu shuar yajauch ániawai tusarum, atumí nawe nuñka akakekrum ikiuk-tiarum. Kame Yus áentsun nekapsattana nú tsawant jeamtai, nu shuarnaka asutiattawai. Sutuma péprunmaya shuarjaj tura Kumura péprunmaya shuarjaj nan̄kaamas nin asutiattawai” tímiayi Jesus.

¹² Nuyá Jesusa unuiniamurjñ jjiñkiar enentái yapajjar Yúsaj enentáimtumartinian et-serkarmiayi.

¹³ Tura iwianchruku enentáiyá iwianchin jjiirki akupkarmiayi, tura asutijjaj yakarar untsurj jánian tsuararmiayi.

Juanka jakamurjñ

(Mateu 14.1-12; Rúkas 9.7-9)

¹⁴ Jesusa náarín tura ni túramurín ashí aents áujmatin ásar matai, uunt akupin Erutis nuna antukmiyai. Erutiska “Imiakratin Juan jakamunmaya nantakni. Tuma asa ti kakaram takaawai” tímiyai.

¹⁵ Tura chikich shuar “Eriásaiti” tiarmiiai. Chikichcha “Yúsnan etserniuiti, yaunchu etserniuya nukete” tiarmiiai.

¹⁶ Erutis nuna antuk “Nékas Juánkaiti. Ni muuken tsupiktinian akupkamiyai nu, jakamunmaya nantakniuiti” tímiyai.

¹⁷⁻¹⁹ Kame Uunt akupin Erutis, ni yachí Jiripi nuarín nuatkamiyai. Nu nuwa naari Jirutíasaiti. Juansha uunt akupniun Erutisan chicharuk “Yatsumi nuarí akintrukchat-niuitme” tímiyai. Tutai nuwa Jirutías Juánkan ti kajerkamiyai. Tura Juánkan máataj tusa wakerimiyai. Túrasa uunt akupin Erutis nuna surimkiamiyai. Antsu Juan achikrum sepunam enkeatarum tusa akupkamiyai.

²⁰ Juansha tuke enentájjai Yusa jintín wekainiuyayi. Erutis, ni esetar enentáimniun neka asa Juánkan ashamak Jirutías wakeramurín túrawaj tusa suritkiamiyai. Kame Erutis Juan étserman nékachuitai antuktinian wakerimiyai.

²¹ Jirutías, itiurak máawaj tu pujai, uunt akupin Erutis, ni akiiniamu tsawantrí jeamtai, ni suntaríncha, Kariréa nunkanmaya úuntríncha, kuírintin armia nunasha untsukar, namperan najanamiyai.

²² Nuisha Jirutiasa nawantrí wayá jantsemámtai Erutis tura niijjai nampernum matsarmia nusha shiir enentáimsarmiiai. Túramtai uunt akupin nuwáchin chicharuk “Ame wakeram nu seattia. Wi amastatjai.

²³ Nékas tájame, ashí ame seatmena núnaka amastatjai. Wats, seatkumniñkia takakjana nuna jímiapetek nakakan, amastatjai” tímiyai.

²⁴ Tutai nuwách jíinki ni nukurín Jirutíasan chicharuk “¿Wariniak seattaj?” tímiyai.

Tutai “Imiakratin Juan ka muuke seata” tímiyai.

²⁵ Nu chichamaik nuwách warí wayá Erutisan chicharuk “Yamaikia uunt amamkunam Juan ka muuken wakerajai” tímiyai.

²⁶ Nuna takui uunt akupin ti kuntuts enentáimpramiyai. Tura nii tiniu asa ni amikrí matsatainia nu antukaru ásar matai surimkiatniun tujinkiamiyai.

²⁷ Tuma asa uunt akupin Juan ka muuke itíata tusa ni suntarín wárikmas akupkamiyai.

²⁸ Túramtai suntar wari we, sepunam Juan ka muuken tsupikmiyai. Tsupik, amamkunam itía, nuwáñ susamiyai. Túram achik ni nukurín susamiyai.

²⁹ Juan maamun antukar ni unuiniamurí ni ayashín iwíarsatai tusar júkiarmiiai.

*Senku mir áishmankan Jesus ayuramiania nu
(Mateu 14.13-21; Rúkas 9.10-17; Juan 6.1-14)*

³⁰ Tura Jesusa unuiniamurí Nii akupkarma nu, ataksha wakетки káunak irunturarmiiai. Ashí nii túrawarmia nuna, unuiniararmia nunasha ujakarmiiai.

³¹ Tura untsurí shuar táiniakui, niisha ankant ajastinniasha yurumátiniuncha tujinkiar-mi-ai. Tuma asamtai Jesus chichaak “Íijjai wemi aents atsuiniamunam; nu j ishichik ayam-prarmi” tímiyai.

³² Nuyá Jesus ni unuiniamuríjjai kanunam enkemprar, aents atsuiniamunam jeatai tusar jíinkiar-mi-ai.

³³ Túrasa shuar ni wéenan wáinkiar-mi-ai. Tura “Jesusaiti” tiarmiiai. Tuma ásar ashí péprunmaya untsurí shuar tseke ashintiukar, ni jeatniunam nákakarmiiai.

³⁴ Jesus kanunmaya jíinki ti untsurí aents iruntrar matsatun wáinkiamiyai. Murik péñker wáinchataiya núnisan matsatu ásar matai Jesus nin wáitnentrarmiiai. Tura núkap unuiniararmiiai.

³⁵ Nuyá kjakui ni unuiniamurí Jesusan tariar chicharainiak “Atsamunam pujatsjik; tura yamá kjatsuk.

³⁶ Shuar wari akupkarta. Tíjiuch péprunmasha, shuarnumsha wearti, ni yurumkarí sumarmakarat” tiarmiiai.

³⁷ Tutai Jesus chichaak “Atumek ayuratarum” tímiyai.

Tutai “Íisha ju shuar ayuratai tusar, ¿jímiará sian kuitjai yurumak sumaktai tusar wétinkiaitai?” tiarmiiai.

³⁸ Tura Jesus ni unuiniamurín chicharainiak “Tanta takakrum nu iistarum ¿urutmak aa?” tímiyai.

Tutai nekapmarar chichainiak “Tántaka séñkuchikiiti, tura namaksha jímiarchikiiti” tiarmiiai.

³⁹ Tutai Jesus tímiyai “Ju shuar chírichriniam pujusarti tusar akupkatarum.”

⁴⁰ Ankant ankant sian siansha, senkuenta senkuenta iruntrar matsamsarmiiai.

⁴¹ Jesuska senku tantancha, jímiar namaknasha jusa, yakí nayaimpinmaanĭ ímias Yúsan yuminqsamiayi. Tura yurumkan púurmiayi. Puur ni unuiniamurĭn súsarmiayi. Namaknasha puur súsarmiayi, ashí shuáran ajamsarat tusa.

⁴² Ashí yurumáwar ejemarmatai,

⁴³ puunaruncha, namak ampirmancha achikiar, tuse chaŋkinian áimkiar júkiarmiayi.

⁴⁴ Nu yurumkan ti untsurĭ yurumáwarmiayi. Aya áishmaŋkak senku mir (5.000) ármiai.

Jesus entsá pátatek wekasamiania nu

(Mateu 14.22-27; Juan 6.16-21)

⁴⁵ Nuyá Jesus ni unuiniamurĭn chicharainiak “Kanunam enkemprarum, katĭnkrum amain émaa ajatarum, Petsaitia péprunam. Wisha ju shuaran áujsan ikiuktatjai” tímiayi.

⁴⁶ Shuáran áujas ikiuki Yusjai chichastaj tusa náinnium wémiayi.

⁴⁷ Tura kirit ajasmanum kánuka antumiaŋnum ajapén nanammiai. Jesuska niŋki juakmiayi.

⁴⁸ Jesusa unuiniamurĭsha wia-wiantainiakua ti pimpikiarmiayi, nase tukumma ásar. Nuna Jesus wáiniak tsawartĭn ishichik ajasmatai entsá pátatek wekas nin jeariarmiayi. Tura naŋkaamaktiasa wea núnisaŋ wémiayi.

⁴⁹ Jesus entsá wekaan ni unuiniamurĭ wáinkiar, wakanchashit, tu enentáimprarmiayi. Túrawar ti untsumkarmiayi.

⁵⁰ Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wítjai Jesus; ashamprukairap” tímiayi.

⁵¹⁻⁵² Nuiŋkia entsaya kanunam waka enkempramiayi. Túramtai nasesha majaanmiami. Ni unuiniamurĭnkia enentáĭ kiritia áintsan ásmatai Jesus yurumkan núkap awajsamia nuna paant nekaatniun tuke tujinkiarimiayi. Tuma ásar yamáĭ túrunamu itiurak aankia tusar ti enentáimprap sapijmiakarmiayi.

Jinisarĭniumiá shuáran Jesus tsuármiania nu

(Mateu 14.34-36)

⁵³ Nuyanka katĭnkjar, Jinisarĭt núŋkanam jeawarmiayi. Jeawar kanun ajuĭniarmiayi.

⁵⁴ Kanunmaya jĭntrarmatai, nu nuŋkanmaya shuar Jesusan nekaawarmiayi.

⁵⁵ Tura “Jesus pujawai” táman antukar, ashí jeanmaya jaan ni peakrintiuk Jesus pujamunam tiaarmiayi.

⁵⁶ Tura Jesus wekaak wémia nuĭsha, péprunmasha, shuar matsatmanumsha, ishichik matsatkamunmasha jaan itiarar jintiá áeprusarmiayi. Túmainiak Jesusan pushirmin antĭntaj tusar seawarmiayi. Tura ashí antiŋkiarmia nuka péŋker ajasarmiayi.

7

Jesus Pariséun áujmatsarmiania nu

(Mateu 15.1-20)

¹ Pariséusha, Israer-shuara jintinniurĭsha Jerusaréŋnumiá Jesusan tariarmiayi.

² Tura Jesusa unuiniamurĭn ikijmiatsuk yurumun wáinkiar “Israer-shuara túrutairĭn túruiniatsui” tiarmiayi.

³ (Kame Pariséusha, tura ashí Israer-shuarsha, ni uuntrĭ jintintiamurĭn umikiar ti núkap ikijmiarar yurumin ármiai.)

⁴ Péprunmaya tari “ikijmiatsuk yurumáshtiniaiti” tiniu ármiai. Tura ti untsurĭ ni uuntrĭ túrutairĭ núnisaŋ ármiai. “Tsapancha, ichiŋnasha, jiruncha, peaknasha niĭjakartiniaiti” tiniu ármiai.)

⁵ Tuma asamtai Pariséusha, Israer-shuara jintinniurĭsha Jesusan chicharainiak “¿Urukamtai ame unuiniamuram ii uuntrĭ jintinramniuitiaj nuna túruiniatsu. Urukamtai ikijmiatskesha yurumáinia?” tiarmiayi.

⁶ Tutai Jesus tímiayi “Ántar chichamtiniaitrueme. Isayas yaunchu nekas atumin áartampramiayi juna:

Ju aents ni wenejai Winia “ti péŋkeraiti” turutainiawai, tímiayi Yus, tura ni enentáŋkia jeachat pujuiniawai.

⁷ Tura tukeneas Winia shiir awajtuiniawai. Aentsu chichame jintiainiayat, “Yus-Chichamaiti” tuiniawai.”

Tu áarmaiti.

⁸ Tura átum Yusa chichame iniaisarum, aentsu jintintiamurĭ umirkarum, ichiŋnasha, tsapancha niĭjaktin, tura chĭkich túrutaisha áintsarmek untsurĭ túrarme.

⁹ Túrákrum Yus-Chichamka tsukintiaani ikisurme atumí uuntrĭ chichame umirkatai tusarum.

¹⁰ Kame Muisais yaunchu aar juna tíchamka:

Ame apa nukusha shiir enentáimtustarum.

Tura ataksha áarmiayi:

Shuarsha ni aparín, nukuríncha yajauch chichareakka, nu shuar jákatniuiti.

¹¹⁻¹² Túrasha átumka Pariséutirmeka, antsu ju tárume: “Shuar ni aparín ni nukurín chicharuk “Wi yáintinian takakjana nu Kurpanaiti” takuñkia, atumsha péñkeraiti, aparíncha nukuríncha yáinchati” tarume. (Kurpan tana nuka, Yus susamu, tawai.)

¹³ Nekaatarum, Pariséutiram. “Íi yaunchu uuntri chichame tuke umiki wétiniaitji” tákurum, Yus-Chicham peñké ántar chichama núnin awajearme. Núnisrumek chikichcha untsurí túrarme.” Tu tímiayi Jesus.

¹⁴ Nuyá ataksha Jesus ashí shuáran untsukar “Mash anturtuktarum, ashí nekaatarum, tímiayi.

¹⁵ Aya ayashnium wayaana nu, shuáran yajauch awajsachminiaiti; tura antsu ni enentáiniá jiniia nu, yajauch awajsattawai.

¹⁶ Shuar nuna ántakka enentáimprati” tímiayi.

¹⁷ Nuyá áentsun ikuiak, jeá wayámtai, ni unuiniamurí aniasarmiayi “¿Nu métek-taku chicham warintiuu?” tiarmiayi.

¹⁸ Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiaiti.

¹⁹ Antsu wakenam wayá, nankaamas menkaatsuk” tímiayi. Nuna taku, ashí yurumak páchitsuk yuamniaiti, tímiayi.

²⁰ Nuyá tímiayi “Shuara enentáiniá jiniia nu, yajauch awajsamniaiti.

²¹ Shuara enentáiniá, iniñia, yajauch enentáimsatniusha, tsanirmatniusha, natsa tsanirmatniusha, shuar máatniusha,

²² kasamkatniusha, chikichna wakeruktincha, péñkercha túratniusha, anañkatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka iniñia wininiatsuk.

²³ Ashí nu tunáa ainia nu, shuara enentáiniá jiniia asa, shuáran yajauch awajainiawai” tímiayi.

Serupinísianmayá nuwá Jesusan nekas enentáimtusmiania nu
(Mateu 15.21-28)

²⁴ Tiru pepru, Setún péprusha Serupinísia nunkanam ámiayi. Nuka Israer-shuara nunkenchauyai. Nu nunkanam Jesus wémiayi. Tura jeá, jeá wayáa pujusmiayi. Tura nuñ pujamun nu nunkanmayá shuar nekarawarain tusa nakitmiayi; túrasha uumkatniun tujinkiamiayi.

²⁵ Wárik nu nunkanmayá nuwá Jesus pujan nekaamiayi. Nu núwaka nawantri iwianchrukuyayi. Tuma asa Jesusan tari ni nawen piniakum tepersamiayi.

²⁶ Nu nuwá Israer-shuarcha, Serupinísianmayáuyayi. Túmaitiat, nawantru enentáiyá iwianchin jirturkitia tusa Jesusan seamiayi.

²⁷ Tutai Jesus nuwán chicharuk “Uchi emka ejemarartí. Uchi apatkurí atankir yawach súsatin péñkerchaiti” tímiayi.

²⁸ Tutai nuwá ayak “Nekas, Unta, tame. Tura yawachisha misanam wakenam pujuinia nu, uchi apatkun yurumuk juyumak kákeamun yuñiatsuk” tímiayi.

²⁹ Tutai Jesus tímiayi “Péñker tame. Tuma asam, shiir wetá; ame nawantrumí enentáiyá iwianch jinkiyi” tímiayi.

³⁰ Takui niisha wémiayi. Tura ni jeen jeá, ni nawantrin iwianch jinkimtai péñker ajas peaknum tepan wáinkiamiayi.

Jesus empekun tsuármiania nu

³¹ Jesus Tirunmayá jinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jeamiayi.

³² Nuñ chichachu ámiayi, kuishin empeku. Nu shuáran Jesusan itiarar, ni uwejejai antiñkiat tusa seawarmiayi.

³³ Shuar matsatmanumiá Jesus nin akanki jukí kuishin tsara uwejejai tsutsukruamiayi. Tura usukia, nu shuara iniñia antintkiamiayi.

³⁴ Tura nayaimpinmaaní íimias súkaska mayati “Epata” tímiayi. Nuka, shuar chicham-numka “chinkiat” tawai.

³⁵ Nu chichamaik ni kuishisha chinikiamiayi, iniñisha séermiayi. Tura paant chichasmiayi.

³⁶ Tura Jesus chicharainiak “Peñké etserkairap” tímiayi. Jesuska surí-suritiamaitiat, nu nankaamas etseriarmiayi.

³⁷ Tura ti enentáimprarmiayi. Enentáimprar, “Ju Jesus aya péñkeran túrawai. Empekuncha ántumtikniaiti, tura chichachun chichamtikniaiti” tiarmiayi.

8

Kuattru mir shuáran Jesus ayuramiania nu

(Mateu 15.32-39)

¹ Nu tsawantáí shuar tímíá untsurj iruntrarmiayi. Yurumkarj atsakui Jesus ni unuiniamurj untsukar juna tímíayi:

² “Ju shuáran waitnentajai. Menaintiú tsawant Wijjaj pjuuinia ásarmatai ni yurumkarj amuukachaik.

³ Tura ni jeen ayurtsuk akupeamka, tsukarjin jintiá pimpikiartatui, yajaya káunkaru ásar” tímíayi.

⁴ Tutai ni unuiniamurj chichainiak “Túrasha juj atsamunam, ju aents ejemaratat tusar çtuyá yurumkak wáinkiatjaj?” tiarmiayi.

⁵ Tutai Jesus nin aniasmiayi “¿Urutmá tanta aa?”

Tutai “siati awai” tiarmiayi.

⁶ Nuiñkia ashí áentsun “nunká pujustarum” tiarmiayi. Tura tantan achik, Yúsán yu-miñsamiayi. Tura puuk, áentsun ajamsatarum tusa ni unuiniamurjñ susamiayi.

⁷ Tura uchich namaksha ishichik aan achik, Yúsán yumiñkias, ni unuiniamurjñ chicharuk “Jusha shuar ajamsatarum” tímíayi.

⁸ Turam ashí yurumáwar ejemaramiayi. Ampirma púunaruncha siati chañkinnium áimkiarmiayi.

⁹ Kuattru mir (4.000) shuar yurumáwarmiayi. Yurumáwar amikiarmatai, Jesus nin áujas akupkarmiayi.

¹⁰ Tura ni unuiniamurjijaj kanunam enkemprar Tarmanúta nunkanam wearmiayi.

Pariséu Jesusan iniakmasta tiarmiania nu

(Mateu 16.1-4; Rúkas 12.54-56)

¹¹ Pariséu Jesusjaj áujmatsatai tusar tariarmiayi. Nekapsatai tusar wakeruiniak Nin chicharuk “Nayaimpinmaya kakaram iniakmasta” tiarmiayi.

¹² Tuíniakui Jesus kúntuts enentáimias, súkaska mayati “¿Urukamtai, yamaiya aentstiram, nayaimpinmaya kakarman iniakmasat tusarum wakerarum? Nuka penké sunaschat-tarme, paant tájarne” tímíayi.

¹³ Nuyá nin ikiukiar ataksha kanunam enkemar amain katiñmiayi.

Pariséu túramurjijaj aneartarum, tímíayi Jesus

(Mateu 16.5-12)

¹⁴ Tura ni unuiniamurj yurumak jukitjai tukamá kajinmatkiarmiayi. Kanunmanka aya chikichik tantanak takaku ármiayi.

¹⁵ Jesussha ni unuiniamurjñ enentáimtikiuk tímíayi “Wáinkiatarum; Pariséusha Erutissha wakaprutain takakainia nújajsha aneartarum” tímíayi.

¹⁶ Tutai ni unuiniamurjñsha tunaiarmiayi “Tanta kajinmatkin asakrin nuna túramtsujias” tiarmiayi.

¹⁷ Tura Jesus nuna nekáa chichaak “¿Urukamtai aya yurumkak enentáimtarum? Tuke nékatsrumek. Penké enentáimtsurmek. Atumí enentáj tuke kiritkíait? tímíayi.

¹⁸ Jimi ajsha itiura wáintsurmea. Kuíshim ajsha itiura ántatsrum. Ashí kajinmatkintrumek.

¹⁹ Nekaatarum, nuik, señku tantan púuran señku mir áishmankan ayurachmakaj. ¿Tura ampirma urutmá chañkinnium chumpiamarum?” tímíayi.

Niisha tiarmiayi “Tuse chañkinnium chumpiamji.”

²⁰ Ataksha Jesus tímíayi “Tura siati tantajaj kuattru mir shuaran ayuramtai, çampirmasha urutmá chañkinnium chumpiamarum?”

Niisha “siati” tiarmiayi.

²¹ Tuma asamtai Jesus tímíayi “¿Itiura imiá nékatsrum?”

Jesus kusuruñ ímtiksamiania nu

²² Nuyá Petsaitia péprunam jeawarmatai, áishman jji kusuruñ Jesusan itiararmiayi. Túrawar antínta tusar seawarmiayi.

²³ Tuma asamtai Jesus uwejnnum achik péprunam añani enkeki jukí jjin usukjijaj kuérmiayi. Tura uwejéjaj antin “¿íimmek?” tímíayi.

²⁴ Tutai kusuruñ ími tímíayi “Aentsun iyyajai, túrasha paantcha. Numi wekainian áaniun iyyajai” tímíayi.

²⁵ Nuyá ataksha Jesus ni uwejéjaj kusuruñ jjin antinñmiayi. Tura kusurusha úmamkes iis, péñker ajas, ashí paant ímpramiayi.

²⁶ Jesus chichaak “Jeemjñ weakum péprunam wayawaip tura shuar ujakaip” tímíayi.

Pítur Jesusan “Yusa Anaikiamurinme” tímiania nu

(Mateu 16.13-20; Rúkas 9.18-21)

²⁷ Jesus ni unuiniamurijjaj uunt pepru Sesaria-jiripiunam jeatsuk, tjiuch uchich péprunam irasarmiayi. Jintiá wésar Jesus ni unuiniamurjñ chicharainiak, “¿Yáiti turutaini-awa Winia?” tímiayi.

²⁸ Tutai niisha áimkiarmiayi “Chíkich chichainiak, imiakratin Juankaiti, turamainiawai. Chíkichcha, Eríasaiti, tura chíkichkia, yaunchu Yúsnan etserin nantakniua núiti, turamaini-awai” tiarmiayi.

²⁹ Tutai Jesus tímiayi “Atumsha, ¿waritrumé. Yáitiaj?” tímiayi.

Tutai Pítur tímiayi “Ámeká Krístuitme; Yúsaiya akupkamuitme.”

³⁰ Tutai Jesus chichaak “Peñké etserkairap” tímiayi.

*Jesus ni jákatniurjñ ujakmiania nu
(Mateu 16.21-28; Rúkás 9.22-27)*

³¹ Unuiniak: “Wi Aents Ajasuitjiana ju ti wáitsatniuitjai. Israer-shuarti ii uuntrjsha, Patri úuntrjsha, ii jintinniurjsha Winia nakitrurar mantuawartatui. Túrasha menaintiu tsawant nankaasmatai nantaktinaijtai” tímiayi.

³² Nunasha paant ujakmiayi.

Tura Pítrusha Jesusan arantach júki kakantramiayi. “Tu chichasaip” tímiayi.

³³ Tutai Jesus ayantmar, ni unuiniamurjñ iis, Pítrun kakantar chicharuk “Satanása, werumta. Ámeká Yusna ana nu enentáimtatsme, antsu aya áentsnak enentáimtame” tímiayi.

³⁴ Nuna tuasua amik tura nuj matsamarmia nunasha, ni unuiniamurjñcha untsuk tímiayi, “Shuar Winia nekas nemartustasa wakerakka ni wakeramurjñkia iniaisati; tura ni krusrj yanakj nemartustá.

³⁵ Kame shuar ju nunkanam aya niñki anenmamkunka nu shuar ni iwiaakmarjñ emenkkatatu. Antsu Winia anentu asa tura winia chichamprun anea asa, shuar aya péñker pujostinniak enentáimtsuna nu, nekas iwiaakman wáinkiatwawai.

³⁶ Nekaata, shuar ashí ju nunkanam írúnna nuna sumaksha túrasha ni wakanj jinium wéakuisha, ¿jitiurak péñker pujusaint?

³⁷ Shuaraka wakanjñ uwemtikrataj tusa wakerak ¿urutmak akimkakaint?

³⁸ Antuktarum. Yamaiya aents Yúsán nakitjar ajapawaru yajauch ainia nu ímiainiamunam shuar Winia natsantrakuñkia tura winia chichampruncha natsantakuñkia, wi, Aents Ajasuitjiana ju, winia Aparu kakarmarjijjaj tura nayaimpinmaya péñker suntarjaj atak taakun, nú shuaran natsantrattajai Wisha.’ Tu tímiayi Jesus.

9

¹ Ataksha Jesus nin chicharuk, ‘Nekas tájarme, shuar játsuk Yus ni kakarmarjijjaj aentsu enentáin akupkattana nú tsawantan wáinkiatatna nu juj iijjaj pujuiniawai’ tímiayi.

*Jesus nusháa iira ajasmiania nu
(Mateu 17.1-13; Rúkás 9.28-36)*

² Nuyá sais tsawant nankaasmatai, Jesus Pítruncha, Jakupuncha, Juán_nasha uunt náinnium júkiarmiayi. Nujsha Jesus nushá iira ajasmiai.

³ Ni pushirjsha ti puju jítsumir ajattsarmiayi. Nujaj métek puju awajsatin ju nunkanam atsawai.

⁴ Túruna nuj Erías, Muisaisjaj wantinkiar Jesusjaj chichainian wáinkiarmai.

⁵ Nuyasha Pítur Jesusan chicharuk “Uuntá, ii juj pujustin ti péñkeraiti. Menaintiú áakmaktai, Áminiu chikichik, Muisaisna chikichik, Eríasnasha chikichik” tímiayi.

⁶ Jesusa unuiniamurjñ sapijmainiak, Pítur wariniak titi nekaachmiayi. Nékachu asa nuna tímiayi.

⁷ Tura yuranjñkim tara mikintiu awajsamiai. Yuran_minmaya chichaak “Júiti winia aneamu Úchir. Nii anturkatarum” tímiayi.

⁸ Nuyanjka ni unuiniamurjñ ayantmar iiyaj tukamar aya Jesusnak wáinkiarmai. Chíkichkia atsuarmiayi.

⁹ Nuyá náinniumiá akainiak Jesus nin chicharuk “Wáinkiarumna nu etserkairap. Wi, Aents Ajasuitjiana ju jakamunmaya nantaatsajñ nu etserkairap” tímiayi.

¹⁰ Tutai ni tímian ímiatrusañ újukarmiayi. Tura “jakamunmaya nantaatsajñ tana nu, ¿wariniak ta?” nuamtak tunainiarmai.

¹¹ Tura Jesusan aniasarmiayi “¿Urukamtaí Israerti ii jintinniurjsha, Erías emka tátiniaiti, tuinia?” tiarmiayi.

¹² Tutai Jesus tímiayi “Nekas Erías ashí iwiarattsa emka tátiniaiti. ¿Tura Aents Ajasunum Yus-Papinium warintuia?

“Ti wáitsattawai; Nin nakitrartatui.” Tu áarmaiti.

13 Wi tájarme, Erías nekas táwiti. Támatái, shuar ashí ni wakeriarmia nuna nin túrawarmiayi. Yusa Papiríin Eríasa túrunatniurí aarma amia tímatrusañ túrawarmiayi” tímiayi Jesus.

*Jesus iwianchin jiki akupkamina nu
(Mateu 17.14-21; Rúkas 9.37-43)*

14 Tura ni unuiniamurí matsatmanum atak wáketuk, ti untsurí aents káutkar Israer-shuara jintinniurísha níjjai tunai pujuinian wáinkiamiayi.

15 Tura aencha, Jesusan wáinkiar warainiak, tsékeñki weriar, áujsarmiayi.

16 Túrunawarmatai, Jesus chicharainiak, “Warí tunaiyarum?” tímiayi.

17 Tutai chikichik ayak “Uuntá, winia uchirun Ámin itiarjame. Iwianchruku asa chichachuíti.

18 Túmakui íwianch enkemtakun paat ajiar áepeawai; túram uchisha saun kaput apak nain kátetete awajeawai. Túram kakaakcha ame unuiniamurmin seamjai, jírútkú tusan, túrasha tujintrutkarai” tímiayi.

19 Tutai Jesus tímiayi “Yúsan enentáimtichutirnea urutná tsawantak pujustaj atumjai. Urutná katsuñtrata! Uchi itiatarum” tímiayi.

20 Takui uchin Jesusan itiararmiayi. Tura íwianch uchin enkemta Jesusan wáiniak uchin ajakramiayi. Uchisha chichiptur nunká iniaan péper-péper ajakin wenunam saun apakmiayi.

21 Túrunamtai Jesus ni aparín aniasmiayi “¿Urutá yaunchu áinkiait?”

Tutai ni aparí tímiayi “Úchichik áinkiaiti.

22 Tuma asa tuke jutikiú pujurniuiti; jiniumsha apeawai, entsá maataj tusa ajuawawai. Yaintrukminiaitkiúmka waitneasam yaintrukta” tímiayi.

23 Tutai Jesus chicharuk “¿Urukamtai, yaintrukminiaitkiúmka, tame? Nekaata, shuar Winia nekas enentáimturna nu ashí túramniaiti” tímiayi.

24 Tutai uchi aparí kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

25 Tura shuar untsurí káunainian Jesus wáiniak kakantuk “Empeku chichachu awajin iwianchi jíinkitia, tájame. Jíinkim ataksha wayawaipia” tímiayi.

26 Tura íwianch jíiniuk untsamak uchin we-werkasa ajakar chichichiptu áepkimiayi. Túram uchi jaka ímanis tepemiayi. Túrunamtai untsurí shuar “jakayi” tiarmiayi.

27 Támanak Jesus uwejen achik awajkimiayi, tura uchi nantaki wajakmiayi.

28 Tura Jesus jeá wayamtai, níñki pujusar, ni unuiniamurí aniasar “¿Urukamtai iisha jíiktin tujinkiamaj?” tiarmiayi.

29 Tutai Jesus tímiayi “Ju iwianchkia ijiamar Yus áujkur jíikminiaiti” tímiayi.

*Jesus ataksha ni jákatniurín ujakmiania nu
(Mateu 17.22-23; Rúkas 9.43-45)*

30 Nuyá jíinkiar Kariréa nunkanmaani nankaamakarmiayi. Ni unuiniamurín unuinia asa nu nankaamamun nekaawarain tusa Jesus nakitmiayi.

31 Unuiniak juna tímiayi: “Wi Aents Ajasuitiaj juna mantamnati tusar achirkar surutkar-tatui. Tura máamuítatnak, iwiarsamunmayan menaintiú tsawantaj nantaktiatjai” tímiayi.

32 Tura nu chichaman nekaacharmiayi. Nékainiachiat, anintrustinian arantukarmiayi.

*“¿Yaki imiá nankaamantuit?”
(Mateu 18.1-5; Rúkas 9.46-48)*

33 Nuyá Kapernáum péprunam jeawarmiayi. Tura Jesus jeá pujus ni unuiniamurín aniniak, “¿Atumsha jintiá winisrum warí áujmatmiarum?” tímiayi.

34 Tura natsarar pachischarmiaayi. Kame jintiá wésar “íjjai zyaki imiá nankaamantu ajasat?” tunainiarmiayi.

35 Ni unuiniamurí pachischarmatai, Jesus pujus ashí tuse unuiniamurín irur chichaak “Shuar nekas nankaamantu ajastajtsa wakerakka, peejchachia nuke enentáimtumar shuara yáintri atí” tímiayi.

36 Tura uchin itiaa miniakas chichaak:

37 “Shuar uchin winia naaruj shiir awajeakka Winia shiir awajtai. Tura Winia akuptukua nunasha shiir awajeawai” tímiayi.

*“Shuar in nakitramachkuñka in páchitkiawai”
(Rúkas 9.49-50; Mateu 10.42)*

38 Nuyá juan Jesusan chicharuk “Uuntá, shuar ame náarmin pachis iwianchin akupea wainkiamji. Tura íjjai írútkachu asamtai nu túratin suritkiamji” tímiayi.

39 Tutai Jesus tímiayi “Antsu suritkiarap. Shuar winia náarun pachis tujinkiamun túrakka, nu shuar warí tsanumprutratniun tujinkiatawai.

40 Shuar in nakitramachkuñka, in páchitkiawai, tímiayi.

⁴¹ Winia nemarka asakrumin shuar yumiichinkesha ajampramkuka ántar túratsui; akikma átatui' tímiayi.

(Mateu 18.6-9; Rúkas 17.1-2)

⁴² Tura shuar ju uchin Winia umirtuinia nuna yajauchin túrumtikiamtáinkia, ti asutniattawai. Tuma asamtai uchin yajauchin túrumtiktsaín kuntujeñ kayajai jínkiar nayaantsanam ajunmaka maak ainti.

⁴³ Ame uwejmek yajauchin túrumtikramamniaitkuínkia tsupikta. Mai uwejtuk wáitsatniunam jeatniujainkia chikichik uwejjai ju nunkanam pujasar tuke iwiaaku pujustinnium jeatin ti shiiraiti. Warí, wáitsatniunmanka ji kajinkiashtin awai,

⁴⁴ jákaru akarisha jáiniatsui tura jisha tuke kapaawai.

⁴⁵ Nawemsha yajauchin túrumtikramamniaitkuínkia nusha tsupikta. Mai nawentuk wáitsatniunam jeatniujainkia chikichik nawejai ju nunkanam pujasar tuke iwiaaku pujustinnium jeatin ti shiiraiti. Wáitsatniunmanka ji kajinkiashtin awai,

⁴⁶ jákaru akarisha jáiniatsui tura jisha tuke kapaawai.

⁴⁷ Jímisha yajauchin túrumtikramamniaitkuínkia ukuinkiata. Mai jiiintiuk wáitsatniunam jeatniujainkia chikichik jijijai ju nunkanam pujasar Yus akupeana nuí jeatin ti shiiraiti;

⁴⁸ wáitsatniunmanka jákaru akarisha jáiniatsui tura jisha tuke kapaawai.

⁴⁹ Naman Yus susamu weaktinia áintsan aentstirmesha jijijai nekapanastatume.

⁵⁰ Weesha ti penkeraitiat michumarka, ¿itiurak jea-jeat átik'? Wats, wee jeakua áintsarmek atumek shiir enentáimtunaistarum" tímiayi Jesus.

10

Nuwa ajapatniun Jesus áujmatsamiania nu

(Mateu 19.1-12; Rúkas 16.18)

¹ Jesus Kapernáumnumiá jiiinki, Jutía nunkanam nankaamaki, Jurtañ entsa amain jeamiayi. Nuí pujai, aents ataksha Nin irunturarmiayi. Iruntrarmatai tuke túrin asa ataksha unuiniamiayi.

² Tura Pariséu Jesusan nekapsatai tusar wakeruiniak, Nin chicharainiak “¿Áishman ni nuarí ajapatin tsankamkamukait?” tiarmiayi.

³ Tutai Jesus tímiayi “¿Muisais wariniak timia?”

⁴ Tutai “Papijiai in ajapatniun tsankatramkamiaji” tiarmiayi.

⁵ Tutai Jesus tímiayi “Atumí enentái kátsuram asamtai nu chichaman atumin tsankatramkamiarme.

⁶ Tura Yus yámankamtaik ashí najanamia nuí, áishmannasha nuwancha najanamiayi.

⁷ Tuma asamtai áishman ni aparíncha nukuríncha kanakí ikiuki, ni nuarijai tsanintiniaiti.

⁸ Warí, áishman nuarijiai jímiaraitiat chikichik ajasartatui. Tuma asamtai yamá jímiarchaiti, antsu chikichik ajasuiti.

⁹ Tuma asa, Yus atsanikiania nuna, aents akankashtiniaiti” tímiayi.

¹⁰ Tura urum jeá wayawar, Jesusa unuiniamurí nu chichaman ataksha aniasarmiai.

¹¹ Tuiniakui Jesus tímiayi “Shuar ni nuarín ajapa ikiuak chikichan nuátkanka, emka nuarín yajauch awajas, ikiuak, tsanirmayi.

¹² Nuwasha ni áishri ajapa ikiuak, chikichjai niiniurtukka, niisha tsanirmayi” tímiayi.

Jesus uchin shiir awajsamiania nu

(Mateu 19.13-15; Rúkas 18.15-17)

¹³ Antínkiarat tusar uchin Jesusan ititariarmiayi. Túruiniakui Jesusa unuiniamurí “iti-airap” tiarmiayi.

¹⁴ Tura Jesus nuna wáiniak, kajek juna tímiayi “Uchi Winí winitin tsankatruktarum. Suritkiairap. Iis, shuar ju uchía núnisan peejchach enentáimtumainia nu Yusa akupeamurín pachiiinkiamniaiti.

¹⁵ Nuní asamtai tájarme, uchi umiana núnisan Yusa akupkamurín shuar umíachkuñka nuna pachiiinkiachminiaiti.

¹⁶ Nuyá uchin miniakas, “Yus yáinmakarti” tímiayi.

Kuútrintin Jesusan áujsamiania nu

(Mateu 19.16-30; Rúkas 18.18-30)

¹⁷ Ukunam, Jesus nuyá weai, shuar tseke Nin tarimiayi. Tari tikishmatar chicharuk “¿Uuntá, Amesha ti penkeraitme. Tuma asam, turuttia, ¿warinia túrakna tuke iwiaaku átataj?” tímiayi.

¹⁸ Tutai Jesus tímiayi, “¿Urukamtai Winia, penkeraitme, túrutam? Shuarka chikichkisha penkerka atsawai. Aya Yúsak penkeraiti.

¹⁹ Yus akupkamu nékatsmek. Ju áiniawai: tsanirmawairap, maṅkartuawairap, kasamkairap, chíkich shuar tsanumprurairap, anaṅkartuawairap, apasha nukusha umirkatarum. Nu áiniawai" tímiayi.

²⁰ Tutai kuítrintin chichaak "Uunta, núnaka úchichik mash umiki tsakaruitjai" tímiayi.

²¹ Tutai Jesus iis waitnenmai tímiayi "Chikichik táasume. Weme ashí áiniyu ana nu surukta. Túram nu kuit kuítrinha susarta. Túrakum nayaimpiniam kuítrum ikiaunṅattme. Túram winitia, krus yanaktinia áintsamek itiuṅchatrum aṅṅ nemartusta" tímiayi.

²² Tura kuítrintin nu chichaman antuk, wake mesek, kúntuts enentáimiar wémiayi, ti kuítrintin asa.

²³ Nii wématai, Jesus ashí ni téntakmarin iis, ni unuiniamurin chicharuk, "Kuítrintin ainia nu Yusa akupeamurin pachiinkiatin ti itiuṅchaiti" tímiayi.

²⁴ Takui ni unuiniamurij nuna antukar niisháa enentáimprarmiyai. Túramtai Jesus tímiayi "Uchiru antuktarum. Shuar kuítriniak enentáimtuinia nuka, Yusa akupeamurin pachiinkiatin penṅé itiuṅchataiti."

²⁵ Uunt kamiriu auja jin wayatin ana nú naṅkaamas, kuítrintin Yusa akupeamurin pachiinkiatin itiuṅchataiti" tímiayi.

²⁶ Nuna antukar nú arant niisháa enentáimprarmiyai. "¿Nuiṅkia yaki uwempramniait?" tunaiyarmiyai.

²⁷ Tura Jesus nin iisar chichainiak "Aents ninṅi túrachminiaiti, antsu Yus túramniaiti. Yuska ashí túramniaiti" tímiayi.

²⁸ Nuyá Pítiur Nin chicharuk "Iis, iikia ashí ikiukir némartujuk" tímiayi.

²⁹ Tutai Jesussha tímiayi, "Nekas tájarme, shuar Winia nemartak Yus-Chichamnasha ipi-ampartasa wakerak ni jéncha, yachincha, umajincha, aparincha, nukurincha, nuarjincha, uchirincha, nunṅencha uyumatsuk ikiuakka,

³⁰ nu shuar ju nunṅanam siaṅ patatnas jéncha, yachincha, umajincha, nukurincha, uchirincha, nunṅencha, ju nunṅanam wáitiatat sunastatui. Tura ukunam, nunṅa amuukamtai, nu shuarsha jáchatainiam tuke péṅker pujustatui.

³¹ Tura untsurij shuar yamá penṅerj ainia nu, ukunam ukunmaanij pujusartatui, tura íksaṅ untsurij shuar yamá ukunmayá ainia nu, ukunam eem pujusartatui" tímiayi Jesus.

Jesus ni jákatniurij ataksha ujakmiania nu

(Mateu 20.17-19; Rúkas 18.31-34)

³² Nuyá arak Jerusarénum wéenak, jintiak wearmiayi. Jesuska émak wémiayi. Ni unuiniamurijsha niisháa enentáimprarmiyai. Ashamainiyatan Jesusan nemarsarmiyai. Túmainiaj atak ni nekas unuiniamurin akankiar, ni túrunatniurin ujakmiayi.

³³ Ujaak tímiayi "Antuktarum, arak Jerusarénum wéaji. Nuṅ Winia, Aents Ajasuitjana juna, Patrj uuntriincha, jintinniummasha surutkartatui. Niisha apachnium mantamnati tusar surutkartatui.

³⁴ Nusha Winia wishikrurar, katumprukar, usukruawar mantuawartatui. Túramaitiatnak menaintiú tsawantaj nantaktiatjai" tímiayi.

Jakupu Juanjai seawarmiania nu

(Mateu 20.20-28)

³⁵ Sepetéu uchirj Jakupusha Juansha Jesusan taruntarmiyai. Taruntar "Uuntá, ii seattaj-nia nu túrak tusar wakeraji" tiarmiyai.

³⁶ Tutai Jesus tímiayi "¿Warj itiuṅtukat tusam wakerutam?"

³⁷ Tutai "Ame nupetmaktin tsawantrum jeamtai, iisha Ámijaij pujustaitsar wakeraji, wi untsuuruminij, winia yatsursha menaarminij. Nu tsanṅkatrukta" tiarmiyai.

³⁸ Tura Jesus tímiayi "Átum seatrumna nu nékatsrume. Wi umartatjana nu umarminkaitrum. Tura Wi imiantiatjana núnisrum imianminkaitrum" tímiayi.

³⁹ Niisha tiarmiyai, "Túramniaitji, páchitskea."

Tuṅniakuí Jesus tímiayi "Wats, Wi umartatjana nu umartatrume, tura Wi imiantiatjana núnisrumek imiantiatrume.

⁴⁰ Túrasha winia untsuuruinij, menaruinjsha átum pujustinian Wikia súsashtinaijtarme, antsu Yus wakerana nu nuṅ apujsattawai" tímiayi.

⁴¹ Tura chíkich tias unuiniamurij nuna anturkar Jakupuncha, Juáṅnasha ti kakerkarmiyai.

⁴² Tura Jesus ni unuiniamurin irur tímiayi "Ju nékarme; Yus-shuarchanum akupniuitjai tuinia nu, waantu enentáimtummas, ni shuarin ti akupeawai; tura uunt ainia nusha ashí shuar ti takamtikiainiawai.

⁴³ Antsu atumjai núnisaṅ atsutniuiti. Átumka, wi unuiniamutiram, uunt ajastaj tusarum wakerakrumka, ashí yáimin ajastinaiatrume.

⁴⁴ Shuar atumj penṅerj ajastajtsa wakerakka, takarniua nuke ajas, umirtamkatí.

⁴⁵ Wisha, Aents Ajasuitjiana ju, shuar takartusarat tusan táchamjai, antsu ashí shuáran yáintaj tusan táwitjai. Wisha jarukan shuáran uwentikratajtsan táwitjai" tímiayi.

*Jesus Partimiásan tsuármiania nu
(Mateu 20.29-34; Rúkas 18.35-43)*

⁴⁶ Jesus ni unuiniamurijjai, tura chíkich untsurj aentsjai Jirikiú péprunam jeawarmiayi. Nuyá Jirikiúnmayasha jinkiar weenai, Timiasa uchirj Partimiás, kusuru amia nu, jintiá yantam kuítan seamu pujumiayi.

⁴⁷ Niisha, Nasarénumia Jesusaiti táman antuk, untsumuk "Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnentrurta" tímiayi.

⁴⁸ Tura untsurj nuj matsamarmia nu nin chicharainiak "Takamatsata" tiarmiayi.

Niisha nú nankaamas untsummiayi "Tawit weeá Jesusa, winia waitnentrurta."

⁴⁹ Nuna antuk Jesus wajasat, chichaak "Untsuktarum" tímiayi.

Takui shuar kusurun untsuiniak "Kakaram ajasta. Wajaktia; untsurmawai" tiarmiayi.

⁵⁰ Tuiniakui niisha esekmatairjn ajapa ikiuak wajakí Jesusan tseke tarimiayi.

⁵¹ Tura Jesus nin chicharuk "¿Winia itiurtukat tusamea wakerutam?" tímiayi.

Tutai kusuru chicharuk "Uunta, ímtiasan wakerajai" tímiayi.

⁵² Tutai Jesus chichaak "Shiir wetá. Winia nekas enentáimtursa asam péñker ajasume" tímiayi. Tura nu chichamaik ímpramiayi. Tura Jesusan nemarki wémiayi.

11

*Jesus Jerusarénum wayamiania nu
(Mateu 21.1-11; Rúkas 19.28-40; Juan 12.12-19)*

¹ Wésar Jerusarénum tura Petpajái péprusha Petania péprusha Uriwiu naint íñkiuasmak ámanur jeawar, Jesus jimiará unuiniamurjn ujuikimiayi.

² Ujuiak tímiayi "Aatuninj pépruchiniam werum nujn umpuuru uchich jñnkiamu wáinkiatarme. Nu umpuuruka teke entsamprukchamuiti. Nu atiarum utitiarum.

³ Tura "¿Urukamtia áitkiarum?" turamainiakuisha, "ii Uuntrj wakerawai" titiarum" tímiayi.

⁴ Tutai wearmiayi. Tura umpuurun wáitiniam aani jñnkiamun, jintiá yantamnum wajan wáinkiar atiwarmiayi.

⁵ Nuj pujuarmia nu "¿Warí áitkiarum. Urukamtai umpuuru atiarum?" tiarmiayi.

⁶ Takui, niisha Jesus timia nu ujakam suritkiacharmiayi.

⁷ Tura umpuurun Jesusan itiarar pushirjn umpuurunam awantkarmiayi. Túram Jesus entsamkamiayi.

⁸ Tura untsurj shuarsha pushirjn jintianam ayapar áinkiarimiayi. Chíkichcha jintiá yantamnumian nukan juuk jintianam áintrarmiayi.

⁹ Eem wearmia nusha, uku winiarmia nusha warainiak "Jusanna" untsumkarmiayi. "Yusa naarjn winiana nu imiá péñkeraiti.

¹⁰ Ii uuntrj Tawitia akupeamurj tátatna nu imiá péñker atí. Ii Yusrj naarj shiir ati." Tu untsumki wearmiayi.

¹¹ Tura Jesus Jerusarénum jeamiayi. Jeá, Yusa Uunt Jeen wayamiayi. Tura ashí iiyasua amik, kintiamprajj tusa ni tuse unuiniamurjjjai tjiuch Petania péprunam wearmiayi.

*Jesus iikiu numin yumin'kramiania nu
(Mateu 21.18-19)*

¹² Kashin tsawar, Petanianmaya jintia wesa, Jesus tsukammiayi.

¹³ Tura arant wajan iikiu numirjn núkenniun wáiniak, nereatsuasht tusa iyumiayi. Tura nereshtairjn asamtai neren penké wáinkichmiayi.

¹⁴ Nuyá iikiu numin yumin'keak: "Ame nerem penké yunaashti" tímiayi. Ni unuiniamurjsha nuna táman antukarmiayi.

*Yusa Uunt Jeen suruktinian Jesus suritkiamiania nu
(Mateu 21.12-17; Rúkas 19.45-48; Juan 2.13-22)*

¹⁵ Nuyá atak Jerusarénum jeawarmiayi. Nu Jesus Yusa Uunt Jeen wayá suruktai tusar pujuarmia nuna jñki akupkatasa nankammiayi. Kuítian yapajjn armia nuna misarjn tura yampitsan súrin armia nuna kutan'krjncha ayanturmiayi.

¹⁶ Tura káarak entsaki Yusa Uunt Jeen nankaamaktinian suritkiarmiayi.

¹⁷ Nuyá "Yus áusatai tusar ashí shuar Yusa jeen wayamnia áatui" tú aarchamukait Yusa Papirijn. Antsu átumka Yusa jee kasa matsamtaiya nútikiarme" tímiayi.

¹⁸ Aents nuj matsamarmia nu Jesusa chichamen antukar ti enentáimprarmiayi. Tuma asamtai Israer-patri uuntrjsha, Israer-shuara jintinniurjsha, nuna nekaawar, Jesusan ashamainiak mantamnatí tusar chichaman jurusarmiayi.

¹⁹ Nuyá kñkui Jesus Jerusarénumia jñnkimiayi.

*Iikiu numin káarun wáinkiarmania nu
(Mateu 21.20-22)*

²⁰ Kashin káshik nankaamainiak iikiu numin kan̄kaptuk jaka wajan wáinkiarmai.

²¹ Tura Pítiur enentáimias Jesusan tímiayi “Uunta, iista, iikiu Ame yuminkramam nu kan̄kaptuk káarchaik.”

²² Tutai Jesus tímiayi “Yus nekas enentáimtustarum.

²³ Iis, nekas tátsujrumek, shuar “Yus nekas túratpiash” tútsuk, tura “wi tájana nuna Yus nekas túrattawai” tu enentáimsar, ju náintian “jiinki nayaantsanam iniánti” tákuinkia, páchitsuk iniañtatui, tímiayi.

²⁴ Tuma asantai tájarme, ashí Yus áujkuram searmena nuna suramsattarme. “Wi seajna nuna yamá takakjai” tu enentáimkiurmeka, wáinkiáttarme.

²⁵ Tura Yus áujkuram pujarmena nu, kajernaiyamuram ákuinkia tsan̄kurnáiratarum. Atumí Aparí nayaimpiniam pujana nu atumí tunaarín tsan̄kurturti tusarum túratarum.

²⁶ Atumsha tsan̄kurnáiyachkurminkia, núnisan atumí Aparí nayaimpiniam pujana nu atumí tunaarín tsan̄kurtámprashtatrumé” tímiayi Jesus.

*Yusa kakarmaríjají Jesus takasmania nu
(Mateu 21.23-27; Rúkas 20.1-8)*

²⁷ Ataksha Jerusarénnun waketkiarmiayi. Jesus Yusa Uunt Jeen wekaj, Israer-patrí úuntrišha, Israer-shuara jintinniurísha, Israer-shuara iruntai-jeé úuntrišha Nin káutkarmiayi.

²⁸ Káutkar Jesusan tiarmiayi “¿Yana kakarmaríjají ju túram. Ame túramna nuna ya tsan̄katrama?” tiarmiayi.

²⁹ Tuiniakui Jesus tímiayi, “Chíkichiniak aniastatjarme. Áirkatarum. Túrakrumninkia Wisha winia takastinian tsan̄katrukma nuna ujaktatjarme.

³⁰ Wats, turutiarum, ¿ya Juan imiaitniun tsan̄katkama? ¿Shuar tsan̄katkamka? ¿Yus tsan̄katkamka? Áirkatarum” tímiayi.

³¹ Tura niisha enentáimprar “Yus akupkaiti” tákurninkia, “¿urukamta umirkachuram?” turamchattajik.

³² Antsu “shuar tsan̄katkaiti” tákurkia, ashí shuar ashamaji” tunainiarmiayi. Ashí aents Juan nekas Yúsnan etserniuiti, tu enentáimainiakui ashamiarmai.

³³ Nuyá Jesusan tiarmiayi “Iikia nékatsji.”

Tutai Jesus tímiayi “Wisha núnisnak yana kakarmaríjají takaaj nuna ujakchattajrumé.”

12

*Yajauch takau armia nu
(Mateu 21.33-46; Rúkas 20.9-19)*

¹ Jesus ju métek-taku chichaman unuiniamiayi: “Shuar uwa ajan ajam wenuimiai. Nuyá uwa nekeetain najanamai. Tura kumpin jeen najanamai. Najana takartusti tusa shuáran ikiuak ninkia jeachat wémai.

² Neretai tsawant jeamtaí, ni takarniurín júukman akankat tusa akupkamai.

³ Tura ajanam takau arma nu, nu takarniun achik, katsumkar, áyatik awainkiarmai.

⁴ Ataksha chíkich takarniun akupkamai, tura nunasha kayajají tukurar, múuknum katsumkar, katsekar awainkiarmai.

⁵ Tuma aín ataksha chíkichan akupkamai, tura nunasha máawarmai. Ti untsurín akupramai. Chíkichnasha katsumkarmai, chíkichan máawarmai.

⁶ Tura níjjají chíkichik tuke ámiayi, nuka ni aneamu uchirí. Nu uchincha ukunam akupkamai. Akupeak “Winia uchirnaká shiir awajstataui” tímiayi.

⁷ Tura ni uchirí winian wáinkiar, takau shuar nuámtak chichainiak “Júka ajá nérenniu uchirínti. Wátsek, maatai; túramka ájaka iiniu átatui” tiarmai.

⁸ Túsar achikiar máawarmai. Ayáshincha ajanmayá ajapawarmai” tímiayi.

⁹ Tura nuyá aniasmiayi, “¿Wats, warí enentáimsarum; ajá nérenniurí ititurkattawa? Jeash-tanmayá taa, ajá takainia nú shuaran amuktatui. Ni ajaríncha chíkichan ikiastatui.

¹⁰ Ju, Yus-Papinium aarma ana nu áujchukaitrum:

Kaya péñkernak, jeammin “yajauchiiti” tusar ajapawarmia nu ashí kayajají nankaamas péñker apujsamuiti.

¹¹ Nusha Yus túramuiti. Iisha ísar ti enentáimtaji.

Nuke áarmaiti” tímiayi.

¹² Tura nú metek-taku chichamjají nin áujmatma asa achiktai tusar chichaman jurusarmi-ayi. Túmainiyat shuáran ashamainiak Jesusan ikiuiniak wearmai.

Uunt akupin súsatín tura Yús súsatín

(Mateu 22.15-22; Rúkas 20.20-26)

¹³ Tura wear, imiaamtikiar yajá chichakmatai nújaj yajauch títai tusar Pariséu shuar-nasha, Eruṭisa nemaṛin shuarnasha akatar Jesusan akuptukarmiayi.

¹⁴ Túram Nin jeariar chicharainiak: “Uuntá, aents nakitiainiañ tuke nekas chicham páchitsuk chichaame, nu nékaji. Aents páatek iyyatsme, antsu nekas Yusa jintj unuiname. ¿Waritisa enentáimiam, ii kuitri uunt Sesar súsatín péñkerkait. Susattajik. Suritkiattajik? Nu nekaatai tusar wakeraji” tiarmiayi.

¹⁵ Tura Jesus ni yajauch enentáimmarin nekara “¿Urukantai Winia yajauch titi tusarum wakerutarum? Kuit itiatarum, Wi ístaj” tímiayi.

¹⁶ Tutai kuitian itiararmiayi.

Jesus nuna iis tímiayi, “¿Juisha yana yapí tura yana naari áarmait?” tímiayi.

Tutai “Uunt Sésarna” tiarmiayi.

¹⁷ Nuyá Jesus tímiayi “Uunt Sésarna ana nu susatarum; túrarum Yúsna Yús susatarum” tímiayi. Tura ni áimkiamurin antukar ti enentáimprarmiayi.

Aents nantaktinian Satuséu anintrusarmiania nu

(Mateu 22.23-33; Rúkas 20.27-40)

¹⁸ Nuisha Satuséu aents, jakamunmayá nantaktin peñké atsawai tiniu armia nu, Jesusan tariarmiayi. Taar Jesusan chicharainiak:

¹⁹ “Uuntá, Muisais júna áatrampramaji:

“Áishman ni nuari júreatsañ jakamtainkia, yachin yajutmatratsa, ni yachi nu wajen nuátkatniuiti.”

²⁰ Wats, siati yachi ármiai. Iwiairj nuwan nuatak yajutmatsuk jakamiayi.

²¹ Ni yachi wajen akinkiamiayi. Nusha núnisan yajutmatsuk jakamiayi. Nuna yachjsha núnisan tura nuna yachjsha núnisan túramiai.

²² Tura ashí siati patañman, patañman nu nuwan nuátkarmiayi. Yajutmatsuk, yajutmatsuk jiniawarmiayi. Tura ukunam nuwasha jakamiayi.

²³ Nuñkia nantaktin sawantaj, nantakiarmatai, ¿yana nuarjñ ati? Ashí siati nuátkacharmaka” tiarmiayi.

²⁴ Tutai Jesus tímiayi “Jakamunmayá nantaktin atsawai” tátsurmek. Yusa chichame tura Yusa kakarmarj nékachu asarum awajiarne, tímiayi.

²⁵ Iimiatarum, aents jakamunmayá nantakiarmatai, nuatnaikiatin atsuttawai, antsu nayaimpinmayá suntara núnisan pujusartatui.

²⁶ Tura jakamunmayá nantaktiniapitia tusarum nu nekaatin nekas wakerakrumka Muisais aarmia nu enentáimtustarum. Yuska numichinmayá Muisaisan chicharuk “Wikia Apraáma Isaaka tura Jakupu Yúsrñtjai” Yús tímiayi.

²⁷ Yaunchu jákaru ain, Yús nuna taku, ayashnium jakayat iwiaaku pujuinia nuna Yusrñtjai, tawai. Nekas jaka ainia nuna Yusrñchuiti. Nantaktin atsawai tau asarum awajirurme” tímiayi Jesus.

Yús akupkamu imiá péñker ainia nu

(Mateu 22.34-40)

²⁸ Jesussha Satuséusha áujmatnainian Israer-shuara jintinniurj taa anturkamiayi. Anturak, Jesus ti peñker áimkiui, niisha Jesusan júna aniasmiayi: “¿Yús akupkamu tuá imiá péñkerait?” tímiayi.

²⁹ Tutai Jesus tímiayi “Júiti Yús akupkamu imiá péñker: Antukta Israer shuará. Ii Yusrj úuntaiti, tura Niñki nekas Yúsaiti.

³⁰ Tuma asamtai, tuke enentáimjai ti enentáimsam Uunt Yús aneeta. Túram ame iwiaakmarmesha, kakarmarmesha Yús iiktusta. Núiti nekas péñker akupkamu, tímiayi.

³¹ Nuyasha chikichcha awai, “ame ayashim aneamna tímatrusmek ame írutramurmesha aneeta.” Chikich nu nankaamas péñker akupkamu atsawai” tímiayi.

³² Tutai jintintin tímiayi “Ee, péñkeraiti, Uunta. Nékasmek tame. Chikichk Yús awai, chikichkia atsawai.

³³ Tura tuke enentáijjai ti enentáimsar, ii kakarmarjsha Yús iiktusar Nin aneakrikia, ii ayashj aneajnia núnik ii írutramurjsha aneatniuiti. Nusha ashí Yús sutai ana nujaj nankaamas péñkeraiti” tímiayi.

³⁴ Nuna tiniu asamtai Jesus ni péñker áimkian nekáa “Ameja Yús akupeamunam pachinkiatin ishichik táasume” tímiayi. Tura nuyá chikich shuar Jesusan aniastinian arantukarmiayi.

Kristu tutai ¿yana uchirimpait?

(Mateu 22.41-46; Rúkas 20.41-44)

³⁵ Jesus Yusa Uunt Jeen unuiniak pujumiayi. Tura chichaak “¿Urukamtai ii jintinniuri “Yus anaikiamu Kristun Tawitia shuari” tuinia?”

³⁶ Tawit, antsu, Yusa Wakaní aarta tutai, Yus-Papinium juna áarmiayi: Uunt winia Úuntrun tímiayi “Ame nemasrumin nupetkatin amuatsain winia untsuuruinini pujusta”.

³⁷ Kame Tawitkia, Kristun áujmatuk, “winia Uuntru” taisha, ¿itiura ní shuarisha átink’?” tímiayi Jesus. Tuma asamtai untsuri shuar nuj matsamarmia nu ti shiir antukarmiayi.

“Israer-shuuran jintintin ainia núaj aneartarum” Jesus tímiania nu (Mateu 23.1-36; Rúkas 11.37-54; 20.45-47)

³⁸ Jesus unuiniak tímiayi, “Israer-shuara jintinniuri ainia nuaj aneartarum. Ni-isha waantu enentáimtumasar, esaram pushin entsasar wekasatajtsar wakeruiniawai. Péprumasha shuar shiir áujtsarat tusa wakeruiniawai.

³⁹ Israer-shuar iruntainiam penkeri pujutainium pujustinian wakeruiniawai. Nampernumsha penkeri pujutainium pujustinniasha wakeruiniawai.

⁴⁰ Tura waje jeencha atantainiawai. Túrawar aents nekaracharat tusar ti esaram chichamaj Yúsán áujainiawai. Nincha chikichaj nankaamas Yus asutiawartatui” tímiayi.

Waje kuítrin susamiania nu (Rúkas 21.1-4)

⁴¹ Jesus Yusa Uunt Jeen kuit enketainiam naka pujus áents kuítrin chumpian wáinkiamiayi. Uuntsuri kúitrintin núkap enkeawarmiayi.

⁴² Nuyá waje kuítrincha taa jimiará uchich kuítian, reara áantsan, enkeamiayi.

⁴³ Jesuska unuiniamurin untsuk “Nekas tájarme, ju waje kuítrinchaitai, ashí enkeena nú nankaamas núkap enkeayi.

⁴⁴ Iis, kuítrinniusha ní ampirma nuna enkeenawai, tura antsu ju nuwa kuítrinchaitai, ampirmatsuk ní yurumatniurin takurmakman ashí enkeayi” tímiayi.

13

Yusa Uunt Jeen yumpuntratniun Jesus ujakmiania nu (Mateu 24.1-2; Rúkas 21.5-6)

¹ Yusa Uunt Jeenia Jesus jiinkimtai, unuiniamuri Nin tímiayi “Iisia, Uunta, kayasha ti shiir áiniawai. Jeasha imiá úuntchakait.”

² Tutai Jesus tímiayi “Ju imiá uunt jea wáinmek. Kaya ekentramu au ashí mash yumpuntratatui” tímiayi.

Amuukatin tsawantin uruku átatna nu (Mateu 24.3-28; Rúkas 21.7-24; 17.22-24)

³ Nuyá Uriwiu náinnium wakar, Yusa Uunt Jeen naka pujusar, Pítrusha, Jakupusha, Juansha, Antressha, níngkimias Jesusan aniiniak

⁴ “Uuntá, tímiam nu, ¿urutíá túrunatta. Nu túrunatin jeakuisha itiura nekaattajia? Paant ujatmakta” tiarmiayi.

⁵ Tutai Jesus tímiayi “Aneartarum, anankramawairap.

⁶ Nekaatarum, untsuri winia naarun pachisar winiartatui. Chíkich chíkich “Wiitjai Kristu” taku, untsurin anankawartatui.

⁷ Tura meset chicham ántakrumka, yajaya meset chicham ántakrumsha sapijmiakairap. Nekas túrunashtinkiait. Nuajisha amuukatin tsawantka tuke jeatsui, tímiayi.

⁸ Shuar chíkich shuaraj mesetan najanawartatui; apachcha chíkich apachaj núnisaran mesetan najanawartatui. Uuntsuri nunkanam úurkattawai. Tsukasha ártatui, charaatum ajamusha núnisarn átatui. Tura nuaj itirchatka aya yama nankamuí.”

⁹ “Túmaitkui atumsha aneartarum. Akupin iruntainiumsha surutmakartatume, tura íi shuar iruntainmasha katsumpramkartatume. Wíi shuar asakrumin, kapitíánnium, akupniunmasha juramkittiarme. Nuj jearum, Winia chichastatume.

¹⁰ Nu túruntsain ashí áentsnum Yus-Chicham etsernaktiniati.

¹¹ Atumin surutmaktasar juramainiakuisha, warintiajak tusarum ti enentáimsairap. Chichastin jeamtai, Yusa Wakaní jintintramattarmena nu titiarum. Iis, atumí enentáijiaitichattarme, antsu Yusa Wakaní jintintiam titiatume.

¹² Nu tsawantin shuarsha ní yachin mantamnati tusa suruktatui. Apasha ní uchirin suruktatui. Uchisha aparincha nukurincha kajerak, jakati tusa suruktatui. Núnisarn untsuri shuar túrawartatui.

¹³ Nunkia Wíi shuar asakrumin ashí nakitramprartatui. Tura shuar yawetsuk katsuntranka uwemprattawai” tímiayi.

¹⁴ Nuyá Jesus tímiayi “Shuar juna áujeana nu nekaati. Yúsnan etserin, ni naari Taniar, ti yajauch tuke emesin ana nuna yaunchu aar etserkamiayi. Nuka pujushtainiam pujan wáinkiuermesha, ashí Jutía nunkanam pujarmena nu, náinnium pisartarum.

¹⁵ Jeá yaakiinj pujana nu akaiki wariri achiktajtsa, jeen wayashiti.

¹⁶ Ajanam pujana nusha ni pushirijn jukitiajtsa waketkishti.

¹⁷ Tura ajamtin áiniana nusha, kuírchin umuntsainia nusha, nu tsawantin timiá itiuur-
chatan wáinkiertatui.

¹⁸ Tuma asamtai átum pisaarmena nuj yumitin ahati tusarum Yus seatarum.

¹⁹ Nu tsawantinkia ti wáitsatin átatui. Yama nankamtaik Yus nunkan najanama nujsa, yamaisha ukunmasha timiu wáitsatin penké atsuttawai.

²⁰ Tura Uunt Yus wáitsatin tsawantan ishichik awajsattajai tíchaitkuinkia, uwempratin penké atsuinti. Tura ni shuarin anaikiamia nuna yáintajtsa wakerak, nu tsawantan ishichik awajsattawai.

²¹ Nu tsawantai “júiti Kristu” túramkuinkia anturkairap.

²² Kame “Kístuitjai” ántar tuinia nu, tura “Yúsnan etsernuitjai” ántar tuinia nusha wantinkiertatui. Wantinkiar Yus anaikiamu shuárnasha anankatai tusar wakeruiniak, ni kakarmarijn iniakmainiak aentsti tujintiamun túrartatui.

²³ Tura átum aneartarum. Aetak, túruntsajin ujakchajrumek’ tímiayi Jesus.

Aents Ajasu tutai tátintri

(Mateu 24.29-35, 42-44; Rúkas 21.25-36)

²⁴ Jesus tuke unuiniak juna tímiayi: ‘Tura nu wáitsatin nankaamasmatai, etsaasha nantusha etsantrashtatui.

²⁵ Yaasha nayaimpinmaya kakekartatui, tura nayaimpiniam kakaram ainia nu muchitrartatui.

²⁶ Nuyasha ashí aents Winia wáitkiertatui. Wi, Aents Ajasuitjiana ju, ti kakaran, ti wincha ajasan, yuranminiam winiáj wáitkiertatui.

²⁷ Nuñ nayaimpinmaya suntarun akupkattajai, Wí shuaran ashí nunkanmayan irurarat tusan. Arakaaniya, nunkaaniya, ashí nunka nánkatkamunmayan Wí shuaran irurartatui.’

²⁸ ‘Ikiu numi nakumea nu nekaatarum. Ni chinimpri punkak nuke jeaku, ‘ju nunkanam esat jeatemai’ tátsurmek.

²⁹ Núnisrumek Wi tájarmena nu wáinkiuermeka, ni tátintri jeatemai tu nekaattarme.

³⁰ Nekas tájarme, yamaí aents pujuinia nu kajin amuiniatsajin, ashí Wi tájana nu túrunatniuiti.

³¹ Nayaimpisha nunkasha amuukatniuiti. Tura winia chichampruka amuukashtiniaiti.

³² Tura tsawantcha nekanachminiaiti. Nayaimpinmaya suntarsha nékainiatsui; Wisha Yusa Uchirintiayan nékatsjai. Aya winia Aparuk nékawai.

³³ Atumsha anearum enentáimprarum Yus aujsa pujustarum, tsawant nékachu asarum.’

³⁴ ‘Tura Wikia ju shuarjai méteketjai. Ju shuarsha jeachat weak, ni jeen ikiuawai. Ikiuak ni shuarin wáitrukarti tusa apujas ikiuak ashí shuaran takatrin súawai. Tura wáitin wáinnium, “ameja pépker wáinkiata” tímiai.

³⁵ Wikia nu jeá nérenniua núnisnak, urutai tátataj nékachu asarum anearum pujustarum. Kíaraimpiash, tura ajapkeash, atash shiniukaimpiash, káshikiash tátatjai.

³⁶ Nérentin aya aneachmak taa, kanúu tepaj wáitkiai tusarum aneartarum.

³⁷ Wi atumin tájana nu, ashí shuáran tajai, anearum pujustarum” tímiayi Jesus.

14

Jesusan chichaman jurusarmiania nu

(Mateu 26.1-5; Rúkas 22.1-2; Juan 11.45-53)

¹ Jimiarchiki tsawant ajasmiai paskua tutai námper jeatin. Paskua námpertincha wakapru-
achu tantan yuatín námpernasha métek najanin ármiai. Israer-patri uuntrisha, Israer-
shuara jintinniurjsha Jesusan anañkar achikiar maatai tusar wakeriarmiai.

² Túrasha “Jista tsawantin túrachmi, aents charaatum ajarajin tusar” tiarmiai.

Nuwa kunkuinian Jesusan ukatramiania nu

(Mateu 26.6-13; Juan 12.1-8)

³ Jesussha Petania péprunam tunamaru Semunka jeen misanam pujan, nuwa tarimiayi. Nartu kunkuinian arapástru tutai kaya najanamunam piakun itiamiayi. Nu kunkuin ti kuitiati. Mutí chuchuke kupik Jesusa muuken kunkuinian ukatramiai.

⁴ Tura nuñ pujuarmia nu, kajerar tunaiyarmiai “¿Urukamtai ju kunkuinian ántar wa-
surea?

⁵Junasha súrakka, menaintiú sian̄ kuítnium surukminiuyi. Nu kuitcha kuítrinchan súsaṅka maak” tiarmiayi. Tusa nuwaṅ kajerkarmiayi.

⁶Antsu Jesus chicharainiak “Iniaisatarum. ¿Urukantai au kajerarum? Winia shiir túrutayi, tímiayi.

⁷Kuítrincha atumjai tuke íruntsuk. Wakerakrumka tuke péṅker awajsatniuitrume. Antsu Wikia atumjai tuke pujushtajai.

⁸Ju nuwaṅ ashí ní túramnia núnaka umikiai. Wi jákatin jeatsain̄, iwiarsatin kuṅkuinian shiir ukatururai.

⁹Nekas tájarme, ashí nuṅkanam Yus-Chicham etsernakatna nuṅ, ju nuwaṅ túramurisha etsernakatui, nin kajinmatkiarain̄ tusa” tímiayi.

*Jútas Jesusan suruktaj timiania nu
(Mateu 26.14-16; Rúkas 22.3-6)*

¹⁰Nuyá Jútas Iskariúti, Jesusa unuiniamuríntiat, Israer-patri uuntrin werimiayi, Jesusan suruktaj tusa.

¹¹Niisha nuna antukar, warasar “Kuit amastaji” tiarmiayi. Jútassha Jesusan ititurak yúpichuch tsan̄kamkattaj tusa enentáimias wekaimiayi.

*Jesusjai iruntrar yurumáwarmia nu
(Mateu 26.17-29; Rúkas 22.7-23; Juan̄ 13.21-30; 1 Kurintianam 11.23-26)*

¹²Wakapruachu tantan yuatin jisat naṅkama tsawant tsawarmatai, paskua námpertin yúatin murik máatin jeamtai, Jesusa unuiniamurí iniasarmiayi “Paskuatin murikiu yúatin iwiaratai tuser ¿túi wétataj. Túy yurumattam?” tiarmiayi.

¹³Tutai Niisha jimiará unuiniamurín akatar akupeak “Péprunam wetarum. Nuṅ áishman̄ yumin júki wéa wáinkiatarme. Nu áishman̄ nemarsatarum.

¹⁴Wayana nuṅ jeá nérenniurí títiarum “Uunt túramui, ¿wisha, unuiniamurjai tuj yurumáttaj?”

¹⁵Nu nérentin, yakí písunam uunt tesamunam ashí iwiaramun iniakturmastatrume. Nuṅ jisat ii najanatin iwiaratarum” tímiayi.

¹⁶Ni unuiniamurí wear, péprunam jeawar, Jesus timia núnisan̄ wáinkiarimiayi. Tuma ásar paskua námperan̄ iwiararmiayi.

¹⁷Nuyá kíakui Jesus ni tuse unuiniamuríjiai wayawarmiayi.

¹⁸Niisha misanam pekaamak, yurumáiniak pujusar, Jesus tímiayi. “Nekas tájarme, chikichik shuar Wijíai yurumna nu, surutkattawai.”

¹⁹Nujai kúntuts enentáimprarmiayi. Chikich chikich Jesusan aniasar “wíashitaj” tiarmiayi.

²⁰Jesus tímiayi “Ju misanam tuse irunar yurumprum nu, chikichik surutkattawai. Wijíai pininnum yurumkan ayak yuana núiti.

²¹Nekas Wi, Aents Ajasuítjiana ju, jákatniunam wéajai, áarturma áintsanak. Tura áishman̄ súrutna nu ti wáitsattawai. Niisha akiinmainchu ajakuiti” tímiayi.

²²Yurumainiak Jesus Yúsan yuminkias, yurumkan achik, puuk, chicharainiak “Achik-tarum, júsha winia ayáshruiti” tímiayi.

²³Pinin̄nasha achik, Yúsan yuminkias, ni unuiniamurín súsarmiayi. Ashí umararmiayi.

²⁴Umararmatai Jesus tímiayi “Júti winia numpar, untsurin̄ yáintajtsa puártinia nu. Nujai Yamaram Chichaman Yus najanaiti.

²⁵Nekas tájarme, uwa yumirí ataksha juṅ umarchattajai. Tura tsawant jeamtai, ukun-masha, Yus akupeana nuṅ yamarman umartatjai” tímiayi.

*Pítur natsantratniua nuna Jesus ujakmiania nu
(Mateu 26.30-35; Rúkas 22.31-34; Juan̄ 13.36-38)*

²⁶Yus-kantan kantámawar, jíinkiar, Uriwiu náinnium wearimiayi.

²⁷Nuínkia Jesus nin̄ tiarmiayi “Ju kashi átum natsantrurtatrume. “Murikiu wáinnun máattajai, túramtai murik tsakin̄makartatui” tu aarchamukait.

²⁸Tura ukunam Wi nantakin̄ atumin̄ Kariréanam émtuktiajrume” tímiayi.

²⁹Tutai Pítur chicharuk “Ámin ashí natsantramainiakuisha, wikia natsantrashtatjame” tímiayi.

³⁰Tutai Jesus tímiayi “Nekas tájame, ju kashi atash jimiará shiniatsain̄, natsantrurtatme. “Núnaka nékatsjai” menaintiú turuttiatme” tímiayi.

³¹Tutai Pítur kakaram chichaak “Ámijiai métek máantuiniakuisha, núnaka pen̄ké tíchattajai” tímiayi. Ashí ni unuiniamurí núnisan̄ tiarmiayi.

*Jesus Jitsemani ajanam Yúsan áujsamiania nu
(Mateu 26.36-46; Rúkas 22.39-46)*

³²Nuyá Jitsemani ajanam wearimiayi. Jeawar Jesus ni unuiniamurín tímiayi “Juṅ pujus-tarum, Yúsan áujsatasa pujai”.

³³ Pítrun, Jakupuncha, Juánnasha jukimiayi. Tura Jesuska ti kuntuts enentáimiar wake mesek nekapsatasa nanǰkammiayi.

³⁴ Tura nin chicharuk “Wi ti kuntuts enentáimjai, tura jakamnia nekapeajai. Jui iimia pujutarum” tímiayi.

³⁵ Jesussha ishichik arantach we, nuńká piniakumar tepes Yúsan aujmiayi. “Ju wáitsatin átatna nu, túrutatniitkuńkia iniaitiusta” tu seamiayi.

³⁶ Tuke áujuk tímiayi “Apawá, ashí tujinchaitme. Pinińnumia ashí umartinia áantsań ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.”

³⁷ Tura ni unuiniamurjń tarin, kanúu tepenan wáinkiamiayi. Pítrun tímiayi “¿Semuńka kánamek. Kanutsuk ishichkisha iimia pujustin tujinkiamek?”

³⁸ Anearum Yus áusatarum, tunaanum iniaaraj tusarum. Atumí wakanjin kakarmaitrume, antsu atumí ayashjin kakarmachuitrume” tímiayi.

³⁹ Ataksha we, nuik Yúsan áusama núnisań áusamiayi.

⁴⁰ Ataksha waketruki, ni unuiniamurjń kanúu tepenan tarimiayi. Karj ti pujá asamtai, Jesusan áusatsniun tujinkiarimiayi.

⁴¹ Jesus ataksha we, tarí tímiayi “Kanarum ayampratarum. Máakete. Jeayi. Wi, Aents Ajasuitjana ju, tunáa shuarnum surukmaitjai.

⁴² Nantáktiárum, wemí. Iis, Winia súrutna nu nuntumsai” tímiayi Jesus.

Jesusan achikiarmiania nu

(Mateu 26.47-56; Rúkas 22.47-53; Juan 18.2-11)

⁴³ Jesus nuna chicháa pujá unuiniamurjń Jútas tarimiayi. Nijijai untsurj aents puniá takaku, tura numincha takaku káutarmiayi. Israer-patri uuntrj, Israer-shuara jintinniurj, tura Israer-shuara úuntrj akupkarma asa káutkarimiayi.

⁴⁴ Káuntsań Jútas chicharainiak, “Wi mukunattaj áujkin núiti Jesus. Achiirum, péńker emetarum jukitiarum” tímiayi.

⁴⁵ Tura Jesusan tarí, mukunuk áujas “Uuntá, Uuntá” tímiayi.

⁴⁶ Túramtai aencha Jesusan achikiar emetawarmiayi.

⁴⁷ Túruiniakui nuj wajatusha puniarj úkuitsań, patri uuntrj takarniurjń awati ni kuishjń tsupirkamiayi.

⁴⁸ Túram Jesus áentsun tímiayi “Kasakaitiaj. Puniajai numijjai, kasá nútiksarmek achirkatai tusarum tarutniurme.

⁴⁹ Ashí tsawant atumjai Yusa Uunt Jeen wayan unuiniakun pujuchmakaj. Túmaj nuj achirkachmarme. Tura Yus timia nu uminkiat tusa ju túrunayi.”

⁵⁰ Nuńkia ni unuiniamurjń Niniak ikiuiniak pisararmiayi.

Natsa pisarmiania nu

⁵¹ Tura áishmań nátsaach aya tarachin penumas Jesusan atamprimiayi. Tura natsaach suntar achikiam

⁵² tarachrjń ajapa ikiuak misú tsékeńkimiayi.

Patri uuntrjń Jesusan júkiarmiania nu

(Mateu 26.57-68; Rúkas 22.54-55, 63-71; Juan 18.12-14, 19-24)

⁵³ Patri uuntrjń Jesusan ejeniarmiayi. Nuj Patri uuntrjsha, Israer-shuara jintinniurjsha, Israer-shuara uuntrjsha irunturarmiayi.

⁵⁴ Tura Pítiur íikiań nemarki Patri jeen aach jeá, Patri suntarjijai jinia anamuk pujumiayi.

⁵⁵ Patri uuntrj ashí naamka uunt armia nujai iruntrar maatai tusar wakeruiniak shuar Jesusan tsanumprurat tusar eątkarmiayi. Nu chichamjai mantamnati, tiarmiayi. Túrasha wáinkiacharmiayi.

⁵⁶ Túrasha untsurj shuar Jesusan tsanumpruiniayatan yapajjá yapajjá chichainia ásarmatai wáinkiacharmiayi.

⁵⁷ Nuyá chikich wajakiar wáitruiniak juna tiarmiayi

⁵⁸ “Yusa Uunt Jeen, aents jearmia nuna yumpuntatjai. Túran menaintiú tsawantaj, chikichan, aents jeamchamun jeamtatjai” tau antukmaji” tiarmiayi.

⁵⁹ Tura tuke yapajjáwar tiarmiayi.

⁶⁰ Nujsa Patri uuntrj ajapén wajaki Jesusan chicharuk “¿Áimsatin peńké tujintiamek. Warinia turainia?” tímiayi.

⁶¹ Tura Jesus takamtak áimsuk pujumiayi.

Patri uuntrj atak chicharuk “¿Ame nekas Yusa Anaikiamurjńkaitiam. Ii Yusrj Uunt tainia nuna Uchirjńkaitiam?”

⁶² Tutai Jesus tímiayi “Ee, nútjaj. Winia, Aents Ajasu tutaintiajna nu Kakaram Yusa untsuurjñi pujaj wáitkiattarme. Tura nayaimpinmayá yurañminiam winiaj wáitkiattarme” tímiayi.

⁶³ Tutai Patri uuntri kajek, ni pushirjñ jaak tímiayi “¿Chíkich títincha warí atsumaj?”

⁶⁴ Nii tana nujaj Yúsana kátsekeamu antukurme. ¿Warintia enentáimprum?” tímiayi.

Takui “jakamniati” ashí tiarmiayi.

⁶⁵ Chíkich chíkich Jesusan usukiáwarmiayi. Jjin epetkar awatiar “¿Ya áitkiarma? etserkata” tiarmiayi. Patri suntarjsha yapiniam awatiarmiayi.

Pítiur Jesusan natsantramiania nu

(Mateu 26.69-75; Rúkas 22.56-62; Juan 18.15-18, 25-29)

⁶⁶ Núnaka túruiniaj Pítru nunká, jea aani pujan, nuwá Patri uuntri takarniuriya nu tarimiayi.

⁶⁷ Niisha Pítrun jinia anamu pujan wáinkiamiayi. Wáiniak, “Amesha Nasaretnumia Jesusaj wekaichukaitiam” tímiayi.

⁶⁸ Tutai Pítiur chicharuk, “Nékatsjai. Ame támena nuna nékatsjai” tímiayi. Tura aa wáitainiam jñinkimiayi. Tumai atash shiniukmiayi.

⁶⁹ Nu núwasha Pítrun ataksha wáiniak, shuáran nuj pujuinian tímiayi “Júiti ni shuari.”

⁷⁰ Tura ataksha “atsá” tímiayi.

Ishichik árusañ, shuar nuj pujuarmia nu ataksha Pítrun chicharuk “Nekas ni shuarinme. Kariéanmayá shuárchakaitiam. Auyá shuara nuni chichaame” tiarmiayi.

⁷¹ Tutai Pítrusha kakantar chichaak, “Jú áishmanñaka átum tárugna núnaka nékatsjai. Wáitrakuñkia Yús írsati” tímiayi.

⁷² Nuyá ataksha atash shiniukmiayi. Pítrusha, Jesus nuik timian enentáimmiayi. Iis, Jesus nuik tíchamka “Atash jimiari shiniatsañ, ame, núnaka nékatsjai, menaintiu turuttiatme” tíchamka. Pítru nuna enentáimias ti útmiayi.

15

Jesusan Piratú ejeniarmiania nu

(Mateu 27.1-2, 11-14; Rúkas 23.1-5; Juan 18.28-38)

¹ Tura kashin káshik Patri uuntri, Israer-shuara úuntrijjaj, Israer-shuara jintinniurjñaj, ashí naamka armia nujaj irunturar, chichaman jurusarmiayi. Túrawar Jesusan jñinkiamun apach kapitían Piratujñ ejeniarmiayi.

² Ejeniarматаi Piratu aniasmiayi “¿Amesha Israer-shuara Uuntriníaitiam?”

Tutai Jesussha “Amek tame” tímiayi.

³ Nuyá Patri uuntri ti tsanumprurarmiayi.

⁴ Ataksha Piratu aniasmiayi “¿Áimsatin penké tujintiamek? Ti untsurj etserturmainiat-suk.”

⁵ Tura Jesus nunasha áikchamiayi. Túmakui Piratu ti enentáimpramiayi.

Jesusan, mantamnati, tiarmiania nu

(Mateu 27.15-31; Rúkas 23.13-25; Juan 18.38-19.16)

⁶⁻⁷ Shuar ámiayi, ni naari Parapás. Niisha ni shuarjñaj meset ámanum, shuara maa asamtai sepunam enkeamuyayi. Tura námpet sawantaj Piratu sepunmayá chikichik shuarnak jñiki akupniuyayi, aents seawarmia nuna.

⁸ Nuisha untsurj shuar Piratun káutkar tiarmiayi “Ame ju námpertin tuke túramna nu túratá.

⁹⁻¹⁰ Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuartiram ¿atumí akupniurjñ jñiki akupkattajak? ¿Nu wakerarmek?” tímiayi.

¹¹ Tutai Patri uuntri áentsun chichainiak ““Antsu Parapás jñikim akúpkatá” titiarum” tiarmiayi.

¹² Tutai Parapásan seawarmatai Piratu ataksha chicharainiak “Jesusnasha, átum ii akupniurj tarumna nuna, ¿itiurkattaja?” tímiayi.

¹³ Ataksha ni kakantar tiarmiayi “Krúsnum mantamnati.”

¹⁴ Piratusha nin tiarmiayi “¿Warí tunaana túriniait?” tímiayi.

Takui niisha nú nankaamas kakantar tiarmiayi “Krúsnum mantamnati.”

¹⁵ Tusi asamtai, aents shiir enentáimprarti tusa, Piratu tunáa shuara, Parapásan jñiki akupkamiayi. Tura Jesusnasha katsumkarum krusnum ajinrurtarum tusa suntaran tsankatkamiayi.

¹⁶ Tiniu asamtai suntar Jesusan jukiar, kapitíani jeen awayawarmiayi. Nu jea naari Piritiúriuti. Túrawar untsurj suntaran untsukarmiayi.

¹⁷ Ashí káunkar, pushin kapaḡnniun Jesusan áentsrarmiayi. Tawasap jaṅki najanamun etsenkrumtiarkiarmiayi.

¹⁸ Nuḡsha Jesusan áujсар “Shíraitme, Jesúsá, Israer-shuara akupniurjya” wishikiainiak tiarmiayi.

¹⁹ Muuknumsha sapapjaj awatiarmiayi; nuyá usukiawarmiayi, túrawar ántar tikishma-trarmiayi.

²⁰ Tura Jesusan wishikrar amukar, kapaḡntin pushin áitkiar, ni pushirj̄n áentsrarmiayi. Túrawar krúsnum ajintrurtaḡ tusar j̄ikiarmiayi.

Jesusa jakamuri

(Mateu 27.32-44; Rúkas 23.26-43; Juan 19.17-27)

²¹ Semuṅ Serini núṅkanmayá shuárayayi. Arijantruncha, Rupuncha aparíyayi. Semuṅkan takatnumiá winian suntar emetawarmiayi, Jesusa krusrj̄n yanaki jukiti tusar.

²² Jesusnasha Kúrkuta náinnium júkiarmiayi. Kúrkuta, shuar chichamj̄inkia, muuka ukunch naint, tutainti.

²³ Jeawarmatai, karia, mira kuṅkuinjaj pachimprar áartaj tusa susarmiayi Jesusan. Túrasha umarchamiayi.

²⁴⁻²⁵ Nantu yakí jatemsamtaḡ krúsnum ayapar ajintrurar ikiusarmiayi. Túrawar suntar yakí jukit tusar nakurutaj̄jaj nakurusar Jesusa pushirj̄n yaruakarmiayi.

²⁶ Urukamtaḡ máamuit, ashí aents nuna nekaawarat tusa, ni krús̄rj̄n j̄u aarmauyayi: **ISRAER SHUARA AKUPNIURI**

²⁷ Nu náinnium jimiará kasa shuaran Nij̄ijaj máawarmiayi. Chikichik Jesusa untsuurj̄n krúsnum, chikichik ni menaarj̄n krúsnum máawarmiayi.

²⁸ Yus-Papinium aarma ana nujaj uminkiauyayi. Nuḡ “tunáa shuarjaj nekapmar-mauyayi” tu áarmaiti.

²⁹ Shuar naṅkaamainiak, muuke pearar, Jesusan katsekainiak tiarmiayi “Iisia, amesha, “Yusa Uunt J̄eṅ yumpun̄tiatjaj, tura menaintiú tsawantaj ataksha jeamkattajaj” tíchakaitiam, tiarmiayi.

³⁰ Amek krúsnumiá akaikim uwemprata.”

³¹ Núnis̄an Patri uuntr̄isha, Israer-shuara jintinniur̄isha Jesusan wishikrar chicharnais-armiayi “Chikichan uwemtikraitiat, Niṅki uwempratniun tujintiawai.

³² Yusa anaikiamuri K̄ristuashit, ii akupniur̄niashit, tiarmiayi. Wats, yamá krúsnumiá akáikití, iisha nu ísar Yus-shuar ajastaj” wishikiainiak ántar nuna tiarmiayi. Jesusjaj krúsnum ajintruamusha Nin wishikiarmiayi.

(Mateu 27.45-56; Rúkas 23.44-49; Juan 19.28-30)

³³ Tutupin jeamtaḡ ti kiritin ajasmiayi ashí nuṅkanam. Tura, nantu nuṅkaach ajasmataḡ ataksha tsaapnirmiayi.

³⁴ Nuṅ̄ Jesus kakantar untsumuk tímiayi “Iruí, Iruí, rama sapaktani.” Nuka shuar chichamj̄inkia, “Yusrú, Yusrú, ¿urukamtaḡ ajapa ikiurkiniam?” tawai.

³⁵ Shuar nuḡ pujuarmia nu, nu chichaman nékachu ásar, nuna antukar “Eríasan untsúawai” tiarmiayi.

³⁶ Chikichik shuar churuinian uruchjaj ajamper, sapapjaj ijiú mukunati tusa susamiayi. Tura tímiayi “Wajastarum, Eriás Nin jukitaj tusa winishtimpiash. Iistai” tímiayi.

³⁷ Nuṅ̄kia Jesus kakaram untsumak jakamiayi.

³⁸ Túramtaḡ Yusa Uunt J̄eṅ ejamu niṅki jaṅnakmiayi, yakíyá nuṅká.

³⁹ Suntara kapitian̄r̄isha Jesusan ayamtus wajamia nu, Jesus kakaram untsumak jaamun iis tímiayi “Nuka ti nekas Yusa Uchiriyayi.”

⁴⁰ Nuwasha arant ii pujuarmiayi. Nu nuwajaj Máktara péprunmayá Marí, chikich Marisha, Sarumáisha pujuarmiayi. Chikich Marisha uchich jakupuncha Jusencha nukur̄iyayi.

⁴¹ Nu nuwaka, Kariréa nuṅkanam Jesus wekaimia nuḡ, Nin nemarsar yaṅtatsar wekasarmiayi. Untsur̄i chikich nuwasha Jesusjaj Jerusar̄nnum wear, nu nuwajaj arant ii pujuarmiayi.

Jesusan iwarsarmiania nu

(Mateu 27.57-61; Rúkas 23.50-56; Juan 19.38-42)

⁴² K̄iatemamtaḡ, ayamprat̄in tsawant jeats̄in, námper iwiaratin tsawant asamtaḡ,

⁴³ Arimiatian̄mayá Jusé arantutsuk, kakaram ajas, Piratúí jeá Jesusa ayash̄in seatajtsa utuamiayi. Nu Jusencha ashí irunin ainia nu anturin ármiai. Niisha Yus j̄u nuṅkanam akupin ajasat tusa nákasmiayi.

⁴⁴ Tura Jesusa ayash̄in seam, Piratusha “wárik jaka” tímiayi. Tuma asa suntara kapitian̄r̄in untsurak “¿Nekas jakayik?” tímiayi.

⁴⁵ Tutai kapitian̄ “Ee” takui, Jesusa ayash̄in Jusen tsan̄katkamiayi.

⁴⁶ Jusesha puju tarachin péñkeran sumarak, Jesusa ayashin itiar áepas penuarmiayi. Tura yamaram kaya táurmanum ikiusmiayi. Ikius wáitiniam kayan átutmiayi.

⁴⁷ Tura Máktaranmaya Marí, Jusé nukurí Maríjjai ni ikiumun ii wajarmiayi.

16

Jesus nantakmiania nu

(*Mateu 28.1-10; Rúkas 24.1-12; Juan 20.1-10*)

¹ Tura ayampratin tsawant nankaasmatai, Máktaranmaya Marisha, Jakupu nukurí Marisha, Sarumáisha, kunkuinian Jesusa ayashin kuertai tusar sumakarmiayi.

² Tura kashin Tumintin, ti káshik, nantu yáma jiniiai, iwiarsamunam jeariarmiayi.

³ Wésar chichainiak “Iwiarsamu wáitiri kayan cha ¿yaki akanketramkattaj?” tiarmiayi.

⁴ Jear uunt kaya akankekman wáinkiararmiayi.

⁵ Iwiarsamunam wayawar, natsan esaram puju pushin entsar, untsuurnumaani pujan wáinkiar ti ashamkarmiayi.

⁶ Túmainiakui natsa tímiayi “Ashamkairap. Nasarénumiá Jesus krúsnum jakama nu éarme. Iniantkimiuiti. Juj pujatsui. Wátsek, ju ikiusmanum íistarum.

⁷ Túrarum werum Pítrusha, chikich unuiniamurjsha ju ujaktarum. Kariréanam atumin émkíyi. Turammarumna núnisan túruna wáinkíattarme” tímiayi.

⁸ Niisha ti ashamainiak purushniarar iwiarsamunmaya tseke wearmiayi. Ti ashamainia ásar, chikichkinkesha ujakcharmíayi.

Máktaranmaya Marín Jesus wantintiúkmania nu

(*Juan 20.11-18*)

⁹ Émkaka Tumintin ti káshik Jesus nantaki, Máktaranmaya Marín wantintiúkmiayi. Nu María enentáiyá siati iwianchin Jesus yaunchu ajapruyayi.

¹⁰⁻¹¹ Marisha Jesusa nemarí kúntuts uutu matsatainian werí, “Jesus iwíiakui, imia wi wainkíajai” tímiayi. Támaiati anturkacharmiayi.

Jesus jimíará shuaran wantintiúkmania nu

(*Rúkas 24.13-35*)

¹² Tura urum jimíara shuar Jerusarénumiá tsaniñ weenan, Jesus nusháa iira ajas tarimiayi.

¹³ Niisha Jesusan wáinkiar waketkiar, unuiniamurín ujakarmiayi, tura ni chichamencha anturkacharmiayi.

Jesus ni unuiniamurín akupkarmiania nu

(*Mateu 28.16-20; Rúkas 24.36-49; Juan 20.19-23*)

¹⁴ Nuyasha Jesusa auntse unuiniamurí misanam pekaamkar pujuinian Jesus tarimiayi. “¿Atumí enentái urukamtaí kátsuram ainia, urukamtaí Winia nekas enentáimtursachuram?” tímiayi. Ni nantakmarín wáinkiaru chichamen anturkacharu ásarmatai kakantramiayi.

¹⁵ Nuyá chichaak “Ashí nunkanam wetarum. Túrarum ashí shuarum Yusa shiir chichame etserkatarum.

¹⁶ Shuar anturak imiani uwemprartatui. Shuar antukcharka, tuke sumamawartatui.

¹⁷ Shuar winia náarun pachis, Yúsan nekas enentáimtakka, juna túrawartatui, Yusa kakarmarín iniakmastaj tusa: iwianchin jiki akupkartatui; chikich chichamjai chichasarukam-tai Winia nekas enentáimturatui;

¹⁸ napincha achiksha, tseasnasha úmaksha, jaa ajaschartatui. Jaa shuaran ni uwejejai antin, nu shuaran péñker awajsartatui.” Tu tímiayi.

Jesus nayaimpiniam wakamiania nu

(*Rúkas 24.50-53*)

¹⁹ Jesus chichas amukmatai, Yus nayaimpiniam jukimiayi. Túruna Yusa untsuurinjí pujusmiayi.

²⁰ Ni unuiniamurjsha jinkiar, ashí nunkanam Yus-Chichaman etserkarmiayi. Tura Uunt Yus nin yáinmiayi. Tura etserainiakui, ashí aents ni kakarmarín nekaawarat tusa, aentsti tujintiamun túratniun susamiayi. Nuke atí.

Yúsna Shíir Chichamén

RÚKAS aarmia nu

- ¹ Nekas iinj Jesús túramia nuna “ímiatrusañ áartajai” untsurj aents tiarmiayi.
- ² Yámankamtaikniumiñ íisarmia nú shuar, tura Yus-Chichaman etserkatniun yáinkiarmita nusha in unuítiamprarmia nútiksarañ áartinian wakeriarmiayi.
- ³ Wisha núnisnak esetsaran enentáimsan, yámankamtaikniumiñ nuna nekaamjai. Tuma asan túrunamia nuna ímiatrusnak amincha áatratajtsan wakerimjiame, winia úuntur Tiupiru.
- ⁴ Jintinramawarma nú nankaamas nekaata tusan wakerakun áatjame.

Imiakratin Juanca akiiniatniurín ujakmiania nu

⁵ Jutía nunkanam uunt akupin Erutis akupkamia nú tsawantin Israer-shuar Yúsna pujurin ámiayi, ni naarj Sakarías. Niisha Aptías weeayuyai. Ni nuweshá Irisapít Arun weeayuyai. Irisapítia úntrisha Israer-shuar Yúsna pujurin ámiayi.

⁶ Yúsajsha Sakaríassha Irisapítcha máí-metek péñker ámiayi. Yus akupkamia nunasha umirin ámiayi. Tuma asamtai péñkeshá chikich nin yajauch chicharkatin atsuarmiayi.

⁷ Yusjaj péñker wekainiyat Irisapít júrechuyai. Túrusha máí úuntach ámiayi.

⁸⁻⁹ Israer-shuar Yúsna pujurin chikich weeanmayá nuyá chikich weenam, ankant ankant Yusa jeen takáu ámiayi. Chikich tsawant, Sakarías weeá takastin amia nuj, Sakaríaska kunkuinian ekeemaktaj tusa inít wayatniuyai.

¹⁰ Inít kunkuinian ekeemaj untsurj aents aani matsamsar Yúsna áujtak pujuarmiayi.

¹¹ Sakarías inít pujaj kunkuin ekeematainiam untsuurnumaanj aya aneachma nayaimpinmayá suntar wajamiayi.

¹² Nuna wajan wáiniak Sakaríaska purushnairmiayi.

¹³ Túrusha nayaimpinmayá suntar chicharuk tímiayi “Sapijmiakaip Sakaríasá. Nekaata. Ame seamna nuna Yus anturtamkayi. Tura ame nuwem Irisapít uchin takastatui. Nii akiiniamtai, “Juan” anaikiata.

¹⁴⁻¹⁵ Ame uchiram akiiniattana nuka Yusajsha nankaamantu átatui. Tuma asamtai akiiniamtai, amesha shíir enentáimsam warastatme. Tura chikich aents untsurj warastatui. Ame uchirmesha karía ainia nuna umarchattawai. Tura áetak akiinchanak Yusa Wakanj pimiutkattawai, tímiayi.

¹⁶ Tura ni shuarin Israer-shuar áiniana nuna, ii Uuntri Yusjaj ataksha nawamtikiartatui.

¹⁷ Uunt Yúsajya akatramu átatui. Yaunchu Yúsna etserin Erías kakaram etserkamia núnisañ niisha etserkattawai. Nujaj shuaran ni uchirjijaj nawamtikiartatui. Tura umichu áinia nuna eseer enentáimtikrartatui. Ni Uuntri taakui ni enentái iwíaramu arti tusa etserkattawai” tímiayi nayaimpinmayá suntar.

¹⁸ Nuna takui Sakarías nayaimpinmayá suntaran tímiayi “¿Nunasha warijjaj paant nekaataj? Wisha nuarjaj máí-metek ti úuntchichukaitaj” tímiayi.

¹⁹ Tutai nayaimpinmayá suntar tímiayi “Wikia Kapriiraitjai, Yusa suntarintjai. Nii akatturmatai chichastájam tusan tura nu shíir chichaman ujaktájam tusan tarjime, tímiayi.

²⁰ Túrusha wi tájamna nu “nekasaiti” tu enentáimprachume. Tura asam uchiram akiintsajin muut ajastatme. Chichastin péñké tujinkiattame. Tura wi tajana nu, tsawant jeamtai túrunattawai.”

²¹ Nuna tumaj Yusa jeen aani pujusar, Sakaríasan nákas pujuarmiayi. “¿Urukamtaik inít we imiá menkaka?” tu enentáimprarmiai.

²² Nuyá Sakarías jinkimtai, áujstaj tukamá tujinkiarmitai. Sakaríaska, muut ajasu asa, aya úwjmiasañ chichamiayi. Túmakui, Sakarías inít pujus Yúsaj wáimiakun nekaawarmiayi.

²³ Yusa jeen takastin tsawantj amuukamtai Sakaríaska ni jeen waketkimiayi.

²⁴ Nuyá ukunam ni nuarj Irisapít ajaprুকmiayi. Tura senku nantutin aya jeen pujusmiayi.

²⁵ Jeá pujus, “Aents wishikruiniakui natsantan jurutkitaj tusa uchi takustinian Yus tsankatrukai” tu enentáimpramiayi Irisapít.

Jesusa akiiniatniurín nayaimpinmayá suntar etserkamiania nu

²⁶ Nu senku nantu nankaamasmatai Yus ni suntarin Kapriiran Nasarét péprunam akupkamiayi. Nu pepu Kariréa nunkanam pujawai.

²⁷ Nasarénumiñ nuwan, naarj Mari, iyutí tusa akuptukmiayi. Nu núwaka áishmanjaj pujuchuyai. Niisha Jusejaj nuatnaikiatsa anajmanair pujumiayi. Juseka uunt Tawit weeayuyai.

²⁸ Wats, nayaimpinmayá suntar Marí pujamunam wayá tímiayi “Yus péñker enentáimturma asamtai, ámin winitjiamé, Mariya. Yuska ámin nemartamuk ashí nuwá nankaamas péñker awajtamui” tímiayi.

²⁹ Tura Marisha nayaimpinmayá suntaran wáiniak, chichaamun nékatsuk “Urukamtaik tu chicháa” tu enentáimpramiayi.

³⁰ Nuyá nayaimpinmayá suntar chicharuk tímiayi “Mariya, sapijmiakaip. Yus shiir enentáimturmawai.

³¹ Antukta. Amesha ajapruktatme. Túram Uchi takustatme. Nusha “Jesus” anaikiata.

³²⁻³³ Niisha uunt átatui. Nincha “Uunt Nankaamaku Yusa Uchirí” tiartatui. Tura Uunt Yuska yaunchu Tawitian uunt akupniurj awajsamia núnisañ ame Uchirmin ame shuárumin Israer tutain Uunt akupin awajsattawai. Ni akupeamurísha Yus susamu asa penké amuukashiniaiti” tímiayi.

³⁴ Nayaimpinmayá suntar nuna tutai Marí tímiayi “Nusha winia áishur atsaísha, ¿itiurak túrunataj?”

³⁵ Tutai nayaimpinmayá suntar Marín tímiayi “Yusa Wakaní tarutramtatui. Tura yurañmia núnisañ Uunt Yusa kakarmarj ijirmattawai. Nu tuma asamtai Uchi akiiniattana nu Yúsaiya asamtai, “Yusa Uchirínti” tiartatui, tímiayi.

³⁶ Tura Irisapít ame kaná kaimia nusha núnisañ weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin.

³⁷ Yúsajñkia itiurchatka penké atsawai” tímiayi.

³⁸ Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmayá suntarka wémiayi.

Irisapítian Marí iyumiania nu

³⁹⁻⁴⁰ Nu tsawant Marí wárikmas muranam Jutía nunkanam ni kaná kajñ Irisapítian iyutaj tusa wémiayi. Sakaríasaj jeá, ni jeen wayá, Irisapítian áusamiayi.

⁴¹ Marí áujeamun antukmatai Irisapítia ampujén uchirí muchitkamiayi. Tumaí Yusa Wakaní ni enentáin pimiutkamiayi.

⁴² Nuñkia kakantar chichaak Marín tímiayi “Yus amincha ti shiir awajtamsaiti. Tura Uchiram akiiniattana nusha Yus shiir awajsamuiti.

⁴³ Kajrua, ame winia Uuntru nukurí áminin, Yus winia ti waitnentra asa, áúsata tusa ámin akuptamkachaik, tímiayi.

⁴⁴ Warí, wisha ame áujtamna nuna ántakui ampujuruj uchi waras muchitrukayí.

⁴⁵ Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

⁴⁶ Nuna tinia iniaisamtai Marí juna tímiayi:

“Wikia tuke enentairjai “Yus timiá úntaiti” tajai.

⁴⁷ Tura Uunt Yuska winia Uwemtikruru asamtai ti waraajai.

⁴⁸⁻⁴⁹ Wisha péjchach aín ni wakeramurín umiktajtsan wakerakui winia enentáimturayi. Tuma asamtai ashí aents, “Marincha Yus shiir awajsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtai ashí aents “Marincha Yus shiir awajsaiti” turutiartatui. Núnaka yamá nankamamunak tuke turutú ajartatui.

⁵⁰ Tura Nin umirkatniun wakerana nunasha Yus tuke waitnentrartatui.

⁵¹ Ti itiurchatan páchitsuk túraití Nii. “Nankaamantuitjai” tu enentáimtumainia nuna nupetkaiti.

⁵² Ashí akupin ainia nuna awakkaruiti. Tura íksañ péjchach ainia nuna uunt awajsaruiti.

⁵³ Péñker ana nuna kitiamaainiakui Yus péñkeran súsaruiti. Tura antsu “ashí takakjai” tuinia nuna aya júnik awajsaruiti.

⁵⁴ Israer-shuar Niiniu ájinia núnaka waitnentratniun kajinmattsuk yáinmákuítji.

⁵⁵ Yaunchu ii Uuntrí Apraáman tura ní shuarnasha “túrtatajai” timia nuna ímiatrusañ tuke túraití.” Nuní tímiayi Marí.

⁵⁶ Marikia Irisapítjai menaintiú nantu pujus ni jeen waketkimiyai.

Imiakratin Juanka akiiniamurí

⁵⁷ Nuyasha ni jurertin tsawantrí jeamtai Irisapítcha uchin áishmañkan takusmiayi.

⁵⁸ Tura ni shuarísha, ni írutramurísha “Irisapítian Yus ti shiir yáñmiayi” tuíniak, nin iyuwearmiayi. Tura máí-metek warasarmiayi.

⁵⁹ Israer-shuar túrutai júnisaiti: uchi akiiniamurí uchu tsawant jeamtai, shunichirí nuapen tsupiktin awai, sirkunsisiún tutai. Yus nuna tú tinu asamtai tuke túrin ármiayi. Wats, Irisapítia uchirí akiiniamuríniá uchu tsawant jeamtai tsupirkatai tusar ni jeen jearmiayi. Nuñkia ni aparj naarj Sakarías anaikiataitsar wakermiarmiayi.

⁶⁰ Tura ni nukurí tímiayi “Atsá. Antsu ni naarj Juan átatui.”

⁶¹ Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi.

⁶² Nuñkia uchi aparín “¿Warí anaikiatajtsam wakeram?” tusar aya úwejejaín iniasarmiayi.

⁶³ Tutai uchi aparísha “Nakash surusta; áartaj tusan wakerajai” tusa aya úwejejaín iniakmamiayi. Takui nakash susam, ni naarí Juáñkaiti, tu áarmiayi. Nuna wáinkiar “Ayawa urukakuñ ta” tu enentáimprarmiayi.

⁶⁴ Nú chichamaik Sakarías chichatsuk pujamun chichakmiayi. Tura nuñ Yusa náaríncha shiir awajsamiayi.

⁶⁵ Nuñkia ni írutramurísha ashankarmiayi; tura ashí Jutía nuñka murá amia nuí nu túrunamun ujakam ashí nekaawarmiayi.

⁶⁶ Nu túrunamun antukar ti enentáimsarmiayi. Tura “ju uchin Yus nekas pujurtsuk. Tuma asamtai uunt ajas ¿urukuk ati?” tu enentáimprarmiayi.

Sakarías Yus jintintiam tímiania nu

⁶⁷ Uchi aparí Sakarías, Yusa Wakaní pimiutkam tura Yus jintintiam, juna tímiayi:

⁶⁸ “Israer-shuartí ii Yusrí naarí shiir awajsatniuitji. Íi Yúsriisha tarutmaítji. Tura uwentikrampraitji.

⁶⁹ Yaunchu ii uuntri Tawit Yusa wakeramuríjjai uunt akupin áchamkia. Tura ni ukurín ti kakaram Uwentikiartinian suramsaitji.

⁷⁰⁻⁷² Yuska ii nemasriya tura in nakitramainiajnía nuyá uwentikrampratniun enentáimsamia nuna, yaunchu ni etserniurín péñker armia nuna ujakmiayi. “Winia ti péñker chichamprun tájana nuna yapajítsuk umirkan tuke wáitnentratajrume” yaunchu ii úuntri tímiania nunasha ni etserniurín ujakarmiayi. Yaunchu nu ujakma yamá iisha wainji.

⁷³⁻⁷⁵ Nu ujakman Yuska yámankamtaik imiá yaunchu ii uuntri Apraáman tíchamkia. Apraáman ujakmia nu júiti: “Wi wakeraj nútiksaran, Winia umirtukar péñker wekainia nuna ni nemasriya uwentikrattajai. Sapijmiatsuk winia tuke takartusarat tusan túrattajai” Yus tímiayi Apraáman. Iisha ni shuarí asakrin, nuna taku incha túramaji.

⁷⁶ Tura amincha, uchiru, “Uunt Yusna etserniuiti” turamartatui. Amesha ni tátintri iwiarataj tusam Uuntaj émkin wétatme.

⁷⁷ Ni shuarí, ni tunaarí tsankurnar uwemprarat tusam túrattame.

⁷⁸⁻⁷⁹ Yuska ashí shuaran anea asa, incha wáitnentrakam ni pujamunmaya ni tsáapnintrín suramsaitji. Ni enentáin kiritniunam wekainia nuna, mesertinnium jeatemá ásarmatai, ni tsáapnintrín jeat tusa túraití. Tura ashí incha ii enentáin imiatkinchanum wekasarmí tusa túraití.” Nuní tímiayi Sakarías.

⁸⁰ Uchisha tsakarmiayi. Tura Yúsan nekaki-nekaki wémiayi. Israer shuarum etserkatín tsawantri jeatsañkia atsamunam pujuyayi.

2

Jesusa akiiniamurí

(Mateu 1.18-25)

¹ Wats, Juan akiiniamia nú uwitin uunt akupin Akustu ashí nuñkanam áentsun nekapmarartí tu chichakmiayi.

² Nu nekapmartinian yaunchu túrushtain yamá túriarmiayi. Siria nuñkanam Seriniu akupin pujáj túrawarmiayi.

³ Ni naarí áartaj tusa ashí shuar ni nuñkenín wétin áarmiayi.

⁴ Tuma asamtai José Nasaréé péprunmaya Kariréa nuñkanam amia nuyá jiinki Pirín péprunam Jutía nuñkanam amia nuí wémiayi. Juseka Tawit weenam akiinia asa, ni nekas nuñkenka Pirínkauyayi.

⁵ Nu asamtai, ni náarín áartaj tusa José wémiayi Maríjjai. Marisha José núweyayi. Tura tsaniñcharuyayi. Túmaítat Marisha Yusa Wakaní kakarmaríjjai ajamtiniuyayi.

⁶ Tura nuí Pirínnum pujuiniaí Marí takustintrí jeamiayi.

⁷ Nuí iwiairín uchin áishmañkan takusmiayi. Tura uchi penutaijjai penuar, waaka yurumtainiam áepsamiayi. Írar kanutainiam pujustin ankant atsá asamtai túrawarmiayi.

Murikiun wáinnium nayaimpinmaya suntar Yus akatar akuptukmia nu

⁸ Tura Pirínnum tíjuich murikiun wáinin kashi murikrín wáiniuk pujuararmiayi.

⁹ Túmainiaí nayaimpinmaya suntar murikiun wáinin matsatainian wantintuukmiayi. Tura Yúsnumia tsáapnin ni matsatainiamunam etsantramiayi. Túrunamtai murikiun wáinniuka ti ashankarmiayi.

¹⁰ Túrasha nayaimpinmaya suntar tímiayi “Ashamprukairap. Ashí áentsnum ti warastin atí tusan ti péñker chichaman itiarjarme.

¹¹ Júiti: yamáí tsawantaj uunt Tawitia péprurin Pirinnum yaunchu Yus anaikiamu KRISTU tutai, uwemtikramprataj tusa akiinturmarme. Nu Uchisha ashí áentsun akupniúiti, tímiayi.

¹² Tura jujaj nekaattarme: uchi penutajijaj penuarma waaka yurumtainiam tepá wáinkiatarme. Nu wáinkiarum nekas júiti, tu nekaattarme.”

¹³ Nu chichamaik nayaimpinmaya suntar ti untsurj, nayaimpinmaya káunkarmiayi. Túrawar Yusa naarin shiir awajainiak juna tiarmiayi:

¹⁴ “Nayaimpinmasha Yus nankaamantuiti tu enentáimtusarti. Tura ju nunkanmasha Yusjaj nawamnaikiaru ainia nu imiatkinchanum pujusarti.” Tu tiarmiayi.

¹⁵ Tura Yusa suntarj nayaimpiniam wakеткиarmatai murikiun wáinin tiarmiayi “Wats, Pirinnum wárik wetái. Nu túrunamu Yus turamajnia nu iyumi” tiarmiayi.

¹⁶ Nuna tiar wárik wearmiayi. Tura Marincha Jusenchá wáinkiarumiayi. Tura uchinchá waaka yurumtainiam tepan wáinkiarumiayi.

¹⁷ Wear nuna wáinkiar, nayaimpinmaya suntar uchi túrunamurin timia nuna etserkarmiayi.

¹⁸ Tura murikiun wáinin tiarmia nuna antukaruka ti enentáimtusarmiayi.

¹⁹ Túrasha Marikia ashí túrunamia nuna ni enentáijijajnia enentáimtu pujumiayi.

²⁰ Nu murikiun wáiniika antukarmia nuna enentáimtusar, tura ísarmia nunasha enentáimtusar “Nayaimpinmaya suntar ujatnakmajnia tímatrusan túrunayi” tiarmiayi. Tuma ásar Yusa náarin shiir awajsar kantampruawar wakеткиarmiayi.

Uchin Jesusan Yusa Uunt Jeeñ itiarmiania nu

²¹ Tura uchi akiiniamu uchu tsawant jeamtai, ni túrutairin túrin ásar, ni shunichirj nuapen tsupirkarmiayi. Túrawar Marí ajapratsajin nayaimpinmaya suntar tímia nútiksán “Jesus” anaikarmiayi.

²² Tura Muisais akiiniatniunam akupkamia núnisan, tsawantrj jeamtai, Yusa Uunt Jeeñ Jerusarénnun uchin Yus iiktustai tusar júkarmiayi.

²³ Kame Yus-Papinium ju aarma awai:

“Ashí uchi iwiajri áishman akiinkiuñka Yusna átatui.”

²⁴ Tuma asamtai, Marí Yusa Uunt Jeeñ wáitsuk pujamu wayatniurj jeamtai, uchin Yus iistí tusa Yusa Uunt Jeeñ Jerusarénnun pujana nuñ itarmiayi. Tura yampitsan jimíaran wáinkiamiyi. Muisáis akupkamun umiiniak nuna túrawarmiayi.

²⁵ Nu túmaj Semeún naartin áishman Jerusarénnun pujumiayi. Semeúnsha Yusa Wakanj pujurma asa péñker áishmankauyayi. Yúsan nekas enentáimtinuiyayi. Yusa anaikiamurijijaj Israer-shuar ankant ajastin jeati tusa nákauyayi.

²⁶ “Winia anaikiamur KRISTU tutai wáintsuk jákashtatme” uunt Yusa Wakanj tu jintinti-amiai.

²⁷ Nú Semeún Yusa Wakani “wetá” tutai, Yusa Uunt Jeeñ wémiayi. Tura nú tsawantaj Muisáis tímia núnisan umirkatai tusar Marisha Jusesha uchin Jesusan Yusa Uunt Jeeñ itariarmiayi.

²⁸ Itiariarmatai Semeún uchin jusa miniakas Yúsan áujuk juna tímiayi:

²⁹ “Yamaikia, Uunta, Amjin wi jeatin ankant atí. Turutmiamna nu ímiatrusmek umikiume.

³⁰⁻³¹ Ju Uchi ashí aents uwemtikrartá tusam susamna nuna yamáí imia winia jiiurujaj wáinkiajai.

³² Israer-shuarcha ainia nu tsáapninium wekasarat tusa akuptukmaiti ju Uchi. Tura Israer-shuar Áminiuram ájinia nuna ashí aents shiir enentáimtikrartí tusam ju Uchi akuptukmaitji. Nuna wáinkian shiir enentáimsan jákatniuitjai.”

³³ Tura Semeún Uchinui tu chícharkui Jusesha Jesusa nukurísha ti enentáimprarmiayi.

³⁴ Semeúnsha chichaak “Yus shiir enentáimturmasartí” nin tímiayi. Nuyasha Marin chicharuk tímiayi “Nekaata. Ju Uchin Israer-shuartisha untsurj nakitrar iniarartatji. Tura chíchik Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarin ti paant iniakmastatui. Tuma ain untsurj Aun yajauch chichariartatui.

³⁵ Nujaj shuar ni enentáim warinia enentáimia nu, paant átatui. Maaj, ashí nu túmakui, ijiumua núnismek ame enentáimin ti wáitsattame, Mariya.” Tu chichasmiayi Semeún.

³⁶ Nuwasha Ana naartin nuñ Yusa Uunt Jeeñ pujumiayi. Niisha Yúsnan etserniuyayi. Ni aparísha Panuíruyayi tura Aser shuarauyayi nu nuwá. Niisha ti úntchiyayi. Niisha yama nuatnaikiamujaj siati uwi ni áishrijaj tsanin pujusarmiayi.

³⁷ Tura wajemamiayi. Tura uchenta kuartru uwi takakuyayi. Tura ninkia Yusa Uunt Jeeñi jintsuk káshisha tsawajisha tuke Yúsan áujniuyayi. Tura yurumsuk Yúsan áujniuyayi.

³⁸ Semeún tuasua amikmatai Anasha taa, Uchin wáiniak Yúsan yuminisamiayi. Tura Jerusarénnun Yus uwemtikrampratai tusa nákarmia nuna áujukñka uchin áujmat wémiayi.

Nasarénnun wakеткиarmiania nu

³⁹ Nuyá Yus tímia nuna ashí túrawar amikiar Kariréa nuñkanam, kame nii pujumia nú peprunam Nasarétnum Jusesha Marisha Uchisha waketkiarmiayi.

⁴⁰ Uchi Jesus tsakaki, kakaram ajaki tura nú nankaamas nekaki wémiayi. Tura Yus Nin ti shiir awajsamiayi.

Jesus Yusa Uunt Jeen túrunamuri

⁴¹ Jusesha, Jesusa nukurísha tuke uwitin paskua námper jeakui Jerusarénnunm weu áarmiayi.

⁴² Ni túrutairj túruiniak, Jerusarénnunm weak Jesusan tuse uwí jeamtai júkiarmiayi.

⁴³ Námper amuukamtai ni nukurísha Jusesha nékachmanum Jesuska Jerusarénnunm juákmiai.

⁴⁴ Marisha Jusesha “wí shuarjaj winiawai” tusa, núnaka eatsuk chikichík tsawant wekasarmiayi. Nuyá wáinkiataj tukamá, ni shuarjin tura ni nékamunam eakarsha,

⁴⁵ wáinkiacharmiai. Nuínkia Jerusarénnunm ataksha waketrukiarmiayi, eaktai tusar.

⁴⁶ Tura menaintiú tsawant eakar Yusa Uunt Jeen Yus akupkamun jintinnian anturak anintrú pujan wáinkiararmiayi.

⁴⁷ Tura nuj ashí Jesusan anturkarmiania nu, niisha ti nékakui tura áimtanash ti péñker áimkiui, ti enentáimturarmiayi.

⁴⁸ Ni aparísha nukurísha tumáa pujan wáinkiar, ti enentáimprarmiayi. Tura ni nukurj chichaak tímiai “Uchiru, ¿ausha urukamtai ititurchat enentáimtikurram? Ame apasha wisha urukayik tusar ti eakjame” tímiai.

⁴⁹ Tutai Jesus tímiai “¿Urukamtai eattrum? Winia Aparnan túratniuitjiana nuka nékatsrumek” tímiai.

⁵⁰ Tura timia núnaka penké nekaacharmiayi.

⁵¹ Nuyá Jesus niijjaj Nasarétnum waketkimiayi. Ninkia tuke umiriarmiayi. Ashí nu túrunamun Marikia tuke enentáimtu pujumiayi.

⁵² Jesuska tsakaki, tura nekaki wémiayi. Yussha tura aencha Nin shiir enentáimtiarmiayi.

3

Imiakratin Juanka etserkamuri

(Mateu 3.1-12; Márkus 1.1-8; Juan 1.19-28)

¹ Tipiriu uunt akupin pujamu kinse uwí jeamtai, Jutía nuñkanam Punseu Piratu akupin pujumiayi. Tura Kariréa nuñkanam Erutis akupin pujumiayi. Itiurea nuñkanmasha Trakuniti nuñkanmasha ni yachí Jiripi akupin pujumiayi. Tura Apirinia nuñkanam Risanias akupin pujumiayi.

² Tura nu uwitin Anassa Kaipiássa Israer-patri uuntri pujuarmiayi. Nu uwitin Sakaríasa uchirí Juan atsamunam pujan Yúsaiya chichaman antukmiayi.

³ Nuyá Jurtañ entsanam supichik matsamarma nuna Juan wekaatusar juna tímiai “Winia tunaarun Yus tsankurturat tusarum, enentai yapajjárum imiantiarum.” Tu ujakmiayi.

⁴ Nu ujakman Isayas yaunchu juna áarmiayi:

Atsamunam wekaana nu unsumun ántuiniawai. Nii unsumuk juna tawai: Atumí enentáj Uunta jintí iwiarturtarum; naka awajsatarum.

⁵ Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka juikmia arti. Tura pujutrin ainia nusha métekrak paka awajsamu arti.

⁶ Túrunamtai ashí nuñkanmaya aents Yúsaiya uwempratin aan nekaawartatui.

⁷ Untsurí aents imiatit tusar tariarmia nuna Juan chicharainiak tímiai “Napia áaniutirmincha, ti asutniátin jeatemáttana nuyá uwempratarum tusa ¿ya ujatmakuram? tímiai.

⁸ “Íikia Apraám weeaitji, tuma asakrin Yus shiir enentáimturmaji” tu enentáimtumasaipar. Antsu enentáim yapajjámuitikuiñkia péñker wekaamurmijjaj paant iniakmastarum. Warí, Yus wakerakka, ju kayan Apraáma shuarjin páchitsuk najankainti, tímiai.

⁹ Aneartarum. Numi ajaktinian kampuwárin jacha atuttsamuiti. Numi péñker nereatsna nuka ajakar jinium apeamu ártatui” tímiai.

¹⁰ Tutai aentska enentáimprar “¿Nuínkia ititurkatjik?” tiarmiayi.

¹¹ Tutai Juan tímiai “Jimiará pushin takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiai.

¹² Uunt akupniu kuítrin juu armia nú shuar imiantiaj tusar Juánkan weriar aniasarmiayi. “Uunta, ¿iisha warí ititurkatjik?” tiarmiayi.

¹³ Tutai Juan tímiai “Kuit uunt akupin tana nu iniankasrum achikiairap.”

¹⁴ Santarsha aniasarmiayi “Uunta, ¿iisha warí ititurkatjik?”

Juaṅsha tímiayi “Ame kakarmarmijjai chikichna jurukip. Tura nin tsanumpruraip. Tura uunt akupin akirmana nújain warasta” tímiayi.

¹⁵ “Ju Juaṅ Yusa anaikiamurinchuashit” tu enentáimsar paant nekaataitsar nákarimiayi.

¹⁶ Tumaj Juaṅ tímiayi “Wikia aya ayashmin entsanam imiajrumé. Tura wijjai nankaamas ana nu tátatui. Ni sapatrj jinikiamurinkisha atitrachminiatjaj. Niisha taa, imiantinia áanis tura jíiya áanis Yusa Wakanj enketramprattarme.

¹⁷ Shuar aruusan awajtia núnisan, nusha yajauch ana nuna ajapa aya pénkernak júuktatui. Neren ikiustatui tura yajauchinkia ji tuke kajinchatainiam apeattawai” tímiayi.

¹⁸ Juaṅ nu arant shiir chichaman áentsun ti núkap ujakarmiayi.

¹⁹ Tura nuýasha akupin Erutisan chicharkamiayi. Ni yachj Jiripi nuarj Jirutíasan kasarak nuatkui tura chikich yajauchincha túrakui chicharkamiayi.

²⁰ Tura Erutis núnaka ántutsuk chikich yajauchin túramiayi. Juánkan achik sepunam enkeamiayi.

Jesusa imianmiari

(Mateu 3.13-17; Márkus 1.9-11)

²¹ Nu túruntsain, Juaṅsha ashí nú nunkanmayá áentsun imiak pujurainaj Jesussha imianmiayi. Niisha Yusan áujuk pujaj nayaimpisha uranmiayi.

²² Tura Yusa Wakanj yámpits najanar paant tarurmiayi. Tura Yus nayaimpinmayá chicharuk “Ame winia aneamur Uchiruitme; Ámin ti wararjame” tímiayi.

Jesukristu shuari

(Mateu 1.1-17)

²³ Jesus trainta (30) uwí takaku asa ni takatrj nankamamiayi. “Jusé uchirinti” tiniu armiai. Jusésha Iriá uchiriyayi.

²⁴ Iriásha Matata uchiriyayi; Matat Riwi uchiriyayi; Riwi Mirkia uchiriyayi; Mirki Jana uchiriyayi. Jana Jusé uchiriyayi;

²⁵ Jusé Matatías uchiriyayi; Matatías Amusa uchiriyayi; Amus Najuma uchiriyayi; Najum Esri uchiriyayi; Esri Nakaia uchiriyayi;

²⁶ Nakai Maata uchiriyayi; Maat Matatías uchiriyayi; Matatías Semái uchiriyayi; Semái Jusé uchiriyayi; Jusé Jutá uchiriyayi;

²⁷ Jutá Juana uchiriyayi; Juana Resa uchiriyayi; Resa Surupapira uchiriyayi; Surupapir Saratiira uchiriyayi; Saratiir Nerí uchiriyayi;

²⁸ Neri Mirkí uchiriyayi; Mirkí Atí uchiriyayi; Atí Kusama uchiriyayi; Kusam Irmutama uchiriyayi; Irmutam Ira uchiriyayi;

²⁹ Ir Jusué uchiriyayi; Jusué Irieséra uchiriyayi; Iriesér Jurema uchiriyayi; Jurem Matata uchiriyayi;

³⁰ Matat Riwi uchiriyayi; Riwi Semeúnka uchiriyayi; Semeún Jutá uchiriyayi; Jutá Jusé uchiriyayi; Jusé Junaṅka uchiriyayi; Junaṅ Iriakímia uchiriyayi;

³¹ Iriakím Mirea uchiriyayi; Mirea Mainiánka uchiriyayi; Mainián Matata uchiriyayi; Matata Natanṅka uchiriyayi;

³² Natan Tawitia uchiriyayi; Tawit Isaí uchiriyayi; Isaí Upitia uchiriyayi; Upit Puusa uchiriyayi; Puus Saramúnka uchiriyayi; Saramún Naasunṅka uchiriyayi;

³³ Naasun Aminiatapa uchiriyayi; Aminiatap Arama uchiriyayi; Aram Esruma uchiriyayi; Esrum Paresa uchiriyayi; Páres Jutá uchiriyayi;

³⁴ Jutá Jakupa uchiriyayi; Jakup Isaka uchiriyayi; Isak Apráama uchiriyayi; Apráam Tarea uchiriyayi; Taré Nakura uchiriyayi;

³⁵ Nakur Seruka uchiriyayi; Seruk Rakaua uchiriyayi; Rakau Pirikia uchiriyayi; Pirik Epera uchiriyayi; Eper Sará uchiriyayi;

³⁶ Sara Kainiánka uchiriyayi; Kainián Arpaksata uchiriyayi; Arpaksat Sema uchiriyayi; Sem Nuaia uchiriyayi; Nuai Ramikia uchiriyayi;

³⁷ Ramik Matusariṅka uchiriyayi; Matusariṅ Enuka uchiriyayi; Enuk Jaritia uchiriyayi; Jarit Maarariira uchiriyayi; Maarariir Kainiánka uchiriyayi;

³⁸ Kainián Enusa uchiriyayi; Enus Seta uchiriyayi; Set Ataṅka uchiriyayi; tura Ataṅ Yus najanamuyayi.

4

Jesusa nekapsamuri

(Mateu 4.1-11; Márkus 1.12-13)

¹ Jesusa enentáin Yusa Wakanj pimiutkamiayi. Jesussha Jurtaṅ entsanmayá waketkimtai Yusa Wakanj aents atsamunam jukimiayi.

² Tura nujsa kuarenta tsawant pujusmiayi. Tura íwianch Nin tunaanum ajuaraintiajtai tusa pujurmiayi. Nu kuarenta tsawantin Jesus yurumtsuk pujá asa ti tsukammiayi.

³ Nuiŋkia íwianch chicharuk “Amesha nekas Yusa Uchiríntkiumka ju kaya apatuk nananata” tímiayi.

⁴ Tutai Jesus tímiayi “Yus-Papí tawai:

“Aya apatkujain shuar iwiaaku pujuschamniaiti. Antsu ashí Yus-Chicham tana nujai nekas iwiaaku pujusminiaiti,”

tawai” tímiayi.

⁵ Tura nuyá íwianch naint yakí wájakmanum jukí, ashí nuŋka ainia nuna ju chichamaik iniaktusmiayi.

⁶⁻⁷ Tura chicharuk tímiayi “Ashí ju nuŋka wáinmena nu wíniati. Tura wi wakerajna nú shuaran súsatniuitjai. Tuma asamtai tikishmatrurakminkia ju nuŋkanam ashí akupkatniun susattajme. Tura nuj ni warirí ainia nusha áminiu átatui” tímiayi.

⁸ Tutai Jesus tímiayi “Yus-Papí tawai:

“Aya Niŋki Yus ame Úntrum tikishmatram enentáimtustiniaitme.”

Tau asamtai, werumta, iwianchi” tímiayi.

⁹ Ataksha íwianch Jesusan Jerusarén péprunam jukimiayi. Tura Yusa Uunt Jee yakiini iwiak tímiayi:

¹⁰ “Yus-Papí tatsuk:

“Yuska ni suntarín wáinkiatá tusa akupturmaktatui.

¹¹ Kayanam ajintrain tusa wenkurumaktatui.”

Tuma asamtai nekas Yusa Uchiríntkiumka juyá akaikim iniaata” tímiayi.

¹² Tutai Jesus áimiuk tímiayi “Yus-Papí junasha tawai:

Yus ame Úntrum nekapsataj tiip.”

¹³ Tuma asamtai íwianch penké tujintiak ishichik tsawant Jesusan iniaisamiayi.

Kariréa nunkanam Jesus ni takarín nankamamiania nu

(Mateu 4.12-17; Márkus 1.14-15)

¹⁴ Jesus ni enentáin Yusa Wakaní kakarmarj pimiutkamu ajas Kariréa nuŋkanam waketkimiayi. Nu nuŋkanam nankaamantu túramurín áujmatiarimiayi.

¹⁵ Nu nuŋkanam ashí péprunam Israer-shuar iruntai jeá armia nu unuiniarmiayi. Tura anturkarmia nuka ni náarín shiir awajsarmiayi.

Jesus Nasarétnum pujumiania nu

(Mateu 13.53-58; Márkus 6.1-6)

¹⁶ Ni tsakarmarjin Nasarétnum Jesus wémiayi. Tura Israer-shuar ayampratin tsawantin iruntai jeanam wayamiayi, tuke turin asa. Tura wayá Yus-Papin áujsataj tusa wajakmiayi.

¹⁷ Nuŋkia Yúsnan etserin Isayasa áarmarín súsarimiayi. Nuna urak, nuj juna áarman wáinkiamiayi:

¹⁸ Yusa Wakaní winí pujurtawai. Shuar warainiachun shiir chichaman ujaktinian anaitiukuiti. Kúntuts enentáimiar wake mesek pujuinian tsuártinian akuptukuiti. Tura jji kusuruncha ímtiktinian, tura yajauch awajsamu ainia nuna péŋker awajsatniuncha,

¹⁹ tura Uunt Yus, shuáran yaiŋtin tsawantri jeán etserkatniuncha akuptukuiti.

²⁰ Nu áarman aujsua amik papin nukukmiayi. Tura iruntai jeanam yáimin pujan susa iniais Niŋkia etserkataj tusa pujusmiayi. Tura ashí shuar pujuarmia nu émamkes ii pujuarmiayi.

²¹ Jesussha chicharuk tímiayi “Yus-Chicham yamá antukurmena nu yamá tsawantin túrunayi.”

²² Jesusan ashí péŋker áujmatiarimiayi. Tura Jesus ti shiir chichaakui ti enentáimprar “Juka Jusé uchirínchukait” tiarmiayi.

²³ Tu enentáimiaiiniakui, Jesus chicharuk “Atumsha shuar tuke tuinia núnisrumek, “tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnisemek jujsa túrata tusarum nu turuttiatrume.

²⁴ Túrasha nekas tájarme, Yúsnan etserniun ni nunkenkia nii tana nuna anturainiatsui.

²⁵ Nuyasha tájarme, Irías pujumia nú tsawantin, menaintiú uwí nankaamas yumi yutukcha asamtai ashí Israer nuŋkanam ti tsuka amia nuj ti untsurí waje irunmiayi.

²⁶ Tuma ain nu wajen yaiŋti tusa Yus Iríasan akuptukchamiayi. Antsu chíkich nunkanmaya wajen Sarepta péprunam pujumia nuna yaiŋti tusa akuptukmiayi. Sarepta pepru Sitiún péprunam tíjiuch pujawai.

²⁷ Núnisar ii nuŋksha Iriséu pujumia nu tsawantin ti untsurí tunamaru iruniarmiayi. Tura núnaka tsuácharmia. Antsu chíkich nuŋka, Sírianmaya Naaman kan tsuármia” tímiayi Jesus.

²⁸ Israer-shuarsha iruntai jeen pujuarmia nu, nuna antukar ti kajerkarmiayi.

²⁹ Tura wajatkjar Jesusan jiiki péprunmaya akupkarmiayi. Tura pepru amia nuñ naint yakí nánkatkamunam, nuyá akaki ajuatai tusar júkiarmiayi.

³⁰ Túrasha Jesuska irunar matsatainiamunman etempraktak jiinki wémiayi.

Iwianchrुकun Jesus tsuármiania nu

(Márkus 1.21-28)

³¹ Nuyá Jesus Kariréa nunkanam Kapernáum pepru amia nuñ wémiayi. Tura Israer-shuara ayampratin tsawantriin tuke etserki wémiayi.

³² Yusa kakarmarin takaku asa nujaj etserkamiayi. Tuma asamtai “Yusa kakarmarijjaj unuitiamtsujik” tiar ti enentáimprarmiayi.

³³ Chíkich tsawantaj áishman iwianchrुku Israer-shuar iruntai jeanam pujumia nu untsumuk tímiayi.

³⁴ “Inikiartusta. Iikia Áminkia pachistin nakitiaji. ¿Warí, incha amukratkataj tusam táchamek? Wikia nékajme. Ámeke ti penker Tunaarincha núitme” tímiayi.

³⁵ Tutai Jesus iwianchin kakantar chicharuk “Takamatsata. Ju áishman ikiuktia” tímiayi.

Tutai nu chichamaik iwianch áishmannumia jiinki weak nunká ajuant ikiukmiayi. Túrasha nekas yajauch awajtsuk ikiukmiayi.

³⁶ Ashí pujuarmiania nu ti enentáimiar mai tunai ajarmiayi. “¿Jusha warí chichamait? Ju áishman Yusa kakarmarijjaj iwianchin jiiki awematsuk” tiarmiayi.

³⁷ Tura ashí nú nunkanam Jesusa túramurin áujmatarmiayi.

Semuñ Pitru tsatsarín Jesus tsuármiania nu

(Mateu 8.14-15; Márkus 1.29-31)

³⁸ Jesussha Israer-shuara iruntai jeenia jiinki Semunka jeen wémiayi. Semunka tsatsari tsuer ti jáamiayi. Ti jaakui Jesusan “tsuárturtá” tiarmiayi.

³⁹ Jesussha jaa tepan tsuntsumprua tsemun “michatrata” tímiayi. Tutai nú chichamaik nuwasha michatramiayi. Nú chichamaik nantaki nincha ayurawarmiayi.

Untsurí jaan Jesus tsuármiania nu

(Mateu 8.16-17; Márkus 1.32-34)

⁴⁰ Etsa akaikin aj ni shuarí nánkamas sunkurjaj jaarmia nuna Jesusan ikiaatkarmiayi. Jesussha jáinian chíkichkiniak chíkichkiniak uwejejjaj antinjar tsuármiai.

⁴¹ Ti untsurí iwianchrुku armia nunasha iwianchrin jirkiarmiayi. Jíinkiar íwianchkia untsumainiak “Ámeke Yusa Uchirínme” Jesusan tiarmiayi. Tura niisha “Jesuska Yusa anaikiamurinti” tu nékainiakui Jesus kakantar chicharak itiatmamtikiarmiayi.

Kariréa nunkanam Jesus etserkamaiania nu

(Márkus 1.35-39)

⁴² Kashin káshik tsawaak Jesus péprunmaya jiinki atsamunam Niniki wémiayi. Tura shuarsha eakiar ni pujamunam jearmiayi. Tura iijjaj tuke pujusat tusar emetataitsar wakermiayi.

⁴³ Túmain Jesus tímiayi “Yus ii enentáin akupkatajtsa wakera nú shiir chichaman chíkich péprunam matsatainia nunasha ujakúniaitjai. Nu túrata tusa akupkamuitjai” tímiayi.

⁴⁴ Tuma asamtai Kariréa nunkanam Israer-shuar iruntai jeenam Jesus tuke etserki wémiayi.

5

Namakan ti untsurín achikiarmiania nu

(Mateu 4.18-22; Márkus 1.16-20)

¹ Chíkich tsawantaj Jesus Jinisarit antumianka tutainium káanmatkarí pujaj ti untsurí shuar, Yusa chichamen antuktai tusar wakeruiniak Jesusaj káunkarmiayi. Antuktai tusar wakeruiniak kaé ajattsarmiayi.

² Tura jimiará kanun antumiankan káanmatkaríin tepan wáinkarmiayi. Ni nérenniurinkia jínkiar ni nekarin nijá pujuinia asamtai kánuka ankant ármiai.

³ Tuma asamtai Jesus Semunka kanurín enkempramiayi. Tura Semunkan chicharuk “Ishichik ajapén juruktia” tímiayi. Nuínkia kanunam enkemas áentsun káanmatkanam pujuinian unuiniamiayi.

⁴ Unuiniasua amik Semunkan chicharuk “Kanu kunanam jukim neka aj ajunkatarum” tímiayi.

⁵ Tutai Semun tímiayi “Túrasha, Uuntá, káshisha tuke aju-junkuar tsawarji. Túrasha penké achikchaji. Kame áankisha Ame támajaj ajunkatjai” tímiayi.

⁶ Tura ajunkar namakan ti untsurín achikiarmiayi. Túram nekasha jaanaki wémiayi.

7 Tuma asamtai ni írutkamurjín chíkich kanunam pujuinian uwejéjaj “winitia, yáintkiamniumam” tusar untukarmiayi. Niisha táarmiayi. Túrawar jimiará kanunam métej awajsarmiayi. Tura kanusha inít wayastatuk ajamiayi.

8 Nuna túramtai Semuñ Pítíur Jesusan tikishmatar tímiayi “Uuntá, wikia ti tunaitjai. ¿Wíjjaishá itíurak pujútam?”

9 Semuñsha ni írutkamuríjjaj namakan timiá untsurjín wáinkiar ashamkarmiayi. Tuma asa Semuñsha núní tímiayi.

10 Tura Sepetéu uchrj Jakupusha Juañsha Semuñjaj pujuarmia nusha ashamkarmiayi. Tura Jesus Semuñkan tímiayi “Ashamkaip. Yamaikia namaka-achinia áintsamek aents-egu ajastatme.”

11 Nuyasha kanurjín kukar júkiar, ashí takakmarjíncha ikiukiar Jesusan nemarki wearmiayi.

Tunamaru áishmanjan Jesus tsuármiania nu
(Mateu 8.1-4; Márkus 1.40-45)

12 Ukunam Jesus chíkich péprunam pujaj tunamaru áishman taa Jesusan wáiniak tikishmatar nunká shushuma pankái Jesusan tímiayi “Uuntá, wakerutakmeká páchitsuk tsuármniaitme.”

13 Nuna tutai Jesus antjín tímiayi “Wakerajai. Tsuaajme.” Tura nú chichamaik tunamarusha péñker ajasmiai.

14 Túrasha Jesus chicharuk “Ámeká nu etserkaip, tímiayi. Antsu Israer-shuar Patrij werim ame péñker ajasmanum Muisáis akupkamia núnismek susata. Nujaj ashí shuar ame péñker ajasmarmín nekaawartatui” tímiayi.

15 Tura Jesusa túramurj í etsernamiai. Túmakui untsurj aents anturkataj tusar káutkarmiayi. Tura ni sunkurjíncha tsuámartaj tusar káutiarmiayi.

16 Núnisañ Jesuska aents atsuiniamunam we ni Aparjín áujmiayi.

Emearun Jesus tsuármiania nu
(Mateu 9.1-8; Márkus 2.1-12)

17 Chíkich tsawantaj Jesus uniniak pujaj Pariséu aents tura Israer-shuara jintinniurjsha Kariréa péprunmayasha, Jutía péprunmayasha tura Jerusarénnumiasha káunkarmia nu antúu pujuarmiayi. Jaa tsuártinian Yusa kakarmarjín takakuyayi Jesus.

18 Nuiñkia emearun tampunprua kuaru shuar itíariarmiayi. Jesus pujamunam inít awayattsar wakeriarmiayi.

19 Tura shuar ti untsurj piaku asamtai wayamnia atsumiai. Túmaitkui yakiinj wear jeñ urarak, aents kaé ajas matsatmanum Jesus pujamunam emearun tampunam nená itíararmiayi.

20 Nin itíarmiania nu, Jesus Yusa kakarmarjín takakui, tú enentáimtamun Jesus nekáa emearun tímiayi “Ame tunaarum tsanukuramuitme.”

21 Nuiñkia Israer-shuara jintinniurjsha, Pariséusha ni enentáin enentáimsar “¿Jusha yait Yusa náarjín yajauch awajtin? Warí, aya Yúsak tunaan tsanukurachminkiait” tu enentáimsarmiayi.

22 Tura Jesus ni enentáimsamurjín nekáa tímiayi “¿Urukamtai tú enentáimprarum átum?”

23 Nuiñkia ¿warí imiá yúpichuchit, tsuártiniak, ni tunaarj tsanukuratniuk?”

24 Wats, Aents Ajasu tutai Wisha tunaan tsanukuratniun Yusa kakarmarjín takakjai. Jujaj nekaatarum tusan wats itíurchat tárumna nuna túrattajai.” Nuyá emearun chicharuk tímiayi “Amesha wajakim, tampuram achikiam ame jeemjín wetá.”

25 Nú chichamaik emearu niisha íimiainiamunman tampurjín achik wajakí ni jeñ Yúsan wararki wémiayi.

26 Túmakui ashí shuar ti enentáimprar Yusa náarjín shiir awajsarmiayi. Tura ashamainiak “aentsti tujinkiamu yamá wáinkiaji” tiarmiayi.

Riwín Jesus untsukmiania nu
(Mateu 9.9-13; Márkus 2.13-17)

27 Ukunam Jesus wekas akupniú kuítrjín-juu, naarj Riwi, ni chíkich naarj Mateu, akupin akitiaí jeñam pujan wáinkiamiayi. Wáiniak “nemartusta” tímiayi.

28 Tutai Riwi wajakí takakmarjínkia ikiuak Jesusan nemarsamiayi.

29 Nuyá ukunam Riwi namperan Jesusan najatamiayi. Tura untsurj akupniú kuítrjín-juu tura chíkich shuarsha káunkar misanam pujuarmiayi.

30 Tura Pariséusha Israer-shuara jintinniurjsha Jesusan tsanumpruiniak Jesusa unuiniamurjín tiarmiayi “¿Maaj, urukamtai átumsha akupniú kuítrjín-juu ainia nújjajsha tura chíkich yajauch shuarjajsha iruntrarum yurumprum?”

³¹ Tutai Jesus áimkiamiayi “Shuar jaachu péñker ainiana nu çtsuákratniun atsumainiawak? Antsu jaa ainia nu tsuákratniun atsumainiawai.

³² “Wikia péñkeraitjai” tuinia nuna untsuktajtsan táchaitjai. Antsu yajauch shuar ni enentáin yapajjá Winia ajasat tusan untsuajai” tímiayi.

*Yurumtsuk Yús áújsatniun Jesusan aniasarmiania nu
(Mateu 9.14-17; Márkus 2.18-22)*

³³ Nuyá Jesusan aniák tiarmiayi “Juanka unuiniamurísha, Pariséu unuiniamurísha yurumtsuk Yúsán áújainiatsuk. Tura ame unuiniamurmeke çurukamtai ijiarma Yúsán áújainiatsu?” tiarmiayi.

³⁴ Tutai Jesus tímiayi “Nuatma nampernum, çipiaamu ainia nu ijiarmamniakait, yamáinuatu pujai?”

³⁵ Atsá. Wats Wisha ukunam junaktiatjai; nuinçkia ijiarmatin átatui” tímiayi.

³⁶ Tura junasha nujai méték-taku unuiniamiayi: “çYamaram pushí tsupikiar nujai arut pushiniam anujtukminkiait? Nu túramka yamaram pushí yajauch ajasaintúu; túrasha shiir anujkam arut pushijjai mai metek yamaram wáinkiachminiaiti.

³⁷ Núnisan nijiamanch yamá nawamu nuap najanamu arutnum yaraachminiaiti. Túramka nijiamanch kariák ijiakratniuiti; túmak nijiamchisha nuap najanamusha mai metek mençkainiawai.

³⁸ Tuma asamtai nijiamanch yamá nawamu yamaram nuap najanamunam yaraatniuiti. Nu túramka mai metek péñker átiniaiti.

³⁹ Yaunchu nawamu úmana nuka yamarman nakitrattui. “Yaunchu nawamu imiá pençkeraiti” tíartatui” tímiayi Jesus.

6

*Ayampratin tsawantaj trikiu neren achikiarmiania nu
(Mateu 12.1-8; Márkus 2.23-28)*

¹ Ayampratin tsawantaj Jesussha unuiniamuríjjai araamunam wekasar, unuiniamurísha trikiu neren majurkutat wekainiarmiayi; tura tishisar neren yuawarmiayi.

² Nuna túruiniakui Pariséu tiarmiayi “Maaj, atumsha ayampratin tsawantaj takaschatniua nuç, çurukamtai takaarum?”

³ Takui Jesus ayak tímiayi “Yaunchu uunt akupin Tawitsha tura nemarniusha tsukamainiak túrawarmia nu ántichukaitrum.

⁴ Tawit Yusa Jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantancha aya Israer-shuara Pátriri yúatin ármiai. Tuma aiñ Tawitsha yajauchin túrutsuk achikmiayi, tímiayi.

⁵ Wisha Aents Ajasuitkiun ayampratin tsawantan Nérenniurintjai” tímiayi Jesus.

*Shuara uweje jakaan Jesus tsuármiania nu
(Mateu 12.9-14; Márkus 3.1-6)*

⁶ Chíkich ayampratin tsawantaj Israer-shuar iruntai jeanam Jesus wayá unuiniartasa nançkamamiayi. Nuç shuar uweje untsuurja nu jakaa pujumiayi.

⁷ Tura Israer-shuara jintinniurísha, Pariséusha Jesusan “yajauch túrayi” titiai tusar wakeruiniak, “ju ayampratin tsawantaj nu shuuran tsuartimpiash” tusar ii pujuarmiayi.

⁸ Túrasha Jesuska ni enentáimmarin nekariarmiayi. Túmayat uweje jakaan chicharuk “Juç ajapén wajasta” tímiayi. Tutai áishman ajapén wajasmiai.

⁹ Nuinçkia iruniarmiania nuna Jesus tímiayi “Enentáimpratarum. Ayampratin tsawantaj yajauch túratin, péñker túratniujai çtuá péñkerait? çUwemtikratin, máatniujajsha tuá péñkerait?” tímiayi.

¹⁰ Nuyá téntakarmia nuna iis áishmançkan tímiayi “Uwejem takuitia.” Áishmançsha uwejen takuimtai nú chichamaik péñker ajasmiai.

¹¹ Tura chíkichkia ti kajerarmiai. Túrawar “Jesus warí iturkamniakit” tusar aniniaisarmiai.

*Tuse unuiniamun Jesus anaikiarmiania nu
(Mateu 10.1-4; Márkus 3.13-19)*

¹² Nuyá Jesus Yúsán áújsataj tusa náinnium wakamiayi. Tura nu kashi Yúsán au-aujkuwa tsawarmiayi.

¹³ Tsawarmatai unuiniamurin ikiankar tuse anaikiamiayi. “Winia akatramuruitume” tímiayi.

¹⁴ Ju ármiai: Emka, Semun chíkich naarj Pítur apujtusmia nu; tura nuyá ni yachj Antres, Jakupusha, Juançsha, Jiripisha, Parturumísha,

¹⁵ Mateusha, Tumassha, Arpeu uchirj Jakupusha, Ásump Semunçsha,

¹⁶ Jakupu yachj Jútassha, tura Jútas Iskariúti Jesusan ukunam surukmia nu. Nu tuse achikma ármiayi.

*Untsurj shuaran Jesus yáinkiarmania nu
(Mateu 4.23-25)*

¹⁷ Niijjaj Jesus náinniumiá pakanam taawarmiayi. Nuñ pujusarmiayi. Nuñsha untsurj unuiniamurjsha, tura Jutía nunñkanmaya, tura Jerusaréñnumiá tura nayaantsanam ayamach Tiru, tura Setuñ péprunmaya ti untsurj aents antuktaitsar pujuarmiayi. Jesus tsuarati tusar káunkarmiayi.

¹⁸ Iwianchrukusha tsuámararmiayi.

¹⁹ Jesus tsuártinian tujinkiachu asamtai ashi shuar antíntaj tusar wakeriarmiayi.

*Náinnium Jesus etserkamu
(Mateu 5.1-12)*

²⁰ Ni unuiniamurjñ Jesus iis juna tímiayi: ““Yusan atsumajai” tárumna nu, Yus akupeamunam páchitkiaitrum; tuma asamtai warasminiaitrum.”

²¹ ‘Yamáí tsukamarmena nu ukunam ejemartatrum. Tuma asamtai warasminiaitrum. Yamái útrumna nu, ukunmañka wishirtatrum. Tuma asamtai warasminiaitrum.’

²² ‘Atumin nakitramprarmatai, ajapramawarmataisha, tura Winia Aents Ajasu tutaiya núshuar ajasuíti tusar tsanumprutmak katsekkramkarmataisha warasminiaitrum.’

²³ ‘Túramtai nayaimpiniam ti shiir ana nu núkap sunastin átatu ti enentáimsarum ti warastarum. Warí, ju shuara uuntri yaunchu Yúsna etserniun nútiksarañ yajauch awajsharmakia.’

²⁴ ‘Tura kuítrinnitiram atumsha atumí waratairi aya yamaik waintrume. Ukunmañka waraschattarme.’

²⁵ ‘Atsumatsjai, tu enentáimprumna nu, ukunmañka atsumattarme. Nuñkia waraschattarme. Yamái wishíarmena nu, ukunmañka wáitiakrum úttiatrum. Nuñkia waraschattarme.’

²⁶ ‘Ashí aents atumin shiir awajtamkurmin aneartarum. Nuñjaj waraschatniuitrum. Warí nuna uuntri ántar-yusna etserjñ armia nuna nútiksarañ yaunchu shiir awajarmiayi.’

*Ii nemasri aneatniun Jesus unuiniamiayi
(Mateu 5.38-48; 7.12)*

²⁷ ‘Winia anturtarmena nuna juna tájarme: Ame nemasrum aneata, nakitramainia nusha shiir awajshata;

²⁸ yajauch chichartamainia nusha shiir enentáimtusarta; katsekramainia nusha Yus áujtusarta.

²⁹ Ame yapimin ijiutmamtai áatú yapirujsha ijiuti tusam iniaktusta; ame pushirmin jurutramkitiaj tuñiaikuisha sákurmencha jukiti tusam iniáisata.

³⁰ Seatmana nu susata, tura áminium jurutramainiaikuisha ataksha awanturkitia tiip.

³¹ Chíkich winia túrutati tusam wakeramna nútiksamek chikichcha túrata.’

³² ‘Iista, aya atumin anenmainia nuke aneakmesha, ¿nusha warí péñkera túrarum? Yajauch shuarsha nuna túrin áiniawai.

³³ Tura atumniasha péñker awajtamainia nuke péñker awajkurmesha ¿nusha warí péñkera túrarum? Yajauch shuarsha nuna túrin áiniawai.

³⁴ Awanturkimmiaiti tu enentáimtarum nuke ikiakrumsha ¿nusha warí péñkera túrarum? Yajauch shuar nuamtak yajauch shuarjaj awanturkimmiaiti tu enentáimsar ikianainiawai.

³⁵ Tura atumsha nemasrum aneatniuitrum, tura péñker túratniuitrum, tura awanturkittiwai tu enentáimtsuk ikiastiniaitrum. Túrakrumñkia Uunt Yus péñker akirmattatrum; tura ni uchiríntjai tu iniakmattatrum. Yuska, “yumiñsajme” ticha nunasha tura yajauch shuarnasha shiir awajeawai.

³⁶ Ii Aparj waitnentrannia nútiksarmek atumsha waitnentratarum.’

*Chikicha túramurj ti enentáimtusairap
(Mateu 7.1-5)*

³⁷ ‘Chíkicha túramurj ti enentáimtusairap. Núnisañ Yuska atumí tunaarjñ iirtamsashtatui. Chíkicha tunaarjñ “nuke asutniatniúiti” tiirap. Núnisañ Yus atumin sumamtikramashtatrum. Tsañkurnairatarum. Núnisañ Yus tsañkurtamp Prattawai.

³⁸ Chíkichcha susata. Núnisañ Yus atumin suramsattarme. Niisha péñker nekapma, tura núkap ati tusa teeka awajas tura patas núkap enkea emetsaj amastatui. Atum chíkich túrarmena nútiksañ atumniasha túrutattarme.”

³⁹ Tura nuyasha juna métek-taku chichaman ujakarmiayi: “Jij kusurusha ¿itiurak chíkich kusuruncha jukimniai. Mai metek wañnam iniaashtatuak?

⁴⁰ Unuiniamua nu unuiniana nuna nan̄kaamas áchatniuiti. Túrashá niisha ti unuimiatar unuiniana nujaj̄ métek nekaamniaiti.'

⁴¹ '¿Itiurtsuk atumi j̄iin numi en̄ketna auk ítskesha atum̄í yach̄í j̄iin tsuat en̄ketusha iiyarum?

⁴² Ame j̄iim̄iin numi tuke en̄ketaisha ¿itiurtsuk ame yatsumi j̄iyyā tsuátan jurustajme tame? ¡Ántraiurme! Emka ame j̄iim̄iin numi en̄ketna nu jusata. Nuin̄kia paant wáinkiatame yatsumi j̄iin tsuat en̄ketna nu jurustin.'

Nerejai numi nekaatainti
(Mateu 7.17-20; 12.34-35)

⁴³ Pénker numi yajauchin nereatsui; tura yajauch numi péñkeran nereatsui.

⁴⁴ Numisha ni neren nékanui. Tsachikniumiasha kushin̄kiap júukchamniaiti. Tura naranmaya shuinia júukchamniaiti.

⁴⁵ Núnisan̄ péñker shuar ni enentáj péñker asamtai péñkeran chichaawai; tura yajauch shuar, enentáj yajauch asamtai yajauchin chichaawai. Páantchakait. Enentáin pimiutkamua ana nuyan̄ ni wenejaj̄ chichaawai.'

Jimiará jea ukurtin
(Mateu 7.24-27)

⁴⁶ 'Wi tájana nu túrachiatrumsha ¿urukamtai Winia, Uunta, túrutrum?

⁴⁷ Shuar winia chichamprun ántuinia nu jea jeammajaj̄ méteketete. Winia anturtuk umiana nu jujaj̄ méteketete:

⁴⁸ Shuar jean̄ jeamuk emka inít taur kayanam ukurmai. Tura yumi ti yutuk, entsa nujan̄krua tukummaiat pukukachmai kayanam ukuamu asa.

⁴⁹ Antsu Winia anturtukiát umiatsna nuka jujaj̄ méteketete: Shuar jean̄ jeamuk aya naikminiam jeammai. Tura entsa nujan̄krua tukumpram nu jeaka pukukamai. Tura mash sántramai." Tu unuiniamiyi Jesús.

7

Suntara yáin̄trin̄ Jesús tsuármiania nu
(Mateu 8.5-13)

¹ Jesús áentsun unuiniasua amik Kapernáum péprunam wémiayi.

² Nū Rúmanmayā suntara kapitíán̄trī pujumiayi. Nu kapitíán̄i takarniur̄i, ti aneamur̄i, jakamnia jaamiayi.

³ Tura Jesusan pachis áujmatainian antuk, ame shuarum Jesusan ititarti tura winia takarniun tsuárturti tusa Israer-shuara úun̄trin̄ akupkamiayi.

⁴ Niisha Jesusan weriar, umirtukat tusa ti seainiak tiarmiayi "Ju kapitíán̄ nekas yáin̄tin̄ péñkeraiti.

⁵ Niisha yajayā apachitiat in shiir enentáimturmají. Tura iruntai jean̄ jeamtinniasha nin̄ki chicharkaiti, tura yayawai."

⁶ Nuyá Jesús niij̄aj̄ wémiayi. Tura ni jean̄ jeastatuk jatemsamtai kapitíán̄cha ni amik̄rin̄ akatar jū titiarum tusa Jesusan akuptukarmiayi. Niisha Jesusan chicharuk junā tiarmiayi "Uuntá, ántram wayat̄aj tu enentáimsaip. Ame ti nan̄kaamaku asam winia jeaur̄i wayachminiaitme.

⁷ Tuma asakmin imia wiki Am̄ijn̄ jeatniun arantukjame. Ayatik "pénker ajastí" tákumin winia takarniusha péñker ajatrustatui.

⁸ Wi nékajai. Winia úuntur winia akuptuiniawai. Tura wisha suntaran akupenajai. Nunasha wi "wetá" takui wéawai. Tura chikichnasha "winitíá" tutai winiawai. Tura winia takartinian "jū túratá" tutai umíawai." Tu tímiayi.

⁹ Jesús nuna antuk ti enentáimias ni nemarainian tímiayi "Nekas tájarme Israer-shuar Yúsán tímiatrus enentáimtinian wáinchaitjai."

¹⁰ Tura kapitian̄i akatramur̄j jeá waketkiar, takarniur̄j péñker ajasun wáinkiararmiayi.

Wajé uchir̄in̄ Jesús iniantkímanian nu

¹¹ Nuyá ukunam chikich pepuru Naín tutainium ni unuiniamur̄jjaj̄ tura chikich untsur̄j aentsjaj̄ Jesús wémiayi.

¹² Tura péprunam nuntumas jakaan iwíarsatai tusar jūnian wáinkiamiayi. Jakáa nukur̄j wájeyayi, tura uchir̄i jakamia núchikiiyayi. Tura ti untsur̄j nu pepunmayā nin nemsarmiayi.

¹³ Jesús nu wajen wáiniak tura waitnentar "úutip" tímiayi.

¹⁴ Nuin̄kia Jesús jakaan en̄kerman tarunt antiñmiayi; nuna jūniasha wajasarmiayi. Nuin̄kia Jesús jakaan chicharuk "Umpa nantaktia, tájame" tímiayi.

¹⁵ Tutai niisha nantaki pujus chichaamiayi. Tura Jesús ni nukur̄in̄ "Juj̄ú uchiram" tímiayi.

¹⁶ Tura matsamiarmia nu, nuna wáinkiar ashamkarmiayi. Tura Yusa náarin shiir awajsarmiayi. Tura chichainiak, “Yúsnan etserniuchukait Niisha. Ataksha Yúsnan etserin uunt ana nu tarutramji” tiarmiayi. Tura “Israer-shuarti Niiniu ájinia nuna yáinmaktai tusa Yus tarutramji” tiarmiayi.

¹⁷ Tura ashí *Jutía nunñanmayasha* tura ni írutkamu nunñka ármia nuyasha Jesus túramia nuna nekaawarmiayi.

Imiakratin Juan sepunam pujak ni amikrín akatar Jesusan akuptukarmiania nu (Mateu 11.2-19)

¹⁸ Juan ni írutkamurí ujakam Jesus túramun nekaamiayi. Nekáa ni írutkamurín jímiarun untsukmiayi.

¹⁹ Tura Jesusaj akupkarmiayi. “Atumsha Jesus aniastarum. ¿Amesha nekas Kristu Yus akupkamu tátinia nukaitiam. Kame chikichak nákastataj? titiarum. Nu nekáa ikiuutarum’ tímiayi.

²⁰ Tutai niisha Jesusan werí jeariar tiarmiayi “Incha imiakratin Juan akatar akup-tamkaji. ¿Amesha nekas tátinia nukaitiam. Chikichak nákastataj? Nu nekaatai tusar wakeraji” tiarmiayi.

²¹ Wats, nii jeawarmia nuí Jesus untsurí jaan tsuártasa pujurmiayi. Iwianchrunkuncha iwianchrín jíirki akupkatasa pujurmiayi. Tura kusuruncha íimtikmiayi.

²² Tuma asa Jesus akatramun júna tímiayi: “Waketkirum ashí átum antukurmena nusha, wáinkiarumna nusha ujaktarum. Kusurusha wáinmainiawai; shutuap áinia nu péñker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinchunmsha uwempratin chicham ujakmaiti. Juan nu ujaktarum.

²³ Yawetsuk Winia tuke shiir enentáimturna nú shuar shiir átatui” tímiayi Jesus.

²⁴ Waketkiarmatai Jesus Juánkan pachis ájumatman antuk shuar matsamarmia nuí júna tímiayi: “Shuar atsamunmasha ¿warí werimiarum. Pintiu nase umpúam atúu we júni we ajana nu íistai tusarmek wémarum? Juan núnischaiti.

²⁵ Nuikia ¿warí werimiarum. Shuar péñker iwiarmampra íistai tusarmek wémarum? Warí, péñker iwiarmampraka uunt akupniú jeen pujuiniatsuk.

²⁶ Nuñkia ¿warí werimiarum. Yúsnan etserniuk werimiarum? Maa, nú nanñkaamas wáinkiarne.

²⁷ Yaunchu Yus-Chichamnum ju áarmaiti:

“Winia akatramurun amjini emka akupeajai ame jintimin iwiarat tusan.”

Juan nu akatramuiti.

²⁸ Nekasan tájarme, Yúsnan etserin imiakratin Juanjai nanñkaamas uunt atsuwiti. Túmaitiat Yus akupeamunam páchinia nu shuarka nekas imianchaitiat, Juanjai nanñkaamas átatui” tímiayi.

²⁹ Penké shuarsha, kuítian-juusha, Juan imiaimujai imianiarmia nu, Jesus timian antukar Yusa náarin shiir awajsarmiayi.

³⁰ Túrasha Paríséusha Israer-shuara jintinniurjsha Yus yáintaj támaitiat Juan imiaamujai imiancha ásar nakitrarmiayi.

³¹ Nuñkia Uunt Jesus tímiayi “Yamaiya áentstiram, warijjain métek árum nuna paant títiatjarme.

³² Uchijjai métek árume. Ni ajjjai iruntrar nakurustaj tukamá tuíniawai “Námpera áinis nakurustaitsar peem umpuarji, túrasha jantsemáchurme. Nuyá iwíarsatniua áinis nakurustaitsar íwiareakur kantamtaí kantamáaji, túrasha átum úutcharme.” Tu tuíniawai.

³³ Atumsha núnisaitrume. Kame Juan núkap yurumsuk úmutsuk wekaimiayi. Túmakui átumka “iwianchrukuíti” tímiarme.

³⁴ Nuyá Wisha Aents Ajasan támajai. Tura yurumá úmakuisha “ti yurumin tura ti nampe-naiti; kame ashí yajauch shuuran tura kuítian-juu amikrinti” túrutrume.

³⁵ Wats, nekas neka áinia nu, Yusa nekatairín iníakmainiawai.” Tu tímiayi.

Pariséu Semuñ náartin Jesusan ni jeen ipiaamiania nu

³⁶ “Winí yurumátia” tusa Paríséu Jesusan ipiaamiayi. Tutai Jesus ni jeen werí misanam pujusmiayi.

³⁷ Nuñkia nu péprunmaya yajauch nuwa, Jesus Paríséu jeen yurumáttsa weyi táman antuk, kayá mutinium kunkuin asuiti áimkiamun takukí jearmiayi.

³⁸ Tura úutki Jesusa nawen pujuras neajkijjai nijjarmiayi. Tura intiashijjai japirmiayi; nuyá nawenan mukuta kunkuinian ni nawen ukatramiayi.

³⁹ Paríséu Jesusan ipiaamia nu, nuna wáiniak júna enentáimsamiayi: “Ju nekas Yúsnan etserniuitkiñka, ju yajauch nuwa ántiana nuna nekaawainti. Warí, niisha netse nuwáchukait” tu enentáimsamiayi.

⁴⁰ Nuñkia Jesus Paríséun chícharuk tímiayi “Semuñká, ámin titiaj tusan wakerajai.”

Tutai Pariséu chichaak “Turuttiá, Uuntá” tímiayi.

⁴¹ Tutai Jesus tímiayi “Kuítian ikiamniun jimíarâ áishmañ tumashmakarmiayi. Chíkich kiniantus (500) tura chíkichka aya senkuentak tumashmakarmiayi.

⁴² Akiktin tsawant jeamtai máí-metek takakcha áirmiayi. Tuma asamtai kuítian ikiamin ni tumashrjñ máí-metek asakárrarmiayi. Wats, turuttiá çtú áishmañka ikiamniun nekas aneamia?” tímiayi.

⁴³ Tutai Semuñ tímiayi “Enta, núkap tumashrjñ tsankuramia nu.”

⁴⁴ Tutai Jesus tímiayi “Nekas tame.” Nuñkia nu nuwañ iis Semuñkan tímiayi “Ju nuwa wáintsumek. Ame jeemñin wayamtaí winia nawer niartín entsa suruschamame; antsu ju nuwañka nawerun neajkjñaj niarturái, tura intiashññaj japirturái.

⁴⁵ Mukutam áujtusshamame; antsu niñkia nawerun tuke mukutui.

⁴⁶ Winia muukaruñsha asuiti ikiurtuschamame; antsu niñkia naweruj kunñuin asuitin ukaturái.

⁴⁷ Nu tuma asamtai tájame, niisha Winia ti anentu asamtai ni tunaarj untsurj ana nu tsankuramuiti. Tura tunaar ishichik awai tau tsankuramu ana nuka ishichik anenkratniuiti.” Tu tímiayi Jesus.

⁴⁸ Nuñkia nuwañ tímiayi “Ame tunaarum tsankuramuitme.”

⁴⁹ Tura chíkich ipiaamu Jesujai misanam pujuarmiania nu “¿Jusha ya asañ tunaancha tsankurea?” nuamtak tunainiarmiayi.

⁵⁰ Tura Jesus nuwañ chicharuk ““Uwemtikiartiniaiti” tu enentáimturu asam uwempraitme. Shiir wetá” tímiayi.

8

Nuwa Jesusan yáñkiarmiania nu

¹ Nuyá untsurj péprunam Jesus wekaráktak Yus akupeana nuna shiir chichaman etserkini wekaiarmiayi. Tura ni unuiniamurj tuse ármia nu nemarsarmiayi.

² Yaunchu untsurj nuwañ jaa armia nuna tura iwianchruku armia nunasha Jesus tsuáarmiayi. Nu nuwasha Nin nemarsarmiayi. Nusha ju ármiai: Maktaranmayá Marí, siati íwianch jñirkimiuyañia nusha

³ tura uunt akupin Erutisa takarniurj Chusa nuwé Juancha, tura Susancha; tura chíkich untsurj ni takakmarjñ súsar Jesusan yáñkiarmiayi.

Atsaamin atsaampramun Jesusan unuiniamiania nu

(Mateu 13.1-9; Márkus 4.1-9)

⁴ Untsurj péprunmayá Jesusan iistai tusar jñinkarmiayi. Tura untsurj káunkarmatai ju métek-taku chichaman Jesus unuiniamiayi:

⁵ “Atsaamin atsaamprataj tusa jñinkimiayi. Atsaamki wesa jinkíái jintiá iniaararmiayi. Túrunamtai weenak najakarmiayi. Nuyá chñki tariar yuawarmiayi.

⁶ Chíkich jinkíái kaya írunmanum iniaararmiayi. Nu jinkíái tsapainiar, wárik nantu sukuam káarmiai.

⁷ Chíkich jinkíái janñiniam iniaararmiayi. Tura janñkisha jinkíáisha máí-metek tsapainiar, janñki kanñkar ajakarmiayi.

⁸ Tura chíkich jinkíáisha péñker nuñkanam iniaararmiayi. Tura tsapainiar, péñker nerekar chíkichka siañsha (100) nerekararmiayi.” Tuasua amik kakantar chichaak Jesus tímiayi “Kuishim ákuñkia antukturum.”

(Mateu 13.10-17; Márkus 4.10-12)

⁹ Nuyá ni unuiniamurj Jesusan aniak tiarmiayi “Ju métek-taku chicham tamena nu çwarinkumea tame?”

¹⁰ Tutai Jesus tímiayi “Atumnia Yus ni akuptairjñ nekaachma ana nuna nekamtikram-prume. Tura chikichnaka, wáiniainiyat kusurua núnin árti tusan, tura ántuiniayat nekaacharat tusan aya métek-taku chichamñaj jintintiatñaj,” tímiayi.

Atsaampramu chichaman Jesusan paant jintintiamiania nu

(Mateu 13.18-23; Márkus 4.13-20)

¹¹ “Wats, ju nekaatarum, tímiayi. Jinkíáisha Yusa chichamen nakumui.

¹² Jintiá iniaaru tana nuka shuar aya ántana nuna nakumui. Yúsán nekas enentáimtus uwemprechtart tusa íwianch wárik taa nu chichaman ni enentáiyañ júawai.

¹³ Kayanam iniaaru tana nuka shuar antuk waras umiana nuna nakumui. Tura nú shuar kanñkape atsa asamtai, ishichik tsawantiniñ umikiar itiurchatan wáñkiar wárik kanainiawai.

¹⁴ Janñiniam iniaaru tana nuka tuke enentáijñaj umíatsna nuna nakumui. Nu shuarsha ántuiniawai, túrasha ni wakeramurññaj wekainiawai. Ju nuñkanman ana nuna ti páchiniaakui,

tura kuítian ti wakeruniiakui, warastinniak enentáimtuiniakui, Yus-Chicham ni enentáin takaatsui. Nujai kanharma ásar nerektinian tujintiainiwai.

¹⁵ Tura jinkiaí péñker nuñkanam iniaaru tana nuka shuar antuk umiinia nuna nakumui. Niisha antukarmia nuna péñker enentáimtusar, yawetsuk umirkar ti péñker nerenawai.'

Ashí iwaiiniakma átatui

(Márkus 4.21-25)

¹⁶ '¿Shiripkin eeekamak nukuktinkiait? Peaknum waaptak ikiuschatniuiti. Antsu jeñanam wáiniana nu paant wáinkiarat tusa yakí ekentsatniuiti.

¹⁷ Núnisan ashí nekaachma ana nu paant átatui. Tura úukma ana nu nekanattawai. Tura iwaiiniakma átatui.

¹⁸ Tuma asamta anearum péñker antuktarum. Shuar takakna nu patatsamnia átatui. Túrasha takaktsuna nu, takakjai tu enentáimtumana nuka jurunkíttiawai." Tu timiayi.

Jesusa nukurí, Jesusa yachí

(Mateu 12.46-50; Márkus 3.31-35)

¹⁹ Jesus pujamunam nukurí ni yachísha tariarmiayi.

²⁰ Turamtaí Jesusan tiarmiayi "Ame nukusha yatsumsha aq wajasar untsurmainiwai."

²¹ Tutai Jesus tímiayi "Ee, nukuruít, yatsuruít, tura Yus tana nuna antuk umíana nusha winia nukuruít, winia yatsuruít."

Nasesha entsasha Jesusan umirkarmiania nu

(Mateu 8.23-27; Márkus 4.35-41)

²² Chíkich tsawantai Jesus ni unuiniamurjjai kanunam enkemprar "Antumian amaini wetai" tímiayi.

²³ Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun inít awayastatuk awajmiayi.

²⁴ Túram nuñkia Jesusan ishintiainiak "Uuntá, iisha entsá wayaaji" tiarmiayi. Nuñkia Jesus nantaki nasencha entsanacha chicharkamiayi. Nú chichamaik nasesha menkakamiayi, tura entsasha miaaku ajasmiayi.

²⁵ Nuyá ni unuiniamurjin chicharuk "¿Urukamtaí Winia enentáimtusachuram?" tímiayi.

Tura niisha ashamainiak, ti enentáimprar "¿Ausha warí áishmankait? Nasesha entsasha Nii chicharkam umirainiatsuk" tiarmiayi.

Jatara nuñkanam Jesus iwianchrुकun tsuármiania nu

(Mateu 8.28-34; Márkus 5.1-20)

²⁶ Kariréa nuñka amaini Jatara nuñkanam jeawarmiayi.

²⁷ Kanunmaya Jesus jinkimtai nu péprunmaya áishman Nin taruntamiayi. Nu áishmansha yaunchu iwianchrुकuyayi. Misú wekas, jeá pujutsuk aents iwiansamunam pujuyayi.

²⁸⁻²⁹ Íwianchkia nu aishmankan ti kakaram nupet wémiayi. Tura emetataí tusar uwejencha nawencha jirujai jinkiaí wearmiayi. Túrasha tujinkiararmiayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishman Jesusan wáiniak tikishmatar kakantar chicharuk "¿Urukamtaí winiisha tarutnium, Uunt Nankaamaku Yusa Uchirí Jesusa? Winia wáitkiarsaip tusan seajme" tímiayi. Íwianch ñin pujurun Jesus jiki akupeam tu tímiayi.

³⁰ Jesus nu áishmankan anias "¿yáitiam?" tímiayi.

Tútai nii chichaak "Wikia Untsuríntjai" tímiayi. Untsurí íwianch ñin pujurma asa nuna tímiayi.

³¹ "In uunt wáñam ii jinkimij nuñ akuptukam amutkaip" íwianch seawarmiayi Jesusan.

³² Nuí ishichik arantach náinnium untsurí kuchi shushunmak yujaararmiayi. Tura íwianch chichainiak, "Antsu kuchiniam wayatin tsankatrukta" tiarmiayi.

Tutai Jesuska "Ayu, wetarum" tímiayi.

³³ Nuna takui íwianch áishmannumia jinkiar kuchiniam wayawarmiayi. Túram kuchisha nánatanam akaiki iniaawar entsanam utsanawarmiayi. Túrunawar jakekarmiayi.

³⁴ Kuchin wáinniusha túrunan wáinkiar, ashamkar, péprunmasha tura arantcha etserkatai tusar tseke wearmiayi.

³⁵ Etserkarmatai, iyutai tusar untsurí shuar wearmiayi. Tura Jesus pujamunam jeawar, íwianch jintiukarmia nú áishmankan péñker ajas pushí entsar Jesusa nawen pujan wáinkiararmiayi. Tura ashamkararmiayi.

³⁶ Iwianchrुकun áishman tsuármian wáinkiarmania nu yama taan ujakarmiayi.

³⁷ Tura ti ashamainiak Jatara nuñkanmaya aents ashí Jesusan "Wetá" tiarmiayi. Tutai Jesus kanunam enkempar wémiayi.

³⁸ Íwianch jíintiukiarmia nú áishman Jesusan, wisha ame wéamunam winitiaj tusa seamiayi. Tutai Jesus nuna suritiak,

³⁹ “Antsu ame jeemijn weme Yus ámin túrutma nu ashí etserkata” tímiayi. Tutai áishman we Jesus nin túramia nuna ashí nu péprunam etserkamiayi.

*Jairu nawantríncha tura chíkich nuwáncha Jesus tsuármiania nu
(Mateu 9.18-26; Márkus 5.21-43)*

⁴⁰ Tura Jesus katiñki Kariréanam tatí tusar nákas pujuarmiayi. Tuma ásar Nii waketki katiñki támatai nu aencha warasar áusarmiayi.

⁴¹ Tumaj Israer-shuara iruntai jeá uuntri Jairu naartin támiayi. Nii taa, Jesusa nawen tikishmatar “Winia jearuj waitneasam winítritiá” tímiayi.

⁴² Ni nawantri chikichik amia nu, tuse uwí takaku, jakatasa pujaku nuna tímiayi. Jesus “ayu” tinia weakui ti untsurí aents nemariarmiayi. Tura untsurí shuar kaé ajas weena ásar chanuawarmiayi.

⁴³ Nuñ nuwá páchitkia wémiayi. Niisha tuse uwí numpa ajapeak wáitias pujuyayi. Tsuákratniua nuñsha ni kuitrin ashí ajapaitiat tsuámarchauyayi.

⁴⁴ Jesusa úkuriini winiá weantuk ni pushiri náñkatramurin antinmiayi. Nuna tura nú chichamaik numpé ájapeamuncha péñker ajasmiai.

⁴⁵ Nuñkia Jesus chichaak “¿Ya Winia antintkia?” tímiayi.

Tura “péñkesha antinçhajme” tuñiakui Pítur ni tsaniakmarijiaj Jesusan chicharuk “Uuntá, ti untsurí antinmasha, tura ti untsurí chanunmainiasha çitiura “ya Winia antintkia” tame?” tiarmiayi.

⁴⁶ Tútaisha Jesus tímiayi “Nekas Winia antintkiayi. Winia kakarmarjaj tsuárajna nuna nékajai” tímiayi.

⁴⁷ Nuyá nu nuwasha, nekarayapi tusa kuranki taa Jesusa nawen tikishmatramiai. Tura ashí aents ántuiniamunam urukaku antinçkia tura itiura wárik péñker ajasmia nuna ujakmiayi.

⁴⁸ Nuñkia Jesus nuwán tímiayi “Nawantrú, shiir wetá. Winia nekas enentáimtursa asam péñker ajasume.”

⁴⁹ Jesus tuke chichas pujaj uunt Jairu jea, ti untsurí antinmasha, turenia taa, Jáirun tímiayi “Ame nawantrum jakayi. Unuikiartin tuke itit awajipia” tímiayi.

⁵⁰ Tura Jesus nuna antuk tímiayi “Ashamkaip. Áyatik Winia nekas enentáimtursata. Túrakmin nawantrum péñker ajastatui” tímiayi.

⁵¹ Jeá jeawar Jesussha Nijiaj untsurí wayatniun surimkiarmiayi. Antsu aya Pítrun, Jakupun, Juápnasha tura nuwachi aparín nukuríncha wayatniun tsançkatkamiayi.

⁵² Ashí útainiak atakka wáinkiashtatjapi tu útiarmiayi. Túmainiakui Jesus péñké jakaan nékayat tímiayi “Úutirpa. Nuwáçhkia jákachai, antsu kanarai” tímiayi.

⁵³ Jakaancha urukaku ta tusar wishikrarmiayi.

⁵⁴ Nuyá Jesus nuwachi uwejen achik, káantar chicharuk “Nawantru nantaktia” tímiayi.

⁵⁵ Túram niisha jakayat atak iwiaaku ajasmiai. Tura nú chichamaik nantakmiayi; túrunamtaí Jesus “ayuratarum” tímiayi.

⁵⁶ Nuwachi aparí nukurísha ti enentáimprarmiayi. Tura Jesus “Ju túramu péñké etserkairap” tímiayi.

9

*Jesús ni unuiniamurin etserkati tusa akupkarmiania nu
(Mateu 10.5-15; Márkus 6.7-13)*

¹ Ni tuse unuiniamurin ikiaanank ni chichamejaj iwianchrukun enentáijan iwianchin jíirki akupkatniun tura sunçkurjaj jaa tsuártinnasha ni kakarmarín súsararmiayi.

² “Yus akupin ajastin ujaktarum, tura jaa tsuártarum” tinia akupkarmiayi Jesús.

³ Nuyá tímiayi “Wéakrum áyatik wetarum. Ushukrustincha, uyuncha, yurumkasha, kuitcha péñké jukiirap. Aya chikichik pushí jukitiarum.

⁴ Náñkamas jeañam jearum wayarmeka nuñ pujustarum. Nuñ pujusrumek chíkich péprunam wéakrum jíinkitiarum, tímiayi.

⁵ Tura atumin awaintiamatniun nakitiana nú péprunmaya jíinkirum nawemiyá nuñka akakekum ikiuktiarum. Awaintiamachma paant ati tusarum nu túratarum” tímiayi.

⁶ Nuyá jíinkiar ashí péprunam uwempratin chichaman ujakiar wearmiayi; tura ashí péprunam jáiniancha tsuákiar wearmiayi.

*Erutis “Jesús listaj” tímiania nu
(Mateu 14.1-12; Márkus 6.14-29)*

7-8 Uunt akupin Erutis Jesus túramun antukmiayi. Nu túramun chíkich shuarka “Juan jakamunmaya nantaki túrawai” tu wearmiayi. Chíkichkia, “yaunchu Yúsnan etserin Erías wantiniak túrawai” tu wearmiayi. Chíkichkia, “chíkich yaunchu etserin nantaki túrawai” tiarmiayi. Tuma asantai Erutis penké nekaachmiayi.

⁹ Tura tímiayi “Wiki, Juanka muuke tsupirkatarum, tíchamkaj. Tuma ajsha, çjü shuar, ni túramurí ashí shuar chichainia nusha yátsukai?” Tu enentáimiuk “iistaj” tímiayi.

Senku mir áishmankan Jesus ayuramiania nu
(Mateu 14.13-21; Márkus 6.30-44; Juan 6.1-14)

¹⁰ Atak Jesusa akatramurí waketki taar ni túramurín Jesusan ujakarmiayi. Nuñkia aents atsamunam Petsaitia péprunam tíjiuch weak nuí júkiarmiayi.

¹¹ Tura penké shuar nuna nekaawar nemariarmiayi. Túram Jesus nin shiir áujsamiai. Tura Yusa akuptairí pachis unuiniamiai. Tura jaa armia nuna tsuárarmiayi.

¹² Tura kjakuí, tuse unuiniamu Jesusan wériar tiarmiayi “Uuntá, shuar akupkachmini-ashit. Tíjiuch péprunmasha, shúarnumkesha wear ni yurumátinurín sumarmakarti, tura kanartintrín wáinkarti. Juí pujajnia juñkia penké atsawai” tiarmiayi.

¹³ Tutai Jesus tímiayi “Atumsha ayuratarum.”

Tutai chichainiak “Íisha aya senku tanta tura namaksha jímiarchik takakji. Ju shuar ayuratin sumaktai tusar wétinaiitji” tiarmiayi.

¹⁴ Áishmansha ti untsurí senku mir (5000) jeeá ámiayi. Tura Jesus ni unuiniamurín chicharainak ““senkuenta senkuenta kanaarum ankant ankant pujustarum,” títiarum” tímiayi.

¹⁵ Túrawarmatai ashí pujusarmiayi.

¹⁶ Nuyá senku tantan tura jímiará namaknasha Jesus achik, yakiinjí íimias Yúsan yu-mínsamiai. Nuyá ajamsarat tusa ni unuiniamurín súsararmiayi.

¹⁷ Ashí yurumáwar ejemarmarmiayi. Tura ampirman tuse chan̄kinnium áimkiarmiayi.

Jesus Yusa anaikiamurínti ujakma amia nu
(Mateu 16.13-19; Márkus 8.27-29)

¹⁸ Jesus ni unuiniamuríjjai áentsnumia kanaki pujuarmiayi. Jesus Yúsan aujsua umik ni unuiniamurín tiarmiayi “¿Yáiti turutainia Winia?”

¹⁹ Niisha áimkiarmiayi, “Chíkich “Ímiakratin Juánkaiti” turamainiawai; chíkichcha “Íriásaiti” tura chíkichkia “yaunchu Yúsnan etserin nantakniua núiti” turamainiawai” tiarmiayi.

²⁰ Tutai “Tura atumsha çyáiti tútrum?” tiarmiayi.

Takui Pítiur chichaak “Ámeke Yusa Anaikiamurí, Kristu tutai, núitme” tímiayi.

²¹ Tutai Jesus “Penké etserkairap” tímiayi.

Ni jákatniurín Jesus ujakmiania nu
(Mateu 16.20-28; Márkus 8.30-9.1)

²² Nuyá Jesus tímiayi “Wi Aents Ajasuitjiana ju ti waitsatniuitjai. Wíi shuara uuntri, tura ni Pátrirí úntrísha tura ni jintinniurísha nakitruar maantuáwartai. Túraha iwiartusarmatai menaintiu tsawant jeamtai nantaktiatjai.”

²³ Nuyá ashí áentsun chicharuk juna tímiayi “Shuar Winia nekas nemartustajtsa waker-akka ni wakeramuriñkia iniaisati. Tuke tsawant ni krusrj yanaki nemartusti.

²⁴ Kame shuar ju nuñkanam aya péñker pujustaj tákuñka nu shuar uwemtsuk jakattawai. Antsu Winia anentu asa péñker pujustinniak enentáimtsuna nú shuarka nekas iwiaakman wáinkattawai.

²⁵ Íimiata, shuar ashí ju nuñkanam ana nuna súmakui tura jinium wétin ákuisha çitiurak péñker pujusat?

²⁶ Wi Aents Ajasuitjiana ju Winiasha tura winia chichampruncha shuar natsanraitkuñkia, winia wincharujai, winia Aparu wincharíjjai tura nayaimpinmaya péñker suntara wincharíjjai atak táakun shuar natsantrurmia nuna natsantrattajai Wi.

²⁷ Tura shuar Yusa akuptairín wáintsuk jákachartatna nu juí pujuiniawai. Nuna nekas tájarme” tímiayi.

Jesus nusháa iira ajasmiania nu
(Mateu 17.1-8; Márkus 9.2-8)

²⁸ Nuna tuasua amik nuyá chíkich semanatin Yúsan áujsatat tusa Jesus náinnium wakamiayi. Pítiur, Jakupu, Juanjaj nemariarmiayi.

²⁹ Jesus auju pujus nusháa iira ajattsarmiayi. Ni pushirísha ti puju jíitsumir ajasmiai.

³⁰ Nuñkia jímiará áishman Níjjai chicháa wajarmiayi. Nuka Muisáis Eríasaj ármiayi.

³¹ Níñcha wincha jíitsumir téntakarmiayi. Tura Jesus wáitias Jerusarénnum jákatniurín amia nuna áujmatarmiayi.

³² Pítur ni tsaniakmarjijai kari ti pujainiajn iwiáa pujuarmiayi. Tuma ásar Jesusan tura jimíarâ áishmanjaj jítsumir ajas wajainian wáinkiarmai.

³³ Tura nu áishman Jesusan ikiuki weenaj Pítur Jesusan chicharuk “Uuntá, iisha ti shiir pujatsjik. Menaintiu áakmaktai, Áminiusha, Muisaisnasha, Eríasnasha áakmaktai” tímiayi. Tura Pítrusha enentáimsuk nuna tímiayi.

³⁴ Nuna chicháa pujaj yuranjim tarí kaput amuyarmiayi. Tura yuranjim amuyam ti ashankarmiayi.

³⁵ Nuñkia yuranminmaya ju chichaamun antukarmiayi: “Juka winia aneamu Uchiruiti. Nii anturkatarum.”

³⁶ Chichaamun antasua amikiar Jesus ninji wajan wáinkiarmai. Nuñkia takamtak pujuarmiayi. Tura wáinkiarma nuna penké etserkacharmiayi.

*Uchi iwianchrukun Jesus tsuármiania nu
(Mateu 17.14-21; Márkus 9.14-29)*

³⁷ Kashin tsawantaj, náinniumia táarmatai, ti untsurj shuar Jesus inkiuntai tusar wearmai.

³⁸ Nu shuarnumia chikichik áishman Jesusan untsuk tímiayi “Uuntá, waitneasam uchir firtústá. Uchirsha júchikiiti.

³⁹ Íwianch achik núpeteam niisha nánkamas untsumui. Tura chichichiptu ajas we-nunmasha saun kaput apaawai. Íwianch nin tuke yajauch awajas ankant awajsatniun nakitiawai.

⁴⁰ Túmakui ame unuiniamurmin iwianchin jirtukit tusan seamjai. Túrasha tujinkiarmai tímiayi.

⁴¹ Tutai Jesus tímiayi “Yus enentáimtichutirmin, tutupnik wekaichatirmin zurutná tsawanttsuk atumjai pujustaj. Urutná katsuntratjatsuk? Uchiram ju itiatá” tímiayi.

⁴² Tura uchi winiaj iwianch nuñká ajuant chichichiptu áepsamiayi. Tura Jesus iwianchin kakantar chicharkamiayi. Tura uchin penker awajas ni aparin awantuki susamiayi.

⁴³ Tura ashí pujuarmia nu ti enentáimprar “Yuska imiá úuntchakait” tiarmiayi.

*Jesus ni jákatniurin ataksha ujakmiania nu
(Mateu 17.22-23; Márkus 9.30-32)*

Jesus túramun ti enentáimtu pujuiniaj Jesus ni unuiniamurin tímiayi

⁴⁴ “Wi tájarmena ju penker antuktarum. Winia Aents Ajasu tútain surutkartatui.”

⁴⁵ Tura Nii timia nuna unuiniamurj nekaacharmiayi. Nekaawarain tusa paantcha awajsamuyayi. Tura warinkit tusa anintrustinniasa arantukarmiayi.

*“¿Yaki imiá nankaamantuit?”
(Mateu 18.1-5; Márkus 9.33-37)*

⁴⁶ Nuyá ni unuiniamurj, yaki imiá nankaamaku ati tusa, nuamtak mai tunai ajarmiayi.

⁴⁷ Tura ni enentáimsamurin Jesus nekaamiayi. Tuma asa uchin achik ni pujamunam itiamiayi.

⁴⁸ Itiá tímiayi “Winia anentuk ju uchin shiir awajeana nuka Winiasha shiir awajtaiwai. Tura Winia shiir awajtana nuka Winia akuptana nunasha shiir awajeawai. Kame átum nankaamantuchu tárumna nu ti nekas nankaamantuiti’ tímiayi.

(Márkus 9.38-40)

⁴⁹ Nuyá Juan tímiayi “Uuntá, shuar ame náarmin pachis iwianchin jiki akupea nu wáinkiamji. Tura in páchitkiachu asantai nuka suritkiamji.”

⁵⁰ Tutai Jesus tímiayi “Antsu suritkiarap. Shuar in nakitramachkunka in páchitkiawai.”

Jesus Jakupun Juánasha chicharkarmiania nu

⁵¹ Jesus, nayaimpiniam waketkitniurj jeatemantai, enentáimmia ímiatrusan Jerusarénum we-wémiayi.

⁵² Wesa, kanartinian wáinkiarat tusa akatar émtikiarmiayi. Tura niisha Samaria péprunam jeawarmiayi.

⁵³ Tura Samarianmaya aentska, Jerusarénum wéenan nekaawaru ásar itiaatniun nakitramarmiayi.

⁵⁴ Jesusa unuiniamurj Jakupusha Juansha nuna nekaawar, Jesusan tiarmiayi “¿Uuntá, Erías yaunchu túramia núnisrik iisha túrat tusam wakeramek. Nayaimpinmaya ji tara Samarianmaya aentsun amukarti, títiatjik?”

⁵⁵ Tutai Jesus nin ísar kakantar chicharuk tímiayi “Atumsha atumi enentái urukukit nuka nekamatsrume.

⁵⁶ Wi Aents Ajasu áentsun emesratsan táchaitjai. Antsu uwemtikratajtsan táwitjai” tímiayi. Nuyá chikich péprunam wearmai.

*Jesus nemarsatin**(Mateu 8.19-22)*

⁵⁷ Jintia weenaj, chikich áishman Jesusan chicharuk “Uuntá, tuj wétatam nujsa nemarsatjame” tímiayi.

⁵⁸ Tutai Jesus tímiayi “Kujanchmasha ni wáarín takaktsuk. Chínkisha pasunken takakt-suk. Tura Wi Yusa Uchiríntiatan tepesan ayampratniur atsawai.”

⁵⁹ Chikich áishmankan Jesus “Nemartusta” tímiayi.

Tutai nii chichaak “Antsu, Uuntá, winia apar jakantai, iwiarsa ikuiakun nemarsatjame. Nu tsankátrúktá” tímiayi.

⁶⁰ Tutai Jesus tímiayi “Jakaa ainia nu ni shuarín iwiarsatniunka enentáimtusarti. Tura ámeka weme Yus-shuar átin urukukit nu etserkata” tímiayi.

⁶¹ Nuyá chikich tímiayi “Uuntá, nemarsataj tusan wakerajme. Túrasha wíi shuaran emka áújsan ikuuweartaj tsankátrúktá” tímiayi.

⁶² Tutai Jesus tímiayi “Shuar arayat ukunmaaní apajas iimna nu, Yus akupeana nuí takaschamniati.”

10*Ni unuiniamurín setenta armia nuna Jesus etserkatarum tusa akupkarmiania nu*

¹ Nuyá ukunam chikich unuiniamurín setenta anaikiarmiayi Jesus. Tura jímíar jímíaran apatak émkítíarum tusa ashí péprunam ashí nunkanam ni wétin amia nuí akupkamiayi.

² Akupeak tímiayi “Nekas tájarme, Yus-Chicham étserkum, júuktinia núnisan, aents Yus-shuar awajsatin tí awai. Tura zyaki júukat, aya ishichik takainiasha? Tuma asamtai ni takarniurí akupkat tusarum Nerentin seatarum.

³ Wetarum. Átumka murikua núninaitrume. Uunt yawá yujamua núninnium tsumai ámunam akupeajrume.

⁴ Yurumkasha, kuitcha, sapatcha júkiirap; shuarjái jintia áujmamsatai tusarum waja-sairap.

⁵ Jeá wayakrum emka ju titiarum: “Ju jeanam pujuinia nuna Yus shiir awajsarti.”

⁶ Nérentin “Ee, nuna wakerajai” tákuinikia túrunattawai. Tura “Atsá, wakeratsjai” tákuinikia, “nuinikia túrunashti” titiarum.

⁷ Jeá wayattarmena nú jeanman pujustarum. Tura ajampramsattarmena nu yuatarum. Wari, takaana nu akinkiashtinkiait. Chikich jeanam nuí werum nuí werum ajairap.

⁸ Awaintiamawartatna nú peprunam jearmeka ajampramsartatna nu yuatarum.

⁹ Jaa ainia nu tsuártarum. Túrarum “Yus ju nunkanam akupin ajastin ishichik ajatemsai” nu peprunmayá shuar titiarum.

¹⁰ Iksarmek itiaarmachartatna nú peprunam jearum, jintia wajasrum ju titiarum,

¹¹ “Yusna nakitra asakrumin, atumi pépruriniá nunka ii nawen peema japirar akakekji. Túrasha ju paant nekaatarum: Yus ju nunkanam akupkatin ishichik ajatemsai.”

¹² Yusa nekapsatin tsawantrj jeamtai nu peprunmayá shuaran ti asutiáttawai. Yaunchu Sutumanmayá shuaran asutiáimia nujaí nankaamas asutiáttawai. Núnaka paant tájarme tímiayi.

(Mateu 11.20-24)

¹³ Wáinkiatá, Kurasín péprunmayatiram. Wáinkiatá Petsaitia péprunmayatirmesha. Atumi pépruríin aents tujintiamun ti túraitjai. Wari, yaunchu Tiru péprunmasha, Setun péprunmasha nu tujintiamu túramuitkuinikia yaunchu ni enentáin yapajjáwaraayi. Túrawar kúntuts pujutai pushin entsarar yunkunim ajakiarayi.

¹⁴ Tura tumsha aents tujintiamu túramu wáiniatrum yapajiachu asakrumin Tirunmayá tura Setunnumiá aentsjai nankaamas asutniáttarme.

¹⁵ Tura tumsha Kapernáumnumiáatirmesha, “ti nankaamantu ajaras nayaimpiniam jeattaji” tu enentáimtsurmek. Maaj, antsu jaka matsamtaniun jeattarme, auka” tímiayi.

¹⁶ Tura Jesus ni unuiniamurín junasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant, Winia nakittrakka Winia akuptukua nunasha nakitiawai.” Tú áújas Jesus nin akupkarmiayi.

Setenta unuiniamu wakетки táarmiania nu

¹⁷ Ukunam nu setenta unuiniamu warasar wakетки táarmiayi. Tura chichainiak “Uuntá, ame náarmíin íwianch jíiki akupeam umirtamkamji” tiarmiayi.

¹⁸ Tutai Jesus tímiayi “Ee, Wisha nayaimpinmayá peem peetna núnisan, uunt iwianch Satanásan akaiki iniaan wáinkiamjai.

¹⁹ Atumniaka winia kakarmarun susamjarme, napi najarmasha titin najarmasha ya-jauch awajtamsairum tusan; tura ii nemasrj kakarmarj nupetkatniuncha susamjarme.

²⁰ Túrasha íwianch umirtamkui nu enentáimsam warasairap. Antsu atumí naari nayaimpiniam aarma aa asamtai warastarum” tímiayi Jesus.

Jesus warasmiayi
(Mateu 11.25-27; 13.16-17)

²¹ Nuiñkia ni enentáin Yusa Wakaní waramtiksam Jesus juna tímiayi: “Aparú, ashí nayaimpijíai nuñka Úntrinme; tuma asam ju túrunamu ti unuimiaru enentáimtumainia nuyá úukuitme; antsu uchichia núnis nankaamantuchu enentáimtumainia nú shuar paant awajtusuitme. Ee, Aparú, núnik wakerichmakum. Tuma asamtai shiir enentáimtajme, Aparú” tímiayi.

²² “Winia Apar ashí surusuiti. Wisha ni Uchiri asamtai Winia nékarui. Tura chikich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nú shuarsha winia Aparun nékainiawai.” Tu tímiayi Jesus.

²³⁻²⁴ Nuyá ni unuiniamurjin iis tímiayi “Wi tájarme, untsurj Yúsnan etserniusha tura uunt akupniusha átum yamá wáintrum nuna wáinkiatniun wakeruiniayatañ wáinkicharmiayi. Tura átum yamá ántarme nuna antuktinian wakeruiniayatañ antukcharmiai. Tura Yus achirmaku asakrumay, wáintrumna nu ti péñkeraiti” tímiayi.

Samarianmaya áishmañ katsumkamun yainmia nuna Jesus unuiniamiania nu

²⁵ Nuyá akupkamun jintinkiertin Jesus warintiak chichakat tusa wajatki werimiayi. Werí iniimiayi “Uuntá, wi tuke iwiaaku átaj takun ¿warinia túratniuitiaj?” tímiayi.

²⁶ Tutai Jesus ayak “¿Yús-Papiniun Muisáis áarmanum waritia áarmait. Waritia enentáimiam?” tímiayi.

²⁷ Akupkamun jintinkiertin ayak tímiayi “Juna tawai: Ti enentáimsam, tuke enentáimjaj Uunt Yus aneeta. Ame kakarmaram, iwiaakmarmesha Yus iiktusta. Tura ame ayashim aneamna núnisemek ame írutramurmesha aneeta. Núchakaiti” tímiayi.

²⁸ Tutai Jesus tímiayi “Péñker áimsame. Nu túrakmeka tuke iwiaaku átatme.”

²⁹ Tutai akupkamun jintinkiertin ni aninramun kiishtumaktajtsa wakerak “Winia írutramursha ¿ya ainia?” tímiayi.

³⁰ Takui Jesus tímiayi “Jerusaréñnumia jintia Jirikiú péprunam jeana nú jintianam áishmañ wean, kasa áishmañ tariar ni warirjin, pushirjincha kasarkarmiayi. Tura katsumkar mayá ashirak ajuantar ikiukiarmiayi.

³¹ Tura Israer-shuar Patri ukunmañ winis nu áishmañkan wáiniak aya íkijaj iis ikiukmiayi.

³² Nuyá ukunam Patri yáintrisha nu jintianam wesa, nu áishmañkan wáiniak, áyatik iis ikiuak wémiayi.

³³ Tura nuyá Samaria nuñkanmaya áishmañsha nu jintianmañ wesa, nu áishmañkan wáiniak ní shuarinchunak wáitnéntramiayi.

³⁴ Nuyá nu áishmañkan weantuk ni numpamnamurjin asuitijaj tura wíniujaj tsuar jaanchjaj penuarmiayi. Tura ni kawairjin ekenak jukimiayi. Tura írar kanutainiam juki ejé nu áishmañkan péñker wáinkiamiayi.

³⁵ Tura kashin tsawarmatai Samarianmaya áishmañ weak jimirá kuítian jusa jeá nérenniurjin susamiayi. Susa tímiayi “Ju áishmañ péñker wáitrukta. Tura wi amaajna ju táasmataisha wi wáketkun akiktajme” tímiayi.

³⁶ Ayu, ámjijajisha, nu menaintiu áiniana nu, ¿tuá imía nekas katsumkamun waitnentramia?” tímiayi Jesus.

³⁷ Takui akupkamun jintinkiertin chichaak “Entá, katsumkamun wáitnentramia núa” tímiayi.

Tutai Jesus tímiayi “Amesha weme núnisemek túrata.”

Marta ni kajjaj Marí jeen Jesus pujusmiania nu

³⁸ Nuyá Jesus jintiá wesa chikich péprunam jeamiayi. Nu péprunmaya nuwá naari Marta ni jeen itiaamiayi.

³⁹ Marta kaj ámiayi ni naari Marí. Marisha unuiniamun anturkataj tusa Jesusa nawen pujursamiayi.

⁴⁰ Tura Mártaka ni takatrin ti enentáimtak Jesusan weantuk tímiayi “Uuntá Jesúsá, ¿winia kajr takatan winiak íktursainia nuka enentáimsumek? Winia yáingá turuttia” tímiayi.

⁴¹ Tutai Jesus tímiayi “Maaj Martí, untsurj túratin ana nu ti enentáimsam itit awajtamui.

⁴² Tura aya chikichik nekas túratniuiti. Marikia nekas péñker ana nuna achikiai. Nusha penké jurunkishtatui” tímiayi.

11

Jesus Yus áujsatniun unuiniamiania nu
(Mateu 6.9-15; 7.7-11)

¹ Chíkich tsawantaj Jesus Yúsana áusataj tusa atsamunam pujumiayi. Áusua amiknatai ni unuiniamurj chikichik Nin tímiayi “Uuntá, imiakratin Juanj ni unuiniamurj unuiniamia núnismek Yus áusatin unuiturta.”

² Tutai Jesus tímiayi “Yus áujkuram jü titiarum: Aparu Yus, nayaimpiniam pujamna nu, ii Aparinme. Ame náarmincha shuar ántar pachis-charti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisanj jü nunkanmasha uminkiatí.

³ Aparú, ii yurumkarj ashí tsawant amasta.

⁴ Tura winia nemasrun tsankurajna núnismek, Aparú, winia tunaaru tumashrisha tsankurturta. Tunáa wakeruktin tsankatrukaip. Antsu ashí tunaanumia uwemtikrurta.

⁵⁻⁶ Nuyá Jesus juna tímiayi. “Wats, jü titiái. Kashi ajapén amikrum werishtameash. Tura “Winia amikiur yajaya winia jearuj yama tayi. Tura ajamsatniun penké takaktsujai. Tuma asamtai amikru, menaintiu apatuk ajamprustá” tichatameash.

⁷ Tura nii inít pujusanj chichaak “Wari, wáitisha epenmiati, tura winia uchirsha wijijai ashí teepenawai. Itiur nantakniak amastaj. Itit awajtipia” turamchanpiash.

⁸ Wats, paant tájarme, niisha amikrum asa, nantaki ikiatmastianian nakitiayat, itit awajtin tusa nantaki ashí wakeramna nuna suramsattawai.

⁹ Tuma asamtai tájarme: Yus seatarum; túkrumin suramsattarme. Eakrumka wáinkiatarme. “Winiajai” tákrumin awaintiamattarme.

¹⁰ Seana núnaka suániatsuk. Eana nuka wáintsuk. “Winiajai” tuinia núnaka awániatsuk.’

¹¹ ‘Wats, átum uchirtintiram, ame uchiram apatkun seatmakui ζkayaash súsaintiam? Namakan seatmakui ζnapíash súsaintiam?

¹² Nujintian seatmakuisha ζtitiñkiash súsaintiam?

¹³ Wari, átum imiá yajauchitirmesha atumí uchirj péñker ana nu tuke súchakaitrum. Atumí Aparj nayaimpiniam pujana nu, seakrumniñkia nú nankaamas ni Wakanj suramsattawai.” Tu unuiniamiai.

Jesusan “iwianchi kakarmarijaj túrawai” tiarmiayi

(Mateu 12.22-30; Márkus 3.19-27)

¹⁴ Shuar iwianchruku asa chichachu ámiayi. Nuna enentáyan nu iwianchin Jesus jüki akupkamiayi. Íwianch jüinkimtai chichachu chichasmiai. Túramtai shuar nuj pujuarmia nu ti enentáimprarmiai.

¹⁵ Tura chíkich tiarmiayi “Juka iwianchj kapitiantrj Satanásan, ni chíkich naarj Pirsepún umirniuiti. Tuma asa nuna kakarmarijaj iwianchin jüki akupeawai.”

¹⁶ Tura chíkichkia, nekas Yúsnumia taawashit tusar “Nayaimpinmayá kakaram ana nu iniakmasam aents tujintiamu túrata” Jesusan tiarmiayi.

¹⁷ Tura Jesus tu enentáimianin neka asa tímiayi “Núu nunkanmayan shuar nuamtak kajernaiakuñkia nú nunka wárik meserchattawak; nuamtak shuarsha ni shuarijaj kajernaiyaksha amunaikchartatuak.

¹⁸ Wíniaka “Pirsepú iwianchi kakarmarijaj iwianchin jüki akupeawai” túruttsurmek. Tuma asamtai tájarme, uunt iwianch Satanás naartin, ni suntarjaj kajernaiyaksha ζitiur tuke kakaram áting’?

¹⁹ Tura Wi Pirsepú kakarmarijaj iwianchin jüki akupeakuñkia, atumi shuarjsha ζyana kakarmarijaj iwianchin jüki akupena? Niisha “iwianchi kakarmarijaj túrichuitji” tu-iniajsha ζitiura Winiaasha, “iwianchi kakarmarijaj túraití” turutminiaitrum?

²⁰ Wikia Yusa kakarmarijaj iwianchin jükin akupeajai. Nu nekaarum Yus atumj enentáin akupin ajasuana nu nékarme.’

²¹ ‘Kakaram áishmanj kíshumaktajtsa iwiarnar wajas jeen wáinkiu, ni warirj inít ana nusha tímiatrusanj ániawai.

²² Antsu niijaj nankaamas kakaram ana nu winiakka nupetkashtatuak. Tura kíshumaktinian iwar takakman jurawai. Tura kasamkámun ni amikrjín súawai. Kakaram áishmanj iwianchin nakumeawai. Tura nujaj nankaamas kakaram áishmanj Winia nakumprawai.

²³ Iista. Winia nemartatsna nu winia nemasruiti. Núnisanj Winia yáintsuna nuka aya iturchat nájateawai.’

Iwianch jüki akupkamuitiat wáketna nuna ujakmiania nu

(Mateu 12.43-45)

²⁴ Nuyá Jesus juna tímiayi: “Shuara enentáiya íwianch jüinki ayamprataj tusa yumi penké yútatsna nuj wéawai. Tura ayampratniun wáincha asa ataksha waketitniun enentáimui. “Wi jüinkimij nuñ waketitjai” tawai.

²⁵ Tura wakетки péñker iwiaramun tura ankant aan wáiniui.

²⁶ Nuna wáiniak, ni áin siati iwianchin níjjají nan̄kaamas yajaunchin itíá en̄kemáwartatui. Túrnamtai nu shuar nuiki nuna nan̄kaamas yajauch ajastatui.” Tu tímiayi Jesus.

Nekas warastin

²⁷ Shuar iruniarmia nuí Jesus nuna chichaa pujají, nuwá untsumuk “Ame nukun Yus ti yáin̄kiai. Ni ampújéjé ame pujuschamkam. Ámin amuntstamachmakam” tímiayi.

²⁸ Tutai Jesus tímiayi “Antsu ni chichamen antukar umirainia nuna, nukurjají nan̄kaamas Yus ti yáin̄kiaru áiniawai, tajají” tímiayi.

(Mateu 12.38-42; Márkus 8.12)

²⁹ Shuar untsurj Níin káunkarmatai Jesus tímiayi “Yamaiya shuarka yajauch áiniawai. Yajauch ásar, chichartuiniak “Nekas Yúsnumiáitkiúmka aents tujintiamua nu túram Yusa kakarmarj iniakmasta” turutainiawai. Túrasha áyatik yaunchu Junas túrunamujají iniakmasmia nu jain̄ nekaatin áiniawai.

³⁰ Kame Junas túrunamujají Níniwi péprunmaya shuaran yaunchu Yus ni kakarmarj iniakmasmia núnisan̄ yamaisha Aents Ajasu tutainjiana nu Wí túrunamujají Yuska ni kakarmarj iniakturmastatrumé.

³¹ Yaunchu Sarumún uunt akupin pujají Sepa núnkanmaya nuwá akupin Sarumúnka chichamen nekaataj tusa ti jeashtanmaya tímiayi. Tura yamaikia Sarumúnjají nan̄kaamas pujají átumka anturtatrumé. Tuma asamtai Wí tájarme, Yus ashí shuaran nekapsattana nu tsawant jeamtai nu nuwá, akupniun pépker anturka asamtai, Yus ímianum pépker átatui. Antsu atumsha Winia anturtukcha asakrumin Yus ímianum yajauch átatrumé.

³² Tura Yúsnan etserin Junas Níniwi péprunmaya shuarum Yus Chichaman etserkamtai nu shuar ni tunaarj in enentáimtusar enentáin yapajjáawarmiayi. Tura juí yamáí Junasjají nan̄kaamas etserin pujajají. ¡Tuma asamtai nekapsatin tsawant jeamtai Níniwinmaya shuar yamaiya shuar árumna nuna sumantikramattarme!

Ayashi tsáapninri

(Mateu 5.15; 6.22-23)

³³ ‘¿Shirikip ekeemakar úuktinkiait? Pitiaknumsha en̄keashtiniati. Antsu shuar jeá wayana nu paant ímsat tusar yakí ekensatniuiti.

³⁴ Ame jímijjají wáinkiam nu jají wekasatin nekaattame. Tuma asamtai ame jímijjají pépker ana nu wáinkiumka pépker wekasattame; antsu ame jímijjají yajauch ana nu wáinkiumka, kiritniunam wekasatnia núnisan̄ yajauchiniam wekasattame.

³⁵ Anearta. Enentáimin tsápin ana nu kiritin ajaschati tusam anearam wekasata.

³⁶ Ame ayashmjín kirit ajatsuk aya tsáapniniaitkiuínkia, shirikip paant awajea núnisan̄ ashí paant wáinkiatame” tímiayi.

Pariséuncha, Israer-shuara jintinniurisha “yajauchiitrumé” tímiayi Jesus

(Mateu 23.1-36; Márkus 12.38-40; Rúkas 20.45-47)

³⁷ Jesus chichasua amikmatai Paríséu shuar, winia jearují yurumáitia tusa untsukmiayi. Tutai Jesus wayá misanam pujusmiayi.

³⁸ Tura Israer-shuar ikijmiartin ana nuna túrutsuk aya pujakuí Paríséusha nuna wáiniak “maa ¿urukamtia tura?” tu enentáimsamiayi.

³⁹ Tura Uunt Jesus tímiayi “Pariséutirmeka atumí yurumtairj aya pátatek nijjaktin ti wakeriniaitrumé. Atumsha nu yurumtajjají méteketrumé. Pátatek pépker túrarme. Tura atumí enentáinkia kasamkatniusha tura yajauchia nusha piakuiti.

⁴⁰ ¡Enentáimcha! Warí, ashí pátatek wáiniájí nuna Yus najanachmakia; tura inít paantcha ana nunasha Yúsak najanachmakia.

⁴¹⁻⁴² Aneartarum, Paríséutirmesha. Aya nuka méntasha, anissha tura aya apatkusha Yus súsatin ti enentáimprumé. Nukasha tsuriasrum apatkusha tias ana nuyá chikichik achikrum, Yúsnaítí tátsurmek. Tura antsu nu túratin iniaitsuk pépker wekasatniusha, Yus anenmarmena nusha pépker enentáimsatniuitrumé. Wats inít, enentáimin ana nútiksarmek jusam susarta. Nuínkia ashí chamir átatui.’

⁴³ “Tura aneartarum Paríséutirmesha. Yus áujtai jeanam penkerj pujutainium pujustin wakerarme. Tura jintiá aents ímianiamunam ti shiir áujtusarat tusarum wakerarme.’

⁴⁴ ‘Jintinniutirmesha, Paríséutirmesha máí-metek aneartarum. ¡Antar shiir chichamtinia! Iwiarsamu paantcha núniniaitrumé. Shuar nu nan̄kaamaksha nájamiat nékatsui. Núnisan̄ shuar atumj chichame antukar yajauchia nuna nekartamturme.”

⁴⁵ Nuikia Israer-shuara jintinniurj chikichik Jesusan chicharuk tímiayi “Uuntá, nu tákum incha yajauch chichareame.”

⁴⁶ Tutai Jesus tímiayi “Atumsha jintinniutiram aneartarum. Atumj akupkamurjijaj káarak ti kijin entsackhamnia súarme. Tura átumka yáintaj tusarum atumí uwejejaisha penké ántiatsrume.’

⁴⁷ ‘Aneartarum tájarme. Yaunchu atumí uuntrj Yúsnan étserniun máawarmia nuna iwíarsamurj átum jeamniutrume nu etserin ti péñker ásarматаi kajinmatkishtin.

⁴⁸ Nu túrakum atumí uuntrj túrawarmia nu, “yajauchichuiti” tarume. Warí, niisha máawarmiayi, tura atumsha máawarai táyatrurum niijijaj méteketrume. Warí, Yúsnan etserniun iwíarsamurj jeamkuram atumek sumamarne.’

⁴⁹ ‘Atumí túramurj nekáa Yus júna yaunchu tímiayi: “Winia etserturniun tura winia akatramurnasha níjn akuptukartatjai. Túramtai chikichnaka máawartatui, tura chikichnaka pataatukartatui.”

⁵⁰ Tuma asamtai ashí ni etserniurj maamu ainia nuna, yamaiya áentstirmin Yus samantikramattarme. Nuñka najanamunmaya júki

⁵¹ yamá ímiajaj maamu ainia nuna, kame Apir maamunmaya júki yamá Sakarías maamua tímiajaj anintrustatui. Namañ maar Yus sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asamtai tájarme, ni etserniurj maantamnawarmia nuna yamá matsatrurnna nútirmin aninmasartatui.’

⁵² ‘Jintinniutiram aneartarum. Waiti asakatniua núnisrumek nekas nekaatin surimiarme. Atumkeshá nekatsrume. Tura nekaataj tana nusha suritiarme” tímiayi.

⁵³⁻⁵⁴ Jesus nuna takui Pariséusha, jintinniusha ti kajerarmiaiyi. Tura nii tana nujaj “yajauch túrame” titiai tusar wakeruiniak untsurj anintriarmiaiyi.

12

¹ Nu tumaj shuar ti untsurj káunkarmiaiyi. Ti kaunka ásar nawen mai-najatnai ajarmiaiyi. Tura Jesus ni unuiniamurj tótan juarkímiayi. “Pariséu ántar chichamtin áiniawai. Nuka wakaprutaiya núnisaiti. Wakaprutaikea nijiamanch yumirniun yama enkeam páantchaiti. Tura ukunam nekaamniaiti.

² Núnisañ ashí paantcha ana nu iwíainiakma átatui. Uñkma ana nusha nekaamu átatui.

³ Nu tuma asamtai, kiritniunam tímiarmena nusha tsawái tsáapin ajasmanum antunkatawai. Tura jea inít pujusur ishishmasrum tímiarmena nusha áa ti paant etsernaktatui.’

*Yusak ashamkatniuiti
(Mateu 10.28-31)*

⁴ ‘Amikrutiram, aya ayashmin main ainia nu ashamkairap, tájarme. Ayashmin maa nú arantka máashtatui.

⁵ Tura ya nekas ashamkatniuitrum, nuna paant jintintiattajrume. Ame ayashmj maa, nuyá ámin jinium akuptamkatniun tujintiatsna nu ashamkatarum. Ee, Yus ashamkatarum, tájarme.’

⁶ ‘Jimará chiníki ishitiúpchich ishichik kuitjaj surukchatniukait. Túrasha Yussha nu chinín penké kajinmatkishtatui.

⁷ Wats, ashamkairap. Untsurj chiníkijaj nankaamas Yuska atumin enentáimturmarne. Warí, ame intiashmin mash Yus nekapmaruítí.’

(Mateu 10.32-33; 12.32; 10.19-20)

⁸ ‘Ashí shuar ashí ímiainiamunam Winia Aents Ajasu tutain, Winia natsantruiniatsna núnaka, Wisha Yusa suntarj ímiainiamunam natsantrashtatjai;

⁹ antsu shuar ímiainiamunam Winia natsantrana núnaka Wisha Yusa suntarj ímiainiamunam natsantrattajai.’

¹⁰ ‘Winia, Aents Ajasu tutain, shuar yajauch chichartakuiníka nusha tsankuramniaiti, tura Yusa Wakaníncha yajauch chicharkuiníka nuka penké tsankurachminiaiti.’

¹¹ ‘Wats, Israer-shuar iruntai jeanmasha, tura Israer-shuar kapitáinnumsha, uuntnumsha juramainiakui, aninmainiakui sha warintiajak tusam ti enentáimsáip.

¹² Ame áimkiatin jeamtai, Yusa Wakanj ame títiatmena nuna jintinramattawai,” tu timiaiyi.

Kuítia enentáimtuschatniuiti

¹³ Chíkich áishman Jesusan tímiayi “Uuntá, ii aparj ikiurtamkimiaj nuna yatsur winiasha nakak surustí, titia” tímiayi.

¹⁴ Tutai Jesus tímiayi “Áishmanka, atumin nu túratin anaikiamukaitiaj.”

¹⁵ Nuyá tímiayi “Péñker enentáimsatarum. Nii takakna nújajñ shuar iwíiaaku, áchatniuiti. Tuma asamtai kuítrintin ajastin aya nuke enentáimsaip.”

¹⁶ Nuyá júna métek-taku chichaman unuiniak tímiayi:

“Kuítrintin áishman ni ajarjyan arakan ti nukap juukmai.

¹⁷ Tura “¿Ti nukap asamtai tuiñ ikiustaj. Itiurkatjak?” tu enentáimsamiai.

¹⁸ Wats, wi nékajai. Winia ikiutái-jearun ashiran nú nan̄kaamas úntan najanatjai. Tura nuǰ ashí ikiustajai.

¹⁹ Nuñkia untsurǰ uwitin shiir pujustinian ikiusman takustatjai. Tuma asamtai, ayam-pran, yurumán, umaran shiir pujustatjai” timiai.’

²⁰ “Tura Yus nin chicharuk timiai “Netse. Yamái kashi jakattame. Nuñkia imiá núkap ikiusumna nusha zyana átata?” timiai” timiayi.

²¹ Nuyá Jesus timiayi “Shuar niñki kuitrin ikiauntumna nu, núnisaiti. Túrasha Yusjajǰ íismaka kuitrinchaiti.”

*Yus ni uchirǰn péñker wáinkiaiti
(Mateu 6.25-34)*

²² Nuyá ni unuiniamurǰn Jesus juna timiayi: “Warí yuarik pujustajǰ tura warin̄ entsartajǰ tusarum nuke ti enentáimsairap.

²³ Yus iwiaaku átinian amasu asa yurumkancha amastatui. Tura ju ayashniasha najana asa entsataincha amastatui.

²⁴ Chínkisha enentáimsatarum. Niisha arakmainiatsui. Juuk yurumkan ikiuiniatsui. Tuma ain̄ Yuska ni yurumátniurǰn tuke súawai. Atumsha chin̄kia nú nan̄kaamaschakaitrum.

²⁵ Tura ya shuarak, ti enentáimtana nujajǰ nú naya ajasminiaiti.

²⁶ Kame yúpchuch ana nusha túrachminiaititrumsha, çurukamtai chíkich ainia nusha ti enentáimtarum?’

²⁷ ‘Íistá, kukujsha takaachitiat tura nájanchitiat ti shírmach áiniawai. Yaunchu akupin Sarumún̄ ti shiir iwiarmamniuitiat kukujia tímianchayayi.

²⁸ Íis, nupa yamá tsakaawai tura kashin aents tsupikiar jinium apeánáawai. Tuma ain̄ Yus ti shiir awajeatsuk. Nuna tura asa atumniasha nú péñker wáitmakchattawak. çUrukamtai Yus nekas enentáimtsarum?’

²⁹⁻³⁰ Ju nuñkanam ana nu ti pachirap. Chíkich shuar, Yúsán nékainiatsna nu, warin̄ yuatajǰ, warin̄ umartajǰ nuna ti pachiniawai. Tura atumsha tu enentáimsairap. Urukataj, tírap. Ame Apa nayaimpiniam pujana nu, ashí atsumarmena nuna nékawai.

³¹ Antsu emka Yusna nu enentáimtsarum. Túrakrumñkia atsumamna nuna Yus suramsattawai.’

*Kuitian pachis Jesus unuiniamiania nu
(Mateu 6.19-21)*

³² ‘Winia murikrutiram ashankairap. Untsurǰchuitrum. Túrasha atumí Aparǰ ni akuptairin̄ pachitmakata ti wakerutmarme.

³³⁻³⁴ Kuitrum túj aa, nuǰ tuke enentáimtitiarme. Tume asamtai takakrumna nu surukrum atsumainia nu susatarum. Nuka en̄ketai arut ajatsna nuǰ en̄keatniua núnskete. Túrakrum nayaimpinmaya kuit amuatsna nu ikiauwearme. Nuñsha kasa nu kuitian kasamkataj tusa wayachminiaiti, tura kayáasha nu kuitian yúatniun tujintiawai.’

Aneerar wekasatniuitji

³⁵⁻³⁶ ‘Ju enentáimsatarum. Ni uuntri nuatnaikiatin námpernumiá taa, “uraitia” takui, takarn̄urǰ jinia ekeemakar wárik urattiai tusar nakáa pujuiniawai. Atumsha núnisrumek Wi atumǰ Uuntri támatat, shiir itiaatai tusarum anearum wekasatarum.

³⁷ Ni uuntri taak iwíáa pujuinian wáinkiarai nuka shiir pujuiniawai. Nu úntak iwiar, “misanam pujustarum” ni takarn̄urǰn títiatui tura yurumkan sústartatui.

³⁸ Kashi ajapén̄ taaksha tura tsawaána aǰ taaksha ni takarn̄urǰn iwíáa pujuinian wáinkiuñka, nu takarin̄ shiir pujuiniawai.

³⁹ Tura jusha nekaatarum. Jeñniua nu, kasa tátinian nékaitkuñka, iwíáa pujusaǰyi. Kasa wayá kasamkatniun suritkiáǰyi.

⁴⁰ Atumsha núnisrumek, anearum pujustarum. Wi Aents Ajasu tutai aya aneachmanum tátatjai” timiayi.

*Pénker takarin̄ yajauch takarniujajǰ
(Mateu 24.45-51)*

⁴¹ Nuyá Pítiur aniasmiayi “çAya ín̄k unuinartaj tusam nu métek-taku chicham támek. Kame ashí nekaawarat tusamek tame?’ timiayi.

⁴² Tutai Jesus timiayi “Atumsha péñker takatan wáinnua núnsketrume. Takatan wáinin̄ ni uuntri takatrin̄ takainia nuna, yurumátin̄ jeamtai, ayurkamna núiti ni ún̄trin̄ shiir umirna nu, tura péñker enentáimtana nu.

⁴³ Ni uuntri taa, takatrin̄ úmiatrusan̄ túran wáinkiuñkia nu wáinnusha shiir enentáimsamniaiti.

⁴⁴ Umirin asamtai, ni uuntri ashí ni warirín wáitrukat tusa apujstatawai. Nuna paant tájarme.

⁴⁵ Tura nu takatan wáinniusa “úuntur wau táchattawai” tu enentáimias, ni uuntri takarni-urín yajauch awajeakuinkia tura niñki ti yurumá, ti umar nampeakuinkia,

⁴⁶ nuñkia ni uuntri ni nákachmanum aya aneachma taa ti asutiáttawai. Umichu pujuinia nuí akupkattawai.’

⁴⁷ “Takarín ni uuntri wakera nuna nékayat, iwiartsuk umitsuk pujakka ti awatramu átatui.

⁴⁸ Túrasha takarín nékachu asa, asutniámmia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisan nankaamas seawartatui.’

Jesusjai shuar akannartatui

(Mateu 10.34-36)

⁴⁹ Jijiai nekapsatniua nútiskanak nunkanam jinia ikiapartaj tusan tamajai. Tura túrunat tusan ti wakerajai.

⁵⁰ Imiantinia núnisan itiurchat ukatruktatui. Nusha wárik amuukat tusan ti wakerajai.

⁵¹ “Ashí shuar shiir pujusarat tusa táwiti” tu enentáimturumek. Núchaiti. Antsu shuar tesanairat tusan táwitjai.

⁵² Yamái jukimiutak chikichik shuarnum senku ainia nu akannakartatui; menaintiu shuar ni shuarín jímíaran nakitrartatui. Jímíarsha ni shuarín menaintiun nakitrartatui.

⁵³ Apasha ni uchirín nakitrattawai. Núnisan uchisha ni aparín nakitrattawai. Nukusha ni nawantrín nakitrattawai, nawantrisha nukurín nakitrattawai. Tsatsarisha ni najatín nakitrattawai; najatisha tsatsarín nakitrattawai.”

(Mateu 16.1-4; Márkus 8.11-13)

⁵⁴ Jesus áentsun chicharuk junasha tímiayi “Atumsha nantu akaatainmaani kíarmatai “yutuktatui” tátsurmek. Nusha nekas tárume.

⁵⁵ Tura anaaraniá nuse násenkamtai “séejik átatui” tárume. Tura nekas tárume.

⁵⁶ Yurañminmasha nunkanmasha túruna nu nékarme. Túmaitiatrumsha ju tsawantaj túrunattana nusha çitiura nékatsrum? ¡Maaj, ántraitrumek!”

Nemasrumjaisha nawamnaikiata

(Mateu 5.25-26)

⁵⁷ Túrasha péñker ana nusha çurukamtai atumek enentáimsarum wáintsuram?

⁵⁸ Irutramuram úuntum juramkuinkia jintia wésamek “nuamtak iwiartatui” titiá. Túrachkumnigkia akupniunam juramkittiamé. Tura niisha suntarnum akuptamkattame. Tura niisha sepunam enketmattawai.

⁵⁹ Tura nekas tajai, nuí enkemamka ashí rearchisha akimachkumka jíinkisatme” tímiayi.

13

Ii enentái yapajiátniuitji

¹ Nu tsawantín chícham ujaktai tusar Jesusan tariarmiayi. Kariréa nunkanam Israer-shuar ni waakarín máawar Yus susatai tusar pujuiniaí, Piratu nin maa, nuna numpen waaka numpejai pachimpramun ujakarmiayi.

² Tura Jesus tímiayi “¿Warí enentáimsarum? Kariréanmaya áishman tárumna nu, chíchik Kariréanmaya áishmanjai nankaamas yajauch ásar túrunawarai çtu enentáimprumek?

³ Atsá; atumí enentái yapajiáchkurmeka núnisrumek atumsha jakattarme. Nuna paant tájarme, tímiayi.

⁴ Tura tiasiúchu áishman yakí jea Seruí kupiniak iniaak nekenkarmiania nu, ¿warí enentáimtarum? Chíchik Jerusarénumiá shuarjai nankaamas tunáa ásar túrunawarai çtu enentáimprumek?

⁵ Atsá, tájarme. Atumí enentái yapajiáchkurmeka núnisrumek atumsha jakattarme.”

Iikiu numi nereatsna nu

⁶ Junasha Jesus métek-taku chichaman tímiauyi. Júiti:

Shuar ni ajarín iikiu numin araamun takakuyi. Nerekchiash tusa iyumai. Túrasha nere atsumai.

⁷ Nuñkia ni ajarín wáinniu timiai “Antukta, menaintiú uwitin juna nere átai tusan waketrú pujajai; túrasha penké wáinkichjai. Ajakta. ¿Urukamtai ánttrash wajastata?”

⁸ Tutai ajá wáinin timiai “Atsá, uuntá; ju uwitin wajastí. Wajamurín takarsatjai tura péñker nunkan matsatkatjai.

⁹ Nujaí nerechampiash. Tura tuke nereachkuinkia nuñkia ajakta” timiai”, tímiayi.

Nuwan punuá kaarun Jesus tsuármiania nu

¹⁰ Ayampratin tsawantaj Israer-shuar iruntai jeanam Jesus unuiniak pujumiayi.

¹¹ Nuñsha nuwa pujumiayi. Nu nuwasha tiasiúchu uwitin tuke jaa pujumiayi. Íwianch nin yajauch awajash apuna tuke ikiamiyai. Túramu asa pañkái nakuenkataj tukamá penké tujinmiayi.

¹² Jesus nuna wáiniak, chicharuk “Nawantrú, ame jaamurmiya ankant ajasume” tímiayi.

¹³ Nuna tinia ni uwejejai antinmiayi. Tura nú chichamaik nuwasha pañkái nakuenkamiayi. Tura Yusa náarjin uunt awajsamiyai.

¹⁴ Tura Jesus ayampratin tsawantaj tsuaru asamtai, iruntai jea uuntri kajek iruntrarmia nuna tímiayi “Sais tsawantin takaschatniukait; ayampratin tsawantaj tsuámartaj tusarum táchatniuitrume. Sais tsawant ana nuí tátiniaitrume.”

¹⁵ Tura Jesus tímiayi, “¡Antar chichamtinia! ¿atumí waakarisha atumí umpuururisha yumi aartai tusarum ayampratin tsawantin atíarum júatsrumek?”

¹⁶ Tura ju nuwasha, atumí shuari Apraám shuarnumiá akiiniaiti. Nii tiasiúchu uwi Satanás yajauch awajsamujai jinkiamuyayi. Nincha ayampratin tsawant ain yajauch awajsamunmaya atíachminkiaiti” tímiayi.

¹⁷ Jesus nuna takui ni nemasrisha natsaárrarmiyai. Tura penké shuar ni péñker túramurjin wáinkiar warasarmiyai.

Mustasa jinkiaí

(Mateu 13.31-32; Márkus 4.30-32)

¹⁸ Nuyá Jesus tímiayi “¿Yusa akupeamurj warijiaín métek-takuit?

¹⁹ Mustasa jinkiaíjiaí métek-takuiti. Mustasa jinkiaíncha shuar ni ajarjin araamiayi. Tsapaí, tsakaak, uunt numi ajasmiayi. Ti uunt asamtai chiní ni kanawen pasunmarmiyai.”

(Mateu 13.33)

²⁰ Tura junasha tímiayi: “¿Yusa akupeamurj warijiaín métek-takuit?

²¹ Tanta wakaprutaia métek-takuiti. Arinia núkap ana nuí nuwá wakaprutain ishichik enkéamiayi. Túram ashí wakapruamiayi.” Tu tímiayi.

Yupikiach waiti

(Mateu 7.13-14, 21-23)

²² Jesus Jerusarénum jeattsá weak untsurí peprunam wayá unuiniarkutak wémiayi.

²³ Weaj chikich shuar aniasmiayi “Uuntá, ¿uwemainia nu ishichikiait?”

²⁴ Tutai Jesus tímiayi “Yupikiach wáitiniam wayataj tusam ti wakeritiarum. Kame untsurj wayataj tusar wakeriartatui, túrasha tujinkiaratui, tájarme.

²⁵ Jeá nérenniurj wáitin epenmiatai, atumsha áá wajarum nu, wáitiniam wajasrum untsúakrum “Uuntá, uratritia” titiatrume. Túrasha “Nékatsjarme. ¿Tuyantskaitrum?” turamatrume.

²⁶ Nuyá átum titiatrume “Túrasha, uuntá, iisha ámijiaí yurumámji, ámijiaí umarmaji. Tura ii pépruríncha unuiniamame.”

²⁷ Túrasha nii titiatui “Tuyantskaitrum, nékatsjarme, tátsujrumek. Yajauch túrintirmeka winiyañka kanaktiarum.”

²⁸ ‘Nuyá Apraámsha, Isaksha, Jakupsha tura ashí Yúsnan etserin Yus akupeana nuí wayawaru wáinkiarum tura áá ajapam pujusrum ti útkuram naim tásarara ajattarme.

²⁹ Tura Yus akupeana nuí, nantu tatainmaaniyasha nantu akaatainmaaniyasha, arakiasha, nuñkaaniasha taar, imia Israer-shuarachaitai yurumátaí tusar pujusartatui. Tura atumsha, “Apraám shuáraitjai” táyatrum, wayashtatrume.

³⁰ Nuñsha yamáí ukunmaani ainia nusha emka ártatui; tura yamáí emka ainia nusha nuñsha ukunmaani ártatui.”

Jerusarénumaani Jesus wémiayi

(Mateu 23.37-39)

³¹ Nu tsawantaj Pariséu aents Jesusan tariar tiarmiyai “Erutis mantamattsá wakerut-mawai. Tuma asamtai juyañka wetá.”

³² Tutai Jesus tímiayi “Werum nu kujancham ju titiarum: “Ístá. Yamaisha ishichik tsawant iwianchin jikin akupkartajai; túran jaancha tsuáartajai. Tura ukunam amuktatjai.”

³³ Tura Jerusarénumaani ishichik tsawant tuke wétiniaitjai. Yúsnan etserin aya Jerusarénuman jákatniuiti.’

³⁴ ¡Jerusarénumatirum, Yúsnan etserin máiniaitrume; tura Yus akatar akupturmakmania nusha kayajai tukurum máiniaitrume! Tuma ain atash ni shiamprin etektana núnisnak Wisha weaktasan wakerimjarme, túrasha nakitramarme.

³⁵ Iistarum. Atumniasha Yus ajapramaitrume. Tura “Yusa náarjin winiana nu, shiir atí” títiatrumna nú tsawant jeatsain penké wáitkiashtatrumé. Nuna tájarme” tímiayi Jesus.

14

Áishman eaak-jaan Jesus tsuármiania nu

¹ Ayampratin tsawantaj Pariséu uuntri jeen Jesus yurumáttsa wémiayi. Tura chíkich Pariséu wariniak túrat tusar ii pujuarmiayi.

² Nuj áishman eaak-jaa Jesus pujamunam naka pujumiayi.

³ Jintinniuncha Pariséuncha Jesus aniasmiayi “¿Warí tárur? ¿Ayampratin tsawantaj jaa tsuárminkiat. Tsuárchamniakait?” tímiayi.

⁴ Tura niisha áimtsuk pujuarmiayi. Nuñkia jaan antin tsuármiai. Tura “shiir wetá” tímiayi.

⁵ Nuyá Pariséun chicharuk, “Atumí umpuurarisha, waakarisha wáa táurmanum akaiki iniamtai, ayampratin tsawant ain nu chichamaik júatsrumek” tímiayi.

⁶ Takui áimkiatniun penké tujinkiarumiayi.

Nuátnaikiatin nampernum ipiaamu ármia nu

⁷ Ipiaamusha penkeri pujutainium pujustaisar ti wakeruiniakui, Jesus nuna wáiniak juna jintinramiayi:

⁸ “Nuátnaikiatin nampernum penkeri pujutainium pujusaip. Nuj pujakminkia, chíkich ámjijai nankaamas penkéri táchatpiash.”

⁹ Tura ipiatmania nu chichartamuk “Chíkich iiktusta” turamchatpiash. Nuñkia chíkich nánkatkamu pujutainium wéakum natsartatme.

¹⁰ Antsu ipiatmakmin, nánkatkamu pujutainium pujustá. Nuñkia ipiatmamnia nu chichartamuk “Amikru, ámeke juí penkeri pujutainium pujustá” turamtatui. Nujai chíkich ipiaamu ainia nu, “nekas penkerinti” turamartatui.

¹¹ Iimiata, “penkerintjai” tu enentáimtumá nuka pééchach awajnastatui. Tura ímianchach enentáimtumána nuka waantu ajastiniati.”

¹² Nuyá Nin ipiaamua nuna chicharuk tímiayi “Amesha yurumáiti tusam untsuktajtsam wakerakmeke, ame amikrumsha, yatsumsha, ame shuarumsha, írutramuram kuítrintin ainia nusha ipiaawaip. Nii ipiaamka, ataksha íksan ámin ipiatmashtatuak. Nujai akikma átatme.

¹³ Antsu yurumáiti tusam untsuktajtsam wakerakmeke, kuítrincha, wekaicha, shutuapsha, kusurusha ipiaawarta.

¹⁴ Niisha akirmaktinian tujintiainiawai. Péñker shuar nantakiartatna nuj akinkiatatme. Nu tuma asantai warastatme” tímiayi.

Uunt namperan Jesus nekapmá chichasmiania nu

¹⁵ Nu misanam pujuarmia nuyá, chíkichik Jesus chichaamun antuk, Jesusan tímiayi “Yus akupeamunam pachiiniak, yurumkunka ti shiir ainti.”

¹⁶ Nuna takui Jesus juna jintintiamiayi: “Áishman namperan nájanuk, untsurí shuaran taartí tusa akatar akupkamai.

¹⁷ Yurumátin jeamtai “Winitiarum, yurumátin jeayi” tu tiarta tusa ni takarniurin akupkamai.

¹⁸ Tura winichminiatiji tusar ashí ujakarmai. Chíkich timiai “Nuñkan yamáí sumarmakjai. Iyutaj tusa wéakun winishtatjai. Tsankurturti” timiai.

¹⁹ Tura chíkich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsankurturti” timiai.

²⁰ Tura chíkich chichaak “Yamáí nuatnaikajai. Tuma asan winishtatjai” timiai.

²¹ Takarin waketki ni uuntrin ashí nuna ujakmai. Nuna antuk niisha kajekmiayi. Tura ni takarniurin timiai “Ju péprunam péñker jintianmasha tura uchich jintiachinmasha weme, kuítrincha tura wekaichasha, shutuapsha, kusurusha itiaarta.”

²² Nuyá ukunam ni takarniurí taa chicharuk “Uuntá, ame turutmiamna nútiksanak túramjai; túrasha tuke ankant awai” timiai.”

²³ Tutai ni uuntri chichaak “Jintianam weme, chíkich jintiachiniam weme, wáinmena nu ashí awayawarta. Winia jearuj piakat tusan wakerajai.

²⁴ Emka ipiaawarmajnia nuka penké chíkichkiksha winiñkia yurumáchartatui, tajarme’ tímiayi.”

Kristu nemarsatin yúpichuchichuiti

²⁵ Untsurí aents Jesusjai irunki wearumiayi. Niisha nuna apajas iis juna tímiayi:

²⁶ “Shuar ni aparíncha, ni nukuríncha, nuaríncha uchiríncha, yachíncha, umajíncha Wijíají nankaamas enentáimtakka, tura shiir pujustinian wakerak Winí winitniun nakiti-akka winia unuiniamur ajaschamniaiti.

²⁷ Ni wakeramurín ajakeak ni krusrj yanakj nemartatsna nu winia unuiniamur ajaschamniaiti.’

²⁸ ‘Jeá yaki jeamtaj tusam wakerakmekka, kuítian urutmak ajapawaintiaj tusam tura urutmajaink¹ amukaintiaj tusam emka enentáimsashtatmek.

²⁹ Túrtsuk aya ukura iniaisam amuktin tujinkiakmiñkia, nuna wáiniainia nu, wishiki-ainiak juna tiartatui:

³⁰ “Tiskua. Nu shuar jeamtinian nankamamiayi. Túrasha amuktinian tujinkiamiayi.”’

³¹ “Tura uunt kapitián chíkich kapitíanjaj mesetan najanatin áchatpiash. Emka, niisha pujus, tias mir (10.000) suntarjaj painti mir (20.000) suntar winiana nuna nupetkaintjash tusa enentáimsashtatuak.

³² Tujintiakka, chíkich kapitíanj jeachat pujaanak, nawamnaikiatai tusa akatar akupkash-tatuak.

³³ Wats, “Kristu unuiniamurj ajastinjaj, wi takakjana juna warí winia itiurtawa” tu enentáimsatniuitrume. Túrachkurmeka winia unuiniamur ajastin tujinkiarne.’

Wee michumarka yajauchiiti

(Mateu 5.13; Márkus 9.50)

³⁴ “Weeka jeaku penkeraiti. Tura michumarka çitiurak atak penker ati?”

³⁵ Wee michumarka araaamatniunmasha yayaçatsui. Tura tsuatnum ikiusmasha ántraii. Aya ajapatniukete. Kuishim ákuñkia antuktarum” tímiayi.

15

Jesus murik menkakamu chichaman unuiniamiania nu

(Mateu 18.10-14)

¹ Akupniu kuítrín-juu tura yajauch shuarsha Jesusan anturkatai tusar tarú wearmiayi.

² Tuma asamtai Paríséusha, Israer-shuara jintinniurjsha Jesusan áujmatainiak “Júsha tunáa shuaran itiaawai tura niijjaj yurumáiniawai” tiarmiayi.

³ Nuna tuiniakui Jesus ju métek-taku chichaman jintintiwarmiayi:

⁴ “Shuar siañ (100) murikiun takuschampias. Nu siánnumiá chíkichik menkakamtai nuwintia nuíwinkia ni matsatmaríin ikuuak, menkaka nuna ti eakchattawak. Wáintsuk iniaisashtatui.

⁵ Tura wáiniak yakainium awañkek waras jeen wáketui.

⁶ Tura jeen jeá ni amikrín, írutramuríncha ikiaanak “Wijíaj warastarum. Murikiur menkaka nuna wáinkiajai” tawai.

⁷ Wats, nuwintia nuíwi penker shuar akui nayaimpiniam warastin awai. Tura antsu chíkichik yajauch shuar ni enentáin yapajíamtainkia, nú nankaamas warastin átatui, tájarne’ tímiayi.

Kuit emenkakman Jesus unuiniamiania nu

⁸ ‘Nuyá chíkich enentáimsatai. Nuwá tias kuítian takakna nuna chíkichik menkakamtai, wáinkiataj tusa jinia ekeemak, jeen japimiak émamkes eakchattawak.

⁹ Tura wáiniak ni amikrín, írutramuríncha ikiaanak, “Wijíaj warastarum. Kuit menkakamia nuna wáinkiajai” tawai.

¹⁰ Núnisañ yajauch shuar ni enentáin yapajíamtai, Yusa suntarj matsatmanum ti warastin awai” tímiayi.

Uchi ni aparíin waketitniun Jesus unuiniamiania nu

¹¹ Nuyá Jesus juna unuiniamiayi:

“Áishman jimiara uchin takakuyi.

¹² Tura pátatka uchi ni aparín timiai “Apawá, surustiniaitmena nu yamá surusta.”

¹³ Tutaí ni aparj ni kuítrín jímiapetek nakak mai uchin susamai.

¹⁴ Ishichik tsawant nankaamasaj pátatka uchi ni warirín irur jukí jeachat chíkich núnkanam wémai. Nuísha nápkamas yajauchin túrak kuítrín ashí ajapamai.

¹⁵ Núnisañ ashí amuuka ajñ nu nunkanam ti tsuka ámai. Niisha núnisañ tsukaríin wáitsamai.

¹⁶ Tímak takatan eaktajtsa nu nunkanmayá apachíin werimiai. Nu áishmansha kuchirín wáitrukta tusa akupkamai.

¹⁷ Uchi ti tsukamak kuchi ukatramun niisha yuátajtsa ti wakerimiai. Túrasha penké súcharmai.

¹⁷ Tumáa pujus nuin̄kia enentáimpramai. “Winia aparuj̄ takau shuar péñkeran ti yurumáiniawai. Tura wikia jūi tsukaruj̄ wáitijai.

¹⁸ Wats, aparuj̄ waketkitjai. Tura aparun chicharkun “Apawá Yúsjaisha ámijjaisha tunaan túrajai, titiajai.

¹⁹ Ame uchiram áchamnaitjai yamaikia. Ame takarniurmea áantsanak átaj tusan wakera-jai” titiajai” tu enentáimsamai.

²⁰ Tura wajaki ni aparuj̄in waketkimiai’ tímiayi.

“Tura ni aparj̄sha jeachat winian wáiniak waitnentramai. Aparj̄ tséken̄ki in̄kiun̄ miniakak mukunámai.

²¹ Nuin̄kia uchirj̄sha timiai “Apawá, Yúsjaisha ámijjaisha tunáan túrajai. Ame uchiram áchamnaitjai.”’

²² ‘Túrasha ni apar̄n̄kia ni takarniur̄in chicharuk “Ti pen̄ker push̄i itiarum áentsratarum, timiai. Tura uwejn̄um aweetaisha aweemtikiatarum. Tura sapat̄cha aweemtikiatarum.

²³ Túrurum waaka nueram ana nu maatarum. Námper nájankur shiir enentáimsar yurumámi.

²⁴ Warí, jū winia uchir jakaapitia tu enentáimsamjai. Túrasha iwiaakui. Men̄kakama nuna wáinkiajai.” Nuin̄kia ti warasarmai’ tímiayi.

²⁵ ‘Tumaj̄ iwíá̄i úchikia takatnum pujumai. Tura wáketuk, jeá nuntumas jantsemáiniak túntuiyamun antukmai.

²⁶ Nuin̄kia yain̄tr̄j̄ matsatun chikichkiniak untsuk “¿Warimpait?” timiai.’

²⁷ ‘Tura nii chichaak “Ame yátsum tayi. Túramtai ame apa waaka nueram maatai tawai, ame yatsum péñker tau asamtai” timiai.’

²⁸ ‘Tura iwíaj̄i uchi kajek wayat̄niun̄ nakitramai.’

‘Tuma asamtai ni apar̄j̄iintiuki “wayata” timiai.’

²⁹ ‘Tura uchisha apar̄in̄ chicharuk “Wisha ámin umirkun untsurj̄ uwitin ame takatrumin túraitjai. Nu nékame. Túrasha winia amikruj̄aj̄ námper najanatin chiipiuksha pen̄ké surichuitme.

³⁰ Tura jū ame uchiram nuwaj̄aj̄ yajauchin túrak ame kuítrumin wasurkania nu támatai, waaka nueram máachumek” timiai.’

³¹ ‘Takui apar̄j̄ chicharuk “Uchirú, ámeká wíjjaj̄i tuke pujame. Tura wi takakjana nusha ash̄i áminuiti.

³² Tura ame yatsum jákaiti tu enentáimsamij̄ nu iwiaakuiti. Men̄kaka nu yamaikia wáinkiaji. Tuma asamtai námper najanar waraschatniukaitij̄” timiai’ tímiayi.

16

Takatan wáinin

¹ Jū métek-taku chichamnasha Jesus ni unuiniamu⁷ ‘Tura nii chichaak “Ame yátsr̄in unuiniamiayi.

“Kuítrintin áishmañka takat̄r̄in wáinniur̄i ámai. Tura nérenniun ujainiak “Ame wáinniuram ame kuítrumin náñkamas ajapeawai” tiarmai.’

² ‘Nuna antuk ni wáinniur̄in untsuk “¿Warinia jūsha turamainia? timiai. Yamaikia winia wáinniur áhattame. Tuma asamtai winia kuítruj̄aj̄i ititurkamea nu iniaktursata” timiai.’

³ ‘Tutai takatan wáinin enentáimsamai. “Maaj, wisha iturkatjak, timiai. Nuñka táurtinniaasha jeatsjai. “Kuit surusta” titinniaasha natsamajai.

⁴ Wínia takatur atsakui yurumkan ajamprusarat tusan túratajna nuna nekajai” tu enentáimsamai.

⁵ Nuyá nérenniun tumashmaku armia nuna añkant añkant untsukarmai. Emka tamia nuna chicharuk “¿Winia úuntur urutma tumashmakuitiam?” timiai.’

⁶ ‘Niisha ámiuk “Asuitin siañ taru tumashiitjai” timiai.’

‘Tutai takata wáinin chicharuk “Pai. Papinium tumashrum ana nu juá: wárikmasmek pujusam, nu papí jaakam, chíkich papinium aya sen̄kuentachik aarta” timiai.’

⁷ ‘Nuyá chíkich tumashmaku támatai “¿Amesha urutná tumashiitiam?” timiai.’

‘Tutai nii chichaak “Shana siañ taru tumashiitjai” timiai.’

⁸ ‘Tutai “Pai. Papinium tumashrum ana nu júiti. Chíkich papinium aya uchentak aarta” timiai.’

⁸ ‘Nuyá takata wáinniu uun̄tr̄i nuna nekáa “Nii yajauch túriniaiat imiá enentáimniuiti” timiai’ tímiayi.

Nuyá Jesus tímiayi ‘Yus-shuarj̄aj̄i nan̄kaamas Yus-shuarcha ajjjaj̄i ni túratniuriniak takainiak imiá enentáimkia ániawai.’

⁹ ‘Jú nunkanam anankatin átsuk. Tura kuitsa aya jú nunkanmayanekte. Tuma asamtai atumsha kuitrumjai “shuaran yaiñtaj” tu enentáimsatarum. Kuitjai yaiñtin amuukamtai atumsha amuicha jeanam ipiaamu átaj tusarum túratarum.”

¹⁰ ‘Shuar ishichik takakna nujai péñker túrakka, núkap takakna nujajsha péñker túrattawai. Tura ishichik takakna nujai péñker túrachkuñka, núkap takakna nujajsha péñker túrashtatui.

¹¹ Tuma asamtai jú nunkanmaya anankartin kuitjai péñker túrachkurmeka, tuke átin ana nujai takastincha çitiur takastarumek?

¹² Takakme nuna Yus ikiatmasuiti. Nujai péñker túrachkurminka, atumnia átinia nuna çitiurak suramsat?’

¹³ ‘Takarniurj jimirá úuntrintin ajastinian tujintiawai. Warí, chikichnaka aneak chikichnaka nakitrashta túrattawai. Turya senkuentachik aarta” timiaituak. Chikichan umiruk chikichnaka umirkashtatui. Yussha kuitcha mái-metek enentáimtuschanmaitrume” timiayi Jesus.

¹⁴ Pariséusha kuítian anen armia nu, ashí ni táman antukar Jesusan wishikrarmiayi.

¹⁵ Túmakui Jesus nin timiayi “Atumsha aents íimianum péñker awajmamprume. Túrashta atumí enentáincha Yus péñker nékawai. Kame winia “nankaamantuiti” turutit tusa wakera nuna Yuska nakitiawai.’

Yaunchu etserkamu, yamá etserkamu

¹⁶ ‘Juan étsertsain Muisáis aar akupkama nunasha tura Yúsnan etserin unuinarmia nunasha antuktin ármiai. Tura yamaisha tímianiai ti shiir chicham awai. Yus akupeana nuj urukukit nuka paant etserkamuiti. Tura ashí shuar nuj pachiinkiataj tusar ni kakarmarjijain ti takainiawai.’

¹⁷ ‘Túrashta yaunchu akupkamu ashí chicham uminkiatniuiti. Nu chicham uminkiashtinka nayaimpisha nunkaasha amukatniujai nankaamas itirchataiti.’ *

¹⁸ ‘Áishman nuarjñ ajapa chikichan nuátkuñka tsanirmawai. Tura nuwá ajapamu niinirtakka nusha núnisan tsanirmawai.’

Kuítrintin áishman Rásarujai

¹⁹ ‘Áishman kuítrintin ámai. Niisha imiá shiir pushin ti kuit ainia nujai iwiarmamniuyi. Tura tuke tsawant yurumak ti kuit amia nujai namperan najannuiyi.

²⁰ Tura kuítrincha ámai ni naarj Rásaru. Niisha kuchapruku tunamaruyi. Tuke tsawant kuítrinniu wáitirijn pujuyi.

²¹ Ti tsukamak kuítrinniu misarinia kakekan yuattsa wakerimiai. Tura yawasha ni kuchaprjñ nukatiarmai.

²² Kuítrincha jakamai. Jakamtai jaka shiir pujutainium, Apraám pujumia nuj nayaimpinmaya suntar júkiarmai. Kuítrinniusha jakamai. Jakamtai iwiarsarmai.

²³ Jaka pujutainium wáitias pujus, pañkái íimias, Rásarun Apraámjai pujuinian wáinkiamai.

²⁴ Wáiniak untsumuk “Apawá Apraamá wáitnentrurta, timiai. Rásaruka tsara uwejejai entsan uchupir winia iniairun imichturat akupturkata. Wisha juj jinium pujusan ti waitiajai” timiai.’

²⁵ ‘Tutai Apraám timiai “Uchirú enentáimpratá. Ame nunká iwiaaku pujusam ti shiir pujumame. Antsu Rásaruka nuj ti yajauch pujumai. Tura niisha yamaikia juj áyamui tura ámeka wáitiame.

²⁶ Tura nú arant nánata ti uunt awai. Tuma asamtai juyá aj wétinian wakeruiniayat tujintiainiawai. Tura ajya juj tátinian wakeruinia nusha tujintiainiawai.” ’

²⁷ ‘Nuñkia kuítrintin timiai “Nuñkia apawá Apraamá, júna seajme. Winia aparú jeen Rasaru akupturkata.

²⁸ Nujsha winia yatsur senku matsatainiawai. Niisha jú wáitsatniunam tácharat tusa ujákartí, tájame” timiai.’

²⁹ ‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.” ’

³⁰ ‘Tutai kuítrintin áimkiamai “Túrashta apawa Apraamá, antsu jakamunmaya nantaki, shuar we ujakam enentáin yapajjáwarainti.” ’

³¹ ‘Tura Apraám timiai “Muisáis áarman tura Yúsnan etserin áarman anturainiachkuñka jaka nantaki we ujakmasha antukchartatui” timiai.” Tu áujmatsamiayi Jesus.

17

Yajauch túrumtikiatin ti tsúumainti
(Mateu 18.6-7, 21-22; Márkus 9.42)

* 16:17 Mateu 19.1 ya senkuentachik aarta” timiai-12; Márkus 10.1-12

¹ Jesus ni unuiniamurin juna tímiayi, “Aentsun yajauchin túrumtikiattana nu tuke átatui. Tura shuar ni ain tunaan wakerumtikna nu anearti.

² Ju shuar uchich ainia nuna yajauchinium túrumtikna nuna Yus imiá asutiáttawai. Tuma asamtai nuna túratsaın uunt kayajai kuntujnum jinkiá nayaantsanam ajunkam maak ainti.

³ Túrasa atumek ímiastarum. Ame yatsum ámin tunáa túrutmamtaınkia chicharkata; tura niisha “tsaņkurturta” túramkuınkia tsaņkurata.

⁴ Chikichik tsawantinin siati túrutmamtai, tura “tsaņkurturta, atakka túrashtajai,” siati túramkuınkia, tuke tsaņkurata.”

Yus nekas enentáimtakrikia tujinkiashtatji

⁵ Jesusa unuiniamurı Nin chicharuk “Yus enentáimtajnia nú naņkaamas enentáimtustin yáınmaktá” tiarmiayi.

⁶ Tutai Jesus tímiayi “Mustasa jinkiá ti ishitiúpchich ana núnisan ishichkisha Yus enentáimtaitkiurmeka, sikiumuru numi wajana nu, “Wajamurmıyaņka ukuiniakam nayaantsanam wajasta” tákurmin nú numi umirtamkainti.”

Yusa takatri takasar “ti penker túraitji” tichatniuitji

⁷ ‘Atumı takarnıurı arakmasua amik, waakancha iis támatı, ģnú chichamaik amesha, “Winitıá, yurumáitiá” tíıntmek?

⁸ Atsá. Antsu, “yurumak iwiarturata. Wi yurumátin tura umartincha surusminiam iwiarnarta. Nuyá ame yurumátá.” Nu tichaintmek.

⁹ Nii túratın ana nunak túratsuk. Tuma asamtai yumınsashtatme.

¹⁰ Atumsha núnisrumek Yus túramna nu ashı umikiam “ti penker túraitjai” tichatniuitme. Antsu “aya ii túratniurı ana nuke tura asar iikıa ántrıitji” tíıniaitme.” Tu tímiayi Jesus.

Tias áishmaņkan tunamarun Jesus tsuáramıania nu

¹¹ Jesus Jerusarėnum wesa Kariréa nuņka ikiuki Samaria nuņkanam naņkaamakmiayi.

¹² Tura péprunam jeamtı, tias áishmaņ ripra suņkurjai tunamaru armıa nu, arant wajasarmıayi.

¹³ Tura untsumainiak “Uunt Jesusá, waitnentrurta” tiarmiayi.

¹⁴ Jesus nin wáiniak, “Pátrıi werirum iniaktumastarum” tímiayi.

Tura wesar pénker ajasarmıayi.

¹⁵ Nuyá chikichik ni tsuamarman nekáa kakantar chichaki Yusa náarın uunt awajki waketki Jesusan tarımıayi.

¹⁶ Yumınsataj tusa Jesusan tikishmatar piniakumar tepesmiayi. Nu áishmaņka Samari-anmayayuyı.

¹⁷ Nuna wáiniak Jesus tímiayi “Tsuámaru tíaschakait. ģChikich nuiwisha tui pujuinia?

¹⁸ ģJu yajaya áishmaņ niņkik Yusa naarı uunt awajsataj tusa waketki tai?”

¹⁹ Nuyá áishmaņkan tímiayi, “Winia nekas enentáimtura asam pénker ajasume. Wajakim shıir weta” tímiayi Jesus.

ģYusa akupeamurı urutaik atı?

(Mateu 24.23-28, 36-41)

²⁰ Pariséu aents Jesusan aniak “ģYusa akupeamurı urutaik atı?” tiarmiayi.

Tutai Jesus tímiayi, “Yusa akupeamurı paant wáinkıachminıaitı. “Yamaı naņkamnayı” tıchamııaitı.

²¹ “Juı awai, nuısha awai” tıchamııaitı. Warı, Yusa akupeamurııkia atumıın pujawai” tímiayi.

²² Nuyá ni unuiniamurın chicharuk juna tímiayi: “Tsawant jeattawai atumsha Winia Aents Ajasu tutain “aya chikichik tsawantkesha Nii wáinkıarkıa mak” turuttıatrume. Túrasa tujinkııattarme.

²³ Aents Ajasu tutai “juı pujawai, nuısha pujawai” tuıniakui werıırap. Tana nu nemarıırap.

²⁴ Wi, Aents Ajasuıtjıana nu tátinian tsawantur jeamtı paant wáıtıııattarme. Peem péetuk ashı nayaimpin tsáapnı awajna núnisan wi taamu paant átatui.

²⁵ Tura nu túruntsaın yamaı pujuinia nu Winia nakıtrııniakui ti wáıtsatniııtjai.

²⁶ Winia atak tátinıurı jeamtı, yaunchu Nuáı pujumıa nú tsawantin túrunamıa núnisan túrunattawai.

²⁷ Yurumáwarmıayi, umararmıayi, nuatnaıkiarmıayi, ni nawanrıı nuatnakat tusa surukarmıayi. Tumáa pujuıniıı Nuáı uunt kanunam enkempramtı, amaarak nu aentsnasha mash amuukarmıayi.

²⁸ Tura Sutuma péprunmasha Rauta írutrıamurısha núnisanı Yusa asutiátnıurı enentáimtutsuk pujuarmıayi. Yurumáwarmıayi, umararmıayi, sumakarmıayi, surukarmıayi, ajancha ajarmıayi, jeanča jeammarmıayi.

²⁹ Tura Raut Sutuma péprunmaya̍ jìinkimtai asupri tutai kaya keek yútana áintsan̍ nayaimpinmaya̍ kakeetuk nu áentsun mash máawarmiayi.

³⁰ Núnisan̍ winia atak tátiniur jeamtai enentáimtsuk pujusartatui.

³¹ Nu tsawant jeamtai je̍g yakiin̍ pujana nú shuar ni warir̍in achiktaj tusa akaikishti. Je̍g wayashti. Tura kampunniunam wekaana nú shuar ni je̍en waketkishti.

³² Rauta nuar̍j túrunamu enentáimpratarum.

³³ Aya ju̍ nuñkanmaya̍ enentáimias “iwiaaku átaj” tana nu ni iwiaakmar̍in emen̍kákttatui. Tura ju̍ nuñkanam ni iwiaakmar̍in emen̍kana nu nekas iwiaakma ana nuna wáinkíáttawai.

³⁴ Paant tájarme. Nú káshitin̍ jímíará áishmañ nuu peaknumañ kanúu tepeartatui. Chikichik junaktiatui, chíkichkia ikiunkittiwai.

³⁵ Jímíará nuwá máí-metek nekée pujuartatui. Chikichik junaktiatui, chíkichkia ikiunkittiwai.

³⁶ Jímíará áishmañ kampuniunam wekainiartatui. Chikichik junaktiatui, chíkichkia ikiunkittiwai.” Tu tímiayi.

³⁷ Nuna antukar “Uunta ¿tu̍j túrunatta?” tiarmiayi.

Tutai ni chichaak “Jaka tepana nu̍j chuan̍ káutkartatui.”

18

Shuar yawetsuk Yúsán tuke áujsatniuiti

¹ Shuar yawetsuk Yúsán tuke áujsatniua nuna unuiniartaj tusa Jesus ju̍ métek-taku chichaman tímiayi:

² “Chíkich péprunam shuaran akupin amai. Nú áishmañ Yúsánsha ashamchuyi; shuárnasha péñker enentáimtichuyi.

³ Tura nú péprunam waje amai. Niisha shuárán akupniun chicharuk “Áishmañ winia yajauch awajtusmania nu iirtusta” tusa tuke waketrú pujuyi.

⁴ Yámankamtaikkia nin anturkatniun nakitmiiai. Tura ukunam enentáimias “Wisha Yúsán ashamachiatnak shuárnasha péñker enentáimtichuiatnak ju̍ waje tana nuna túrattajai.

⁵ Warí niisha tuke taa itit awajatsuk. Tuma asamtai nin kajerkañ tusan wárik túrattajai” tímiayi.

⁶ Nuyá uunt Jesus tímiayi “Shuaran akupin yajauchiitiat nuna timiai.

⁷ Tura Yus ti péñker asa, ni achikmar̍in tsawajsha, káshisha untsuamka nú nan̍kaamas anturkashtatuak. ¿Yáitsuk men̍kakatuak?

⁸ Atsá, wárik yáinkíartatui, tájarme. Tura Wi Aents Ajasuitjiana ju̍ atak támatai, ¿shuaran tuke Winia nekas enentáimturainia nuna wáinkiatjash?” tímiayi Jesus.

Pariséusha, kuítian-juuncha Yúsán áujsarmia nu

⁹ “Péñkeraitjai” tu enentáimtumainiak chikichnaka yajauch enentáimtiarmia nuna Jesus nekapmá chichasmiayi. Juna tímiayi:

¹⁰ “Jímíará áishmañ Yusa Uunt Je̍en Yus áujsatai tusar wearmai. Chíkichkia Pariséuuyi, chíkichkia kuítian-juuyi.

¹¹ Pariséusha wajakí Yúsán áujuk júnis tímiayi: “Yusrú, chíkich áishmañ kasa, yajauch, tsanirmau ainia nujaj métekcha asan yuminsajme. Tura ju̍ kuítian-juu wajana jújajsha métekchaitjai.

¹² Warí, Ame akupkamna nuna inian̍kasan wisha chikichik semanatin̍n jímíará tsawant ijarman áujeajai; tura wi achiajna nuna tiásnumiã chikichkiniak Yúsánit tusan akankan súajai.” Tu tímiayi.

¹³ Tura kuítian-juusha arant wajas, nayaimpinmaan̍j pankáñ ímsatniunkesha natsaãmak, tsunsuma, ni netsepen awatí “Yusá, ti tunaitjai. Waitnénturrtá” timiai.

¹⁴ “Wats tájarme, nu kuítian-juu shuar Yus ímmianum ni enentáñ péñker awajnas ni je̍en waketkimiai. Tura Pariséuka tamia núnisan̍ waketkimiai. Nekaatarum. Shuar nan̍kaamantu enentáimtumana nuka péjchach awajnatatui. Tura antsu péjchach enentáimtumana nu, nan̍kaamantu awajnatatui” tímiayi Jesus.

Uchisha Jesusna áminiaiti

(Mateu 19.13-15; Márkus 10.13-16)

¹⁵ Jesus antin̍kiarat tusar uchín itíariarmiayi. Tura Jesusa unuiniamur̍isha nuna wáinkiar suritkiarmiayi.

¹⁶ Tura Jesus nin untsukar tímiayi “Uchi Winí winitin̍ tsan̍kamkatarum, surimkiarap. Enentáimsatarum. Uchichia áintsan̍ enentáimtumana nú shuárak Yus ni enentáin akupin ajasminiaiti.

¹⁷ Uchi ni úntr̍in umira núnisan̍ shuar Yúsán umíachkunka Yus ni enentáin akupin ajaschamniaiti.” Tu tímiayi Jesus.

Kuítrintin áishman Jesusjai áujmatsamiania nu

(Mateu 19.16-30; Márkus 10.17-31)

¹⁸ Shuara uuntri Jesusan tari áujsamiaiyi. “Uuntá, amesha péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

¹⁹ Tutai Jesus, “¿Urukamtia Winia, péñkeraitme, túrutam? Aents péñkerka atsawai. Aya Yusak péñkeraiti.

²⁰ Tura Yus akupkamu ana nu péñker nékame. Tsanirmawairap, mankartuawairap, kasamkairap, tsanumprurairap, ame apasha, nukusha shiir enentáimtustarum. Nusha nékame” tímiayi.

²¹ Tutai áishman tímiayi “Uuntá, úchichik mash umiki tsakaruitjai.”

²² Jesus nuna antuk “Chikichik taatramsaí, tímiayi. Ame takakmena nu ashí surukam kuítrintincha ainia nu susarta. Nuiñkia nayaimpiniam kuítrum átatai. Túram nemartustaj tusam winitia.”

²³ Tura nuna antuk, nu áishman ti kuítrintin asa ti kuntuts enentáimpramiayi.

²⁴ Tura kúntuts enentáimprantai Jesus nuna nekáa “Kuítrintin ainia nu Yus akupeamunam pachiinkiatin ti iturchataiti, tímiayi.

²⁵ Kamiriuka, uunt ana nu, auja jiiin wayatin iturchataiti. Tura shuar kuítrin ti enentáimtana nu Yus akupeamunam pachiinkiatin nú nankaamas iturchataiti.” Tu tímiayi.

²⁶ Tura nuna antukarmia nu tiarmiayi “¿Nuiñkia yaki uwempramniat?”

²⁷ Tutai Jesus tímiayi “Aents tujintiainia nuna Yuska páchitsuk túramniati.”

²⁸ Nuyá Pítiur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

²⁹⁻³⁰ Tutai Jesus tímiayi “Shuar Yus akupeana nuna túrataj tusa ni jeen ikiuakka tura núnsan ni aparíncha, nukuríncha, yachínkisha, nuwenkesha, uchirínkisha ikiuakka ju nunkanmasha núkap wáinkiatitawai nu shuar. Tura tuke iwiaaku pujustinniasa wáinkiatitawai.”

Ataksha ni jákatniurín Jesus ujakmiania nu

(Mateu 20.17-19; Márkus 10.32-34)

³¹ Jesus ni tuse unuiniamurín akanki ikiaanank juna tímiayi:

“Jerusaréñnum jeatemaji. Juisha Jerusaréñnum Winia, Aents Ajasu tutain, túrunatniurun Yúsnan etserin yaunchu áatrurarmia nu uminkiatitawai.

³² Apachnium surutkartatui. Túrawar wishikrurar, katsekrukar usukruawartatui.

³³ Awatiar mantuáwartatui. Túramaitiatnak menaintiú tsawántaj nantaktiatjai” tímiayi.

³⁴ Tura Nii tímiania nuna nekas túrunattawai, tícharmiayi. Wariniak ta tusar nekaacharmi-ayi.

Jirikiúnmayá áishmankan Jesus ímtikmiania nu

(Mateu 20.29-34; Márkus 10.46-52)

³⁵ Jesus Jirikiú péprunam nuntumsaí, nu jii áishman jii kusuru, kuítian surusarat tusa jintiá pujumiayi.

³⁶ Untsurí aents nankaamainian antuk “¿waríñkit?” tímiayi.

³⁷ Tutai, “Nasaréñnumia Jesus nankaamawai” tiarmiayi.

³⁸ Kusurusha nuna antuk unsumuk “Jesusá, Uunt Kapitían Tawit weeachukaitiam. Tátiniuya núchakaitiam. Winiaja waitnentrurta” tímiayi.

³⁹ Eemak wearmiania nu chicharainiak “takamatsata” tiarmiayi.

Tutaisha nú arant unsumuk “Tawit weeachukaitiam; winiaja waitnentrurta” tímiayi.

⁴⁰ Nuiñkia Jesus wajas “itiatarum” tímiayi. Tura nii támatai,

⁴¹ “¿Warí ititurtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

⁴² Tutai Jesus chichaak “íimtia. Winia nekas enentáimtursa asam péñker ajasume” tímiayi.

⁴³ Nu chichamaik kusuru íimmiayi. Tura Yusa naari uunt awajki Jesusan nemarmiayi. Tura ashí aents nuna wáinkiarimia nusha Yusa náarín uunt awajarmiai.

19

Sakú Jesusjai

¹ Nuyá Jirikiú péprunam wayá nu jii wekaikini ajamiayi.

² Nu jii kuítrintin áishman ni naari Sakú pujumiayi. Nu Sakú kuítian-juu úntriyayi.

³ Aents ti káunkámtai, Sakú ti sútarach asa, Jesusan ístaj tukamá tujinkiamiayi.

⁴ Tuma asa Jesus nuke nankaamaktin asantai, eemki tsékiñki sikiumuru numi wajamunam wakamiayi iistaj tusa.

⁵Jesus nuĵ nanĵkaamak paŋkáĵ íimias chicharuk “Sakíu wárik akáikitiá. Ame jeemĵin yamá kanartiniáitĵai” tímiayi.

⁶Tutai Sakíusha wárik akaiki, shiir enentáimias Jesusan itiaamiayi.

⁷Ashí aents nuna wáinkiar “Maaj, Jesus tunáa áishmaŋka jeen pujawai” tusa mai tunaim ajarmiayi.

⁸Nuyá Sakíu wajaki Jesusan chicharuk “Íistá Uuntá, wi takakjana ĵuna ĵimiapetek nakakan kuĵrincha ainia nuna susartatĵai. Tura wáitruan chikichan kasarkaitkiuncha menaintiu patatsan awainkittiaĵai” tímiayi.

⁹Tutai Jesus tímiayi “Ĵu áishmaŋ Apraáma shuárintiat yamá niisha níniuĵai uwempra asa nekas Apraáma shuariĵ ajasuiti.

¹⁰Wisha Aents Ajasu asan menĵakaru ainia nuna eĵkan uwemtikrartaj tusan táwitĵai.” Tu tímiayi.

Kuĵtian nekapmá chichasmiayi

¹¹Nu aents Jesusan anturkarmia nu “Jerusaréŋnum jeawakrin Nii, Yus anaikiamu asa, wárik akupin ajastatui” tu enentáimsarmiai. Tuma asamtai wésar Jerusaréŋnum nuntumsaraj, nuna enentáimsarajĵin tusa Jesus ĵuna métek-takun chichasmiayi:

¹²“Áishmaŋ peŋkerĵ amai. Nu áishmaŋsha jeachat chíkich núŋkanam kapitián náamkan tátaj tusa wemai.

¹³Tura wétsuk ni takarniurĵin tias armia nuna untsukarmai. Tura aŋkant aŋkant kuit kurijĵai nanĵkaamas péŋker armia nuna suĵniak “Ĵu kuitĵai wi táatsaĵin takakmá ajatarum” timiai.”

¹⁴“Tura ni nuŋkénĵa shuarka nakitiarmai. Túmainiak “nu áishmaŋ ii kapitiantrĵi ajasaĵin tusa nakitiĵai” nu titiá tusa áishmaŋkan akatrar akuptukarmai.”

¹⁵“Tuma aĵin kapitián náamkan ni nuŋkén waketki tamai. Taa “winia kuĵtrujĵai warí túrarum” títiĵ tusa ni takarniurĵin kuitia súsarimia nuna untsukarmai.”

¹⁶“Ni takarniurĵi emka chikichik taa “ame kuĵtrumĵai takakmasan tias patasan achikmaĵai” timiai.”

¹⁷“Tutai kapitián chichaak “Péŋker túrame. Ishichik susamjamna núĵaĵinĵi wi tímiaĵna tímiatrusmek túrame. Tuma asakmin tias péprun akupin awajsattajme” timiai.”

¹⁸“Chíkich taa “Íistá Uuntá, ame kuĵtrumĵai takakmasan seŋku patasan achikĵai” timiai.”

¹⁹“Nunasha chicharuk “Amincha seŋku péprun akupin awajsattajme” timiai.”

²⁰“Nuyá chíkich taa “Uuntá, ame kuĵtrumĵin panĵiĵiĵai ĵian ikusmajai.

²¹Amesha kakaram chichau asakmin, ikuschiatam achin asakmin tura arakmachiatam juu asakmin ashamkamĵame” timiai.”

²²“Tutai kapitián timiai “Maaj, amesha ti yajauchiitme. Ame támena nuke makurmawai. Wi kakaram chichau aĵsha, ikuschiatan achin aĵsha tura araknasha arakmachiatan juu aĵsha,

²³nuinĵkia ĵurukamtia kuit-ikiutainiam ikuschamam? Nuinĵkia wi atak táakun patasan achikĵaĵna” timiai.

²⁴Tura nuĵ wajarmia nuna chicharuk “Kuĵtian takakmarĵi juruktiarum; túrarum tias takakna nú shuar susatarum” timiai.”

²⁵“Tura niisha chichainiak “túrasha Uuntá, tias takakĵa” tiarmai.”

²⁶“Tutai kapitián chichaak “Takakna nuĵai takaakuinĵkia patatnastatui táĵarme. Tura takakna nuĵai takaachkuinĵkia ishichik takakkuisha jurunkittiwai.

²⁷Tura winia nemasur kapitián ajasaĵin tusa nakitrurarmia nu itiatatum. Tura wisha íimian máatárum” timiai.” Tu tímiayi Jesus.

Jerusaréŋnum Jesus wayamiayi

(Mateu 21.1-11; Márkus 11.1-11; Ĵuanĵ 12.12-19)

²⁸Nuna tuasua amik Jesus Jerusaréŋnumaanĵi wémiayi.

²⁹Petpajái pepru tura Petania péprusha Uriwiu náinnium tíĵiuchiĵi; nuĵ jeastatuk ajatemas ni unuiniamurĵin ĵimiaran chicharuk,

³⁰“Tĵiĵuch péprunam wetarum. Túrarum nuĵ umpuuruch ekemtukchamu ĵinĵkiamu wáĵ wáinkiatarme. Nu atiarum itiatatum.

³¹Tura “ĵurukamtai atiarum?” turamainiakuiŵsha, “ii ununtrĵi wakerawai” títiarum” tímiayi.

³²Tutai unuiniamurĵi wear, Jesus timia ímiatrusaŋ wáinkiarimiayi

³³Tura umpuuruchin atiakui nérentin chichainiak “ĵUrukamtai umpuuruchsha atiarum?” tiarmiayi.

³⁴Tutai unuiniamusha “Ii ununtrĵi wakerawai” tiarmiayi.

³⁵Tura umpuuruchin Jesusan itiarimiayi. Túrawar ni pushirĵin umpuuruchiniam awantkar Jesusan ekenkarmiayi.

³⁶ Tura Jesus wétinnium ni pushir̄in jintianam ayaparar áintrarmiayi.

³⁷ Tura Uriwiu naint awan̄kénamunam t̄jiuḡ ajasarmatai untsur̄i aents Jesusan nemari-armia nu warainiak kakantar untsumainiak aents tujintiamun untsur̄i túran wáinkiaru ásar Yusa náarin uunt awajsarmiayi.

³⁸ “Yusa náar̄in winiana ju ii uunt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náarin uunt awajsarti” tiarmiayi.

³⁹ Tura Pariséu aents nūj páchitra pujuarmia nu Jesusan chicharainiak “Uuntá, nemartainia nu “takamatsata” tiarta” tiarmiayi.

⁴⁰ Tutai Jesus tímiayi “Nuñkia ju takamatsarmatañkia, kayasha untsumkarainti. Nuna paant tájarne” tímiayi.

⁴¹ Jerusaréñnum t̄jiuḡ ajatemas péprun wáiniak útuk júnis tímiayi:

⁴² “Jerusaréñnumia shuártiram, ju tsawantinkesha shiir pujustintrum nekaarmeka maak. Túrasha yamaikia nekaatin nan̄kaamasai.

⁴³ Kame ti itiuḡchat tsawant jeartamatrume. Atumí nemasr̄i nuñkajai aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatrume.

⁴⁴ Túrutma nuñká ajuñmartatrume. Tura atum̄in pujuinia nuna máawartatui. Tura ashí emesarmatai ishichkisha kaya irumpramusha penké atsuttawai. Wi Yusa anaikiamur̄in tarijrumna nu nekaachu asakrumin túrutmattarme.” Tu tímiayi.

Yusa Uunt Jeeñ suruktinian Jesus surimkiamiania nu

(Mateu 21.12-17; Márkus 11.15-19; Juan 2.13-22)

⁴⁵ Nuyá Jesus Yusa Uunt Jeeñ wayá suruktasa pujuarmia nuna sumaktasa pujuarmia nunasha j̄iki awemarmiayi.

⁴⁶ Túrak juna tímiayi:

“Yús-Papinium yaunchu aarma awai: “Winia jearka Yus áujsatin jeaiti” tu áarmaiti. Túrasha átumka kasáa matsamtaiya nútikiarme” tímiayi.

⁴⁷ Tuke tsawantin Yusa Uunt Jeeñ Jesus uwempratin chichaman unuiniak pujaj Israer-patri úuntr̄isha, Israer-shuara jintinniur̄isha, tura pepuru úuntr̄isha, itiuḡ máamniakit tusar ti enentáimsarmiayi.

⁴⁸ Túrasha ashí aents émamkes anturainiakui máatniun tujinkiarimiayi.

20

Yusa kakarmarij̄jai Jesus takasmiania nu

(Mateu 21.23-27; Márkus 11.27-33)

¹ Yusa Uunt Jeeñ Jesus uwempratin chichaman unuiniak pujaj Israer-patri úuntr̄isha, Israer-shuara jintinniur̄isha, Israer-shuara úuntr̄isha táarmiayi.

² Taar Jesusan chicharainiak “¿Yana chichamej̄jai ju túram? ¿Ya ju túratniuncha akup-tamkai?” tiarmiayi.

³ Tutai Jesus tímiayi “Wisha aniaatajrum tusan wakerajrume.

⁴ ¿Ya Juánnasha imiakratia tusa akupkamia? ¿Yusak? ¿Aentsuk? Turuttiarum” tímiayi.

⁵ Tútaisha niisha nuamtak warintiaj̄k mai tunai ajarimiayi. “Yus akupkaiti” tákurniñkia, “¿urukamtai enentáimtuscharum?” turamat̄jai.

⁶ Túrasha “aents akupkaiti” tákurnisha ashí aents kayaj̄jai tukurmar mantamattaji. Warí “Juan Yúsnan etserniuiti” tuiniatsuk” tiarmiayi.

⁷ Nuñkia Jesusan áiniak “Iisha nékatsji, Juan imiakratinniasha yátsuk akupkamia” tiarmiayi.

⁸ Tutai Jesus tímiayi “Wisha núnisnak winia akuptukua nuna tíhattajrume” tímiayi.

Péñker-takachu armia nu

(Mateu 21.33-44; Márkus 12.1-11)

⁹ Nuyá Jesus ju métek-taku chicham̄jai aentsun jintintiamiayi:

“Áishman̄ ni ajar̄in uwa araa amuk, shuaran takartusti tusa ikiukmiai. Tura niñkia wau táchataj tusa jeachat wémai.

¹⁰ Tura júuktin tsawant jeamtai juukman akanak jurumkit tusa takarniur̄in takau shuar̄in akuptukmai. Tura takarniur̄incha katsumkar áyatik awaiñkiarmai.

¹¹ Nuyá nérentin chikich takarniur̄in akupkamai; tura nunasha núnisan̄ katsekkar, awat̄iar, sútsuk akupkarmai.

¹² Nuyá ataksha chikichan akupkamai. Tura nunasha takau shuar katsumkar akupkarmai.’

¹³ Nuyá ukunam ajá nérenniur̄i “Itiurkatjak, timiai. Winia aneamu uchirun akupkattajai. Nin wáinkiar shiir enentáimtuschartimpiash” timiai.’

14 Túrasha takau shuar nuna wáinkiar, nuamtak chichainiak “Juka ajá nérenniurj ajastatui. Maatai. Nuikia aja iiniu átatu!” tiarmai.

15 Nuna tuíniak ajanmaya jiki máawarmai.

Nuyá Jesus aniasmiayi ‘Wats ¿warí enentáimsarum, ajá nérenniurj itiurkattawa?

16 Niisha taa, nu takau shuáran máawartatui. Tura núpkanka chikichan susattawai” tímiayi.

Nuna anturkar “Yus núnaka tsan̄katkashti” tiarmiayi.

17 Tura Jesus nin émamkes ísar tímiayi “¿Nuikia Yus-Papinium áarma nu warintuia? Ju áarmaiti:

Kayan pénkernak jea jeamin “yajauchiiti” tusar ajapawarmia nu ashí kayajaj nan̄kaamas pénger apujsamuiti.

18 Nu kayan tukumainia nuka kupintrattawai. Tura nu kaya shuarnum iniarka nu shuaran tsai tsai awajsattawai. Tu áarmaiti.

Pariséu achiktai tusar wakeriarmiania nu

(Mateu 21.45-46; 22.15-22; Márkus 12.12-17)

19 Israer-patri untrj tura Israer-shuara jintinniurjsha “nu métek-taku chichamjai in túramji” tu nekaawar nuik’ Jesusan achikiar emetatai tusar wakeriarmiayi. Tura untsurj shuar Jesusan wakeruiniakui, ashamainiak túracharmiayi.

20 Tura Kapitiánnium suruktai tusar wakeruiniak mamikmau shuaran Jesusan akup-tukarmiayi. Nu shuar pénger shuara núnisan jeariar, Jesus nékatsuk yajauch chichakat tusar, aniaataj tusar wearmiayi. Ni chichamarjijaj uuntnum suruktai tusar túrawarmiayi.

21 Tu enentáimsar tiarmiayi “Uuntá, ame tuke nekas chicham chichaame, nu nékaji. Aents pátatek íyatsme, antsu nekas Yusa jintj jintintiamé.

22 Wats turuttia, ¿Rúmanmaya uunt akupin ii kuitrj akiktin péngerkait? ¿Akiktinkiait? ¿Suritkiatniukait? Nu nekaatai tusar wakeraji” tiarmiayi.

23 Tura Jesuska ni yajauch enentáimsamurj nekáa chicharainiak,

24 “Kuit itiatarum. ¿Yana yapi tura yana naarj jui áarmait?” tímiayi.

Tutai nii tiarmiayi “uunt akupniunu.”

25 Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

26 Aents ántamunam ni chichamarjijaj achiktinian penké tujinkiarmiayi. Antsu aya ímprarmiayi tura takamtak pujusarmiayi.

Satusésha achiktai tusar wakeriarmiania nu

(Mateu 22.23-33; Márkus 12.18-27)

27 Nuyá Satuséu “jakamunmaya penké nantakchamniaiti” tuinia nu, Jesusan aniaatai tusar tariarmiayi.

28 Aniiniak tiarmiayi “Uuntá, Muisáis juna áartampramijai: “Áishmañ ni nuarj júreatsain jakamtainkia ni yachj ni wajen nuátkati, yachj yajutmatratsa.” Tu áarmaiti, tiarmiayi.

29 Wats, siati yachi áрмаi, tiarmiayi. Iwiajri nuwan nuatak yajutmatsuk jakamai.

30 Ni yachj wajen akintiak, nuátak, niisha yajutmatsuk jakamai.

31 Nuna yachjsha núnisan nu wajen nuátkamai; tura núnisan ashí siati nuna patajnk’ nuátkarmai. Yajutmatsuk yajutmatsuk kajjnkarmai.

32 Tura ukunam nuwasha jakamai.

33 Nantaktin tsawantaj, nantakiarmatai, ¿yana nuarjñ ati? Ashí siati nuátkacharmaka” tiarmiayi.

34 Tutai Jesus tímiayi “Ju nuñkanmañ nuatnaikiatin awai.

35 Tura nantakiar atak iwiaaku ámin ainia nuka nuatnaikiachartatui.

36 Warí, jákashtin ániatsuk. Nayaimpinmaya suntara áintsañ ajasartatui. Tura nantakiaru ásar Yusa uchirj ajasartatui.

37 Tura jákaru nantakiartin ainia nuna imia Muisáis jintíamiayi. Warí, numichiniam ji wajái keamunan Yus niijaj chichaamun, Yus-Papinium Muisaiska áarmiayi. Nú áarmanum Uunt Yus Apráama, Isaka tura Jakupu Yúsrñti, tímiayi. Nú áishmañ yaunchu jákaru ainj “ni Yúsrñti” tímiayi. Nuna taku nantaktin awai tu jintíamiayi.

38 Kame jaka men̄kakatiunam pujuinia nuna Yúsrñchuiti. Tuma asamtai jakáa Yúsrñti tíchamniaiti. Antsu iwiaaku ainia nuna Yúsrñti. Ashi Niiniun iwiaarkainiawai” tímiayi.

39 Nuna antukar Israer-shuara jintinniurj “penger tame, Uuntá” tiarmiayi.

40 Tura nuyánka aniastinian arantukarmiayi.

¿Kristu tutai yana uchirjimpiait?

(Mateu 22.41-46; Márkus 12.35-37)

41 Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tárúm?

⁴² Warí, Sarmu papinium Tawit niŋki juna tátsuk:

“Uunt winia Úuntrun “Akupin pujutainium Winia untsuuruinj pujustá, tímiayi.

⁴³ Ame nemasrumin núpeteatsaín nuj pujustá” tímiayi.” Tú áarmaiti.

⁴⁴ Kame Tawitkia, Kristun chicharuk, “winia Úuntur” taisha, ¿itiurak Kristu tutai Tawitia pampañmarj átiñk?” Tú tímiayi Jesus.

Israer-shuaran jintintin ainia nuyá aneartarum

(Mateu 23.1-36; Márkus 12.38-40; Rúkas 11.37-54)

⁴⁵ Ashí aents Nin anturkatasa pujuiniaj ni unuiniamurjñ Jesus juna tímiayi:

⁴⁶ “Israer-shuaran jintintin ainia nuyá aneartarum. Niisha esaram pushin entsarar wekasataisar wakeruiniawai. Tura jintiá ti shiir áujtusarat tusar wakeruiniawai; tura iruntai jeñam penkerj pujutainium pujustinian wakeruiniawai. Tura nampernumsha uunt pujutainium pujustaj tusa wakeruiniawai.

⁴⁷ Túrasa wajé jeñcha atantainiawai. Túrawar aents nekaracharat tusar ti esaram chichamjaj Yúsán áujainiawai. Nincha chíkichjaj nankaamas Yus asutiáwartatui.”

21

Waje ni kuítrjñ susamia nu

(Márkus 12.41-44)

¹ Yusa Uunt jeñ kuítrintin kuit enketainiam kuítian enkeenan Jesus wáinkiamiayi.

² Tura waje kuítrinchja jimiara uchich kuítian, reara áaniun, enkean wáinkiamiayi.

³ Wáiniak tímiayi “Nekas tájarme, ju waje kuítrinchaitiat, ashí enkeena nú nankaamas núkap enkeayi.

⁴ Warí, chikichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi.”

Yusa Uunt Jeñ saanaktinian Jesus ujakmania nu

(Mateu 24.1-2; Márkus 13.1-2)

⁵ Yusa Uunt jeñ kaya shíirmach armia nuna tura chíkich shíirmach susamu armia nunasha chíkich shuar áujmatuk pujuarmiayi. Nuyá Jesus tímiayi:

⁶ “Átum yamá shiir wáinrumna nu ashí emesnartatui. Kaya ekenramusha mash yumpuuntrartatui” tímiayi.

Amuukatin tsawantin uruku átata nu nekaatin

(Mateu 24.3-28; Márkus 13.3-23)

⁷ Nuyá Jesusan chicharainiak “Uuntá, nusha ¿urutaik túrunat? ¿Kame ju túrunatin jeatemamtaisha warijjajñ nekaattaj?” tiarmiayi.

⁸ Tutai Jesus tímiayi “Aneartarum; anaññawairap. Nekaatarum. Winia náarun pachisar, “wi Kristuitjaj” tau ti untsurj jíintrartatui. “Nuñka amuukatin jeayi” tu etserkartatui. Tuíniakui anturkarum nemariirap.

⁹ Tura meset chichamsha, kapitián mesetan nájanmasha antukrum sapijmiakairap. Nusha emka túrunatniuiti. Túrasa nú chichamaik amuukatin tsawant jeashtatui.’

¹⁰ Nuyá tuke chicharuk tímiayi ‘Shuar chíkich nuñkanmayá shuarjajñ mesetnum ti nekas maaniawartatui.

¹¹ Ti uqrkattawai; untsurj nuñkanam tsukasha, suñkursha ti átatui. Nayaimpinmasha ti ashammai náñkamas túrunattawai. Nujajñ Yus ni kakarmarjñ iniakmastatui.’

¹² Tura ju túrunatsaín atumin pataaturmakar achirmakartatui. Iruntai jeñmasha makurmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui.

¹³ Nuñkia atumin túrutmakrumin wi túramu etserkatin arutmattarme.

¹⁴⁻¹⁵ Tura atumj nemasrj nakitramainiak “wáitiati” títinian tujinkiarat tusan, winia nekatairjajñ chichastinian amastatjarme. Tuma asamtai “Jurakuisha warinia tiniak kíishtumaktaj tusan áetak enentáimsashtatjaj” titiarum.’

¹⁶ Tura imia atumí aparjsha surutmakartatui. Atumí yachjsha, atumí shuarjsha amikrumsha núnisarañ surutmakartatui. Tura máamunka máawartatui.

¹⁷ Tura Winia ajasaru asakrumin ashí aents nakitramprartatui.

¹⁸ Tura penké ishichkisha yajauch awajtamsachartatui.

¹⁹ Katsuntrarmeka iwiaaku átin wáinkiatarme.’

²⁰ Ju pepuru Jerusarénka aá tanishrjñ suntar téntakar matsatu wáinkiumeka, emesratin jeá nekaattarme.

²¹ Nuikia juj Jutia nuñkanam pujuinia nu, náinnium pisartin áiniawai; tura juj Jerusarénnum pujuinia nusha juyánka jíinki wétin ainiawai. Tura ajanam pujuinia nusha, péprunam waketskishtin áiniawai.

²² Nu tsawantincha Yus asutiámun wáinkartatui. Yús-Papinium nu túrunatin yaunchu aarma nu uminkiattawai nu tsawantin.

²³ Nunkanam ti wáitsatin átatui. Tura ju aents ti asutniawartatui. Tuma asamtai nuwa ajamtin ainia nusha, tura uchi kuírchin takakainia nusha imiá itiurchatan wáinkartatui.

²⁴ Tura juyá aents mesetnum jákartatui. Tura chikichnaka ashí nunkanam misaawar júkiartatui; tura yajaya apach, Yúsnan enentáimtuiniatsna nu, juí Jerusarénnum wayawar najakartatui. Nu túratniunka Yus tsan̄katkana nuñ túrawartatui.

Aents Ajasu tutai táintrí

(Mateu 24.29-35, 42-44; Márkus 13.24-37)

²⁵ 'Nuñkia etsanmasha, nantunmasha, yáanmasha Yuska ni kakarmarín iniakmak nusháa túrattawai. Nunkanmasha ashí aents páchim enentáimprartatui. Tura nyaantsanam chíchimi ti aku tantáa ajakui ti ashamkartatui.

²⁶ Tura túrunatin ana nuna enentáimsar mayáí ashinkartatui. Warí, nayaimpiniam kakaram ainia nusha peantrartatui.

²⁷ Nuyá Winia, Aents Ajasu tutain, yurañminiam ti shiir ajasan winiaí wáitkiartatui.

²⁸ Nu túrunatin náñkamkui uwempratin jeatemayi tusarum kakañrum shiir enentáimsatarum.'

²⁹ Tura ju chichamnasha nekapmamiayi. 'Ikiu numi tura náñkamas numisha enentáimsatarum.

³⁰ Ju nunkanam ni nuké yama pun̄kakartaí "esat jeatemayi" tátsurmek.

³¹ Núnisan̄ Wi tájana nu wáinkurmeka, Wi ju nunkanam akupin ajastin jeatema nu nekaatarum.'

³² 'Tura aents yamaí pujuinia nu jáatsaín nusha ashí túrunattawai. Núnaka paant tájarne.

³³ Nayaimpisha nuñkasha amuukartatui. Tura winia chichampruka amuukachminiaiti.

³⁴⁻³⁵ Nu tsawant aya aneanchma jeattawai. Ashí aents ju nunkanam pujuinia nu, nuna enentáimsuk pujuiniaí jeattawai. Tuma asamtai atumsha anearum wekasatarum. Yajau-chiniam emetnarum, aya yurumátniuk, aya umartiniak enentáimtusurum, ju nunkanam ana nu ti wakerakrumñkia péñker enentáimsatin tujinkiattarme. Nu atsutí tusarum tura nu tsawant aya áwaktamkajj tusarum péñker wekasatarum.

³⁶ Anearum wekasatarum. Túrunattana nuñ katsuntrataj tusarum Yus aujsa pujustarum. Túrarum Aents Ajasu tutai ímmianum péñker átaj tusarum túrarum.'

³⁷ Tuke tsawant tsawajsha Yusa Uunt Jeeñ Jesus unuiniamiayi. Tura káshikia Uriwiu náinnium we-wémiayi.

³⁸ Tura tuke tsawant Yusa Uunt Jeeñ Jesus chichaamun anturkatai tusar káshik tariarmi-ayi.

22

Jesus achiktin chichaman jurusarmiania nu

(Mateu 26.1-5, 14-16; Márkus 14.1-2, 10-11; Juan 11.45-53)

¹ Wakaprutai en̄ketaachma tanta yuatin námper, paskua tutai, jeatemamiayi.

² Israer-shuara Pátrirjsha Israer-shuara jintinniurjsha áentsun ashamainia ásar, itiurak máawaintiaíj tusar ti enentáimsarmiayi.

³ Nuñkia Iskariúti Jútsan enentáin íwianch wáintiamiayi. Nú Jútsaka Jesusa unuiniamurjñ páchitkiauyayi.

⁴ Israer-patri úuntrin tura Yusa Uunt Jee kapitíán pujuarmia nuna werimiayi. Tura Jesusan tu surukminiaiti tusa niñjaí chichasarmiayi.

⁵ Niisha nuna antukar warasar "kuit amastatji" Jútsan tiarmiayi.

⁶ Niisha "ayu" tinia, aents nékachmanum suruktaj tu enentáimsamiayi.

Kristu jakamu enentáimtustin námper

(Mateu 26.17-29; Márkus 14.12-25; Juan 13.21-30; 1 Kurintiunam 11.23-26)

⁷ Wats, wakaprutai en̄ketaachma tanta yúatin námper jeamiayi. Paskua tutainium murikchin máatin ármiayi.

⁸ Tura Jesus Pitruncha, Juáñnasha akupeak "Paskua tutai námper iwiaratarum" tímiayi.

⁹ Tutai niisha chichainiak "¿Tuj íwiarat tusamea wakeram?" tiarmiayi.

¹⁰ Tutai Jesus juna tímiayi "Péprunam wetarum. Jearum áishman̄ yumin takaku wekáa wáinkiatarme. Nú áishman̄ nemarsatarum. Tura jeá wayaakui,

¹¹ nú jeá nérenniurj chichareakrum "Uunt chichartamuk unuiniamurjaj paskua yurumátn̄ tuj aa? turamui" titiarum, tímiayi.

¹² Tákurmin nu nérentin yakí písunam uunt kuártun ashí iwiaramun iniakturmastatrome. Nuj ii yurumátn̄ iwiaratarum" tímiayi.

¹³ Tutai niisha wear Jesus tímiania tímiatrusañ wáinkiarmaiya. Tura paskua namperan nu*í* iwiarmaiya.

¹⁴ Yurumátin jeamtai ni unuiniamurijjai Jesus misanam pujusarmiayi.

¹⁵ Pujusarmatai, Jesus chichaak “Wisha játsuk atumjai ju paskua najanatniun ti waker-imjai,

¹⁶ atakka ju nuñkanam atumjai najanashtin asan. Tura antsu Yus akupeana nu*í* jear atak najanattaji” tímiayi.

¹⁷ Nuyá piniñkian achik, Yúsan yumiñkias, ni unuiniamurin tímiayi “Ju piniñ achikrum sunaisatarum.

¹⁸ Atakka ju nuñkanam uwa yumirin atumjai umarchattajai, tajarme. Tura antsu Yus akupin ajastin jeamtai atak iijjai umartatji” tímiayi.

¹⁹ Nuyasha yurumkan achik, Yúsan yumiñkias puuk susarmiayi. Tura chicharainiak “Juka winia ayáshruiti. Winia ayáshur atum péñker pujostinnium surunkattana núiti. Winia enentáimtursarum yuatarum” tímiayi.

²⁰ Tura yurumsua amikiarmatai piniñkian achik, “Ju piniñ winia numparun nakumea asa uwempratin yamaram chicham najanamun nakumeawai. Winia numpar atumnian puartamprattawai” tímiayi.

²¹ “Túrasha winia surutkattana nu Wijjai métek ju misanam pujawai.

²² Kame Wi, Aents Ajasuitjiana ju, Yus iwiamua nútiksanak jakattajai. Túrasha Winia surutkana nu nekaatí. Ti asutniattawai” tímiayi.

²³ Nuna antukar “Wíashitaj, yákit” tunaim ajarmiayi.

Nanakaamantu ana nu

²⁴ “¿iijjai yaki imía nanakaamantu aint?” tunaim ajarmiayi.

²⁵ Tura Jesus tímiayi “Ju nuñkanam akupin ainia nu, waantu enentáimtusar akupe-nawai. Tura akupenakuí “péñker túrin áiniawai” tuíniawai.

²⁶ Tura atumjainkia nuka atsutí. Antsu nanakaamantu ana nu, uchichia núnik ajastiniati; akupeana nusha takarnia núnik ajastiniati.

²⁷ Enentáimsatarum. Misanam pujus yurumna nu, yurumkan ajamana nujai ¿tuá imía nekas nanakaamantuit? ¿Yurumna nu nekas nanakaamantuchukait? Tura Wisha atumin yurumkan ajamna núnisnak pujajai.”

²⁸ “Winia itiurchatrun wáinmíaj nu*í* atumsha Wijjai tuke pujumarme.

²⁹ Tuma ain Yus enentáimtustinian kajinmatkiñ tusan Wisha Yúsan seamjai. Tura Yúsnun waketchim ame yatsum ikiakárarta” tímiayi.

³⁰ Tutai akupin pujutainium pujusrum, Israer-shuar tuse írutkamu akupkattarme tajai.” Tu tímiayi.

Pítuir “atsá nékatsjai” títinian Jesus ujakmiania nu

(Mateo 26.31-35; Márkus 14.27-31; Juan 13.36-38)

³¹ Nuyá Uunt Jesus tímiayi, “Nekaata, Semunká. Trikiu neré tsatsamátinua áintsañ Satanás atumi enentáin páchim enentáimtikrampratay tusa seayi.

³² Tuma ain Yus enentáimtustinian kajinmatkiñ tusan Wisha Yúsan seamjai. Tura Yúsnun waketchim ame yatsum ikiakárarta” tímiayi.

³³ Tutai Semun tímiayi “Uuntá, sepunam enketmainiakuisa wisha nemarsatajme. Tura mantamainiakuisa métek jakatjai” tímiayi.

³⁴ Tutai Jesus tímiayi “Pitrú, nekas tájame, yamaik atash shiniatsajñ ame menaintiú natsantrurtatme” tímiayi.

Itiurchat winiawai

³⁵ Nuyá Jesus tímiayi “Wisha yurumkajainchu, kuítjainchu, sapatjainchu akupkamjar-mena nu*í* ¿táatramsamkarum?”

Niisha “Atsá penké táatramsachmaji” tiarmiayi.

³⁶ Tutai Nii tímiayi “Antsu yamaikia yurumkan takakkunka takustí, kuítniasha núnisajñ; tura puniancha takachakka ni pushirñ suruk punian sumakti.

³⁷ Nekaatarum. Yus-Papinium yaunchu aarma ana nu wi túrunamujai uminkiatstawai. Juíti aarma:

Yajauch shuarnum pachikiarmiayi.

Wari, Yus-Papinium ashí Winia aarma ana nu uminkiatniuiti.”

³⁸ Tutai ni unuiniamurí tiarmiayi “Uuntá, ju*í* jimiará puniá awai.”

Tutai Niisha “Asati” tímiayi.

Jitsemani ajanam Jesus Yúsan áujsamiania nu

(Mateo 26.36-46; Márkus 14.32-42)

³⁹ Nuyá Jesus jíinkimiayi. Tura tuke túrin asa Uriwiu náinnium wémiayi. Ni unuiniamurísha nemariarmiayi.

⁴⁰ Aj jeá nin chicharuk “Itiurchat winiakui iniarajj tusarum Yus áujساتارum” tímiayi.

⁴¹ Tuasua amik arantach, kaya nankimiam jeana núnik Jesus wémiayi. Tura Yúsan áujساتaj tusa tikishmarmiayi.

⁴² Tikishmar juna tímiayi “Apawá, piniñnum yapá umartinia ántsan Wi waítsattajna nu wakerakmekka jurutkitia. Tura Wi wakerajna nucha antsu Ame wakeramna nu atí, tajai” tímiayi.

⁴³ Nuyá, ikiakártaj tusa Yusa suntarj nayaimpinmaya tarimiayi.

⁴⁴ Tura Jesus imiá wáitias pujak nú kakaram Yúsan áujسامiayi. Tura ni searmarísha numpá ántsan nunká kitiawarmiayi.

⁴⁵ Yúsan augsua amik wajaki ni unuiniamurj werimiayi. Tura kúntuts enentáimmiarijijai ti pimpiki kanúu tepenan tarimiayi.

⁴⁶ Nuñkia chicharainiak “¿Urukamtai kanúu teparum? Itiurchat winiakui iniarajj tusarum nantakrum Yus áujساتarum’ tímiayi.

Jesusan achikiarmiania nu

(Mateu 26.47-56; Márkus 14.43-50; Juan 18.2-11)

⁴⁷ Jesus tuke chichaa pujaí, untsurj shuar táarmiayi. Tura nuní eemka Jesusa unuiniamurj Jútas naartin winimiayi. Tura Jesusan mukunatajtsa tarunmiayi.

⁴⁸ Támatai Jesus chicharuk “Jútasá, ¿Aents Ajasu tutai mukunamek surutkattam?” tímiayi.

⁴⁹ Jesusjaj pujuarmia nu, túmamun wáinkiar “¿Uunt puniajají ljuartatjik?” tiarmiayi.

⁵⁰ Tura chikichik Patri uuntrj takarniurj kuishjñ untsuurjñ tsupirkamiayi.

⁵¹ Tura Jesus tímiayi “Iniaisatarum.” Nuna tinia ni kuishjñ antjñ tsuármiai.

⁵² Nuyá Israer-patri úuntrjñ, Yus-jea úuntrjñcha, tura pepu úuntrjñcha, Nin achiktaj tusa tariarmia nuna chicharuk “¿Wisha kasakaitaj. Urukamtai puniajajísha numijajísha tarutniuram?”

⁵³ Nuik Yusa Uunt Jeen tuke tsawant atumjaj pujumaj nuí achirkachmarme. Túrasha átum kiritniumiá kakarmajaj nupetkatin yamá tsawantin tsankatkamuitrume” tímiayi Jesus.

Pítur “Jesunaka nékatsjai” tímiania nu

(Mateu 26.57-58, 69-75; Márkus 14.53-54, 66-72; Juan 18.12-18, 25-27)

⁵⁴ Nuñkia Jesusan achikiar emetawar Israer-patri uuntrj jeen júkiarmiayi. Tura Pítrusha íkian nemarki wémiayi.

⁵⁵ Tura açh jinia ikiapáramiayi. Túrawar anamuk pujuarmiayi. Pítrusha niijjaj pujusmi-ayi.

⁵⁶ Tura nuwá, Patrj takarniurj amia nu, Pítur jinia anamuk pujan wáiniak “Ju áishmansha Niijjaj pujumiayi” tímiayi.

⁵⁷ Tutai Pítur chichaak “Nuwá, Nin nékatsjai” tímiayi.

⁵⁸ Tura árusañ chikich nin wáiniak “Amesha Njñ páchitkiatme” tímiayi.

Tutai Pítur tímiayi “Atsá. Wikia áñkia páchitkiatsjai” tímiayi.

⁵⁹ Chikichik ura nankaasmatai chikich apach chichaak “Nekas ju áishmansha Niijjaj pujumiayi. Warí, niisha Kariréanmayañchakait” tímiayi.

⁶⁰ Tutai Pítur chichaak “Ame táména núnaka nékatsjai” tímiayi. Nú chichamaik Pítur chicháa pujajñk’ atash shiniukmiayi.

⁶¹ Tura nuñkia Uunt Jesus Pítrun apajas íismiayi. Túra “atah shiniatsajñ ame menaintiu natsantrurtatme” Uunt Jesus timia nuna enentáimpramiayi.

⁶² Nuyá Pítur jjiinki ti úutmiayi.

Jesusan wishkrarmiayi

(Mateu 26.67-68; Márkus 14.65)

⁶³ Áishman Jesusan wáiniarmiania nu ti wishikiainiak awattiarimiayi.

⁶⁴ Jjñ epetkar yapiniam awattiar chicharainiak “Nekamata, ya awatama” tiarmiayi.

⁶⁵ Tura katsekainiak ti untsurj chikichnasha náñkamas tiarmiayi.

Uunt Iruntainiam Jesusan ejeniarmiania nu

(Mateu 26.59-66; Márkus 14.55-64; Juan 18.19-24)

⁶⁶ Tsawarmatai, Israer-shuara úuntrjsha, Israer-patri úuntrjsha, Israer-shuara jintinni-urisha iruntrar ni iruntairjñ ejeniarmiayi. Nuí chicharainiak

⁶⁷ “Paant titiá. ¿Yus anaikiamu Kristu tutaia nukaitiam?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme.

⁶⁸ Tura Wi aniamsha áirkashtatrume, túrasha akuptukchattarme.

⁶⁹ Tura wárik Wisha Aents Ajasuitjiana nu, ashí nankaamaku ajasan, Yusa untsuurinjí pujustatjai" tímiayi.

⁷⁰ Tutai niisha tiarmiayi "¿Nuiñkia amesha Yusa Uchirínkaitiam?"

Tutai Jesus tímiayi "Ee, Wítjai, átum Winia túrutrum núnisnak."

⁷¹ Tutai niisha tiarmiayi "Wari, ¿iisha chíkich ujatkat tusar atsumajik? Imia niníki chichaamu antukchajik" tiarmiayi.

23

Piratuí Jesusan júkiarmiania nu

(Mateu 27.1-2, 11-14; Márkus 15.1-5; Juan 18.28-38)

¹ Nuyá ashí Uunt iruntrarmia nu wajatkiar Rúmanmaya akupin Piratuí Jesusan júkiarmiayi.

² Nuj jeawar, Piratun chicharainiak "Ju áishman íi shuaran awajimtikiar enentáimtikiaiania nu nekaamji. Rúmanmaya uunt akupin Sésaran kuit akiktinian suritramaji. Tura nu arant Niníki, akupin Kristu tutaítjai, tawai" tiarmiayi.

³ Tutai Piratu Jesusan chicharuk "¿Ame Israer-shuara akupniurínkaitiam?" tímiayi.

Tutai Jesus tímiayi "Ee, núitjai, ame támena núnisnak."

⁴ Nuyá Israer-patri úuntríncha tura aents nuj iruntrarmia nunasha Piratu chicharainiak "Ju áishman tunaan túran penké wáinkichuitjai, tajai" tímiayi.

⁵ Túrasha niisha nú kakantar chicharainiak "Antsu nekas ashí Jutía nunkanmaya aentsun ni unuiniana nujai akajenawai. Kariréa nunkanmaya nankaamas ímijajsha tayi" tímiayi.

⁶ Piratusha nuna antuk "Nu áishman ¿Kariréanmayanékait?" tímiayi.

⁷ "Ee" tuinikui, Erutisan akuptukarmiayi. Erutiska Kariréanmaya aentsun akupniuyayi. Túmaitiat nu tsawantin Jerusarénum ishichik tsawant pujusmiayi.

⁸ Erutiska Jesusan ístaj tusa ti wakerimiayi. Jesusa túramurín áujmatman ti antukmiayi. Tuma asa, "Wi ímíai aents tujintiamun túrashtimpiash" tusa Jesusan wáiniak warasmiayi.

⁹ Jesusan ti nukap aniasmiayi; túramsha penké áimkiachmiayi.

¹⁰ Nujsha Israer-patri úuntrísha, tura Israer-shuara jintinniurísha yajauchiiti tusar charaatum awajiarimiayi.

¹¹ Tura Erutissha ni suntaríjiai Jesusan yajauch enentáimtuiniak Nin wishikiainiak ti penker pushin, akupniu entsatairíya ánniun, áentsrarmiayi. Nuyasha Erutis ataksha Piratuín akupkamiayi.

¹² Túram nu tsawant Piratu Erutisjai nawamnaikiarmiayi. Kame yáunchuka nemasnaikiau ármiayi.

Jesusan "mantamnati" tiarmiania nu

(Mateu 27.15-26; Márkus 15.6-15; Juan 18.39-19.16)

¹³ Nuyá Israer-patri úuntrín aentsu úuntríjiai tura penké aentsjai Piratu ikiaanak tímiayi

¹⁴ "Ju áishman aentsu awajimtikuii tusarum itiantinrume. Túrasha átum ímprunniñ aninrusan yajauch átum túrumna nuna penké nekarachjai.

¹⁵ Erutissha núnisan yajauchin nekaachaí. Wari, júi awainkíchimaka. Nuikia páantchakait jú aishman jakamnia tunaanka túrichuiti" tímiayi.

¹⁶⁻¹⁷ Túraitiat tuke túrutai asamtai, jisat jeakui sepunmaya chikichik áishmankan Piratu ankant akupkatin ámiayi. Tuma asamtai, níi chichaak "juna asutián awematjai" tímiayi.

¹⁸ Tura aencha iruntrar ti unsumainiak "Atsá; júcha. Ju nakitijai. Antsu Parapás akupkata" tiarmiayi.

¹⁹ Nu Parapássha akupniun nakitiak mesetan najana asa tura mankartin asa sepunam enkeamuyayi.

²⁰ Piratuka Jesusan akupkattsa wakerak ataksha aentsun áujсарmiayi.

²¹ Túrasha nú arant unsumainiak "Atsá. Krúsnum mantamnati" tiarmiayi.

²² Tura ataksha Piratu chicharainiak "¿Urukamtai. Wari tunaan túrait? Jakamnia tunaan túrachiashtusan, aniasan penké nekarachjai. Asutián akupkatjai" tímiayi.

²³ Tura niisha kakaram unsumainiak "Jesus mantamnati" tiarmiayi. Kame aencha tura Patri úuntrísha ti unsumaina áсарmatai ni wakeramurí tsankatnakarmiayi.

²⁴ Nii wakeriarmia nuna Piratu "túrattajai" tímiayi.

²⁵ Tuma asa Parapásan, mesetan najanin tura mankartin amia nuna akupkamiayi. Tura Jesusnaka ni wakeramun túrawarti tusa íktusarmiayi.

Jesusan krúsnum ajintrurarmiania nu

(Mateu 27.32-44; Márkus 15.21-32; Juan 19.17-27)

²⁶ Jesusan jukitiasa pujuiniái Serini nunkanmaya Semun ni pépruriya Jerusarénum yama jeamiayi. Nin achikiar, Jesusa krusri ayantkar "ni ukuri wetá" tiarmiayi.

²⁷ Untsurí aents Jesusan nemariarmiayi. Tura untsurí nuwasha ti kuntuts enentáimiainiak úutkiar tura wa-wa ajakiar wearmiayi.

²⁸ Túmainiakui Jesus nin iis, “Jerusarénnumiã nuwatiram Winia enentáimtursarum úuttiirap. Antsu atumniak tura atumí uchirí enentáimtusurum úuttiarum.

²⁹ Warí, ti iturchat tsawant jeawartatui. Tuma asamtai “Uchirtichu ainia nu, ajapruckhana nu tura amuntsachu ainia nu, chíkich aentsjai nankaamas péñker pujuini-awai” tiartatui.

³⁰ Nu tsawantaj aents chicharainiak “Náint in nekentmak yuturmaartai” tiartatui.

³¹ Warí, numi sameka áinis yajauch aya náñkamna aĩsha ju iturchat átsuk. Tura numi kukaru ainkiamtai iturak nú yajauch túrunachat’.” Tu timiayi Jesus.

³² Tura Jesusjai krúsnum maatai tusar jímiar yajauch áishmankan júkiarmiayi.

³³ Karawír nain tutainium jeawar Jesusan krúsnum ajintrurarmiayi. Tura Jesusa untsu-urinj chikichík yajauch áishmankan tura ni menaarinj chíkich yajauch áishmankan núnisañ krúsnum ajintrurarmiayi.

³⁴ Tura Jesus krúsnum ajintraku pujuram, chichaak “Apawá, tsañkurarta. Nii áitkiania nuna nékainiatsui” tímiayi.

Tura suntar pujuarmiania nu, yaki Jesusa pushirj jukit tusar nakurusarmiayi.

³⁵ Péprunmayã aents ii wajiarmiayi. Tura uunt armia nusha Nin wishikiainiak “Chíkich-naka uwemtikniuiti. Wats, yamá nekas Yusa anaikiamurj Kristu tútaintkiungka imia Niñki uwémprati” tiarmiayi.

³⁶ Suntarsha Nin wishikrarmiayi. Tiarar churuinian aartai tusar awajarmiayi.

³⁷ Tura chicharainiak “Amesha nekas Israer-shuara uunt akupniurĩnkiumka amek uwemprata” tiarmiayi.

³⁸ Tura muuknumaani, Kriaku chichamjai, Rúmanmayã apach chichamjajisha tura Israer chichamjajisha ju árar anujkamú ámiayi: *JÚITI ISRAER-SHUARA UUNT AKUPIN*

³⁹ Chíkichík yajauch áishman nuj ajintruamu amia nu kátsekeak chicharuk “Amesha nekas Yusa anaikiamurjĩnkiumka amek uwemprata tura incha uwemtikramprata” tímiayi.

⁴⁰ Tura chíkich ni tsaniakmarin kakantar chicharuk “¿Amesha Niijjai métek asutniátasa pujayatam, Yus ashamatsmek? tímiayi.

⁴¹ Iikia yajauch asar wáitsatniuitij; ii tunaarj akimakur wáitajai. Antsu ju áishmanka yajachin túrichuiti” tímiayi.

⁴² Nuyá Jesusan chicharuk “Amesha akupin ajasam winiasha enentáimtursata” tímiayi.

⁴³ Tutai Jesus chicharuk “Nekas tájame, jakar shiir pujutainium yamá tsawant Wijjai pujustatme” tímiayi.

Jesusa jakamuri

(Mateu 27.45-56; Márkus 15.33-41; Juan 19.28-30)

⁴⁴ Tutupin aj ashí nunkanam ti kirit ajasmiai. Tura menaintiú ura nankaamasu ain, nantu nunkaach ajassa tuke kirit ámiayi.

⁴⁵ Tsawái nantusha mushatmarmiayi. Tura Jerusarénnum Yusa Uunt Jeecha tarach ajamu aa jímiapetek nakaakamiayi.

⁴⁶ Nuyá Jesus untsukum “Apawá, winia wakantrun Amijn ikiauajai” tímiayi. Nuna tinia jakamiayi.

⁴⁷ Suntara kapitántrj nu túrunamun wáiniak, Yusa náarin shiir awajeak “Jusha imiã nekas péñker áishmankuyi” tímiayi.

⁴⁸ Tura untsurí aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar waketkiarmiayi.

⁴⁹ Tura Jesusa amikrjsha tura nuwã Kariréanmayã Nin nemariarmia nusha ikian wajasar ii wajarmiayi.

Jesusan iwiarsarmiania nu

(Mateu 27.57-61; Márkus 15.42-47; Juan 19.38-42)

⁵⁰ Naka enentáimin péñker áishman ámiayi ni naarj Jusé. Arimatéa pepu Jutía núnkanam ana nuyayuyai. Israer-shuara Uunt Iruntairjn páchitkiauyayi.

⁵¹ Yus ju nunkanam akupin ajasat tusa Jusé nakas pujumiayi. Tuma asa Uunt Irun-tainium Jesusan túrawarmia nuna nakitmiayi.

⁵² Tuma asamtai Piratuj we Jesusa ayashin seamiayi.

⁵³ Piratu “ayu” takui, Jesusa ayashin krúsnumiã jusa tarachjai penuar kaya táurmanum iwiarsamiayi. Nu táurmanum chíkich iwiarsachmauyayi.

⁵⁴ Iwiaratin tsawantaj, ayampratín tsawant tsawástatuk ajasmatai túrunamiayi.

⁵⁵ Tura nuwã Kariréanmayã jukiniutak Jesusan nemarsarmia nusha iwiarsamunam weriar, Jesusa ayashj itiuur ikiusmait nuna iisarmiayi.

⁵⁶ Iisar ikiuak ni jeen wakеткиarmiayi. Tura Jesusa ayashí mejeenin tusar kunkuinian iwiararmiayi. Tura ayampratin tsawantai, Israer-shuar akupkamun umikiar ayamprarmiayi.

24

Jesus nantakmiania nu

(Mateu 28.1-10; Márkus 16.1-8; Juan 20.1-10)

¹ Tumiñtin káshik kunkuinian iwiamun júkiar nu nuwá Jesus iwiansamunam weriarmiayi. Tura chíkich nuwasha atampriarmiayi.

² Tura iwiansamu kaya atutkamu urani aan wáinkiararmiayi.

³ Tura wayawar uunt Jesusa ayashin wáinkiacharmiayi.

⁴ Wáinkiachu ásar ashamkarmiayi. Tura “itiurkatjik” tiarmiayi. Tumaj jimiaará áishmañkan pushin wincharpatniun entsaru nin ayamach wajainian wáinkiararmiayi.

⁵ Nuna wáinkiar ti sapijmiainiak tsuntsumawarmiayi. Túmakui nu áishmañ chicharainiak “¿Iwiaakusha urukamtai jakaanumsha eñrum? tiarmiayi.

⁶ Jui pujatsui. Antsu nantakni. Nékatsumek. Niisha Kariréanam tuke pujus

⁷ “Wi, Aents Ajasuitjana nu, yajauch aentsnum surunkattajai. Túran krúsnum mantamnantajai. Tura menaintiú tsawantai nantaktiatjai” turamchamkarum” tímiayi.

⁸ Nuna takui Jesus timian enentáimprarmiayi.

⁹ Tura iwiansamunmayá wakетки taar, Jesusa unuiniamurin auntse armia nuna tura chikichnasha ashí nu túrunamun ujakarmiayi.

¹⁰ Jesusa unuiniamurin ujakarmia nu ju áiniawai: Maktaranmayá Marí, Juánasha, Jakupu nukurí Marisha, tura chikich nuwajai.

¹¹ Tura Jesusa unuiniamurisha nuwá tuñiaikuisha nekasaiti tu enentáimsuk “wáuruk tuñiawai” tiarmiayi.

¹² Túrusha Pítrusha jiinki Jesus iwiansamunam tsékenki werimiayi. Jeá, inít iis, aya tárachik tepenan wáinkiamiayi. Tura túrunamia nuna ti enentáimiar ni jeen wakеткиmiayi.

Emaús wetai jintianmaani túrunamia nu

(Márkus 16.12-13)

¹³ Nu tsawantajik Jesusa nemarniurí jimiar Emaús péprunam wéarmiayi. Emaúska Jerusarénumiá auntse kirumitru jeá pujawai.

¹⁴ Túrunamia nuna chichaki wearmiayi.

¹⁵ “Itiurkit” tu aujmatki weenaj imia Jesus taa nuj páchiniak niijjai wearmiayi.

¹⁶ Tura wáinkariat nekaashin asamtai yait nekaacharmiayi.

¹⁷ We-wénakua Jesus chicharainiak “Jintiasha ¿warí áujmatkirum wéarum? ¿Urukamtai kúntus enentáimprum?” tímiayi.

¹⁸ Chikichik, Kreupas náartin chicharuk “Jerusarénum túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

¹⁹ Tutai Jesus tímiayi “¿Warí urukait?”

Tutai tiarmiayi “Entá, Nasarénumiá Jesusa túrunamurí taji. Niisha Yúsnan etserin asa Yusa kakarmaríjjai chichasmiayi tura nuna kakarmaríjjai takasmiayi. Núnaka ashí aents nékainiawai.

²⁰ Tura ii Pátrirí uuntri tura ii péprurí uuntri “tunáa jakamnia túrayi” tusar “krúsnum mantamnati” tiarmiayi.

²¹ Tura ii Israer-aentstin uwentikrampratin tu enentáimsamji. Tura ni maamusha menaintiú tsawant nankaamasai.

²²⁻²³ Túrusha ii nuwá ni iwiansamunam yamaí káshik weriar ni ayashin wáinkiacharmai. Tura “Yusa suntari wáinkiaji tura “Jesus iwiaakuiti” túramji” tiarmai. Nuna tu ujatmakakrin ti enentáimpraji.

²⁴ Nuyá íi shuar iwiansamun weriar, nuwá tiarmia tímiatrusañ wáinkiararmiayi. Tura Jesunaka wáinkiacharmai.” Tu ujakarmai Jesusan.

²⁵ Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtsrume.

²⁶ ¿Yusa anaikiamurí, Kristu tutai, shiir awajnantsuk ti wáitsashtinkiait?” tímiayi.

²⁷ Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniurin áararmia nuna jintintiatasa nankamamiayi.

²⁸ Ayu, nii wearmia nú peprunam jeawarmiayi. Tura Jesuska nuj nankaamaki wétaj tau ajamiayi.

²⁹ Tura niisha chicharainiak “Weep. Iijjai pujustá. Warí, nantu akaikiyi, kirit ajatemsai” tiarmiayi.

Tutai Jesus niijjai pujustaj tusa wayamiayi.

³⁰ Tura niijjaj irunar misanam pujus, yurumkan achik, Yúsán yuminkias nincha puuk súšarmiyai.

³¹ Nu chichamaik, ni jji uranniuá núnikiarmatai Jesusan nekaawarmiyai. Tura Niisha nú chichamaik menkakamiyai.

³² Tura nu shuarsha mai tunai ajainiak “Jintia winis Niisha Yus-Papin jintintramuk nekas ii enentáin shiir enentáimtikramprachmakaj” tiarmiayi.

³³ Nuyá, Emaúsnumiá wárik jíinkiar Jerusarénum waketkiarmiayi. Nuji Jesusa unuini-amurjin auntse armia nuna tura chikich shuar Jesusan nemariarmia nunasha iruntrar pujuinian wáinkiarimiayi.

³⁴ Auntse armia nusha tiarmiayi “Uunt Jesus nekas nantakni. Semuñ Nin wáinkiaiti.”

³⁵ Tutai niisha jintiá túrunamun ujakarmiayi. “Jesus yurumkan ajaamakui nuji nekaamji” tiarmiayi.

Ni unuiniamurjin Jesus wantintuqmiania nu

(Mateu 28.16-20; Márkus 16.14-18; Juan 20.19-23)

³⁶ Nuna áujmatuk pujuiniaj Jesus aya aneachma ajapén wajas “Shiir enentáimsatarum” tímiayi.

³⁷ Nuna antukar, ti sapijmiakar, wakanchashit, enentáimsarmiayi.

³⁸ Tura Jesus chicharainiak “¿Urukamtai sapijmiakrum wakanchashit, tu enentáimsarum? ³⁹ Winia uwejrusha, nawersha írtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” tímiayi.

⁴⁰ Nuna tinia ni uwejéncha nawéncha iniaiktusarmiayi.

⁴¹ Warainiayat sapijmiainia ásar, Niimpiashit tu enentáimtusarmiayi. Tuma asamtai, nin chicharainiak “¿yurumak takakrumek?” tímiayi.

⁴² Takui, namaknasha, míshkincha súšarmiyai.

⁴³ Tura Jesus nuna achik niisha ímiainiamunmañ yuamiayi.

⁴⁴ Tura nin tiarmiayi “Winia túrutawarma nuna, Wi atumjai nuik pujusan tímiajrume. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

⁴⁵ Nuyá Yus-Papinium aarman jintintiawarmiyai.

⁴⁶ Jintintiuk juna tímiayi: “Yusa anaikiamurj Kristu tutai jaka menaintiú tsawantaj jakamunmayá nantaktinia nu yáunchuk áarmauyayi. Tura Wi nú Krístuchukaitaj.

⁴⁷ Winia náarun pachisar, Jerusarénumiá nanakama ashí nunkanam nu chicham etser-naktinia nu áarmauyayi. Shuar ni tunaarj tsankurnarat tusar enentáin yapajiatniuiti. Tura tu etserkatniua nusha yaunchu áarmauyayi.

⁴⁸ Tura wi túrunamu neka asarum etserkatniuitrume, tímiayi.

⁴⁹ Tura winia Apar, winia Wakantrun susartatjai, turammarumna nuna akuptuktat-jarme. Tura nayaimpinmayá táatsain jui Jerusaréñ péprunam pujústárum. Taa ni kakarmarjin suramsattarme.” Tu tímiayi.

Jesus nayaimpiniam wakamiania nu

(Márkus 16.19-20)

⁵⁰ Nuyá Jesus Jerusaréñ péprunmayá júkiar Petania péprunam ejeniarmiayi. Tura nuji ni uweje takui, “Yus yáinmakarti” tímiayi.

⁵¹ Nuna tu pujus, niijya kanakmiayi. Tura nayaimpiniam junakmiayi.

⁵² Ni unuiniamurjsha Nin imiá shiir enentáimtusarmiayi. Tura nuyá ti warasar Jerusarénum waketkiarmiayi.

⁵³ Tura Yusa Uunt Jeen pujusar Yusa náarjin shiir awajú pujuarmiayi. Áukete.

Yúsán Shiir Chichamēn JUAN aarmia nu

Chícham aents ajasmiania nu

¹ Ashí nan̄kamamia nú yaunchu Yusa Uchirí tuke pujuyayi. Niisha Yúsán ti paant awajeakui, Chícham tímíniati. Chichamsha Yusjaj pujuyayi. Chichamsha Yúsauyayi.

² Yáman̄kamtaik Niisha pujuyayi Yusjaj.

³ Ashí najanamú ainia nu Niijjaj najanamúiti. Nii najanachmaka pen̄ké atsawai.

⁴ Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniati.

⁵ Nu tsáapnin kiritniunam tsáapniawai. Tura kiritniusha tsáapninian ikiajniaktinian tu-jinkiaiti.

⁶ Áishman̄ ámiayi, Yus akupkamu, ni naari Juan̄.

⁷ Niisha tsáapnin chichaman etserkatajtsa támiayi. Nuna étseruk ashí umirkarat tusa támiayi.

⁸ Juan̄sha nu tsáapninchaulyayi. Áyatik akupkamuyayi tsáapnin chichaman etserkat tusa.

⁹ Nu tsáapninkia nekas tsapniniati. Ju nuñkanam taa ashí shuaran enentáin tsáapniartiniati.

¹⁰ Chichamsha taramiayi ju nuñkanam. Tura nuñkasha ni najanamú aín, nuñkaya aents Nin nekaacharmiayi.

¹¹ Támiayi ni nuñkén tura ni shuarsha ni enentáin itiaacharmiayi.

¹² Tuma aín chíkich shuar Nin enentáimtuiniak ni enentáin itiaawarua nuna Yusa uchirí ajastinian Yus tsan̄katkamiayi.

¹³ Niisha Yusa uchirí ajasar ataksha númpentin ayashímkiacharmai. Áentsnúmiá akiiniachú ániawai niisha. Áishman̄ wakeramujajsha akiiniacharmai. Antsu Yúsnumiá akiiniawaru ásar Yusa uchirí ániawai.

¹⁴ Nú Chichamsha ayashtin ajas iijjaj núkap tsawant pujumiayi. Yusa anen̄kratairijjaj piakuyi. Aya nekas nunak chichaamiayi. Núnisan ni pen̄kerin, aya Yusa Uchirí chikichkia nu takusminia nuna iniakmamiayi. Nusha iisha paant wáinkiaitji.

¹⁵ Juan̄sha Nin neka asa, étseruk tímiayi “Júiti wi tímiay nu: “Winia ukuruinj winittiana nu wíjajnkia émkaiti. Maa, wi atajsha tuke pujuyayi” tiniujaj.” Tu etserkamiayi.

¹⁶ Chichamsha ti anen̄kartin asa ashí pen̄ker ana nuna iniatsuk súrampi.

¹⁷ Yusa akupeamurin Muisais yaunchu jintintraiti, antsu aneatniuncha tura ashí nekas ana nunasha Jesukristu jintintraiti.

¹⁸ Chikichkisha Yúsán pen̄ké wáinkiachuiti. Tura ni Uchirí chikichkia nu tuke Niijjaj tsaniaku asa Yúsán paant awajturmasuitji.

Imiakratin Juan̄ Jesukristunun etserkamiania nu

(Mateu 3.11-12; Márkus 1.7-8; Rúkas 3.15-17)

¹⁹ Jerusarénumiá Israer-shuar ni Pátririncha Riwi-shuarjaj Juan̄kaj akupkarmiayi yákit túsar.

²⁰ Inintruiniakui paant ujakmiayi. “Wikia Krístuchuitjai” tímiayi.

²¹ Takui ataksha aniasarmiayi “¿Nuikia yáitiam. Yúsán etserin yaunchu amia nú Eriaskaitiam?” tiarmiayi.

Juan̄sha “Atsá, núchaitjai” tímiayi.

Nuyá ataksha aniasarmiayi “Nuikia ¿Yúsán etserin tátinia nukáitiam?” tiarmiayi.

Niisha “Atsá” tímiayi.

²² Takui “¿Nu arantcha yáitiam. In akuptamkajnia nusha warí títiataj. Warintia enentáimiam?” tiarmiayi.

²³ Juan̄sha tímiayi “Yúsán etserin Isayas yaunchu tímia núitjai. Niisha áarmiayi “Aents atsamu nuñkanam shuar untsumuí “li uuntri jinti naka awajtsatarum,” tu untsumuí.” Núnaka Isayas áaruiti. Tura wikia untsumna nú shuaraitjai” tímiayi.

²⁴ Juan̄jaj chichainiakka Pariséu akupkarma áarmiayi.

²⁵ Niisha tiarmiayi “Nuikia Krístuchuitiatmesha, Eriashaitiatmesha, Yúsán etserin tátinia núchaitiatmesha ¿urukamtai imiakratam?” tiarmiayi.

²⁶ Juan̄sha tímiayi “Wikia entsajain imiakratjai. Tura átum írutramunam shuar átum nékatsrumna nu wajaawai.

²⁷ Niisha winia ukuruñi winiyat wíjiañkia ti nañkaamantuiti. Nii ti péñker asamtai wisha ni sapatrj jñkiamurjñcha atitrachminiaitjai" tímiayi.

²⁸ Nuka Petapara peprunam túrunamiayi. Petaparasha Juan imiakratmia nuñ Jurtañ entsa amain amai.

Jesús Yusa Murikrñti

²⁹ Nuyá kashin Juan Jesusan winian wáiniak tímiayi "Iistarum. Núiti Yusa Murikrñ ashí aentsu tunaarñ júana nu.

³⁰ Núiti wi tímiaj nu, "Winia ukuruñ winiana nu wíjiañkia nañkaamantuiti. Tura wi atsaisha tuke pujuyayi" tímiajai.

³¹ Wisha Nin nekaachmajai. Tura ashí Israer-shuar Nin nekaawarat tusan imiakin támajai" tímiayi.

³² Nuyá tímiayi "Yusa Wakanin yámpitsa núnin nayaimpinmayañ táarun wáinkíamjai. Tura ekemsamai.

³³ Nu túruntsañ tuke Nin nekaachmajai. Tura Yuska winia imiakrattinian akuptak turutmiai "Chikichik shuarnum Yusa Wakanj tara ekemsa wáinkiam, nujaj nekaattame. Yusa Péñker Wakanjñjai imiakratniua núiti" túrutmiayi. Tura nujaj Nin nekaamjai.

³⁴ Yamaikia wainkia asan ti paant nékajai tí nekas Yusa Uchirñti" tímiayi Juan.

Jesusa unuiniamurj emka armia nu

³⁵ Kashincha ataksha Juan nuñ wajasmiai ni unuiniamurj jímjarjai.

³⁶ Jesussha nuñ nañkaamakui Juan tímiayi "Iistarum, Yusa Murikrñ áuwiti."

³⁷ Juanka unuiniamurj nuna antukar mai Jesusan pataatukarmiayi.

³⁸ Jesussha úkumur ímias nu jímjaran wininian wáinkíamiai.

Tura tímiayi "¿Ya eñrum?"

Niisha "Uuntá, ¿tuñ pujam?" tiarmiayi.

³⁹ Jesussha tímiayi "Wats, iítiarum."

Niisha wear ni pujutairñ wáinkiarimiayi. Tura áañkú ajasmatai nu tsawantaj nuñ kinti-amprarmiayi.

⁴⁰ Juanka chichamen antukar Jesusan pataatukaruka jímjar ármiai. Chikichik Antre-sauyayi. Niisha Semuñ Pitru yachñiyayi.

⁴¹ Antressha wárik ni yachj Semunkan eaktajtsa wémiayi. Tura wáiniak "Misías wáinkiaji" tímiayi. Misíaska ni chichamen "Kristu" tawai. Krístuka Israer-shuaran yainkíarat tusa Yus anaikiamuiti.

⁴² Nuyá Antres ni yachj Semunkan Jesus pujamunam jukimiayi. Jesussha wáiniak tímiayi "Ámetme Semuñ, Junasa uchirj. Túrasha Sépas átatme." Sépaska Israer-shuar chichamnum kaya tawai. Tura Kriaku chichamnum nuka Pítruiti.

Jesús Jiripijñ tura Natanaérñ chichasmiania nu

⁴³ Kashincha Jesús Kariréa nunkanam wétajtsa pujumiayi. Tura Jiripin wáiniak "Nemartusta" tímiayi.

⁴⁴ Jiripisha Petsaitia péprunmayayuyayi. Antressha Pítrusha nu péprunmayayuyayi.

⁴⁵ Nuyá Jiripi Natanaéran eakmiai.

Tura wáiniak tímiayi "Muisais Yus akupkamu papinium "Anaikiamu tátatui" tu áarchamkia. Yaunchu Yúsnan etserniusha ujakcharmakia. Nu shuar wáinkiaji. Jesusaiti, Jusé uchirj. Nasarét péprunmayañti."

⁴⁶ Natanaérsha tímiayi "¿Nasarétnumia péñker shuar áminkiait?"

Jiripisha "Winim ítiá" tímiayi.

⁴⁷ Jesussha Natanaéran tíjñch winian wáiniak tímiayi "Ju shuar iistarum. Ti péñker Israer-shuaraiti. Peñké anañkartichuítí."

⁴⁸ Natanaérsha tímiayi "¿Itiur nékaram?"

Jesusha tímiayi "Jiripi tuke untsurmatsañ wáinkíajme iku numirñ ejamkam wajamin."

⁴⁹ Natanaér nuikia tímiayi, "Uunta, nekas Yusa Uchirñme. Israer-shuar akupñuitme" tímiayi.

⁵⁰ Tura Jesús tímiayi "¿Aya wi "Iku numirñ ajamkam wajamin wáinkíajme" takui Winia enentáimturamek? Antsu nuna nañkaamas nekaachmin ana nusha wáinkíattame" tímiayi.

⁵¹ Nuyásha Jesús tímiayi "Wi nekas tájarme, Aents Ajasu asan atumsha nayaim uranmi-anum Yusa suntarj Winin tara waka ajainia wáinkíattarme." Tu tímiayi.

2

Nuatnaikiatin jísat Kaná péprunam ámiania nu

¹ Menaintu tsawant nañkaasmatai nuatnaikiatin jísat Kaná péprunam ámiayi. Kaná péprusha Kariréa nunkanmauyayi. Jesusa nukurjsha nuñ pujumiayi.

² Jesussha ni unuiniamurjsha nu nuatnaiyamunam ipiaamu ármiai.

³ Umutai amuukamtai Jesusa nukurj tímiayi “Umutai amuukai. Peñké takakainiatsui.”

⁴ Tura Jesus tímiayi “Nukuá, ¿urukamtai Winia túrutam? Iníatiústá. Winia kakarmar iniakmastiñ jeaatsui.”

⁵ Nuyá umutain wáinmainia nuna ni nukurj tímiayi “Ashí ni tana nu umiktárum.”

⁶ Nuj kayajaj najanamu yumi-yaraatai sais (6) ámiayi. Nu yaraatainmaya Israer-shuar ni ewejéncha ni nawéncha niijlamau ármiai Yus shiir enentáimtursatí tusar. Chíkich chíkich yaraatainmum uchenta (80) rítrusha, siañ (100) rítrusha yumi wayamniauyayi.

⁷ Nuyá Jesus umutain wáinmaun “Ju yaraatai ámpratarum” tímiayi. Takui mete ámprarmiai.

⁸ Ámprarmatai Jesus tímiayi “Pai, ishichik shikikrum námper chicharu suutarum.” Tutai nútiksañ túrawarmiai.

⁹ Jista chicharusha nu umutai ajasun nekáprámiayi. Yaraatainmaya yumi jusamun nekaachmai niisha tura umutai ajamau jusaru ásar nékarmai. Jista chicharusha nuwatun untasuk

¹⁰ tímiayi “Jístanmanka péñker umutain emka suñiatsuk. Tura jémararmataiñkia tímianchan suñiatsuk. Túrusha ámeke péñker umutai ikiasam yamá jíkchamek” tímiayi.

¹¹ Jesus túramu Kananum Kariréa nunkanam túrunamiayi. Nujainkia Jesus emka ni kakarmarín paant iniaktusmiayi. Nuna ísar ni unuiniamurjsha Nin enentáimtusarmiai.

¹² Nuyá Kapernáum péprunam wémiayi. Ni nukurjsha ni yachjsha ni unuiniamurjsha nemariarmiai. Nujsha untsurj tsawant pujusarmiai.

Yusa Unt Jeen suruktinian Jesus surimkiamiania nu

(Mateu 21.12-13; Márkus 11.15-18; Rúkas 19.45-46)

¹³ Israer-shuara namperj, paskua tutai, ishichik ajasmatai Jesus Jerusarénum wémiayi.

¹⁴ Nuj jeá Yusa Unt Jeen súruinian wáinkiamiayi. Turuncha murikniasha yampitsnasha súrin ármiai. Chíkichcha ni misarín pujusar kuítian yapajñiancha wáinkiamiayi.

¹⁵ Nuna wáiniak yarañken chapikmar asutkiartutain najana nujaj ashí waakartiuk murikrintiuk aa jírmiayi. Kuítian yapajñiu misaríncha ayantar ni kuítrin nunká ut-sankarmiai.

¹⁶ Yampitsan súrinniasha tímiayi “Nuka juyá jítiarum. Winia Aparu Jeen surutai jea najanawairap” tímiayi.

¹⁷ Nuna ísar ni unuiniamurj yaunchu Yus-Papiniun áarman enentáimprarmiai. Ju áarmaiti:

“Ame Jeeñ shiir atí tusan ti wakerukuitjai.”

¹⁸ Nuikia Israer-shuara untrj Jesusan aniasarmiai “Juna túramnaitjai tusam ¿warí kakarmak iniakmastatam?”

¹⁹ Jesussha tímiayi “Ju Jea sáakiakrumin menaintiú tsawantaj iniantaittiai Wikia.”

²⁰ Israer-shuarsha tiarmiai “Kuarentisáis (46) uwitin juna jeamtinian pujursarmiai. Amesha menaintiú tsawantaj jeamtámeash.”

²¹ Kame Jesus “Jea” chichayat ni ayashjñ tímiayi.

²² Tuma asamtai Jesus ukunam jakamunmaya nantakmiatai ni unuiniamurj ni timian enentáimprar ni chichamencha tura yaunchu Yus-Papiniun áarmancha “Nekasaiti” tu enentáimtusarmiai.

Jesus ashí shuara enentáin nekawai

²³ Paskua námperin ti untsurj Jerusarénum pujuarmia nu, Jesus aents tujintiamu túramtai, nuna wáinkiar Nin nekas enentáimtusarmiai.

²⁴ Tuma ain Jesus ashí neka asa ninkia enentáimtuscharmiai.

²⁵ Nínki ashí shuara enentáin neka asa chíkich ujatkat tusa atsumchamiayi.

3

Jesus Nikiutémuaj

¹ Shuar ámiayi ni naarj Nikiutému. Niisha Pariséu asa nii tuinia áintsañ Yúsnañ takauyayi. Niisha Israer-shuara untriyayi.

² Niisha kashi Jesusaj irastajtsa wé tímiayi “Uuntá, shuáran unuiniarat tusa Yus akúptámkaiti. Nu paant nékaji. Yúsaiyanchuitkiunka aentsti tujintiamu túramna nu tujinkiaintme’ tímiayi.

³ Jesussha tímiayi “Tí nekas tájame. Atak yamaram akiiniachuka Yus akupeamunam pachiiñkiashtatui.”

⁴ Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurj ampujén enkempramniakait atak akiiniatniuna?”

⁵ Ataksha Jesus túmiayi “Ti nekas tájame. Shuar entsayasha tura Wakanniumiasha akiiniachuka Yus akupeamunam penké pachiinkiashtatui.

⁶ Ayashniumiá akiinia nuka ayashchakait. Núnisan Wakanniumiá akiinia nuka wakan-chakait.

⁷ Wi “atak yamaram akiiniatniuiti” takui itiurchat enentáimpraip.

⁸ Nase enentáimpratá. Nase nanáksan umpúawai. Amesha ántame tura tuyan winiá túrasha tuiñ weti nékatsme. Núniskete ashí Wakanniumiá akiinia nu.”

⁹ Tuma asamtai Nikiuté musha atak anias “¿Jusha itiurak áminiait?” túmiayi.

¹⁰ Jesus áikmiayi “Ame Israer-shuara jintinniurjintiatmesha ¿itiura nékatsmea?”

¹¹ Ti nekasan tájame. Nekas nékakur chichaaaji. Ísmajnia nusha ujaaji. Tuma ain ii chichame ántatsrume.

¹² Aya ju nunkanmaya túramu ujaam ántachkurmeka ¿itiurak nayaimpinmaya túramusha antuktarum?”

¹³ “Shuar chikichkisha nayaimpiniam waka atsawai. Aya Wiki, nayaimpinmaya taran Aents Ajasu asan, túraitjai. Tura Wikia nayaimpinmayaitjai.

¹⁴ Tura Winiasha, Aents Ajasu ain, mantuawartatui. Iis, yaunchu Israer-shuar atsamunam wekainiak napijjai ti jáiniakui tuke tsamarti tusa Muisais napin jirú najana yakí numiniam awajaimiayi. Núnisnak Wisha awajnitniuitjai.

¹⁵ Nújainkia ashí Winia enentáimturna nuka jinium wétsuk Yusaj tuke iwiaaku pujustatui.”

Yuska ashí shuaran ti aneawai

¹⁶ Yuska ashí shuaran ti anea asa, ni Uchirín chikichik ana nuna shuáran uwentikrarat tusa tsanatkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmiayi.

¹⁷ Yus áentsun kajerak jinium surukat tusa ni Uchirín akupkachmiayi. Antsu uwentikrarat tusa akupkamiayi.

¹⁸ Yusa Uchirín enentáimtana nuka jinium penké surunkashtiniaiti. Tura Nin enentáimtatsna nuka, Yusa Uchirín chikichik ana nuna enentáimtachu asa, páchitsuk jinium surukmaiti.

¹⁹ Yusa Uchirí tsáapninia áintsan ii tunaari paant awajturmajai. Nu tsáapnisha ju nunkanam táraiti. Shuar tunáa ti tura ásar tsáapninian nakitrar kiritniun wakeriarmai. Nuna tura ásar jinium surunkaruiti.

²⁰ Ashí tunaan túruinia nuka tsáapninian muíjainiawai. Túrawar yupitiainiawai ni tunáa túramu paant ajasaj tusa.

²¹ Antsu ashí nekas túratniun umiiniana nuka tsáapninian weantainiawai. Yus ni enentái pujuram tsáapninium takainiawai. Nuka ti paantaiti.

Imiakratin Juan ataksha Jesusnan chichasmiania nu

²² Nuyá Jessusha ni unuiniamurjiaisha Jutía nunkanam wear nuj pujusar imiakratarmiayi.

²³ Juansha Enun nunkanam, Sarim tjijuchia nuj, imiakratuk pujumiayi entsa nuj núkap aa asamtai. Tura aents táarmatai imiainiarmiayi.

²⁴ Nusha Juánkan sepunam enkenatsajin túrunamiayi.

²⁵ Tura Juánka unuiniamurí Israer-shuarjai jianaiktinian nanáamawarmiayi. “¿Ya imiakratma imiá penkerait?” tusar áujmatarmiayi.

²⁶ Juánkaj inintrustai tusar wéarmiayi. “Uunta, ame nuik Jurtan entsa amain pujakum shuar nuj pujá “núiti Yusa Murikri” tichamkum. Yamaikia imiakratui tura ashí shuar Nin nemarainiawai” tiarmiayi.

²⁷ Tutai Juan túmiayi “Ashí kakarmaka aya Yúsajayanchakait.

²⁸ Wisha paant tímiajai “Wikia Krístuchuitjai antsu ni jintin iwiarat tusan emka akupkamuitjai.” Nusha antukmarme.

²⁹ Kame shuar nuwan nuatna nuna áishrinti. Nuatnaiyak áishman nuwejai áujnainiakui, ni amikrisha nuna antuk ti waraatsuk. Wisha núnisnak aents Jesusaj wénaku ti waraajai.

³⁰ Niisha tuke nanáamaku uunt ajastiniaiti antsu wikia tuke tímiancha ajastiniaitjai.” Juan tu chichasmiai.

Nayaimpinmaya tara nu

³¹ Nayaimpinmaya tara nuka ashí nanáamakuiti. Nunkeya nuka, nunkeya asa ju nunkanmayanak áujmatui. Nayaimpinmaya tara nuka ashí nanáamakuiti

³² tura nuj antukmancha ísmancha áujmatui. Túrasha ni chichamen ántuiniatsui.

³³ Antsu ni chichamen ántana nuka “Yusa chichame imiá nekasaiti” tawai.

³⁴ Yus akupkamuka Yusa chichamen étserei. Yuska ni Wakanin ementutsuk susa asamtai tu étserei.

³⁵ Yus Apa ni Uchirin anea asa ashí ana nuna iistí tusa ataksaiti.

³⁶ Shuar Yusa Uchirin enentáimta nuka yamaram iwiakmanum akiinia asa tuke Yusaj shiir pujustiniaiti. Antsu Yusa Uchirin enentáimtatsna nuka nu iwiakmanum akiiniachuiti antsu Yus tuke nin kajerkaiti.

4

Jesus Samaria nunkanmaya nuwajaj chichasmiania nu

¹ “Jesus untsurí shuaran ni namarin awajeawai; kame Juanjaj nankaamas untsurí imiaawai” taman Pariseu shuar antukarmiayi.

² Nekaska Jesus imiakratchamiayi, antsu ni unuiniamurí túrawarmiayi.

³ Pariséu nu chichaman antukarman Jesussha nekáa Jutiá nunkanmaya jiinki Kariréa nunkanam waketskimiayi.

⁴ Wáketuk Samaria nunkanmaaní nankaamaktiniuyayi.

⁵ Samaria nunkanam wéak Sekar péprunam jeamiayi. Nu pepru jeastatuk Jakupa nunke ámiayi. Jakupsha nu nunkan ni uchirin Jusén tí yaunchu susamiayi.

⁶ Nujsha yumirmat ámiayi. Jakup taurma asamtai “Jakupa yumirmatrí” tiarmiayi. Tutupin jeamtai Jesussha pimpiki winis yumirmat ayamach pujusmiayi.

⁷ Nuj pujaj Samarianmaya nuwá yumí shikiktajtsa támiayi. Tura Jesus “Entsa surusta” tímiayi.

⁸ Jesusa unuiniamurísha yurumkan péprunam sumaktajtsa wéaru asamtai aya Jesusak pujumiayi.

⁹ Samarianmaya nuwá Jesusan tímiayi “¿Itiura Israer-shuaraitatmesha Samarianmaya nuwá áisha entsa seatam?” Kame Israer-shuar Samarianmaya shuarjainkia penké chichachu ásar nuna tímiayi.

¹⁰ Jesussha tímiayi “Yus súamu nékameka tura entsa surusta tájam nusha nékameka ame antsu seattínme tura Wikia iwiaaku entsan amasantjai.”

¹¹ Nuwásha tímiayi “Uunta, entsasha ti iniitai tura shikiktincha takaktsume. ¿Tuyan iwiaaku entsasha surustam?”

¹² Ii uuntri Jakup jú yumirmatan taur juyanak niisha ni uchirísha ni waakarísha umararmiayi. Nuyá ikiurtamkimiayi. ¿Amesha Jakupjaj nankaamas kakarmakaitiam?”

¹³ Jesussha tímiayi “Ashí shuar jú entsan umarka penké kitiamtatiui.

¹⁴ Antsu Wi súajna nú entsan umarka penké kitiamchattawai. Antsu nu entsa Wi susamuka ni enentáin púkunia áintsaj tuke pajamtiatui nuvaj tuke iwaaku pujustí tusa.

¹⁵ Tutai nuwá tímiayi “Uuntá, winiasha nu entsa surusta. Wisha kitiamcha átaj. Tura jú entsancha shikiktinian táchataj” tímiayi.

¹⁶ Nuwásha Jesus tímiayi “Áishrum untsukam utitia, turam jú tatá.”

¹⁷ Nuwásha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai.

¹⁸ Kame ame áishrum senku (5) takusuitme. Yamái takakmena nusha ame áishrumchaiti. Nekas tame.”

¹⁹ Nuna antuk nuwásha tímiayi “Uunta, ame Yúsnan etserniuchukaitiam.

²⁰ Ii uuntrinikia tuke Samarianam pujuarmia nu jú nainnium Yúsan tikishmatrarmiayi. Antsu átum Israer-shuar árumna nu aya Jerusarénum Yus tikishmatratnuiiti tárume.”

²¹ Jesus tímiayi “Nuwá, enentáimsata. Tsawant jeattawai átum jú náinniumsha tátsuk tura Jerusarénumsha wétsuk Yus Apa tikishmatratin.

²² Átum tikishmatrum nuka nékatsrume. Iikia tikishmatrajnia nu nékaji. Israer-shuarnumiá Uwenttikkiartin winiakui nékaji.

²³ Tsawant winittiana nu yamá jeayi. Ashí shuar Yus Apan nekas tikishmatainiakka tuke wakanjaj tuke enentáijajisha awajitsuk tikishmatratatui. Núnisaj tikishmatrurat tusa wakerawai Yus Apa.

²⁴ Yuska Wakaniiti tura ashí Nin tikishmatainia nuka tuke wakanjaj tura tuke enentáijaj awajitsuk tikishmatratin ániawai.”

²⁵ Nuwásha tímiayi “Anaikiamua nu tátiniaiti. Nusha Krístuiti. Niisha taa ashí jintintra-mattaji.”

²⁶ Jesus tímiayi “Wiitjai. Ámin chichajmena nú Kristuitjai.”

²⁷ Nuiñ ni unuiniamurí táarmiayi tura nuwajaj chichaa pujan wáinkiar ti enentáimprurarmiayi. Tumaitiat “¿Warí wakerakmea nuwajaj chichaaam?” títinian arantukarmiayi.

²⁸ Nuyanka nuwá ni yumirín ikiuki péprunam we ashí áentsun tímiayi

²⁹ “Winiirum fitiarum, shuar ashí wi túramun túruta nu. ¿Juka Krístuittiya?”

³⁰ Tutai péprunmayā jiiñkiar Jesus pujamunam wearmiayi.

³¹ Jeainiatsaj̄n ni unuiniamur̄j seak tiarmiayi “Uunta, yurumáta.”

³² Tura Jesus tímiayi “Wi yúatniunka takakjai átum nékachman.”

³³ Ni unuiniamur̄jsha nuámtak anniasarmiyai “¿Chikich shuar yurumak itiarim̄ tátsuash?” tiarmiayi.

³⁴ Tura Jesus tímiayi “Winia akuptukua nuna wakeramur̄j túrakun tura ni takatr̄n takaakun Wijiain̄kia yurumátniā aintsaj̄n ikiakáatui.

³⁵ Átumka “Tuke kuaru nantu árak júuktin taasai” tátsurmek. Túrasha Wi tájarme, shuar wininia nu iistarum. Yus-Chicham ni enentáin araamuiti. Tura júuktin tsawant jeayi.

³⁶ Arakan júaka akinkiatniuiti. Júukmataisha nu shuar uwempr̄r tuke iwiaaku pujusaratui. Núnisaj̄n arakan araana nusha júana nusha mai metek warasartatui.

³⁷ Tiniu armia nuka nekasaiti: “Chikichik arawai chikichcha júawai.”

³⁸ Iis, chikich arakmamu júuktinian akupkaitjarne. Átum araachiatrumek chikich takamanum atumsha pachiiñtiukuitrume” tímiayi.

³⁹ Tura núwaka péprunam jeá “Ashí wi túramun ujat kayi” takui untsur̄j shuar Jesusan ti shiir enentáimtusarmiyai. Niisha Samarianmayā shuar ármiyai.

⁴⁰ Nu asamtai ashí Jesusaj̄ taar niij̄aj̄ pujusát tusa seawarmiyai. Tutai Jesus jimiará tsawant nūj pujusmiayi.

⁴¹ Nú shuar untsur̄j ni chichamen antukar Jesusan ti shiir enentáimturarmiyai.

⁴² Nuyá nuwan tiarmiayi “Yamaikia aya ame chichammij̄aj̄n Jesus enentáimtatsji antsu imia iisha ni chichamen anturkaji. Tura nékaji nekas Krístuiti, ashí shuaran Uwemtikin.”

Jesus akupniu takarniur̄j uchr̄in tsuármiania nu

⁴³ Jimiará tsawant nan̄kaamasmatai Jesus Samaria nun̄kanmayā jiinki Kariréa nun̄kanam wémiayi.

⁴⁴ Kariréasha Jesusa nun̄ke asamtai, ān̄sha Jesus timia aintsaj̄n ámiayi: “Yúsnan etserniun ashí shuar péñker anturainiawai antsu nuna nun̄keyañka nin anturainiatsui.”

⁴⁵ Tuma ān̄ Kariréa nun̄kanam jeamtai auyá shuarsha Jerusarénnum paskua námperum wearu ásar tura ashí ni túramun nūj wainkia ásar ti shiir awajsarmiyai.

⁴⁶ Nuyá Jesus Kaná péprunam atak támiayi. Nu péprunmasha nuik Jesus yumin umutai awajsamiayi. Jesussha nūj pujaj̄ yajá péprunam Kapernáumnum akupniu takar̄in ámiayi. Ni uchr̄isha jaa tepemiayi.

⁴⁷ Niisha Jesus Jutianmayā Kariréa nun̄kanam taman antuk Jesusaj̄ wémiayi. Tura ni uchr̄ir̄j jákatin tepakui ni jeen we ni uchr̄ir̄in tsuarat tusa Jesusan seamiayi.

⁴⁸ Jesussha tímiayi “Aya aents túrachminian túrakui ísrum aya nújaj̄n Winia enentáimtarme.”

⁴⁹ Tura takar̄in tímiayi “Uunta, winia uchr̄ir̄j jáatsaj̄n wari winitia.”

⁵⁰ Nuñkia Jesus tímiayi “Jeem̄in waketkitia. Yamaikia ame uchr̄iram péñker ajasai.” Tutai nú aishman̄ Jesus táman antuk wémiayi.

⁵¹ Ni jeen jeátemámtai ni takarniur̄j in̄kiun̄ tiarmiayi “Yamaikia uchr̄iram péñker ajasai.”

⁵² Apasha inintrusmiayi nantu urukaim péñker ajasma.

Niisha tiarmiayi “Yau, nantu pukuntamtai, tsuemun michatramai” tiarmiayi.

Nuna antuk uchi apar̄jsha enentáimsamai.

⁵³ Nantu pukunta āj̄ Jesus “Ame uchr̄iram péñker ajasai” timia nuní ān̄ michatrait. Tuma asamtai niisha ashí ni shuarj̄sha Jesusan nekas enentáimturarmiyai.

⁵⁴ Jesus nū túramuj̄aj̄ ni kakarmar̄in jimiará iniakmasmiayi. Nunasha Jutianmayā jiinki Kariréa nun̄kanam jeá túramiayi.

5

Petesta amia nūj tampemaran̄ Jesus tsuármiania nu

¹ Nu nan̄kaamasmatai, Israer-shuar namperan najanainiakui Jesus ataksha Jerusarénnum waketkimiyai.

² Jerusarén yama wayamunam murik wayat̄in waiti t̄jiuch amia nūj entsa pajamtai jeammauyayi. Nu pajamtain̄ Petesta tiarmiayi. Nuna wáitir̄jsha sen̄ku (5) ármiyai.

³ Nūj untsur̄j jániak nun̄kanam tepear̄miayi. Kusurusha shutuapsha tampemakusha tepesar entsa miartukat tusa nákasarmiyai.

⁴ Kame ni tátaj̄ taku Yusa suntar̄j táuyayi entsan umuchkiattsa. Nuyañka emka shuar entsá wayá nu ni jáamuriyá tsuámarmiyai.

⁵ Áishman̄ traintiúchu (38) uwi jaa tepá nūj ámiayi.

⁶ Jesussha nu shuaran nūj tepan wáinkiamiyai. Tura untsur̄j uwitin jaa tepan nekáa aniasmiayi “¿Shiir ajastiniak wakeram?”

⁷ Tutai jaasha tímiayi “Uunta, entsa muchitkiui ζwinia yaki enkétát? Kame wi enkemátaj tai chíkich emka enkemáiniawai.”

⁸ Nuyá Jesus tímiayi “Nantaktia. Ame peakrum jukim wetá.”

⁹ Nu chichamtaik áishman shiir ajasmiayi. Tura ni peakrjn jukí wémiayi. Nusha ayampratin tsawantaj túrunamiayi.

¹⁰ Tuma asamtai Israer-shuar shiir ajasun tiarmiayi “Yamáí ayampratin tsawantaiti. Peakrum júkishtiniaitme” tiarmiayi.

¹¹ Áishmansha tímiayi “Winia tsuara nu “Peakrum jukim wetá” turutni” tímiayi.

¹² Nuñkia aniasarmiayi “ζYa “Peakrum jukim wetá” túramam?” tiarmiayi.

¹³ Tura áishmansha Nin tsuárun nékachmiayi. Untsurí shuar nuj aa asamtai tura Jesus weu asamtai nin nekaachmiayi.

¹⁴ Atak Jesus Yusa Uunt Jēen áishmankan wáiniak tímiayi “Antukta. Yamaikia shiir ajasume. Atak tunáa túrawaip; nu arant ajasám” tímiayi.

¹⁵ Nuñkia áishman Jesus nin tsuárman nekáa Israer-shuaran ujakmiayi.

¹⁶ Tuma asamtai ayampratin tsawantaj túramtai Israer-shuar Jesusan maatai tusar áintrarmiayi.

¹⁷ Tura Jesus tímiayi “Wina Apar tuke yamaisha takawiti. Núnisnak Wisha takaajai.”

¹⁸ Tutai Israer-shuar nuna nankaamas maatai tusa wakeriarmiayi. Ayampratin tsawantaj takaakui kajerkarmiayi. Tura nu arantcha “Yus winia Aparuítí” takui Yusjají métek enentáimtumawai tusar nu arant kajerkarmiayi.

Yusa Uchirí túramnia nu

¹⁹ Nuyá Jesus tímiayi “Ti nekas tájarme, Yusa Uchirínkia ni enentájjiañ takaatsui. Antsu aya winia Apar takaana nuna íisan métek takaajai. Ashí winia Apar túramun Wisha ni Uchirí asan métek takaajai.

²⁰ Ni Uchirí asamtai winia Apar anentui tura ashí tura nuna iniakturui. Tura nuna nankaamas tujinkiamnian iniaktursattawai Wisha túratniun. Tura nuna túrakui ashamkat-tarme.

²¹ Winia Apar jakamunmayan iwiaaku ajasat tusa Ni wakerana nuna inianteatsuk. Núnisnak, ni Uchirí asan, Wi wakeraj nuna iwiaaku awájsámniaitjai.

²² Winia Aparka súmamtiksui antsu shuar súmamtikiatniun ni Uchirín súsaiti.

²³ Tuma asamtai ashí shuar Yus Apan shiir awajainia áintsan ni Uchiríncha métek shiir awajsatin áiniawai. Yus Apa ni Uchirín akupka asamtai, Uchin shiir awajeatsna nuka Yus Apancha shiir awajeatsui’ tímiayi.

²⁴ “Ti nekasaiti. Winia chichamprun ántana nú shuarka Winia Akuptukun enentáimtak ni iwiaakmarjn tuke amukashtinian takakui. Nu shuarsha ayashí iwiaakuitiat jákaui antsu yamáí nekas iwiaakuiti. Tuma asa sumamashtatui.

²⁵ Ti nekasaiti. Tsawant winittiana nu jeayi. Nu tsawant jaka ainia nu Wi untsunnan antukar umirkarka iwiaaku ajasartatui.

²⁶ Íis, winia Apar iwiaaku awajsatniun takakui. Tura Winiasha, ni Uchirí asamtai, iwiaaku awajsatniun surusuiti.

²⁷ Nu arantcha wi Aents Ajasu asamtai, shuaran súmamtikiatniun surusuiti.

²⁸ “Jú chicham itirchataiti” enentáimprairap. Atak tsawantaj wi untsunnan ashí jákaru ainia nu antukartatui.

²⁹ Tura ashí iwíarsamunmaya jínkiartatui. Péñker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui’ tímiayi.

“Jesus nekas Yúsajyáiti” tu áujmatainia nu

³⁰ ‘Imia Wiki takaatsjai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asamtai, awajitsuk súmamtikjai.

³¹ Aya Wiki “Yúsajyáitjai” tákunka winia chichamur ántar ainti.

³² Chikichcha awai. Niisha “Yúsajyáiti” túrutui. Ni chichamesha imiá nekasaiti.

³³ Atumsha Juankej wi túramu inintrusmarme tura nii timia nu nekasaiti.

³⁴ Tuma aiñ aents táman atsumatsjai. Antsu Juanka chichame enentáimkiuram uwempratarum tusan tájarme.

³⁵ Juansha jiya núnis keemai. Atumsha ishichik tsawantin nú tsápninnium warastin enentáimpramarme.

³⁶ Tura Winia “Yúsajyáiti” túrutna nu, Juanjai nankaamas péñkeran takakjai. Wi takasma núiti. Winia Apar takastinian surusma nuna takaakun nujají páantaiti Yus Apa akupkamuitjai.

³⁷ Winia Aparsha, akuptuku asa, ayamprutui. Túrusha átumka ni chichamesha antukchaitrume tura wáintiash wáinkiachuitrume.

³⁸ Yus Apa akuptukuiti. Tuma asamtai Winia enentáimturchakrum winia Aparu chichamesha atumí enentáin wayachuiti.

³⁹ Átumka Yus-Chicham yaunchu aarma nuĵ iwiaaku átinian wáinkiataj tusarum ti unuimi-aruitrume. Nu chichamsha Wínian áujmatui.

⁴⁰ Tuma aĵ nekas iwiaaku átaj tusarum Winí tátin nakitiarme” tímiayi.

⁴¹ “Shuar Winia “shíiraiti” túrutainiakuisha nuna páchiatsjai.

⁴² Maa, Wi nékajrume. Átumka Yus aneatrume.

⁴³ Winia Apar akuptukmatai táwitjai túrasha nakitrarme. Antsu chíkichka ní enentáijĵain jeartamkuĵkia nuka átum wakerarme.

⁴⁴ Átumka nuámtak “Shiir enentáimtursatí” tu enentáimtunaiyarme. Tura Yus enentáimturma nuka páchiatsrume. Núĵainkia ĵitiurak Yus enentáimtustam?

⁴⁵ “Íi tunaarĵ Yusaj etserturmaktatĵi” turutiirap. “Muisais akupkamun umirkan uwem-prattajai” tátsurmek. Antsu Muisais aarma nuĵaj atumí tunaarĵ etsernaktatui.

⁴⁶ Íis, Muisais Winia áatrurmiayi. Atumsha ní timia enentáimtakrumka Winiasha enentáimturaintrume.

⁴⁷ Tura ní aarma enentáimtackurmeka ĵitiurak wi tama enentáimtustarum?” tímiayi Jesus.

6

Jesus senku mir (5.000) áishmanĵan ayurawarmiania nu

(Mateu 14.13-21; Márkus 6.30-44; Rúkas 9.10-17)

¹ Nu nanĵkaamasmatai Jesus Kariréa antumiaĵnum amain katiĵmiayi. Nu antumiaĵsha Tipirias antumiaĵ tuiniawai. Jimiará náartiniaiti.

² Untsurĵ shuar Jesus ti jáinian tímiá wárik tsuan wáinkiaru ásar Nin nemariarmiayi.

³⁻⁴ Israer-shuara paskuanamperĵ ishichik ajasmatai Jesussha ní unuiniamurĵĵai náinnium waka nuĵ pujusmiayi.

⁵ Jesussha untsurĵ aents wininian wáiniak Jiripin tímiayi “Tímiá untsurĵ shuar ayurat-niusha ĵtuyan yurumak sumaktaj?” tímiayi.

⁶ Kame Jesuska Nii túrátana nuna neka asa Jiripi warittĵn tusa tímiayi.

⁷ Jiripisha nuyá tímiayi “Tímiá nukap kuitĵai tanta sumakmesha ashí ishichik susamsha jeachaintĵia” tímiayi.

⁸ Nuyá chíkich unuiniamurĵ Antres, Pitru yachĵ, tímiayi

⁹ “Uchi ĵuĵ seĵku (5) tantan jimiará namakĵai takakui. Ausha tímiá untsurĵnmasha jeatpiash” tímiayi.

¹⁰ Nuyanka ““Ashí pujustarum” titiarum” tímiayi Jesus.

Áishmanĵa nuwaĵsha uchisha irunmiayi. Tura chírichri núkap aa asamtai nuĵsha seĵku mir (5.000) áishmanĵ pujusarmiayi.

¹¹ Jesussha nu tantan achik Yúsan yumĵnkias ní unuiniamurĵin susamiayi. Niisha ashí nuĵ puĵuinian súsarimiayi. Namaknasha núnisaĵ ashí ní wakeriarmiania nuna súsarimiayi.

¹² Jémarmataisha Jesus ní unuiniamurĵin tímiayi “Ampirma júukrum chaĵkinnium chumpiatarum. Wasúrńakajĵn.”

¹³ Niisha seĵku (5) tantanmaya ampirmán júukar tuse (12) chaĵkinnium áimkiarmiayi.

¹⁴ Nu shuarsha Jesus túramun ísar tiarmiayi “Ĵu nekas Yúsán etserin tátinia núchakait.”

¹⁵ Shuar Jesusan uunt akupin awajsataj tutai Jesus nekáa Niĵki náinnium wémiayi.

Jesus entsá pátakek nanamas wekasamiania nu

(Mateu 14.22-27; Márkus 6.45-52)

¹⁶ Kĵakui Jesusa unuiniamurĵ antumiaĵnum wearmiayi.

¹⁷ Káshisha Jesus tuke táchamtai uunt kanunam eĵkemáwar Kapernáum péprunam wéenak ĵiĵinkiarimiayi.

¹⁸ Tura nase ti umpúakui chíchimi ti wajaimiayi.

¹⁹ Ajapén ajaras Jesus entsá pátakek nanamas tĵiĵuch winian wáinkiar ashamkarmiayi.

²⁰ Tura Jesus “Wíitĵai. Ashamprukairap” tímiayi.

²¹ Núĵainkia ti shiir warasar kanunam ítiaawarmiayi. Tura nu chichamtaik ní wéamunam jeawarmiayi.

Shuar Jesusan eĵk wekainiawai

²² Kashincha chíkich shuar amain ayuramunam kanararu nekaawarmai. Jesusa unuiniamurĵ Jesusĵainchu chíkichik kanu amia nuĵai wéarun nekaawarmai.

²³ Nuĵ chíchak matsataĵ Tipirias péprunmaya chíkich kanu táarmiayi. Yau Jesus Yúsán yumĵnkias tantan ayuramunam tĵiĵuch táarmatai

²⁴ nu shuar, Jesussha ní unuiniamurĵisha nuĵ atsuiniakui, nu kanunam eĵkemáwar Kapernáum péprunam Jesusan eĵktajtsa wearmiayi.

Jesus apatkua áintsan̄kete

- ²⁵ Entsa amain Jesusan wáinkiar aniasarmiayi “Uunta, ¿urutía jūsha támam?”
- ²⁶ Jesussha tímiayi “Ti nekas tájarme. Aents tujintiamu nekáa asarum é̄atsurme. Antsu tanta yuarum jémaru asarum é̄atrume.
- ²⁷ Juyá yurumak amuukatin asamtai ti pachisairap. Antsu amuukashtin yurumak tuke iwiaaku pujustinian amaanu nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Jūka shuáran Yáin̄kiartiniaiti” túrutui” tímiayi.
- ²⁸ Tutai inintrusarmiayi “¿Warí túratniuitiaj! Yus wakerana nu umiktin?”
- ²⁹ Jesussha tímiayi “Yus akupta asa Winia enentáimtusarat tusa wakerawai.”
- ³⁰ Tutai aniasarmiayi “¿Aentsti tujintiamuka warí túratam ii ísar Ámin nekas enentáimtustin? Chikichcha túratá.
- ³¹ Yaunchu ii uuntri aents atsamunam maná yurumkan nayaimpinmayá susamun yurumáwarmiayi. Yus-Chichamnum núnik áarmaiti: “Nayaimpinmayá yurumkan Yus susamiayi.” Tu áarmaiti” tiarmiayi.
- ³² Jesussha tímiayi “Wi tájana nu nekasaiti. Muisais atumí úuntriñ nayaimpinmayá yurumkan súsachmiayi. Antsu winia Apar yamá nekas apatkun nayaimpinmayá súramui.
- ³³ Iis, Yusaiyá apatkunka, nayaimpinmayá tára nu súramui tura nekas apatuk asa ashí shuaran nekas iwiaakman súawai.”
- ³⁴ Tutai “Uunta, nu apatuk tuke amasta” tiarmiayi.
- ³⁵ Tura Jesussha tímiayi “Wiitjai nu apatuk nekas iwiaakman súana nu. Winí winiana nú shuar pen̄ké tsukamashatui, tura Winia enentáimturna nusha tuke kitaarchattawai.
- ³⁶ Túrusha wi túramu wáinkiuermesha winia chichamur enentáimtatsrume.
- ³⁷ Ashí shuaran winia Apar tsan̄katrukarmiania nu, Wíi shuar ajasartatui. Winin winiana núnaka pen̄ké nakitrashtatjai.
- ³⁸ Wi wakeraj nuna túratniun táchaitjai antsu Winia akuptukmia nuna umirkatniun táwitjai.
- ³⁹ Winia Apar akuptukui tura juna wakerawai. Ashí winia tsan̄katrukman emen̄kátsuk amuukatin tsawantaj iniantkiarat tusa wakerawai.
- ⁴⁰ Yus Apa wakerana nu júiti. Ashí shuar Winia “Yusa Uchir̄inti” tu enentáimturkui yamaram iwiaakman tuke takusat tusa wakerawai. Nú shuarnaka amuukatin tsawantaj iniantkittijai” tímiayi Jesus.
- ⁴¹ Tura Jesus “Wiitjai, nayaimpinmayá apatuk akupkamu” takui Israer-shuar Jesusan áujmatiarimiayi.
- ⁴² Tura tiarmiayi “Jū Jesuschakait, Jusé uchir̄iya nu. Iikia ni apar̄isha nukur̄isha nékatsjik. ¿Itiurak “Nayaimpinmayá taraitjai” ta?” tiarmiayi.
- ⁴³ Jesussha tímiayi “Tu áujmatrukairap.
- ⁴⁴ Shuáran winia Apar akúpturkachuikiun̄kia pen̄ké weanturkachainti. Tura Winia akupturna nuna amuukatin tsawantaj iniantkittijai.
- ⁴⁵ Yúsnan etserniú áarmar̄in tawai “Ashí Yus jintintiamu ártatui”. Núnisar̄ ashí Yusa chichamen antukar unuimiatainiakka Winí táiniawai” tímiayi.
- ⁴⁶ “Aya Wiki Yúsaiyá tau asan Yúsan wáinkiaitjai. Chíkicha pen̄ké wáinkiachuiti.
- ⁴⁷ Ti nekas tájarme. Winia enentáimturna nú shuarka yamaram iwiaakman amuukash-tinian takakui.
- ⁴⁸ Wikia iwiaakman súana nú apatkuítjai.
- ⁴⁹ Iis, atumí uuntri aents atsamunam maná yurumkan yúawariatcha ashí jákarmiayi.
- ⁵⁰ Antsu Wi tájana nú apatkun shuar yúakka jákachartatui.
- ⁵¹ Wikia nayaimpinmayá iwiaaku apatkuítjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashruiti. Ashí shuar Yusaj iwiaaku pujusarti tusan winia ayashrun susattajai” tímiayi Jesus.
- ⁵² Nuyá nuámtak áujmattar tiarmiayi “¿Itiurak ni ayash̄in̄kesha ayuramatataj?” tiarmiayi.
- ⁵³ Jesussha tímiayi “Ti nekas tájarme, Wi Aents Ajasu asamtai winia ayashur yúatniuitrume. Winia ayashur yúachmeka tura winia numpar umarchamka nekas iwiaaku pujatsrume.
- ⁵⁴ Winia ayashrun yúana nuka tura winia numparun úmakka yamaram iwiaakman amuukash̄tinian takakui. Tura nu shuaran amuukatin tsawantaj iniantkittijai.
- ⁵⁵ Winia ayashruka nekas yurumkaiti tura winia numparsha nekas umutaiti.
- ⁵⁶ Winia ayashruncha yúaka tura winia numparnasha úmaka Wijjaj tsaniñ pujawai tura Wisha nu shuarjaj tsaniñkian pujajai.
- ⁵⁷ Yus Apa, Winia akuptukuka, nu iwiaakma nérenniuiti. Tuma asamtai ni iwiaakmar̄iñ iwiaaku pujajai. Núnisar̄ Winia yurakka winia iwiaakmaruj iwiaaku pujustatui.

⁵⁸ Nayaimpinmaya apatkun tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” tímiayi Jesus.

⁵⁹ Núnaka Jesus Israer-shuar iruntainiam unuiniarmiayi.

Iwiaaku chicham

⁶⁰ Nu chichaman antukar Jesusa unuiniamurj chicharainiak “Nii tana nu ti itiurchat asamtai ¿yaki antukminiait?” tiarmiayi.

⁶¹ Jesussha ni áujmatman nekáa tímiayi “Átum “ju chicham itiurchataiti” tárumek.

⁶² Wátsek, Wi nayaimpiniam pujumiaj nuj waketkimtaisha ¿urukawaintrumek?

⁶³ Warí, aya wakanik iwiaakman súwaiti. Ayashkia penké áantraiit nekas iwiaaku awajsatniun. Wi tájana nujai imiá nekas wakankia iwiaaku awajsamniaiti” tímiayi Jesus.

⁶⁴ Tura Jesus Nin enentáimtachun tura Nin suruktatna nunasha yaunchu neka asa ni unuiniamurjín tímiayi “Atumjíncha winia chichamprun enentáimtachu tuke awai.

⁶⁵ Nu asamtai tímiajrumé “Shuáran winia Apar akupturkachmaitkiuinjka penké wean-turkachainti” tímiajai” tímiayi Jesus.

⁶⁶ Nuyasha ni nemarniurj untsurj armia nu Jesusan ikiukiar atakka Niijjai wekasacharmiayi.

⁶⁷ Nuyá Jesus ni tuse (12) unuiniamurjín chicharainiak “¿Atumsha wétin wakerarmek?” tímiayi.

⁶⁸ Semun Pítrusha áikmiayi “Uunta, ¿yáiniñ wetaj? Ame chichammijjain nekas iwiaaku áminiaiti.

⁶⁹ Ame Kristu asam nekas iwiaaku Yusa Uchirínme. Nuka enentáimtusar ti paant nékaji” tímiayi.

⁷⁰ Jesussha tímiayi “Ashí tuse (12) árumna nu achikiuitjarme nekas Wíi shuar ajastin. Tuma ain atumjín chikichik iwianchiiti” tímiayi.

⁷¹ Nuna taku Jútás Iskariútin, Semunka uchirín, enentáimtusar tímiayi. Jútassha ni unuiniamurjintiat Jesusan ukunam surukmiayi.

7

Jesusa yachisha Nin enentáimtuscharmiayi

¹ Nu nankaasmatai Jesus Kariréa nunkanam wekaimiayi. Jutía nunkanam wéchamiayi Israer-shuara uuntri nuj máataj tutai.

² Tura Israer-shuar aak aakmatai namperi jeatemamtai

³ Jesusa yachj wishikiainiak tiarmiayi “¿Urukamtaí jujsha pujam? Jutía nunkanam wetá, ajsha ame unuiniamuram túram nuna ísarat.

⁴ Ashí shuar nekaawarat tákumka úukam túrawaip. Ti tujintiamu túriniaitkiumka ashí shuar ímmianum túratá” tiarmiayi.

⁵ Ni yachisha ishichkisha Nin enentáimtachu ásar tiarmiayi.

⁶ Tura Jesus tímiayi “Winia tsawantur nampernum wétin jeatsui. Atumjainjka nánkamás tsawant wétin péñkeraiti.

⁷ Ju nunkanmaya aents atumniaika kajertamatsrume. Antsu ni tunaarjín etsertin asamtai Wíniaka kajertuiniawai.

⁸ Átumka nampernum wetarum. Wikia tsawantur jeachkui wéatsjai.”

⁹ Juna tinia Jesuska Kariréa nunkanam juákmiayi.

Aak aakmatai nampernum Jesus timia nu

¹⁰ Ni yachj wearmatai Jesussha nampernum wémiayi. Tura nekarawarain tusa úumak wémiayi.

¹¹ Israer-shuara úuntrijsa námper irunturmanum eakar “Nu aishmanjsha ¿tuiñ pujá?” tiarmiayi.

¹² Ashí shuarsha Nin áujmatarmiayi. Chíkich “péñkeraiti” tiarmiayi. Tura chikichcha “Péñkerchaiti. Aya anañkartawai” tiarmiayi.

¹³ Tura Israer-shuara úuntriñ ashamainiak uuk áujmatarmiayi.

¹⁴ Nampersha ajapén ajasmatai Jesus Yusa Uunt Jéen wayá shuáran unuiniamiayi.

¹⁵ Israer-shuara úuntrijsa nuna ísar ti enentáimsar chichaak “Jusha unuimíatrachiatcha ¿itiurak imiá neka?” tiarmiayi.

¹⁶ Jesussha tímiayi “Wi unuiniajna nu winia chichampruchuiti antsu Winia akuptukua Núnan unuiniajai.

¹⁷ Yus wakerana nuna shuar nekas umiktinian wakerakka winia chichamprun nekaattawai. Nekas Yúsnaikuijnka, nuna nekaattawai. Aya wi enentáimmiainj chichaakuisha, nuna nekaattawai.

¹⁸ Ni enentáimmiajaj chichaana nuka ashí shiir enentáimtursarti tusa chichaawai. Antsu nin akupka nuna shiir awajsarti tusa wakerak, nekas wáitratsuk tawai.

¹⁹ Muisais Yusa akupkamurin atumí uuntrin amaschamka. Tuma aijn nu umitsuk mantuatin wakerutarme” tímiayi Jesus.

²⁰ Nu shuarsha tiarmiayi “Wáurtsumek. ¿Ya mantamataj tusa wakera?”

²¹ Jesussha tímiayi “Ayampratin tsawantaj chikichkí túramtai ti enentáimtsurmek.

²² Muisais ashí tsupirnaktinian akupkachmiayi. Antsu ni uuntrin^{ka} nuna akupka ániawai. Tuma aijn átumka Muisais akupkamu umiktai tusarum ayampratin tsawantajsha uchi áishman tsúpirnaitrume.

²³ Wátsek, Muisais akupkamu uminkiatu tusarum ayampratin tsawantajsha uchi áishman tsúpirkurmekaka çurukamtai Wi ayampratin tsawantaj áishman^{ka} ayashí takamtsuk tsuármatai kajertarum?

²⁴ Shuar túrana nu íisam wárik súmamtikiawaip. Antsu inintrúsam paant nekaam, nekas nu enentáimtusta” tímiayi Jesus.

Jesus Yúsnumiq akupkamuiti

²⁵ Nuyá Jerusarégnumia shuar tiarmiayi “Maatai tuinia núchakait.

²⁶ Tura nu^j ashí ántamunam éterui tura suntar páchiniautsui. ¿Ii uuntrinsha “Nekas Krístuiti” tu enentáimtuiniawash?

²⁷ Antsu nekas Kristu taa tuyaⁿ winiá nekanashtatui tura ju^j pujamuka ashí nékaji” tiarmiayi.

²⁸ Jesus nuna antuk, Yusa Uunt Jeeⁿ waja kakaram chichaak tímiayi “Winia nekararum tuyá winiaj nu nékarme. Kame núnisrum enentáimprume. Tura winia enentáir^{ja} táchaitjai antsu winia Apar akuptukuiti. Niisha ti nekas akupniusha átumka nékatsrume.

²⁹ Antsu Winia akuptukuitkiui a^{ja}ya tau asan Wikia nékajai” tímiayi.

³⁰ Nuyá sepunam en^{ke}ataj táyat achikcharmiayi ni tsawantrⁱ jeachu asantai.

³¹ Tura untsur^j shuar Nin enentáimtsusar “Kristu ta çnuna nan^{ka}amas aentsti tujintiamun túratpiash?” tiarmiayi.

“Éátkáttarme tura wáitkiashtatrume” tímiayi Jesus

³² Pariséusha Israer-patri uuntrinsha Jesusnan timian antukar suntaran akupkarmiayi Jesusan achikar sepunam en^{ke}awarat tusar.

³³ Nuyá Jesussha tímiayi “Aya ishichik tsawant atum^{ja} pujustatjai. Nuyá ataksha Winia akuptuku pujana nu^j waketkittijai.

³⁴ Átumka éátkáttarme tura Wi wéajna nu^j wéchamniaitkiuram wáitkiashtatrume.”

³⁵ Israer-shuarsha nuamtak aniniisarmiayi “¿J^usha tu^j wéakuⁱn iisha wáinkiashtataj. Israer-shuar apachnium pujuinia nu^j we apachin unuiniartatuak.

³⁶ Nii timia nu iturkit. “Átumka éátkáttarme tura Wi wéajna nu^j wéchamniaitkiuram wáitkiashtatrume” tana nu iturkit?” tiarmiayi.

Yamaram iwiaakman súana nú entsa

³⁷ Jista amúamunam ti shiir najanawarmia nu tsawantaj Jesus wajaku kakaram chichaak tímiayi “Shuar ni enentájn kitiamakka Winin taa umar kitiakén imíkráti.

³⁸ Winia enentáimturna nuka ni enentá^{ja} entsa wa áintsanⁿ yamaram iwiaakman súana nú entsa jiinkittiwai.”

³⁹ Nuna taku Jesus “Ashí Yúsan enentáimtsusarun Yusa Shiir Wakan^j súsatniuiti” tímiayi. Tura núnisanⁿ Yus-Papiniunsha áarmaiti. Antsu Jesus tuke nayaimpiniam wéatsainⁿ Yusa Wakan^j shuar súasachmauyayi.

Shuarsha niisháa niisháa enentáimprarmiania nu

⁴⁰ Chíkich shuarsha nuna antukar “Ju nekas Yúsan etserin tátinia núiti” tiarmiayi.

⁴¹ Chikichcha “Ju^{ka} nekas Krístuiti” tiarmiayi. Tura chíkichkia Jesus Kariréanmay^{ai}ti tu enentáimainiak tiarmiayi “Warí, ¿Kariréa nuⁿkanmayá Krístu áminkiat?

⁴² Yus-Papiniun paant tawai “Krístuka yaunchu uunt akupin Tawit weeanmayá akiini-atniuiti, tawai. Tura Tawitia pépruriya Pirin^{numia} átiniaiti” tawai” tiarmiayi.

⁴³ Tuma asantai shuar niisháa niisháa enentáimprar kanakiarmiayi.

⁴⁴ Chíkich a^{ja}ya nuka “sepunam en^{ke}ataj” tiarmiayi túrasha túracharmiayi.

Israer-shuara uuntrⁱ Jesusan enentáimtsu^{ch}armiania nu

⁴⁵ Suntarsha waketkiarmiayi. Tura Pariséusha Israer-patri uuntrinsha “¿Urukamtai itia^{ch}uram?” tiarmiayi.

⁴⁶ Suntarsha tiarmiayi “Chikichkisha ju^j áishmanⁿ chichaa áanis chichaschaiti” tiarmiayi.

⁴⁷ Nuyá Pariséu tiarmiayi “Atumsha ananⁿarume.

⁴⁸ Pariséutisha uuntcha nuna enentáimtuiniawash.

⁴⁹ Penké shuarka yaunchu akupkamun nékachua nuka yajauchiniam yumínkramu áiniawai” tiarmiayi.

⁵⁰ Nikiuté musha, kashi Jesusan tarimia nu, Pariséuitiat tímiayi

⁵¹ “Íi shuartikia, shuar ni túramun etserkamu ántutsuk súmamtikiachminiaiti” tímiayi.

⁵² Nuínkia níisha tiarmiayi “Wats, amesha Kariréanmayá nchuashitiam. Yus-Chicham áuj sam nekaattame. Kariréanmayá Yús nan etserin penké táiniatsui” tiarmiayi.

Nuwa wáinmakman Jesusan itiarimiania nu

⁵³ Nuyá ashí ni jeen waketiarmiayi.

8

¹ Tura Jesuska Uriwiu náinnium wémiayi.

² Tura kashin tsawar Yusa Uunt jeen atak támatai ashí shuar Nin káutkarmiayi. Túrawarmatai Jesus pujus unuiniarmiayi.

³ Nuyá Israer-shuara jintinniurjsha Pariséusha nuwan wáinmakman Jesusan itiarimiai.

Tura ashí iruntramunam ajapén awajarmiayi.

⁴ Tura Jesusan tiarmiayi “Uunta, ju nuwa tsanirma pujá achinkiai.

⁵ Muisais akupkamunmasha nuna túraka “kayajají tukurar máatniuiti” tawai. ¿Amesha warintmea?” tiarmiayi.

⁶ Aya mamikmar nekapsatai tusar tiarmiayi. Nin sumamtikiatniun wakeriarmiayi.

Nuyá Jesus tsuntsumá ni uwejejái nunká áarmiayi.

⁷ Tura tuke iníam wajaki tímiayi “Ayu, atumíyá tunáa túrichu ákunka kayan achik nin emka tukuti” tímiayi.

⁸ Tura nuna tí, ataksha tsuntsumá nunká áimiayi.

⁹ Tura ni chichamen antukar ni enentáin sumamawar úuntnumig júki chikichik chikichik jiinki wéarmiayi.

Ashí wéarmatai Jesus Niníki nuwájají juákmiayi.

¹⁰ Jesussha wajaki aya nuwanak wániak tímiayi “¿Ámin súmamtikramainia nusha tuin pujuinia. Chikichiksha áwak?” tímiayi.

¹¹ Niisha “Atsá, Uunta. Chikichiksha atsawai” tímiayi.

Nuyá Jesus tímiayi. “Ayu. Wisha súmamtikiatsjame. Yamaikia weme atakka tunáa túrawaip” tímiayi.

Jesus tsáapnia áintsan kete

¹² Ataksha Jesus Yusa Uunt jeen iruntrarun tímiayi “Ju nunkanam Wi tsáapnia áintsan shuara enentáin tsáapniajai. Ashí Wijjái tsanin wekaana nú shuar ni enentáin kiritniunam wekasashtatui antsu tsáapnin yamaram iwiaakman súana nujají wekasattawai.”

¹³ Pariséu nuikia tiarmiayi “Ame péngerum tau asam támena nu áantraiti.”

¹⁴ Jesus tímiayi “Tuyá winiaj tura tuí weaj nu nékatsrume, tura Wikia nékajai. Tuma asan winia péngerun táyatnak tájana nu péneraíti.

¹⁵ Ju nunkanmayá aents enentáimmiajai enentáimtakrum ti súmamtikrume. Tura Wikia chikichinkesha súmamtiktsujai.

¹⁶ Tura súmamtikiunka awajitsuk túrajai. Iis, Wiki shuar túramun pénerashit tusan enentáimtsujai antsu winia Apar Wikia akuptukua nusha Wijjái métek shuar túramun nékawai.

¹⁷ Atumí akupkamurjín áarmaiti: “Jimará shuar mai nú chichamnak tákuínkia nu chicham nekasaiti.”

¹⁸ Wátsek Wisha winia Aparsha mai métek taji. Winia Aparsha akuptukuíti” tímiayi.

¹⁹ Tutai “¿Ame apasha tuí pujá?” tiarmiayi.

Jesussha tímiayi “Átumka Winiasha winia Aparsha nékatsrume. Winia nékarkurmeke winia Aparsha nekaawaintrume.”

²⁰ Nuna Yusa Uunt jeen Yusa kuítrín suinia nuí tímiayi. Tuma aín sepunam enkeatniun achikcharmiayi ni tsawantrí jeachu asantai.

“Wi wéajna nuí wéchamniaitrume” tímiayi Jesus

²¹ Jesus ataksha tímiayi “Wikia wéajai. Atumsha eátkáttarme tura wi wéamunam wéchamniaitkiuram atumí tunaarjijáin jakattarme.”

²² Israer-shuarsha tiarmiayi “Wi wéamunam wéchamniaitrume” tutai, nuínkia máamatpiash” tiarmiayi.

²³ Nuínkia Jesus tímiayi “Átumka nun kayáitrume antsu Wikia nayaimpinmayáitjai. Ju nun kayáitrume tura Wikia juyanchuitjai.

²⁴ Tuma asantai tájarme “Atumí tunaarjijáin jakattarme.” Nekas Wi tájana núitjai. Tura nu enentáimtachkurmeke atumí tunaarjijáin jakattarme” tímiayi.

²⁵ Niisha aniasarmiayi “¿Amesha yáitiam?”

Jesusha tímiayi “Yaunchu tájarme.

²⁶ Nu arantcha atumin súmamtikiatjarum tusan ti tímíniatjai. Winia Apar akuptukua nuka tuke nekasa nuna tawai. Tura aya ni taman antukan ashí shuaran nunak tajai” tímiayi.

²⁷ Tuma ain ni Aparin áujmatman penké nekaacharmiayi.

²⁸ Tuma asantai tímiayi “Aents Ajasuitjiana ju, numiniam ajintruarum yakí takuriakrumin nújainkia nekarattarme. Wi tájana núitjai tura winia enentáirjain takatsuk aya winia Apar unuíturmanak tájai.

²⁹ Winia akuptukua nuka tuke Wíjain pujawai. Winia Apar wakeramun tuke shiir túrakui ikiurkichuiti” tímiayi.

³⁰ Tutai untsurí shuar Nin nekas enentáimtusarmiayi.

Yus-shuarsha tura tunaanum emetamusha

³¹ Israer-shuaran Nin shiir enentáimtusarmia nuna Jesus tímiayi “Wi tájarmena nu yawwetsuk túrakrumka nekas winia unuiniamur átatrume.

³² Nújaisha timiá nekas ana nu nekaattarme tura nekas ankant ajastatrume” tímiayi.

³³ Niisha tiarmiayi “Iisha Apraám weeatji. Chikicha takarniur átai tusar penké emetach-maitji. ¿Urukamtai “Ankant ajastatrume” tame?” tiarmiayi.

³⁴ Jesus tímiayi “Timiá nekasaiti, ashí shuar tunaan túruinia nuka nu tunaajai emetamuiti. Tuma asa takarniua núnisaj ajasuiti.

³⁵ Takarniusha ajapnammia asantai Yus atumin ajapramamniaitrume. Tura Akupniu Uchirinkia ni Aparijjai tuke pujawai.

³⁶ Tuma asantai Akupniu Uchirí ankant awajtamsamtainkia imiá nekas ankant pujus-tatrume.

³⁷ Átum Apraám weeatrume nékajai. Túmaitiatrum winia chichamur ántachu asarum mantuataj tárume.

³⁸ Winia Apar iniaktursamun áujmatjai. Átumka atumí uuntrj timia túrarme” tímiayi.

³⁹ Tutai niisha tiarmiayi “Iikia Israer-shuar asakrin ii uuntrjnkia Apraámaiti” tiarmiayi.

Tura Jesus tímiayi “Nekas enentáimin Apraám weeitkiurmeka níya núnis túrawaintrume.

⁴⁰ Nekas ana nuna Yus iniaktursamtai nuna ujakjarme, tuma ain mantuataj tarume. Apraámka nuní túrachmiayi.

⁴¹ Antsu atumí uuntrj túrana áintsarum túrarme” tímiayi.

Tutai niisha tiarmiayi “Warí, tsanirnumiá akiiniachuitji. Ii uuntrj Yúskete. Niisha ii Aparínti.”

⁴² Tura Jesus tímiayi “Yus nekas atumi Aparíntkiuinikia Winiasha anentíntrume Yúsnumiá tau asamtai. Wisha winia enentáimmiarjai juí táchaitjai antsu Yus akuptukuiti.

⁴³ ¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrume.

⁴⁴ Atumí aparjnkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke mankartiniaiti. Nekas ana nunasha nakitiawai tuke wáitrin asa. Wáittraksha níniunak chichaawai. Iis, waitia uuntrj asa tuke wáitriniaiti.

⁴⁵ Tura Wikia nekas takui átum enentáimturtsurme.

⁴⁶ ¿Yaki chikichkí tunaajai súmamtikruamniait? Nuikia Wi nekasa nuna tau aisha ¿urukam-tai enentáimturtsuram?

⁴⁷ Yús-shuarka Yus timian ántawai tura átum Yúsnachu asarum Wi tájana nu nakitiarme” tímiayi.

Apraám akiintsain Jesus pujumiayi

⁴⁸ Nuikia Israer-shuar tiarmiayi “Maa, ti nekas tátsujik “Ame Samarianmaya shuáraitme. Tuke yajauch ániawai nusha. Nu arantcha iwianchrुकuitme amesha” nekas taji” tiarmiayi.

⁴⁹ Jesusha tímiayi “Iwianchrुकchaitjai. Áyatik winia Aparun shiir enentáimtikijajai. Tura átumka yajauch chichartarme.

⁵⁰ Wikia “shiir enentáimturati” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun penkerashit tusa nekaattawai.

⁵¹ Ti nekasaiti. Wi tájana nuna enentáimta nú shuarka penké jákashtiniaiti” tímiayi.

⁵² Nuinkia Israer-shuar tiarmiayi “Pai, yamaikia ti paant iwianch takakme. Apraámsha ashí Yúsnan etserniusha jákaruiti tura Ame “Wi tájana nuna enentáimtaka penké jákashtiniaiti” tátsumek tiarmiayi.

⁵³ ¿Nuinkia ii uuntrj Apraám nankaamaskaitiam. Niisha tura Yúsnan etserniusha jákacharuk áinia. Itiurak imiá nankaamantu enentáimtumam?” tiarmiayi.

⁵⁴ Jesusha tímiayi “Wiki shiir enentáimtumaknaka penké áantrai. Antsu Winia shiir enentáimturna nu winia Aparuiti. Nusha átumka “winia Yúsrui” tárumna núiti.

⁵⁵ Nusha táyatrur Nin nékatsrume. Wikia Nin nékajai. “Nin nékatsjai” tákunka atumjají métek wáitrin ántjai. Tura Nin neka asan Nii tana nuna tuke túriniaitjai.

⁵⁶ Apraámka, atumí uuntri, imiá yaunchu jákaiat Wi ju nunkanam tátinian wararas nákasmiayi. Tura wáitai ti shiir warartusmiayi” tímiayi.

⁵⁷ Nuyá Israer-shuar Jesusan tiarmiayi “Warí, senkuenta (50) uwí takaktsume túmaitiam Apraáman wáinkiamjai tame.”

⁵⁸ Jesussha tímiayi “Ti nekas tájarme, Apraámka pujatsajin Wikia pujajai” tímiayi Jesus.

⁵⁹ Nuna takui kayan achikiar “Jesusan tukutai” tiarmiayi. Tura Jesus úumak ni matsatmanum ajapénin weak Yusa Uunt Jeeniá jiinki wémiayi.

9

Kusuru akiinian Jesus tsuármiania nu

¹ Jesus ni unuiniamurijjají wesa áishmankan kusuru akiinian wáinkiamiayi.

² Ni unuiniamurjsha aniasarmiayi “Uunta, jusha çurukamtai kusuru akiiniawit. Yana tunaarjijajin kusuru akiiniat. Niiniuajampiash, aparíniuajampiash túrunawit?” tiarmiayi.

³ Jesus tímiayi “Ni tunaarjijainchusha ni aparíniuajainchusha túrunaiti. Antsu Yus ni ayashin túratniua nu paant atí tusa túrunaiti.

⁴ Tsawajikia takastiniati. Yamaikia Winia akuptukua nuna takatrin túratnuiitjai. Kashi ajasmatai takastin atsuttawai.

⁵ Jú nunkanam pujakun shuara enentáin tsápnimtikratnuiitjai” tímiayi.

⁶ Nuna chichas nunká usukmi nunkejai pachimiar kusuru jin yakarmiayi.

⁷ Nuyá chichaak “Siruí pajamtai entsanam nijiamauta” tímiayi. Siruísha nu chichamnum “akupkamu” tawai. Kusurusha we nijiamaran pénger ímiamarjijajin tímiayi.

⁸ Nuyá ni írutkamurjsha nuik wáinin ármia nusha tiarmiayi “Juka pujus tuke kuítian seamniyuwa núchakait.”

⁹ Chikich “Ee, nukete” tiarmiayi. Chikichcha “Atsá, núchaiti; kame nuash tumainti” tiarmiayi.

Tura niniki “Ee, wíitjai” tímiayi.

¹⁰ Tutai aniiniak “çitiurak yamaikia ímiam?” tiarmiayi.

¹¹ Niisha tímiayi “Áishman Jesusa nu tsakusan jirun yakartur “Siruí pajamtai entsanam nijiamauta” turutmiai. Takui wena nijiamaran paant ímpramjai” tímiayi.

¹² Tutai “Nu áishmansha tuin pujá” tiarmiayi.

Niisha “Cha, nékatsjai” tímiayi.

Pariséu kusuru tsuárman inintrusarmiania nu

¹³ Nuyá kusuru tsuárman Pariséunam júkiarmiayi.

¹⁴ Kame Jesus kusurun tsuarmia nuí ayampratin tsawantauyayi.

¹⁵ Tuma asamtai Pariséusha itiuurak ímniun tusar aniasarmiayi.

Niisha tímiayi “Jiruun tsakusan yakaarämtai, nijiamaran paant ímjiai.”

¹⁶ Nuyá chikich Pariséu shuarnumia nuamtak tunaiyar “Juná tsuárka Yúsaiyanchuiti. Kame ayampratin tsawantai túraití” tiarmiayi.

Tura chikichcha “Tunáa shuaraitkiunkia júnisan túratniun tujinkiaayi” tiarmiayi. Nujají akannaikiarmiayi.

¹⁷ Tsuármancha ataksha aniasarmiayi “Ámin tsuármarua nu çwarí enentáimtam?” tiarmiayi.

Tutai “Wikia “Yúsnan etserniuiti” tajai” tímiayi.

¹⁸ Tura Israer-shuar nekas kusuruitiat yamá ímiui tu enentáimtuscharmiayi Pariséu. Tuma ásar ni aparíncha unsukar

¹⁹ inintrusarmiayi “çAme uchiram kusuru akiinia tárumba nukait. Itiuurak yamaikia íimia?” tiarmiayi.

²⁰ Ni aparísha tiarmiayi “Ii uchirínkia kusuru akiiniama nu nékaji.

²¹ Tura iisha nékatsjii itiuurak yamaikia íimia. çYátsuk pénger tsuárui? Niisha úuntchakait, nii aniastrarum. Niniki ujatmakarti” tiarmiayi.

²² Sapijmiak tiarmiayi. Israer-shuara úuntriúnkia “Jesus Yus akupkamu asa nekas Krístiti” tuinia núnaka Israer-shuara iruntainmaya jikí akupnakti tiniu ásarumatai tsuarma aparí ashamkarmiayi.

²³ Nu asamtai ni aparí “Niisha úuntchakait, nii aniastrarum” tiarmiayi.

²⁴ Nuiúnkia Israer-shuara uuntri kusuru tsuárman ataksha unsuk tiarmiayi “Yus ímianum nekasa nu titiá, ju áishmanikka tunaarinnuiiti nékaji” tiarmiayi.

²⁵ Tutai tímiayi “Kame tunaarinchashit. Nékatsjai. Antsu junak nékajai. Yaunchu kusuruitiatan yamaikia ímjiai.”

²⁶ Ataksha aniiniak “çitiurtámkama. Itiu ímtikrammia?” tiarmiayi.

²⁷ Niisha tímiayi “Yaunchu tájarme tura anturtatsrume. ¿Urukamtai ataksha titi tusa wakerarum. Niiniu ajastin enentáimprurmek?” tímiayi.

²⁸ Nuñkia katsekkar “Ámeka ní shuarinme. Tura iikia Muisaisa shuárintji, tiarmiayi.

²⁹ Yus Muisaisan akupkaiti iikia nékaji antsu nu áishman nékatsji. ¿Tuyantskait?” tiarmiayi.

³⁰ Áishman tsuarma tímiayi “¿Áusha itiuksuk áminiait? Winia ímtikurrua nu átumka nékatsrume tuyankit.

³¹ Paant nékaji tunaarinniun Yus anturtsui. Tikishmatar ni wakeramun túruinia nunak anturui.

³² Yáunchusha kusuru akiinian tsúruka tuke atsuwaiti.

³³ Ju áishman Yúsaiyanchuitkiunka penké túrachayí” tímiayi.

³⁴ Nuñkia tiarmiayi “Ámeka tunaarintin akiiniaiatmesha ¿in jintintin átaj tamek?” Nuna tiar jiki awemarmiayi.

Wakanin kusurua nu

³⁵ Kusuru tsuarman jiki awemarma nuna Jesus nekaamiayi. Tura wáiniak “Yusa Uchiría nu enentáimtamek” tímiayi.

³⁶ Tsuarma tímiayi “Uunta, turuttia wisha nekaan enentáimtustaj.”

³⁷ Jesussha tímiayi “Wainme. Wiitjai ámijiai chichaaína nu.”

³⁸ Tutai, tikishmatar “Uunta, enentáimtajme” Jesusan tímiayi.

³⁹ Nuyá Jesus tímiayi “Shuura enentáin nekaan, akantratajtsan táwitjai. Ni enentáin kusuru aín íimtikinian tura ananmamuk “Yusnan nekaan paant iimjiai” tana nuna ukusturtinian táwitjai” tímiayi.

⁴⁰ Tutai Paríséu shuar nu pujarmia nu nuna antukar “¿Nuñkia iikia kusurukaitiaji?” tiarmiayi.

⁴¹ Jesussha tímiayi “Átum kusuruitikurmeka atumí tunaari wáinchakrum sumamachu áinrume. Tura “paant iimjiai” tau asarum sumamaitrume” tímiayi.

10

Iikia murikua áintsar aji

¹ Jesus tímiayi “Wi tájana nu ti nekasaiti. Shuar murikiun takakna nu ni murikrin wenuimiunam kashi ikuiawai. Tura murik wenuimiunam pujuiniakui yajauch shuar murikiun kasamkatniun wakerakka wáitiniam wayachmin asa tanishnum waruk yajá wayawainti.

² Antsu murikiu wáinniuka wáitiniam wayawawai.

³ Waiti wáinniuka nekas murikiun wáinniun wáitin uratui. Muriksha ni wáinniuri chichamen nékainiawai. Niisha ashí ni murikrin chikichik chikichik náarin anaitius untsúawai. Tura tsawáikia ni murikrin jiki ayurtainiam yarumui.

⁴ Tura ashí ni murikrin jiri émtuki wéawai. Muriksha ni chichamen ántuiniak untsuam nemarainiawai.

⁵ Chikich shuárnaka nékachu ásar nemarainiatsui. Antsu ni chichamen nékainiachu ásar pisainiawai.”

⁶ Nu métek-taku chichamnaka Jesus áujmatsamiayi tura shuar antukar nekaacharmiayi.

Pénker wáinniuka Jesusaiti

⁷ Nuyá Jesus tímiayi “Ti nekasán tájarme. Wenuimiu wáitirj murik wainia nuka Wiitjai. Shuarsha murikiu áintsar Winí wayamin áiniawai.

⁸ Wi táatsain ashí táaruka kasa áiniak winia shuarun kasamkatai tusa wakeriarmiayi. Tura winia murikiur Wí shuar áiniak nu shuaran anturkacharmiayi.

⁹ Wikia wáititjai. Ashí Winin wayáaka uwemprattawai. Tura murikua áintsan wenuimiunmaya jinki pénger yurumáttawai tura atak wayá ayamprattawai” tímiayi.

¹⁰ Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiakman tuke shiir atsumtsuk takusarti tusan táwitjai.

¹¹ Wikia pénger wáinniuitjai. Pénger wáinniuka ni murikrin uwemtikrartaj tusa jakat-tawai.

¹² Antsu aya kuitjai takauka ni murikrichu áiniakui tura nekas wáinniuchu asa pénger wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakinmawai.

¹³ Nu shuarsha akikiam takáa asa murikiun enentáimtatsui. Nu asamtai aya pisaawai’ tímiayi.

¹⁴⁻¹⁵ Wikia pénger wáinniuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwemtikrartaj tusan jakattajai.

¹⁶ Chíkich muriknasha takakjai. Nusha jü wenuimiummayanchu áiniawai. Nunasha ititattajai. Nu muriksha Winia umirtukar ashí métek matsamsar chikichik wenuimiummaya ajasartatui tura chikichik wáinin átatui' tímiayi.

¹⁷ 'Winia murikrun uwemtikrataj tusan jakattajai turan atak nantaktiatjai. Nu asamtai winia Apar anentui.

¹⁸ Wi wakerakun jakattajai. Wi wakerachkuinkia chíkichkia mantuachminiaiti. Jákatniuncha tura nantaktinnishasha winia Apar surusuiti" tímiayi Jesus.

¹⁹ Israer-shuarsha nuna antukar niisháa enentáimprar kanakiarmiayi.

²⁰ Untsurí tiarmiayi "¿Urukamtai ántarum wáuruk tausha. Yajauch wakanin takaktsuk?"

²¹ Tura chikichcha tiarmiayi "¿Yajauch wakantrinniusha núnisan chichasminkiait. Yajauch wakantrinniusha kusurun ímtikramniashit?" tiarmiayi.

Israer-shuarka Jesusan nakitiarmiania nu

²² Micha nantutin Israer-shuar Jerusarénum namperan najanainiawai. Nu nampernumsha Yusa Uunt Jee atak jeamman enentáimtuiniawai.

²³ Jesussha Yusa Uunt Jee áachiniam wekasamiayi Sarumúnka wáitirja nuj.

²⁴ Israer-shuarsha Nin téntakar tiarmiayi "¿Ame nekas Kristukaitiam? Jü chichamaik etserkata. ¿Urukamtia nekas paant tátsum?" tiarmiayi.

²⁵ Tutai Jesus tímiayi "Yaunchu tiniu an enentáimturachmarme. Winia Apar akupkamun takaajna nu ti paant awajtai.

²⁶ Tura átumka winia murikruchu asarum enentáimturtsurme.

²⁷ Wisha winia murikrun untuam anturtuiniak nemartuiniawai. Wisha wíniyanak mash nékajai.

²⁸ Tura yamaram iwiaakman tuke jákashtinian súajai. Nu asamtai niisha menkakachartatui antsu Wi wainkia asamtai zyaki jurutkit?

²⁹ Winia Apar murikiun surusuiti. Niisha ashí nankaamas kakaram asamtai zyaki uwejéyan atankit?

³⁰ Wisha winia Aparjai iisha aya chikichkiitji" tímiayi Jesus.

³¹ Tutai Israer-shuarsha atak kayan achikiar tukutaj tiarmiayi.

³² Jesussha tímiayi "Winia Aparu kakarmarijai ti untsurí pénkera nuna takasuitjai. ¿Tújaimpia mantuattarum?"

³³ Israer-shuarsha Nin tiarmiayi "Pénker túra asakmin máataj tátsuji antsu Yus yajauch chicharkumin túrattaji. Ámeka shuáraitatam Yusa nuke enentáimtumame" tiarmiayi.

³⁴ Nuyá Jesussha tímiayi "Atumí akupeamurijin Yus timia nu áarmaiti: "Átum yúsaitrume" tawai.

³⁵ Kame Yus-Papinium aarma nu tuke nekaschakait. Tuma asamtai ni chichamen antukarun Yuska "yúsaitrume" takui nuikia ti nekaschakait.

³⁶ Niisha yúsaitkiuinkia nuikia Yus Apa anaikia jü nunkanam akupkamu asan ti nekas Yúschakaitaj. Nújainkia wi "Yusa Uchirintjai" takui ¿itirurak "Yusan yajauch chicharuí" túrutrum?

³⁷ Winia Apar túramu túrachkuinkia enentáimtursairap.

³⁸ Tura nekas túrakuinkia enentáimtursatarum. Tura Winia nakitrakrumsha nuikia wi túramu enentáimtustarum. Nujainkia winia Apar Winin pujamu ashí nekaattarme. Núnisnak Wisha Nijin pujajai. Iisha chikichkiitji."

³⁹ Tutai ataksha sepunam eñkeatai tiarmiayi. Túrasha Jesus uwempramiayi.

⁴⁰ Nuyá Jesus Jurtan entsa amain wé yaunchu Juan imiakrattainium pujusmiayi.

⁴¹ Ti untsurí shuar iyuwar tiarmiayi "Nekas Juanka aentsti tujintiamun túrachiat ashí Jesusnan tímia nu nekasaiti" tu tiarmiayi.

⁴² Nuisha untsurí Jesusan enentáimtusarmiayi.

11

Rásaru jakamu

¹ Petania péprunam áishman, ni naarij Rásaru, jaa pujumiayi. Nu péprunam Marí ni kaijijai Mártajajai pujumiayi.

² Niisha Rásaru umai ármiayi. Nu Marisha ukunmanka kunkuinian sumak Jesusan kuer ni intiashijijai japirmiayi.

³ Tura Rásaru jaakuí ni umai Jesusan chichaman akuptuiniak tiarmiayi "Uunta, ame amikrum jaawai."

⁴ Jesussha nuna antuk tímiayi "Tuke jakataj tusa jaatsui. Antsu Yusa kakarmarijsha tura ni Uchirij kakarmarijsha jü suñkur tsuármanum paant atí tusa jaawai."

⁵ Jesus Mártancha ni kaiincha tura ni umai Rásaruncha nekas aneemiayi.

⁶ Túmaitiat Rásaru jaawai taman antukiat ni pujamunam jimiará tsawant pujusmiayi.

⁷ Nuyá ni unuiniamurin “Ataksha Jutía nunñkanam wetái” tímiayi.

⁸ Tura ni unuiniamurísha tiarmiayi “Uunta, nuiksha Israer-shuar kayajai tukurmar mantamatai tícharmaka. ¿Nui ataksha wétai támek?”

⁹ Jesussha jú métek-taku chichaman tímiayi “Tsawajikia páantchakait. Tsawaj wekaana nu paant asantai tukumkashtatui.

¹⁰ Tura kashi wekaana nusha kirit asantai tukumkáttawai. Núnisan Wíi tuke pujakun winia takatron takastiniaitjai. Túraknasha itiurchatan wáinkiashtatjai.”

¹¹ Nuyásha Jesus atak tímiayi “Ii amikri Rásaru kanarai. Wi ishintiartatjai.”

¹² Tutai ni unuiniamurí tiarmiayi “Uunta, aya kanarka nuñkia péñker ajastatui.”

¹³ Jesuska Rásaru jakamu nékayat “kanarai” tímiayi. Tura ni unuiniamurí Rásaru kajinmakua áintsan kanarai enentáimprarmiayi.

¹⁴ Jesus nuikia ti paant tímiayi “Rásaru yamaikia jakayi.

¹⁵ Tura nuí pujuscha asan kúntuts pujatsjai. Jean túrattajna nu ísrum ti nekas enentáimursattarme. Nuna nekaan shiir enentáimjai. Wátsek, iyutai.”

¹⁶ Nuyá Jimiampramu Tumas chíkich unuiniamurí nuí armia nuna “Iisha weri Niijjai métek jakatai” tímiayi.

Iwiaaku átiniaasha jaka nantaktinniasha Jesus nérenniuiti

¹⁷ Nui taa, Rásarun kuaru tsawant ikusman wáinkiamiayi.

¹⁸ Petania pépruka Jerusarénumiá menaintiú kirumitru áinis tjiuchiiti.

¹⁹ Tuma asantai untsurí Israer-shuar Mártaasha Marísha, ni umaj jakamtai utkuí at-sankrataj tusa weriarmiayi.

²⁰ Mártaasha Jesus tjiuch ajasun nekáa inkiuntajtsa wémiayi. Antsu Marikia jeá pujumiayi.

²¹ Tura Marta Jesusan inkiun tímiayi “Uunta, Ame pujakminkia winia umar jákachaayi.

²² Tura tuke nékajai ashí Yus seamna nuna súrarnui.”

²³ Jesussha tímiayi “Ame umaimisha nantaktiatui.”

²⁴ Mártaasha tímiayi “Nekas, ashí amuamunam jákaru nantaktin tsawantaj nantaktiatui. Nuna nékajai.”

²⁵ Nuyá Jesus tímiayi “Iwiaaku átinia nérentin asan Wikia iniantkartiniaitjai. Winia enentáimturna nuka jakasha nantaktiatui.

²⁶ Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtakek?”

²⁷ Niisha “Ee, Uunta, ame Yusa Uchirínme. Krístitme, uwemtikkiartin jú nunñkanam tátinia nu” tímiayi.

Jesus Rásaru iwiansamunam taa úutmania nu

²⁸ Mártaasha nuna ti, ni kai Marin untsuk úukan tímiayi “Uunt juí taa untsurmawai.”

²⁹ Marísha nuna antuk wárik wajaki Jesusa iyuttsa wémiayi.

³⁰ Jesussha péprunam jeatsuk Marta inkiunmanum pujumiayi.

³¹ Marí wari wajaki wémetai Israer-shuar nu jeanam atsankrattsa pujuiniasha nuna ísar weriarmiayi. Iwiansamunam úuttiasa wéatsuash tusa weriarmiayi.

³² Marísha Jesus pujamunam jeá tikishmatar tímiayi “Uunta, Ame pujakminkia winia umar jákachaayi.”

³³ Jesussha Maríncha tura niijjai úutuncha wáiniak wáitnentaimta asa ti kúntuts pujusmiayi.

³⁴ Tura “Tui iwiansamarum” tímiayi.

Niisha “Uunta, iitia” tiarmiayi.

³⁵ Jesussha úutmiayi.

³⁶ Israer-shuarsha “Ti aneatsuk” tiarmiayi.

³⁷ Tura chíkich “Kusuru tsuáruuchukait. Nii pujakuisha Rásaru jákaampiash” tiarmiayi.

Rásaru iniantkimiu

³⁸ Jesussha ti kúntuts enentáimiar iwiansamunam weankámiayi. Náinnium asa paka taurma áuyayi. Tura kaya atutkamuyayi.

³⁹ Tura Jesus “Kaya jurustarum” tímiayi.

Rásaru umaj Marta tímiayi “Uunta, kuaru tsawant jákai. Mejeatsuk’ tímiayi.

⁴⁰ Tura Jesus tímiayi “Yus enentáimtakmeke Yusa kakarmari wáinkiatame tíchamkajam.”

⁴¹ Nuikia kayarin uratiarmatai Jesus nayámpin iis tímiayi “Aparu, Winia anturtakmin yuminsajme.

⁴² Winiaasha tuke anturtame tura jú shuaran péñker enentáimtikrataj tusan tajai. Ame akuptukuitmena nuna nekarmawarti.”

⁴³ Nuna tinia kakaram untsuak “Rásaru jíinkitia” tímiayi.

⁴⁴ Nujáinkia penuarmartiuk jíinkimiayi. Yapinmasha jaanchijai ijiamuyayi. Tura Jesus “Atirtarum. Wéti” tímiayi.

Jesuan achiktin chichaman jurusarmiania nu

(Mateu 26.1-5; Márkus 14.1-2; Rúkas 22.1-2)

⁴⁵ Untsurí Israer-shuar Marin nemariaru Jesus túramun ísar enentámtusarmiayi.

⁴⁶ Tura chíkichkia Pariséunam wear Jesus túramun ujakarmiayi.

⁴⁷ Nuna antukar Pariséusha Israer-patri úuntrjsha ashí naamka uunt armia nu^{jaj} iruntrar tiarmiayi “¿Wari itiuirkamniait? Nu shuarka aentsti tujintiamun ti túratsuk.

⁴⁸ Aya júnik iniiai yakrinkia ashí shuar Nin enentámtuschartatuak. Nuyá Rúmanmaya apach taar mesetan najanawartatui tura in amutmakar Yusa Uunt Jeencha emesrartatui.”

⁴⁹ Nu uwitin Kaipias Israer-patri uuntrjyayi. Niisha tímiayi “Átumka nékatsrume.

⁵⁰ ¿Ashí Israer-shuar mesertin péⁿkerkait. Antsu aya chikichik shuar jákatin péⁿkerchakait?” tímiayi.

⁵¹ Kaipiaska aya ni enentámmia^{jaj}in tíchamiayi. Antsu nu uwitin Israer-patri uuntrj asamtai Yus nuna enentámtikramiayi. Nú^{jaj}inkia Israer-shuar Jesus jaruktinian ujakmiayi.

⁵² Tura aya Israer-shuarnakcha antsu ní^{jaj}isha ashí nun^{kan}am Yus-shuar ajasarun irurajtsta jákatniuyi.

⁵³ Tuma asamtai nu tsawantiniⁿ Israer-shuara uuntrj Jesus máatai tusar áujmatsarmiayi.

⁵⁴ Nu asamtai Jesus paant wantiniak Israer-shuarnum wekaichmiayi. Antsu Jutía nun^{kan}maya júⁿki atsamu nun^{kan}am Eprain pepru tji^{uch} wémiayi. Tura nu^j pujusmiayi ni unuiniamur^{jaj}i.

⁵⁵ Israer-shuara namper^j paskua ishichik jatemsamtai untsur^j shuar yajá péⁿrunmaya Jerusaréⁿnum káunkarmiayi. Kame paskua jeatsⁱⁿ Muisais timia núⁿisaⁿ ni ayash^ísha enentá^jsha iwiarnarat tusa wakeriarmiayi.

⁵⁶ Jesusnasha e^{ak} yujarmiayi. Tura Yusa Uunt Jeen pujusar nuamtak aniniaisar “¿Wari enentá^miam. Jístanam tatimpiash?” tiarmiayi.

⁵⁷ Pariséusha Israer-patri uuntrjsha akupainiak “Jesus pujá nekaamka ujatkata” tiarmiayi. Jesusan sepunam en^{ke}atai tusar tiarmiayi.

12

Marí Jesuan kun^{ku}inian kué^{er}miania nu

(Mateu 26.6-13; Márkus 14.3-9)

¹ Paskua jí^sat jeatin sais tsawant ajasmatai Jesus Petania péⁿrunam wémiayi. Jesus jakamunmaya iniantkimia nú Rásaru nuⁿ pujumiayi.

² Jesus jeamtai ayurawarmiayi. Rásarusha ní^{jaj} yurumámiayi. Mártasha yurumkan iwiasmakmiayi.

³ Tura Marikia kun^{ku}inian ti kuit^{jaj} ritru ajapén sumak itiamiayi. Tura Jesusa nawen kuer ni intiash^{jaj}apirmiayi. Jeasha nu kun^{ku}in^{jaj} ti shiir kun^{ku}inmiayi.

⁴ Jútas Iskariúti, Semun^{ka} uchirí, nu^j pujumiayi. Niisha Jesusa unuiniamur^jintiat ukunam Jesusan surukmiayi máawarat tusa. Niisha tímiayi

⁵ “¿Urukamtai nu kun^{ku}inian ti kuit^{jaj} surukchama kuí^{tr}inchan sú^satniun?”

⁶ Kame kuí^{tr}inchan enentá^mitak tíchamiayi. Antsu unuiniamu kuí^{tr}in wainkia asa yú^pichuch kasamkamniuyayi. Tuma asa nuna tímiayi.

⁷ Tura Jesus tímiayi “Iniaisata. Wi iwiarnakui kué^{er}atniun sumak ikiurtusuíti.

⁸ Kuí^{tr}incha tuke atum^{jaj} iruntsuk. Antsu Wikia atum^{jaj} tuke pujuschattajai” tímiayi.

Rásaruncha má^{at}aj tiarmiania nu

⁹ Israer-shuarsha Jesus Petania péⁿrunam pujan antukar Jesus ístaitsar weriarmiayi. Rásaruncha Jesus jakamunmaya iniantkimiua nusha iyutai tusar wearmiayi.

¹⁰ Túramtai Israer-patri uuntrⁿkia chichaman jurusarmiayi Rásaru maatai tusar.

¹¹ Untsurí Israer-shuar Rásaru iniantkimiun nekaawar Israer-patrin ikiukiari Jesusan enentámtusarmiayi. Túrawarmatai Rásaruncha má^{at}niun wakerukarmiayi.

Jesús Jerusaréⁿnum shiir wayamiania nu

(Mateu 21.1-11; Márkus 11.1-11; Rúkas 19.28-40)

¹² Paskua namperan pachiintiuktajtsta ti untsur^j shuar Jerusaréⁿnum wearmiayi. Kashin tsawar Jesus nú peprunam tátinian nekaawarmiayi.

¹³ Niisha tintiuki nuké áinis nukan jú^{ur}ar Jesusan in^{ku}iantai tusar jíⁿkiarmiayi. Túrawar unsumainiak “Shiir tati, tiarmiayi. Yusa kakarmar^{jaj} wíⁿiana nu ti péⁿkeraiti. Israer-shuara uuntrj asa shiir ati” tu unsumiarmiayi.

¹⁴ Jesussha umpuurun wáⁿiniak entsamkamai. Núⁿisaⁿ áarmaiti Yus-Chichamnum:

¹⁵ “Seuⁿ péⁿrunmaya shuara, ashamkairap. Atumí Akupniur^j umpuurunam entsamak winiawai.”

¹⁶ Nu chichamaik Jesusa unuiniamurí nu túrunamun nekaacharmiayi. Tura ukunam Jesus nayaimpiniam shiir waketkintai enentáimprarmiayi. Ashí Jesusna aarma núnisan túrunamiayi.

¹⁷ Jesus Rásarun iwíarsamunmaya iniantkimiun wáinkiarua nú shuar nuna áujmatiarmai.

¹⁸ Tuma asantai shuar Jesus nu tujintiamun túramtai nekaawar Jesusan inkiunktaj tusar jíinkiarmai.

¹⁹ Tura Pariséusha nuamtak tiarmiayi “Iis, penké tujinkiaji. Maa iista, ashí shuar Nin nemarainiatsuk.”

Kriaku apach Jesusjaj chichastinian wakeriarmiania nu

²⁰ Paskua nampernum Yus shiir awajsatniun Jerusarēnum weriaruka untsurí nunkanmaya shuar ármai. Kriaku apachcha ármai.

²¹ Niisha Jiripin weantukarmiayi. Kame nu Jiripi Petsaitia péprunmayayayi. Petsaitia péprusha Kariréa nunkanam awai. Nincha Kriaku apach seainiak “Uunta, Jesusjaj chichas-taitsar wakeraji” tiarmiayi.

²² Jiripisha Antresan werí ujakmiayi. Nuyá níijjaj métek tsaninkiar Jesusan weriar ujakarmiayi.

²³ Jesussha tímiayi “Wi Aents Ajasuitjiana ju tsawantur jeayi. Túramtai shiir awájnátstajai.

²⁴ Wi tájana nu ti nekasaiti. Jinkiaia ántsanketjai. Araachmaka ninki pujatsuk. Antsu araamka tsapain jinkiaichirí kaushmariat nereki untsurí ajatsuk. Núnisnak Wi jakamtai ti untsurí shuar yámaram iwiaakman takusartatui.

²⁵ Shuarsha jinkiaia nuke aya ju nunkanam péñker pujustinian enentáimkiunka ántar pu-jak nekas iwiaakmarin emenakattatui. Tura ju nunkanam péñker pujustinian enentáimtsuk jákatniuncha ashamchaa nú shuarka nekas iwiaakman wáiniak tuke iwiaaku átatui.

²⁶ Shuar winia átaj takunka nemartusti. Túranka Wi pujajna nuí Wíi shuar tuke átatui. Núnisan Wíi shuar winia takatrun takáa nuna winia Aparsha shiir enentáimtsustatui’ tímiayi.

Jesus ni jákatniun étseru

²⁷ “Yamaikia enentáiruí ti itirchat pujajai. ¿Warittajak. “Aparu, ju túrunatniunmaya uwentikurta” titiajash? Antsu ju túrunatniun táwitjai.

²⁸ Aparu, wí túramujaj ashí shuar ame náarmin shiir enentáimturarti” tímiayi Jesus.

Tutai nayaimpinmaya chichaman antukarmiayi. “Winia náarun shiir awajsaitjai tura ataksha shiir awajsattajai” tímiayi.

²⁹ Shuarsha nú pujuinia “ipiamtachuashit” tiarmiayi. Tura chikichcha “Nayaimpin-maya suntar Nin chichasai” tiarmiayi.

³⁰ Jesussha tímiayi “Wi antuktinian chichaschayi antsu átum nekaatarun tusa chichasai.

³¹ Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai.

³² Tura numiniam awajnaintai ashí nunkanmayanka shuar enentáimturartatui” tímiayi.

³³ Juna taku krúsnun jákatniun ujakmiayi.

³⁴ Shuarsha awajirar tiarmiayi “Yaunchu Yus akupkamu papiniumia áujsar nékaji. Kristu tutai tuke jáatsuk iwiaaku pujustiniaiti. ¿Itirak nuikia “Aents Ajasu numiniam awajna-itniuti” tame? Aents Ajasuka Kristuchukait, Yus anaikiamu. Núchaitkiunkia Aents Ajasuka yait?” tiarmiayi.

³⁵ Nuinkia Jesus tímiayi “Wi tsáapninia áintsanketjai. Tsáapnisha atumín aya ishichik tsawantin tsáapniartatui. Tsáapin ana juik wekasatarum kirit ajatsaj. Kame kiritniunam wekana nusha nékatsui ituiranimpia wea.

³⁶ Tsáapnin wáinkiarun nin enentáimtsustarum. Túrakrun winia tsáapninruj wekasattarme.” Jesussha nuna tí wémiayi uumak pujustaj tusa.

Untsurí Israer-shuar Jesusan enentáimtuscharmiania nu

³⁷ Jesus aentsti tujintiamun ti untsurí túramtaisha Nin enentáimtuscharmiai.

³⁸ Yúsna etserin Isayas yaunchu aarma uminkiatniuyi:

“Uunta, ¿ya ii ujam antukuit. Yusa kakarmarisha yana iniaktusuit?” tu áarmaiti.

³⁹ Nuna uminiak Jesusan enentáimtuscharmiai. Tura nu arantcha Isayas áarmiayi:

⁴⁰ “Yus nin kusuru awajsaiti tura ni enentáincha kátsuram awajsaiti. Ni jíijjaj íimsaj tusa tura ni enentáijjaj nekaawaj tusa túrait. Kame ni tunaari iisar enentáimtuiniakui Yus nin tsuárait” tu áarmaiti.

⁴¹ Isayas yaunchu Jesusan nayaimpiniam ti shiir pujan wáiniak nuna tímiayi.

⁴² Tuma ajn untsurí Israer-shuarsha tura ni uuntrinmayasha Jesusan nekas enentáimtusarmiayi. Tura niisha Pariséun ashamainiak paant ticharmiayi. Israer-shuara iruntairiya jiki awetamaj tusa ashammarmiayi.

⁴³ Yus shiir enentáimtusati tutsuk antsu shuar shiir enentáimtusati tusar túrawarmiayi.

Shuaran sumantikiatniun táchaitjai antsu uwemtikratniun táwitjai, timiania nu

⁴⁴ Jesus kakantar untsumuk tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtawai.

⁴⁵ Winia wáitkiusha Winia Aparnasha wáinui.

⁴⁶ Wikia tsáaprin asan Winia enentáimturainia nuka kiritniunam wekasajin tusan ju nunkanam táwitjai.

⁴⁷ Shuáran sumantikiatniun táchaitjai antsu uwemtikratniun táwitjai. Tuma asamtai shuar winia chichamprun antuk umíachkuŋka sumamaiti. Tura Wikia sumantikiachuitjai.

⁴⁸ Winia nakitrur chichampruncha enentáimtachuka sumantikiamuiti. Wi timiaj nuka amuukatin tsawantaj nin sumantikiattawai.

⁴⁹ Wi enentáimmiyajain chichaatsjai. Winia Apar akattur akuptukuiti. Tura chichastinia nuna surusuiti.

⁵⁰ Wisha nékajai, ashí winia Apar akupeamuka yamaram iwiakman tuke amuukashinian súawai. Tuma asamtai winia Apar túrutmia núnisnak tajai” tímiayi Jesus.

13

Jesus ni unuiniamurj nawen nijiatramiania nu

¹ Paskua jísat jeatin chikichík tsawant ajasmatai Jesusa tsawantrj jeatemayi. Túramtai ju nunkan ikiuki ni Aparin wétiniuyi. Jessussha nuna nekaamiayi. Ashí Níiniun ju nunkanam pujuinian tuke anea asa amúamunmasha yapajitsuk tuke aneemiayi.

² Nu tsawantajsha murikiun yúatin ármiai. Tura yurumátin jeatsajin, uunt iwianch Semunka uchirj Jútas Iskariúti enentáin Jesusan surukat tusa enentáimtikramiayi.

³ Tura Jesus Yusajiyá tau asa waketkitniuyi. Tura Yus Apa ashí mash susamiayi akupin atí tusa. Jessussha nuna nekáa

⁴ chíkich yurumuk pujuiniaj wajakmiayi. Tura pushirjin ámiak awanékéman emenmamamiayi.

⁵ Nuyá nijiaamatainiam entsan yará ni unuiniamurj nawen nijiatramiayi. Tura awanékémjai japirmiayi.

⁶ Semun Pítrunam jeamtai Pítiur tímiayi “Uunta, ¿Winia nawer nijiertaj tamek?”

⁷ Jessussha tímiayi “Wi túrajna nu yamá nékatsme tura ukunam nekaattame.”

⁸ Tura Pítiur tímiayi “Peŋké winia nawer nijiarhattame.”

Jesussha tímiayi “Wi nijiaachkuŋkia Wijijai tsaniŋkia pujuscharmniaitme.”

⁹ Tutai Semun Pítiur tímiayi “Nuiŋkia, Uunta, aya nawerkechu antsu uwejrusha tura muakarsha nijiatrurta.”

¹⁰ Tura Jesus tímiayi “Yamá mainkia ayashí shiir asamtai aya nawenin nijiamártiniaiti. Atumí enentáin ashí péŋkeraitrume. Túrassha ashí shuarcha” tímiayi.

¹¹ Kame Jútas Nin suruktinian nekáa “ashí shuarcha” tímiayi.

¹² Jessussha nijiar umik ni pushirjin entsarmiayi. Tura atak pujus tímiayi “¿Atumsha Wi túrajna nu nekaarmek?”

¹³ Wi atumí Uuntrj asamtai nekas “Uunta” túrutrume. Nusha péŋkeraiti.

¹⁴ Tura Jintinniuítian tura Úuntaitiatan atumí nawen nijiarhajak. Atumsha núnisrumek nuamtak náwem nijiatnairatarum.

¹⁵ Atumin nekaprúatsan túramjai. Atumsha núnisrumek túrataram.

¹⁶ Ti nekasan tajai. Takarniuka ni uuntrj nankaamaschaiti. Akupkamusha akupea nuna nankaamaschaiti.

¹⁷ Nu nekaarum túrakrumka shiir átatrume.

¹⁸ “Tura tájana nuna ashí tátsujrume. Anaikiaitiaj núnaka Wi nékajai. Tura Yus-Chicham uminkiatniúiti, nékajai. Ju aarmaiti:

“Wijijai yurumna nu winia nemasur ajasai.”

¹⁹ Nuka túmatsajin ujaajrume. Nuyá túrunamtai Yusa Uchirintjai nusha paant nekaattarme.

²⁰ Wi tájana nu nekasaíti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

Jesus Jútas Nin suruktinian étservi

(Mateu 26.20-25; Márkus 14.17-21; Rúkas 22.21-23)

²¹ Nuna tj, Jesus ni enentáin ti itirchat enentáimpramiayi. Tura paant tímiayi “Nekas tajai, chikichik juj atumjai pujana nu Winia surutkattawai.”

²² Tutai ni unuiniamurj nuamtak íniaisar “¿Yanak ta?” tiarmiayi.

²³ Chikichik unuiniamurj, Jesus ti aneamu, Nijijai tsaniŋ yurumuk pujumiayi.

²⁴ Tuma asamtai Semun Pítiur ni uwejéjai iniakmas “Aniasta, ¿yanak áujmata?” tímiayi.

²⁵ Tutai Jesusan áyanmatsan aniasmiayi. “¿Yait, Uunta?” tímiayi.

²⁶ Jesussha ayak “Tantan túumnium ajun^{kan} susattaj núiti” tímiayi. Nújainⁿ tantan túumnium ajun Semun^{ka} uchirín Jútas Iskariútin susamiayi.

²⁷ Tura wárik Jútas tantan achikmatai íwianch ni enentáinⁿ wayamiayi. Nuyá Jesus tímiayi “Túratamna nu wárik túrata.”

²⁸ Tura ashí nu^j yurumainiak pujuarmia nusha wariniak ta tusa nekaacharmiayi.

²⁹ “Kuitrincha kuit súsarta” tátsuash tu enentáimprarmiayi. Tura chikichcha “nampernum yurumátin atsumajnia nu sumakta” tátsuash, tu enentáimprarmiayi. Jútas kuítian wáinin asamtai tu enentáimprarmiayi.

³⁰ Jútas tantan yua kashi ajasmanum jíinkimiayi.

Yamaram akupkamu

³¹ Jútas jíinkimtai Jesus tímiayi “Wi Aents Ajasu asamtai winia kakarmar yamaikia paant átatui. Tura wi túramujaiⁿ Yusa kakarmarísha ti paant átatui.

³² Wi Yusa kakarmarín paant awajeakui Wisha ni Uchiríⁿ asamtai winia kakarmarnasha Yuska wárik paant awajsattawai.

³³ Uchichiru, atumjaiⁿ ti untsuríⁿ tsawant pujuschattajai yamaikia. Wi Israer-shuaran tímiaj nútiksanak atumin tájarme. Atumsha Winia éátkáttarme tura wi wéamunam winishta-trume.

³⁴ Ju yamaram akupeamun amajai nuamtak mai anenai ajatarum tusan. Wi atumin aneajrumna núnisrumek atumsha nuamtak mai anenai ajatniuitrume.

³⁵ Anenaiyakrumniñkia nujai ashí shuar “Kristu unuiniamuríⁿ ániawai” túramartatui.

Pítur Nin natsantratniun Jesus ujakmiania nu

(Mateu 26.31-35; Márkus 14.27-31; Rúkas 22.33-34)

³⁶ Semun Pítur Jesusan aniasmiayi “Uunta, ¿tua wéam?”

Jesussha tímiayi “Wi wéajna nu^j yamaikia winichminiaittrume. Tura ukunam winitiarⁿme.”

³⁷ Nuyá Pítur tímiayi “Uunta, ¿urukamtai yamaikia winichminiaitaj? Ámin yáintajtsan jakataj tajai.”

³⁸ Jesussha tímiayi “¿Nekasmek táme? Ti nekas tájame, atash shiniatsainⁿ Winia menáintiú natsantrurtatme” tímiayi.

14

Jesus Yus-jintiaiti

¹ “Kúntuts pujusárap. Yus enentáimtustarum, Winiasha enentáimtustarum.

² Winia Aparu^j átum pujustin ti an^{kan}ak awai. Tura nuna iwiarataj tusan Aparu^j wéajai, nekasaiti. Nekaschaitkiuñkia ¿itiurak ujakaajrum?

³ Tura iwiaaran amukan ataksha tátatjai. Tura tana yaruaktatjarme, wi pujamunam atumsha pujusúk tusan.

⁴ Wi wéaj nu nékarme tura jintiasha nékarme” tímiayi Jesus.

⁵ Tumas tímiayi “Uunta, Ame weam nu nékatsji. ¿Jintiasha itiurak nekaattaj?”

⁶ Jesussha tímiayi “Wi nekas jintiaitjai. Wíjainⁿchu wekaana nuka winia Aparu^j jeatniun penké tujintiawai. Tura Wisha tuke nekas tiniu asan nekas ana nuna shuáran nékamtikiajai. Wisha shuáran yamaram iwiakman tuke amuukashtinian súwitjai.

⁷ Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

⁸ Nuñkia Jiripisha tímiayi “Uunta, Apasha wáinkiarⁿka maak.”

⁹ Jesussha tímiayi “Jiripi, atumjaiⁿ ti pujusu aisha ¿tuke nékatsrumek? Winia wáitkia nuka Winia Aparnasha wáinkiaiti. ¿Itiurak, nuikia, “Apasha wáinkiarⁿka maak” tame?

¹⁰ Winia Aparjaiⁿ tsaninⁿgian pujakun tura winia Aparsha Wíjainⁿ pujakui tuke chikichkitji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai.

¹¹ Nekaatarum. Wisha winia Aparjaiⁿ tsaninⁿgia pujakur nekas chikichkitji. “Nu chicham itiurchataiti” enentáimkiurmeka wi túramu nuikia enentáimpratarum. Wi túramujaiⁿ chikichik ájinia nu páantchakait.

¹² Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparu^j wéakui nuna nanⁿkaamas tujintiamun túrattawai.

¹³ Ashí Winia enentáimtursarum seatrumna nuna amastatjai. Nújainⁿ winia Apar shiir awajnastatui.

¹⁴ Winia enentáimtursarum seakrumniñkia ashí túrattajai’ tímiayi.

Jesus Yusa Wakanin akupkattawai

¹⁵ ‘Atumsha anentkurmeka winia chichamur umiktarum.

¹⁶ Tura wéakun winia Aparun chikichan akupturmakti tusan seattajai. Niisha atumjaj tuke pujak atsantamprartatui.

¹⁷ Nusha Yusa Wakanjinti. Yus-shuarcha Nin nekaachmin áiniawai. Tuma asamtai ni enentáin wayachminiati. Antsu átumka atumi enentáin pujakui Nii nékarme. Niisha atumí enentáin tuke pujustatui.

¹⁸ Mitiaikia áitkiasnak ikiukchattajrume. Atumjín atak tátatjai.

¹⁹ Ishichik tsawant nankaasmatai chíkich shuar irunna nu wáitkiachartatui. Tura Wi iwiaaku asamtai átumka nu iwiaakmajaj pujustatrume. Tuma asarum wáitkiattarme.

²⁰ Tura nu tsawantaj ju nekaattarme. Wisha winia Aparjaj tsaninkia pujakur chikichkitji. Núnisnak Wisha atumjaj tsaninkian pujajai. Tura atumsha Wijjaj tsaninkia pujarme.

²¹ Shuar Winia anentuka wi akupkamun nekáa umiawai. Nú shuarnaka winia Aparsha aneawai. Wisha nin aneajai tura nekarati tusan iniaktustatjai.” Jesus nuna tímiayi.

²² Chíkich Jútas, Iskariútichu, tímiayi “Uunta, ¿urukamtai ashí shuarnum iniaktutskesha aya in iniaktustatam?”

²³ Jesus tímiayi “Winia anentuka tájana nuna enentáimtawai. Winia Aparsha nu shuaran aneattawai. Tura Wisha winia Aparnum nu shuarjaj tsaninkia pujustatjai.

²⁴ Antsu Winia anentchaka tájana nuna enentáimtatsui. Átum ántarmena nú chíchamka wíniachuiti, antsu Yus Apa Winia akuptukua Núnaiti’ tímiayi.

²⁵ ‘Atumjaj tuke pujakun nuna tájarme.

²⁶ Yus Apa ni Shiir Wakanin atumin yáinmak atsantamprarat tusa akupturmaktatrume. Wi seam túrattawai. Nu Wakancha ashí Wi ujakjarmena nuna atak enentáimtikramprar ashí unuitiamprartatui’ tímiayi.

²⁷ ‘Imiatkinchanum pujustarum. Imiatkinchanum pujajna núnisrumek pujustarum tusan amaajai. Jú nunkanmanka warastin wáinkiashtatrume. Antsu itiurchatnum pujay-atrumkesha Wijjaj imiatkinchanum pujustatrume. Ashantsuk pujustarum. Itiurchat enentáimprairap.

²⁸ Nuk tímiaj nu antukmarme. Aparuj wena atak atumjín tátatjai. Winia Aparka Wijjaj nankaamas úuntaiti. Tuma asamtai ti nekas anentkurmeka “Aparuj wéajai” takui ashí warasaarme.

²⁹ Nuka túmatsain ujaajrume. Túrunamtai nuyá Winia enentáimtursattarme” tímiayi.

³⁰ ‘Jú nunkanmayan akupin winiakui atumjaj núkap chichaschattajai yamaikia. Wíniaka nupettukchamniaiti.

³¹ Tura Wikia winia Aparun aneajai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetái’ tímiayi.

15

Numi arakma áintsanjetjai

¹ ‘Winia iwiaakmarun amaakun numi arakma áintsanjetjai. Wikia kampuinjai atumsha kanawentrume. Winia Aparsha arakan wáiniua núnisaiti.

² Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa.

³ Wi ujakjarmena nujaj puruarmatrume.

⁴ Numí kanawesha kampuín áchitkiachkunka niniki nerechamniaiti. Núnisrumek atumsha Winí áchitkiachkurmeka nerechamniaitrume. Wi atumjaj áchitkij núnisrumek atumsha Winí tuke áchitkia atarum’ tímiayi.

⁵ ‘Wikia kampuinjai atumsha kanawentrume. Kampuinkia kanawen áchitkia núnisnak achiajarme. Tura kanawe ni kampuinin áchitkia núnisrum Winí áchitkia atarum. Túrakumka núkap nerektatrume. Antsu Wjajinchuka penker túratin penké tujintarme.

⁶ Winí áchitkiachuka ajapam kukartatui. Kanawesha kukarmatai shuar irumkar áesawatatui’ tímiayi.

⁷ ‘Tuke Winí áchitkaiitkiurmeka tura winia chichamprusha kajinmattsuk emetarmeka átum wakerarmena nu seakrumin amatatjai.

⁸ Átum núkap nereakrumninkia ashí shuar “Nekas Jesusa unuiniamurjinti” túramartatui tura winia Aparnasha shiir awajsartatui.

⁹ Winia Apar anenna nútiksanak Wisha atumin aneajrume. Winia aneamur tuke atarum.

¹⁰ Winia Aparu akupamurjín umiakun tuke ni aneamurjintai. Núnisrumek winia akup-kamur umiakrumka tuke winia aneamur átatrume’ tímiayi.

¹¹ ‘Wi waraajna áintsarmek warastarum tusan nuna tájarme. Tura ti shiir warastatrume.

¹² Wi akupkamu júiti: “Wi aneajrumna nútiksarmek ashí anenaitiarum.”

¹³ Shuar ni amikrjín yáintaj tusa jakańka ti anekartichukait.

¹⁴ Wi akupeamu takaakrumka atumsha winia amikruitrume.

¹⁵ Takarniuka ni uuntri takaana nuna nékatsui. Tuma asamtai “winia takarniuritrume” tátsurume. Antsu ashí winia Apar táman ujaku asan “winia amikruitrume” tájarme.

¹⁶ Aya atumí enentáimsamurijjain Wíi shuar ajaschamarme. Antsu akatramur ajastarum tusan atumniaka achikjarme Wí. Winia takatur takastiniaitrume. Túrarum pénger túratniuritrume nerektinia áintsarmek. Tura nu nere amuutsuk tuke áiniyai. Tuma asamtai winia Apar searmena nuna amastatui.

¹⁷ Júnaka akupeajrume: Nuamtak mai anenai ajatarum’ tímiayi.

Yus-shuarcha Jesusnasha Níniuncha nakitiainiawai

¹⁸ Ju nuñkanmaya shuar Winia emka nakitrurar atumniasha nakitramarme.

¹⁹ Atumsha ju nuñkanmaya shuaraitkiurminkia niiniua nútiksaj anenmaintrume. Antsu Wíi shuar ajastarum tusan ju nuñkanmaya achikmajrume. Túramtai nekas ju nuñkanmayanchuitrume yamaikia. Nu asamtai nu shuar nakitramainiawai.

²⁰ “Takarniuka ni uuntri nankaamaschaiti” tíchamkajrum. Shuar Winia yajauch awaj-tusaru ásar atumniasha yajauch awajtamsartatui. Chikichcha umirtukaru ásar atumni-asha umirtamkartatui.

²¹ Winia Akuptukun nékachu ásar Winia enentáimturkurmin yajauch awajtamsartatui’ tímiayi.

²² “Wí tana Yus-Chichaman nin ujakchamtañkia tunaanum sumamacharajyi. Antsu ujakma ásar “Nékachkun túraitjai” tíchamin áiniawai.

²³ Winia nakitruinia nuka winia Aparnasha nakitiainiawai.

²⁴ Aents penké túrachman túrachuitkiuñkia tunaanum sumamacharainti. Antsu wí túramun wáinkiaru áiniayat Winiasha tura winia Aparnasha nakitiainiawai.

²⁵ Yaunchu Yus akupkamunam áarmaiti:

“Penké ántar nakitrurarmai.”

Nu chicham uminkiat tusa túrunaiti’ tímiayi.

²⁶ Tura atsantamprattsá yáinmana nuna winia Aparujya akuptuktatjarme. Niisha tuke nekas tiniu Wakaniiti. Niisha Yusajya taa atumin nekamtikramprattarme.

²⁷ Atumsha yaunchu Wijjaj pujusu asarum nekamtikiattarme’ tímiayi.

16

¹ Átum kanartukajrum tusan júna tajarne.

² Israer-shuar iruntainumia jiki akuptamkattarme. Nu arantcha mantamainiaksha “Yúsan shiir awajsattsan túrajai” tíartatui.

³ Nu shuar Winiasha tura winia Aparnasha nékachu ásar túrutmawartatui.

⁴ Núnaka yamá tájame. Tura túrunamtai “núnisaj áiniyai” timiaj nu nekaarum ititurchat enentáimprairap’ tímiayi.

Yusa Wakaní túrana nu

‘Atumjai tuke pujá asan núnaka yaunchu ujakchamajrume.

⁵ Antsu yamaikia wáketjai winia Akuptukmia nujaj pujustaj tusan. Tuma áin wéajna nu inintratsrume.

⁶ Antsu nuna takui ti kuntuts enentáimprarme.

⁷ Tura Wí wématai atumjainkia nuna nankaamas pénger átatui. Iis, Wí wéaknaka atumin yainmaktinia nuna akupkattajai tura wéachkuñkia táchattawai. Nuka ti nekasaiti.

⁸ Yusa Wakaní taa ashí jú nuñkanmaya aentsun ju menaintiun nekamtikiattawai. Ni tunaarj aan nekamtikiattawai. Pénger tunaajainchu wekasamniana nunasha nekamtikiattawai. Tura Yus tunaanum súmamtikiamniana nunasha nekamtikiattawai.

⁹ Winia enentáimturainiachu tunáarintin áiniawai.

¹⁰ Winia Aparuj wáketkui wáitkiashtratume. Tuma asamtai ashí shuar wí pénger tunaajainchu wekaamun nekaawartatui.

¹¹ Tura ju nuñkanam akupniunka Yus tunaanum súmamtikia asa shuarnasha súmamtikiamnaiiti. Nuna paant nekaawartatui’ tímiayi.

¹² Nu arantcha núkap tíntjiarme túrasha átumka nekaachaintrume.

¹³ Yusa Wakaní ashí nekas tiniu asa ashí nekasa nuna unuitiamprattarme. Ni enentáimmiyajaj tíchattawai antsu winia Aparuj antukma nuna ujatmaktatui. Ukunam áatna nunasha ujatmaktatui.

¹⁴ Ashí Wínian ujatmak Winia shiir awajtustatui.

¹⁵ Ashí winia Apar takakna nusha Wíniyai. Nu asamtai “ashí Wínian ujatmaktatui” tajai’ tímiayi.

Kúntuts pujuiniayat ukunam warasartatui

¹⁶ Ishichik pujusrum Winia wáitkiashtratume. Nuyá ataksha ishichik pujusrum ataksha wáitkiattarme. Wisha winia Aparuj wéajai’ tímiayi.

17 Nuyá ni unuiniamurj nuamtak aniniaisarmiayi “¿Jú chichamsha warimpait? “Ishichik pujusrum wáitkiashatrumé tura ataksha ishichik pujusrum wáitkiattarme tura Aparuj wéajai” tátsuk.

18 “Ishichik pujusrum” tana nusha ¿warimpait? Nii tana nu ántatsji” tiarmiayi.

19 Jesussha nin aniaistai táman nekáa tímiayi “Ishichik pujusrum wáitkiashatrumé nuyá ataksha ishichik pujusrum wáitkiattarme” tímiyai. ¿Núchakait átum initrustin wakerarmena nu?

20 Ti nekas tájarme: Átumka kúntuts pujusrum úttiatrumé tura Yus-shuarcha warásártatui. Tuma ajñk'í átum kúntuts pujayatrume ukunam warastatrumé.

21 Iis, nuwasha jurertin tsawant jeamtai najaimiak wáitiatsuk. Tura uchin jurerka ti waraak wáitsamunka enentáimtsui.

22 Atumsha núnisrumek yamaik kúntuts pujarme. Tura atak íjtjarum tusan winiakui ti shiir atumí enentáin warastatrumé. Nu warastinian jurutramkichimnia áiniawai.'

23 'Nu tsawantinkia penké ininsashtatrumé. Ti nekas tájarme Winia enentáimtursarum winia Apar searum nuna ashí amastatui.

24 Yamaisha Winia enentáimtursarum winia Apar seachurme. Seakrumniñkia amastatui ti shiir warasaruk tusa' tímiayi.

Jesus jú nunkanmayan nupetkaiti

25 'Métek-taku chichamjai nakumkan nuna tímiyai. Tura ukunmanka nujai chichatsuk winia Aparnan paant ujaktatjarme.

26-27 Nu tsawantaj átumka Winia enentáimtursarum winia Apar seattarme. Winia Aparsha atumin anea asamtai Wi Nin áusatin atumashtatrumé. Winia anentu asarum tura winia Aparujá taman enentáimtakrumin Niisha anenmawai.

28 Winia Aparujá jfinkin jú nunkanam táwitjai. Yamaikia jú nunkanmayá jfinkin ataksha Aparuj wáketjai” tímiayi.

29 Nuyá ni unuiniamurj tiarmiayi “Yamaikia métek-taku chichamjainchu chichaame.

30 Mash nékaitme. Shuar Ámin ininmatsain penker áimkiatin nékame. Nu nekaar Ame nekas Yúsnumaijtme tu enentáimtaji” tiarmiayi.

31 Tura Jesus tímiayi “¿Nekasash enentáimtarum?

32 Ti warik átumka ashamkarum niisháa tsakinmaktatrumé tura Winiak ikiurkittiarne. Antsu winia Apar pujakui Wiki pujatsjai.

33 Winia enentáimturkum imiatkinchanum pujusarat tusan tájarme. Jú nunkanam ti wáitsattarme. Tura Wi jú nunkanmayan nupetka asamtai warastarum” tímiayi Jesus.

17

Jesus ni unuiniamurjín Yúsan áujtawai

1 Nuna tj Jesus nayaimpinmaanñ ímias tímiayi “Aparu, yamá jeayi ame Uchiram shiir awajsatin. Núnisan ame Uchirmisha penker awajtamstatawai.

2 Ashí shuara Akupniurj najatajtme. Nujainkia Winia surusumna nú shuaran yamaram iwiaakman tuke amuukashтинian súsaitjai.

3 Aparu, chikich atsawai. Amek nekas Yúsaitme. Wisha Jesuskrístuitjai Ame akuptukmamna nu. Nu asamtai ashí shuar nuna enentáimtak yamaram iwiaakman tuke amuukashтинian takakui.'

4 'Ashí túratniun akuptukmamna nuna amukuitjai. Túran ju nunkanam shiir awajsaitjame.

5 Nuna túramtai, Aparu, ti yaunchu jú nunka atsaisha Ámijiai pujakui shiir awajtusmamna núnisemek yamaisha shiir awajtusta.'

6 'Ashí jú nunkanmayá surusmamna nú shuaran Ámin nekamtikiamjai. Áminiu áiniakui surusmame. Niisha ame chichammin umirtámkaruiti.

7 Ashí Wi takaajna nu Amek surusuitme. Niisha nuna nékainiawai.

8 Ame chichamem surusmam nuna ujakam niisha umirtámkaruiti. Ame akuptukakmin Amjiniya táwitjai. Nu nekasaiti tu enentáimtuiniawai.'

9 'Nin yainkiarta tusan seajme. Jú nunkanmayá shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yainkiarta tusan seajme.

10 Ashí Winia ainia nuka Áminiuiti. Tura ashí Áminiu ainia nuka Winia áiniawai. Winia penkerusha ni túramunam paant awajsaiti.'

11 'Wikia yamaikia jú nunkanam pujuschattajai. Tura nu shuarka juj pujuartatui. Antsu Ámijiai pujustajtsan winiakui ashí surusumna nuka, Aparu, ti shiir asam ame kakarmarmujiai wáinkia. Wisha Ámijiai chikichik ájiniá núnisan niisha ashí iruntrar chikichik ajasarti.

¹² Juǐ niǐjǐaj pujakun ame kakarmarmǐjǐaj ti pēnker wáinkiamǐaj. Antsu Yus-Chichamnum aarma uminkiatǐ tusa aya chikichik menkakaitǐ. Niisha tuke emesnartǐnia núiti.’

¹³ ‘Yamaikia Amǐjǐni winiaǐaj. Tura juǐ tuke pujakun juǐna tájame. Niisha Wi waraajana núnsar ti shiir warasarat tusan tǐajǐ.

¹⁴ Wi jú nuṅkanmayanchnuitǐaj. Niisha núnsan jú nuṅkanmayanchnu ániawai. Tuma asamtai ame chichammin Wi susamtai jú nuṅkanmayǐ shuarka nin nakitiainiawai.

¹⁵ Jú nuṅkanmayǐ júki tusan seatsǐjame. Antsu íwianch nin nupetkain tusan seajme.

¹⁶ Wi juyanchuitǐaj áintsan niisha juyanchu ániawai.

¹⁷ Ame chichammin ti nekasa nuna ántuiniakui pēnker awajsata.

¹⁸ Juyǐ shuarnum akuptukmam áintsan Wisha nin chikich shuarnum akupeajǐ.

¹⁹ Aya Áminiunak takastaj tusan enentáimtimǐaj. Túra asamtai niisha aya Áminiunak takastǐnian enentáimpratin ániawai’ áujtak tímiayi.

²⁰ ‘Aya núniunkeka seatsǐjame antsu ashǐ ni chichamǐen antukar Winia enentáimtusartatna nusha ame yáinkǐarta tusan seajme.

²¹ Ashǐ niisha chikichikiniak enentáimtusarti tusan seajme. Wisha Amesha, Aparu, chikichik ájǐnia núnsan niisha Iǐjǐaj iruntrar chikichik ajastai tusan seajme. Wǐi shuar chikichik najanata tusan seajme. Nuyá ju nuṅkanmayǐ shuar akuptukuitmena nuna nekaawartatui.

²² Ame shiir awajtursamna núnsinak Wisha nin shiir awajsaitǐaj. Iikia chikichik ájǐnia núnsan niisha chikichik ajasarti tusan túraitǐaj.

²³ Wǐ ni enentáin pujakui Amesha Winin pujakmin penké chikichik ajasarti. Túramtai ashǐ shuar juǐna nekaawartatui: Ame akuptukuitme, tura Winia anenmena áintsam nu shuarsha aneame. Wǐi shuar chikichik ajasmajǐ ashǐ shuar nuna nekaawartatui.’

²⁴ ‘Aparu, shuar surusmam nu, Wi pujostatǐjana nuǐ pujusarti tusan seajme. Tura ti shiir awajtusmamna nuna ísarti tusan nuna seajme. Ju nuṅka najanchamunman tuke anentǐn asam ti shiir awajtusuitme.

²⁵ Aparu, ti pēnker áminǐn ju nuṅkanmayǐ shuar nekarmainiatsui. Antsu Wi nékajme. Ju shuarsha ame akuptukman nékainiawai.

²⁶ Nú shuaran Ámin nekarmawarti tusan jintintǐaitǐaj. Tura nu arantcha jintintǐattajǐ. Nújainkia Wisha ni enentáin pujarkui Winia anenmena áintsan niisha anenkratin ajarasartatui’ áujtak tímiayi Jesus.

18

Suntar Jesusan achikiarmiania nu

(Mateu 26.47-56; Márkus 14.43-50; Rúkas 22.47-53)

¹ Jessussha nuna tinia amuk ni unuiniamurǐjǐaj Setrunǐ entsá katiṅ numi arakmanum wémiayi.

² Jútassha Nin suruktajtsa pujumia nuka nu ajan nekaamiayi. Untsurǐ tsawant Jesus ni unuiniamurǐjǐaj nuǐ iruntramtai Jútas Jesusan nuǐ wáinkiatǐniun enentáimpramiayi.

³ Tura untsurǐ suntarǐjǐasha Jesusan tariarmiayi. Pariséusha Israer-shuar Patri untrǐjǐasha suntarnasha Yusa Jeen wáiniuncha Jesusan achikiarat tusa akupkarmiayi. Niisha machitniasha nanǐkincha rámparancha jiniasha júkiar weriarmiayi.

⁴ Jessussha ashǐ átinia nuna neka asa jiintiuki “¿Ya eǐarum?” tímiayi.

⁵ Niisha “Nasarénumǐa Jesus” tiarmiayi.

Jesussha “Wiitǐaj” tímiayi.

Jútassha Jesusan surukua nu niǐjǐaj pujuarmiayi.

⁶ Tura Jesus “Wiitǐaj” takui ti ashamkar úkumur waketainiak iniaararmiayi.

⁷ Ataksha Jesus “¿Ya eǐarum?” tímiayi.

Niisha “Nasarénumǐa Jesus” tiarmiayi.

⁸ Nuǐnkia Jesus tímiayi “Wiitǐaj, tájame. Winia eǐatkurmeka Wǐi shuar ainia júka waketǐarti” tímiayi.

⁹ Jesus nuik aujuk “Winia Apar surusma nu menkakacharai” timia nu uminkiatǐ tusa Jesus “waketǐarti” tímiayi.

¹⁰ Nuyá Semun Pítiur machitǐan jusa Marku kuǐshǐn untsuurnumaanǐ tsupirkamiayi. Markusha Israer-patri untrǐjǐ takarniurǐyayi.

¹¹ Túramtai Jesus Pitrun tímiayi “Machitrumka awainki ikiusta. Winia Apar wáitsatǐniun surakuǐnkia ¿wáitsashtinkaitǐaj?”

Israer-patri úntrǐniam júkiarmiania nu

(Mateu 26.57-58; Márkus 14.53-54; Rúkas 22.54)

¹² Nuǐnkia apach suntarsha ni kapitǐantrǐjǐasha Yusa Jeen wainniusha Jesusan achikiar jinǐkiawarmiayi.

¹³ Nuyá Anasa jeen júkiarmiayi. Anassha Kaipiasa wearíyayi. Tura Kaipias nu uwitin Israer-patri uuntríyayi.

¹⁴ Kaipiasa nuik “¿Ashí Israer-shuar mesertin péñkerkait. Antsu aya chikichik shuar jákatin péñkerchakait?” timia núiti.

Pítiur Jesusan natsantramiania nu

(Mateu 26.69-70; Márkus 14.66-68; Rúkas 22.55-57)

¹⁵ Semuñ Pítiur chíkich unuiniamujai Jesusa uku weriarmiayi. Israer-patri uuntri nú unuiniamunka nékauyayi. Tuma asamtai ni jeen jeawar, suntar Jesusjai aa tanishnum wáiniakui niisha wayamiayi.

¹⁶ Tura Pítiur aa wáitiniam wajaamiayi. Túramtai chíkich unuiniamu jíinki wáitin wáinia nú nuwajai chichas Pítrun awayamiayi. Nuí nékanu asa yúpichuch awayamiayi.

¹⁷ Waiti wáinniusa Pítrun aniasmiaiyi “¿Amesha nuna unuiniamurínchukaitiam?”

Pítrusha “Atsá, núchaitjai” tímiayi.

¹⁸ Tsetsek asamtai suntarsha tura nuí takarniusa jinia ikiapárar ni nawen anaak pujuarmiayi. Pítrusha nuí pachíiniak anamuk pujumiayi.

Kaipias Jesusan aniasmiania nu

(Mateu 26.59-66; Márkus 14.55-64; Rúkas 22.66-71)

¹⁹ Israer-patri uuntri Jesusan aniasmiaiyi “Ame unuiniamurmesha ¿ya ainia. Tura warí nin jintintiaitiam?”

²⁰ Jesussha tímiayi “Ashí íimiainiaín tuke etserniuitjai. Israer-shuar iruntainmasha Yusa Uunt Jeecha Israer-shuar irunainia nuí arantutsuk tuke etserkaitjai.

²¹ ¿Urukamtai Winia inintiam? Winia chichamprun antukua nu anistarum. Wi timian nii ujatmakarti. Wi timiancha niisha nékainiatsuk.”

²² Jesu nuna takui Yusa Jeeen wáiniua nu nuí pujá Jesusan yapiniam awati tímiayi “¿Núnisag nekas úntnum chichastinkait?”

²³ Jesussha tímiayi “¿Warinmampa yajauch aa? Turuttia. Tura tájana nu péñkeraitkiuinikia ¿urukamtai awattiniam?”

²⁴ Nuyá Anas Jesusan jíinkiá Kaipias takaamunam akupkamiayi Kaipias Patri uuntri asamtai.

Pítiur ataksha Jesusan natsantramiania nu

(Mateu 26.71-75; Márkus 14.69-72; Rúkas 22.58-62)

²⁵ Tuke Anasa jeen chichainiaj Pítiur jinia anamuk puján shuar aniak “¿Amesha Jesusa unuiniamurínchukaitiam?” tiarmiayi.

Pítrusha “Atsá, wíchaitjai” tímiayi.

²⁶ Chíkich takarin, Marku shuari, nuí pujumiayi. Pítiur Marku kuíshin tsupirkamia nuna shuari asa tímiayi “¿Ajanam Jesusjai wekaamin wáinkiamkajam?”

²⁷ Pítrusha ataksha “atsá” tain atash shiniukmiayi.

Píratu Jesusan aniasmiania nu

(Mateu 27.1-2, 11-14; Márkus 15.1-5; Rúkas 23.1-5)

²⁸ Nuyá Kaipiasajya Jesusan júkiar tsawant tsawaamunam apach kapitían Piratu takatai jeenam ejeniarmiayi. Israer-shuarsha ni uuntri akupkama nunisar wapik ajasajj tusar nu jeenam wayacharmiayi. Wayawarka paskua nampernum yurumáchmin ármiaiyi.

²⁹ Nu asamtai Piratu níijjai chíchastaj tusa jíinki tímiayi “¿Jú áishmansha warí tunáa túrait?”

³⁰ Niisha “Tunaarinchaitkiuinikia amíjini itiachaaji” tiarmiayi.

³¹ Tutai Piratu tímiayi “Atumek júkirum atumí akuptammarijijai ni tunaari nekaatarum.” Israer-shuarsha tiarmiayi “Antsu íikia Israer-shuurtikia tunáa shuarsha máachminiaitjai.”

³² Yaunchu Jesus ni jákatniurjin enentáimtus “Wi awajnaíniuitjai” tímiayi. Niisha krúsnum awajninain asamtai apach máataijjai Nii timia nu uminkiamiayi.

³³ Piratusha atak jeá wayá Jesusan untsuk “¿Ámeka Israera Uunt Akupniurínkaitiam?” tímiayi.

³⁴ Jesussha tímiayi “¿Amekek nu inintram. Kame chíkich túramainiatsuash?”

³⁵ Piratusha tímiayi “¿Wi Israer-shuarkaitiaj? Ameer shuarak Israer-patri uuntrijjai winin itiararai. ¿Warí tunáa túraitiam?”

³⁶ Nuínkia Jesu tímiayi “Wi jú nuñkanam akupniuchitjai. Juyaitkiuinikia Winia nemartuiniana nu máanaikiarayai. Túrawarmatai Israer-shuarnum surutkachaarayai. Antsu juyan akupniuchitjai.”

³⁷ Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nuñkanam akiinian ashí shuaran nekas ana nuna ujakтинian táwitjai. Ashí shuar nekas ana nuna umirniuka Wi táman ántawai.”

³⁸ Tura Piratu “¿Nekasa nusha warimpiait?” tímiayi.

Piratu Jesusan mantamnatniun tímania nu

(Mateu 27.15-31; Márkus 15.6-20; Rúkas 23.13-25)

Piratusha nuna t̄i, atak Israer-shuarj̄ai chichastajtsa jiinki tímiayi “J̄ú aishman̄ka tunaarin pen̄ké wáitt̄sujai.

³⁹ Tura ashí uwitin paskua nampernum sepunmaya shuar an̄kant akupkatniuiti. Núnisrum tuke searme. Tuma asamtai, ¿yamaikia Israera Uunt Akupniur̄in an̄kant akupkattajak?” tímiayi.

⁴⁰ Nuñkia ashí kakantar unsumainiak “Ju akupkaip; antsu Parapás akupkatá” tiarmiayi. Nu Parapássha kásauyayi.

19

¹ Nuyá Piratu suntaran akupkamiayi Jesusan asutiáwarat tusa.

² Suntarsha Jesusan wishikrar tawasap jan̄ki najanamun etsen̄krumtikiarmiayi. Yamakai pushincha uunt akupniua áintsan̄ áentsrarmiayi.

³ Nuyá “Israera Uuntr̄ja, kakaram ajasta” tiar yapiniam awatiarmiayi.

⁴ Nuyá Piratu atak jiinki tímiayi “Átum wáinkiarum nekaatarum tusan Jesusan j̄úktiatjai. Wikia tunaar̄inkia pen̄ké wáitt̄sujai.”

⁵ Tímiatai Jesussha jan̄kin etsen̄kruku tura pushin yamakairman entsaru j̄úinkimiayi. Tura Piratu nūj káunkarun tiarmiayi “Pai j̄úiti, íistarum.”

⁶ Israer-patri uuntr̄jsha suntarsha Jesusan ísar ataksha kakantar unsumainiak “Krúsnum jakati” tiarmiayi.

Piratusha “Átum j̄úkiurum máatarum. Ni tunaar̄in pen̄ké wáitt̄sujai” tímiayi.

⁷ Tura Israer-shuar tiarmiayi “Nu shuar “Yusa Uchir̄int̄jai” takui jákatniuiti. Iiniu akupeamu arma nūj núniskete” tiarmiayi.

⁸ Nuna antuk Piratusha nu nan̄kaamas ashankamiayi.

⁹ Ataksha in̄it wayá Jesusan aniasmiayi “¿Tuȳampaitiam?” Tura Jesussha pen̄ké áikchamiayi.

¹⁰ Nuyá Piratu tímiayi “¿Urukamtia winia áirtsum. Wi jeajna nu nékatsmek? Wakerakna krúsnum máatniuncha tura an̄kant akupkatniuncha jeajai.”

¹¹ Tutai Jesussha tímiayi “Yus nuna amaschaitkiun̄kia pen̄ké tujinkiaintme. Nu asamtai am̄jin surutka nu ámin nan̄kaamas tunaar̄inniuiti.”

¹² Piratusha nú chichamtaik Jesusan an̄kant akupkattsa wakerimiayi. Antsu Israer-shuar unsumainiak tiarmiayi “Ju an̄kant in̄íakmeka ame únt akupnīu amikr̄inchuitme. Juka “únt akupniuit̄jai” taku atumí uunt akupniur̄i nemasr̄inti” tu unsumkarmiayi.

¹³ Piratusha taman antuk akupin pujutainium pujus Jesusan unsumkarmiayi. Nūj kaya ukatkamu asamtai Israer-shuara chichamen̄ Kapata anaikiarmiayi.

¹⁴ Paskua jisat jeats̄ain̄ nantu tutupin ajats̄ain̄ Piratu Israer-shuaran tímiayi “Uunt akupniuram íistarum.”

¹⁵ Tura ashí “Jakati, jakati, krúsnum máatá” tu unsumkarmiayi.

Tura Piratu “¿Atumí uunt akupniur̄in krúsnum máattajak?” tímiayi.

Tura Israer-patri uuntr̄j tiarmiayi “Atumí uunt kapitíánrumek in akuptamji. Chikichka atsawai.”

¹⁶ Tutai Piratu Jesusan krusnum mantamnatni tusa tsankatkarmiayi. Tutai niisha Jesusan júkiar wearimiayi.

Jesusa krúsnum máawarmiania nu

(Mateu 27.32-34; Márkus 15.21-32; Rúkas 23.26-43)

¹⁷ Jesussha ni krus̄r̄ yanaki Kúrkuta náinnium wémiayi. Kúrkuta naar̄jsha Israer-shuara chichamen̄ “muuka ukunch” tawai.

¹⁸ Nūj krúsnum ajin̄trurar awajainiarmiayi. Tura mai paē jimiará shuaran chikichik chikichik awajainiarmiayi. Tura Jesus ajapén ámiayi.

¹⁹ Piratusha Jesusa krús̄r̄in uunt áarman anujkamiayi. *NASARETNUMIA JESUS, ISRAERA UUNT AKUPNIUR̄I*

Tu áarmauyayi.

²⁰ Israer chichamj̄aj̄sha Kriaku chichamj̄aj̄sha Rúmanmaya chichamj̄aj̄sha áarmauyayi. Menaintiu chichamnum aarma asamtai tura Jesusar̄én̄ pepru t̄ij̄iuch asamtai Israer-shuar t̄i untsur̄i áuj̄iarmiayi.

²¹ Nu asamtai Israer-patri uuntr̄j Piratun jeariar “Israera Uunt Akupniur̄i” áaraip. Antsu “Israera Uunt Akupniur̄int̄jai tawai” tu aarta” tiarmiayi.

²² Tura Piratu nincha á̄kiar “Wí áaraj nuke átatui” tímiayi.

²³ Suntarsha Jesusan krúsnum awajainiar ni entsarmarin kuátru akankar ankant ankant júkiarmiayi. Tura ni pushirin apatsuk najanamu asamtai jááktinian nakitrarmiayi. Kame yakíya nunkaani apaiyia chma takamtsukuyi.

²⁴ Tuma asamtai suntar tiarmiayi “Juka jáákchatai. Antsu nakurakrin yának ati nu jukiti.” Nújainkia yaunchu Yus-Chichamnum aarma nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsararmiayi” áarmaiti.

²⁵ Krúsnumsha Jesusa nukurísha Kriúpasa nuarj Marisha tura Máktaranmayá Marisha wajaarmiayi.

²⁶ Jesus ni nukuríncha tura ni ti aneamu unuiniamuríncha nuj wajan wáiniak ni nukurín tímiayi “Nukuru, ju ame uchirnea áintsan atí.”

²⁷ Nuyá ni unuiniamuríncha tímiayi “Ju ame nukua áintsan atí.” Nu tsawantaik nu unuiniamurj ni jeen júki awayámiayi.

Jesusa jakamuri

(Mateu 27.45-56; Márkus 15.33-41; Rúkas 23.44-49)

²⁸ Nuyá ashí uminkiamtai Jesus nuna nekáa yaunchu Yus-Papinium aarma uminkiat tusa “kitiamajai” tímiayi.

²⁹ Nujsa pininnum churuín ámiayi. Tura shuar nuna uruchjai ejampar sapapjai ijiu mukunaati tusa susamiayi.

³⁰ Jesussha churuínian najekaa “ashí túrunatniua nu mash uminkiai” tímiayi. Nuna ti, muuken nená jakamiayi.

Suntar Jesusan paenam nanjkijai ijiumiania nu

³¹ Nu tsawantai, kashinkia paskua námper uunt tsawantrj asamtai tura ayampratin tsawant aa asamtai, Israer-shuar jaka ayashí nuj paant ajn tusa nakitrarmiayi. Nu asamtai Piratun seainiak “Krúsnum ajintrurma ainia nuna kanjakajn suntar kupirkarti. Nuyá wari jákarmatai krúsnumiá júkiarti” tiarmiayi.

³² Nuyá suntarsha weriar emka krúsnum amia nuna kanjakajn kupirkarmiayi. Nuyá chikichnasha Jesusjai atsankiar ajintrurma nuna kanjakajincha kupirkarmiayi.

³³ Tura Jesusan weantuk yaunchu jákaiiti tusa kanjakajn kupirtsuk

³⁴ suntar aya paenam ijiumiayi. Ijiuntaisha nu chichamtaik numpa yumijjai puarmiayi.

³⁵ Wi, Juan, nuna wainkia asan nekas tajai. Atumsha Yus enentáimtustarum tusan tí nekas tajai. Wi áarajna nu nekasaiti nékajai.

³⁶ Yaunchu Yus-Chichamnum aarma uminkiat tusa túrunaiti:

“Ni ukunchin kupirkachartatui” tu áarmaiti.

³⁷ Tura chikichcha:

“Ijiuarmiania nuna wáinkartatui” tu áarmaiti.

Jesús iwiansamu amiania nu

(Mateu 27.57-61; Márkus 15.42-47; Rúkas 23.50-56)

³⁸ Nuyá Arimatéanmayá Jusé Jesusa ayashín jukitiaj tusa Piratun seamiayi. Nu Jusé Jesusan enentáimtaiat Israer-shuara úntrin ashamak paant nemarsachmiayi. Niisha seamtai Piratu “Jukitia” tímiayi. Tutai Jusé Jesusa ayashín jukimiayi.

³⁹ Nikiuté musha Jesusjai chichastaj tusa kashi tarimia nu jimiara kunquin pachimpramun ti nukap sumak itiamiayi. Mira kunquinniasha aruí kunquinniasha sumakmiayi.

⁴⁰ Nuyá Jusé Nikiuté mujai Jesusa ayashín júkiar kunquinian kuérar jaanch esarmajai penuararmiayi. Israer-shuar tuke nunisar ikiúu ármiai.

⁴¹ Jesus krúsnum maama nuj aja tjiuch ámiayi. Nu ajanmasha wáá náinnium paka taurma ámiayi. Nusha yama taurma asamtai jaka nuj ikuschamuyayi.

⁴² Nu wáasha tjiuch asamtai tura Israer-shuara ayampratin tsawantrj jeatemantai Jesusa ayashín nuj iwiansarmiayi.

20

Jesús nantakmiania nu

(Mateu 28.1-10; Márkus 16.1-8; Rúkas 24.1-12)

¹ Tumintincha káshik kirit ajn Máktaranmayá Marí Jesus iwiansamunam listajtsa wémiayi. Jesusan iwiansar kaya uuntjai wáan atutkarmiayi. Tura Marí nuj jeá nu kaya uraimiun wáinkiamiayi.

² Nuna wáiniak Semun Pítur pujamunam tsékenki wémiayi. Chikich unuiniamurj Jesus ti anemia nusha nujsa pujumiayi. Tura Marí tímiayi “Iwiansamunmayá ii Úntrin júkiarai. Tura çtuínsuk ikiusara?”

³ Pítrusha chikich unuiniamurijjai júkiar iwiansamunam iyuwarmiayi.

⁴ Mai métek tsékeŋkiar Pítur jeatsaj̄n ch́kích unuiniamurj̄ iwiarsamunam emka jeamiayi.

⁵ Niisha wayatsuk tsuntsumá iis penuarmarj̄nkia nuj̄ tepan wáinkiamiyi.

⁶ Nuyá Semuŋ Pítur ukunam jeá iwiarsamunam wayá penuarmarj̄ nuj̄ tepan wáinkiamiyi.

⁷ Ch́kích jaanchcha Jesusa muuken penuarma nusha nanerma niisháa tepan wáinkiamiyi.

⁸ Nuyá ch́kích unuiniamurj̄ emka tamia nusha iwiarsamunam wayamiayi. Niisha túruna wáiniak "Jesus nekas nantakni" tu enentáimpramiayi.

⁹ Nuna wáintsuk Yus-Chichamnum "Jesus jakamunmayá nantaktiniaiti" áarman áujsariat nekaacharmiayi.

¹⁰ Nuyá mai ni jeen wakеткиarmiayi.

*Máktaranmayá Marincha Jesus wantintuikmiania nu
(Márkus 16.9-11)*

¹¹ Tura Marikia iwiarsamunam juak útu pujumiayi. Niisha útiataŋ tsuntsumá iwiarsamunam ímsamiayi.

¹² Tura Jesusa ayashj̄ nuik tepesmanum nayaimpinmayá suntar puju entsaru jímiar pujan wáinkiamiyi. Chikichik múuknumaanj̄ tura ch́kíchka nawenmaanj̄ pujumiayi.

¹³ Nayaimpinmayá suntarsha "¿Urukamtai útam?" tiarmiayi.

Marísha tímiayi "Winia Úntrun jurutkiarai tura ¿tuintsuk ikusara?"

¹⁴ Nuna tj̄ ayanmar Jesusan wáiniak Nin nekaachmiayi.

¹⁵ Jesus aniak "¿Urukamtai útam. Ya eəam?" tímiayi.

Marísha ajan wáinniua nuiti tusa tímiayi "Uunta, ame ni ayashj̄ jukimkia, tu ikusmam ujakata wi jurumkitiaj̄" tímiayi.

¹⁶ Nuyá Jesus "Mariya" tímiayi.

Tutai niisha ayanmar "Rapuni" tímiayi. Nusha Israer-chichamnum "Uuntá" tawai.

¹⁷ Jesussha tímiayi "Emetruawai. Winia Aparuj̄ wáatsjai. Antsu weme Wíi shuar titiá "Winia Aparuj̄ nayaimpiniam wéajai. Niisha atumí Aparj̄nti. Winia Yúsruti tura atumí Yúsrinti" tawai titiá" tímiayi.

¹⁸ Nuyá Máktaranmayá Marísha Jesusa unuiniamurj̄n wáiniak "Wi Úntan wáinkiajai, tímiayi. Niisha juna mash túrutui" tu ujakarmiayi.

*Jesus ni unuiniamurj̄n wantintuikmiania nu
(Mateu 28.16-20; Márkus 16.14-18; Rúkas 24.36-49)*

¹⁹ Nu tsawantaj̄, tumiŋtin, ni unuiniamurj̄ Israer-shuara úntrin ashamainiak kashi iruntrar waiti epeni pujuarmiayi. Túrusha Jesus áyatik wayamiayi. Tura ajapén wajas "shíir pujustarum" tímiayi.

²⁰ Nuna tj̄, nuyá ni uwejen ajintruamuncha ni paen ijiumuncha iniakmasmiayi. Ni unuiniamurj̄sha Úntrj̄n wáinkiar shíir warasarmiayi.

²¹ Ataksha Jesus "Shíir pujustarum, tímiayi. Winia Apar akatar akuptukma núnisnak Wisha akatran akupeajrume" tímiayi.

²² Nuyá ni matsatmanumaan̄j̄ umpuí tímiayi "Yusa Shíir Wakanj̄ atumí enentáin wayati.

²³ Shuara tunaarj̄nkia átum "asakárti" tákurminkia tsan̄kurnartatui. Tura nu shuar "sumamati" tákurminkia tuke sumama pujawai" tímiayi Jesus.

Tumas Jesus nantakniun wáinkiamiania nu

²⁴ Tura chikichik unuiniamu, Jímiampramu Tumas, Jesus tamia nuj̄ pujuchmiayi.

²⁵ Tura ukunam chikich unuiniamurj̄ ujainiak "Ii Uuntrj̄ wáinkiaji" tiarmiayi.

Tura Tumas tímiayi "Ajintruamurj̄ wáinkian uwejr̄n awáintiatnuijt̄jai. Tura paenumsha awáintiatnuijt̄jai. Penké jaka asamtai aya nuj̄ai iniantkimium enentáimtustatjai" tímiayi.

²⁶ Chikich tumiŋtin ataksha Jesusa unuiniamurj̄ iruntrarmiayi. Nuiŋkia Tumassha niij̄j̄ai pujuarmiayi. Tura waiti epenmianumaŋ Jesus wayá ajapén wajas "Shíir pujustarum" tímiayi.

²⁷ Nuyá Tumasán tímiayi "Winia uwejur ísam ame uwejem awáintiuata. Núnismek winia paeruj̄ uwejem awáintiuam ístá. Tura arantutsuk nekas enentáimtursata."

²⁸ Nuyá Tumas "Winia Úntrua, nekas winia Yúsrutme" tímiayi.

²⁹ Jesussha tímiayi "Winia wáitkiam nuin̄ enentáimtursame. Antsu Winia wáittsuk enentáimturaru nekas shíir ániawai" tímiayi.

Shuar Yusa Uchir̄in enentáimtusarti tusa ju papí áarmaiti

³⁰ Aentsti tujintiamuncha Jesus túramu ti untsurj̄ ju papinium áarchamu ániawai. Tura ni unuiniamurj̄ mash wáinkiarmai.

³¹ Antsu Jesuska Kristu asa Yusa Uchirinti tu enentáimtustarum tusan júna áarmajai. Tura enentáimtakmin Jesus ni iwiaakmarin yamarma nuna amastatui.

21

Entsá yantamnum Jesus siati (7) unuiniamurin wantintiukmiania nu

¹ Tipirias antumianka káanmatkarin Jesus ni unuiniamurin wantintiukmiayi. Júnisan ámiayi.

² Semun Pítrusha Jímiampamu Tumassha Kananmaya Natanaérsha Sepetéu uchirisha tura chikich jímiar unuiniamurisha métek iruntrar pujuarmiayi.

³ Semun Pítrusha “Namakan nekajai nankiattsan wéajai” tímiayi.

Chikich mash “Iisha winittiaji” tiarmiayi.

Wéar uunt kanunam enkemprar nu kashi achitsuk tsawararmiayi.

⁴ Káshik aji Jesus entsá káanmatkarin wantinkiamiayi tura ni unuiniamurisha Jesusan nekaacharmiayi.

⁵ Jesussha tímiayi “Uchiru, ¿namak achikiurmek?”

Niisha “Atsá” tiarmiayi.

⁶ Tutai Jesus tímiayi “Neka untsuurnumaanji ajunkatarum. Nuj achiktatrumé.”

Nii timia núnisan túrawar namakan ti achikiar nekan júsatniun tujinkiararmiayi.

⁷ Nújainkia Jesusa unuiniamurj Jesus ti aneemia nu Pítrun tímiayi “Ti Úntrinti.” Takui Pítrusha áimiaku asa ni pushirin entsar entsá inianmiayi yukuak jeataj tusa.

⁸ Chikich unuiniamurisha jeachat pujuiniachuk nekan japiki kanujai káanmatkanam jeawarmiayi.

⁹ Káanmatkanam jeawar ji kajir ámanum namakan jiámun wáinkiararmiayi. Tantancha wáinkiararmiayi.

¹⁰ Jesussha “Átum achikiurmena nuyá jíatin itiatarum” tímiayi.

¹¹ Tutai Semun Pítiur kanunam we nekan nekartiuk káanmatak japiki itiamiayi. Itiar namaknasha siañtu senkuenta nuyá tres (153) nekapmararmiayi. Ti untsurj áyat nekasha jáankachmiayi.

¹² Nuyá Jesussha “Yurumáitiarum” tímiayi. Ni unuiniamurisha “aya ii Uuntri áminiaiti” tusar inintrustinian natsantiarmiayi.

¹³ Nuyá Jesus wajakí tantan jukí súsararmiayi. Núnisan namaknasha súsararmiayi.

¹⁴ Jesus jakamunmaya nantaki jujai menaintiu ni unuiniamurin wantintiukarmiayi.

Jesus Semun Pítrujai chichasmiania nu

¹⁵ Nuyá yurumáwar Jesus Semun Pítrun aniasmiayi “Junasa uchirj Semunka, ¿ju shuar nankaamas anentmek?”

Pítrusha tímiayi “Ee, Uunta, wi wakerajam nu Ame nékame.”

Jesussha “Nuinkia winia murikiur ayuratniua áintsam Winia enentáimturania nu yaintá” tímiayi.

¹⁶ Ataksha aniasmiayi “Junasa uchirj Semunka, ¿winia anentmek?”

Pítrusha “Ee, Uunta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi.

¹⁷ Nú ataksha aniasmiayi “Junasa uchirj Semunka, ¿winia wakerutamek?”

Pítrusha menaintiu iniam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata.

¹⁸ Maa, nekas tájame. Natsa asamka iwiamampram ame wakeramunam wéuyame. Tura úntach ajasmeka ame kunturam ayaparakmin chikich aentstamprattawai tura ame wétin nakítiam nuj juramkiartatui.”

¹⁹ Jesus nújainkia Pítiur máatniun ujakmiayi. Tura núnisan jakamtai shuar Yúsán shiir awajsatniun ujakmiayi. Nuyá Pítrun “Nemartusta” tímiayi.

Juan túrunatniun Pítiur Jesusan aniasmiania nu

²⁰ Pítrusha ayanmar chikich unuiniamurin Jesus ti anea nuna némarun wáinkiamiayi. Kame nu unuiniamuka nuik Jesus jáatsain yurumáiniakui “Uunta, ¿ya surutmaktata?” timia núiti.

²¹ Nincha Pítiur wáiniak Jesusan aniasmiayi “Uunta, ¿jusha warí urukatniuit?”

²² Jesussha ayak “Wi wakeraknaka iwiaaku pujain tátatjai tímíniaitjai. Nuna tákuisha ¿warí itiurtama? Ámeka nemartusta” tímiayi.

²³ Nújainkia “Nu unuiniamurj jákashtatui” tusa Yus-shuarnum áujmatiararmiayi. Túrusha Jesus “jákashtatui” tichamiayi antsu áyatik “Wi wakeraknaka iwiaaku pujain tátatjai takuisha ¿warí itiurtama?” tímiayi.

²⁴ Wikia nú unuiniamurintjai. Ju papincha aaru asan “mash nekasaiti’ tajai. Ashí shuarsha núnisaran tuíniawai.

²⁵ Nu arantcha juí áarchamusha ti awai. Kame ashí áamka ti untsurí papí asa ashí nuñkanam ikuschamnia ainti. Nuke atí.

Jesusa Akatramurj Yusa Wakanjjai **TÚRAMU**

Yusa Wakanjn nákasarmiania nu

¹ Amikiur Tiúpiru:

Nuik akupkamiaj nú papinium ashí Jesus túramia nuna áatramiajme. Tura unuiti-ampramiaj nunasha áatramiajme. Yámankamtaiknumia,

² nayaimpiniam wétsuk, ashí Nii túramia nuna tímiajme. Jesuska, nayaimpiniam waketsuk Yusa Wakanj kakarmarjjai túratniua nuna ni akatramurjn jintintiwarmiayi.

³ Tura jaka nantaki, Jesus tímiajjai wantintiuarmiayi ni akatramurjn. Tura kuarenta (40) tsawant nin wantintiuarmiayi. Nuna tura nekas iwiaakjai tusa iniakmasmiayi, nekaawarat tusa. Tura Yusa akupeamurj urukukit nuna mash ujakmiayi.

⁴ Jesuska ni akatramurjjai tuke pujus, nin chicharuk “Jerusarénnumiá wéerap, tímiaji. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénnum nákastarum, tímiaji.

⁵ Tuke enentáimsatarum. Juan entsajai atumí ayashjn imiatmimiarme. Túrasha wárik Yusa Wakanjsha atumniasha tarutmar, atumí enentájn enkemprutmattarme. Nusha enentáimiantin áintsankete” tímiaji.

Jesus nayaimpiniam wakamiania nu

⁶ Tura Jesusaj irunar matsamas anintriarmiayi “Uunta, Israer-shuar ájinia nu, ankant ajasakrin iiniuk Akupin atak naamkatin yamaí jeayash” tiarmiayi.

⁷ Jesus áimiuk tímiaji “Winia Apar túratana nu warí tsawantnik túrunatí nu nekaatniusha atumniachuiti. Apar Ninjki neka asa ni kakarmarjjain túratatai.

⁸ Tura atumsha Yusa Wakanj kakarmarjn sunastatume. Nii taa enkemprutmamta kakaram ajasrum, Wíi túramu etserkattarme. Emka juj Jerusarén péprunam etserkattarme. Nuyá ashí Jutía nunkanam, tura arant Samaria nunkanmasha, tura nú arant ashí nunkanam werum, Wíi túramu etserkattarme” tímiaji Jesus.

⁹ Nuyá chichas amir, ashí ni akatramurj ii wajainiaj, Jesus nayaimpinmaanj junakmiayi. Wéa-wéakui yurankim mash Nin amúamiayi. Tuma asamta ni akatramurj Nin wáinkicharmiayi.

¹⁰ Tura Jesus waakkui ni akatramurjsha yakí ii wajainiaj, jimiará áishman puju entsaru nuj wantintiuarmiayi. Tura ayamach wajattsarmiayi.

¹¹ Nu áishmansha Jesusa akatramurjn tiarmiayi “Kariréanmayá áishmanka, çurukamta nayaimpinmaanj imiá íimprum? Ju Jesusak atumíya nayaimpiniam wea wáinkiarumna núnisan ataksha winittiwai” tiarmiayi.

Matlasan anaikiarmiania nu

¹² Tuasua amikmatai Jesusa akatramurj Uriwiu náinniumiá akaikiar Jerusarénnum waketiarmiayi. Uriwiu naincha Jerusarénnumsha tíjiuchiiti, chikichik kirumitrua núnisan.

¹³ Tura Jerusarénnum jeawarmiayi. Nu j jeawar, jeá wayawar yakj wákararmiayi. Nu j Pítrusha, Jakupusha, Juansha, Antressha, Jiripisha, Tumassha, Parturumísha, Mateusha, tura Arpeu uchirj Jakupusha, nuyá ásump Semunsha, Jakupu yachj Jútassha, tímian wayawarmiayi.

¹⁴ Jusha mash tuke iruniarmiayi Jesusa yachjjai. Tura Jesusa nukurj Marijjai, nuyá chikich nuwajajsha tuke iruniarmiayi, Yus áusatai tusar.

¹⁵ Nu j siántu painti (120) aents iruntrmia nu j Pítuir chichastaj tusa wajakmiayi.

¹⁶ Pítuir juna tímiaji “Yatsurtírmesha, umarutírmesha antuktarum. Yuska yaunchu ni Papirijn Jutasnan áamtikramiayi. Jútas akiintsajjn Tawitkia, Yusa Wakanj jintintiam Jutasnan áarmiayi. Jesusan achik surukarmia nú shuaran nekapruamia núiti. Kame Tawitia áarmarj Yus-Chicham asa tímianak uminkiatniuyi.

¹⁷ Nú Jutaska ii írutramuitiat, ii takaamurjn páchtikiaitiat,

¹⁸ tunáa tura nujaj kuítian achik nunkan sumakmiayi. Tura piniakum iniaan tantane páttimiayi.

¹⁹ Tuma asamta ashí Jerusarénnum pujuarmia nu, nuna nekaawar nú nunkan “Numpa Nunka” anaikiarmiayi.

²⁰ Kame Sarmu papinium Tawitkia juna áarchamkia:

“Ni jésha itiarak atí.

Nu jéanmanka penké pujuscharti.” Tura

“Ni takatrĭ chĭkich atankiti.”

Tu aarmaiti’ tĭmiayi.

²¹ Tuma asamtai yamaikia chĭkich anaikiatniuitji. Tura nánkamas achikchatniuitji. Antsu ii nemartamkau atĭ. Uunt Jesu iijĭjaj pujumia nuĭ tuke Nin nemarsamia nu atĭ.

²² Juanĭ Jesusan imiaimiania nú tsawantnumiā jukĭ, Jesu nayaimpiniam wémiania nú tsawantan tĭmanu eĭ tuke Niiĭjaj wekaimia nu atĭ. Nu shuar enentáimtusar, chĭkichĭk achiktai. Iisha iruntrar Jesusa nantakmiariĭ etserkamĭ tusar túramĭ” tĭmiayi Pĭtiur.

²³ Tura nuyá jimiará shuaran anaikiarmiayi. Matĭasan anaikiarmiayi. Tura chikich-nasha Jusen, ni chĭkich naariĭ Parsapas, tura apach náariĭkia Justu, nunasha anaikiarmiayi.

²⁴⁻²⁵ Tura nuyá Yus-shuar Yŭsan áujainiak juna tiarmiayi “Ii Uuntrĭ, Amesha ashĭ shuara enentáĭ nékame. Juĭ awai jimiará áishmanĭ. Jŭtas tunáa túrak jákatniunam wéak akatramu takantan ikiukmiayi. Yamaikia Jŭtasa takatrĭ achikiat tusam, ĭtuá achikium, Uunta? Paant iniakmasta.” Tu aajsarmiayi.

²⁶ Tura Israer-shuara túrutairĭ núnisaĭ, wats yaki nupetmakat tusar túrawarmiayi. Tura Matĭas nupetmakmiayi. Túrunamtai Matĭasnak pachikiarmiayi.

2

Yusa Wakanĭ taramiania nu

¹ Pintikiustĭs náartin jĭsat jeamtai, chĭkichĭk jeanmanĭ nuin Yus-shuar tuakarmiayi.

² Tumaj aya aneachma nayaimpinmaya nasea áintsan téter ajaki winian antukarmiayi. Ashĭ mash jeá pujuarmia nuka antukarmiayi.

³ Tura nuĭ pujuiniĭ ji wajaĭ kea áaniun wáinkarmiayi. Túruna anĭkant anĭkant puunak tarurarmiayi.

⁴ Tuma asamtai Yusa Wakanĭ ashĭ ni enentáĭn pimiutkarmiayi. Túram chichasarat tusa Yusa Wakanĭ ni nekatairĭ súsarmiayi. Tuma asamtai nuĭjaj niisha chĭkich chichaman chichasararmiayi.

⁵ Nuĭ Jerusaréĭnum Yus táman umirin Israer-aents áirmiayi. Ashĭ nuĭnkanmaya Jerusaréĭnum taar matsarmarmiayi.

⁶ Tura túrunamia nuna antukar káunkarmiayi. Tura ashĭ shuar ni chichamejainĭ chichamun antukarmiayi. Tuma ásar, warinkit, tu enentáimsarmiayi.

⁷ Nekaachar ashamkarmiayi. “Warinĭkit, tunaim ajarmiayi. Ju aents chĭkich chĭkich chichaman chichainia nu, ashĭ Kariréanmayanchukait, tiarmiayi.

⁸ Tura iisha anĭkant anĭkant ii chichameĭka ántatsjik. Ausha urukainiakua, nunak chichainiawa, tiarmiayi.

⁹ Juĭ ashĭ nuĭnkanmaya aents pujuiniatsjik. Partianmaya, Eramnumiasha, Misi-uptámianmayasha, Puntanmayasha, tura Asia nuĭnkanmayasha,

¹⁰ Prĭjianmayasha, Pampirianmayasha, Eĭiptunmaya tura Áprikanmaya Serinia nú nankaamasnumiasha pujuiniatsjik, tiarmiayi. Nuyasha ii shuarsha Ruma péprunmaya yaunchu taar juĭ matsataniawai. Chĭkichcha tuke Israer-shuar áiniawai. Tura chĭkichcha Israer-shuar ajastaj tusa Israer túrutairĭn mash túruiniawai.

¹¹ Kritianmayasha Arapianmaya pujuiniĭji. Tura ashĭ mash ii chichamejainĭ Yusa péĭnker túramurĭ ántaji” tiarmiayi.

¹² Ashĭ aents nuna nékachu ásar ashamkarmiayi. Tura nuámtak aniniaisarmiayi “ĭWarininiĭait ju?”

¹³ Tura chĭkichcha wishikiarmiayi. “Nampeku áiniatsush” tiarmiayi.

Pĭtiur ujakmia nu

¹⁴ Nuĭnkia Pĭtiur, chĭkich áuntse Jesusa akatramurĭjĭjaj wajaĭ, kakantar chichasmiayi. Chĭchaak tĭmiayi “Jutĭanmaya shuartiram, Jerusaréĭnumiĭqirmesha antuktarum. Wi tĭtiatjana nu antukrum péĭnker enentáimpratarum.

¹⁵ Ju áishmanĭ, nampekarai, tárumna nu, nampekcharai. Warĭ, nantu imiá ishichik takuni. ĭÁisha itiurak?

¹⁶ Antsu Yŭsnan etserin, ni naariĭ Juér, yaunchu áarmia nu, yamá túrunayi, tĭmiayi.

¹⁷ Juna áarmiayi: “Yus tawai “Jŭ nuĭka amuukatĭn jeatemamtai, winia Wakantrun ashĭ áentsnum akupkattajai, yumi yaraanua áintsan. Atumĭ uchirĭ, atumĭ nawantrĭsha Yusa chichameĭn áujmĭtiartatui. Tura nátsaka íimiarartatui. Tura uuntka mesekramĭ-artatui.

¹⁸ Tura áishmanĭsha nuwasha winia takartin ainia núnaka winia Wakantrun akuptukartatjai. Túram niisha Wĭi túramun áujmĭtiartatui.

¹⁹ Yaki nayaimpiniam, aents túrachminian iniakmastatjai. Tura nuĭnkanmasha winia kakarmarun iniakmastaj tusan numpancha, jiniasha, mukuintiuncha yuraĭmia áintsan akupkattajai.

20 Tura tsawái nantusha kajinkiattawai. Tura nantusha mushatmar numpa núniktatui. Uunt tsawant achikmiajna nu jeatsain, túrunattawai. Nú tsawantcha imiá nekas uunt átatui.
 21 Nuínkia ashí shuar nekas winia kakarmarun seana nuka uwemprattatui” tímiayi Yus.”
 Núnis Juér áarmiayi’ tímiayi Pítuir.

22 Tuke chichaak: ‘Israernumiá shuartiram, wi títiatjana nu antuktarum. Nasarénumiá Jesusnan tajai. Nú Jesusan Yus shiir enentáimtaiwai. Yuska, átum ti enentáimprarum ni kakarmarın paant nekaatarum tusa, nú Jesusan ti ikiakármiai. Tura Jesusjaj aentsti túrachminian Yuska túramiayi, átum ímmianum. Nuka ti paant nékarme, tímiayi.

23 Tura Jesus surunkamia nuna Yuska yaunchu, túruntsain, paant nekaamiayi. Túrusha Yus enentáimmia nujaj métek túrawarmiayi. Tura atumek emetarum Jesus jukimiarme. Nú arant, krúsnum máatarum, tunáa shuar tímiarme.

24 Túramunak Yus Jesusan jákatniun nupetmamtik iniantkimiayi, tuke jákachmin asamtai.

25 Iimiata, ii uuntrj Tawit Jesusnan kantamprua juna áarmiayi:

Úntan tuke pujurtan wáinniajai. Winia pujurtaku awajkamú áhattajai.

26 Tuma asamtai winia enentáirjajsha Nin shiir enentáimtusmiajai. Tura wenurjajsha shiir chichaman chichamiajai. Jáaknasha shiir enentáimsan jakattajai, aneantiniapitjia tusan.

27 Winia wakaniur, Yusru, jákatniunam ikiirtuschattame. Wi ame Uchirmetjai, Tunaarincha. Túmaikui anentu asam ayashur káurtin tsankatrukchattame.

28 Tura iwiaaku átin jintia jintinrutamame. Tura tuke pujurtakum waramtikrustatme.

Tu áarmiayi Tawit’ tímiayi.

29 Pítuir tuke chichaak: ‘Páantchakait. Ii uuntrj Tawit yaunchu jákai. Tura iwiansamuiti. Ni iwiansamurj iinj pujatsuk.

30 Túrusha Tawitkia Yúsnan etserniuyayi. Tuma asa Yus tímia nuna nekaamiayi. Yus Tawitian chicharuk tímiayi “Ame akupniuitme. Nekas tájame, ukunam ame inannamurminian Kristu akiiniattawai. Nüsha Akupin anainiaktatui, amea áintsan.” Nuna Yus táman Tawit nekaamiayi.

31 Neka asa, túruntsain Tawit, wainkia nútiksán, Kristu nantaktinrın áarmiayi. Kristu túrunatniurın chicharuk tímiayi “ni wakanıncha jákatniunam ikiikchatniuyi. Ayashıncha káurtinian tsankatkashitniuyi.”

32 Au Kristun tímia nu Jesusaiti. Nu Jesusnak Yus iniantkimiayi. Nuka iisha neka asar étserajai.

33 Yuska, Jesus nankaamantuiti tusa ni untsuurınj apusaiti. Tura ni Wakanın Jesusan súsaiti, Nii yaunchu tímia nútiksán. Tuma asamtai jusha átum antukurmena nuna, tura ísurmena nunasha Yus suramsaiti.

34 Tawitkia ayashtiuk nayaimpiniam wákachmiayi. Tura nú Tawitiak juna áarmiayi:

“Uunt Yus winia Úntrun tímiayi “akupin pujutainium, winia untsuurınjı pujustá.

35 Ame nemasrumin nupetkattajai. Nu túruntsain jui pujustá” tímiayi.”

Nuní áarmaiti Jesusnan, tímiayi.

36 Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrusha Jesussha in uwemtikkiartin Kristuiti. Ashí áentstıram nu pénger nekaatarum” tímiayi Pítuir.

37 Nuna antukar wake mesekarmiayi. Tura Pitruncha chíkich akatramuncha aniasarmiayi “Yatsuru, ¿nuínkia itirkatjik?” tiarmiayi.

38 Tutai Pitrusha chichaak “Atumı tunaarj ikiiktıaj tusarum Yus nekas enentáimustarum. Tura ashı shuartiram Jesukrıstu naarj pachisrum imiantarum. Nuínkia atumı tunaarın Yus tsankurtamprattarme. Túrunawakrumin Yuska ni Wakanın suramsattarme, tímiayi.

39 Yus tímia nuka atumin túramprume. Atumı uchirıncha tura ashı arant matsatania nunasha tawai. Kame ii Yusrı áentsun untsuktaj tusa wakerana nuna tawai” tímiayi.

40 Nú chichamjaj tura nuyasha Pítuir tuke jintintiuk tímiayi “Yajauch shuara asutiániurj áatna nuyá uwempratarum” tímiayi.

41 Tuma asamtai nuna antukarmia nuka imianiarmiayi. Nú tsawantaj menaintiú mir (3000) aents Yus-shuar ajasarmiayi.

42 Ashı nu shuar Jesusa akatramurj jintintiarmia nuna tímiatrusan antukarmiayi. Tura irunar shiir enentáimtusaisar yurumin áarmiayi. Túrawar, Kristu enentáimtustin namperın najanın áarmiayi. Túrawar Yúsan áujjarmiayi.

Yus-shuar pampararmiania nu

43 Tura Yuska aentsti túrachminian Jesusa akatramurjjaj túramiayi ni kakarmarın iniakmastaj tusa. Tuma asamtai ashı aents nuna wáinkiar ashamkarmiayi.

44 Yúsan umirkaruka ashı métekrak pujuarmiayi. Tura ashı niiniu armia nuna sunaisarmiayi.

⁴⁵ Ni nunken surukar, ni takakmarincha surukar, atsumainia nuna súarmiayi.

⁴⁶ Tuke tsawantak Yusa Uunt Jeen káuniarmiayi. Tura ni jeencha iruntrar warainiak Kristu enentáimtustin námper najanin ármiai. Tura nankaamantu enentáimtumatsuk, yurumkan ajamnainiarmiayi.

⁴⁷ Túrawar, Yuska ti úuntaiti, tu wearmiayi. Tura ashí aents nin shiir enentáimtiarmiayi. Tura Uunt Yus tuke tsawant shuaran uwentikiar Yus-shuar írunmanum íkiaunkí wémiayi.

3

Wekaicha wekasamia nu

¹ Chikich tsawantaj, nantu nunkaach ajasmatai, Pítiur Juanjaj, Yusa Uunt Jeen Yus áujstai tusar wearmiayi, Israer-shuar tuke turin armia nútikasaran.

² Tura áishman, ni akiiniamuriniá wekaicha amia nu, nuí aa wáitiniam tuke tsawant pujumiayi. Nu áishmanasha ni shuarj entsakí júkiar nú wáitiniam apujin ármiai, nuí shuar wayan kuítian seat tusar. Nú wáitisha, Shiir Waiti, tutajyayi.

³ Tura nú shutuapsha Pitrun Juanjaj wayan wáinkiamiayi. Wáiniak kuítian seamiai.

⁴ Tura Pítiur Juanjaj apajas ísarmiayi. Tura nú áishmanasha chicharuk “Íirsata” tímiayi.

⁵ Aishmansha, surustatuapi, tu enentáimias, ímsamiayi.

⁶ Nuyá Pítiur chichaak “Kuítusha atsawai, tímiayi. Kurisha atsawai. Antsu kuítaj nankaamas takakjana nuna amastajai. Wats, Nasarénumiá Jesukristu kakarmarjijaj wajakim wekasata” tímiayi.

⁷ Tinia iniaais, Pítiur ni untsuurinj achik awajkiymiayi. Túram ni nawesha, wanusesha kakaram ajasmiai.

⁸ Tura niisha wajaki nantent ajakmiayi. Nuyasha wekasamiayi. Tura Pítrujajsha Juánjajsha Yusa Uunt Jeen wayawarmiayi. Nuik shutuapka wayá nantent nantent ajak Yusa náarj shiir pachimiayi.

⁹ Ashí aents pujuarmia nu, nin wekaan wáinkiamiayi. Tura ni chichamen anturkarmiayi.

¹⁰ Tura chichainiak “Nuik Yusa Uunt Jeen wáitirj, Shiir Waiti tutainium, nu áishman tuke pujuuya núchakit” tiarmiayi. Tura ni túrunamurj nekaawar, ti ashamkar nusháa enentáimsarmiayi.

Pítiur ujakmiania nu

¹¹ Shutuapka pénger ajasu asa Pítrujaj Juánjajsha péngé tsurachmiayi. Tura aents nuí pujuarmia nu, warinkit tusar, jeáshkirj tsékenki wearmiayi. Nuka Sarumúna tiniu ármiai.

¹² Aents káunkarun Pítiur wáiniak, chicharuk “Israer-shuartiram, ¿urukamta winiasha imiá írun? tiarmiayi. ¿Isha pénger asarik’ tsuarmaj? ¿I kakarmarjijajnik’ ewekamsamaj?”

¹³ Atsá. Antsu Yuska ni Uchirj Jesusan ashí nankaamantu awajsaiti. Ii uuntri Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitían Piratú surukmarne. Tura Piratu akupkataj tau atumsha suritkiamarne.

¹⁴ Jesus pénger náak enentáimniyuana nu “akupnakhati” tímiarme. Antsu shuáran main akupnakat tusarum wakerimiarme.

¹⁵ Túrarum iwiaaku átinian Amaana nu maamarne. Tuma ain Yuska Nin jakamunmaya iniantkimiayi. Nuka iisha neka asar étsereaji.

¹⁶ Tura ju aishman juj wajaana ju tura nékarmena ju, Yusa Uchirj naari enentáimta asa kakaram ajasuiti. Jesus enentáimtusu asa nekas pénger ajasuiti. Nusha wáinni asarum nékarme’ tímiayi.

¹⁷ ‘Wats, yatsurtiram, wi nékajai. Atumsha atumí úntrijaj Jesusan túramarmena nu nékatsuk túramarme.

¹⁸ Tura nu túramurmijaj Yus yaunchu tímia nu tímianak umikiurme. Ni Krísturj wáitsatniuya nuna Yuska ashí ni etserniurj áamtikramiai.

¹⁹⁻²⁰ Wats, yamaikia tunaaruminiá kanaktiarum. Túrarum Yúsnumaanj ayantárarum, tunaarun asakárat tusarum. Túrunawakrumniá, atumin uwentikramprarat tusa Yus yaunchu anaikiamia nuna akupturmaktatrum. Nusha Jesukristuiti. Tura Niijjaj enentáimin ayampratin átatui.

²¹ Tura yamaikia Jesukristu nayaimpiniam pujustiniaiti, ashí iwiarnatsaj. Yuska ukunam ataksha nunkan shiir awajsattawai. Nuna ni etserniurj tsáapin enentái takaku armia nuna yaunchu áamtikramiai.

²² Tuma asa Muisais ii aparj tímiayi:

“Atumí Uunt Yusrj ukunam etserniun akupturmaktatrum, winia akuptukmia núnisan. Nuámtaktirminiá achik akupturmaktatrum. Tura nii títiatna nu umirkatarum” tímiayi.

²³ Nánkamas aents nu etserniun chichamen umíachkunka emesnartatui. Tura Israer-shuarum páchitkia áhattawai.

Núnisañ áarmiayi Muisaissa' t́imiayi.

²⁴ Pítur tuke chichaak 'ímiata, Yúsnañ etserin Samuer ju tsawantin túratniuri etserkamiayi. Nuyá ashí Yúsnañ etserniusha tuke nuna etseriarmiayi.

²⁵ Etseriarmia nuka atumin túramprume. Tuma asa átum péñker pujustinian Yuska ii uuntri Apráman ju chichaman susamiayi. "Nekas tájame, ame shuarum akiiniattana nujai ashí áentsnasha shiir awajstatajai' t́imiayi. Tura ii úuntriñ t́imia núnaka incha túramji, t́imiayi.

²⁶ Ímiata, Yus ni Uchirín iniantkimia nu, atumin emka akupturmakmiarme. Atumsha, atumí tunaarjya kanaktiarum tusa, tura atumin shiir awajtamsatniun wakerak túramiayi." Nunak t́imiayi Pítur.

4

Pitruncha Juágnasha kajerkarmiania nu

¹⁻² Pítrusha Juanjai Yusa chichameñ áentsun jintintiainiak pujuarmiayi. Jesus nantakin asantai aencha nantaktin ániawai, tiarmiayi. Tura chichaak pujuiniñ Israer-patri táarmiayi. Tura Yusa Uunt Jeen wainniu úuntriñsha Satuséu aentcha táarmiayi. Taar Pitruncha Juágnasha kajerkarmiayi, niisha Jesusa nantakmiari chichaman jintintinia asantai.

³ Yamaikia kíawai, kashin iismi tusar achik sepunam enkea iniaisarmiayi.

⁴ Tura Pitrun nuik anturkarmia nú aents untsurí Yus-shuar ajasarmiayi. Nuik Yushuaraim tura yamaiyaim iruram ti untsurí ajasarmiayi. Aya áishmankak, senku mir (5000) aents árimiayi.

⁵ Kashin tsawarmatai Israer-shuara akupniuri, ni úuntriñsha, tura ni jintinniurishá Jerusarénum iruntrararmiayi.

⁶ Nuñsha Anassa, Israer-patri uuntri anaikiamu amia nu, tura Kaipiassha, Juansha, Arejantrusha, tura Israer-patri kapitiantri shuarishá t́imian iruntrararmiayi.

⁷ Iruntrar Pitruncha Juágnasha utitiarum tusar akupkarmiayi. Tura itiarumatai, ajapén awajsarmiayi. Tura aniasarmiayi "Kame ¿yana kakarmarjijai, yana chichamejai túrarum?" tiarmiayi.

⁸ Tutai nuyá Pítur, ni enentáin Yusa Wakaní pimiutkamu asa t́imiayi "Akupniutiram, tura úuntirmesha antuktaram.

⁹ Ju áishman nuik shutuap amia nu péñker ajasmarj anintrarme. Kame itiurak péñker ajasuít tátsurmek.

¹⁰ Urukantia úuktataj. Anintrakrumin iisha paant títiatji, Israernumiá shuar ashí nekaawarat tusar. Ju áishman Jesukristu kakarmarjijai péñker ajasuít. Nasarénumiá Jesukristun, átum máamurmena nuna, tura Yus jakamunmaya iniantkimiania nuna tajai, t́imiayi.

¹¹ Nú Jesuska kayaa áintsankete. Atumsha jeamniutiram, nú kaya yajauchiiti, t́imiarne Jesusna. Túrasha túramaitatñ Niisha jeanam emka apusamua núnisañ ajasuít, t́imiayi.

¹² Tura chikichjai uwempratín penké atsawai. Ju nunkanam ii chikicha naarj pachisar uwempratín atsaji. Jesuskete ii uwemtikrampratniun Yus suramsamíaj nu" t́imiayi Pítur.

¹³ Pítrusha Juansha nánkamas shuara áintsan árimiayi. Núkap unuimiarcharu árimiayi. Tura unuimiarchaitiat, arantutsuk etseriarmiayi. Aentsu uuntri núnaka nekaawar "Nékachuitiat, itura sapijmiatskesha chichainia" tiarmiayi. Tura, jusha Jesusa nemarin ármia núiti tiar nekaawarmiayi.

¹⁴ Nuyasha áishman péñker ajasmia nu niijjai nu wajamiayi. Tuma asantai, niisha ai wajaku, Israer-shuara úuntriñkia, péñker ajaschaiti títiat tukamá tujinkiararmiayi.

¹⁵ Tuma ásar, iik nuamtak áujmatsatai tusar, Pítrusha Juansha shutuapsha aa awemartai, tiarmiayi.

¹⁶ Tura áujmatainiak tiarmiayi "Ju Pítrusha ju Juansha ititurkatjik. Ju uunt túrunamun Jerusarénum matsatainia nu ashí nékainiatsuk. Wáitiati titin tujintiaji, tiarmiayi.

¹⁷ Tura, ashí aents nekaawarain tusar yamaik jiaktai. "Ju Jesusa naarj pachisrum penké jintintiawarairap," titiai" tiarmiayi.

¹⁸ Tura árusañ Pitruncha Juágnasha shutuapnasha ataksha untsukarmiayi. Tura chicharkarmiayi. "Jesusa naarj penké áujmatsairap. Tura Jesusa túramuri penké jintinti-airap" tiarmiayi.

¹⁹ Tutai Pítur Juanjai áimkiarmiayi "Enentáimpratarum. ¿Yus warinia wakera? ¿Iikia Yus umirtsuk atumí chichameñ umirkatniukaitiat?" tiarmiayi.

²⁰ Nekaatarum. Iisha ísjinia nu, tura antukjinia nusha ii etsertsuk pujustin tujintiaji." Tu áimkiarmiayi.

21-22 Shutuáp péñker ajasmia nu kuarenta (40) uwí nan̄kaamas takakuyayi. Ni péñker ajasmariñ aents nekaawar, “júka aentsti túrachminiaitji” tusar Yusa naarin uunt awa-jsarmiaiyi. Tuma asamtai aentsu uuntrj Pitruncha, Juannasha asutiátai tukamá aentsun ashamainiak áyatik chicharkar iniaisarmiaiyi.

Yus-shuar Yusa kakarmariñ seawarmiania nu

23 Pítiur Juanjaj an̄kant ajasar ni írutramuriñ waketkiarmiaiyi. Tura jeawar Israer-patri uuntrj tura aentsu úntrisha nin tiarmia nuna mash etserkarmiaiyi.

24 Nu ujakam antukar métekrak Yúsan áujuk tiarmiaiyi “Winia Uunt Yusru, Amesha nayaimpisha nun̄kasha najanaitme. Nayaantsasha tura juí írunna nusha najanamiamé, tiarmiaiyi.

25 Tura Tawit ámin umirtamin amia nu ju áamtikramiamé:
“¿Urukamtai ashí nun̄kanmayá aents charaatum ajainia? ¿Tura Israer-shuarsha urukamtai ántar chichaman enentáimainia?”

26 Uunt kapitíán ármia nuka chichaman jurusarmiaiyi Uunt Yúsan.
Tura pepru úntrisha iruntrar Uunt Yúsan kajerarmiaiyi. Ni anaikiamuriñ Krístun nútiksán kajerarmiaiyi.”

27 Tu áarmaiti, Uunta, tura nekasaiti. Erutis apachi kapitíantri Punsiu Piratujaj jú péprunam iruntrararmiaiyi. Niisha yajayá shuarjaj tura Israernumiá shuaraim nuim iruntrararmiaiyi. Ame Uchirmin Jesusan tunaarinchan kajerarmiaiyi. Jesuska Ame anaikiamiamé, winia takatrun túrat tusam.

28 Tura ame enentáimjaj iwiararamna nu uminkiatniuiti. Tura apachcha Jesusan kajerainia ásar, Ame iwiararamna tímianak umikiarmiaiyi.

29 Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha ame chichamem ii ashamsuk etserkatín ame kakarmaram amasta.

30 Tura ame kakarmarmijjaj jaasha tsuártin amasta. Ame Uchiram Jesus tunaarincha nujaj ii aentsti túrachmin túratniusha amasta. Aents Yusa kakarmariñ nekaawarat tusam túrata” tiarmiaiyi.

31 Tura Yúsan tú áujas umikmatai nuin irunar pujuiniañ úrkarmiaiyi. Túrunamtai ashí shuara enentáin Yusa Wakanj pimiutkarmiaiyi. Túmaitkiui ashamsuk Yusa chichamen etserkarmiaiyi.

Wíniakete, tícharmiania nu

32 Yus-shuar ajasarmia nu, ti untsuritiai, ashí chikichík enentainiak enentáimainiak, ni takaku armia nuna, aya wíniakete tútsuk, júsha ashí iiniu ainiawai, tiarmiaiyi.

33 Tura Jesusa akatramuriñsha, Yus ti yayamu ásar, Yusa kakarmariñjaj Uunt Jesusa nantakmariñ tuke etseras pujuarmiaiyi.

34 Tura ashí Yus-shuarka nun̄kan takakusha jeñ takaku armia nusha, núnaka surukar kuítian ititariarmiaiyi.

35 Tura itiaar Jesusa akatramuriñ súarmiaiyi. Akatramusha susam, niisha atsumainia nuna súarmiaiyi. Tuma asamtai shuar atsumaka pen̄ké atsuarmiaiyi.

36 Chikichík shuar, ni naarj Jusé, nun̄kan takakuyayi. Jesusa akatramuriñsha Jusén chíkich náarín apujtusarmiaiyi, Pirnapín. Nu náaríñsha, shiir enentáimtkiartin tawai. Tura Pirnapísha Riwí áentsuyayi. Tura ni akiiniamuriñ nun̄kenka Chípriiyayi.

37 Niisha ni nun̄ken surukmiyai. Tura nu kuítian itia Jesús akatramuriñ súarmiaiyi.

5

Ananías tunaari

1 Tura chíkich áishman, ni naarj Ananías, ni nuwé Sapirraj ni nun̄ken surukarmiaiyi.

2 Niisha nun̄kan suruk kuítian emeenak akanak júki Jesusa akatramuriñ werí takamt-sukea nútikias susamiyai. Ni nuwésha, Sapir, nuna túran nekaamiyai.

3 Túramtai Pítiur chichaak “Ananías, ¿urukamtai uunt iwianch enentáimin en̄kemturmatai, Yusa Wakanj anan̄kataj tusam nun̄ka surukam kuit achikumna nu akankam ikiur-masam? tímiyai.

4 Entá, nuñkia nun̄ka áminiučkukait. Surukumna nu kuitcha áminiučkukait. Nusha, ¿urukataj tusamea tu enentaípram? Amesha aya áentsnum wáitruachume. Antsu Yus-numsha wáitruame” tímiyai Pítiur.

5 Tutai Ananías nuna antuk nú chichamaik jakamiyai. Tura ashí shuar nuna antuk nekaawar ti ashamkarmiaiyi.

6 Nú turunamtai áishman tariat Ananías jakan penuararmiaiyi. Túrawar iwiansatai tusar júkiarmiaiyi.

⁷Tura Ananíasá nuwə arur, menaintiú ura nan̄kaamasaj̄ támiayi. Túrasha ní áishrī jakanka nekaachmiayi.

⁸Támatai Pítur nuwə́n t́miayi “Turuttia. Átum nuñka surukurmena nū, ¿kuit itiarumna núnikik surukuram?” t́miayi. Tutai nuwə́ t́miayi “Ee, núnik surukji.”

⁹Tutai Pítur t́miayi “¿Urukamtai atumsha Uunt Yusa Wakar̄ñ nekapkamsatai tusarum imiá enentáimprarum? Pai, iisiá. Ame áishrumin iwiarsatai tusar júkaria nu wininiawai. Tura yamaikia amincha juramkiartatui” t́miayi.

¹⁰Tutai nu chichamaik niisha imia Pitru wajamunam jaka iniaantmiayi. Aishman̄ wayaj tukamá jaka tepan wáinkiarimiayi. Túramtai júkiar ní áishrīniñ ayamach iwiarsarmiayi.

¹¹Tura ashí Yus-shuar armia nu tura ashí aencha nuna antukarmia nu ti ashankarmi-ayi.

Yusa kakarmarij̄aj̄ túrawarmiana nu

¹²⁻¹⁴Tura ashí Yus-shuar Yusa Uunt Jeen shikir̄jin irunin ármiai. Nu shikir̄jsha, Sarumú̄na, tu anaikiamuiti. Tura chíkichmamtinka nuim iruntratniun ashamiarmiayi. Túmainiayatan, ti pé̄nker ániawai, tu wearmiayi. Tura Yus-shuar Yusa kakarmariñ iniak-masarmiayi. Túra asamtai imiá untsur̄i aents Yus-shuar ajasarmiayi.

¹⁵Tura chíkich aents ni shuarj jainia nuna jintiá amantikiarmiayi. Peakjaj̄ júkiar, tam-punmasha en̄keawar júkiar jintiá ayamach áepsarmiayi. Pítur nan̄kaamak ni wakan̄in̄sha en̄kemprutmawainti tusar nu shuar túrawarmiayi.

¹⁶Núnisan̄ arantiá shuarsha ti untsur̄i ni shuarj̄ jáinian tura iwianchrukuncha nūi Jerusarēnnum itiarimiayi. Tura ashí nūi táaruka tsuámararmiayi.

¹⁷Israer-patri uuntrī, tura Satuséu aencha niij̄aj̄ pujuarmia nu suuir iiniak

¹⁸Jesusa akatramur̄in achikiar en̄keawarmiayi.

¹⁹Túrasha kashi Uunt Yusa suntar̄i nayaimpinmayá tara sepú wáitir̄in uraimiayi. Tura Jesusa akatramur̄in āā j̄iikiarmiayi.

²⁰Tura t́miayi “Wetarum. Tura Yusa Uunt Jeen wajasrum Yusjaj̄ tuke iwiaaku átinia nu etserkatarum” t́miayi.

²¹Nuna antukar kashin tsawar káshik Yusa Uunt Jeen wayawar jintintiawarmiayi.

Nu túmainī Israel-patri uuntrī, tura niij̄aj̄ pujuarmia nusha iruntrarmiayi. Tura Israer-shuara uuntrī, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramur̄i sepunmayá itiatarum tusar.

²²Tura suntarsha sepunam jeariar Jesusa akatramur̄in wáinkiacharmiayi. Atsawai tukam táarmiayi.

²³Taar chichainiak “Sepú waiti asakamua tímianisan̄ aa wáinkiaji, tiarmiayi. Tura suntar wáitin̄ iimpru wajainia wáinkiaji. Tura waiti urair wayaj̄ tukamar atsá wáinkiaji” tiarmiayi.

²⁴Israer-patri uuntrī, tura Yusa Uunt Jeen wainniu úntr̄isha, nu chichaman antukar, “tsej ausha ¿urutiak nunasha iniaisarat?” tiarmiayi.

²⁵Nu chichamaik áishman̄ taa t́miayi “Aishman̄ átum sepunam en̄keamarmena nu, Yusa Uunt Jeen wajasar áentsun jintintiuk pujuiniawai” t́miayi.

²⁶Túrunamtai Yusa Uunt Jeen wainniu uuntrī ni suntar̄ij̄aj̄ wear achik itiarimiayi. Túrasha penké aents kayajaj̄ tukurmaraj̄ tusar, yajauch awajtsuk itiarimiayi.

²⁷Tura achik itiaar Israer-shuar naamka pujamunam naka awajsarmiayi.

²⁸Tura Israer-patri uuntrī t́miayi “Iisha atumin chicháa chicharu awajsar, Jesusa naarj̄ pachisrum etserkairap tusar akupkachmakajrum. Túrasha, ¿antukurmek? Atsá. Mash Jerusarēnnum átum etserkamú pampañkai. Jes, átum, Jesusan máawarai, in tátsurmek. Nusha in makuutai tusarum tárume” tiarmiayi.

²⁹Nuyá tutai Pítur chíkich Jesusa akatramur̄ij̄aj̄ chichainiak “Iikia aentsjainkia inian̄kasar Yus emka umirkatniuitj̄, tiarmiayi.

³⁰Jesus atumek krúsnum máamurmena nuna ii iwiaaku Yusr̄i Nin iniantkimiayi.

³¹Yus ni kakarmarij̄aj̄ Nin nan̄kaamantu awajsamiayi. Tura nekas Akupniuiti tusa ni untsuur̄inj̄ apuj̄samiayi. Tura áentsun Uwemtikniuiti. Israer-shuar enentá yapañjáwar tunaar̄inj̄a uwemprarat tusa Yus túraiti.

³²Nu tuma asamtai iisha nu nekaar étsereaji. Tura Yusa Wakan̄jsha nuna étsereawai. Túrasha aya Yusa umirkarua nunak ni Wakan̄ñ súsaruiti” t́miayi Pítur.

³³Tutai nuna antukar ti kajerkarmiayi. Túrawar, maatai tusar wakeriarmiayi.

³⁴Tura nūi Israer-shuara uuntrī pujumiayi, ni naarj̄ Kamar̄i. Niisha Pariséunam páchitkiauyayi. Tura akupeamun jintinniur̄iyayi. Túmakui ashí aents nin shiir enentáimtin ármiai. Tura niisha wajaki t́miayi “Jú áishman̄ āā ishichik wajasarti” t́miayi.

³⁵Nuyásha irunar matsarmia nuna chicharuk “Israer shuartiram, jú áishman̄ tú túratai tu enentáimsarumna nu aneartarum.

³⁶ Enentáimsatarum. Nuik áishman Tiútas wantinkiachmakia. Niisha kapitániitjai takui, kuartru siáŋtu (400) shuar nemarkarmiayi. Tura ukunam nin maawarmatai, ni némarkamuriŋsha píсарarmiayi. Túrunawar nuní amuukamiayi.

³⁷ Ukunmasha, iruntrar nekaptartin tsawantincha Kariréanmaya Jútas wantinkiachmaka. Tura nincha nútiksāŋ ti untsurí nemarkarmiayi. Túman máawarmiayi. Nu túrunamtai nútiksāŋ ni némarkamuriŋsha píсарarmiayi.

³⁸ Jes, tuma asamtai nu áishman aq wajainia nu iniaisatarum. Auka pachisairap. Au tumainia nu aya áentsnaketkuinŋkia amuukattawai.

³⁹ Tura antsu Yúsnaitkuinŋkia atumsha amuktai tukamarum tujinkiattarme. Aneartarum. Iniaiyachkurmeka nu tumá pujusrum Yusjai máanikhchattarmeash” tímiayi Kamarír.

⁴⁰ Tú tutai tímianak umikiarmiayi. Túrasha Jesusa akatramurin untsukar asutiáwarmiayi. Tura chicharuk “Jesusa naari pachisrum penké ishichkisha etserkairap” tiarmiayi. Tú tiar akupkarmiayi.

⁴¹ Jesusa akatramuriŋsha Israer-shuara uuntri pujamunmaya jínkiarmiayi. Tura wáitsamniaitrome tusa Yuska Jesusa naari pachia asakrin ii natsantin wáitsatniun tsankatramkaitji tusar ti shiir enentáimsar wearmiayi.

⁴² Tura Jesukristunun áujmatsatniun penké iniaisacharmiayi. Antsu tuke tsawant Yusa Uunt Jeencha tura chíkich jeanmasha páchitsuk etseriarmiayi.

6

Yus-shuaran yainian siati anaikiarmiania nu

¹ Nú tsawantin Yusan umirkaru ti kawenkar ármiai. Tura tuke tsawant yurumak súsatin ámiayi. Túmakui Yus-shuar Kriaku chichaman chicharmia nu, Israer-shuaran kajeriarmiayi. “Tuke tsawantin yurumak súarmena nuĵ atumí waje ti nukap súarme. Tura íniuka ishichik súarme” tiarmiayi.

² Túruinia Jesusa tuse akatramurí ashí Yus-shuaran irurar tiarmiayi “Iisha Yus-Chicham etserkatin iniaisar yurumak súasachminiaitji.

³ Tuma asamtai yatsurtiram, atumíniá siati áishman eáktárum yurumkan súsarat tusarum. Péŋker wekainia nu, tura neka shuar, Yusa Wakaní pimiutkamu ainia nu achiktarum.

⁴ Iikia antsu Yus áujkir unuiniakratkir Yusa chíchame etserkir wétatji” tiarmiayi.

⁵ Akatramu tiarmia nuna ashí aents enentáimsar pujuarmiayi. Túmainiak Estepañkan anaikiarmiayi. Estepañsha Yúsan tuke enentáimtinuuyayi. Tura Yusa Wakanísha pimiutkamuyayi. Chíkich áishmanċkan anaikiarmiayi, niisha Jiripi, tura nuyá Purukuru, Nikianúrsha, nuyá Temuŋ, Parmenasha, Nikiurássh. Nikiurássh Antiukia nunċkanmayaitiat Israer-nancha ashí umirniuyayi.

⁶ Tura nu siati áishmanċkan Jesusa akatramurin itiararmiayi. Táarmatai, akatramusha, Yus áujtusar, anaikiaji tusar múuknumsha ni uwejen awantsarmiayi.

⁷ Túrasha Yusa chíchamenka tuke pampankj wémiayi. Nuĵ Jerusarénumsha Yus-shuar ti kawenċkarmiayi. Tura imia Israer-patrisha untsurí Yus-Chichaman umiriarmiayi.

Estepañkan Israer-shuara uuntriċn júkiarmiania nu

⁸ Estepañsha Yusa waitnenkartutariċ pimiutkamuyayi. Tura Yusa kakarmariŋsha pimiutkamuyayi. Tuma asa aentsti túrachminian shuar irunmanum túramiayi. Nu shuar Yusa kakarmariċ nekaawarat tusa túramiayi.

⁹ Israer-shuar iruntai jea, ni naari Anċkantin, ámiayi. Nuyá áishmanċsha tura Serini nunċkanmaya áishmanċsha, tura chíkich nunċka Arijiantriċnmayasha, Serisianmayasha, Ásianmayasha, tímian Estepañjai áujmatsatai tusar káutkarmiayi.

¹⁰ Estepañ Yusa Wakaní nekatairijiċ tímianak chícháa asamtai, nu áishman Estepañjai inċkuinaikiar nupetkataj tukamá tujinkiarmiayi.

¹¹ Tuma asamtai suir enentáimtuiniak chíkich áentsun Estepañkan tsanumprurarar tusar eákarmiayi. Estepañ Muisaisnasha Yúsnasha yajauch áujmatui, titiarum tusar akikiarmiayi.

¹² Penké áentsun, tura uunt ainia nunasha, jintintin ármia nujaisha chichaman júsar yajauch enentáimtikrarmiayi. Tura Estepañkan jintiá akirtuawar achikiarmiayi. Túrawar Israer-shuar naamka matsarmarmia nuĵ júkiarmiayi.

¹³ Tura wait chíchamtinian itiararmiayi. Niisha taar chícharainiak “Yusa Uunt Jeen ti péŋker ana nu, tura Yusa akupkamuriċncha ju Estepañ tuke yajauch chícharui, tiarmiayi.

¹⁴ Nú arantcha ju Estepañ tímia nu antukji, tiarmiayi. Estepañ chíchaak “Nasarénumia Jesuska Yusa Uunt Jeen sáaktiatui, tura nuyá Muisais in ikiurtamkimiaċ nunasha yapajáttawai” tímiayi. Nusha Estepañ tímia nu antukji” tiarmiayi. Tura nunasha penké ántar tsanumprurararmiayi.

¹⁵ Nuyasha ashí Israer-shuar naamka iruntramunam pujuarmia nu Estepañkan iiyaj tukamá ni yapin nayaimpinmaya suntara yapiya nuní íran wáinkiarmaiya.

7

Estepañ etserkamiania nu

¹ Tuma wáiniak Israer-patri uuntri Estepañkan aniasmaiya “¿Ju tuinia nu nekaskait?” tímaiya.

² Tutai niisha áimkiamiya “Winia úntrutirmesha, yatsurtirmesha anturtuktarum. Ii Waantu Yusrj ii úntrín Apraáman wantintiukmaiya. Apraámka Misiuputámia-Kartea nunkanam pujai, Aran nunkanam wéatsain, nuj wantintiukmaiya.

³ Tura wantintiuk tímaiya “Ame nunkemsha áminiurmesha ikiukim nunka Wi iniaktustat-jamena nuj wetá” tímaiya Yus.

⁴ Tutai Apraám Misiuputámia-Kartea nunkan ikiuki Aran nunkanam pujustaj tusa wémaiya. Nuyá ni aparj jakamtai “Arant wetá” tímaiya Yus. Nuna taku ju nunkan ii pujajnia juj pujsamiya.

⁵ Túrayat nunkan ishichkisha súsachmaiya ju nunkanam. Antsu “Ukunam amastajai. Ame jakakmin ame uchirmin susattajai” tímaiya. Tura Apraama uchirj penké atsan nuní tímaiya Yus.

⁶ Nuyasha Yus tímaiya “Ame uchirmesha írara núnisarañ chíkich nunkanam pujusartatui. Nujsha emetamu itit awajtai pujuartatui. Kuartru siántu (400) uwí, tímanu uwí wáitsartatui, tímaiya.

⁷ Túrasha, Wi asutiáttajai ame shuárumin wáitkia núnaka, tímaiya. Túram nuyá nú nunkanmaya shiákartatui. Tura Winia enentáimtursartatui jú nunkanam’ tímaiya.

⁸ Yus tuke Apraám nasha chíchruk ‘Yamaikia Wíi-shuar asarum tsupirnaktiniaitrum. Tuma asam amesha uchiram áishmankach akiiniamtai, Wi tímajna núnismek, sirkunsisiúñ tutai, shunichirj nuape tsupirkata, tímaiya. Tura chícham Wi yamaikia ámijjaj najanaj nu nekas uminkatniuiti tusam nusha túrata” tímaiya Yus. Tuma asamtai ni uchirj Isak akiiniamtai, uchu tsawant nankaasmatai, Apraám nin tsupirkamiya. Tura Isaksha ukunam ni tuse (12) uchirj in ii uuntri armia nunasha nútiksañ túramiay.

⁹ Tura niisha ni yachjín Jusén suír íyarmiay. Túmainiak Ejiptu nunkanam júkiarat tusar surukarmiay. Túrasha Yus némarkauyayi.

¹⁰ Tuma asa, ashí ni itiurchatrjñia uwemtikramiay. Tura waitnenkartutairjñincha nekatairjñincha susamiay. Tuma asamtai Ejiptunam uunt akupin Paraún Ejiptu nunkaa akupniurj ajasat tura ni jeen wáinniurj ajasat tusa anaikiamiya.”

¹¹ ‘Tímiatam tsuka tura itiurchatcha ámaiya Ejiptu núnkanam. Tura juj Kanaan nunkanmasha núnisarañ ámaiya. Tuma asamtai ii uuntri yurumkan penké wáincharmaiya.

¹² Tura Jakup, Ejiptunam yurumak ikiusma awai taman antuk ni uchirj in akupkarmiay. Túrasha wekaicha wearmaiya. Wats, ii úntrjñinun ujaajrume.

¹³ Tura ii uuntri atak Ejiptunam wéenak Jusésa, wíitjai takui ni yachjín Jusén nekaawarmiay. Tura Jusé “Yatsur ániawai” takui Paraun, antuk “au shuarapitia” tímaiya.

¹⁴ Nuyañka Jusé ni yachjín chicharuk “Apar itiatarum uchirtuk” tímaiya. Nu shuarsha untsurj, setenta senku (75) matsamarmiay.

¹⁵ Nuní tutai Jakupsha ni shuarjñjaj Ejiptunam pujustai tusar wearmaiya. Tura ukunam nú nunkanman jakamiya. Tura ni uchirjsha ii uuntri ainia nu, núnisarañ nú nunkanman jákarmiay.

¹⁶ Tura atak ukunam ni shuarj Sikiam nunkanam ni ukunchjín júkiar iwiarsarmiay. Kame Sikiam nunkanam Apraámka yaunchu játsuk Amura uchirj nunken sumakmaiya. Túramtai nuj iwiarsarmiay’ tímaiya.

¹⁷ ‘Yus, Apraáman chicharuk “Nekas wi susattajme” tímania nú tsawant jeatemamtai, Ejiptu nunkanam Israer-aents pampanki ti kawenkarmiay.

¹⁸ Nu tsawantjñincha Ejiptunam chíkich akupin naamka ámaiya, tura Jusén nekaachmaiya nii.

¹⁹ Nu akupin ii yaunchu úntrjñin anankawar yajauch awajiarmaiya. “Atumí uchirj kuírchich ana nu ajapa ikiuktiarum” tu wémaiya. Pampankarajñin tusa tímaiya.

²⁰ Tiri iniasamunam Muisais akiiniamiya. Muisaisnaka Yus shiir enentáimtimiai. Tura ni nukurj menaintiu nantu takusmaiya.

²¹ Tura nuyá ajapa ikiuktin jeamtai entsá apujsamiya. Uunt Paraunka nawantri Muisaisan wáiniak jukimiya. Achik, ni uchirjñia tímiatrusañ juki tsakatmarmiay.

²² Tuma asa Muisais unuimíatrayayi ashí Ejiptu aents nékarmia nuna. Túramurjsha chichamesha kakarmauyayi.’

²³ Estepañ tuke étseruk juna tímiayi: ‘Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuarj asamtai.

²⁴ Nuyá we Ejiptunmaya áishman ni shuarin máatasa pujurun wáinkiamiayi. Tura Muisais ni shuarin ayamprak Ejiptunmaya áishmankan máamiayi.

²⁵ Wíi turamujaj Yuska Israer-aentsun uwentikrattawai, tu nekaamiayi Muisais, Yus timia asamtai. Tura Israer-aencha áintsaran nekainiawai tu enentáimsamiayi. Túrasha ninjka nekaacharmiayi.

²⁶ Kashin tsawar Muisais ni shuarj jímiar maani pujuinian wáinkiamiayi. Tura nawamnaikiarat tusa “¿Urukamtai nuamtak yatsumjajsha yajauch awajniarum?” tímiayi.

²⁷ Tutai emka nankaama nu Muisaisan kárut shitiá “¿Ya amincha ii akuptamin tura ii chichartamin anaitiamkamam?”

²⁸ ¿Winiasha maantuátaj tusam wakeramek, yaú Ejiptunmaya áishman máamamna nútiksamka?” tímiayi.

²⁹ Nuna antuk Muisaiska Matian nunkanam pisar, nú nunkanam kuarenta (40) uwí jajaya áintsan pujumiayi. Nú nunkanam pujus, nuatak, jimiará uchin jajutmarmiayi.’

³⁰ ‘Kuarenta uwí nankaamas, nu atsamu nunkanam Senai náinnium tíjijuch Yusa suntari najaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi.

³¹ Muisais, nuna kean wainiak ashankamiayi. Tura weantuk iistaj tukamá Uunt Yusa chichamen antukmiayi.

³² Yus tímiayi “Wiitjai Yus. Ame úntrumj Apráama Isaka, Jakupa Yúsrinjai” tímiayi. Tutai antuk Muisaiska ti kuraimiayi sapijin. Tura ístinian tujinmiayi.

³³ Nuyá Uunt Yus tímiayi “Úntrun shiir awajsataj tusam, ame sapatrum ukuiñkiam ikiuktia, wajamna nuj Wi pujaku.

³⁴ Nuyá nekaata, tímiayi. Wíi-aents Ejiptunam wáitias pujuinia nuna wáinkijai. Tura útainia nunasha antukjai. Tuma asamtai uwentikrataj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.’

³⁵ Estepañ tuke étseruk: ‘Ju Muisaisan ni shuarj “¿Ya amincha ii akuptamin tura ii chichartamin áinniasha anaitiamkamam?” tiarmia nuna Yuska akupniun anak uwentikrarat tusa awainki akupkamiayi. Numiniam ni suntari wantintiukmia nuna chichamejai Yuska Muisaisan akupkamiayi, tímiayi.

³⁶ Muisaisaiti Israer-aentsun Ejiptunmayan uwentikramia nu. Yusa kakarmarin nekaawarat tusa, aentsti túrachminian untsurin túramiayi Ejiptu nunkanam. Nuyá Kapantín Nayaantsanmasha, tura nuyá kuarenta (40) uwitin atsamunam pujuiniajsha ti kakarman iniaktusmiayi.

³⁷ Jú Muisaisak Israer-shuaran chicharuk “Atumíniñanek etserniun Yus ukunam anai-attawai, winia anaitiukma áintsan. Tuma asamtai nu shuarsha umirkamniuram” tímiayi.

³⁸ Jú Muisais Israer-aentsjai atsamunam pujumiayi. Senai nainnium Yusa suntari nijijajsha pujumiayi. Tura Muisaiska ii úntrijjai pujumiayi. Níyiaiti iwiaaku pujustin chichaman sunasmia nu. In ujatmaktinian sunasmiai.’

³⁹ Túrasha ii yaunchu uuntri Muisaisan umirkatniun nakitiarmiayi. Áaniuk imiá umirtaint tusar Ejiptunam waketkitniun wakeriarmiayi.

⁴⁰ Túmainiak Muisais Yusjai chichastajtsa murá wématai nu shuar Muisaisa yachin Arunkan tiarmiayi “Ii yusrj najanata, ii nemarsatin. Áaniusha Muisaissha Ejiptunmaya in juramkiyatcha tútsuk weruma” tiarmiayi.

⁴¹ Nuyá wáakachia áaniun najanawarmiayi. Túrawar, júiti ii yusrj tusar, kuntinian maantuawarmiayi, nu susatai tusar. Tura ni uwejejai najanamun íisar ti wararsarmiayi.

⁴² Nuna túruinian wániak Yus, iniaisajai taku, níyja kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniurj juní áarmiayi:

“‘Israer-aentsu, kuarenta (40) uwitin atsamunam wekaimiarmena nuj, ¿Winiak kuntin maanturtuamarum? Winia surustai tusarum penkê túrachurme, tímiayi Yus.

⁴³ Antsu, Muruk naartin ántar-yusa pujamurj jukimiarme. Tura chíkich ántar-yussha, ni naari Rempan, yaa ánin najanarum nusha jukimiarme. Júkin asakrumin atumí nunkeya jukin, tímiáj Papirúnia nunkan nankaiki akupkatjarme” tímiayi Yus.”
Nuní áarmaiti’ tímiayi.

⁴⁴ Estepañ tuke étseruk: ‘Yus Muisaisan tímiayi “Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánata” tímiayi. Tutai Muisais Yus tímianak unikiayi. Nu jean ii uuntri yaunchu takaku árimiayi.

⁴⁵ Nu jean ni uchirj akintkiar akintkiar wearmiayi. Ukunam, jú nunka achiktin jeamtai, Yuska kapitíán Jusuejai jú nunkanmaya aentsun jüki akupkarmiayi. Tura ii uuntri kapitíán

Jusuejaj winiarmia nu, nu jeancha jú nuñkanam itiararmiayi. Tura Tawit uunt akupin náamtsajin, ii úuntrjsha nu jean takaku áarmiayi.

⁴⁶ Kame Yus Tawitian yájau enentáimtichmiayi. Tuma asamtai Tawit Yus shiir pujustinian jean jeamtinian seamiayi.

⁴⁷ Túrasha antsú Tawitia uchirí Sarumún Yusa jeen jeammiayi.

⁴⁸ Túrasha aents jeammanumañ Uunt Yus pujuschamniaiti. Jes, yaunchu Yusa etserniurj Yus tímia nuna áarchamkia.

⁴⁹ Juna áarmiayi:

“Nayaimpikia winia pujutairuiti. Nuñkanmasha nawer tarimiui.

¿Warí jea najatruatai tusarnea tarum? tímiaiyi Uunt Yus.

Tura Wi ayampratniusha, ¿tuñ aa?

⁵⁰ Wiki winia uwejrújain ashí najanachmakiaj” tímiaiyi.

⁵¹ Estepañ tuke étseruk: “Tura átumka Israer-shuartermeká atumí enentájijaj tuke umichuitrume. Atumí kuishjsha weaktsui tura Yus nékachua núninaitrume. Yusa Wakanjijajsha tuke nemasnaikiatrume. Tura atumí yaunchu úuntrijijaj métek túrarne” tímiaiyi.

⁵² ‘Iisia, atumí úuntrjsha Yusa etserniurjin tuke kajerin áarmiayi, tímiaiyi. Tura nú arant atumí úuntrjsha Tunaarincha tátatui tu etseru wekaan, máacharmakia. Jes, nútiksarmek yamaisha, Tunaarincha támania nusha atumek anañkarum máachmakuram, tímiaiyi.

⁵³ Tura Yusa suntarj nayaimpinmayá Yusa chichamen susamuitiatrum atumsha penké umikchamarme” tímiaiyi Estepañ.

Estepañka jakamurj

⁵⁴ Israer-aencha Estepañ tu chichaamu antukar imiá kajerkar nain kátetete awajiarimi-ayi.

⁵⁵ Tura Estepañsha imiá Yusa Wakanj pimiutkamuyayi. Tuma asa nayaimpinmaani íimias, Yusa wincharjin, tura Yusa untsuurjinjjesusan wajan wáinkiamiaiyi.

⁵⁶ Tuma wáiniak Israer-áentsun tímiaiyi “Núá íiskua, nayaimp uranniun wáinjai. Tura Jesusan, Aents Ajasu tutaiya nuna Yusa untsuurjinj wajan wáinjai” tímiaiyi.

⁵⁷ Támaiati niisha kuishjin akiriarmiayi, tura achiktai tusar charáa tiar ashí wajatkiarmi-ayi.

⁵⁸ Túrawar, péprunmayá arant júkiarmiayi. Tura antuk etserkarmia nu pushirjin ákiar, natsa Sauru wajanunam au iisti tusar áeprusarmiayi. Tura máawartai tusar kayajaj tukurarmiayi Estepañkan.

⁵⁹ Tura Estepañka tukamaitiat Yúsán áujsamiaiyi. Tura áujuk “Uuntru Jesúsá, winia wakantrusha jurutkitia” tímiaiyi.

⁶⁰ Tura tikishmar áujuk “Uunta, jú winia túrutainiana jú makuip” tímiaiyi. Tura nuna tj iniais, jakamiaiyi.

8

Sauru Yus-shuaran kajerkarmiania nu

¹⁻² Estepañkan máawarmatai Sauru, péñkeraiti, tímiaiyi. Tura áishmañ Yúsán péñker enentáimta armiania nu, Estepañka ayashincha iwiarsarmiaiyi, tura aneenak ti uu-tiararmiayi. Tura nú tsawantaj Yus-shuaran Jerusaréñnum pujuarmia nuna ti kajerkatín nankamnamiaiyi.

³ Sáuruka Yus-shuaran kajerak ti pataat wémiayi. Túmak nuñ jeá wayá, nuñ wayá áishmañnasha nuwancha wáinkianka japiki júki sepunam eñkeataj tusa túrimiaiyi. Tumakui Yus-shuar Jerusaréñnumiá pisarar Jutía nuñkanam, tura Samaria nuñkanmasha jearwarmiayi. Jesusa akatramurjnkia antsú Jerusaréñnumañ juakarmiayi.

Samaria nuñkanam etserkarmiania nu

⁴ Túrasha Jerusaréñnumiá aents pisararmia nu, arant wénaksha tuke Yusa chichamen etserkini yujarmiayi.

⁵ Tura Jiripi Jerusaréñnumiá we tura chíkich péprunam Samaria núñkanam ámiania nuñ jeá, chichaak “Yus anaikiamu ana nu Jesusaiti” tu etsermiaiyi.

⁶ Túrakui aents iruntrar chikichik enentájijaj Jiripi étsereamun titiú pujusar antukarmiayi. Yusa kakarmarjin nekaawarat tusa aentsú túrachminian túrimia nunasha wáiniarmiayi.

⁷ Ti untsurj aents iwianchruku ármia nuna Jiripi nu iwianchin jiriki akuptiararmiayi. Tura íwianch jiniainiak kakantar charáa tiar jiniarmiayi. Tura ti untsurj emearusha shutuapsha péñker ajasarmiayi.

⁸ Tuma asamtai nú péprunmayañka ashí shuar ti warasar pujuarmiaiyi.

⁹ Tura nú nuñkanam uwishin Semuñ pujumiayi. Nuikkia wi ímianaitjai tusa Samarian-mayá aentsun anañniuyayi.

¹⁰ Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semunsha Yusa kakarmarjijai áitkiawai.”

¹¹ Tura ti untsurí uwí wawekratmarjijai ananakarta asamtai, umirkarmiayi nu aents.

¹² Túrasha Jiripi Yusa akupeamurín, tura Jesukristununcha shiir chichaman etserkamiayi. Tura, nuna antukar nuwasha áishmansha umikiar imian wearmiayi.

¹³ Semunsha imia uwishniuitai Yus-Chichaman enentáimtus imianmiayi. Tura Jiripijijai tsani wekaimiayi. Yusa kakarmarín shuar nekaawarat tusa Jiripikia aentsti túrachminian túrimiayi. Nuna wáiniak Semun ti enentáimsamiayi.

¹⁴ Tura Jesusa akatramurísha Jerusarénum pujuarmia nu Samarianmaya aents Yusa chichaman umirainiawai taman nekaawarmiayi. Tuma asamtai Pitruncha Juánnasha nekáa ikiuutarum tusa akupkarmiayi.

¹⁵⁻¹⁶ Tura Samarianmaya Yus-shuarsha aya Uunt Jesusa náarín imianiarmiayi. Yusa Wakanínkia tárachmiayi. Tuma asamtai Pítrusha Juanjai nu jeawar Samarianmaya Yus-shuara enentáin Yusa Wakaní pimiutkarat tusan Yusan áujtusarmiayi.

¹⁷ Tura áujtua umikiar Pítuir Juanjai ni uwején nú Yus-shuaran awantsarmiayi. Nuiñkia Yusa Wakaní taramiayi.

¹⁸ Jesusa akatramurí uweje awasmanum Yusa Wakaní taramtai, Semunsha nuna wáiniak, kuitjai nu kakarman sumaktaj, tímiayi.

¹⁹ Tura Jesusa akatramurín chicharuk tímiayi “Winiasha kuitjai surustarum nu kakaram. Wisha nútiksanak nánkamas aentsnum winia uwejur awantsam Yusa Wakaní tarurat tusan tajai” tímiayi.

²⁰ Tutai Pítuir tímiayi Semunkan “Ámeke kuítrumjai métek menkakatnuiutme. Warí, Yus amaana nu ¿kuitjai sumaktinkiait?

²¹ Yus esetram enentáimtachu asam nu túramu pachistincha penké tujinkiamé, tímiayi.

²² Enentáimprata. Túram Yus seata. Enentáimtamna nuna Yus tsankurtamprashtimpiash.

²³ Nékajme, tsankea áintsan yapá enentáimin pimiutramkaiti. Tura tunaarmín jinkiamua núniainaitme” tímiayi.

²⁴ Tutai Semun áimkiamiayi “Uunt Yus aujtsatarum. Túrutrumna nuna túrunawaj tusan tajai” tímiayi.

²⁵ Nuyasha Jesusa akatramurí Jesusa túramurín nú áentsun ujakarmiayi. Tura wésar Samaria nunkanam pepru ámunmanka Yus-Chichaman nuj etserkiar, nuj etserkiar Jerusarénum waketiarmiayi.

Jiripi Yus-Chichaman etserkiamiania nu

²⁶ Tura Yus ni suntarín nayaimpinmaya Jiripincha akuptukmiayi. Niisha chicharuk tímiayi “Wátskea. Juya jíinkim Jerusarénumia jintia Enkasa péprunam wea nuní weme, anaraanj wetá. Nú jintiaka atsamu nunkanam nankaamawai” tímiayi.

²⁷ Tutai Jiripisha wémiayi. Jintia wesa Itiupianmaya áishmankan wáinkiamiayi. Nú áishmansha Itiupia nunka akupniurín, ni naarí Kantasen takarniuyayi. Kantaseka núwuyayi. Tura nu áishman ti neka asa nuna kuítrín írniuyayi. Nú áishmansha Yusan áujsatay tusa Jerusarénum wéu wáketmiayi.

²⁸ Karetanam enkemar wesa, Yusa etserniurí Isayas aarmia nuna aujki wémiayi.

²⁹ Wats, Jiripi nú jintianam wékui, Yusa Wakaní nin tímiayi “Nú kareta amayáta.”

³⁰ Tura Jiripisha amayán, Yusa etserniurí Isayasa áarmarín áujun antuk, chicharuk “¿Aujeamna nu nekamek?” tímiayi.

³¹ Tutai nú áishman tímiayi “¿Itiurak nekaataj? ¿Yaki jintintruat?” tímiayi. Tura antsu iijjai wetái tusa, Jiripincha enker jukimiayi karetanam.

³² Nu papí áarman áujmia nu júuyayi: “Murikiua áitkiasan jákatniunam júkiarmiayi. Tura uchich murik, ure tsúpiram chichaatsna núnisan niisha chichakchamiayi.

³³ Nincha iniatsáramiayi. Túrasha penké chichamnaka tútsuk tsankamakmiayi. Niisha nunkanam iwiaaku pujá maamu asamtai, ¿yaki nuna áujmatkat?” Nuní arma ámiayi.

³⁴ Kantase takarniurí Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniurí nínikik túmama? ¿Chikichnash ta?” tímiayi.

³⁵ Nuyá Jiripi nu aarman áujtus “JuKa Jesusnan tawai” tímiayi. Tura nú arantcha Yus-Chichaman ujakmiayi.

³⁶ Nuyá entsa ámanum nankaamak áishman Jiripin chicharuk “Juí entsá jeaji. Wikia juí imianchamniakaitiaj” tímiayi.

³⁷ Tutai Jiripisha tímiayi “Tuke enentáimjai Jesus nekas enentáimtakminkia túramniatjame.”

Tutai áishman chichaak “Ee nekasaiti, Jesukristuka Yusa Uchirínti tajai” tímiayi.

³⁸ Tura, karetan awajas mai jíinkiar entsá wearmiayi. Nu Jiripikia Kantase takarniurín imiainiayi.

³⁹ Tura kukar jíinkiar matai Uunt Yusa Wakaní Jiripinkia jukimiayi. Tuma asantai Kantase takarniurjsha Jiripin wáinkiachmiayi. Túrasha nínkia waras wémiayi.

⁴⁰ Jiripisha jeachat Asutu péprunam wantinkiamiayi. Tura nuyá jíinki péprunam nuí wayá, nuí wayá Yus-Chichaman etserki we, Sesaria péprunam jeamiayi.

9

Sauru Jesusan umirkamiayi

(Túramurj 22.6-16; 26.12-18)

¹ Nuna tumaj, Jerusarénum Uunt Jesusan umirkarmia nuna máataj tusa áujmattan Sáuruka penké iniaichamiayi. Tuma asa Israer-patri uuntri iyutaj tusa werimiayi.

² Tura jeari tímiayi “Papi ame naarmjijai áaram surusta. Wi nuna papi jukin timiaj Tamasku péprunam jean, Israer-shuar iruntainiam wayattajai. Túran nú papijijai Jesusan umirkaru ainia nuna, nánkamsan achikiartatjai. Túran áishmanasha nuwancha achikian jinkian, juí Jerusarénum enkeataj tusan ikiaankattajai” tímiayi.

³ Tura papi susam Sauru jintiá wéai, Tamasku péprunam nuntumsaj nuí aya aneachma nayaimpinmaya tsáapin jíitsumir téntakmiayi nin.

⁴ Túrunamtai Sauru nuńká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukamtai yajauch awajtustaj tusam imiá pataaturam?” tímiayi.

⁵ Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wí aents pataatamna nuí, amek enentáimin yajauch awajmamsame, waaka sankanmiak numin ijiuma núnísmek” tímiayi.

⁶ Nuyanka Sauru sapijin kuraníki tímiayi “Nuńkia Uunta, ¿wi warinia iturkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nuí jeawakmin ame túratamna nuna turamiartatui” tímiayi.

⁷ Tura Sáurujai irunar wearmia nu, chichaamun antukarmiayi. Tura áentsnaka penké wáinkiacharmiayi. Tuma ásar ti ashankarmiayi.

⁸ Nuyá Sauru nuńká tepá nantakmiayi. Tura wáinmaktaj tukamá wáinmakchamiayi. Tuma asantai chikich shuar uwejnium enkekiar júkiarmiayi Tamaskunam.

⁹ Nuí jeá menaintiu tsawant íimtsuk tura yurumtsuk penké úmutsuk pujumiayi.

¹⁰ Nuí Tamaskunam Yus-shuar Ananías ámiayi. Nin mesekranam Uunt Jesus tímiayi “Ananías.”

Tutai “¿Warí wakeram, Uunta?” tímiayi.

¹¹ Nuyá Uunt Jesus tímiayi “Wajakim jintia, Naka tutaiya nuí wetá. Nuísha Jutasa jeen jean, Társunmaya Sáurun eaktaj tusan winijjai, titiá, tímiayi. Niísha Yúsán áujuk pujawai.

¹² Tura júna mesekranam ipiatkamjai Sáurun. Aishman wayá ni uwejejáí ántiawai, ataksha ímit tusa. Nú áishmanka ámetme, Ananías” tímiayi Jesus.

¹³ Táman antuk Ananías chichaak “Túrasha Uunta, ju áishman ame áentsrumin Jerusarénum ti yajauch awajchakait. Ni yajauch túramurín ti untsurí aents ujataniawai, tímiayi.

¹⁴ Tura yamaisha Israer-patri chicharnium papirín takakui. Tura nujai ame náarmin páchiaj nuna achik jukitiaj tusa tímiajajsha tarutramji” tímiayi Ananías.

¹⁵ Tutai Uunt Jesus tímiayi “Áankisha wetá. Ju áishmankan winia etserniur atí tusan achikjai Wi. Niísha Israer-shuarchancha tura kapitániasha tura Israer-shuarnasha wínian etserin átatui, tímiayi.

¹⁶ Tura Sauru winia náarun páchia asa ti wáitsattana núnaka nin iniaktustatjai” tímiayi Jesus.

¹⁷ Tura Jesus táman umirak Ananías Sauru pujamunam wémiayi. Tura jeari wayá uwején awantas tímiayi “Yatsuru Sauru, Uunt Jesus jintiá wantinturmakmamna nusha ame ataksha ímit tusa, tura Yusa Wakanísha enentáimin pimiutramkat tusa winia akuptukai” tímiayi.

¹⁸ Nu chichamaik ni jíiyá namaká saepeya áanian iniaarmiayi. Túrunamtai ataksha íimmiayi. Túruna wajakí we imianmiayi.

¹⁹ Nuyasha yurumámiayi. Tura yurumásha kakaram ajasmiai. Tura Yus-shuarjai Tamaskunam wárumchik tsawant pujusmiayi.

Sáuruka Tamasku péprunam Yus-Chichaman etserkiamiania nu

²⁰ Nuyanka Sauru Israer-shuara iruntairín wayá Jesusa túramurín etserkamiayi. Etseruk tímiayi “Nekasaiti, juí Jesus Yusa Uchirínti” tímiayi.

²¹ Nuna ashí anturú pujuiniaka “¿Ausha urukakua aania? tiarmiayi. Entá ju áishmansha Jerusarénum Jesusan enentáimtuinian ti pataatimia núchakait. Tura tímiajajsha nuna achik Israer-patri akupniurín jukitiaj tusa tamia núchakait” tiarmiayi.

²² Tura Sáurusha sapijmiatsuk etsermiayi. “Ju Jesus nekas áentsun Uwemtikniuiti” tu etsermiayi. Tura ti paant etserkui, Tamaskunmaya Israer-aents, nekaschaiti titiaj tukamá tujinkiarmiayi.

²³ Tura ukunam, Israer-aents Sáurun maatai tusar chichaman jurusarmiayi.

²⁴ Tura Sáurusha nu chicham jurusman nekamamiayi. Israer-aents pepru Jínmanum tuke tsawaisha, káshisha achikiar maatai tusar jintian akirtiarmiayi.

²⁵ Nuna antukar Yus-shuar Sáurun chiiknium kashi enkeawar itiararmiayi. Pepru tanishnum itiarar awemarmiayi.

Sáuruka Tamaskunmaya Jerusarénum wémiania nu

²⁶ Tura Sauru Jerusarénum jeá Yus-shuarjaí iruntrattsá wakerimiayi túrasha níñkia ashamiarmiayi. Sáurusha nekas Yus-shuar ajaschaiti tusar ashamiarmiayi.

²⁷ Túmainiañ Pirnapí Jesusa akatramurí matsatmanum jukimiayi Sáurun. Tura nuí ejé tímiayi “Ju Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarín etserkaiti” tímiayi.

²⁸ Tura Sauru Jerusarénum juákmiayi. Tura Yus-shuarjaí irunar pujumiayi.

²⁹ Nuyasha Yus, etserkata tutai, sapijmiatsuk Jesusa túramurín etsermiayi. Tura Israer-shuar Kriaku chichaman chichau ármia nu, nuí pujuarmiayi. Sáurusha nu shuarjaí áujmatsarmiayi. Túrasha nu shuar Sáurun itiuur máatjik tusar chichaman juruarmiayi.

³⁰ Tura Yusaí yachi ármia nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi.

³¹ Tura Jutianmaya, Kariréanmayasha, Samarianmayasha Yus-shuar shiir tímiajnisán ajasar kakaram ajasarmiayi. Yúsan ashamainia ásar, tura Yusa Wakaní yayamu ásar kawenki kawenki wearmiayi.

Pítuor Eneasan yáñmiania nu

³² Tura Pítuor Yusaí yachi armiania nuí iráa wekaimiayi. Wekaak Yus-shuar Rítianam matsarmia nuísha iraumiai.

³³ Nuísha Rítianam jeá áishmañkan Eneas náartinian wáinkiamiayi. Niisha emearu asa wekaicha uchu uwi aya tépenuyayi.

³⁴ Tura Pítuor chicharuk “Eneasa, Jesukrístu tsuármawai. Nantaktia. Tura esekmatairam iwiarata” tímiayi. Tutai Eneas nu chichamaik nantakmiayi.

³⁵ Nuna túman wáinkiar Rítianmaya aents tura Saruñmaya aencha enentáimprar Uunt Yusan nemarsarmiayi.

Nuwá Túrkas nantakmiania nu

³⁶ Túrasha Jupe péprunam nuwá Yus-shuar pujuyayi, ni naari Tapitia. Tura nusha Kriaku chichamjañkia Túrkas tuiniawai. Nu nuwasha nuí pujus tuke péñker túriniuyayi. Tura niisha nútiksáñ yaj wémiayi.

³⁷ Nu tsawantunik Túrkas sunkuran jateemak jakamiayi. Túrunamtaí ayashin nijiarar yakí tesaamunam áepsarmiayi.

³⁸ Jupe péprusha Rítianmaya tíjuuch ámiayi. Júpenmaya Yus-shuar Rítianam Pítuor pujan nekaawar jimiará áishmañkan akatrar akupkarmiayi, Júpenam wari winití tusar.

³⁹ Nuí tutai Pítuor níjiaí wémiayi. Tura támatai jaka tepemia nuí awayáwarmiayi. Nuí wayamtaí waje pujuarmia nu útkiar Pítrun téntakarmiayi. Túrawar pushirín, Túrkas iwiaaku pujus najankamia nuna iniaktusarmiayi.

⁴⁰ Nuyanka Pítuor aá akupkarmiayi ashí. Tura niisha níñki tikishmar Yúsan áujsamiai. Nuyasha nuwán jaka tepaan iis tímiayi “Tapitia nantaktia.” Tutai niisha íimi Pítuor wajaan wániak nantaki pujusmiayi.

⁴¹ Tura Pítrusha nuwán uwejnium achik awajkimiai. Tura iniais Yus-shuar ármia nuna tura wajencha untukar Túrkas iwiaaku ajasun iniaktusarmiayi.

⁴² Nu túrunamun ashí aents Jupe péprunmaya nekaawarmiayi. Túrawar untsurí aents Uunt Jesusan umirkarmiayi.

⁴³ Tura Pítruka Jupe péprunam untsurí tsawant nuapen-iwiarin Semunka jeen pujusmiayi.

10

Pítuor Kurniriujaí

¹ Sesaria péprunam Kurniriu naartin suntara kapitíantrí pujumiayi. Ni suntari Itiaria nunkanmaya ármiai.

² Nu kapitían Kurniriu ni shuarjiaí, Yuska nankaamantuiti, tu enentáimtiarmiayi. Tuma ásar Yúsan enentáimtin ármiai. Tura nútiksáñ kuñniasha takakchan yáigtaí tusa Israer-shuaran súuyayi. Tura tuke tsawant Yúsan áujtiniuyayi.

³ Chíkich tsawantaj, nantu aan̄ku ajasaj Kurniriu ímiarmiayi. Yusa suntarj Yus nayaimpinmaya akupkamu, ni pujamunam utuá “Kurniriuá” tímiayi.

⁴ Kurniriuá tutai, Yusa suntarj in ashamak ímia pujumiayi. Tura “¿Warimpiait, Uunta?” tímiayi.

Tutai Yusa suntarj tímiayi “Ame seamun Yus anturtamkai. Tura atsumainia nu yayakmin Yus shiir enentáimturmawai’ tímiayi.

⁵ Tura Yusa suntarj Kurniriuun tuke chicharuk “Wats, áminiuram Júpenam akupkata. Semun, chíkich naarij Pítiur, tatí tusam akuptukta, tímiayi.

⁶ Nu Semunsha chíkich Semunjaj pujawai. Nuka nuapen-iwiarin Semun̄kaiti. Tura ni jeesha nayaantsanam ayaamach pujawai, tímiayi. Nūj jeawakmin, ame túratamna nuna Semun̄ Pítiur turamtatui’ tinia ikiukmiayi.

⁷ Tura Yusa suntarj waketkintai, Kurniriuka ni takarniurj in jímieran itiamiayi. Tura suntaran chíkichkiniak nemarsat tusa itiamiayi. Nu suntar ni írutramuriyayi. Tura Yúsan enentáimtinuiyayi.

⁸ Kurniriusha ni túrunamurj in ashí ujáa-já awajas Jupe péprunam akupkarmiayi.

⁹ Kashin tsawantaj Kurniriu suntarj Júpenam nuntumsaraj, tutupin aj Pítiur jeá yakí wáakunam Yúsan áusatajtsa wakamiayi.

¹⁰ Pítrusha ti tsukamak yurumátaj tusa wakerimiayi. Túrasha yurumkan iniarainiaj Pítiur íkijajtiusmak,

¹¹ nayaimp uranmianum wan̄karam tarachia áanin tura nuna tsakarj in jin̄kiakman tárún wáinkiamiayi.

¹² Nu tarachnium yajasma irunmiayi. Wekainiusha, nanamtincha, tura napisha en̄kemiarmiayi.

¹³ Tumaj Yus Pitrun chicharuk “Pitru, wajakim maam yuata” tímiayi.

¹⁴ Tutai Pítiur tímiayi “Atsá Uunta. Ii Israer-shuartikia yajauch yajasma áinia nu tura yúatin surimkiamu ana nuka pen̄ké yúchaitji. Tuma asantai júnaka wikia yuashtatjai” tímiayi.

¹⁵ Túrasha Pitrun atak Yus chicharuk “Wi, pen̄keraiti, tájana nu, yajauchiiti, tiip” tímiayi.

¹⁶ Nuka menaintiú túrunamiayi. Tura nuyasha tarach ataksha nayaimpiniam wakamiayi.

¹⁷ Nuna túrunan wáiniak Pítiur wariniak áaniuncha wáinkiaj tusa enentáimia pujaj kapitíán Kurniriu ayakma armia nu, anintruiniak jeawariayi.

¹⁸ Tura jeawar kakantar untsummiar “¿Semun, Pítiur, juin̄ pujá?” tiarmiayi.

¹⁹ Tura Pítruka ímiarmarj in tuke enentáimia pujaj Yusa Wakanj chichaak “Menaintiu áishman̄ untsurmainiawai, tímiayi.

²⁰ Wajakim akaikim arantusuk au nemariarta, Wi akupkamu asantai” tímiayi.

²¹ Nuna antuk Pítiur taramiayi. Tura áishman̄kan Kurniriu akupkamia nuna wajainian wáiniak “Wiitjai Pítiur. Átum ēatrumna núitjai. ¿Warí tarintrum?” tímiayi.

²² Tutai niisha tiarmiayi “Iisha kapitíán Kurniriu akupkamu tají. Kurniriuka áishman̄ pen̄keraiti. Yúsan enentáimtiniaiti. Tura Israer-aencha nin shiir enentáimtuiniawai. Nīiya winiaji, tiarmiayi. Kame nuik, Yusa suntarj, nayaimpinmaya akupkamu, ii kapitíántrj in tímiayi “Pitrun untsukát akupkata. Nii tatí. Tura nii títiatna nu pen̄ker anturkata” tímiayi. Nuna ii kapitíántrj in takui iisha winiji” tiarmiayi.

²³ Tutai Pítiur jeá awayámiayi. Tura nu kashi nūj kanarmiamiayi.

²⁴ Kashin tsawarar Pítiur niijaj wearmiayi. Túrasha Júpenmaya Yus-shuarsha nin nemariarmiayi.

²⁴ Nuyá tsawarar Sesaria péprunam, Kurniriu nákamun jeariarmiayi. Kurniriuka ni shuarj in tura ni nekas amikrj in, nekaatarum tusa untsuk ikiaankamiayi.

²⁵ Tura Pítrusha jeamtai Kurniriu āa jiiintiuki Pitrun tikishmankamiayi.

²⁶ Túrasha Pítiur awajki tímiayi “Wajaktia. Wisha aya áentsketjai. Ámea núniketjai” tímiayi.

²⁷ Tura chichasar jeá wayawarmiayi. Tura wayá, untsurj aents matsatun wáinkiamiayi.

²⁸ Nuyá Pítiur chichaak tímiayi “Amikrua, atumsha nékarme. In Israer áentstinkia, chíkich áentsjaj pachiniarchatniuitrum, tura ni jeencha wayashtiniaitrum in jintintramin turamainiaji, tímiayi. Túrasha Yuska ni enentáimsamurj in winiaka paant iniaktursayi. Túmaitkiui wikia nánkamas áentsun yajauchiiti, tura auka wapikiaiti, tíchamniaitjai, tímiayi.

²⁹ Tuma asantai, untsurkurmin, páchitsuk winimjai. Túmaitkiui nekaataj tusan wakera-jai. ¿Urukamtai untsurkamaram?” tímiayi.

³⁰ Tutai Kurniriu tímiayi “Kuatru tsawant nan̄kaamasaj tura nantusha juni aj, wikia yurumtsuk Yúsan áusamjai, kjaraj áusatin ana nuna. Túran chichaj, áishman̄, ni entsatairj in wincharpatniun, naka wajatran wáinkiamjai, tímiayi.

³¹ Niisha chichartak turutmiayi “Kurniriu, Yus ame áujman anturtamkayi. Tura shuar atsumainia yáigmamna nunasha nekarmayi, turutmiai, tímiayi.

³² Tuma asamtai, Jupe péprunam akatramuram akupkata. Semun Pítrun itiatí. Nu Semun Pítrusha, chíkich Semunjai pujawai. Nuapen-iwiarin Semunkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi.

³³ Túrutkui, wi umikian áentsun wárikmasan ámin akuptukjame utitia tusan. Tura nékasen taume. Tuma asamtai iisha juí Yus ímmianum pujuinai. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

Kurniriu jeen Pítiur etserkamia nu

³⁴ Nuyá Pítiur chichaak “Ayu. Yus ímmianum ashí aents métekrak ániawai nekas nékajai, tímiayi.

³⁵ Antsu ashí nunkanam nánkamas aents Yúsán umirak péñker tura nuna, Yus nú aentsun shiir enentáimtai, tímiayi.

³⁶ Yuska shiir chichaman Israer-aentsun akuptukmiayi. Nuí chichaak “shuar Jesukrístu naarin páchiakka, Yusjai nawamnaikiatin átiniaiti, tímiayi. Nú Jesukrístu ashí shuara Úuntrinti’ tímiayi Yus.

³⁷ Túrasa Kariréa nunkanam nánkamak ashí Israer nunkanam túrunamia nu paant nékarme. Imiakratin Juaj imiaak etserak amukmia nú tsawantin nánkamamiayi.

³⁸ Tura juísha nékatsrumek, tímiayi. Nasarénumia Jesús, Yus Anaikiamu asa, Yusa Wakaní kakarmaríjajai péñker túrinuiyayi. Iwianchruku wáitias pujuarmia nuna péñker awajsamiayi. Yus Níin pujurma asa ashí nuna túrinuiyayi.

³⁹ Tura Israer-aents matsatkamun tura imia Jerusaréñ péprunmasha Jesús túramia nu, iisu asar, iisha étsereaji. Tura ayu, Nin achikar krúsnum máacharmakia, tímiayi.

⁴⁰ Tura menainti tsawant jeamtai Yus Nin iniantkimiayi. Tura ataksha iwianttiur-tamkachmakaj’, tímiayi.

⁴¹ Ashí áentsnumka wantinkiachmiayi. Antsu íniak nuik, etserin atarum tusa Yus achir-makmij nu áentstiniak wantinturmakmijai, tímiayi. Au nekas jakamunmayá nantakmi-atai iisha Níijajai tsaninkiar yurumámji, tímiayi.

⁴² Tura Jesussha in akuptamkaij. Jesuska “Wíitjai Yus Anaikiamun, tímiayi. Ashí áentsun, juka makuumawai, túrasa juka makuumatsui, Wiki títiniaitjai. Kame ashí áentsun, jaka áinia nuna tura iwíiaaku áinia nunasha, Wíkiitjai nuna títinian” tímiayi Jesús. Nusha átum werum ujatruktarum, Jesús turammaji, tímiayi.

⁴³ Ya shuarak Jesusa náarin pachia nú shuarnaka tunaarin tsanukurattawai, nuna ashí Yúsán etserniusha yaunchu etseriarmiayi” tímiayi.

Israer-shuarchan Yusa Wakaní tarurarmiania nu

⁴⁴ Tura Pítiur tuke chichaak pujaj, tura chikichcha antúu pujuinai Yusa Wakaní tarurarmiayi.

⁴⁵⁻⁴⁶ Tuma ásar ankant ankant chíkich chichamjai chichasarmiayi. Túmainiak, Yus ti péñkeraiti, tiarmiayi. Tura Israer-shuar, Yus-shuar armia nuka Pítrujajai táarmia nu, nuna antukar ti enentáimsarmiayi. Maa, Yusa Wakanísha Israer-shuarcha áinia nunasha tarurcharaik, tu enentáimsarmiayi

⁴⁷ Túmakui Pítiur chichaak “¿Yaki surimkiat ju aents imiantinian? Warí nincha ínia áintsan Yusa Wakaní tarurcharaik” tímiayi.

⁴⁸ Nuyá Pítiur, Jesukrístu náarin imiantiarum tusa akupkarmiayi. Tura nuyasha Pítrunka, níijajai ishichik tsawant pujustinian seawarmiayi.

11

Ni túrunamurín Pítiur ujakmiania nu

¹ Israer-shuarchasha Yusa chichamen umirkarai táman Jesusa akatramurísha tura Jutíanmayá Yus-shuarsha antukarmiayi.

² Túmainiak Pítiur Jerusaréñnum jeamtai, Israer-shuar Yus-shuar ármia nu chichainiak

³ “¿Urukamtia Israer-aents ániachusha iyumam? ¿Tura aujaj tsaninkiam urukamtai yurumámum?” tiarmiayi.

⁴ Tutai Pítiur ashí yámankamtaiknumia túrunamun ujakmiayi.

⁵ Chichaak tímiayi “Wikia Jupe péprunam pujumjai. Tura nuí Yusan auju pujusan ímiarmajai. Tura wanakaram tarachia áanin kuaru tsakarín jinikiakma, nayaimpinmayá táarun wáinkiamjai. Tura wi pujamunam jeartimiai, tímiayi.

⁶ Tura nuí iyaj tukaman inít yajasman, napincha, nanamtinnisha enketainian wáinkiamjai, tímiayi.

⁷ Tura chichaman antukmajai “Pítru wajakim maam yuata” túrutun antukmajai, tímiayi.

⁸ Túrutkui “Atsá, Uunta, áanin wapiknaka, Israer-aents yuatin surimkiamu ana núnaka tuke yúchaitjai” tímiayi, tímiayi.

⁹ Atak nuyá túrutuk “Wi, péñkeraiti, tájana nu, ámeke, yajauchiiti, tiip” turutmiai, tímiayi.

¹⁰ Nunasha menaintiú túrunan wáinkiamjai. Túruna nayaimpiniam mash waketkimiái, tímiayi.

¹¹ Nuĵ túruna pujaj menaintiú áishmañ Sesarianmaya akupkamu, winia eġainiak wi pujamunam tarutiarmiái, tímiayi.

¹² Tura nuĵ Yusa Wakanĵ chichartak “Arantutsuk aujaj wetá” túrutkui, wémajai. Tura ju sais Yus-shuarjaj wi wémajai. Túrunar ashinĵiar Kurniriu jeen wayamĵi, tímiayi.

¹³ Niisha chichaak “Jearuĵ Yusa suntarĵ nayaimpinmaya taa wajan wáinkiamjai, tímiayi. Tura niisha chichartak “Jupe péprunam Semuñ Pítiur tatí tusam áishmañ akatram akupkata.

¹⁴ Pítrusha taa, itiura aimesha tura áminiurmesha tunaarminia uwemprattam nuna turam-tatui.” Yusa suntarĵ nuní turutmiayi” tu uĵatkamiayi Kurniriu’ tímiayi.

¹⁵ “Wi chichastasan júaraj, Yusa Wakanĵ tarurarmiayi, yámankamtaik in tarutrampramĵaj nútiksañ, tímiayi.

¹⁶ Nuñkia Uunt Jesus timian enentáimpramjai. Niisha tíchamka “Juan entsajain imiakratmiayi. Tura antsu Yusa Wakanĵkia imiantinia áintsañ atumí enentáin enkemprutmattarme.” Nu timian enentáimpramjai, tímiayi.

¹⁷ Atumsha enentáimpratarum. Uunt Jesukrístu umirkamĵaj nuĵ, incha Yuska ni Wakanĵin suramsamĵaj. Tura in suramsamĵaj núnisan Yus nincha ni Wakanĵin súsararmiayi. Nuna tura asamtai, wikia, túrashiniaiti, Yúsán títinkiaitiaĵ” tímiayi Pítiur.

¹⁸ Tura Pítiur taman antukar mitiat wáinkiar “Nekasaiti, Israer-shuarchancha ni enentáin yapajíawarmatai tuke iwiaaku átinian Yuska nin súsaruiti” tiarmiayi. Tusar Yusa náarin tí shiir awajsarmiayi.

Yus-Shuar Antiukía péprunam wearmiania nu

¹⁹ Estepañkan máawarmia nuĵ, chikich Yus-shuarnasha maatai tusar pataatiarmi-ayi. Túram chikichkia pisarar Pinisia nuñkanam, Chipri nuñkanmasha, tura Antiukía péprunmasha wearmiayi. Tura nuĵ jeawar Yus-Chichaman chikichnaka uĵatsuk aya Israer-aentsnak uĵakarmiayi.

²⁰ Tura niĵaj Chipri nuñkanmaya pisararmia nu Serini nuñkanmayasha Yus-shuar ármiai. Nuka Antiukíanam jeawar Israer-shuarchan Uunt Jesusa túramurĵin uĵakarmiayi.

²¹ Tura Uunt Jesus ikiakárma ásar, nú nuñkanmaya aents tí untsurĵ yaunchu túrutairĵin iniaisar Jesusan enentáimtuiniak Yus-shuar ajasarmiayi.

²² Tura nu chichaman antukar, Jerusaréñnumĵa Yus-shuar, ame iyutá tusar, Pirnapín Antiukíanam akupkarmiayi.

²³⁻²⁴ Pirnapísha jeá, Yus nú shuaran uwentikarma nuna wáiniak warasmiai. Pirnapísha péñker áishmanĵauyayi. Yusa Wakanĵsha pimiutkamuyayi. Tura Yúsán nekas umirkauyayi. Tuma asamtai nu shuaran mash jintintianiak chicharuk “Tuke enentáimĵaj umirkarum Yus nemarsatarum.” Tu chicharak ikiukmiayi. Tura nuĵsha nú arant untsurĵ aents Yusaj kawenĵkarmiayi.

²⁵ Nuna turasua amik Pirnapí Tarsu péprunam wémiayi Sáurun wáinkiaĵ tusa. Tura wáiniak Antiukía péprunam jukimiayi.

²⁶ Tura nuĵ jeawar, nú péprunmaya Yus-shuarjaj iruntrar chikichík uwí pujusarmiayi. Yus-Chichaman untsurĵ shuáran uĵaak pujuarmiayi. Tura nuĵ Antiukía péprunmanĵka Yus-shuaran émkaka, Kristu shuarĵ, tiarmiayi.

²⁷ Nuyá Yusnan etserin Jerusaréñnumĵa táarmiayi Antiukíanam.

²⁸⁻³⁰ Túmainiaĵ chikichík etserin, ni naarĵ Akaapu, Yus-shuar matsatmanum ajapén wajakí chichasmiai. Tura Yusa Wakanĵ nekatairĵĵaj chichaak “Tí tsuka ashí núnkanam átatui” tímiayi. Tuma asamtai Antiukíanmaya Yus-shuar chichainiak “Jutía nuñkanmaya Yus-shuar ainia nu yáintai” tiarmiayi. Anĵkant anĵkant ni wakeriarmia núnik súsararmiayi. Tura nú kuítniasha Jutíanmaya Yus-shuara úuntrĵin akuptukarmiayi. Pirnapísha Sáurusha nú kuítian júkiarmiayi. Tura Akaapu timia núnisan túrunamiayi, akupin Krautiu pujaj.

12

Pitrun sepunam enĵkawarmiania nu

¹ Nu tsawantaj akupin Erutis Yus-shuaran máataĵ tusa chichaman jurus áentsrĵin ishiak-miai.

² Tura Juanĵka yachĵin Jakupun suen tsupirkar máawarmiayi.

³ Nuna tura máawarmatai Israer-aents wáinkiar “juka péñkeraiti” tiarmiayi. Erutissha nuna antuk, Pítrusha achikrum itiatarum tusa akupkarmiayi. Núnaka wakapruachu tanta yuatĵin nampertĵin túrawarmiayi.

⁴ Pítruncha achik itiarmatai, Erutis sepunam enĵkeata tusa akupkamiayi. Tura sepunam suntarsha anĵkant anĵkant, kuaru kuaru, ashikía tiasisáis (16) irunar Pitrun téntakarmiayi.

Tura, ju jísat nan̄kaasmatai, mantamnatí tusan jiīk̄iatjai aents iruntramunam, tu enentáimsamiayi Erutis.

⁵ Túramu asa Pítruka sepunam pujumiayi. Tura suntarsha mijiatrutsuk iyarmiayi. Túramunak Yus-shuarka, Pítrun yáin̄kiat tusar iniaitsuk Yúsan ti áujarmiayi.

Yusa suntarj Pitrun uwemtikramiania nu

⁶ Wats, Erutis, kashin jiīk̄iatjai takui, nú kashi Pítruka jimiará suntar wajamunam etema tepes kanarmiayi. Tura jimiará jirujai jin̄kiamuyayi. Tura chíkich suntarka jin̄manum ii wajarmiayi.

⁷ Tumai aya aneachma Yusa suntarj nayaimpinmaya taa ajapén wajasmiayi. Túrunamtaí jeanman̄ka tsáapin ajasmiayi. Tura Yusa suntarjsha Pítrun páenum antin̄ ishintiarmiayi. Tura jirusha Pitru uweyéya sayat atiniamiayi.

⁸ Tura Yusa suntarj tímiayi “Kaki emenmamata. Túram sapatrumsha aweekata” tímiayi. Tutai Pítiur túramiayi. Nuyá chichaak “Pushiram entsarta. Túram nemartusta” tímiayi.

⁹ Tutai Pítiur nemarsamiayi. Túrusha Pítruka, mesekranmaapi júniája, tu enentáimsamiayi.

¹⁰ Túrusha emka suntar íimia wajan nan̄kaikiarmiayi. Tura nuyasha chíkich suntar íimia wajan nunasha nan̄kaikiarmiayi. Tura nuyasha jíintianium jiru waiti ámanum jeawarmatai, nú wáitisha íimia-nin̄ki kuat uranmiayi. Túrunamtaí jíinkiarimiayi. Tura jintiá ishichik wésan, Yusa suntarj Pitrun níiniak ikiukmiayi.

¹¹ Túram Pítiur enentáimiar tímiayi “Yamaikia nékajai. Mesekranmachuiti. Antsu Uunt Yus ni suntarin̄ nekas akupturkayi. Erutis mantuataj tusan pujurtana nuyá Yusa suntarj winia uwemtikrurai. Tura Israer-aents túrutatajtsa wakierarmia nuyasha uwemtikrurai” tímiayi.

¹² Nuna tu enentáimias nekáa, Marí jeen wémiayi. Nú Marisha Juan Márkusan nukuríyayi. Nú jeanam untsurí aents irunar Yúsan auju matsatain̄iaí Pítiur jeamiayi.

¹³ Tura jeá aa wáitin tuntuimiayi, wayataj tusa. Túmakui nuwá uchich, ni naarj Ruti, yákit tusa iyumiayi.

¹⁴ Tura jeari, Pitru chichamen anturak ti shiir enentáimsamiayi. Túmak wáitin urattsuk ikiuki, inít matsatainian werí “Pítiur taa wáitiniam wajaawai” tímiayi.

¹⁵ Tutai “Wáurtsmek” tiarmiayi.

Tútaisha núwaka “Atsá nekasaiti” tímiayi.

Tútaisha nú arant “Níichuiti. Antsu ni wakaní túratsuash” tiarmiayi.

¹⁶ Tu chichainiajn̄ Pítruka tuke tuntuí wajamiayi. Tura wáitin uraj tukamá Pitrun wáinkiar ashamkarmiayi.

¹⁷ Ashamak chichainiakui Pítiur, uweje takuí itiatmamtiarmiayi. Tura nuyá Uunt Yus sepunmayan uwemtikramun ujakmiayi. Tura “Ju chicham Jakupu tura chíkich Yus-shuarsha ujaktarum” tímiayi. Nuna ti iniais jíinki arant wémiayi.

¹⁸ Kashin tsawar suntarsha Pítrun atsá wáinkiar “Chuwa urukakua men̄kaka. Áyawa urukattajia” tiarmiayi. Pítiur túrunamun nékachu ásar nuna tiarmiayi.

¹⁹⁻²⁰ Túrunamtaí Erutis chichaak Pítiur eaktarum tusa akupkarmiayi, túrusha wáinkiacharmiayi. Túrunamtaí Erutis suntan untsukar, Pítrun íisarmia nuna aniasarmiayi “¿Pítiur ititara men̄kakama?” tímiayi. Niisha áimainiachkui, nu suntan mantámnatí tusa akupkamiayi.

Erutis jakamiania nu

Erutissha Tirunmaya tura Setúnmaya áentsjaísha nemasnaikiarmiayi. Túmayatan Jutía nun̄kan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tíjiuchiiti. Setúnmaya aents Tirunmaya áentsjai Erutisa nun̄keyan yurumkan súmainia ásar, Erutisjai nawamnaikiatniun wakierarmiayi. Tuma asamtai métekrak enentáimsar, Erutisa takarniurí pen̄kerí, ni naarj Parastu, níijai emka amikmawar nuyá Erutisan weriar shiir matsamsatniun seawarmiayi.

²¹ Tuma asamtai tsawant jeamtai Erutissha akupin entsatai pushin entsarmiayi. Tura akupin pujutainium pujus áentsun ikiaan̄ak áujmatmiayi.

²² Nuí pujus chichaakui aents untsumainiak tiarmiayi “Ju chichaa pujana júka áenchaiti. Antsu nekaska yúsaiti” tiarmiayi.

²³ Tumai nuyajk Yusa suntarj nayaimpinmaya tari Erutisan jaa awajsamiayi. Tuma asamtai nusha aka yuam jakamiayi. Erutissha Yusan wauntu awajtsuk nin̄ki wauntu enentáimtuma asa túruna jakamiayi.

²⁴ Túrunamtaisha Yusa chichamen̄ka nú arant pampan̄ki wémiayi. Túmakí ashí núnkanam anturamiayi.

²⁵ Tura Pirnapísha Sáurusha ni takatr̄in amukar Jerusarén̄numiá Antiukíanam wake-tainiak Juan Márkusan júkiarmiayi.

13

Yus-Shuar Pirnapíncha Sáuruncha Yus-Chichaman etserkarat tusar akupkarmiania nu

¹ Antiukíanmaya Yus-shuarnum Yusnan etserin páchitra ármiai. Nútiksán Yus-Chichaman jintinnurjsha ármiai. Pirnapísha tura Mukusa Semunsha, nuyá chíkich, Serinianmaya Rúsiusha tura akupin Erutisa tsakatkesha, ni naarj Manaen, Sáurusha tímianu ármiai.

² Tura chíkich tsawantá niisha yurumsuk Yúsán áujeak pujuiniáí Yusa Wakaní tímiayi “Pirnapísha, Sáurusha akanturkitiarum, tímiayi. Wi takatan súsaitjiana nuna takasarat tusarum túratarum” tímiayi.

³ Tutai ijiarma Yusán aujsua amikiar, shiir wetarum tusar ni uwején Sáurun Pirnapíncha awantkarmiai. Túrawar Antiukíanmaya akupkarmiai.

Chipri nunkanam jeawarmiai

⁴ Tura nuyánka Yusa Wakaní akupkam Pirnapísha Sáurusha jíinkiar Serusia péprunam jeawarmiai. Tura nuyá uunt kanunam enkemprar Chipri nunkanam jeawarmiai.

⁵ Juansha yáintaj tusa némarkauyayi. Nuj Saraminia péprunam jeawar Israer-shuar iruntai jeanam wayawar Yus-Chichaman etseriarmiai.

⁶ Tura Chipri nunkanam pepru ainia nuj wáirkutak Papus péprunam jeawarmiai. Nuj jeawar Israer-aents uwishin ni naarj Parjesúsán wáinkiarimiai. Ni chíkich náarínkia Erimiasauyayi. Niisha uwishniuitiat, Yúsán étsereajai, tíniuyayi.

⁷ Akupin Serjiu Páurujai pujuyayi. Nu akupniusha ti pénger enentáimniuyayi. Tura Pirnapín Sáuruncha chichaman akuptukmiayi, taarti tusa. Kame Yus-Chichaman antuktaj tusa wakerak untsukmiayi.

⁸ Tura uwishin Erimias nuna nakitiak “Auka péngerchaiti” tímiayi. Akupniusha Yúsán umirkain tusa nuna tímiayi.

⁹ Nuyánka Sauru, ni chíkich naarj Papru, Yusa Wakaní pimiutkamu asa, nu uwishniun úamkemas iis tímiayi

¹⁰ “Ámeke wáitaitme. Anankartiniaitme. Yajauchiitme. Maaj, iwianchiitme. Tura ashí pénger ana nuka imiá nakitniuitme. Tsej, ¿urukamtai Yusa jintí naka ana nu emeskim weam?”

¹¹ Pajj, yamaikia Uunt Yus asutiámattawai. Yamaikia amesha jíimi kusurmatai untsurí tsawant tsáapnin penké iischattame” tímiayi. Tura nú chichamaik jíi kusurmatai kirit ímiuk chikichan eamiayi enkeki jurukit tusa.

¹² Nu túrunamtai akupin nuna wáinak, ti enentáimpramiayi. Túruna Uunt Yusa chichamen enentáimtur umikmiayi.

Chíkich Antiukíanam etserkarmiania nu

¹³ Nuyá Juan waketki Jerusarénnun wémiayi. Tura antsu Pápruka ni tsaniakmaríjiaí kanunam enkemprar Pápus pépruka ikiukiari Pirji péprunam jeawarmiai. Nusha amaini Pampiria nunkanam pujawai.

¹⁴ Nuyá Pirji péprun nankaikiar Antiukía péprunam jeawarmiai. Nú Antiukíasha Pisitia nunkanam pujawai. Nuj jeawar Israer-shuar ayampratín tsawantin, nuka sáwartin, Israer-shuar iruntai jeanam wayawar pujusarmiai.

¹⁵ Tura nuj Yus-Papiniun yaunchu áarman áujas aminkiamtai, Israer-shuar iruntai jeanam írniurí Páprun tiarmiayi “Yatsuru, jintíatin chicham takakkurmeka yamaik titiarum. Antukarmi” tiarmiayi.

¹⁶ Tutai Papru wajakí uweje takuimiayi. Tura chichaak “Israer-shuarterum, tura Yúsán umirkataj tusa wakerarmena nu antuktatum, tímiayi.

¹⁷ Ii Yusrí ii yaunchu uuntrin Israer-shuarterin achikmiayi. Tura niisha írara núnik Ejiptunam matsatainiáí Yuska nin páchiniak uunt awajsarmiai. Yus ni kakarmarijiaí nú nunkanmaya ii yaunchu uuntrin uwentikrarmiai.

¹⁸ Túrusha atsamu nunkanam ii uuntrin kuarenta (40) uwitin Yuska aya kátsuntramiai.

¹⁹ Tura nuyánka siati áentsun mátsakainian, Kanaan nunkanam matsamarmia nuna amukarmiai. Nú nunkan ii yaunchu úntrin susataj tusa Yus túramiai.

²⁰ Nuyánka ii uuntri akupniurín, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuaru siántu senkuenta (450) uwí ejemiayi. Samuersha Yúsán etserin náamtsáín nuna túrimiai Yús.

²¹ Tura nuyánka áencha juísán nakitiainiak, uunt akupin náamkat tusar Yúsán seawarmiai. Tuíniakui Yuska Sesa uchirín Sáuran anaikiamiayi. Nú Saúra úntrinikia Pinjamínkiauyayi. Tura Sáursha kuarenta (40) uwí nú áentsun akupkat tusa Yus tsakatkamiayi.

²² Tura Saúr náamkan ataksha Yus awainkimiayi. Tura nuyá iiksan nú nunkanam uunt akupin atí tusa Tawitian anaikiamiayi. Tura Yuska juna Tawitnian tímiayi “Isaí uchirín Tawitian winia enentáir jeamtai achirmakjai. Tura Winia umirtin átatuí” tímiayi.

²³ Wats, Tawit weeanmaya Jesusaiti. Tura Yuska Israer-aentsun Uwemtikrartinian Jesusan anaítuikmiayi, yaunchu timiarín uminkiát tusa.

²⁴ Jesuska táatsaín Juan ashí Israer-shuaran tunaaríniá enentáimtumar imiantinian ujakmiayi.

²⁵ Tura Juansha ni jákatniurj jeatemamtai, chichaak “Átum enentáimtarmena núchaitjai. Wikia Yusa anaikiamuri, Kristu tutai, nákarmena núchaitjai. Antsu Nínkia winia ukunmaruj winittiwai. Tura Niisha wíjiaínkia ti nankaamantu asamtai wikia sapatríncha atitratá tichammiaitjai” tímiayi.

²⁶ Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktaram. Ju uwempratin chichamka íniuiti, tímiayi.

²⁷ Iis, Jesusa túrunatniurj Yuska yaunchu ni etserniurjín áamtikrarmakia. Tura ukunam Jerusarénnumiá shuar ni akupniurjiaí tuke sáwartin nuna áujeatskesha penké nekaacharmiayi. Tuma ásar Jesuska Yusa Uchirínti ticharmiayi. Tura, jakatí, tiarmia nuj, Jesusa túrunatniurj, Yus yaunchu chichakmia nuna, tímiatrusaraj umikiarmiayi, tímiayi.

²⁸ Jesuska penké tunaamkachunak yamaikia mantamnatí tusar Piratun seawarmiayi, tímiayi.

²⁹ Tura Yusa Papirín ashí Jesusnan tímia nuna tímiannak umikiarmiayi. Tura nuyá krúsnumiá itiarar iwíarsarmiayi.

³⁰ Túramunak Yus jakamunmayan iniantkimiayi.

³¹ Jesuska jakamunmaya nantaki, yaunchu Kariréanmaya Jerusarénnum Niijiaí irutka wéarmia nuna núkap tsawantin pujus wantintuikmiayi. Nú shuaraiti yamaikia Jesusa túrunamurjín etserainia nu’ tímiayi.

³² Íisha núnsirik shiir chichaman Yus yaunchu ii apachrín tiarmia nu étsereaji.

³³ Íisha Israer-weeá asakrin, Yuska Jesusan iniantkímia nujai ii apachrín anajmatramia nuna yamá uminkiaiti. Kame Sarmu Jímiar papinium ju áarmaiti:

“Ámeke winia Uchiruitme.

Túmaitkiui yamaikia winia iwíaaakmar susamuitme.”

³⁴ Tura Yuska Jesusa nantakmiarjín jintintiaik, tura ni ayashí káurchatniun jintintiaik, chíkich Sarmu papinium juna áamtikramiayi:

“Nekas péñkeran Tawitian anajmatramaj nuna atumin amastatjai.”

³⁵ Tura nú arant, nú paant atí tusa, chíkich Sarmu papinium ju aarma awai:

“Yusa, ame Uchiram aneamna nuna ayashí káurtincha tsankatkashtatme.”

³⁶ Nekaatarum, yatsurtiram, Yuska Tawitia ayashín tichamiayi nuna. Tawitkia Yus tímian amuk jakamiayi. Túrasha ni ayashínkia káurmiayi.

³⁷ Tura antsu Yus iniantkímia nuna ayashínkia penké káurchamiayi.

³⁸ Tuma asamtai, yatsurtiram nekaatarum. Jesusjaínkete tunáa asakártin.

³⁹ Tura Muisais yaunchu akupkámia nujai tunáa tsankurnarchamnia nu, yamaikia Jesusjai tsankurnartiniaiti.

⁴⁰⁻⁴¹ Yúsnan etserin juna áarmiayi:

“Enentáimpratarum wishikkiartintiram. Ashamkatarum. Túrarum menkatumpratarum. Wí Yus asan, átum pujarmena nuj, aents túrachminian túratajna nusha penkesh nekaashtatrum, chíkich ujatmainiakuisha.” Tu áarmaiti.

Tuma asamtai yatsurtiram, aneatarum atumin nuna túrutmawajrum, Yusnan etserin aarma tana nútiksaj.” Nuna chichaak amukmiayi Papru.

⁴² Tura nuyá Papru Pirnapíjiaí jiinki wéenakui aents chichainiak “Chíkich sáwartincha jútiksarmek etserkatarum” tiarmiayi.

⁴³ Tura nuyá iruntsua tsenkeenak Israer-shuarsha, tura chíkichkia Israer ajarusha, Yúsan umirkatajtsa wakerarmia nuka, Páprun Pirnapíncha nemarsarmiayi. Niisha nu áentsun chicharuk “Yusa anenkrattairj enentáimtusum kakartarum” tiarmiayi.

⁴⁴ Tura chíkich sáwartinkia nu péprunmaya tí untsurj aents Yus-Chicham antuktai tusar tuakarmiayi.

⁴⁵ Tura Israer-shuarka ti untsurj áentsun tuakarun wáinkiar, suir iiniak, ti kajerarmiayi. Tuma asamtai Páprun katsekkar “Ju chichaana júka ántar tawai” tiarmiayi.

⁴⁶ Támaitiat Pápruka Pirnapíjiaí arantutsuk chichainiak tiarmiayi “Israer-aentstirmin, atumin emka Yus-Chicham ujaktiniuji. Túrasha átum támaitiatrum nakitramarme. Tura atumsha nakitia asarum, Yúsnun tuke iwíaku pujuschamnia ajasurme, tímiayi. Tuma asamtai iikia yamaikia Israer-aencha ujaktai tusar weraji, tiarmiayi.

⁴⁷ Nu túraratum tusa, Uunt Yus akuptamtsujik. Jes, ni Papirín juna tawai:

“Israer-shuarcha Winia nekarawarat tusan anaitiukjame. Tura ashí nunġkanmayá aents uwemprarat tusan akuptajme.”

Tu áarmaiti” tîmiayi.

⁴⁸ Nú chichaman antukar Israer-shuarcha ti wararsar “Uunt Yus tana nuka imiá pênkeraiti” tiarmiayi. Tura, tuke iwiaaku pujusmin armia nu Yus-shuar ajasarmiayi.

⁴⁹ Tú tumakġ Yus-Chicham nú nunġkanam ashí jamarmiayi.

⁵⁰ Túrasha nuwān, Yúsán pênker enentáimtuinian tura pênker wekainian, Israer-shuarka yajauch enentáimtikrarmiayi. Áishman pênkerġ ármia nunasha, yajauch enentáimtikrarmiayi. Túram Páprun Pirnapíncha katsekkar, chichaman irunturar najatawarmiayi. Tú-turukiar ní nunġkeyá jġiki awemarmiayi.

⁵¹ Túram Papru Pirnapġġai, ju aentska yajauchiiti tusar, wéenak naweyan nunġkan akakekiar ikiukiarmiayi. Túrawar Ikiuniu péprunam wearmiayi.

⁵² Yusa Wakanġsha pimiútkamu ásar Yus-shuarka ti warasarmiayi.

14

Ikiuniu Péprunam túrunamia nu

¹ Ikiuniu péprunam Papru Pirnapġġai jeawar Israer-shuar iruntai jeġnam wayawarmiayi. Túrunawar Yus-Chichaman etserkarmiayi. Túram ti untsurġ Israer-shuar ármia nu, Israer-shuarcha ármia nusha Yúsán umirkarmiayi.

² Tura chġkich Israer-shuar, Yúsán umirkacharu ármia nu, Yus-shuaran kajerkarat tusar Israer-shuarġan yajauch enentáimtikrarmiayi.

³ Tuma asamtai Papru Pirnapġġai nú nunġkanam ti nukap tsawant pujusarmiayi. Tura Uunt Yúsán enentáimtuinia ásar, arantutsuk Yusa waitnênkratairġn etserkarmiayi. Tura, etserinia nu winia kakarmarġainti tusa, Yuska aents túrachminian najanmamtikiawarmiayi.

⁴ Tura Ikiuniunmayá aentska jġmiar kanakarmiayi. Chġkichkia Israer-shuar tuinia nu nekasaiti, tiarmiayi tura chġkichkia Jesusa akatramurġ tuinia nu nekasaiti, tiarmiayi.

⁵ Tura nuyá Israer-shuarchajġ Israer-shuarka chichasar pepru uuntrġġġai chichasarmiayi. Tura Papru Pirnapġġai katsekkar tura kayajġi tukurar, yajauch awajsatniun nankamawarmiayi.

⁶ Túrasha Papru Pirnapġġai nuna anturmamkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nunġkanam pujuiniawai.

⁷ Tura Yus-Chichaman etserkarmiayi.

Ristra péprunam Páprun kayajġi tukurarmiania nu

⁸ Ristra péprunam tunamaru áishman pujumiayi. Ni akiiniamurġġa tuke wekaichauyayi.

⁹ Nú áishman Papru chichaamun antúu pujumiayi. Túman Papru úmamkemas nin ġismiayi. Niisha, Yusa kakarmarġġġai tsuamartatġai, tu enentáimium Papru nekaamiayi.

¹⁰ Tura Pápruka kakantar chicharuk “Wajakim wewe ajasam wajasta” tîmiayi. Tutai áishman wiut kutsuāġ wajaki wekaimiayi.

¹¹ Papru túramia nuna aents wáinkiar Rikiaunia chichamġai untsumainiak “Yuska áishmanġa áanin ajasaru in tarutramarġi” tiarmiayi.

¹² Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi.

¹³ Nú pepru jeamunam Júpitir náartin yusa jeġn pujumiayi. Tura Júpitir náartin yusa pátrirġi kukujġn iwiarkamun, wáakajġi itiamiayi. Tura niisha ní áentsrġġġai wáakan maatai tusar pujuarmiayi. Tura tikishmatrar ajamsatai, tiarmiayi.

¹⁴ Tura Jesusa akatramurġ Pirnapġġa Páprusha nuna nekaawar, auka nakitajġi tusar, ni pushirġn jaġararmiayi. Túrawar aents írumanum pachiniawarmiayi.

¹⁵ Tura tiarmiayi “Shuara, ġurukamtai áitkiarum? Iisha yúschaitġi. Atumea áankiitġi, tiarmiayi. Pênġké ántrarum túrarmena nu ikiukrum, nekas Yus nemarsatarum tusar iisha tajġi. Nekas Yuska nayaimpincha, nunġkancha, nayaantsancha, tura ashí nuġ írúnna nunasha najanaiti, tiarmiayi.

¹⁶ Jes, aents ní enentáimmiarġġġain wekasarat tusa Yuska yaunchu tsanġkatkamiayi.

¹⁷ Tuma aiġn shuaran pênker awajsamujġi Wiitġai Nekas Yus tusa paant awajmamsamiayi. Kame yumi yutuktinian nayaimpinmayá akupturmajġi. Tura ejemamar warasarmi tusa yurumak nerektinniasha súramġi” tîmiayi.

¹⁸ Túrasha Pápruka tîmanu támaitiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

¹⁹ Tura nuyá Antiukġanmayá Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajġi tukurarmiayi. Tura jakayi tiar péprunmayá japiki júkiar arant áepsarmiayi.

²⁰ Túrasha Yus-shuar Páprun tariar téntakarmiayi. Túram nuñkia Papru wajaki wé ataksha péprunam wayamiayi. Tura kashin tsawarar Papru Pirnapíjiai Tirpi péprunam wearmiayi.

²¹ Tírpinium pujusar uwempratin chichaman etserkarmatai untsurí shuar Yúsan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha wakеткиarmiayi.

²² Waketaíniak “ashí Yus tana nu tímiatrusumek tuke umirkatarum” tuíniak Yus-shuaran ikiakárarmiayi. Tura nin tiarmiayi, “Yusa akupeamuríin pachiinkiataj tákurkia ti wáitsatniuitji.”

²³ Tura Yus-shuar írunmanum Yus-shuaran wáinnium anaikiarmiayi. Yurumtsuk Yúsan áusjar chicharainiak, “umirkarumna nú Yus iirmasarti” tiar ikiukiarmiayi.

Yaunchu jíinkiarmla nú Antiukíanam wakеткиarmiayi

²⁴ Nuyá Pisitia nuñkanam nankaamakiar Pampiria nuñkanam jeawarmiayi.

²⁵ Nuí jeawar Pirji péprunam Yus-Chichaman etserkar nuyá Ataria péprunam wearmiayi.

²⁶ Nuí kanunam enkemprar, yaunchu jíinkiarmla nú Antiukia péprunam wakеткиarmiayi. Páprusha Pirnapísha tuke jíintsaiñ nú Antiukíanmaya Yus-shuar chichainiak, Yusa takatrí túrattarmena nuna Yus waitnentramak yáinmakarti, tiar akupkarmiayi nuik’.

²⁷ Nú Antiukíanam jeawar, Yus-shuaran irurar, ashí Yus nin yáinkiarmla nuna ujakarmiayi. Tura nútiksaiñ Israer-shuarchan Uunt Yus uwemtikrataj tusa untsukmia nunasha ujakarmiayi.

²⁸ Tura nuyá Yus-shuarjai Papru Pirnapíjiai núkap tsawant pujusarmiayi.

15

Jerusarénum Yus-shuara úuntríjiai iruntrarmiania nu

¹ Nu tsawantin áishman Israer nuñkanmaya wear, Antiukíanam jeawar Yus-shuaran jintintiniak “Muisais tímia nútiksarmek tsupirnaktin ana nu túrachkurmeka uwemprashtatrume” tiarmiayi.

² Tuma asamtai Papru Pirnapíjiai, núchaiti tusar, nú áishmanjai ti kakaram chichar-naikiarmiayi. Túrasha nuu enentáiniak enentáimsatniun tujinkiarmlai. Tuma asamtai Antiukíanmaya Yus-shuar Páprun Pirnapíncha, atumsha chíkich áentsjai Jerusarénum wétarum tusar akupkarmiayi. “Tura nuí Jesusa akatramurísha Yus-shuaran wáinniusha iniasrum iturmainkit tusarum pépker nekaatarum” tiarmiayi.

³ Papru Pirnapísha akupkamu ásar wéenak Pinisia nuñkanam, Samaria nuñkanmasha nankaamainiak Israer-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

⁴ Tura Páprusha Pirnapísha Jerusarénum jeawarmatai Jesusa akatramurísha Yus-shuara wáinnurísha tura penké Yus-shuarsha itiwarmiayi. Tura niisha túrunamia nuna mash etserkarmiayi.

⁵ Túrasha Pariséu aencha, Yus-shuar ajasarmiania nu, wajakiar chichainiak “Muisais tsupirnaktinian akupkamia nuna tura nú arant ashí Muisais tímia nunasha Israer-shuarchasha umirkatin áiniawai” tiarmiayi.

⁶ Nuyasha Jesusa akatramurísha Yus-shuaran wáinniusha nu chichaman nekaatai tusar iruntrarmiayi.

⁷ Chichasua umikiarmatai Pítiur wajaki tímiayi, “Yatsurtiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitiukmia nu nékarme.

⁸ Tura Yus Niñki ashí aentsu enentáin neka asa, Wíi shuar ajasmin áiniawai tusa, ni Wakanin Israer-shuarchancha susamiayi, in suramsamijai nútiksai.

⁹ Yus incha aushatka awajtamsachmaji, tímiayi. Antsu métekraketji. Tuma asamtai niisha Yúsan enentáimtuiniakui, Yuska enentáijan ni tunaarín japirarmai, tímiayi.

¹⁰⁻¹¹ Tura iikia nékaji níiya áantsarik Jesukrístu waitnenkartutairíjiai uwempraitji. Nuñkia çurukamtia Yus uwempraru áiniawai tajsha, átum Muisais yaunchu akupkamia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsachakait. Warí, ii úuntrísha tura iisha ashí Muisais tímia nu umiktin tujinkiamji. Tuma asamtai, çurukamtai nú káarkasha Israer-shuarchasha áentskatin wakerarum?” tímiayi Pítiur.

¹² Pítiur nuna tutai Pirnapísha Páprusha chichainiak, “Israer-shuarchasha ni kakarmarín nekaawarat tusa aentsti túrachminian túratniun Yuska ti yáinmakmaji” tú ujuam miífiat wáinkiar antúu pujuarmiayi.

¹³ Nuna ujasua amikmatai, Jakupusha tímiayi “Yatsurú, antuktarum.

¹⁴ Nuik túrachman Yus túramia nuna ii yachi Semun Pítiur ujatmakji. Júiti: Yuska Israer-shuarcha waitnentak Winia ajasarat tusa chíkshtarchiniak achikiuítí” tímiayi.

- ¹⁵ Jus̄ha Yús̄nan etserin yaunchu áarmia nu tímiatrusaṅ túrunayi. Júiti aarma:
- ¹⁶ “Israer-aents meserar, jeḡ sáanakniua áintsan áiniawai. Tura ukunam ataksha tana, Tawitia jeen sáanaki ana nuna, ataksha najanattajai. Juakai nuna achikian ataksha awajrattajai.
- ¹⁷ Ashí nunḡanmaya aents, Israer-shuarcha ainia nu, winia náarun pachinia nu, Winia eṅkarat tusan túrattajai.
- ¹⁸ Uunt Yus nuna yaunchu ujakmiayi.”
- Tu áarmaiti’ tímiayi.
- ¹⁹ Tuma asamtai, yatsurtiram, wi tájarne: Israer-shuarcha Yus-shuar ajasaru áiniana nu, imiatik awajsachmi.
- ²⁰⁻²¹ Iimiatarum, ashí péprunam Israer-shuar iruntainiam yáunchuyan tuke sáwartin Mui-saisa áarmarin jintintiaiñisuk. Tuma asamtai, áyatik áatratai ju “Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanirmawairap. Tura kajemtikramua nu yuawairap. Tura numpasha umarairap.” Tu áatratai’ tímiayi Jakupu.
- ²² Nuyá Jesusa akatramurisha Yus-shuaran wáinniusha nuyá ashí Yus-shuaraim enentáimsarmiayi. “Papru Pirnapíjiaí wéakui, shuar níijiaí nenakar Antiúkianam akupkatai” tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar árimiayi.
- ²³ Tura níijiaí ju papin áarman akupkarmiayi:
- “Tisha Jesusa akatramurí tura Yus-shuara wainniurí tura ashí Yus-shuaraitjinia nu, atumin Israer-shuarcha árumna nu, Antiúkianam, Sírianam, tura Sirisianmasha, ju papí akupeaji.
- ²⁴ Juyá aents ii chichamejaínchu atumíin jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiarne. Nunasha ni chichamejaín turamarmayi. Nu chicham atumsha antukrum nushá enentáimprarum “entá nuyañka iturkatjik” tárume.
- ²⁵ Tuma asamtai nu nekaar, iisha métekrak enentáimsar, jimiará áishman akupkatin anaiki-amji. Ju áishman ii aneamu yachí Páprujaí Pirnapíjiaísha atumin írmasarat tusar akupeaji.
- ²⁶ Papru tura Pirnapísha ii Uuntrí Jesukrístunam surumakarmiayi, ni takatrísha tsummai aín túrami tusar.
- ²⁷ Níijiaí Jútassha tura Sérassha akupeaji. Ii chichaañnia nuna niisha ni wenejaí atumin ujatmakartatui.
- ²⁸⁻²⁹ Kame túratin asamtai iisha Yusa Wakaníjiaí ju áartin enentáimsaji. Naman ántar-yus susamu ana nu yuawairap. Tura numpasha umarairap. Kajemtikramu ana nusha yuawairap. Tura penké tsanirmawairap. Nuyasha chíkichia nú nanḡkaamas tíchattajai. Tura antsu nu iniaisarmeka, péñker áatrume. Ayu, Yus wáitmakarti.” Tu áarman akupkarmiayi.
- ³⁰ Tura Antiúkianam akupkam wearmiayi. Nuí jeawar Yus-shuaran irurar, papin súsarimiayi.
- ³¹ Tura Antiúkianmaya Yus-shuarsha nu papin áusjar, péñker jintíamu chichaman áarman wáinkiar, tí shiir enentáimsarmiayi.
- ³² Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakáarmiayi.
- ³³ Tura nuí ishichik tsawant pujusarmatai, Yus-shuarka, péñker wakеткиitarum, tiar akupkarmiayi.
- ³⁴ Tura Séras juáktinian wakerukmiayi.
- ³⁵ Páprusha Pirnapíjiaí juakarmiayi Antiúkianam. Niisha chíkich aentsjaí Yus-Chichaman éteruk pujuarmiayi.
- Papru atak Yus-Chichaman ipiampártasa Wémiania nu*
- ³⁶ Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nuí Yusaj ii yachí ainia nusha urukák pujuinia iyutai” tímiayi.
- ³⁷ Pirnapíkia Juan Márkusan iijiaí winití tusa wakerimiayi.
- ³⁸ Tura Pampiria nunḡanam Juan Márkussha niisháa weu asamtai tura Yusa takatrín iniaisa asamtai, Pápruka ayatniun nakitramiayi.
- ³⁹ Papru Pirnapíjiaí ti kakannairar kanakarmiayi. Tura Pirnapíkia Márkusan ayáki Chípriniam wémiayi.
- ⁴⁰ Pápruka Sérasan ayáki wéakui Yús-shuar Yus yáinmakarti tinia akupkarmiayi.
- ⁴¹ Tura Siria nunḡanmaani wekaráktak, Yus-shuaran ikiakárkutak Sirisianam jeamiayi.

¹ Papru Sérasjaj Tirpi pepru lírkutak Ristra péprunam jeawarmiyai. Tura nuj Rístranam Yus-shuaran wáinkarmiayi, ni naarj Timiutéu. Ni nukurínkia Israer-shuar Yus-shuara uyayi. Tura ni aparínkia Kriaku áentsuyayi.

² Tura Ristra péprunmaya Ikiuniu péprunmayasha Yus-shuar ármia nu, Timiutéu péñker wekaawai, tiarmiayi.

³ Kame Pápruka Timiutéun uyuuntusat tusa wakera asa, Timiutéu aparj Kriaku-apachin nekaawarmatai Israer-shuar nuj pujuarmia nu yajauch enentáimpraraín tusa tsupir-mamtikiamiayi.

⁴ Tura nuyá Papru Timiutéujaj ashí péprunam nuj sétur nuj sétur wéenak Jesusa akatramurjsha Yus-shuaran wáinniusha Jerusareñnum nuik jintintian umiktarum tusa ujarkutak wearmiyai.

⁵ Tu ujamu ásar Yus-shuar nú arant Yúsán enentáimturar kakararmiyai. Tura ashí tsawant kawenki wearmiyai.

Papru iimiarmia nu

⁶ Tura Yusa Wakanjka Páprun Yus-Chichaman Asia nuñkanam ujaktinian tsankatkachmiayi. Tuma asamtai Pirijia nuñkanam tura Karasea nuñkanam ajrkutak,

⁷ Misia nuñka jeatniunam jeawarmiyai. Túrunawar “Pitinia nuñkanam wetai” tiarmiayi. Túrasa Yusa Wakanj nujsa wétinian suritkiarmiayi.

⁸ Tuma asamtai Misia nuñkanam menantki Truas péprunam pachiniawarmiyai.

⁹ Nuj jeawar Papru kashi iimiarmiyai. Masetúnia nuñkanmaya áishmanñkan wajan wáinmiayi. Nu áishmanñ Páprun chicharuk “Winitritia. Yáintkiannium” tímiayi.

¹⁰ Nuyañka tu iimiarmatai, wisha Páprujaj wetai tusar iwiarnarmijai. Tura Yus incha nú nuñkanam ni chichameñ etserkat tusa ti nekas untsurmakrin wéaji, tímiayi.

Jiripius Péprunam túrunamia nu

¹¹ Tura nuyañka kanunam enkemprar Truas péprunmaya jíinkir Samutrásia nuñkanam jeamiayi. Tura kashin tsawar nuyañka katjarar Niápuris péprunam jeamiayi.

¹² Tura Niápurisnumiá náwek Jiripiusnum jeamiayi. Nuj Jiripius péprunmanka Rúmanmaya aents matsamsa ármiai. Tura nú péprusha Masetúnia nuñkanam nekas uunt pepruyayi. Tura nujsa seturmaji.

¹³ Nuyá sáwartin tsawarmatai pepru ikiukir entsá supichik wémiai. Yus áujsatniun iruntrarmia nuj pujusar, nuwá iruntrarmia nu Yus-Chicham ujakarmiyai.

¹⁴ Nuj Tiatiara péprunmaya nuwá, ni naarj Ritia wáinkiamiyai. Nijsa tarach yamakain péñkeran súrinuiyayi. Yúsasha shiir awajniuyayi. Yus-Chichaman Papru etserkamia nuna nijsa péñker anturkamiayi. Túman, Uunt Yus Papru chichaamun umirkat tusa ni enentáin takasmiayi.

¹⁵ Túruna nú nuwá níiniurijijaj imianmiayi. Tura nuyasha chichaak “Yus-shuar nekas ajasai túrutkurmeka winia jaruj winitiarum” tímiayi. Tura nuj jeawakrin setumtikram-pramiayi.

¹⁶ Tura nuyá ukunam Yus aajsatai tusar wekaamar nuwách nekaamin-iwianch enkemtuamu inkiunmakmiayi. Nu nuwáchikia misatkauyayi. Nijsa nékamkui nérenniurjsa ti kuitriniawarmiyai.

¹⁷ Tura nú nuwách incha Pápruncha pataaturmamijai. Tura kakantar untsumuk “Ju áishmanñsha nekas Uunt Yúsán umirkaru áiniawai. Tuma asa nijsa atumin uwempratin chichaman ujatmarme” tímiayi.

¹⁸ Tura nú nuwáchisha ti núkap tsawant tu wekaimiyai. Titmakui, Papru ayanmar iwianchin chicharuk “Jesukristu naarijjaj tájame: jíinkitiá ni enentáiya” tímiayi. Tutai iwianchka nú chichamaik jíinkimiyai.

¹⁹ Tura nuwáchi nérenniurjsa, íwianch jíiki awematniun nekaawar, Páprun Sérasnasha kajerak achikar pepru uuntri íisarar tusar ajapén júkiarmiayi.

²⁰ Tura pepru úuntriñ ejeniar tiarmiayi “Ju áishmanñ Israer-shuar áiniawai. Tura in páchim enentáimtikramainijai.

²¹ Tura ijsa Rúmanmaya aents árin, ii túrachminian, iikia asumprachman jintintramaini-ajj” tiarmiayi.

²² Tura nuyañka ashí aents Páprun Sérasnasha kajerarmiyai. Túramtai pepru uuntri chichainiak “Pushirj áitkiarum numijaj asutiátarum” tiarmiayi.

²³ Tura nuyá ti asutsua amikar sepunam enkeawarmiyai. Tura sepú-iinian chicharuk “Ti péñker iistá pisararajñ” tiarmiayi.

²⁴ Nu chichaman antuk, sepú-iin ti init awayámiayi, tura nawen numi najanamujaj tee chanuntamiayi. Tú tura ikiukmiayi.

²⁵ Tura kashi ajapén Papru Sérasjaj Yusan áujainiak kantampriarmiayi. Tura chíkich enkeamussha nuna antúu pujuarmiayi.

²⁶ Tu pujuiniꝯ aya aneachma ti kakantar uꝯrkamiayi. Tura sepusha muchitramiayi. Túrunantai sepú wáitirisha ashí urantrarmiayi. Tura aents jirujꝯ enꝯekar jĩnkiamusha mash atiniakarmiayi.

²⁷ Túrunantai sepú-iin shintiarmiayi. Tura wáitisha mash uranar aan wániak, enꝯeamusha jiiniar shiákchariash tusa ni puniariniak ukuiniak máamattsa pujumiayi.

²⁸ Tura Papru nuyasha “Amek yajauch awajmamsaip. Ashí pujuiniꝯ” tímiayi.

²⁹ Tutai sepú-iincha jinia ekeemak tsékeꝯki wayꝯmiayi. Tura Papru Sérasjꝯ pujamunam kurꝯnki jearmiayi.

³⁰ Tura aa jĩlki aniasmiayi “Uunta, ¿warí itiuꝯkattaj uwemprataj tusana?” tímiayi.

³¹ Tutai niisha tiarmiayi “Uunt Jesukrístu nekas enentáimtustá. Túrakmeke amesha, tura áminiurmesha uwemprattarme” tiarmiayi.

³² Tura nuyá ashí ni jeen pujuarmia nunasha Yus-Chichaman ujakarmiayi.

³³ Tura tsawant irꝯnkaí sepú-iincha Páprun Sérasjꝯ numpamnamurĩn nijiararmiayi. Túramtai nuyasha sepú-iincha nuarĩjĩjꝯ uchrĩjĩjꝯ imianiarmiayi.

³⁴ Túramtai nuyasha ni jeen júkiarmiayi. Tura nuisha ayurawarmiayi. Tura sepú-iincha niiniurĩjĩjꝯ Yus-shuar ajasu ásar ti shiir warasarmiayi.

³⁵ Kashin tsawar pepru uuntrĩ, Páprun Sérasjꝯ akupkata tusar suntaran sepú-iinian akuptukarmiayi.

³⁶ Tura nuyꝯnka sepú-iin Páprun tímiayi “Yamaikia pepru uuntrĩ chichaman akupturmakai, átum wétinian. Tuma asamtai yamaikia péꝯkerak jĩnkietiarum” tímiayi.

³⁷ Túrasha Papru suntaran chicharuk tímiayi “Warí, iisha Ruma aents árinĩn, niisha chichaman iwiartsuk ashí shuar ímiamiꝯn asutiámamji. Túrawar sepunam enketmamji. Tura ¿urukamtai yamaikia uꝯk akuptamkataj tusa wakeruinia? Atsá. Antsu uuntcha niꝯki taar jĩrmaktiai” tímiayi.

³⁸ Tutai suntarsha wakеткиar nuna ujakarmiayi pepru úuntrĩn. Tutai niisha ti ashamkarmiayi Ruma aentsun nekaawar.

³⁹ Túmak ashamainiak Páprun Sérasan weriarmiayi tsꝯnkurturtarum titiai tusar. Nuyasha sepunmaya jĩlkiar “Yamaikia wáitneasrum wetarum” tiarmiayi.

⁴⁰ Papru Sérasjꝯ nuyá jĩlkiar Ritia jeen wearmiayi. Tura Yus-shuaran ikiakárar ik-iukiarmiayi.

17

Tisarúnikianam charaatum ajarmia nu

¹ Papru Sérassha wéenak Ampipuris péprunam Apurunia péprunmasha nanꝯkaamakutak Tisarúnikia péprunam jeawarmiayi. Nuĩ Israer-shuar iruntai jee ámiayi.

² Tura Pápruka nuna tuke túrin asa nu jeanam wémiayi. Tura nuisha menaintiu sáwartin Yus-Chichaman paant etsermiayi.

³ Tura Páprusha Yus-Chicham tana tímiatrusꝯn jintintiarmiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamurĩn Kristu tútain tájarne” tímiayi Papru.

⁴ Nuna takui Israer-aents chikishtarchik umikiarmiayi. Túrawar Paprujꝯ Sérasjꝯisha tsaniꝯkiarmiayi. Tura Kriaku aencha ti untsurĩ Yúsan umirkarmiayi. Tura nuwꝯ péꝯkerĩ armia nusha nútiksarꝯn umikiarmiayi.

⁵ Tura Israer-shuarka Yus-shuar ajascharmia nu, Páprun Sérasnasha suiir ísarmiayi. Túrawar chíkich yajauch áishmaꝯn naki yujáu armia nujꝯ chichasar nu peprunam charáa charáa ajarmiayi. Tura Páprun Sérasnasha achikiar aentsu úuntrĩn suruktai tusar Jasunꝯka jeen árenkarmiayi.

⁶ Túrasha Páprun Sérasnasha awetrar, Jasunꝯkan tura chíkich Yus-shuarnasha achikiar japirkutak júkiarmiayi. Tura pepru úuntrĩn juńiak tiarmiayi “Ju áishmaꝯnsha ashí nunꝯkanam charaatum ajá wekarmia nu yamaikia tímiájꝯ tarutramarji.

⁷ Tura ju Jasunꝯ ni jeen itiaarmiayi. Tura niisha ashí mash Rúmanmaya uunt akupniu chichamen nakítianiawai, tiarmiayi. Tura jes, chíkich akupin awai, tuńiawai. Niisha Jesusaiti, turamainiꝯ” tiarmiayi.

⁸ Nu chichaman antukar, aents nuĩ pujuarmia nu, úuntrĩmiak charaatum ajarmiayi.

⁹ Tura Jasunꝯ chíkich Yus-shuarjꝯ Papru nekas awemattaji tusar, pajj, kuit ikiuaji, tiarmiayi. Nuna takui pepru uuntrĩ nin akupkarmiayi.

Piríanam

¹⁰ Nuńkia nú kashi Yus-shuar Páprun Sérasnasha Pirĩa péprunam akupkarmiayi. Tura nuĩ jeawar Israer-shuar iruntai jeanam wearmiayi.

¹¹ Piríanmąya áentska Tisarúnikianmąya áentsjainkia nankaamas penker enentáimkia árimiayi. Tuke enentáijjaj Yus-Chichaman ántiarmiayi. Túrawar tuke tsawant imia ninķisha Papru tana nuna nekasahit tusar Yusa papirín ii wearmiayi.

¹² Tuma ásar untsurj shuar Yus-shuar ajasarmiayi. Tura Kriaku aents nuwą penkerj armia nusha áishmansha umikiarmiayi.

¹³ Túrasha Tisarúnikianmąya Israer-shaman ántiarmiayi. Tura Yus-Chichaman Piría péprunam étserun antukar nuj weriar charaatum awajjarmiayi.

¹⁴ Túmainskui Yus-shuar Páprun áruitsuk nayaantsanam akupkarmiayi. Tura Séraska Timiutéujaj nuin Piríanam juakarmiayi.

¹⁵ Tura Páprun nemariarmia nu Atenas péprunam nin ejeyarmiayi. Tura niisha wake-tainiakui, Papru chichaman akatar akupkamiayi, Sérassa Timiutéusha wárik winiartj tusa.

Atenasnum

¹⁶ Tura Papru Atenas péprunam pujus Sérasnasha Timiutéuncha nákamiayi. Nu nuj nú péprunam ántar-yus ti írunkui Páprusha kúntuts enentáimmiayi.

¹⁷ Tuma asa Israer-shuar iruntai jeanam Israer-shuarjaj tura chikich aents Yúsan enentáimtiarmia nujaj chichasmiayi. Tura tuke tsawant pepru ajapén aentsjaj inķiunaikiar chichasarmiayi.

¹⁸ Nuyá chichaman jintin chikich naarj, ipikiuriu, armia nu, tura chikichcha, ni naarj, estuikiu, armia nusha Páprun áujmatsarmiayi. Chikichcha tiarmiayi “Imiá chichamtincha jusha waritramtajib.” Tura chikichcha tiarmiayi “Yajaya yusnan etserniuchashit.” Páprusha Jesusa túrunamurín tura aents jakamunmąya nantaktinian étserkui nuna tiarmiayi.

¹⁹ Nuyanka aents iruntainiam, naarj Ariupaku támanum Páprun júkiarmiayi. Nuisha tuke irunin árimiayi. Nu nuj Páprun aniasarmiayi “Iisha ame yamaram támena nu nekaatai tusar wakeraji, tiarmiayi.

²⁰ Amesha nusháa chicham jintiniaitme. Túmaitkiui ju chichamsha warintiuak tusar nekaatai tusar wakeraji” tiarmiayi.

²¹ (Atenasnumiá aencha tura chikich nunkanmąya shuar nuj pujuarmia nusha aya yamaram chicham aencha nunak ántiarmiayi. Tura aya nunak áujmatiarmiayi.)

²² Nuyanka Papru Ariupakunam ajapén wajakj tímiayi “Atenasnumiá áishmantiram, wi nékajaj, atumsha atumi yusrj ainia nuyá tsurakchamniaitrome, tímiayi.

²³ Kame wu nuik atumi yusrj enentáimtainiam ístaj tukaman nuj jeachin iwiamarun, JU NEKAACHMA YUSNAITI.” tu áarman wáinkiamjai. Wátsek, ju Yus átum nékachiaturm tikishmatrumna nuna ujaktajrume” tímiayi.

²⁴ Nekaatarum, nu Uunt Yuska ashí nunkan tura nuj írunna nuna najanaiti. Tura Niisha nayainpin nunkancha nérenniurinti. Tura aents najanamu jeanam nú Yuska pujuchuiti.

²⁵ Niisha aents yáinkiat tusa atsumatsui. Warí, imia-ninķi Niisha ii iwiaakmarín, ii mayattairíncha tura ashí írunna nunasha súramtsujik, tímiayi.

²⁶ Nekaatarum. Nuu numpanmayanak ashí áentsun najanamiayi ashí nunkanam matsamsarat tusa. Tura Yuska ii tsawantrín nekapmaiti; ii pujustinniasha nútiksą nakakmiayi.

²⁷ Winia eátkar wáitkiarat tusa Yus nuna túrayi. Túrasha Yus jeashtaka pujurtamtsuji, tímiayi.

²⁸ Jes, iisha Yusjaj iwiaakji. Yusjaj muchitajj. Tura Yusjaj ii kakarmarj takakji. Nútiksą atumi papí-aintrj tíchamka “Ashí incha Yus najatmaitj.”

²⁹ Tura iisha Yus najatma asakrin kuri najanamusha, yúsaiti, tu enentáimsashtiniatjji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtiniatjji, tímiayi.

³⁰ Aents Yúsan nékainiachuk túrawarmiania nuna Yuska yáunchuka pachischamiayi. Túrasha yamaikia Yus ashí aentsun chicharuk “Tunaaruminiá enentáimpratarum” túramji, tímiayi.

³¹ Yuska áishmankan anaikiatiti. Nú áishman ashí aentsti, yáki penkeran túriniait, yáki yajauchin túriniait núnaka nekarmattajj. Nú áishman Yus akupkamun tuke enentáimtakui Yus nin anaikiatiti. Tura tsawant nú túrunatin átatna nuna Yus Ninķi achikiuiti. Túrasha nekas anaikijaj tusa, tura ashí áentstiram nekaatarum tusa nú áishmankan jakamunmąya iniantkimiayi” tímiayi Papru.

³² Tura nuna jakamunmąya nantaktinian áujmatun antukar chikichcha wishikiarmiayi. Tura chikich “Yamaikia máakete. Ansu chikich tsawantini antukmí” tiarmiayi.

³³ Tutaj Papru iniaisamiayi.

³⁴ Tura chikich aentska Papru táman umikiar nin nemarsarmiayi. Nuisha Tiuníseu páchitkiuayayi. Niisha Ariupaku áentsuyayi. Tura nuyasha nuwą, ni naarj Támaris, tura chikich aencha nútiksą nemariarmiayi Páprun.

18

Kurintiu péprunam

¹ Nuyanka Papru Atenas péprun ikiuki Kurintiu péprunam wémiyai.

² Tura nuǵ Israer-shuaran ni naarǵ Akiran wáinkiamiyai. Akiraka Puntu nuńkanam akiiniauyayi. Tura ukunam Itiaria nuńkanam pujaj uunt akupin Krautiu ashí Israer-shuaran Ruma péprunmaya awemarmiyai. Rúmaka Itiaria nuńkanmaiti. Nuǵ awemamu ásar Akira Kurintiunam nuik támiyai nuwé Pirisirajaj. Tura Pápruka Akiran chíchastaj tusa werimiyai.

³ Akirasha Páprusha mai juna takau ármiyai, tarach ti núparman jeǵ najantain najanin ármiyai. Tuma asamtai Papru Akiraj seturmiyai nu takat túrawartai tusa.

⁴ Tura tuke sáwartin Papru Israer-shuar iruntai jeǵ wéuyayi. Nuǵsha Israer-aentsun Kriaku-aentsnasha nútiksaran Yus-Chichaman ujakar enentáimtikrarmiyai.

⁵ Tura nuyá Séras Timiutéujaj Masetúnianmaya táarmatai Pápruka mijjatratsuk Yus-Chichaman éteruk “Yusa anaikiamurǵ Kristu, atum nákarmenta nu Jesusaiti” tiamiyai.

⁶ Tura támaiitai nú chichaman nakitiarmiyai. Túmainiak Páprun katsekkarmiyai. Tuma asamtai Papru, nuńkia ikiauǵrume tusa, ni pushirǵn pear tiamiyai “Atumek makuumarne. Tura wikia Yusaj makuumatsjai. Yamaikia Israer-shuarcha ainia nuna Yus-Chichaman ujakartaj tusan werajai” tiamiyai.

⁷ Tura nuyanka Israer-shuar iruntai jeǵnmaya jiinki, Yúsan enentáimtin áishman Justu jeǵn wémiyai. Ni jeǵnka Israer-shuara iruntai jeǵn ayamach pujumiyai.

⁸ Israer-shuar iruntai jeǵ chicharniurǵ, Krispu, Uunt Jesusan nekas enentáimturmiyai. Túruna nuarǵijaj uchirǵijajsha Yúsan umirkamiyai. Tura chikich aencha Kurintiunmaya armia nu nútiksaran Yus-Chichaman antukar, Jesusan enentáimtusar imianiarmiyai.

⁹⁻¹⁰ Nuyá Uunt Yus Páprun mesekran ipiatkamiyai. Chicharuk “Peńké imiatik awajtamsachartatui Wi ámijajaj pujaku. Ju péprunmasha untsurǵ aents Winia ajasartin írunui. Tuma asamtai ashamsuk winia chichamur tuke etserkata” tiamiyai Yus.

¹¹ Tura nuǵ Kurintiu pepunam jimiara úwí ejesattuk Yus-Chichaman éteruk pujumiyai.

¹² Tura Kariun, Akaya nuńka akupniurǵ anaikiamu aj, Israer-aents Páprun kajerkarmi-yai. Tura kajerainiak akupniunam irunturarmiyai. Túrawar Páprun júkiar ejeniarmiyai.

¹³ Tu túrawar akupniun chicharainiak “Ju áishman Yúsan umirkatniun Muisais akupkamia núnaka líkias ausháa jintíawai” tiarmiyai.

¹⁴ Tura Páprusha chíchastaj táunak, Kariunka Israer-shuaran tiamiyai “Jusha nekas tunáa túraukinǵia, tura akupniun umirchakuinǵia, tárumna nuna anturkaintjarme.

¹⁵ Túrusha aya chichamnak tura aya náarǵinjak atumí uuntrǵ akupkamia nunak tau asam-tai, atumek nuámtak íistarum tájarme. Wikia nu chichamnum pachinkiatniun nakitajaj” tiamiyai.

¹⁶ Taku aa jíikmiyai.

¹⁷ Tura nuyanka Kriaku aents Israer-shuar iruntai jeǵ úntrǵin Sústinisian achikiar awa-tiarmiyai akupniusha íimmianuman. Túrusha akupin Kariunka túranak peńké pachischami-ayai.

Papru Antiukíanam waketki, nuyá atak Yus-Chichaman ipiampartasa wémiania nu

¹⁸ Tura ni jeǵn waketkiarmatai, Papru nu péprunam untsurǵ tsawant pujusmiyai. Tura nuyasha ukunam Yusaj yachi ármania nuna áujas ikiuak Pirisirajaj ni aishrǵ Akirajaj Senkrea péprunam wearmiyai. Nuǵ Israer-shuar túrutain umiak Papru ni inti-ashin awampramiyai, nuik Yúsan tiamiǵ nuna yamá umíajaj tusa. Nuńkia kanunam eńkemprarmiyai Siria nuńkanam waketkitiai tusar.

¹⁹ Tura nuyá Ipiisu péprunam jeawar Pápruka Pirisiran tura Akiran ikiukmiyai. Tura Israer-shuar iruntai jeǵnmay wáyá Israer-shuar irunar puǵarmia nujaj chichasmiyai.

²⁰ Tura niisha Páprun juǵn pujustá tusar seawarmiyai. Túrusha támaiitai, tujintajaj, tiamiyai.

²¹ Nuyanka áujas ikiuak “Wisha Jerusarénum námper átatna nuna pachiiintuiktinaiitjai. Tura Yus akuptakuinǵia atak tatajaj atumin íistaj tusan” tiamiyai. Tura kanunam eńkemar Ipiisunmaya jíinkimiyai.

²² Nuyá Pápruka Sesaria péprunam jeá, nuyanka Jerusarénum wémiyai, Yus-shuaran nuǵ áujstaj tusa. Tura nuyá Antiukíanam wémiyai.

²³ Tura Antiukíanam ishichik pujus ataksha weak Karasea nuńkanam tura Pirijia nuńkanmaani wekaráktak wémiyai. Tura weak Yus-shuar matsarmia nuna chicharak ikiakármarmiyai.

²⁴ Tumáa pujaj Arijiántria péprunmaya Israer-aents Apurus Ipiisu péprunam jeamiyai. Niisha Yusa yaunchu papirǵn ti peńker nekaamiyai. Etserkatniuncha ti nékauyayi.

²⁵ Uunt Yus timia nunasha unuimíatrayayi. Tura tuke enentáijaj chichasmiyai. Jesusa túramurǵn peńker jintinniuayai. Túrusha aya Juan imiakratmanak nekaamiyai.

²⁶ Ju Apurus arantutsuk Israer-shuar iruntai jeanam chichamiayi. Tura Pirisíra Akirajai ni étserman anturkar, nincha akanki júkiar Yusa chichamen ni nekaachmia nuna núkap jintintrarmiayi.

²⁷ Nuyá ukunam Apurus, Akaya nunkanam wétaj takui, Ipiasiunmaya Yus-shuar yáinkiar papí árar atakas akupkarmiayi. Nú áentsnum péñkerak jeat tusar túrawarmiayi. Tura Akayanam jeá, nú áentsun Yusa waitnenkratairjijai uwempraru ármia nuna ti yáinkiararmiayi.

²⁸ Tura Apurus Israer-aentsjai paant chichasmiayi. Túrasha Yusa Papirijjai, Jesussha nekas Yusa anaikiamurjinti tusa paant jintiak nincha nupetkamiayi.

19

Papru Ipiasiunam jeamiayi

¹ Tura Apuruska Kurintiunam pujái Pápruka nánniumaanj wekaráktak, Ipiasiunam jeamiayi. Tura nuísha Yus-shuaran wáinkiamiayi.

² Tura aniasmiayi “Atumsha Yus-shuar ajasmarmena nuj, ¿Yusa Wakanj atumí enentáin enkemturmakaitrum?”

Tutai niisha tiarmiayi “Atsá. Iikia nuka penke áyatkisha ántichuitji Yusa Wakanj awai támaka” tiarmiayi.

³ Tutai Papru aniasmiayi “Entá, ¿nuikia atumsha warí enentáimsarmeá imianmiarum?” tímiayi.

Tutai niisha tiarmiayi “Juanj jintintramamij nu iisha enentáimsar imianmij” tiarmiayi.

⁴ Tutai Papru tímiayi “Juansha, tunaarminia enentáimprarum imiantiarum, tíchamka. Nuyá tíchamka, winia ukuruj winittiana nu nekas enentáimtustarum. Niisha Jesus Yusa anaikiamurjinti, tu ujatmakchamka” tímiayi Papru.

⁵ Nuna antukar niisha Uunt Jesusa náarj enentáimtusar ataksháa imianiararmiayi.

⁶ Tura Papru ni uwejejai nin antinmatai Yusa Wakanj tarurarmiayi. Túram chíkich chichamjai chichasarmiayi. Túrunawar Yus-Chichaman etseriararmiayi.

⁷ Nusha tuse (12) áishmanj ármiai.

⁸ Tura nuísha menaintiu nantutin Papru Israer-shuar iruntai jeanam werí Yusa akupeamurj pachis arantutsuk etsermiayi. Túrak nú áentsun ujaak Yúsnan nekasaiti tu enentáimtikrarmiayi.

⁹ Tura chíkichka ni enentáin ti ikiatsúáarmiayi. Túrunawar umiktinian penké nakitiainia ásar aents ántamanam Yusa jintin penké yajauch chicharkarmiayi. Tuma asamtai Papru Yus-shuarnaka akanki yaruak Tiranu iskuirarjin tuke tsawant Yus-Chichaman ujaararmiayi.

¹⁰ Nuna túruka jimiará uwí etserkamiayi. Túramu asamtai ashí Asia nunkanmaya aents Israer-shuar tura Israer-shuarcha Uunt Jesusa túramurj antukarmiayi.

¹¹ Tura aentsi túrachminian túrat tusa Yuska ni kakarmarj Páprun susamiayi.

¹² Jáanchniasha pushincha Papru antinman júkiar, nánkamas jaa shuaran ejetim, nú jaa shuarsha nuna antinkiar péñker ajaarmiayi. Iwianchrúkusha nuna antinkiar, iwianch jínkintai ankant ajaarmiayi.

¹³ Tura chíkich Israer-aents uwishin ármiai. Tura niisha chíkich chíkich péprunam wear iwianchrúkun iwianchrin jírki akuptin ármiai. Tuma asa niisha Jesusa náarijjai iwianchin jíkítiai tusar, iwianchin chichartuiniak “Nu Jesus Papru ujaana nuna náarijjai jíinkitiarum tájarme” tiarmiayi.

¹⁴ Tura Israer Patri uuntrj Esewia náartin, siati uchirj ármia nu, nuna túriarmiayi.

¹⁵ Túrasha Jesusa náarijjai jíinkitia, tuiniakuí, iwianchcha tímiayi “Jesusnaka nékajai. Tura Pápruncha nékajai. Tura atumsha, ¿yátsukaitrum?” tímiayi.

¹⁶ Nuna tinia iwianchrúku áishmanj tsékeñki nú áishmanjan kakaram katsumak nupetkarmiayi. Túram ti katsumam niisha misú tura numpamnawar jíinkiar pisararmiayi.

¹⁷ Nusha Ipiisu péprunam túrunamiayi. Túrunamtai Ipiisu péprunmaya Israer-shuarsha tura Israer-shuarchasha nuna túrunamun nekaawar ti ashamkarmiayi. Tura Uunt Jesusa náarj shiir awajsarmiayi.

¹⁸ Túmainiai untsurj shuar Yúsán umirkaru Yus-shuar ajatsuk tunáa túrawarmia nuna paant ujakarmiayi.

¹⁹ Tura untsurj uwishniunawarmia nu, wawekratai papí ármia nuna itiararmiayi. Itiar, júka iniayaji tusar, ashí ímianimajin áesawarmiayi. Nú papí áesawarmia nuna kuítrjsha senkuenta mir (50.000) nankaamasauyayi.

²⁰ Tu túrunamtai Uunt Yusa chichamej pampanki tura nupetmaki wémiayi.

²¹ Tuma asamtai nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusarénum waketkitjai, tímiayi. Tura nuyá ukunam Ruma péprunmasha wetajai, tu enentáimsamiayi.

²² Masetúnia wétin asa Papru ni tsaniakmarin Masetúnia nunkanam emka akupkamiayi. Timiutéun Erastujai akupkarmiayi. Tura ninikia Asia nunkanam seturniayi.

Ipisiunam ti charaatum ámiania nu

²³ Pápruka tuke Ipisiunam pujají, nuyá aents Yus-Chichaman nakitiainiak charaatum ajarmiayi.

²⁴ Iis, nuí Ipisiunam kaya-yusa jee ámiayi. Nu yus núwauyayi, Tiana naartin. Tura áishman, Timitriu naartin, nú jean nakumak uchichin najannuuyayi kuitjai. Tura niisha nú takatjai ti kútrintin ajasmiayi. Tura chíkich áishman nú takatan takarmia nunasha ti kútrintin awajsarmiayi.

²⁵ Timitriusha niijjai takarmia nuna ikiaanak, chikichnasha niijjai métek-taku takarmia nunasha ikiaanak niijjai charaatum ajarmiayi. Timitriusha tímiayi “Winia irutramutiram antuktaram. Iisha ju takat takajaanu jujai ti kuit achíatsjik.

²⁶ Tura atumsha ju Papru wáintrumna nu tura ántarmena nu chichaak “Ashí aents najanam yuska ántar ániawai” tatsuk. Nuna tau asa, juí Ipisiunam, tura arant ashí Asia nunkanam, ni yúsriñ iniaisarar tusa enentáimtikarai. Tuma asamtai untsurj aents, ii yusrj Tiánan ikiuiniak, Papru tana nuna umirainiatsuk.

²⁷ Papru tu étserkui, iisha itiurchat pujuschattajik. Kuit ii achiaj nuka menkakashtatuak. Tura nú arantcha ii yusrj Tiana jeen shuar iniaisachartatuak. Tura nuyá Asia nunkanmayasha tura ashí nunkanmayá aencha, ii yusrj Tiana shiir awajainia nuna yapajíáwar aun nakitrachartatuak” tímiayi Timitriu.

²⁸ Nuna antukar aencha ti kajekar charaatum ajarmiayi. Túmainiak “Ipisiu shuartikia, aya Tianak wakeraji” tu untsummiarmiayi.

²⁹ Nuñkia aents páchim enentáimprarmiayi. Túmainiak Masetúnianmayá Kayuncha Aristárkuncha Páprun namarin ármia nuna achikiar japirkutak iruntai jeanam júkiarmiayi.

³⁰ Tura Pápruka iruntai jeanam wayá chichastaj taun, nuyá Yus-shuar ármia nu, nuna suritkiarmiayi.

³¹ Tura Asia nunkanmayá uuntri, Páprun amikrj ásar, añkia wayawain tusar chichaman akuptukarmiayi.

³² Túrasha irunar pujuarmia nu, páchim enentáimprar, chikichka nusháa untsummiarmiayi. Tura chikichka ti untsurj, nekaachar “wariniak irunturara” tiarmiayi.

³³ Chíkich nuí wajarmia nu charaatum amia nuna Israer-shuaran Arejántrun jintintrar eem shitiawarmiayi. Arejántrusha Kayun tura Aristárkuncha ayampruktinian wakerak takamatsatarum tusa uwejen takuimiayi.

³⁴ Túrasha aents iruntrarmia nu, juka Israer-shuaraiti tusa nekaawar, nú arant charaatum ajainiak “Ipisiu shuartikia aya Tianak wakeraji” ímia-imiatainiakua tí nukap pujursarmiayi.

³⁵ Ipisiu pepru papí-aintrisha áentsun itiatmamtik tímiayi “Ipisiu shuartiram antuktaram. Ii uunt yusrj Tiana jee ístinia íchukaitiaj”. Tura ni nakumkamurisha nayaimpinmayá iniarmaniana nusha íschatniukaitiaj. Tura nunasha ashí aents paant nékainiatsuk, tímiayi.

³⁶ Warí, núnaka ashí aents nékainia asamtai atumsha itiatkatarum. Túrurum enentáimtsuk yajauch túrawairap, tímiayi.

³⁷ Ímiatarum. Ju áishman átum itiarumna nu, ii yúsriñ yajauch chicharkacharai. Tura ni jeen yajauch awajsacharai.

³⁸ Wats, Timitriu tura niijjai takainiana nu tunáa túramun ujaktai tusar wakeruiniakka pepru penkerin werishtinkiait. Nuñkia máimtek iwiainiakarti.

³⁹ Tura chíkich chicham ákuñkia péñker iruntrarum iwiaratarum.

⁴⁰ Kame ju yamá túrunamun nekaawar Rúmanmayá kapitían “Ii uunt kapitíantri yajauch awajsatai tusarum túrachurmeash” turamchatjash. Warí, niisha “¿Urukamtai charaatum ajarum?” takuisha, áimkiatin penké tujinkiattaji” tímiayi.

⁴¹ Tura papí-aint nuna tuasua amik “Áukete. Wétarum” tímiayi.

20

Papru Masetúnia nunkanam Krisia nunkanmasha wémania nu

¹ Charaatum ajasua amikiarmatai Papru Yus-shuaran untsuk Yusnan jintintrataj tusa ikiaankarmiayi. Tura áujas ikiuki Masetúnianam wémiayi.

² Nú nunkanam wekaráktak, Yus-shuaran jintintrar ikiakármiai. Tura nuyasha Krisia nunkanam jeamiayi.

³Nuĵ menaintiu nántuk pujusmiayi. Tura nuyañka kanuĵaj Siria nuñkanam wétasa pujus Israer-shuar chícham jurusman anturmamak “antsu nuñkan Masetúnianmaani wetajai” tímiayi.

⁴Tura Píriánmaya áishman Súpater naartin Páprun atamprimiayi. Tura Tisarúnikianmaya Aristárkusha Sekuntusha Tírpinmaya Kayusha Timiutéusha Asianmaya Tíkikiusha, Trújmiusha ashí nu shuar Jiripius peprunam Páprun atamprimiayi.

⁵Túrawar niisha emki wear Trúas péprunam jeawarmiayi.

⁶Tura iisha wakapruachu tanta yutai jisat amuukamtai, iisha Jiripius péprunmaya jíinkir, kanunam enkemprar Masetúnia nuñkanmaya jíinkimji. Tura señku tsawant nanĵaamasmanum emki wearmia nu amaiyañkarmiaji Trúasnum. Tura nuĵsha siati tsawant pujusarmiayi.

Trúas péprunam túrunamia nu

⁷Tura tumiñtin kíarai Jesukrístu enentáimtusar yurumátai tusar iruntrarmiayi. Tura Papru Yus-shuaran jintinramiayi. Kame Pápruka kashinkia wétin asa chichaa-chichaakua kashi ajapén ejemiayi.

⁸Tura yaki menaintiu pátaranam, tesaamu ámia nuĵ iruntrarmiayi. Nuĵsha ji ekemarma untsurĵ irunmiayi.

⁹Tura nuĵsha natsa Eutikiu, áanĵkamunam ayamas pujusmiayi. Tura Papru ti esaram chichaakui nu nátsasha karĵ pujumiayi. Tumáa pujus kanaki yakí pátanmaya akaiki iniaamiayi. Tura penké jakan júarmiayi.

¹⁰Tura Papru akaatuki tsuntsumprua miniakkamiayi. Tura Yus-shuaran chicharainiak “Ashamkairap. Ataksha iwiaakui” tímiayi.

¹¹Nuyá ataksha Papru wakamiayi. Tura tantan puukar yurumáwarmatai, tuke chichaa-chichaakua tsawantmarmiayi Papru.

¹²Eutikiuncha iwiaakun ni jeen júkiarmiayi. Tura ashí aents shiir enentáimsarmiayi.

Miritiunam wearmiayi

¹³Wats, Papru Asuñ péprunam nuñkan we jeatajtsa wakerimiayi. Tura incha, átumka kanunam wétarum, turamkurin, iikia emkir wémaji Asuñnum.

¹⁴Nuĵ Asuñnum inĵiunaikiar, Páprusha kanunam enkempramtai, Mitiríniniam jeamji.

¹⁵Tura nuyá jíinkir, kashin tsawarar Sámus péprunam jeamji. Tura nuyañka Trujiriunam jear ayampramji. Nuyasha kashin tsawarar Miritiunam jeamji.

¹⁶Pápruka Jerusaréñnum wari wétajtsa wakerimiayi, pintikiustís naartin jístatin pachinĵiataj tusa. Tuma asamtai, Asia nuñkanam ti núkap pujustinian nakitak “Ipisiunam wéhattajai” tímiayi.

Papru Ipisiunmaya úuntrin áujsamiania nu

¹⁷Túrasha Papru tuke Miritiunam pujus, Ipisiunmaya Yus-shuara úuntrin winitiarum tusa untsukarmiayi.

¹⁸Ni taarmatai Papru tímiayi “Atumsha wi Asia nuñkanam pujusan itiura túraj nu nékarme.

¹⁹Atumĵaj tuke tsawant pujumaj nuĵ, nanĵaamantuchu enentáimtusaman, úutchim winia Úuntrin takatrin takasmiajai. Tura Israer-shuar yajauch awajtustinian wakerutainiaĵin tuke takasmiajai.

²⁰Ashí péñker ana nu nekaatarum tusan mijiatrutsuk jintintiamjarme. Iruntramarmena nuĵ tura anĵkant anĵkant atumí jeen pujumarmena nuĵsha Yus-Chichaman ujakmajrume, tímiayi.

²¹Tura Israer-shuarnasha Israer-shuarchancha nútiksanak, enentai yapajjárurum Uunt Jesukrístu umirkatarum, tímiajrume.

²²Tura yamáí Jerusaréñnum wéajai, Yusa Wakanĵ túrutkui. Nuĵsha túrunatana nunasha nekamatsuk wéajai.

²³Tura Yusa Wakanĵ iniakturkui júna nékajai, ashí pepru wi jeattajna nuĵ enĵketátai tusar nákarainiawai. Tura ti wáitsatniun nekapsattajai.

²⁴Kame wikia jákashĵajash. Túrasha warí winia itiurtawa. Wikia Yusa jintĵin warasan wekasataj tusan wakerajai. Yusaj wea-wéakuan jáakun iniaisataj tajai. Tura nuyá takatan Uunt Jesus surusmia nuna péñker amukĵaj tusan wakerajai. Jes, Jesus chíchartak “Yus wáitnenkartana nú chícham etserkata” turutchamka’ tímiayi.

²⁵Tura, yatsurtiram, ashí Yúsnan atumin paant ujakjarme. Yamaikia wíniaka atakka wáitkiashtatrum.

²⁶⁻²⁷Nekaatarum, ashí Yusa wakeramurĵin wisha penké úurĵtsuk ujakjarme. Tuma asamtai atumin títiĵtsan wakerajrume, chíkichík shuara wakanĵ jiniun wéakuisha wikia penké makuumashtajai.

²⁸Tuma asamtai emka atumek ímiastarum. Túrarum nuyá chíkich Yus-shuar ístarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia núnaka ní numpejain Uunt Jesus sumakchakai.

²⁹Kame wi wématai, chíkich táartatui. Núnaka nékajai. Tura niisha, Yus-shuaran amukartajtsa wakeriartatui, uunt yawasha murikiun amuinia áintsan.

³⁰Túrasha nemartusarat tusar wakeruiniak atumjiniñ wait chichaman unuikiartin wantinkiartatui.

³¹Tuma asamtai yatsurtiram, aneartarum. Wisha menaintiú uwitin tsawajsha káshisha úutchim ankant ankant unuiniamajrumna nu kajinmatkiirap' tímiayi.

³²'Pai, yamaikia, yatsuru, Yus yáinmakarti. Yusa anenkrattairí nékaitrumna nú chichamsha kakarmaiti. Nú chicham átum katsuqar kakaram wekasatniun yainmakarti. Kame nú chicham atumí enentáin pujakui, Yus ní shuarin matsamsatniun anajmatramia nú pachiinkiattarme.

³³Wats, wisha chikichí shuara kuítrín wariríncha wakerutkachuitjai.

³⁴Antsu winia uwejrújai takasan wi atsummiaj nuna sumarmakmajai. Tura winia írutkamuru atsumamuríncha wiki sumakmiajai. Nuka paant nékarme.

³⁵Kame átum takasrum, atsumainia nusha yáintarum tusan jintintiajrum. Wats, Uunt Jesusa chichame enentáimsami. "Achiana nujainkia nankaamas, súana nuka shiir waraawai" tichamka" tímiayi.

³⁶Nuna tuasua amik Papru tikishmarmiyai. Tura ashí niijjai iruntrarmia nú shuar Yúsan áujarmiyai.

³⁷⁻³⁸Tura Papru nuik chichaak "Atakka wáitkiashtarum" tiniu asamtai, ti kúntuts pujuiniak, úutchim Páprun miniaksarmiyai. Túrawar kanunam ejeniarmiyai.

21

Papru Jerusaréñnum wémiania nu

¹Tura nuyá Yus-shuar aujsa ikiukir kanunam enkempramji. Tura inkiuasmak Kus péprunam jeamji. Tura kashin tsawarar Rútas péprunam jeamji. Tura nuyanka Patara péprunam jeamji.

²Tura nuí Pataranam pujusar, chíkich kanu Pínisia péprunam wea wáinkiamji. Túmakui nuí enkemprar wémaji.

³Nuí wésar Chipri nunkaka wáinkiamji. Chíprikia menanmaaní aa ikiuakur Sírianam jeamji. Kánuka Tiru péprunam jeá pujustiniuyi, káarak núkap ikiuktin akui. Tuma asamtai iisha Tírunam jear kanunmaya jíinkir péprunam wayamji.

⁴Nuí Yus-shuar wáinkiar nuín siati tsawant pujusmaji. Tura Yus-shuaran Yusa Wakaní ujakam Páprun chicharainiak "Jerusaréñnumka wéchatniuitme" tiarmiyai.

⁵Tura siati tsawant nankaasmatai jíinkimji. Ashí Yus-shuar ármia nu núwentuk uchiirtuik nemartamkamji, péprunam iniankatmaktiai tusar. Káanmatkanam jear tikishmarar Yus áujsamji.

⁶Tura nu amikiar nuínkia áujnaisar ikiukiarmaji. Tura iikia kanunam enkemprakrin níinkia ní jéen wakеткиarmiyai.

⁷Iisha Tírunmaya entsak wea-wéakuar Turumáitianam nuín jíintramji. Tura nuí jearsha Yusaj yachí ármia nu chichasar nuín chikichí tsawant pujusmaji.

⁸Kashin tsawarar nuyá jíinkir nunkan weri Sesaria péprunam jeamji. Nuí Jiripi jéen jear pujusmaji. Jiripikia Yus-Chichaman etserniuyayi. Nuik Jerusaréñnum siati áishmankan Yusa takatrín wáinkiarat tusar anaikiarmia nú Jiripiiti.

⁹Jiripisha kuaru nawantrín yarumkauyayi nuatnakchan. Niisha Yusa chichamen etserín ármiyai.

¹⁰Tura iisha Jiripi jéen wárum tsawantak pujarin Jutía nunkanmaya aents Yusa etserniurí, Akapu náartin támiayi.

¹¹Niisha taa Papru emenmamkarín achikmiayi. Tura achik níinkí ní nawen tura uwejéncha jíinkiamamiayi. Nuna tura tímiayi "Yusa Wakaní tawai, juna emenmamka nérenniurín Israer-aents jútikia jíinkíáwar Israer-shuarchanum surukartatui, tawai" tímiayi.

¹²Iisha nu antukar Papru tímiayi "Jerusaréñnumka weep." Sesarianmaya Yus-shuarsha núnisan Páprun tiarmiyai.

¹³Tutai Papru tímiayi "¿Urukamtaí úutkuram winia enentáirui kúntuts awajtarum? tímiayi. Wi Jesusna asamtai Jerusaréñnum jíinkiatainiakui sha mántuiniakuisha ashamatsjai" tímiayi.

¹⁴Tura iisha Papru emetatai tukamar tujinkiar "wats, nuínkia Uunt Yus wakera nu tímianak atí" tiarmaji.

¹⁵Nu tiri iniaisar iwiarnarar Jerusaréñnum wémaji.

¹⁶ Chíprinmaya yaunchu Yus-shuar Manasun ni jeen Jerusarennun takakuya nuna ikiastinian wakerimiayi. Tuma asamtai Sesarianmaya ishichik Yus-shuar nemartamainiak Manasunnasha júkiarmiayi.

Papru Jakupu jeen irastajtsa wémiania nu

¹⁷ Tura iisha Jerusarennun jeawakrin, nuj warasar Yus-shuar ti shiir áujtamsarmiayi.

¹⁸ Tura kashin tsawar Papru ímiak Jakupu jeen wémiaji. Nujsa Yus-shuara uuntri matsamarmiayi.

¹⁹ Páprusha áujas amik, Israer-shuarchanum ni étsermajai Yus túramia nuna yámankamtaikniumia júki chikichikimias ujakar ujakar awajsamiayi.

²⁰ Papru taman antukar “Yus ti péñkerchakait” tiarmiayi. Tura Páprun ju chichaman tiarmiayi “Támena nu péñkeraiti, yatsurú, túrasha Israer-shuar timiá untsurí Yus-shuar ajasu áiniayat, “ashí Muisais akupkamia nu umiktinaijti” tuiniawai.

²¹ Nú arant yayaja aents taar, chichartamainiak “Pápruka nusháa jintintui, turamainiawai. Israer-shuar chikik nunkanam pujuinia nuna Muisaisa akupkamurí umirkashtin Pápruka jintintui, turamainiawai. Israer-shuarti tsupirnaktin ana nu túrashtinian tura ashí Israer-shuar túrutai iniaisatniun Papru imia Israer-shuuran jintintui, turamainiawai.”

²² Wátsek, yatsuru, nuñkia itiumainkit. Ame tátinrumin aents nekaawarka ju kajertamainiak káutramkachartatuak.

²³ Wats, antsu nuñkia, ju túrata yatsuru. Ju kuaru áishman Yúsán yaunchu tiarmia nuna umktasa pujuiniawai.

²⁴ Nii júkiarta. Túram niisha Muisais akupkamia nuna umikiar nijiamainiakui, amesha nijiamarta. Núnismek kuitniasha ni susatin ana nu amesha akikmatkarta. Niisha ashí umikiarmatai, ni intiashin awampratin áhattawak. Nu áishmanka intiashin awampran Israer-aents wáinkiar, anturtamkarainia nu, nekaschaiti, turamartatui. Antsu, Pápruka Muisais akupkamia túmanak túrawai, turamartatui.

²⁵ Túrasha yatsuru, nekaata, Israer-shuarcha Yus-shuarka papí yaunchu akuptukmiayi. Israer-shuarti túratin ana nu ashí mash túratarum tátsuji, tu áatramji. Tura antsu namanken máawar ántar-yusan susamu yúashtinaitrume, tímiaji. Tura numpasha umarchatniuitrume, kajentikramusha yúashtinaitrume. Tura tsanirmashtinaitrume. Tu áatramji” tiarmiayi.

Páprun achikiarmiania nu

²⁶ Nuyá tiniu asamtai Papru nú kuaru áishmankan júkiarmiayi. Tura kashin tsawarar nímiak nijiamaramiayi, Muisais timia nútiksaran. Tura Yúsán tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt jeen wayamíayi.

²⁷ Túrasha nu siati tsawant amusattuk ajatemsai, Ásianmaya Israer-aents Paprun Yusa Uunt jeen pujan wáinkiarimiayi. Túrawar charaatum ajakiar Páprun achikiarmiayi.

²⁸ Achikiar untsumainiak “Israer-shuártirum in yáinmaktarum. Ashí nunkanam Muisais akupkamuríncha Israer-shuarti túrutairíncha, ju Yusa Uunt jeencha yajauch chicharea nu achikji, tiarmiayi. Warí, Kriaku áentsun awayáshtinia nuna awayá nujai yamá ju jeencha yajauch awajturmají” tiarmiayi.

²⁹ Jes, nuik Ipsiunmaya Trúpium Páprujai pérunam wekaan wáinkiaruyi. Wáinkiaru ásar, Yusa Uunt jeen wayayi, tu enentámsar tiarmiayi.

³⁰ Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt jeeya júkiarmiayi. Túrawar wáitíncha nú chichamaik epentrarmiayi.

³¹ Tura maatai tsar matsamtuiniái suntara kapitíántri Jerusarennunimí aents ashí charaatum ajainian antukmiayi.

³² Kapitíáncha ni suntarin tura sarjentuncha irur tseke weriarmiayi aents pujuarmia nu. Aencha suntaran tura kapitíánin wáinkiar, Páprun asutíniayat iniaisarmiayi.

³³ Kapitíánka Páprun jeari achikmiayi. Tura jimiará jirujai jínkiamiayi. Nuyasha aniasmiayi “¿Niisha yait? ¿Warinia túrait?” tímiaji.

³⁴ Túrasha aencha untsurí chichaman untsummiarmiayi. Túmainiakui kapitíáncha penké nekaachmiayi. Tuma asamtai Páprunka suntar pujamunam júkiarmiayi.

³⁵ Tura suntar pujamunam wáitiniun jeawar Páprun entsaki júkiarmiayi aents imiá kajarainia asamtai.

³⁶ Tura aencha ukunmaaní pataakar, mantamnatí, tu untsummiarmiayi.

Papru chichastinian seamiania nu

³⁷ Tura Papru suntarnum awayám, Páprusha kapitíánin Kriaku chichamjai chichaak “Wi ishichik chichasaintjame” tímiaji.

Tutai kapitíán chichaak “Warí, ¿amesha Kriaku chicham chichastin nékamek? tímiaji.

³⁸ Nuñkia amesha ¿Ejiptunmaya shuárchakaitiam? ¿Nuik kuartru mir (4000) aents, mañkartin tutai atsamunam yaruakchamkam? ¿Kapitiánjaj meset najanataj tusa túrachmakum?” tímiayi.

³⁹ Tutai Papru tímiayi “Núchaitjai. Antsu wikia Israer áentsuitjai. Sirisia nunñkanam uunt pepru Tarsu náartin ana nuñ akiiniaitjai. Tura waitneasam ju aents chichastin tsañkatrukta” tímiayi.

⁴⁰ Tura kapitián, ayu, tutai, Papru watainium wajas, mitiat pujustarum tusa uwejeñ takuimiayi. Tura aents itiatkarmatai Israer-chichamjaj chichasmiayi.

22

Papru áentsun timia nu

¹ Papru chichaak juna tímiayi: “Yatsurtiram, tura úntur árumna nu antuktarum. Wikia Papruitjai. Kíishtumaktaj tusan títiatjana nu waitneasrum anturtuktarum” tímiayi.

² Tura Papru Israer chichaman chichaakui, aents nuna antukar nú nañkaamas itiatkarmiayi.

³ Nuñ Papru chichaak “Wikia Israer-shuaraitjai. Tarsu pepru Sirisia nunñkanam ana nuñ akiiniaitjai. Túmaitatnak juñ Jerusaréñnum tsakaruitjai. Tura unuikiartin Kamaríran chichamgen unuimiaruitjai. Tuma asan ii uuntri akupkarmia nuna ashí umirkaitjai. Tura átum yamá túrarmena nuna wisha nútiksanak Yusna ana nuna tuke enentájjaj wakerukuitjai.

⁴ Tura Jesusan umirkaru ármia nuna máataj tusan pataatukni wekaimiajai. Túran áishmañkan nuwancha achikian sepunam enkeataj tusan túrimiajai.

⁵ Israer-patri uuntrisha Israer-shuara uuntrisha Tamaskunam íi-shuar susatá tusar papin ataktusar akuptukarmia nuna nuñkia nékainiawai. Jesusan umirkarun achikia ikiaankan juñ Jerusaréñnum asutniáwarat tusan werimjai’ tímiayi.

(Túramurj 9.1-19; 26.12-18)

⁶ “Tura wi jintiá wéaj Tamaskunam jeastatuk ajasaj nantu tutupin aj aya aneachma nayaimpinmaya newaat wajantruntmiayi.

⁷ Túrunamta wisha nuñká iniaarmajai. Nuyañka chichaamun antukmajai. Chichartak “Sauru, Sauru, ¿urukamtia imiá pataaturam?” turutmiai.

⁸ Takui wi aniasmajai “¿Amesha yáitiam, Uunta?”

Tutai “Wikia Nasaréñnumiá Jesusaitjai. Ame pataaturmena núitjai” turutmiai.

⁹ Wijjaj pujuarmia nu, newaat wajantun wáinkiar ti ashamkarmai. Túrasha nuñkia túrutun antukcharmai.

¹⁰ Tura wi tímiajai “¿Nuñkia, Uunta, warí ititurkattaj?” tímiajai.

Tutai Uunt chichartak “Wajakim Tamaskunam wetá. Nuñsha ame túratamna nuna ujatmakartatui” turutmiai, tímiayi.

¹¹ Kame wikia nú newaat ajakun íisan jjiiru kusurmai. Tuma asamtai winia tsaniakmar enkeki jurukiar Tamaskunam ejetiarmai’ tímiayi.

¹² Papru tuke aujmatki wéawai. “Tura nuñ Tamaskunam áishmañ Ananías pujumai. Niisha Yúsán aneak, Muisais akupkamia nuna umirkaui. Tura nú péprunmaya Israer-shuar ármia nu nin péñker enentáimtiarmiai.

¹³ Nú Ananías winia íirsataj tusa támai. Taa turutmai “Yatsuru Sauru, péñker iimtia.” Túrutkui nú chichamaik péñker íimmiajai. Túrunan Ananíasnasha wáinkiamjai.

¹⁴ Tura Ananías chichaak “Iwiaaku Yus, winia wakeramurun nekartuat tusa winia Uchirnasha, tunaarinchaa nuna, íisat tusa, winia chichampruncha antukat tusa ámin yaunchu Yus anaitiamkaiti.

¹⁵ Amesha Papru, Yusna ana nu íisumna nusha antukumna nusha ashí aents ujakartatme.

¹⁶ Tuma asamtai yamaisha ¿warí nákam? Tunaarun asakátrurat tusam Uunt Jesus enentáimtusam weme ní náari pachisam imiantia” turutmai.’

¹⁷ “Tura Jerusaréñnum waketkin Yusa Uunt Jjeen wémajai Yúsán áujsatat tusan. Nuñ íimiamajai.

¹⁸ Nuñ Jesus chichartak “Juñ Jerusaréñnum Wíi túramur etserkattamna nuna antukchar-tatui. Tuma asamta wari jinkim wetá” turutmiai.’

¹⁹ “Túrutkui wi tímiajai “Túrasha Uunta, juyá aents wi Israer-shuara iruntai jjeen wayan Ámin umirtamkarmia nuna nuñ matsatun achikian awatin sepunam enkeawarmia nuna nékainiawai.

²⁰ Tura nuyá Áminiu etserniun Estepañkan máiniakuisha wisha wajamjai. Túruiniakui, “péñkeraiti” tímiajai. Nú arantcha ní pushirín íirsamjai’ tímiajai.’

²¹ “Túrasha Uunt Jesus winia turutmai “Wetá. Israer-shuarcha matsatainia nuĭ akupkat-jame” turutmai” tímiayi Papru.

Suntara kapitiántrĭjn túrunamia nu

²² Nuĭ matsamarmia nu, núnaka antukarka untsumtan juáriarmiayi. “Juka mantamnatí. ħUrukamtaik iwiaakusha pujusat?” tiarmiayi.

²³ Tura aentska Paprun kajerainiak, ti untsumainiak pushirĭn tujaat ajapawar nunĭnancha nanĭkimkiamaikia ajarmiayi.

²⁴ Tura kapitián nuna wáiniak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ħUrukamtaik aents nin kajerainiak imiá untsumainia? Nekaatarum” tímiayi.

²⁵ Tura Páprun asutiátaĭ tusar jinĭkiárar awajsam Pápruka kapitiánin chicharuk “ħRúmanmaya aents áyatik asutiámniakait, ni túramurĭ nekartsuk?” tímiayi.

²⁶ Nuna táman antuk kapitiáncha uunt kapitiánin ujaktaj tusa werĭ chichaak “Maaj, túrataj tamena nu anearta. Ju áishmaĭ Rúmanam pachitkaitĭ” tímiayi.

²⁷ Nuna antuk uunt kapitián Páprun werĭ aniasmiayi “ħAmesha nekasmek Rumanam pachitkaitiam?” tímiayi.

Tutai Papru “Ee” tímiayi.

²⁸ Tutai “Wikia ti kuítian akikmakmiajai Rúmanam pachiĭnkiatniun” uunt kapitián tímiayi.

Tutai Papru tímiayi “Túrasha winia aparka Rúmanam pachitkia asamtai, wisha Rúmanam pachĭinkian akiĭniatĭjai” tímiayi.

²⁹ Nuna takui Páprun asutiátaj tiarmia nuna wárik iniaisar jíniar wearmiayi. Tura imia uunt kapitiáncha Rúmanam pachitkian jinĭkiá asa ashamkamiayi.

³⁰ Tuma asa kashin tsawĭr uunt kapitián, urukamtaik Páprun imiá kajerainia, nekaataj tusa wakerak Paprun werĭ jinĭkiámun atirmiayi. Tura Israer-patrĭ uuntrĭn ħíkĭch naamka armia nuĭajsha ikiaankamiayi. Tura nuĭkia ni matsatmanum Páprun itiar ajapĕn awajsamiai.

23

Israer-aentsu Úuntrĭn Papru timiania nu

¹ Papru Israer-patrĭ naamkarĭn úmamkes iis “Wĭ shuartiram antuktarum. Úchichik tuke yamaisha Yus ímmianum pĕnker wekainuitĭjai” tímiayi.

² Papru nuna takui Israer-patrĭ uuntrĭ Ananías, ni suntarĭn Papruĭ ayamas pujuarmia nuna “Wenunam awatiarum” tímiayi.

³ Tutai Papru tímiayi “Tsej, jimiárá chichamtinia ímiatá, Yus amincha asutiámattawai. Muisais akupeana nuna umiatsui tusam yajauch turutattsam pujame. Entá, ħnuĭkia urukamtia Muisais tímia nuka iniaisam ame suntarum winia asutiátarum tame?” tímiayi.

⁴ Tura nuna takui nuĭ wajarmia nu Páprun tiarmiayi “ħMaaj, amesha Patri uuntrĭ imiá yajauchisha chichaream?”

⁵ Tutai Papru tímiayi “Yatsuru, wisha Patri uuntrĭ áutskaitia tíchamjai. Nékaitkiunka núnaka tíchajai. Kame wisha nékajai, Yus-Chichamnum tawai “Atumĭ uuntrĭ yajauch chicharkairap” tawai” tímiayi.

⁶⁻⁸ Israer-aentsu úuntrĭya jimiárá írutka ármiai. Satuséu aents tura nuyá Pariséu aents nusháa írutkan Pápruka nekaamiayi. Kame Satuséu aentska, jakamunmaya nantaktincha Yusa suntarĭsha aentsu wakanĭsha tura iwianchcha atsawai, tiniu ármiai. Antsu Pariséu aentska, nuka ashĭ awai, tiniu ármiai. Nuna nekáa Papru kakantar chichaak “Wikia Pariséu áentsuitĭjai. Wĭ shuarsha Pariséu ániawai. Wikia ashĭ shuar jakamunmaya ukunam nantaktin átatui tu jintiamun, nekaataĭ tusar itlariarmiayi” tímiayi. Tura Papru nuna takui Pariséu aents tura Satuséu aencha nuámatak kajernaikiarmiayi. Túrunawar kánasaraĭn nusháa nusháa enentáimprarmiayi.

⁹ Nuĭkia ashĭ aents charaatum ajarmiayi. Tura Israer-shuara jintinniurĭ Pariséunam írutka armia nu wajakiar tiarmiayi “Ju áishmaĭ tunaan pĕnké túrchuiti. Yusa suntarĭ ħíkĭch wakancha nin nekas chichaschamashi. ħYa neka?” tiarmiayi.

¹⁰ Ti charaatum ajainiakui suntara kapitiántrĭ Páprun achiĭrchartimpiash tusa suntaran untsuk, “Jĭiktiarum, túrarum suntar pujamunam awayátarum” tímiayi.

¹¹ Nuyá kashi Papru Uuntrĭ mesekra ípiatuk “Kakaram ajasta, Papru. Juĭ Jerusaréĭnum winia ujakarumna núnismek Rúmanmasha ujaktatme” tímiayi.

Páprun máatniun wakeriarmiania nu

¹² Nuyá kashin tsawĭrmataĭ Israer-aents Páprun maataĭ tusar chichaman jurusarmiayi. “Papru máachkurkia yurumtsuk tura pĕnké úmutsuk matsamsattajĭ. Máachriĭka yajauĭchiniam yumiĭnkramu atai” tiarmiayi.

¹³ Nuna tiarmia nuka kuarenta (40) nan̄kaamas ármiayi.

¹⁴ Tura Israer-patri úuntrin tura Israer-aentsu úuntrincha weriar “Papru máachkurkia penké yurumtsuk pujustatji. Máachrikia yajauchiniam yumiñkramu atai” taji.

¹⁵ Tuma asamtai ashí Israer-patri naamkarijjai suntara kapitíántri seatarum, Papru tatí tusarum. “Kashin Papru itíata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar niñkia táatsaiñ náakattaji” tiarmiayi.

¹⁶ Tura Papru awę nú chichaman antuk suntar pujamunam taa Páprun ujakmiayi.

¹⁷ Tuma asamtai Pápruka suntara kapitíántrin untsuk “Ju uchi uunt kapitíánnum jukitia. Niisha chichaman takakuí” tímiayi.

¹⁸ Kapitíáncha uchin uunt kapitíánnum ejé tímiayi “Papru enkeamu pujana nu winia untsurak “Ju uchi uunt kapitíánnum jukitia. Chichaman takakuí” túrutui” tímiayi.

¹⁹ Uunt kapitíáncha nú uchin enkeki arantach jukí chicharuk “¿Warí turuttiaj tame?” tímiayi.

²⁰ Tutai uchi tímiayi “Israer-aents Páprun chichaman jurusarai. “Papru túramurí ti paant nekaatai tusar kashin Israer-shuara uuntrin ejetarum” turamartatui.

²¹ Tura amesha nuna takui anturkaip. Kuarenta (40) nan̄kaamas jintía akirtua pujuraini-awai. Tura “Papru máachkurkia yurumtsuk tura úmutsuk matsamsattaji” tuiniawai. Tuma asamtai yamaisha amin tití tusa nákarmainiawai” tímiayi uchi.

²² Tura uunt kapitíáncha uchin chicharuk “Ame túrutmena nu chikich aents penké ujakaip’ tímiayi. Nuna tí, uchin akupkamiayi.

Akupin Piriksaj ejetiarmiania nu

²³ Nuyança uunt kapitíáncha chikich kapitíánin jímíaran itíá chichaak “Urum, kashi ajapén ajastatuk ai, untsurí suntar ikiaankarta. Jimiará sián (200) aya náwek, setenta (70) kawainium eketka, nuyá chikich jimíará sián (200) nánkijjaiñ Sesaria nunkanam wétin iwiarata.

²⁴ Páprusha kawainium ekemkatin iwiarturta. Túrarum péñkerak ejetarum akupin Piriksaj” tímiayi.

²⁵ Tura niijjai ju chichaman áatrar akuptukmiayi:

²⁶ “Ti péñker akupin Píríks, wikia Krautiu Rísias ju papin áatjame.

²⁷ Israer-aents ju áishmañkan maatai tusar wakeruiniak achikiarmiayi. Tura niisha Rúmanmayá áentsuitkui wikia nuna nekaan suntarjai werin jukimjai.

²⁸ Wikia žurukamtaik achikiaruit? Tusa Israer-patri naamkarin jukimjai nin.

²⁹ Páprunka ii uuntri akupkamurin umiatsui tusar nin kajerarmiayi. Pápruka yajauch túrachu asa mantamachminiuyayi. Sepunmasha enkemachminiuyayi.

³⁰ Tura wisha Israer-aents nin máatniun chichaman jurusman nekaan amin akuptajme. Nuyasha nin kajerainia nunasha tajai “Atumsha Piriksaj werum átum warinma kajerarum nu titiarum” tajai. Ayu. Júchiniak tájame.” Nuna tu áatar akuptukmiayi.

³¹ Tura suntarsha ni uunt kapitíántri tímia nútiksaran Páprun kashi júkiarmiayi Antipatris péprunam.

³² Kashin tsawęrar suntar aya náwek wearmia nuka waketrarmiayi. Tura kawainium eketrainiaka Páprujai wearmiayi.

³³ Sesaria péprunam jeawar papin Piriksán súsararmiayi. Tura Pápruncha nuj ejeniarmiayi.

³⁴ Akupniusha papí aujsua amik Páprun aniasmiayi “Amesha, ¿túti akiiniaitiam?”

Tutai “Sirisia nunkanmayaitjai” tímiayi.

³⁵ Nuna takui akupin tímiayi “Wátskea kajertamainia nu taar turamainiakui anturkatjame” tímiayi. Tura nuyança uunt akupin Erutisa jeen awayá apujamiayi, suntar ísarat tusa.

24

Papru Píríksaj áujmatsamiania nu

¹ Tura señku tsawant nan̄kaamasaj Israer-patri uuntri, ni naarj Ananías, Sesarianam támiayi. Tura Israer-aentsu uuntri tura ti unuimiaru chichamtincha, ni naarj Térturu nujai táarmiayi. Ju aents Páprun kajerainia ásar akupniunam wearmiayi.

² Nuĵ Páprun itíarmatai Térturu chichatan juármiayi. “Uunt akupin Píríks, amesha yaimiu asakmin iisha shiir matsatainijai. Tura imiá neka asakmin ashí aents tímiatrusrik matsatainijai.

³ Tuma asakmin iisha ashí matsatmanum tuke tsawant ti shiir yumisamajme, uunta.

⁴ Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tímiayi.

⁵ Ju áishmañ Papru, suñkura utsukratniua núniniaiti. Niisha ashí nunkanam mesetan najanatniun Israer áentsun ikiakáiniaiti. Tura Jesusa aentsrj, Nasarénu tuinia nuna úuntriní.

⁶Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntri tana nujaj métek asutiátaí tusar wakerimji.

⁷Túrarin nuyanka kapitíán Rísias taa tapit achik jurutramkimiaji.

⁸Tura atumek akupin Piriksaj werum nuj aujmatkatarum, turamaji, tímiayi. Tuma asamtai amesha Píriks, Papru aniasta. Nuiñkia ii tájnia nu nekasaiti, nu nekaattame” tímiayi Térturu.

⁹Tura Israer-aents pujuarmia nu “Nekasaiti ashí ni tana nu” tiarmiayi.

¹⁰Nuyá Píriks, uwejejai, Papru chichasat tusa iniaktusmiayi. Túram Papru tímiayi “Amesha uunta, ju aentsu akupniurj ti untsurj uwitin pujusuitme. Tuma asamtai nuikia shiir enentáimsan páchitsuk chichastatjai.

¹¹Wats, wi túramur nekartuata. Yúsán áujсатаj tusan Jerusarénum wi wémajna nu tuse (12) tsawant nankaamasai.

¹²Nujsha yajauch áujmatki weaj wáitkiacharmai. Yusa Uunt Jeencha tura Israer-shuara ujtaí jeencha tura pepuru jintianmasha áentsnum charáa charáa ajá wekaaj penké wáitkiacharmai, tímiayi.

¹³Ju aents juí matsatainia nu wíniaka penké turutchamnia áiniawai.

¹⁴Túrasha júna paant ujaajme. Jesus yamarman jintiána nuna umíajai. Kame Israer-aentska wáitaiiti tuinia nuna wikia umíajai. Túrasha nuna túran ii uuntri Yusrj akupkamia nunak umiktasan pujajai. Jes, ashí Muisais aar akupkamia nuna tura ashí Yúsnan yaunchu etserin aar akupkarmia nunasha uminiaitjai.

¹⁵Tura jakaasha nantaktin átatui, tajai. Warí, péñker aents nútiksán yajauch aencha nantakiartatui imia Israer-shuar tuiniatsuk. Tura wisha nútiksának túrunatniuiti tajai.

¹⁶Tura wisha tiniu asan, wikia winia enentáiruj Yus ímmianum makuumatsuk wekasataj tajai. Tura áentsnumsha nútiksának penké makuumatsuk wekaajai’ tímiayi.

¹⁷Tura, uunta, untsurj uwitin chíkich chíkich nuñkanam wekaasuan amikian winia shuaruj támajai. Kuítrinchan kuítian susataj tusan tura Yusa kuítrincha nin susataj tusan támajai.

¹⁸Túran wisha, Muisais jintinmia nútiksának nijiaamaran, Yusa Uunt Jeen pujumiajai. Untsurj aents charaatum ajainiasha atsumiayi. Nuj wiki pujaj Ásianmayá Israer-aents wáitkiarmiayi.

¹⁹Tura wi yajauch túraitkuñkia winia wáitkiarainia nu táchatniukait ámin ujatmaktasa.

²⁰Túrachkuñkia juí pujuinia nu, Israer-patrj naamkarj matsatmanum wi pujumajna nuj yajauch túramun nékainiakka turutiarti.

²¹Kame, “jakamunmayá nantakminiaiti” tau asamtai makuurtiajtsarum pujarme” matsatmanum tímiay nujaj turutchartimpiash. Nú arantcha yajauch túramun penké nekar-tuacharmai” tímiayi Papru.

²²Táman antuk Píriks, Kristu shuarj túramun paant nekáa, áanik iniaisamiayi. “Antsu kapitíán Rísias támatai nuñkia nu chichaman nekaatjai” tímiayi.

²³Tura nuyá suntara kapitíántrin chichaak “Ju Pápruka tuke emetnati. Tura ishichkikia ankant apujsataram. Tura nuyá ni amikrj taa yáñtaj takui suritkiairap” tímiayi.

²⁴Tura nuyá chíkich tsawantaj ataksha Píriks ni nuwejai Tursirajaj támajai. Núwenka Israer-shuarauyayi. Pírikska “Papru itiatarum’ tímiayi. Papru Jesukristunun étserkui antimiyai.

²⁵Tura Pápruka yajauchiniam wekasashtincha naka wekasatniuncha, tura ukunam Yus tunáa áentsnaka asutiátniuiti takui Pírikska ashamak tímiayi “Antsu yamaikia máakete. Tura ataksha wi ankant pujakun untsukmijiam” tímiayi.

²⁶Tura, ankant ajastaj tusa Papru kuítian akirkashtimpiash, tu enentáimias, Píriks tuke untsúu wémiayi, chichastai tusa.

²⁷Tura nuyanka jimiará uwi nankaamasmatai Píriks akupin náamkamu ajapnamiayi. Tura chíkich aents, ni naarj Pursiu Jistu akupin náamkamiayi. Tura Pírikska, Israer-aents péñker enentáimtursarat tusa wakerak, Páprun sepunam tuke ikiukmijai.

25

Papru Jístujaj áujmatsamiania nu

¹Jístusha akupkatin takatan nankaamataj tusa Sesaria péprunam támajai. Tura menaintiú tsawant nankaamasmatai nuyá we Jerusarénum jeamiayi.

²Nujsha Israer-patri uuntri tura Israer-aentsu penkerjsha Páprun tsanumprurtai tusar Jístun weriarmiayi.

³Tura tiarmiayi “Waitneasam Páprusha Jerusarénum akupkata” tiarmiayi. Jintiá maatai tusar wakeruiniak nuna tiarmiayi.

4 Tutai Jistu tímiayi “Atsá. Páprusha Sesaria péprunam sepunam enkeamu pujawai. Tura wikia nuj wárik waketkittijai” tímiayi.

5 Nuyá nin tímiayi “Atumsha penkeri árumna nu, wíjjai Sesarianam wétiniaitruma. Tura nú áishmanka tunaari ákuinkia nuisha tífiniaitruma” tímiayi.

6 Jístuka Jerusarénnum ishichik tsawant pujusmiayi. Kame uchu tsawant tura tias tsawantcha pujushaiwash. Nuyá ataksha Sesarianam waketkimiayi. Tura nuj jeá kashin tsawar, akupin pujutainium pujus “Papru itiatarum” tímiayi.

7 Tura Papru wayamtaí, Israer-aents Jerusarénnumia taarmia nu káunkarmiayi. Túrawar ti nukap chichainiak “Tunáa túraiti Pápruka” tu tiarmiayi. Túrusha penké uyumamtiki-acharmiayi.

8 Pápruka chichamprumak tímiayi “Wisha tunaan penké túrachuitjai. Israera uuntri áarmaríncha umirkaruitjai. Tura Yusa Uunt Jeencha yajauch awajsachuitjai. Tura uunt kapitániasha yajauch penké chicharkachuitjai” tímiayi.

9 Jístuka Israer-aents penker enentáimtursarat tusa wakerak, Páprun tímiayi “Wakerak-minkia Jerusarénnum wemi. Wisha nuj ame túramurin nekaatjai” tímiayi.

10 Tutai Papru tímiayi “Amesha paant nékame, Israer-áentsnum tunaan penké túrachjai. Tuma asamtaí Rúmanmaya uunt akupniun wisha winia túramurun ujaktiniaitjai, nekartuati tusan.

11 Wisha jakamnia tímianu tunáa túranka, jákatniuncha ashamatsjai. Tura antsu turutainia nu nekashaitkiunkia wíniaka Israer-shuarnum surunkachminiitjai tajai. Tuma asamtaí seajme, wíi túramun uunt akupin Sésar nekartuati” tímiayi.

12 Tutai, nuyá ni írutramuríjjai chichasua amik, Jistu Páprun tímiayi “Uunt akupniuj wétaj tusam seame. Tuma asamtaí nuj wétatme” tímiayi.

Papru uunt akupniujai áujmatsamiania nu

13 Tura ishichik tsawant nankaasmatai akupin Akripia ni nuwejjai Pirinísejjai Jístun áujsataj tusa Sesarianam wearmiayi.

14 Tura untsurí tsawant pujusarmiayi. Tura nuj pujuiniaí Jístuka Papru túrunamun akupniun ujaak tímiayi “Jui áishman pujawai. Píriks nin achik enkea ikiukmiayi, tímiayi.

15 Kame wikia Jerusarénnum pujái Israer-patri uuntri tura Israer-aentsu úntrisha, Papru yajauchin túraiti tusar káutrukarmiayi, tímiayi. Mantamnati tusam akupkata, tu seatiarmiayi.

16 Takui wí tímiajai “Iisha Rúmanmaya áentstikia chícham nékatsuk, mantamnati tusar akupeatsji. Tsanumpruinia nu, emka táartin ániawai. Tura nuyá chichamprumatsain mantamnati tusar akupeatsji iisha” tímiajai.

17 Tíniu asan, táarmatai, wikia nákatsuk kashin tsawaran akupin pujutainium pujusan, Papru itiatarum tusan akupkamjai.

18 Tura Páprun tsanumprurtaí tusar taar chichainiaksha, wi enentáimmiajna núnaka tícharmiayi.

19 Antsu áyatik Yus umirkar túmatairin Papru nuna túrachai, tiarmiayi. Tura nuyasha áishman Jesus naartin nantaki iwiaakui tawai Pápruka, tiarmiayi. Nunak tiarmiayi.

20 Tura wikia nú chichaman túratniun nékachu asan, Páprun aniasmajai “¿Amesha Jerusarénnum wétaj tusam wakeramek? Nuj nu chichaman nekartamawarti” tímiajai.

21 Túrusha “Atsá. Juij pujustajai. Rúmanmaya uunt akupin Akustu Sésar nekartuati” tímiayi Papru. Takui, “nuinkia tuke sepunam pujustá. Tura wi ukunam uunt akupniun akuptuktajame” tímiajai” tímiayi Jistu.

22 Nuyá Akripia chichaak “Wisha itiursanak nu áishman chichaamun anturkaj” tímiayi. Tutai Jistu tímiayi “Amesha kashinka anturkattame”.

23 Tura kashin tsawar Akripia Pirinísejjai taar, iwiaa-iwiarmamu ajas wayawarmiayi. Suntara úntríjjai tura nú péprunmaya úntríjjai wayawarmiayi. Tura nuj Jistu, “Papru itiatarum” tímiayi.

24 Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishman ístarum. Ti untsurí Israer-aents Jerusarénnumsha tura jui Sesarianmasha ju áishmankan Páprun kajerainiak yajauch chichartuiniawai. Tura tuke iniaitsuk, mantamnatiuiti, turutainiawai.

25 Túrusha wíjjainkia tunáa jakamnianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai.

26 Tura wariniak uunt akupniun áatrataj nuna nékachu asan, Páprun atumin itiarjarme. Tura nekaska, Akripia, ame iniasta tusan itiarjame. Túrawakmin wi wariniak áartaj nuna nekaatjai.

27 Warí wisha, ni yajauch túramurin áattsuk, uunt akupniunam akupkashtiniaitjai” tímiayi.

26

Papru Akripiaj chichamprumakmiania nu

¹Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takui chichatan juarmiayi.

²⁻³Chíchaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyainia nusha nékame. Tuma asamtai yamá wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam pénger anturtukta’ tímiayi.

Papru ni yaunchu túrutairin ujakmiania nu

⁴‘Wí úchichik winia nunkaruj tura Jerusarénumsha pujusan wi túramajna nuna ashí wí aents Israer ainia nu nékainiawai.

⁵Pariséu ajasan, ni akupeamurin ititurchat ajin ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui.

⁶Túrasha wikia, jakamunmayá nantaktin átatui, tiniu asamtai wíniaka emetruawar ititariarmiayi. Túrasha núnaka Yuska ii úntrin yaunchu tímiayi. Yus tímia nuna túrunatawai wisha tiniu asamtai ititariarmiayi, tímiayi.

⁷Tura ashí mash Israer-shuarti, tuse (12) aents matsatka ájina nu, ju nantaktin chichaman Yus tímia nuna túrunati tusar nákainiaji. Tuma asar Yus áujukurⁱ, tsawajisha káshisha nú enentáimtuiniaji. Tura wisha nú chichamnak enentáimta asamtai wíniaka kajertuiniawai, uunt Akripia.

⁸Wari, atumsha “Yus jakancha iniantkimniaiti” tátsurmek’ tímiayi.

⁹‘Tura wisha yáunchuka Nasarénumia Jesusnan umirkaruka kajerkatniuiti, tu enentáimniuyajai.

¹⁰Tura Jerusarénum Yus-shuar ármia nuna kajerkarmiajai. Israer-patri uuntri chichamejai untsurj áentsun Jesusnan umirkarmia nuna sepunam enkeamijajai. Tura nú shuaran máiniakuisha wikia péngeraiti tu wémiajai.

¹¹Tura Israer-shuara iruntai jeen wayan ti asutiármiajai, Jesusnan umirkatniun iniaisararat tusan. Tura imiá kajerkaran chíkich nunkanmasha pataatu wearmiajai achiktaj tusan’ tímiayi.

Tamasku jintianam túrunamun ujakmiania nu

(Túramurj 9.1-19; 22.6-16)

¹²‘Tura Israer-patri uuntri tsanekatrukmetai, papin ni surusarmia nujaj, Tamasku péprunam wétaj tusan jíinkimijajai.

¹³Tura, uunta, nantu tutupin aj, jintiá wéaj newaat ajaki ti tsáapin, tsawái nantujaj nankaamas etsantrutramiayi. Tura wijíaj wearmia nunasha núnisarañ etsantrurarmiayi.

¹⁴Tura túrunamtai ashí nunká tepetar wáinkiaromiaji. Wiki Israer-chichamjai túrutun antukmajaj “Sauru, Sauru, ¿urukamtai imiá pataaturam? Amek enentáimin yajauch awajmamsame, wáaka sankanmiak numin ijiuma núnismek. Wí aents kajera asam túruname” turutmai.’

¹⁵‘Túrutkui wisha “¿Amesha yáitiam, Uunta?” tímiajai.

Tutai Uunt turutmai “Wisha Jesusaitjai, ame pataatamna nútjai.

¹⁶Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamnum, turutmai.

¹⁷Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuisha, tura chíkich aents kajertamainiakuisha ayampruktatjame, turutmai.

¹⁸Pénger jintintiata tusan akupeajme. Kame aencha kiritniumia jíinkiar tsáapinnum wekasarat tusan, tura iwianchin umirtsuk Yúsan umirkarat tusan akupeajme. Tura Winia enentáimtusarmatai Wisha ni tunaarjin tsankurattajai. Nuna túran Yusna ajasarú áiniana nujaj apusattajai.” Nuna Jesus turutmai’ tímiayi.

Papru mesekrampra umikman ujakmiania nu

¹⁹‘Tuma asamtai, uunt Akripia, Uunt Jesus nayaimpinmayá wantintiuurak turutmia nuna umirkataj tusan pujajai.

²⁰Enentai yapajáwar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusarénumian, Jutia nunkanmayancha tura nútiksanak Israer-shuarchanacha nuna ujakarmiajai. Tura ujainiakun “Yus-shuar ajasmarum paant ajasat tusarum, pénger túratatum” tímiajai ashí shuaran.

²¹Tura wi Yusa Uunt Jeen pujaj, Israer-shuar achirkar emetruawar mántuatai tukamá tujintrukarmiayi, Yus winia yaintiu asamtai.

²² Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura péechach ainia nunasha ujainiajai. Tura Muisaissha, Yúsnan etserniusha tiarmnia nunak étsereajai. Nú arantka tátsujai.

²³ Kristuka wáitsatniuyayi, tura jakasha émak nantaktiniuyayi, ii uuntri tiniu ármiai. Tura Kristuka nantaki Yusa chichamen í áentsun tura Israer-shuarchancha nútiksən ujaktiniuyayi. Nuna tu tiarmniyi. Tura núnaka wisha tu ujainiajai” tímiayi Papru.

Papru Akripián Yus-shuar awajsataj tusa wakerimiania nu

²⁴ Tura nuna takui Jistu kakantar tímiayi “Maaj, Papru, wáurme. Imiá unuimiatu asam wáurkame” tímiayi.

²⁵ Tutai Papru tímiayi “Atsá uunt Jistu, wáurtsujai. Antsu wi tájana nuka ti nekasaiti.

²⁶ Wi tájana nuna, uunt Akripia juí pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai niisha nékawai, tajai” tímiayi.

²⁷ Nuyá Akripián chicharuk “Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiayi.

²⁸ Takui Akripia chichaak “Maaj, ishichik awajtame Papru, Yus-shuar ajastin” tímiayi.

²⁹ Tutai Papru tímiayi “Tura ishichik chichamjajisha untsuri chichamjajisha, amesha uunt Akripia, tura ashí winia anturtukurmena nu, wijiái métek ajasúk tusan wakerajai. Tura antsu wia núnisaj jínkiámua núnaka wakeratsjai” tímiayi.

³⁰ Papru nuna tuasua amikmatai akupniusha, uunt kapitiáncha, Pirinísesha, tura nuí ashí pujuarmnia nu wakiarmniayi.

³¹ Tura arant wear, túrunamun chichasarmniayi. Tura tiarmniayi “Ju áishman mantamnamnian tunaamkachuiti tura penkesha sepunmasha enkeachminiaiti” tiarmniayi.

³² Tura Akripia Jístun tímiayi “Ju áishman “uunt akupin nekarati” tichaitkuínkia akupmai makuitji” tímiayi.

27

Páprun Rúmanam akupkarmiania nu

¹ Tura Páprun Ruma péprunam akupkatniun enentáimsarmniayi. Rúmaka tímiai, Itiaria nunkanam pujawai. Wisha Páprujai wémiajai. Pápruncha tura chikichnasha achikma ármia nunasha Akustunu tutai suntara kapitiántrijjai nenakar akupkarmniayi. Nú kapitiáni naari Júriuiti.

² Tura Atramitiunmaya kanu Asia nunkanam pepu ármia nuí wétasa pujumia nu enkemprarmiajai. Tura Tisarúnikianmaya áishman, ni naari Aristárku, in páchitkiuayai. Tisarúnikiasha Masetúnia nunkanmaiti.

³ Nuí enkemprar kashin tsawarar Sitiun péprunam jeamiajai. Nuí jeawakrin kapitián Juriu, Páprun waitnentak tímiayi “Ame amikrumjín wetá. Au firmasarti” tímiayi.

⁴ Tura Sitiunnumia jíinkir, kanujai wesar nase tukumpramprakin Chipri núnkaka menanmaani aa lkiukmiajai.

⁵ Tura nayaantsanam wesar Sirisia tura Pampiria nunkanam ayamchik nankamakir Mira péprunam jeamiajai. Nuka Risia nunkanmaiti.

⁶ Nuí jear nú kanu ikiukmiajai tura chikich kanu Arijiántrianmaya taa Itiaria nunkanam wétasa pujumiayi. Nú kanunam suntara kapitiántri, enkempratarum, turammiajai.

⁷ Tura untsuri tsawant yáitmataik we-wémiajai tura ti wiántkar Nítionam jeastatuk ajasmiajai. Tura nuísha nase tuke tukumkarta asamtai Sarmun nunkanam ayamchik nankaamakir, Kritia nunkanam áawinini ayamchik wémiajai.

⁸ Tura Kritia nunkanam ayamchik wesar itiurchat akui wáitsar wea-wéakuar “Shiir Pujutai” tutainium jeamiajai. Nusha Rasea péprunam tíjiuchiiti.

⁹ Yáitmataik wea asar ti táasmaji. Tura yumi yututai jeatema asa ti tsúmainiuyayi nayaantsanam wétin.

¹⁰ Tura Papru chicharuk “Amikru antuktatum. Wi nékajai, yamaí wéakrika ti tsúmainiti. Kanusha tura káarak kanunam enketainia nusha menkarattawai. Tura iisha núnisrik kajinchatjash” tímiayi.

¹¹ Suntara kapitiántrinikia Páprunka anturtsuk, kanú wianniurjín kapitiántrincha tura kanú kapitiántrincha chichamen anturkarmniayi.

¹² Tura nuí Shiir Pujutai tutainium yumitin pujustin pénkerchaitkui “Nuínkia juyánka wéartai. Pinise péprunam jeamainchuashit” ashí tiarmniayi. Nú péprusha Kritia nunkanam nayaants ayamach pujawai. Nú péprunam yumitin pujustinian wakeriarmniayi, arakia nunkaani kakaram nase nú péprunam jeachu asamtai.

Tsúmainium wekasarmiania nu

¹³ Tuma asamtai ukunam nase nunkaaniá tápiriri ajakui, ii wétin yamaikia pénkeraiti, tu enentáimsarmniayi. Túmakui kanu emetai jiru júusar jíinkir Kritianam ayamchik wearmiajai.

¹⁴ Túrasha árusaṅ arakiṅ kakaram nase, Nuristi tuinia nu tukumpramiayi.

¹⁵ Nase kanun tukumpra asamtai iisha atsantratin penké tujinkiamiyai. Túmaku, áankisha juramkitiai tusar iniaisamiyai.

¹⁶ Tura Kritia nuṅkanam áawinini naṅkaamakur nuṅkia nase ishichik mijiantmatai, uchich kanu japikir wémiai nu ti takasar uunt kanunam enkemriyai.

¹⁷ Tura enkerar chapikjai uunt kanun jinḱiáarmiayi ewe najanatai tusar. Tura náikim mukutniunam, Serti tutainium nase juramkishtajias tusar, kanunam yakí tarach aan itiararmiayi. Nu tarach nase úsuktin tusar nenarma árimiayi. Túrawar áyatik nase juramkitiai, tiarmiayi.

¹⁸ Tura kashin tsawarmatai nasesha chíchimisha tímiatrusaṅ kakaram aa asamtai kanunmayan káarak irunmia nuna nayaantsanam ajapawarmiayi.

¹⁹ Menaintiú tsawant naṅkaamasmatai iisha ii uwejejáin kanunam káarak iruniarmia nusha entsá utsaṅkarmiayi.

²⁰ Tura untsurj tsawant tsawajsha etsantrachmiayi tura káshisha yaasha tsaparcharmiayi. Tura nasesha ti kakantar tukumpramkurin “Yamaikia uwempratin atsawai” tiarmiayi.

²¹ Tura iisha ti untsurj tsawant yurumsuk matsatu asakrin, Papru ajapén wajakí tímiayi “Amikru winia nuik Krítianmayanḱa jíintsuk anturtukuitkiurmiṅkia yamá ji iturchatnum pujutsuk tura emeṅkatmatsuk pujaajai’ tímiayi.”

²²⁻²⁴ ‘Yamá kashi winia Yusru suntarj nayaimpinmaya wantinturkayi. Nú Yúsan umirkaitjiana nu akupturkayi. Tura nu taruti “Ashamkaipia Papru, turutui. Ame-sha Ruma pérunam uunt akupniunam jeattame. Tura chikichnasha ámijiai kanunam enketainia áarmatai uwempratniun Yus tsanḱatkarai” turutui. Tuma asamtai, amikru, shiir enentáimsatarum. Atumsha mash uwemprattarme. Túrasha kánuka mesertatui.

²⁵ Wisha winia Yúsrin nekas enentáimtajai. Yusa suntarj turutainia nuna nekas tu túrunattawai, tajai. Tuma asamtai kakartarum.

²⁶ Tura chíchimisha nuṅka uchich pújakmanum nuj patatmittiaji” tímiayi.

²⁷ Ayu, katurse (14) tsawant naṅkaamasmatai nú kashi Atria nayaantsanam jeamiyai. Nuj nase náṅkamas juram wémiai. Nuyḱa kashi ajapén wiantin armia nu nuṅka ámunam jeateman nekaawarmiayi.

²⁸ Tura urutná kúnakit tusa nekapmamiayi. Túram tráinta sais (36) mítruuyayi. Nuyasha ékemsan ataksha nekapmamiayi. Nuṅkia painti siati (27) mítru nekapmamiayi. Tuma asa nuṅká anumsatuk ajasun nekaawarmiayi.

²⁹ Tura kayanam ijuikaj tusar ashamainiak kuaru jirun kijinia chapikjai kanú senkarin jinḱiáwar entsá ajunḱarmiayi. Kijin asamtai, inít tepeámtai nase juramkichmi tusar túrawarmiayi. Tura wake mesekar, tsawgarti tusar matsamarmiayi.

³⁰ Tura matsatainaij wiantin armia nu, iikia uchich kanunam enkemprar pisarchatjias tu enentáimsarmiayi. Túmainiak kanú nujinia chikich jirun ajuntai tawa nútiksaraṅ uchich kanun ajuntai tusar pujuarmiayi.

³¹ Tura tuma wáiniak Papru suntera kapitántrin tura ni suntarincha ujakmiayi. “Ausha uunt kanunman enketainiachkuṅkia atumsha uwemprashtatrumé” tímiayi.

³² Tutai suntarsha uchich kanú chapikrin tsupirkar entsá ajunḱarmiayi.

³³ Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumsuk pujarme.

³⁴ Seajrume, ishichkisha yurumárú kakaram ajastarum, uwemprataj tusarum. Iimiata, nekaatarum, imiatkisha túmatsuk péemkattarme” tímiayi.

³⁵ Nuna tuasua amik Papru apatkun achik Yúsan yuminsamiayi ashí íimianuman. Tura puuk yuamiayi.

³⁶ Tura apatkun yuan wáinkiar, ashí aents shiir enentáimsar yurumáwarmiayi.

³⁷ Nusha ashí aents irurmaka jimiará sián nuyá ataksha setenta sais (276) árimiayi.

³⁸ Yurumáwar ejemakar, yurumkanka entsá utsaṅkarmiayi, uunt kanu wampú ajasat tusar.

Kanu penké mesermiania nu

³⁹ Tura tsawarmatai wiantin armia nu, nuṅkan nekaacharmiayi. Túrasha éṅkentamunam káanmataa aan wáinkiar “Ái kanu anuntai” tiarmiayi.

⁴⁰ Nuyá jiru entsá ajunman chapikrin tsupirkar entsá ikiukiarmiayi. Tura kanait jinḱiárma ármia nuna chapikrin tsupirkarmiayi. Tura tarach kanú nujiin amia nuna nenakararmiayi. Túram kanu káanmatkanam anumsatuk ajasmiayi.

⁴¹ Tura wainchi jímiar ámunam jeá kanu entsá wayá tepeamiayi. Tura kanú senkarinḱia chíchimi yakí takuir ajiamu asa kupintramiayi.

⁴² Santarsha, achik júamu armia nú shuaran máataj tusa wakermiayi, yukuak pis-ararajin tusar.

⁴³Tura kapitiáncha Páprun uwemtikrataj tau asa nuna túratniun tsankatkachmiayi. Antsu chichaak “Emka yukuaktin nékarmena nu yukuakrum péemkatarum, tímiayi.

⁴⁴Nuyá chíkichkia kanunmayá numi, kame nápkamas numi achikrum awamkarum péemkatarum” tímiayi. Tu túrwar ashí iwiaakuk jíintrarmiayi.

28

Marta nuñkanam túrunamia nu

¹Tura ashí iwiaakuk jíintrar, nu nuñka Marta naartin nekaamiayi.

²Tura nuj matsamin armia nu, shiir awajtamsarmiayi. Tuma asamtai iisha tsetsema asakrin, tura yumisha yútakui, uunt jinia ikiapárrarmiayi. Tura “anamaitiarum” turammaji.

³Pápruka jinia kukarun ikiaanak jinium pataamiayi. Túmawaj napi tsuéran ashamak jíinki, Papru uwején nemaramiayi.

⁴Tura nú nuñkanmayá aents, Papru uwején napi nemaran wáinkiar “Ju áishmansha shuáran majchuashit, tiarmiayi. Nayaantsanmayá uwempraitiatan ní yusrj iwiaaku átinian suritiawai” tiarmiayi.

⁵Páprusha ni uwején pear napin jinium awanmiayi. Tura penkesha yajauch ajaschamiayi.

⁶Tura niisha eáchatpiash tusar ii pujuarmiayi. “Túmatkesha jaka inianchatpiash” tiarmiayi. Túrasha ti núkap pujussha penké najawéachmiayi. Túrunamtaí, nuñkia nusháa enentáimprar “Pápruka yúschashit” tiarmiayi.

⁷Nú nuñkanam aentsu penkerj ámiayi ní naari Pupriu. Nú Pupriu ni jeen in itiaarmamiayi. Tura menaintiú tsawant yurumkancha suramsarmiayi.

⁸Tura nuj pujarin Pupriu aparj tsuer, numpajai ijiarki jáamiayi. Túmakui Papru weri iyumiayi. Tura Yúsan áujtus amik uwején nin awantkamiayi. Túram péñker ajasmiai.

⁹Nu túramun nekaawar, nú nuñkanmayá aents jaa armia nu tariar, niisha péñker ajasarmiayi.

¹⁰Túram incha ti shiir enentáimturmasar núkap ajampramsamiayi. Túram ukunam ii wétin jeamtaí ashí ii atsumamun suramsarmiayi.

Rúmanam jeawarmiania nu

¹¹Ii wétsuk nú nuñkanam menaintiú nantu pujusmiayi. Tura nuyá chíkich kanunam enkempramiayi. Nu kanusha Arijiántrianmayá yaunchu tau menaintiú nantu yumi yútakui nuj pujumiayi. Nú kanu nujjin numi-yus najankamu jímiar ekemiarmiayi, ní náarinkia Kástur tura Púruks.

¹²Iisha nuj enkemprar weri Serakúsa péprunam jeamiayi. Nuñ menaintiú tsawant pujusarmiayi.

¹³Tura jíinkir nuyanka nayaantsa ayamach weri Rijiu péprunam jeamiayi. Nuñ kanarmiayi. Tura kashin anariá nase suut umpuunti támiayi. Tuma asamtai nú kashinkia Putiuri péprunam jeamiayi.

¹⁴Nuj jeawakrin Yus-shuar pujuarmia nu, ni jeen juramkimiayi. Tuma asamtai nuñ chikichki tumín pujusmiayi. Tura nuyanka nuñkan Rúmanmaani wémiayi.

¹⁵Tura Rúmanmayá Yus-shuar, ii jeatniurj in neka ásar jintiá inkiunmaktai tusar winiarmiayi. Chíkichkia Apiu pepuru támanum táarmiayi, tura chíkichkia, Menaintiú Jeá tutainium táarmiayi. Nuna káunkan wáiniak Papru shiir enentáimias Yúsan yuminsamiayi.

¹⁶Tura ii Rúmanam jeawakrin kapitán Juriu achikia yarumman Rúmanmayá uunt kapitánin ejetimiayi. Túrasha, Pápruka jeá ikiamas niisháa pujustí, tiarmiayi. Tura Páprun ísat tusa chikichik suntarnak ní jeen apujtusarmiayi.

Rúmanam Papru Yus-Chichaman etserkamiania nu

¹⁷Nuyá menaintiú tsawant nankaamasmataí Pápruka Rúmanmayá Israer-aentsu penkerj in unsuk ikiaanak “Yatsurtiram antuktarum. Wisha Israer-áentsun yajauchin penké túrachmiajai. Tura ii uuntri akupkarmia nunasha yajauch chicharkachmiajai. Tuma aij Jerusarénnum winia achirkar Rúmanmayá áentsnum surutkarmiayi.

¹⁸Tura nu aencha winia anintsar, akupkatai, turutiarmiayi, wisha penké yajauchin, mantamannia tímianu túrachu asamtai.

¹⁹Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin nekarati” tímiajai. Wikia wíi shuara tunaarj in kapitánin ujaktinian táchaitjai.

²⁰Tuma asamtai, yatsurtirmin, atumin unsukjarme chichastaj tusan. Yusa anaikiamurj, Israer-shuarti náakajnia nu táwiti wí tu étserkui, juí achikiar jinjúkíamu pujajai” tímiayi Papru.

²¹Tutai niisha tiarmiayi “Iisha Jutía nuñkanmayá aentsti, ame yajauch túramu papí penké wáinkichuitji. Tura ii shuar nuyá táarainia nusha “au yajauch túraití” tu ujatmakchar-maji.

²² Túrasha ashí nunkanam yamaram chichaman jintinian yajauch chicharainiawai tama antukji. Tuma asamtai amesha nu warintia enentáimtam nekaatai tusar wakeraji” tiarmiayi.

²³ Nú tsawantaj iruntrami tiarmia nú tsawant jeamtai, ti untsurj aents Papru pu-jamunam iruntrararmiayi. Papru jintintiainiak Muisais yaunchu aar akupkamia nujaj tura chíkich Yúsna etserniu aarmarjijaisha, Jesus nekas Yusa Anaikiamurjinti tusa paant jintintiwarmiayi. Nuna tura káshik nankaama Yus akupeamunam pachiinkiatniun étse-étserkua kjaraj iniaisamiayi.

²⁴ Tura Papru táman antukarmia nu, chíkichkia, nekasaiti tusar umikiarmiayi. Tura antsu chíkichkia, nekaschaiti tusar umikcharmiayi.

²⁵ Chikichkí enentaik’ enentáimsatin atsa asamtai, jiinki weartasa pujuarmiayi. Túmainiakui Papru chichaak “Nékasen Yusa Wakaní yaunchu Yúsna etserniu, Isayas naartin áarmarjijaj ii úuntrj chicharuk juna tímiayi:

²⁶ “Ame weme au aents ju titia:

“Ántutka ántakrumsha nekaashtatrome,

Íitkia iyakrumsha wáinkiashtatrome.

²⁷ Warí, au shuara enentáj katsuarai;

Kuishjijaj ántaksha ántichua núnin ániawai,

Jiisha epetkamua áanin ániawai,

Iyaksha wáinkiajn tusa, ántaksha antukajn tusa

Enentáimkiusha nekaawajjn tusa,

Winí uwemprajn tusa, tura Winí tsuamarajn tusa túrunayi”.

Nuní áarmaiti.

²⁸ Tuma asamtai, nekaatarum. Yamaikia Yusaj uwempratin ana nuna Israer-shuarsha susamuiti. Tura niñkia nekas umikiartatui” tímiayi.

²⁹ Tura Papru nuna tj iniaisamtai Israer-shuar nuamtak núkap chicharnaiyasua wearmi-ayi.

³⁰ Tura Pápruka nujn jea ikiamsamunam jimiará uwí pujusmiayi. Tura ashí aents nin iyutaj tusa wearmia nuna ni jeen itiaamiayi.

³¹ Tuma asamtai Papru arantutsuk urukuk Yus akupeamunam ati, Uunt Jesukristu túramurjncha ashí etserkamiayi. Nútiksan etserkatniuncha Páprun penké suritkiacharmi-ayi.

Papru RÚMANMAYA SHUARAN papí akuptukma

Papru Rúmanmaya Yus-shuaran áatramania nu

¹ Wi Papru Jesukrístu takarniuitjai. Núnisañ Yus achirak ni Shiir Chichamen etserkat tusa akatar akuptukmiayi.

² Nu Chichamun Yus yaunchu “akupkattajai” tímiayi. Núnaka Yúsna etserin Yus-Papiniun paant ujakarmiayi.

³ Nu Chichamnum Yus ni Uchirín áujmatui. Ayashjijainkia Tawit weeanum akiiniamiayi.

⁴ Tura ni tishiir wakanjjiainkia Yusa Uchirínti. Tura ti kakarmaiti. Jakamunmaya nantakmiajai nekas Yusa Uchiríja nu, paant nekanamiayi. Niisha ii Uuntrí Jesukrístui.

⁵ Ni túramujai Yus shiir enentáimturuk nu Shiir Chichaman etserkat tusa akuptukmiayi. Núnisañ ashí nunkanmaya shuar nu chichaman umirkar Jesusa náarín shiir awajarat tusa akuptukmiayi.

⁶ Atumsha nuyá shuaraitrume. Tura Jesukrístunu ajasarat tusa Yus achirmakuitrume.

⁷ Ashí Yus aneamutirmincha Rúmanam matsatrum nuna ju papin áateajrume. Yus ti pénger awajtamsatniun wakerutmarme. Ii Aparí Yussha ii Uuntrí Jesukrístusha waitnentrainia ásar imiatkinchanum ti shiir pujustinian yainmakarti.

Papru Ruma péprunam irautinian wakerimiania nu

⁸ Émkasha, átum Yus nekas enentáimtamun ashí nunkanam áujmatenan nekaan Jesukrístun pachisan Yúsna ti shiir yumisajai.

⁹ Tuke enentáirjai Yusa Uchirín ashí shuarum etsertajai. Túrakui wi atumin ti Yus aneamutirmincha Rúmanam matsatrum nuna ju papin áateajuke áujtamun Yus nékarui.

¹⁰ Ashí tsawant ni wakerutakuinkia íitjarum tusan Yúsna seajai.

¹¹ Nekas íitniun wakerajrume. Nuj jean wakanmin yainkian Yusjai kanakchamin ajasúk tusan wakerajrume.

¹² Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

¹³ Yatsurú, tuke íitjarum tusan wakerimjiarme. Túrusha iyatsjarme. Kame Yus-Chichaman ujaakun chíkich shuarnuma áintsañ atumjíncha Yus kakaram takasman wáinkiatniun wakerajai.

¹⁴ Wikia Yus akuptuku asamtai ashí shuaran ujákártiniaitjai. Unuimiaruncha tura unuimiarancha, ti nékainia nunasha tura nékachuncha, métekrak ujakartiniaitjai.

¹⁵ Tuma asan atumniasha Rúmanam pujarmena nunasha Uwempratín Chichaman ujitjarum tusan pujajai.

Uwempratín Chicham kakarmaiti

¹⁶ Nu Shiir Chicham Yusa kakarmarjijai ti kakaram asa ashí shuaran uwemtikramniaiti. Tuma asamtai natsantsajai. Nekas Israer-shuarnasha tura chíkich shuarnasha núnisañ uwemtikramniaiti.

¹⁷ Nu chichamnum Yus enentáimsamia nu páantaiti. Júiti: Áyatik Yúsna nekas enentáimtuiniakui Yuska “péngeraitme” tíminiaiti. Yus-Papiniunsha núnisañ tawai: “Yúsna nekas enentáimta nuna Yus “péngeraitme” tutai tuke Yusjai shiir wekasattawai.” Tu áarmaiti.

Aentsu tunaarí

¹⁸ Shuar nekas chichaman nakitrar yajauchín túrataj tusar suriimiainiawai. Túrawar tuke tunaarintín áiniawai. Nu shuaran Yus ti kajerkar ti asutiátniun nayaimpinmaya paant awajsaiti.

¹⁹ Tura nu shuarka ashí Yusna nekaamnia nuna Yus paant awajsa asamtai pénger nékainiawai.

²⁰ Kame yámankamtaiknumiá Yus wáinchataitai ni najanamurjjai juka paant nekaamniaiti: Nekas Yus asa tuke kakarmaiti. Nusha ti paant asamtai nu shuar tsankurnarchartatui.

²¹ Yúsna nékainiyat shiir awajsaarmiayi tura yumisacharmiayi. Tuma ásar aya ánta nunak enentáimtuiniak ni enentái tunaajai piakai.

²² Tura ti nekajai tuñiyat enentáimcha núnin ajasaraí.

²³ Túmainiak jákachmin Yus imiá shiira nuna iniaisar shuar jakamnia nakumkamun shiir awajenawai. Tura nu arant nanamtinniasha napincha kuntinniasha yajasmańcha nakumkar nuna shiir awajenawai.

²⁴ Nu asantai imiá yajauch enentáimiainiakui “áanik asati” tímiayi Yus. Túramtai ti natsanmainian túrunainiawai.

²⁵ Yusna imiá nekasa nuna nakitrar antsu wait-chichaman anturkar nuna túrin ániawai. Tuke Yúsak shiir awajsatniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnasti” taji.

²⁶ Nuna túrin áarmatai Yus natsanmainia nuna wakeruktinian tsan̄katkarmiayi. Túramtai nuwasha áishmańjai tsanińtinian nakitrar nuamtak yajauch awajainiawai.

²⁷ Núnisań áishmańsha nuwajaj tsanińtinian iniaisar nuamtak áishmańkak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayash̄j wáitsatniunak sumamawarmiayi.

²⁸ Tura tuke Yúsak nakitiainia asantai ti yajauch enentáimiainiak pen̄ké túrachminia nuna túrawarti tusa Yus tsan̄katkarmiayi.

²⁹ Nu shuar ti tunaajaj piaku ániawai. Tsanirmausha aya kuńniak wakerincha tura yajauch awajin ániawai. Nu arantcha awakmakun kajerniusha mańkartincha tuke máanaincha anańkartincha pen̄kercha awajkartincha, tsanumniusha ániawai.

³⁰ Nu arantcha chikichnasha yajauch áujmatin ániawai. Yúsnasha nakitiainiawai. Áimniusha ániawai. Tura “pen̄keraitjai” tiar nańkaamantu enentáimtumainiawai. Tunáa túratniun eainiawai. Aparincha nukurincha umirainiatsui.

³¹ Enentáincha ániawai. Tana nuna umichu ániawai. Aneńkartichu ásar waitneńkartichu ániawai. Tsan̄kurcha ániawai.

³² Yuska “Shuar nuna túrinkia jákatniuiti” taman nékainiyat tuke túrukin wénawai. Tura nu arantcha chíkich yajauch túramtai ti shiir wararenawai.

2

Shuar tunáa túramun Yus paant nékawai

¹ Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekasa sumamame.

² Yuska nu tunaan túrin ainia nuna súmamtikiashtinkiait.

³ Amesha nuna túrin “imiá yajauchiiti” táyatam amesha métek túrakminkia Yus sumantikiattana nuyá žitiurak uwemprattam?

⁴ Yus ti waitnentrama asa nu tunáa ikiukim Nin enentáimtustinian katsuńtramuk nákarawai. Tura pen̄ker asa wárik asutiámchakui sumamashtinaiťjai žtu enentáimtumamek? Tu enentáimkium ni waitnentrammarj ántar awajsaitme.

⁵ Tura tunaarum enentáimtutsuk tuke túrakmeka súmamtikiatin tsawantaj ti tunáa irutmampramujaj ti asutniáttame.

⁶ Nu tsawantaj ni túramujaj métek Yus ashí shuaran akirartatui.

⁷ Shuar tuke pen̄ker túrak ashí shiira nunasha tura tuke amuukachmin ainia nunasha wakeruiniana nuna Yus tuke iwiaaku Niijjaj shiir pujustinian sústartatui.

⁸ Antsu pen̄kera nuna wakerutsuk antsu aya yajauchin wakeruiniak Yúsak nakitiainia nuna Yus ti kakerak asutiáwartatui.

⁹ Nekasa Israer-shuarsha tura núnisań Israer-shuarchasha tunaan túrin ániakka ti wáitsartatui.

¹⁰ Antsu nekasa Israer-shuarnasha tura núnisań Israer-shuarchanča pen̄ker túrin ániakka núnaka Yus ti shiir imiatkinchanun apujsartatui.

¹¹ Yus ashí shuaran akantsuk mai métek iyawai.

¹² Shuar Muisais akupkamun nékatsuk tunaan túraka aya júnisań sumamawartatui. Tura shuar Muisais akupkamun nékayat tunaan túran̄ka nu akupkamujaj sumamawartatui.

¹³ Akupkamun aya antukarua nuka Yusaj pen̄ker ániatsui antsu antukar umirainia nuna Yuska “pen̄keraiti” tawai.

¹⁴ Israer-shuarchaka Muisais akupkamun takakainiachkusha aya ni enentáijjaj nu akupkamun umirainiak

¹⁵ nu umireamujaj Yus nu akupkamun ni enentáin ikiursarua nuka paant nekaamni-aiti. Nujaj métek túruiniak shiir enentáimiainiawai. Tura métek túruiniachkun̄ka pen̄kercha enentáimiainiawai.

¹⁶ Wi Uwempratin Chichaman étsereaj nuj ashí shuar uūkrisha túramun ashí paant awajstartatui. Tura nuna etserkatniun Jesukristun anaitiukmiayi. Nu tsawantaj tunaan túrin sumamawartatui.

Israer-shuarsha Muisais akupkamun umircha ániawai

17 Ámeka “Tura Israer-shuaraitjai. Muisais akupkamun takakkui winia Yúsruka ti shiir enentáimturui, tátsumeash.

18 Yus wakeramuncha nékajai. Tura akupkamun nekaan péñkera nuna wakerajai, tátsumeash.

19 Wakannium kusuraru áinia nunasha jintintiamniaitjai. Tura tsáapninian nekamтики-awarminiaitjai, tátsumeash.

20 Akupkamu ti penker neka asan nekasa nuna unuimiaruitjai. Tuma asan nékachuncha ántuiniachuncha jintintiamniaitjai” tátsumeash.

21 Pai, chíkichka unuiniaitmesha ¿urukamtai imia ámeka unuimiatsum? “Kasamkash-tiniaiti” tu étsereatsmek. Táyatmesha ¿urukamtai ámeka kasamam?

22 “Tsanirmashtiniaiti” tátsumek. Enta, ¿urukamtai ámeka tsanirmam? “Ántar-yusan nakiti-ajai” tátsumek. ¿Urukamtai ámeka nu yusa jeeniá kasamam?

23 Akupkamun takakjai tusam shiir enentáimtumayatam nu akupkamu umireachkum Yus yajauch awajeatsmek.

24 Yus-Papiniusha núnis áarmaiti: “Átum péñker umirchamujai Israer-shuarcha Yúsan yajauch chicharainiawai.”

25 Muisais akupkamia nu ashí umireakmeke nii timia núnismek tsupirnaktin péñkeraiti. Tura takamtsuk umireachkumka tsupirnakcha núnisketme.

26 Chíkich shuarsha tsupirnakchaitai Muisais akupkamun umireakka tsupirnaksha tsupirnakua áintsan̄kete.

27 Nu shuar tsupirnakchaitai akupkamun ashí umireak atumin tsupirnakutirmin akupkamu takakuitiatrum umircha asakrumin súmamtikramawartatui.

28-29 Kame nekas Israer-shuarka aya pátatkechu antsu tuke enentáijijai Yúsnan wakera núiti. Núnisan̄ nekas tsupirnakchaitai aya ayash̄jijainchuiti antsu enentáiniam shiir áinia núiti. Nekas akupkamu aya áarchamuiti antsu nekas enentáijijai umirkamua núiti. Nekas tú tura núnaka aents shiir enentáimtuiniachkuisha Yus shiir enentáimtaiwai.

3

1 Núnis ajsa Israer-shuar ainia nu ¿warí péñkernak takakainia? Tura tsupirnakchaitai ¿wariniak yayá?

2 Ti péñkeraiti. Warí, émkaka, Yus ni chichamen Israer-shuaran súsacharmakia.

3 Kame chíkich chíkich umichu áiniakui Yus tsan̄katkamia nuna nú shuaran súsachmatain̄kia nuikia “Yus umichuiti” ¿títinkiait?

4 Péñkea. Antsu Yuska nekas túratniua nujai métek ashí túriniaiti. Shuar umichu áiniakuisha ni támarin̄ mash umiktatui. Ni tamajai shuáran wáitrin awajeakka nusha péñkeraiti. Núnisan̄ atí. Yus-Papisha métek tawai:

“Támena nuna “imía nekasaiti” tiartatui, tura súmamtikramataj tuíniakuisha nupetmaktatme” tawai.

5 Nu arantcha, “Wi tunaan túramujai Yus imiá péñkera nuna paant awajeakka ¿urukamtai winia asutiuwa? ¿Nuka péñkerkait?” tíchatapash. (Kame aents chíchainia núnisnak tajai.)

6 Warí, Yus péñkerchaitkiun̄ka ¿itiurak ashí shuara tunaarin̄ súmamtikiawarat? Kame imiá péñkeraiti.

7 Núnisan̄, “Wi umirkachmajai Yus tuke umiiniana nuna paant awajeaknaka nuikia nujai in shiir awajsamtai ¿urukamtai “tunaitme” túruta?” tíchatapash.

8 Warí, “tunáa túramujai Yúsan péñker awajeajai,” tú nekas enentáimpramniaitkiun̄kia shuar nuikia “Wats, ashí péñker áti tusar tunáa túratatí” túmin ainti. Kame chíkich shuar in kajertamainiak “nuna jintintiainiawai” túramji. Nu shuar sumamawartin áiniawai.

Ashí shuar tunáa túraitji

9 Nuikia Israer-shuartikia chíkichjai nan̄kaamas ¿péñkerkaitiaj? Péñkesha. Warí, Israer-shuartisha Israer-shuarchajajisha ashí métekrak tunaan túrin áiniawai. Núnaka jú áarmajai paant awajsaitjai.

10 Yus-Papisha núnisan̄ tawai:

“Péñkeran túrin chíkichkisha atsawai.

11 Yúsnan nekaatniun nakitiainiawai. Yusnasha eajiniatsui.

12 Yusnumiá kanakiar men̄kakatniunam wénawai. Chíkichkisha péñkeran túrin pen̄ké atsawai.

13 Ashí yajauch chíchainiak iwiarsamu yama urainiua núnisan̄ áiniawai. Ni chíchamejai tuke anan̄kartin áiniawai. Chíchame napía áintsan̄ najamin áiniawai.

14 Aya yajauchin̄ kakaram áujmatin áiniawai.

15 Máataj tusa wárik yujarin áiniawai.

16 Aya ti itiurchat ti yajauch awajin áiniawai.

¹⁷ Shiir pujustinian nékainiatsui.

¹⁸ Ishichkisha Yúsan ashamenatsui.”

¹⁹ Yaunchu akupkamun umirkatin ainia nú shuar aya tákamtak umirkatin ániawai. Tuma asamtai ashí shuar umirkachu ásarmatai Yus nujaj súmamtikiawartatui. Túrakui niisha pachischamin ániawai.

²⁰ Akupkamuka aya ii tunaarjñ paant awajurmaji. Tuma asamtai akupkamu péñker umirkatniujaj Yus “péñkeraitme” turamchamniaitji.

Aya Yus shiir enentáimtusar uwempramniaitji

²¹ Yus-Chicham yaunchu áarmanun itiura Yus in “péñkeraitme” túramminiaitaj nuna paant tawai. Kame akupkamujajñchuiti.

²² Antsu iisha ashí shuarsha núnisajñ aya Jesukrístu shiir enentáimtakrin Yus “péñkeraitme” túramminiaitji.

²³ Kame ashí shuarti tunáa túraitji. Tuma asar Yusjaj métek péñker ajastin peñké jeatsji.

²⁴ Tura Yus in waitnentrama asa kuítchajajñ “péñkeraitme” túramji. Jesukrístujajñ uwentikrampra asa túramji.

²⁵ Tura Krístun akupkamiayi ni jakamujajñ ashí tunaan asakátratniun. Túramtai shuar Nin nekas enentáimtuiniakui Yus tsañkuramniaitji. Yaunchu tunáa túramun katsunteak enentáimtuschiayi. Yamái tsañkuramnia nuna yaunchu nekáa, nuna túramniuyayi.

²⁶ Tura yamaiya tunaancha tsañkureak ashí shuar Jesusan nekas enentáimtuinia nuna “péñkeraitme” tuke tímianiaitji. Krístu jakamujajñ nuka paant ajasai.

²⁷ Nujajñkia ii péñker ajasjnia nu “winia kakarmarjajñ túrunajajñ” tíchamnia asar ñnañkaamantu enentáimtumarminkaitajñ? Peñkesha. Warí, akupkamu umítsuk aya Krístu nekas enentáimtakrin Yus “péñkeraitme” túramji.

²⁸ Nujajñ páantaaiti. Akupkamu umítsuk aya Jesukrístu shiir enentáimtakrin Yus “péñkeraitme” túramminiaitji.

²⁹ Warí, Yuska Israer-shuarnasha tura núnisajñ Israer-shuarchancha mai ni Yúsñinchukait.

³⁰ Kame aya chikichik Yúschakait. Tura tsupirnakuncha tsupirnakchancha mai metek aya Jesukrístun nekas enentáimtuiniakui “péñkeraitme” tímianiaitji.

³¹ Shuar Yúsan shiir enentáimtamujajñ péñker ajastin ániakui nujajñ ñakupkamu ántar awajsamukait? Atså. Antsu nuna nañkaamas umirkatin awajsamuiti.

4

Apraámsha Yúsan shiir enentáimtamujajñ péñker ajasmania nu

¹ Ashí Israer-shuara uuntrñ Apraám enentáimtustai. Niisha ñitiurak Yusjajñ péñker ajasma?

²⁻³ Ni péñker takasmajajñ Yusjajñ péñker ajasuitkiunka nañkaamantu enentáimtumarainti. Antsu Yus-Papí tawai: “Apraám Yúsan shiir enentáimtakui Yus “péñkeraitme” tímiayi” tawai. Nu túramu asa Apraámsha Yus ímmianum nañkaamantu enentáimprachminiaitji.

⁴ Shuar íniamna nu takasmatai ñaya tsañka asam akiktatmek? Warí, ni takasmanum páchitsuk akikchatniukait.

⁵ Antsu shuar ni péñker turamurñ enentaimtsuk áyatuk “Yus tunáa shuaran péñker awajñiuiti” tu enentáimtakui Yuska tsañka asa “péñkeraitme” tawai.

⁶ Tura péñker túrachunak Yus “péñkeraitme” takui nu shuar shiir warasminiaitji. Núnisajñ tawai uunt akupin Tawit:

⁷ “Shuar ashí ni tunaarjñ Yus asakátar tsañkuramu ana nuka shiir enentáimpramniaitji.

⁸ Uunt Yus ni tunaarjñ enentáimtachma asa ti warasminiaitji.” Tu tímiayi Tawit.

⁹ ñAya tsupirnakukeash warasminiait? Tura tsupirnakchasha waraschamniakait. Warí, Apraám Yúsan shiir enentáimtakui Yus “péñkeraitme” tímiayi.

¹⁰ Tura Apraám tuke tsupirnatñsajñ Yus nuna tímiayi. Emka Yus “péñkeraitme” timia nú ukunam Apraám tsupirnakmiayi.

¹¹ Apraám tsupirnatñsuk Yúsan shiir enentáimtusmatai Yus “péñkeraitme” tusa “tsupirnakñtiaitme” tímiayi. Nujajñkia ashí Yúsan shiir enentáimtuinia nú shuar tsupirnatñskesha Apraám weeá ániawai. Tura nu shuaran Yus “péñkeraitme” tawai.

¹² Tsupirnakusha aya tsupirnakui asa Apraám weeá ániatsui antsu nu arant Apraámjajñ métek Yúsan shiir enentáimtuinia nuka Apraám weeá ániawai. Kame Apraám tuke tsupirnatñsuk Yúsan shiir enentáimtusmiayi.

Yus shiir enentáimtamujajñ Nii timia nu uminkiatñtawai

¹³ Yaunchu Apraáman Yus chicharuk “Amincha amée weeá shuarnasha jñ nuñkan susattajajñ” tímiayi. Nunasha Apraám Yus akupkamun umireakui tíchamiayi. Antsu Apraám Yúsan nekas enentáimtakui Yus “péñkeraitme” taku nuna tsañkatñkamiayi.

¹⁴ Kame aya akupkamun umirniun súsatniutkiuñkia nuikia Yus enentáimtustin ánrtrai. Tura Yus Aprááman timia nusha ánrtrai.

¹⁵ Akupkamu akui shuar umirkachka ti asutniáshtatuak. Tura atsakuñkia ¿asutniátniukait? ¿Itiurak umirtsuk ikiuktñ?

¹⁶ Tuma asamtai Yus ti anenkartin asa Nin nekas enentáimtuinian ashí tsan̄katkai. Nújajñkia Apráám weeasha Yus Aprááman timia nuna páchitsuk wáinkiártatui. Iisha Apráámjaj métek Yus nekas enentáimtakur ní weeitji. Tuma asamtai Muisais akupkamun umirniuncha tura umirniuchuncha mai metek ashí in Yus ashí Aprááman timia nuna tsan̄katramkattaji.

¹⁷ Kame Yus-Papiniun Apráám áatramuiti: “Untsurí shuarsha amée weeá ajasartatui.” Nu asamtai iisha Apráámjaj métek Yus shiir enentáimtakrincia Yus incha Apráám weeá áintsan̄ írmaji. Nú Yuska ti kakaram asa jakancha iwiaaku awajniuti; tura atsana nunasha ana nútiksān nájānu.

¹⁸ Yus “ti pampantatme” takui Apráám ti uuntach áyat Yus timian enentáimtak yajutmar-tinian nákasmiayi. Nujaj untsurí shuar ní weeá ajasarmiayi, Yus timia áintsan̄.

¹⁹⁻²⁰ Apráámsha sian̄ (100) uwí takakuitiat tura ní nuwé Sarasha júretsuk uunt ajas-mataisha tuke iniaitsuk Yus timia nuna nekas enentáimtusmiayi. “Yus nekasash ta” tútsuk shiir awajsamiai. Nujajsha nuna nan̄kaamas kakaram ajasmiayi.

²¹ Tuma asa “nekas Yus tana nuna páchitsuk umiktatui” tu enentáimpramiayi.

²² Nu asamtai Yus “pénkeraitme” tímiayi.

²³ Tura Yus nekas enentáimtamunam Yus “pénkeraitme” tana nu aya Apráám̄nak áatrachmaiti.

²⁴⁻²⁵ Antsu incha túramji. Iisha núnisrik ii Uuntrj̄ Jesus nekas enentáimtakrincia Yus incha “pénkeraitme” turamtatji. Jesuska ii tunaarj̄n jarutramkatniun surunkamiayi. Tura nujaj Yus in “pénkeraitrume” taku Jesusan ataksha iniantkimiayi.

5

Yus “pénkeraitme” túramkurin shíiraiti

¹ Tuma asamtai Yus nekas enentáimtakrin Yus “pénkeraitme” túramji. Nujaj iisha Yusjaj shiir nawamnaikiar pujaji. Núnaka ii Uuntrj̄ Jesukristu ní jakamujaj sumartamkamiai.

² Tura Nii shiir enentáimtakur Yusaj weankaitji. Tura Kristu jarutramkakin Yus ti anenmaji. Tura tuke anenma asakrin Nijjaj métek shiir ajastin nákkur waraaji.

³ N arantcha yamá iturchat pujayatrik nu iturchatjaj unuimiartatji tusar waraaji. Katsuntratniuncha unuitiamji.

⁴ Tura nu unuimiarar ii katsuntram paant átatui. Tura nuyá Yus ti shiir awajtamsattaj-nia nuka shiir enentáijjaj nákastatji.

⁵ Nu ti shiir enentáimsar nákamujaj anan̄mamtsuji. Yuska ní Shiir Wakanj̄n ii enentáin̄ pujurtamuk ní anenkartutairj̄n ti paant awajturmajj. Tuma asamtai Yus túratin nákañnia nu imiá nekas wainkiattaji.

⁶ Iikkia pen̄ké uwemprachmin asakrin tsawant jeamta Kristu ashí shuara tunaarj̄n jarukmiayi.

⁷ Shuar chíkich shuaran uwemtikratniun ¿jaruktatuaq? Pénker shuar aijn̄ jarukchattawai. Kame ti pen̄keraitkiuñkia jarukchaintiash.

⁸ Antsu ii tuke tunáa árinj̄n Kristu jarutramkamiai. Nujaj in ti anenmajnia nuna ti paant inakturmaji.

⁹ Tura ní numpejaj tunaarinja awajsamu asar imiá nekas Yus asutiámatniua nuyá uwempraitji.

¹⁰ Yusa nemasrj̄ áyatar Yusa Uchirj̄ jakamujaj yamaikia Yusjaj shiir nawamnaikiar pujaji. Nu arant nuikia Kristu tuke iwiaaku asa iijjaj tsan̄ñkiu asa ashí yajauchinmayá uwemtikramar tuke shiir awajtamsattaji.

¹¹ Ii Uuntrj̄ Jesukristu jakamujaj Yusjaj shiir nawamnaikia asar ti waraaji.

Atañsha tura Krístusha túrawarma

¹² Ayu. Yámankamtaik emka áishman̄ Atañ̄ niñki tunaan túramtai nú tunaajaj ashí shuar tunaarintin ajasarmiayi. Tura ashí tunaarintin ajasar mash jákatin ániawai.

¹³ Akupkamu atsakuñkia umirkachma nekaachminiati. Tuma aijn̄ Muisais akupkamu atsajsha tuke tunaan túrin ármiai.

¹⁴ Atañ̄ pujumia nuyá Muisais tuke akupeatsaj̄n shuara tunaarj̄ paantcha aijn̄ ashí shuar tunaan túrawar jákarmiayi. Kame ní tunaarj̄ Atañna áintsachauyayi. Atañka Yus akupkamu paant ujakman umirkachmiayi. Antsu nu shuar Yus akupkamu paant nékaniachiatan̄ tunaan túrin ániak jákarmiayi. Tura Atañka Krístujaj apatkar enentáimpratai.

¹⁵ *Ataṅ* tunáa túramia nujaj apatka iisam, Yus in tsankatramaj nuka nankaamas péñkeraiti. Kame Ataṅ niñki tunaan túramujaj ashí aents untsurj armia nu, tunaarintin ániak, jákarmiyai. Tura Yus in ti anenma asa chikichik áishmanjaj nuna nankaamas tí shiiran tsankatramaji. Jesukristujajnia untsurj shuaran uwemtikrar ti shiiran tsankateawai.

¹⁶ *Ataṅ* tunaari imiá yajauch ajñ nuna nankaamas péñkeran Yus tsankatramkaitji. Iis, aya chikichik tunaan túramujaj aents sumamawarmiyai. Antsu Yus uwempratniun tsankatramaj nújajnia ki ti untsurj tunaan asakáruiti, tura “péñkeraitme” túramji.

¹⁷ Chikichik áishman tunaan túramujaj aents jákatin ániawai. Tura nuna nankaamas chikichik áishman Jesukristu túramujaj ti shiir pujustatji. Kame Yus ti anenma asa ii péñker túratsriniñ “péñkeraitume” túramji. Nu asamtai yamaram iwiaakmanum kakaram ajaji.

¹⁸ *Ataṅ* tunaan túramujaj ashí tunaarintin ajasar jákarmiyai. Núnisan Jesukristu péñker túramujaj ashí shuar Yus “péñkeraitme” timia nuka yamaram iwiaakmajaj tuke pujusaratui.

¹⁹ Núnisan chikichik áishman umirkachmajaj untsurj tunaarintin ajasarmiyai. Tura chikichik áishman umirkamujaj untsurj shuar péñker awajnasarmiyai.

²⁰ Wats, tunáa ti paant atí tusa Yus ni akupkamurñ susamiyai. Túrasa ti tunáa pampaakui Yus nuna nankaamas waitnentramak nu tunaan asakátramji.

²¹ Shuar tunaan túrin ásar jákatin ármiyai. Tura núnisan ii Uuntrj Jesukristu túramujaj Yus in “péñkeraitume” túramkurin iisha tuke iwiaaku pujustiniaitji.

6

Kristujaj jaka asar tunáa túrachminiaitji tura Kristujaj tsaniñkiu asar iwiaakuiñti

¹ Núnisaitkiuñkia Yus nankaamas waitnentrampratai tusar çtunáa túrattajik?

² Péñkea. Warí, iikia tunáa túrashtin jákaitji. Jáka çitiurak tunaan túramniait?

³ Imianniutikia Kristujaj tsaniñkiu asar imianir Niijjaj métek jaka áintsar ajj.

⁴ Tura imianir Kristujaj jaka áintsar métek iwiasasuitji. Tura Yus ti kakaram asa Kristun jakan iniantkimia núnisan incha nu kakarmajaj yamaram enentáijjaj péñker wekasatniun iniantamkimiaji.

⁵ Kristujaj tsaniñkiu asar Niijjaj métek jaka áintsanjetji. Tura núnisan Niijjaj métek nantaktiniaitji.

⁶ Yaunchu enentáimtañkia Kristujaj métek jaka asamtai ii yajauch wakerutain emenkatrutmakuitji. Tuma asamtai yamaikia penké umirkashtiniaitji.

⁷ Kame çjáka itiuurak tunaan túrat? Yamaikia ankant ajasuitji.

⁸ Iisha nekas Kristujaj jákaitkiurkia Niijjaj métek tuke iwiaaku pujustin enentáimji.

⁹ Kame Kristuka chikichki jaka nantakin asa atakka jákashtatui. Túmaitkiui atakka ajakrachminiaiti.

¹⁰ Kristu chikichki jaka asa ashí tunaajaj itit awajsachmin ajasuíti. Tura yamaikia iwiaaku pujá asa Yúsán shiir awajsatniun pujawai.

¹¹ Atumsha núnisrumeç jaka áintsarum tunáa túrachmin enentáimtumastarum. Antsu ii Uuntrj Jesukristujaj tsaniñkiu asarum iwiaaku pujakrum Yus shiir awajsatarum.

¹² Nu asamtai tunaaka ayashmijn akuptamkashtiniaitume. Ayashí wakeramurj umirkashtiniaitume. Ankantaitume.

¹³ Atumi ayashí tunaan túrat tusarum ikiasairap. Antsu jakamunmayá nantakin asarum Yus wakeramu túratin surumaktarum. Tura ayashmisha aya péñkernak túratí tusarum Yus íktustarum.

¹⁴ Akupkamu umirkatniujaj iwiaaku pujatsrume. Antsu atumin Yus ti anenma asa yamaram iwiaakman suramsaitume. Tuma asamtai yamaikia tunaaka nupettamkachminiaiti.

Tuke umireajnia nuna takarniurñntji

¹⁵ Nuikia akupkamu umirtsuk antsu Yus ti anenma asakrin iwiaaku pujakur ç“Páchitsuk tunaan túramniaitjai” títiatjik? Péñkea.

¹⁶ Tuke umireajnia nuna takarniurñntji. Nuka nékatsrumeç. Tura ni takarñ ajasam umirkatniuitme. Tuma asamtai tunáa umirkurkia ni takarniurñntji tura umirkar jakattaji. Tura Yus umirkurkia péñker wekasattaji.

¹⁷ Atumsha yáunchuka tunáa umirniuitiatrum ikiukrum yamaikia nekas chicham antukurmena nu nekas atumí enentáijjaj umirkaitume. Tuma asamtai Yus ti yumiñsatniuiti.

¹⁸ Yamaikia tunaanumiá ankant ajasu asarum ti péñker wekasatniunam pachiinkiaitume.

¹⁹ Paant nekaak tusan takarniun pachisan tájarne. Wats, yaunchu atumí ayashí mujmianian tura ashí yajauchin túrat tusarum tsankamakmarne. Núnisrumek yamaikia atumí ayashí péñkeran túrat tusarum tura tuke Yusjai shiir wekasat tusarum tsankamaktarum.

²⁰ Atumsha tunáa umirniuyarme nuikia péñker wekaichauyarme.

²¹ Tura nújaisha ¿warí péñkerna yáinmakmarum? Iista, yamá natsanmainchakait. Nusha jákatniunam júawai.

²² Antsu yamaikia, tunaanumiã uwempra asarum Yus umirniuitrume. Antsu júka Yusjai shiir wekasatniunam júawai tura nuyá tuke iwiaaku pujustatrume.

²³ Tunáa takarkunka tuke jákatniun akirmaktatui. Antsu Yuska iikia takaatsriniñ penké ántar tuke iwiaaku pujustinian suramsattaji. Ii Uuntri Jesukristujai tsaniñkia pujá asakrin nuna túrutmattaji.

7

Akupkamujai ankantaitji

¹ Enentáimpratarum yatsuru. Jáka akupkachminiaiti. Aya iwiaakna nu akupkamniaiti. Nu paant nékatsrumek.

² Wats, nuwá nuátkamu ni aishri iwiaakkui niijjai tsaniñ pujustiniaiti. Tura aishri jakamtai ankant ajawai.

³ Tuma asamtai aishri iwiaakain chíkich áishmanjai tsaniakka tsanirmawai. Tura ni aishri jakamtai chíkich áishmanjai páchitsuk nuatnakminiaiti tura nuikia tsanirmatsui.

⁴ Núnisrumek atumsha, yatsuru, Kristu ayashí muchitmarí ajasu asarum akupkamu emettachmin jaka áintsarum ajasuitrume. Túrakrum Kristujai nuatnaikiatin áintsarum ankantaitrume. Niisha jakamunmayá nantakniuiti. Yamaikia Kristunu ajasu asar Niijjai tsaniñkiar Yus wakeramu péñker túratniuitji.

⁵ Yaunchu wakerutai umirniuyaj nuí akupkamu enentáimtusar nuna nankaamas yajauchia nu wakerimji tura jákatniunam juramkimji.

⁶ Antsu yamaikia akupkamu emettachmin jaka asar ankant ajasuitji. Túrunar akupkamu yaunchu áarma nu iniaisar yamaikia Yusa Wakanjijai tsaniakur yamaram iwiaakmajai péñker wekasamniaitji.

Winia enentáiruñ tunáa ana nu

⁷ Núnisaitkiuñkia “Akupkamu yajauchiiti” ¿titiãjiash? Atsá. Warí, akupkamuka tunaan ti paant awajeawai. Akupkamu “Chikichna wakerukaip” táchakuñkia wakerukchajai.

⁸ Tura nu akupkamun enentáimtakui winia enentáiruñ tunáa ana nu ashí yajauchin ti wakerumtikrimiaiyi. Kame akupkamu atsakui tunaan ti enentáimtachaintjai.

⁹ Yaunchu akupkamun nékachkun nánkamsanak enentáimniuyajai. Tura akupkamun nekaan tunaan nekaamjai tura jaka áintsanak ajasjai.

¹⁰ Tuma asamtai akupkamujai péñker wekasatniuitiatan umirkatniun tujintiakui aya jákatniunam jurukni.

¹¹ Kame tunáa wakerutainkia nu akupkamujai anankrua péñker iwiaaku pujustinian surutsuk nu akupkamujai jákatniunam jurukmiaiyi.

¹² Tuma asamtai akupkamuka Yusna asa ti penkeraiti. Yajauchichuiti.

¹³ Nuikia ¿péñkera nu jákatniunam júrawak? Atsá. Antsu tunáa wakeruktin jákatniunam jurukmiaiyi. Nuna tura asa tunáa imiã yajauchia nu nekaamniaiti. Tura tunáa wakerutai péñker akupkamujai jákatniunam jurukmiatai, nujai Yus “tunáa wakerutai imiã yajauchiiti” tusa paant awajsamiayi.

¹⁴ Akupkamuka Yúsnaiti. Nu paant nékaji. Antsu wikia ayashna nuna wakerakun tunaan umireajai.

¹⁵ Kame túrajna nuna itiurchat enentáimtajai. Péñker túratniun wakeraj nuna túratsjai. Antsu nakitiaj nuna nekaska túriniaitjai.

¹⁶ Akupkamu péñkeran nekaan umirkatniun wakerajai. Túrayatnak umirchaitjai.

¹⁷ Tuma asamtai wichaitjai tunaan wakerakun túrajna nuka. Antsu winia enentáiruñ tunáa wakerutai pujá asa nu túrumtikriniaiti.

¹⁸ Yaunchu enentáimtai winia enentáiruñ pujana nu penké yajauchiiti. Nuna ti paant nékajai. Tuma asamtai péñker túratniun wakerayatnak penké tujintiaiyi.

¹⁹ Péñker túratniun wakerayatnak túratsjai. Antsu tunaan nakitiaj nuna túrajai.

²⁰ Nu asamtai nakitiaj nuna túrakun wíchaitjai antsu winia enentáiruñ tunáa wakerutai pujana nu túriniaiti.

²¹ Júnisaiti. Péñker túratniun wakerakun aya tunaan ínkiuajai.

²² Nekas enentáijjai Yusa akupkamurin wakerajai.

²³ Tumaj yaunchu enentáimtai winia enentáiruj pujurtak nupettawai tura nekas wakeraj nuna akirturui.

²⁴ Maa, ti waitiajai. Jú ayash wakeramujaj jákatniunmayá zyaki uwemtikrurat?

²⁵ Yuska ii Uuntrj Jesukristujaj túrutmanniatji. Tuma asamtai Yúsan ti yuminikiajai. Ayu. Winia enentáirujaj Yus akupkamun umirniuitjai. Antsu winia ayashrujaj tunaan umireajai.

8

Yusa Wakanjijaj péñker wekasatin

¹ Jesukristujaj tsaniñkiarun Yuska “tunaan túrawar jákatniunam wémin ániawai” tatsui. Nu shuar ni ayashj wakerana nuna umirtsuk Yusa Wakanj wakerana nuna umirainiawai.

² Jesukristujaj tsaniñkiu asakrin Yusa Wakanj nekas iwiaaku awajtamsaitji. Tuma asamtai tunáa túratniunmayá tura jákatniunmayasha ankant ajasuitji.

³ Ayash wakerutainkia, wi akupkamun enentáimtakui, nuna nankaamas tunaan wakerumtikrimiayi. Tuma asamtai akupkamuka yáinkiachminiuyi. Antsu akupkamu tujinkiamia nuna Yus túraiti. Ni Uchirín ayashtin awajas tunaan jarukat tusa akupkamiayi. Tura nujaj ayash tunáa wakeramun nupetkamiayi.

⁴ Túramtai ii yamaikia ayash wakerana nu umirtsuk tura Yusa Wakanj wakeramu túrar akupkamu tana nu umirniuitji.

⁵ Ayash wakeramun umirainia nu, ayashnia nunak enentáimtuiniawai. Antsu Yusa Wakanj wakeramun páchinia nuka Yúsnan enentáimtuiniawai.

⁶ Ayashnia nuna enentáimtuinia nú shuar jákatniunam wénawai. Antsu Yúsnan enentáimtuinia nuka Yusjaj shiir nawamnaikiar tuke pujusartatui.

⁷ Aya ayash wakeramun enentáimtuinia nú shuar Yusa nemasrj ániawai. Yus akupeamun nakitiainia ásar ni taman umirkatniun penké jeainiatsui.

⁸ Tuma asamtai shuar ni ayashj wakeramurj warareakka Yúsan shiir awajsachminiaiti.

⁹ Tura átumka ayash wakeramu umirtsuk tura Yusa Wakanj pujurtamkurmin ni wakeramu enentáimtiniaitrueme. Ashí shuar Krísturtin ainia nu ni Wakanj takaku ániawai. Takakchaitkiunka nuikia Krístunuchiiti.

¹⁰ Tura Kristu atumin pujurtamkurminia atumí ayashj tunaajaj jakamnia ajñ Yus “pénkeraitme” túramu asamtai atumí wakanjñkia nekas tuke iwiaakuiti.

¹¹ Yus Jesukristun jakan iniantkimiaiyi. Tuma asamtai ni Wakanj atumí enentáin pujurtamkurminia Jesusan iniantkimia núnisan nu Wakanjaj yamaram iwiaakmajaj iniantamkittiarne.

¹² Tuma asamtai, yatsuru, ayash wakeramu penké umirkashtiniatji.

¹³ Ayash wakeramu umirniuitkiurmeka jakattarme. Antsu Yusa Wakanj pujurtamkurmin ayash wakeramu nupetkameka péñker wekasarum nekas iwiaaku átatrume.

¹⁴ Ashí shuar Yusa Wakanj timiajaj métek wekainia nu, nu shuar nekas Yusa uchirínti.

¹⁵ Yusa Wakanj in pujurtamkurin Yusa uchirj ajasar sapijmiatsuk Yusaj weamkar “Aparú” tímimniaitji.

¹⁶ Nu Wakan “nekas Yusa uchirínme” ii enentáin túramji.

¹⁷ Tura ni uchirj ajasu asakrin Yus tímia núnisan ashí Níiniun suramsattaji. Krístun ashí susattana núnisan incha suramsattaji. Yamái Krístunu takaakur wáitiakrikia ukunam Krístujaj métek ti shiir awajnastatji.

¹⁸ Maa, yamá ti wáitiakrishia ukunmanka nayaimpiniam ti shiir pujakur nu wáitsamu kajinmatkittiaji.

¹⁹ Tsawant jeamtai Yus ashí ni shuarjñ Nijijaj métek ti shiir awajsartatui. Nuiñ nekas Yusa uchirj ainia nu ti paant nekanattawai. Nu tsawantan wáinkiatniun ashí Yus najanamu írunga nu ti nákeinaiwai.

²⁰ Ashí Yus najanamia nuna yámankamtaik ti péñker najanamiayi. Túrasha yajauch ajasmiaiyi. Nusha ní neaskeka túrunachmiaiyi. Antsu Yus ukunam ataksha iwiarnartin atí tusa tunáa wayamunam yajauch ajasat tusa tsanekatkamiayi. Tuma asamtai iwiarnartin tsawantan nákwai.

²¹ Nu tsawantaj ashí Yus najanamu emesnartinniumiá uwemprartatui. Tura ashí Yus najanamuka shuar Yusa uchirj ajasarua nujaj métek shiir awajnasar ankant ajasartatui.

²² Yamaisha ashí Yus najanamu ainia nu, nuwaj jatema wáitia nunis ti wáitiainiawai.

²³ Yus najanamuka ashí wáitiainiawai. Iisha Yusa Wakanj takakiatar ti wáitiaji. Tura Yusa Wakanj takakkur ashí Yus suramsattajnia nu nékaji achiktin. Tuma asar nekas Yusa uchirj paant awajnastin tsawant nákwai. Nuisha ii ayashísha ankant awajnastatui.

²⁴ Nu tuke enentáimtuki wéakur takamtsuk uwemprattaji. Yamái nu wáinchiatar tuke nákwai. Warí, ¿wáinjinia nu nákwajik?

²⁵ Tuma asar tuke waincha asar katsuñtraj nákwai.

²⁶ Nu arantcha ii kakarmachu nekapeakrin Yusa Wakanj yáinmaji. Kame Yus áusatniusha nékachkurin in yáinmaji. ¿Warí seattaj' tura itiuur seatjik? Nu nékatsji. Tura itiuur chat pujakur ti wáitiakrincha Yusa Wakanj in áujturmajj.

²⁷ Tura Yus ii enentáin enentáimtaj nuna nékaiti. Tuma asa ni shuarj asakrin ni Wakanj ni wakeramujaj métek seatramkurin ántawai.

Ti nupetmakuitji

²⁸ Yus anea asakrin ashí nankaatamjinia nujaj Yus pujurtamji. Tura nujaj péñker awajtamji. Nu paant nékajji. Tura Ni wakerimia núnisan Ni shuar awajtamaitji.

²⁹ Yámankamtaiknumia in nekarmak ni Uchirj Jesukristujaj métek ajasat tusa achirmakmi-aji. Nujaj Yusa uchirj untsurj ajasji. Tura Kristu ii iwiajrinti.

³⁰ Tura Yus achikmia nuna Niiniu awajsamiayi. Tura nu shuaran “péñkeraitrume” tímiayi. Tura ti shiir awajsamiayi.

³¹ Wats, nuikia Yus in yáinmakrin ¿yaki in nupettamkattaj'?

³² Ni Uchirjíncha suritramkachmiaji antsu in jarutramkat tusa akupturmakmiaji. Tura asa ni Uchirjijaj métek ti shiira nuna ashí suramsashtatjik.

³³ Yus achikmia nú shuaran ¿yaki sumamtikaj? Yus Ápaka “péñkeraitrume” tiniu asa penké túrashtatui.

³⁴ Tura ¿yaki “jínium apenáti” titi? Warí, Kristu penké túrashtatui. Antsu nu shuaran jarukmiaji. Tura nantaki Yusa untsuurinj ekemas in áujturmajj.

³⁵ Kristu ti anenma asakrin in akantamkitin atsawai. Wáitiakrishá, itiuur chat inkiuakrishá, shuar áinramkurnishá, tsukamakrishá, entsatai atsakuishá, tsúumainjashá, tura mantamnakrishá, nujaj “Kristu anentsui” tíchamniaitji. Nuka Kristu anenkrattairjya akantamkitin jeatsui.

³⁶ Yus-Papniumsha júnis áarmaiti:

“Amée-shuar asar tuke mantamnatin pujaji. Murik máatniua áintsan enentáimturmajj.”
Tu áarmaiti.

³⁷ Tuma aijn Kristu in anenma asakrin Niijijaj ti nupetmakuitji.

³⁸ Kristu anenkrattairjya akantamkitin penké atsawai. Nuna ti paant nékajji. Jákatniushá, iwiaakmashá, nayaimpinmayá suntarshá, ashí nayaimpinmashá tura nunkanmashá akupin ainia nushá, yamá írunna nushá, ukunam átatna nushá,

³⁹ yakí írunna nushá, nunká írunna nushá, kame ashí Yus najanmu írunna nushá Yusa anenkrattairjya penké akantamkichiniaitji. Yusa anenkrattajshá ii Uuntrj Jesukristu túrunamujaj paant wainji.

9

Yus Israer-shuaran ni shuarj arti tusa achikiarmiania nu

¹ Yamái tájana nu Kristu shuarj asan imiá nekasan wáitrusuk tájai. Winia enentáirsha tura Yusa Wakanjshá “nekas tawai” turutainiawai.

² Israer-shuaran waitnentakun ti kuntuts enentáimjai.

³ Wíshuar áiniakui Kristunmayá kanakin yumiñnaraintjai nujaj wíshuaran yáinminiaitkiunka.

⁴ Israer weeá shuar áiniawai. Tura ni uchirjía áinis Yus achikiaruiti. Yusa wincharjshá niijijaj pujumiayi. Yaunchu Chicham ni weatrjijaj iwiamuncha tura Muisais akupka-muncha susamiayi. Tura Yusa Jeen Nin shiir awajsatniun jintintiamiayi. Tura ukunam shiir tsanekatattana nunasha ujakmiayi.

⁵ Ni weatrjin Yusan ti péñker enentáimtin irunmiayi. Krístusha aents ajas nú shuarnum akiiniamiayi. Krístuka Uunt Yus asa tura ashí akupin asa Niñki tuke shiir awájnastí. Núnisan atí.

⁶ Kame Yus ashí Nii timia nuna Israer-shuaran súsachmataisha nujaj “Yus timia nu uminkiachuiti” tíchamniaiti. Antsu junis enentáimpratniuiti: ashí Israer weeá áiniayatan Yusjaj íismaka ashí nekás Israer-shuar áiniatsui.

⁷ Núnisan Apraám weeá shuarshá ashí nekás ni shuar áiniatsui. Iis, Yus Apraáman tímiayi “Aya Isak pampanma amee shuarum ártatui.”

⁸ Nujaj páantaiti. Shuar aya Apraam weeá akiinia asa Yus timian wáinkiashtiniaiti. Antsu Yus timiajaj métek akiinia nu nekás Apraám weeá shuar áiniak Yus timian wainkiattawai.

⁹ Kame Yus Apraáman timia nu júiti: “Tsawant jeamtai jeartiatjame, tura ame nuwem Sara uchín takustatui.” Tu tímiayi.

¹⁰ Nu arantcha, ii weatrj Isaka nuwe Ripikia jimiampramiayi.

¹¹⁻¹³ Nu uchisha akiiniainiatsain péñkernashá tura yajauchincha túruiniatsain Yus Ripikian tímiayi: “Iwiajria nu ni patajn umirkattawai.” Ataksha núnisan Yus ni Papirjin

chichak “Jakupan aneakun Esaun nakitramjai” tímiayi. Nujajñkia páantaiti. Yus wakerak aya ni enentájjiajn shuaran achikminiaiti. Nu shuar túrunamu enentáimtutsuk túramniaiti.

¹⁴ Túriniaitkuii “Yus péñkerchaiti” ¿títiajjash? Atsá.

¹⁵ Yus Muisaisan júnis tímiayi:

“Wi wakerajna nunak waitnentratatai.”

¹⁶ Tuma asamtai shuar ti wakerakuisha tura kakaram takaakuisha aya nujaj Yus waitnentatsui. Antsu aya ní enentájjiajn wakerak waitnentawai.

¹⁷ Ataksha Yus-Papininum tawai “Yus Ejiptu nunka akupniurjn tímiayi

“Ámijiaj ashí nunkanam winia kakarmarun nekaawarat tusan uunt akupniun awajsamjame” tímiayi” tawai.

¹⁸ Tuma asamtai Yus Nii wakera nuna waitnentawai. Túrasha Ejiptu akupniurjn túramia núnisan Nii wakera nú shuaran enentájn kátsuram awajatawai.

¹⁹ Tura “Núnisaitkiuñkia ¿urukamtai shuaran Yus súmamtikia? turutchatapash. Nii wakerakuñkia ¿itiurkattajik?” turutchatapash.

²⁰ Warí, aents asam Yusjai ¿tunaiminkiaitiam? Nuwá piññkian nájankui núweka “¿urukamtai júnis najatam?” tíminkiat.

²¹ Nuwá wakerakka nu nuwejai amamkuncha tura yukunnasha nusháa takakmastinian mai najanachminkait.

²² Yajauch shuar ti asutiátin ániak emesnartinnium wétin ániawai. Yus nu shuaran asutiá ni kakarmarjn iniaiktustaj tayat ti katsuntramiayi.

²³ Tura katsunteak ni anenkrattairjn iniakmasmiayi. Nú arant nuikia in waitnentramak shíir enentájjiaj péñker awajtamkur ni anenkrattairj ti paantchakait. Nekas shíir enentájjiaj péñker ajasat tusa yaunchu iwiartampramiaji.

²⁴ Tura incha, Israer-shuarnumiąsha Israer-shuarchanumiąsha, ni shuari ajasat tusa achirmakmiaji.

²⁵ Núnisan yaunchu Yúsnan etserin Useas Yus-Papininum tawai:

“Wiishuarchan Wiishuar awajsattajai. Aneachmancha aneamu awajsattajai.

²⁶ Tura Yus “Wíishuarchaitrume” tímia nú shuaran “Nekas iwiaaku Yusa uchiríniuitrume” ukunam títiatui.”

Tu áarmaiti.

²⁷ Antsu Isayas Israer-shuaran páchis tímiayi:

“Israer weeá ti nankaamas untsurí ániayat penké ishichik uwemprartatui.

²⁸ Kame Yus yajauchin akupkataj timia nuna takamtsuk wárik umiktatui.”

²⁹ Núnisan Isayas ataksha tawai:

“Ashí akupeana nú Yus in waitnentramachkurnñkia Sutuma péprusha Kumura péprusha takamtsuk jákarmia núnisan jákaajl.”

Israer-shuar uwempratin chichamjai tujinkiarmania nu

³⁰ Wátsek, Israer-shuarcha, Yus iisam ni túramurijiaj “péñkeraitji” tu enentáimtumainiachunak, Yuska, Nii enentáimtusam, “péñkeraitrume” tímiayi.

³¹ Antsu Israer-shuarka péñker akupkamun umiktinian wakeruiniayatan tujintiainiakui nujaj péñker ajastinian tujinkiarmiayi.

³² ¿Urukamtai tujinkiarma? Yúsán enentáimtusuk aya ni péñker túramujaj péñker ajastinian enentáimtuiniak tujinkiarmiayi. Krístun enentáimtustinian nakitiainiak shuar kanĵapen awanĵemtuktnia núnisan iniararmai.

³³ Tura kaya tukumkar iniarchamniakait. Nu asamtai Yus-Papininum Krístun pachis tímiayi:

“Seun péprunam kayan ikiuajai, tawai Yus. Nu kayanam Israer-shuar tukumkar iniarartatui. Antsu Nin shiir enentáimtuinia nú shuar natsařchartatui” tawai.” Tu áarmaiti.

10

¹ Yatsuru, Israer-shuar uwemprarat tusan ti wakerakun Yúsán áujatajai.

² Maa, uwempratnium nékachiatan Yúsán shiir awajsatnium ti wakeruiniawai.

³ Túmaitiat shuáran Yus péñker awajsatnium nékachu ásar aya ni péñker túramujaj péñker ajastinian wakeruiniawai. Tuma ásar Yus péñker enentáimtamujaj péñker ajastinian jeacharai.

⁴ Aya Krístu enentáimtamujaj péñker ajastin asamtai akupkamu umirkatniujaj péñker ajastin ántrai.

⁵ Akupkamujaj péñker ajastinian pachis Muisais tímiayi: “Nuna takamtsuk umirniuka nujaj péñker pujustatui.” Tu áarmaiti.

⁶ Antsu Krístun enentáimtus péñker pujustinian pachis shuar juna tímiaiti: “Ti itiuřchata ánis “¿Yaki nayaimpiniam waka Krístun itiarat?” tírap,” tawai.

⁷ Tura ζYaki jakamunam we Kristun iniantkiti?" tiirap" tawai.

⁸ Tura junasha tawai: "Yus-Chicham yúpichuch umirkamniaiti. Aya enentáimjaj enentáimtakum wenumjaj ujaktiniaitme." Nu Chicham "Yus enentáimtustiniaiti" tawai. Nu Chicham tuke étseraj núiti.

⁹ Yus Jesusan jakan iniantkimia nu enentáimtakum tura wenumjaj "Jesus winia Úuntruiti" takum uwemprattame.

¹⁰ Kame Kristu enentáimtakmin Yus "pénkeraitme" turamtatui nuyá wenumjaj "Jesuskristun enentáimtajai" takum uwemprattame.

¹¹ Ataksha Yus-Papinium tawai: "Nin shiir enentáimtuinia nú shuar natsaarchartatui."

¹² Tuma asamtai ashí shuar, Israertisha Israerchasha, mai metek Yúsan shiir enentáimtuinia nuna Yus tí aneak ashí pénkeran súawai. Tura ashí métek ní Úuntrinti.

¹³ Nu arantcha "Ashí shuar Uuntan áujea nu uwemprattawai" yáunchu Kristunun tu áatramuiti.

¹⁴ Tura Kristun enentáimtuiniachusha ζitiurak Nin áusarat? Tura Kristun nékainiachusha ζitiurak Nin enentáimtusarat? Tura Yus-Chicham ujaachmasha ζitiurak nekaawarat? Shuar Yus-Chichaman ujaktiniaiti.

¹⁵ Tura akupkachmasha ζitiurak Yus-Chichaman ujarakat? Tura shuar Yus-Chichaman etserkataj tusa wéana nuna Yus-Papinium tawai:

"Shuar Yusa Shiir Chichamen etserki weana nu tí shiirchakait."

¹⁶ Tura ashí shuar uwempratin chichaman ántuiniayatā umirainiatsui. Isayassha yaunchu aak tímiayi:

"Uuntá, ζyaki ii étserman antukaruit?"

¹⁷ Paantchakáit. Kristu túramu ujakam antuktiniaiti. Tura antukar Kristun shiir enentáimtustiniaiti.

¹⁸ Tura ζIsraer-shuar Yus-Chichaman antukcharu ásarān Yúsan enentáimtuscharma? Atsá. Warí, Yus-Papí tawai:

"Ashí nuñkanam ní chichame antunkaiti."

¹⁹ Tura "Israer-shuar nu chichaman antukariat ζpaant nekaawarmaashi?" inintrusmini-aiti. Tura nekas nekaawarmai. Tuma asamtai Muisais tawai:

"Israer-shuarchan nékachu ainiana nuna shiir awajeakun akajkattajrume."

²⁰ Nuyá Isayas ashamtsuk áarmiayi:

"Eāt-kacharua nu wáitkiarmiayi. Inintruiniatsajin wantintiuksiamaiaj."

²¹ Tura Israer-shuaran áujmatuk tímiayi:

"Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui."

11

Chíkich Israer-shuarsha uwemprattatui

¹ Tura Israer-shuar Yúsan umiiniachkui ζYus nin iniaisaashit? Pénkea. Warí, wi Israer-shuarchakaitiaj. Wi Apraámsha tura Pinjamin weeá akiiniachukaitiaj.

² Yámankamtaikniumiā Yus Israer-shuaran ní shuar arti tusa achikui asa yamaikia iniaiashtatui.

Ti yaunchu Yúsnan etserin Eriás Israer-shuaran pachis Yúsan áujtak tímiayi:

³ "Uuntrú, naman awásar Yus sútaincha mash saǵkiarai. Áminiun etserniuncha mash máawarai. Tura wiki juakjai. Tura winiasha "mantuatai" turutainiawai." Tu áújsamiayi.

⁴ Tura Yus ayak tímiayi "Siati mir (7000) áishmankan Israer-shuarnumiā apujtumsaruitjai. Nu shuar ántar-yus Páaran tikishmatrachu áiniawai" tímiayi Yus.

⁵ Núnisan yamaisha Yus tí waitnentainia asa ashí Israer-shuarnumiā ní shuarin achikuiiti.

⁶ Yus ní enentáijjajin waitnentak túraití. Nú shuar pénker tura asamtai waitnentatsui. Yus aya pénkernak waitnentakka nuikia waitnenkratchainti.

⁷ Ayu. Nuikia ashí Israer-shuar pénkeran ékaru ajin aya Yus achikmia nú shuar wainkiarmiayi. Antsu ní achikchamuka nuna nankaamas nekaachmin ájaras kusurua núnin awajnasarmiayi.

⁸ Yus-Chichamsha núnisan tawai: "Yus enentáimchatai enentáin súsarmiayi. Wáinmashtai jjincha tura ántushtai kuishniasha súsarmiayi. Yamaisha núniskete."

⁹ Tawitcha yaunchu aak tímiayi:

"Tuke tunáa túrin ásar namperan najanainiaksha achinkiar tí asutniáwarti.

¹⁰ Ní enentáin kusurarti tura wainmakcharti. Itiurchat ana nusha, káarak kijinia áintsan, tuke áentskatá." Tu áarmiayi.

Israer-shuarcha uwempramin áiniawai

¹¹ Watsek, Israer-shuar kayá tukumkar ¿tuke iniaararuk áinia? Atsá. Antsu Israer-shuar umirkachmajaj Israer-shuarsha yamaikia uwempratin jeainiawai. Nujaj Israer-shuarsha nujaj métek uwempratniun enentáimsartatui.

¹² Israer-shuar umirkachmajaj ashí shuar, Israercha ainia nusha, uwempramnia ajasarmiayi. Nuna nankaamas Israer-shuar atak Yúsan enentáimtuiniak uwemprarmatai nujaj ashí shuar ti penker ajasartatui.

¹³ Israer-shuarchatirmea, atumin uwempratin chichaman etserkatniun Yus akupkamu asan nu takatan ti takajaj.

¹⁴ Nuna túrakun átum uwemprarmena núnisan niisha, wíshuar ainia nu, nuna ísar uwemprarat tusan wakerajaj.

¹⁵ Kame Israer-shuaran iniaisamujaj ashí shuar Yusaj shiir nawamnaikiarmatainkia nuikia atak nin achikmajaj jakamunmayá nantaktinia áintsan ti shiir átatui.

¹⁶ Emka apatuk ana nu Yus súakur yumínsamuitkiunka nuikia ashí apatkunam Yus yumínsamuít. Núnisan numí kankapé péñkeraitkiunka numi takamtsuk péñkeraiti.

¹⁷ Yuska chíkich chíkich Israer-shuaran, numí kanawen tsupik ajapniua áinis, iniaisami-ayi. Tura nuyá atumin niisháa numinmayá árumnin nu numiniam anujtamkamarme. Nujaj péñker numijaj tsaninkrum nu kakarmajaj iwíaaakrume.

¹⁸ Tura kanawé tsupikmajaj nankaamantu enentáimtumasaip. Warí, ame kakarmarmijaj numi wajatsui antsu ni kakarmarjijaj iwíaaakme.

¹⁹ “Túrasha wi anujnaktinian kanawen tsupikchamka” tíchainmeash.

²⁰ Nekasaiti, túmaitiat niisha Yúsan enentáimtuiniachu ásar tsupinkiarimiayi. Atumsha aya Yus nekas enentáimta asam anujnakuitme. Tuma asamtai nankaamantu enentáimtumatsuk aya anearta.

²¹ Yus nekas kanawé péñkercha túrawarun tsupikkia páchitsuk amincha tsupirmakchamniakait.

²² Iista, Yus atumajaj ti tsáñkaiti tura Israer-shuar umichua nuna ti wari asutiaiti. Tura péñker wáinmankata. Yus tuke nekas enentáimtachkurminkia atumniasha páchitsuk tsupirmaktatrum.

²³ Núnisan Israer-shuar ataksha Yúsan enentáimtuiniakui páchitsuk ataksha anujkchaminkait. Nekas túrtatawaj.

²⁴ Túram Israer-shuarsha asam niisháa numinmayá tsupikiar penké numiniam anujnakuitrum. Nuna tura asa nekas ni kanawé tsupikia ajapamun páchitsuk atak anujkamniaiti.

Israer-shuarsha uwempratin áiniawai

²⁵ Yatsurú, nankaamantu enentáimtumarárum tusan yaunchu nekaachman ujaajrume. Júiti: Israer-shuarnumiánka chíkich chíkich Yúsan nekas enentáimtuistinian nakitiainiawai. Tura aya Israer-shuarsha Yús-shuar ajasarat tusa túrunamiayi.

²⁶ Tura Israer-shuarsha ti untsurj Yus-shuar ajasarmatai nuyá Israer-shuarsha ashí uwempratatui. Tuma asamtai Yus-Papí tawai:

“Seúnnumiá Uwemtikiartin tátatui. Israernumiá tunaan asakátrattawai.

²⁷ Jú Chichamnasha niijaj najanattajaj: ni tunaarj asakturtajaj.”

²⁸ Uwempratin chicham atumsha nekaatarum tusa Israer-shuaran Yus ni nemasri awajsaruiti. Tura yaunchu ni weatrin achikiu asa nincha tuke anenawai.

²⁹ Kame Yus amáa nuna ataksha atáatsui. Shuáran achiksha atak iniaiyatsui.

³⁰ Átumka yaunchu Yus umirchauyarme. Tura yamaikia Israer-shuar umirainiachkui Yus atumin waitnentrarmarum.

³¹ Núnisan nii yamaikia Yúsan umirainiatsui. Tura atumin waitnentrarmarum núnisan nincha waitnentrattawai.

³² Nujaj ashí métek sumantikiak métek waitnentrar uwemtikrattawai.

³³ Maa, Yus imiá shiirchakait. Ti nekachukait. Ni túramu penké nekaachminiaiti.

³⁴ “Uunt Yus enentáimmian ¿yaki neka? Tura ¿ya Nin unuinariuit.

³⁵ Yaki Nin péñkeran susa shiira nujaj yapajniuit?” Tu áarmaiti.

³⁶ Ashí najanamu ainia nu Yus najanamu áiniak Niiniu áiniawai. Tura Nin shiir awajsatniun najanawarma áiniawai. Yus tuke iniaitsuk shiir awájnástí. Núnisan atí.

12

Yusaj surumaktarum

¹ Atumsha Yus-shuar árumna nu, atumek Yusaj surumaktarum. Yus ti anenma asakrumin nuna seajrume. Yaunchu Israer-shuar ni waakarj maa Yúsan suu ármiai. Atumsha núnisrume iwíaaaku árumna nuñ Nii túrutataj taku túrutati tusarum tuke enentáijaj Yusaj

tsaṅkamaktarum. Yusaj íisam ti shiir atí tusarum túratarum. Nu túrakrumka páatkechu antsu ti nekas enentáimjaj Yus shiir awajin átrume.

² Chíkich shuar aya jú nunḱanmaya ana nuna enentáimtusar wekainiawai. Tura átumka nu túrawairap. Antsu Yus winia enentáimmiarun yapajtiurat tusarum tsaṅkatkatarum. Nu túrakrumka Yus wakera nu nekaattarme. Ni wakeramusha yajauchichuiti antsu imiá nekas péṅkeraiti.

³ Yus winia waitnentrak akatar akuptuku asamtai júna tájarme. Atumek wíkitiajtai tu enentáimtumatsuk jeamna nujaj métek enentáimtumasta. Yus enentáimta asakmin takasinian suramsana nujaj apatkam nekaamata.

⁴ Ii ayashj chíkichkiitai ii muchitmarj untsurjinti. Tura métekrak muchitiániatsui.

⁵ Núnisrik iisha, Yus-shuarti, ayashj muchitmarija áintsarik untsurjitiatar chíkichik ayashtinia áintsar takaaaji. Nusha Krístujaj tsaṅkiu asar áitkiamuitji. Túramu asar nuamtak atsumnaiyaji.

⁶ Ii túratniun Yus nusháa nusháa súramji Nii wakera nujaj métek. Wats, Yus ámin suramsamna nu túratniuitme. Yus ni chíchamen etserkatniun suramsaitkiuinḱia Yus enentáimtakum unuimiarmam nujaj métek etserkata.

⁷ Chíkich shuar yáingtinian Yus suramsaitkiuinḱia nekas enentáimjaj yáingtá. Unuiniartini-aitkiunka yawetsuk unuiniarta.

⁸ Chíkich shuar ikiakártiniaitkiunka nekas péṅker ikiakárta. Súsatniuitkiunka shiir enentáijjaj ementutsuk súsarta. Shuaran wáinin atí tusa Yus apujtamsaitkiuinḱia ti enentáimsam túratá. Tura shuar itiurchat pujuinia nu yáingtinian Yus suramsaitkiuinḱia shiir enentáimsam túratá.

Yus-shuar túratniua nu

⁹ Nekas enentáijjaj mai anenai ajatarum. Yajauch nakitrarum péṅkera nu túratarum.

¹⁰ Nuamtak yachí asarum núnisrum mai anenai ajatarum. Chíkich wijjaj nanḱaamas úntaiti tu enentáimtunaistarum.

¹¹ Nakittsuk kakaram ajasrum ashí enentáimjaj ii Uuntrj wakera nu túratarum.

¹² Ukunam Yus tsaṅkatramkattajnia nu enentáimtusum warastarum. Wáitkiakrumsha katsuntratarum. Tuke iniaitsuk ashí túrunamujaj Yus áujsatarum.

¹³ Yus-shuar atsumainia nujaj yáingtarum. Írarsha péṅker itiaatarum.

¹⁴ Yajauch awajtamainia nu shiir awajsatarum. Yus yajauch yumintsuk nu shuaran péṅker túrawarat tusarum seattiarum.

¹⁵ Warainia nujaj warastarum. Kúntuts pujuinia nujajsha úttiarum.

¹⁶ Chíkichik enentáijjaj métekrak shiir enentáimtunaitiarum. Nanḱaamantu enentáimtumasaírap. Antsu péjchach ajastarum. “Ti nekajai” tu enentáimtumasaírap.

¹⁷ Shuar ámin yajauch awajtamkuisha nincha yapajkiataj tu enentáimsáip. Aents íisam péṅker áminia nu amesha tuke túratá.

¹⁸ Ame jeamna nujaj ashí shuarjaj nawamnaikiam wekasata.

¹⁹ Yuska ni Papirjin júna áamtikramiayi: “Wítjaj tunaan asutiátniun. Wisha yapajkiatajai” tawai Uunt Yus. Tuma asamtai yatsuru, kajertamkuisha atumsha yapajkiairap. Antsu yajauch awajtamkana nuna Yus ístí. Yus asutiáti.

²⁰ Tura nu arantcha tawai: “Ame nemasrum tsukamakuisha ayurata. Kitiamakkuisha umartín susata. Nu túrakum péṅker ajachua nu iniatsáartatme.”

²¹ Yajauch nupettamkajin. Antsu péṅker túrakum yajauchia nu nupetkata.

13

¹ Akupniunka ashí shuar umirkatniuiti. Akupniuka Yus apujsamuiti. Yus apujsamu ita akupin atsawai.

² Tuma asamtai shuar akupniun umirtsuna nu, Yus apujsamun umireachu asa nekas asutniátniuiti.

³ Kame akupniuka péṅker shuar sapijmiakarat tusar apujsamu ániawai. Antsu yajauch shuar ashamkarat tusar apujsamu ániawai. Nii ashamsuk pujustin wakerakmeka péṅker túratá. Túrakminka akupin shiir enentáimturmartatui.

⁴ Yainmakat tusa Yus apujsamuiti. Antsu yajauch túrakmeka akupin nekas ashamkatniuitme. Warí, Yus ántar apujsamuiti. Tunáa shuaran asutiátniun Yus apujsaiti.

⁵ Nu asamtai akupin tuke umirkatniuiti. Aya asutiúwain tusar umirkashtiniaitji. Antsu shiir enentáijjaj wekasatin umirkatniuiti.

⁶ Tuma asamtai núnisaṅ akupniun kuit súsatniua nu páchitsuk susatarum. Nu takatan pujursarat tusa Yus apujsaruiti.

⁷ Ashí túratniua nu túratarum. Akiktiniaitkiunka páchitsuk akikta. Akupniusha uuntcha ashí núnisaṅ írurna nusha shiir enentáimtikratarum.

⁸ Kuitjaj tumashrintin airap. Antsu mai anenai tuke ajatarum. Chikich shuar aneakum nin péñker túrattame. Túram ashí akupkamu páchitsuk umirkattame.

⁹ Akupkamusha tawai: “Tsanirmawaip, mañkartuawaip, kasamkaip, chikich shuar tsanumpruraip, chikichna wakerutkaip” tawai. Tura nusha ashí chikichik chichamjain túminiaiti: “Ame ayashim aneam núnisemek ashí shuar aneata.”

¹⁰ Shuar chikich shuaran aneakka yajauch awajsashtatui. Tuma asa akupkamun ti shiir umirkattawai.

¹¹ Ii yámankamtaik Yus nekas enentáimtusmiaj nuñ “Ii ti shiir ajasar tuke uwempratin ukunam átatui” tu enentáimprachmashiaj. Antsu yamaikia nu tsawant yuntumsamta ashí túrajnia nuñ shintiarar enentáimpratniuitji.

¹² Tuke káshiiatitawajtemprai. Ii Uuntrj Kristu jú tunáa nuñkanam tátin ishichik ajasai. Tuma asamta ii túrutairj kiritniua núnisaj yajauch túrutai ana nuka túrutsuk tsáapninium péñker wekasatin kakaram ajastai.

¹³ Túratniua nuñ métek wekasatai. Tsawaj wekaakur kiritniunam uumkar tunáa túrutai túrashtai. Nampetsuk, yajauch warartsuk, tsanirmatsuk, jianaitsuk, tura kajernaitsuk aya péñker túratui.

¹⁴ Ii Uuntrj Jesukristu túramia núnisrik túratui. Tura ii ayashí wakeramu umikiat tusar tsañkatkashtiniaitji.

14

Ame yatsum kakantraip

¹ Shuar Yúsán ishichik enentáimtana nu itiaatarum tura kakantrairap.

² Iis, chikichka ashí yuamniaiti tuiniawai. Tura chikichcha, Yúsán awajirar, naman yúashtiniaiti tuiniawai.

³ Tura ashí yúa nuka namanen yúatsna nuna wishikrashtiniaiti. Núnisaj ashí yucha nu ashí yuun kakantrashtiniaiti. Warí, núnaka Yus ni shuarin awajsachukait.

⁴ ¿Ameka timiaataash péñkeraitiam chikich shuar kakantinia? Antsu ni úntrj ni péñker túramuncha tura yajauch túramuncha íischatniukait. Enentáimpratá. Yus kakaram asa nin péñker awajsamniaiti.

⁵ Chikichcha enentáimpratái. Chikich shuar tsawantan achikiar “Jú tsawantaj Yus nankaamas shiir awajsatniuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti.

⁶ Chikichik tsawantan enentáimtakka Yusan shiir awajsatniun túrawai. Tura ashí métekrak enentáimtakka Yúsán shiir awajsatat tusa túrawai. Yurumkajajisha ashí yúana nu Yúsán yuminkias shiir awajsatat tusa túrawai. Núnisaj ashí yúatsna nusha Yúsán yuminkias shiir awajsatat tusa túrawai.

⁷ Iikkia ii enentáijjain iwiaaktsuji. Tura jáakrishá ii enentáijjain jaatsji.

⁸ Kame iwiaaku pujakrishá ii Uuntrj Kristu shiir awajsatat tusar pujurji. Tura jáakrishá tuke Níiniuitji. Nu asamta iwiaaku pujakrishá tura jakarsha tuke Kíristunuitji.

⁹ Kame jakancha iwiaakuncha ashí ni Uuntrj ajastaj tusa Kristu jaka nantakmiayi.

¹⁰ Tura ¿urukamtaí ame yatsum “yajauchiiti” tame. Urukamtaí nakitiam? Warí, ashí iikia ii túramu paant awajnasat tusar Kristuj naka wajastatji.

¹¹ Nu asamtaí Yus-Papinium tawai:

“Wi nekas iwiaaku pujá asan ashí Winí tikishmatrurartatui. Tura ashí “Yus asa tuke péñker túriniaiti” túrutariatui” tawai.” Tu áarmaiti.

¹² Tuma asamtaí iisha chikichik chikichik ashí ii túramu Yus paant ujakartatji.

Ame yatsum tunaanum ajuarai

¹³ Nu asamtaí “yajauch túriniaiti” tu áujmatnaisashtiniaitji. Antsu ii yachj tunaanum ajuarchatin ti enentáimturtniaitji.

¹⁴ Jesukristu jintintiamu asan júna nékajai: Yus najanamuka péñkerchaka atsawai. Ashí túramniaitjai. Túrassha shuar chichaak “Nu túrushtainti” táyat nuna túrakka níjjaj tunaiti.

¹⁵ Tuma asamtaí shuar chichartamuk “Nu yúakminkia Yusjaj péñkerchaiti” taj, ame yúakminkia nu shuar iturchat enentáimsashtatuak. Tura níisha tunaanum iniaar menkakamniaiti. Nu shuar aneakum túratsme. Enentáimpratá. Aya ame yuamna nuñain ame yatsum Kristu jarukmia nu emenkkákaip.

¹⁶ Tura “yuamniaitjai” táyatam wi yúakui yajauch áujmatrusarain tusam iniaisata.

¹⁷ Kame Yus umirkatin yurumátinujajisha umartinjajisha enentáimtuschatniuiti. Antsu Yusa Wakanjjaj shiir wekasar Yusjaj tura shuarjaj nawamnaikiar ti péñker wekasatniuitji.

¹⁸ Ashí shuar Kíristun núnis umireakui Yussá tura chikich shuarsha péñker enentáimtuiniawai.

¹⁹ Nu asamtaí tuke shiir pujusminia nu túrakur Yusjaj kakaram ajastin yáiniaiktaí.

²⁰ Yus iisan ashí yuamniaitji. Antsu ame yuamna nujaj chíkich shuar tunaanum ajuartin tunaiti. Tuma asamtai ame yuam nujaj Yus nu shuara enentáin takarsamu emesraip.

²¹ Nu túrashtin nuikia naman yúashtincha karía umarchatniusha péñkeraiti. Warí, túrushatijaj ame yátsum itirchat enentáimtikram tunaanum ajurchatapash. Tura nu shuar Yúsán nekas enentáimtusshamnia ajastatui. Nuka atsutí.

²² Ame Yus nekas enentáimtakum ashí túramniaitkiukma Yúsak wararsata. Shuar Yus íimianum shiir enentáijijaj mash túramnia nu nekas shíiraiti.

²³ Tura araantushim yua nuka Yúsán shiir enentáimtutsuk yua asa sumamattawai. Kame ashí Yus shiir enentáimtutsuk túramu tunaiti.

15

Chíkich shuar wakeramuk enentáimtustiniati

¹ Yusjaj katsuaru ájinia nu ilk enentáimtumatsuk kakarmachu ainia nu yáinginiatji.

² Chíkich shuar wakeramu enentáimtustiniatji. Tura Yusjaj nu nankaamas shiir wekasatniun yáinginiatkiui túratniuitji.

³ Krístusha ni wakeramun túrachmiayi. Antsu Yus-Chicham tana núnisañ chikichnan enentáimtusmiayi. Nu asamtai Yúsán umirin asa wáitiak timia nu áarmaiti: “Ámin katsekramainiak Winiaja katsekrukarmiayi.”

⁴ Núnisañ ashí yaunchu Yus-Papinium aarma in jintinramatniun áararmiayi. Nujaj atsantamkurin shiir wáinikiattajnia nuka katsuntrar nákastatji.

⁵ Yus atsantamar katsuntratniun jintinramji. Tuma asa Jesukrístu túramia áintsañ atumniasha chíkichik enentáijijaj enentáimtunaisar pujustinian yáinmakartí.

⁶ Nujaj ashí métekrak Yus shiir awajsattarme. Niisha ii Uuntrj Jesukrístuncha Aparínti.

Israer-shuarchanmasha Uwempratin Chicham etserkamu

⁷ Tuma asamtai chíkich shuarjaisha shiir awajnisatarum. Krístu núnisañ Yúsán shiir awajsat tusa incha shiir awajtamsamajai.

⁸ Juna tajai. Krístu Israer-shuaran yáintaj tusa támiayi. Tura Yus ti yaunchu nuna weatrin “túrataj” timia nu uminkiat tusa támiayi. Nujaj Yus timia nuna umikmia nu nekaamniaiti.

⁹ Tura nu arantcha Israer-shuarchasha Yus waitnentrartin ásar matai nin shiir awajsarat tusa támiayi. Tura Yus-Papisha tawai:

“Ámin kantamprakun ashí shuarnum shiir awajsattajme.”

¹⁰ Tura nu arantcha tawai: “Ashí nunkanmayá shuartiram ashí Israer-shuar Yúsna ainia nujaj warastarum.”

¹¹ Tura ataksha tawai: “Ashí aents ii Úuntrj shiir awajsarti. Tura ashí shuarsha Nin “Ti úuntaiti” tiartí” tawai.

¹² Isayassha áarmiai: “Tawitia aparj Isai weatryia akupin akiinkiatawai. Niisha ashí nunkan akupeakui ashí shuar niiniak shiir enentáimtusartatui.” Tu áarmaiti.

¹³ Yus ashí shíran suramsattakrin nu shiir nákaji. Tuma asamtai Nii nekas enentáimtakrumin warasa shiir pujustinian yamá suramsati. Nuyá Yusa Wakanj kakarmarjijaj ti shiir enentáijijaj katsuntrarum, nu nákastarum.

¹⁴ Yatsurú, atumsha anenainaitrume. Tura ashí Yusna nekaarum nuamtak chicharnaikiatin nékarme.

¹⁵ Tuma ajñ kajinmatkijirum tusan ataksha ti paant áakun jú enentáimtikeajrume. Yus winia waitnentrak ni Chichamen etserkat tusa akuptakui nuna áatjarme.

¹⁶ Kame Jesukrístu Israer-shuarchanum Yusa shiir chichamen etserkat tusa akuptukuiti. Nuna túrakun Israer-shuarchan Yusa Wakanjijaj shiir awajsamu ásar matai Yusaj juiniajai. Tura Yussha shiir enentáijijaj itiaiiniawai.

¹⁷ Jesukrístu yaintiu asamtai Yusna takarsamaj nuna wararsamniaitjai.

¹⁸ Tura chíkich shuarjaj Krístu túramun pachischattajai. Aya wi chichasmajajisha tura wi túramujajisha Israer-shuarchan Krístu umimtikiamia nunak ájimatattajai.

¹⁹ Yusa Shiir Wakanj kakarmarjijaj aents tujintiamun túran ashí shuaran Jerusarén péprunam nankanam etserkin Iririkiu nunkanam ejekamjai. Krístu-chichaman ashí nu nunkanam etserkaitjai.

²⁰ Nuna túrakun chíkich shuar etserkachmanum Krístunun ántichu áiniamunum Uwempratin Chichaman etserkaitjai. Nujaj chíkich takasmanum takarsachuitjai.

²¹ Yus-Papisha núnisañ tawai:

“Chichaman penké antukcharuka nekaawartatui. Nin áujmatman anturkacharusha un-uimiarartatui.”

Papru Rúmanam wétaj tawai

²² Nuna pujuru asan ítjarum táyatan íchmajrume.

- ²³ Tura yamaikia juyá takatrun umikian tura yáunchusha tuke íitjarum tiniu asan
- ²⁴ Ispania nukanam wéakun ístatjarne. Tura atumjín shiir irasan Ispanianam wéakui atumsha yáintkiarum shiir akuptukchattarpash.
- ²⁵ Tura yamaikia kuitjái Jerusarénnumiá Yus-shuaran yáintaj tusan wéajai.
- ²⁶ Masetúnianmaya shuarsha tura Akayanmaya shuarsha kuitian irurar Jerusarénnumiá Yus-shuaran atumainia nuna akuptuktai tuiniawai.
- ²⁷ Ti wakeruiniak túrawarmiayi. Nu nekas túrashtinkiait. Israer-shuarnumiá Yus-Chichaman antukaru ásar yamaikia ni kufríjijai páchitsuk yáinchatniukait.
- ²⁸ Tuma asamtai jú kuitian súsan umiran nuikia Ispanianam wéakun íktiatjarne.
- ²⁹ Tura nuj winiakun Kristu Shiir Chichamen nujaj shiir yáintajrum tusan ejeetitia-jrume.
- ³⁰ Yatsurú, ii Uuntrí Jesukristunu asarum tura ni Wakaní pujurtamkurmin anenia asarum Yus áujtursatarum. Núnisrum wíjjai métek Yusna takastin yaintkiattarme.
- ³¹ Jutia nunkanmaya Israer-shuarnumiá uwentikrat tusarum Yus áujtursatarum. Tura jú kuitian júajna nunasha Jerusarénnumiá Yus-shuar shiir achikiartí tusarum Yus áujtursatarum.
- ³² Nujaj, Yus wakerakuinikia, péñker wampú enentáimsan warasan íttiajrume.
- ³³ Yus ti shiir pujustinian súana nu atumjai tsanin pujurtamsati. Núnisan atí.

16

Amikmaamun akupramiania nu

- ¹ Ii umai Jépeka Senkrea péprumaya Yus-shuaran yáiniaiti. Ti péñker Yus-shuaraiti.
- ² Kristu náarjín shiir wáinkiatarum. Nuamtak yachí wáinkiatniua núnisrum wáinkiatarum. Niisha chikichnasha tura winiasha ti péñker wáitin asamtai atumsha ni atsumamusha yáintarum.
- ³ Pirisirasha Akirasha wíjjai métek Jesukristunun takasaru ásar amikmaatainijai.
- ⁴ Niisha winia uwentikrurtai tusar jániñkiarmiayi. Tuma asamtai yumñkiniyajai. Tura aya wíkichu antsu ashí Israer-shuarchanumiá Yus-shuar áinia nusha yumñkiniawai.
- ⁵ Núnisan ashí Yus-shuar Pirisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Kristun nekas enentáimtusmiayi.
- ⁶ Marisha, atumjai ti takasua nu amikmaatruatarum.
- ⁷ Tura wí shuarsha Antrunikiusha Júniassha amikmaatruatarum. Niisha wíjjai sepunam pujusarmai. Wíjjai emka Kristun shiir enentáimtusar chíkich akatramujai nankaamas takasaru ániawai.
- ⁸ Ámpriassha Kristunam winia aneamu amikiur asamtai amikmaatruatarum.
- ⁹ Urpanujajsha Jesukristu takatrí tsaninñiuitji. Niisha tura aneamu Estakissha amikmaatruatarum.
- ¹⁰ Ápirissha amikmaatruatarum. Niisha Kristun ti shiir enentáimtamú ti páantaiti. Núnisan Aristúpuru shuarsha amikmaatruatarum.
- ¹¹ Wíshuar Erutiñsha tura Narsisu shuarsha Kristu shuarj ásarumatai amikmaatruawarta.
- ¹² Tripiniasha tura Tripiusasha Yúsnan takainia ásarumatai amikmaatruatarum. Núnisan ii umai Pírsitia Yúsnan ti takasu asamtai amikmaatruatarum.
- ¹³ Rúpusha, nusha ti péñker Yus-shuar, tura nukurísha amikmaatruatarum. Niisha wíjjai nekas winia nukuru núnisaiti.
- ¹⁴ Asinñkritiusha, Pirikiuntisha, Érmassha, Patrupassha, Érmessha, tura ashí niíjjai Yúshuar ainia nu amikmaatruatarum.
- ¹⁵ Núnisan Jirurukusha, Júriasha, Néreusha, ni umajjjajsha, Urimpiassha, tura ashí Yus-shuar niíjjai pujuinia nu amikmaatruatarum.
- ¹⁶ Nuámtaksha shiir aujnaisatarum. Ashí juyá Kristu shuarj amikmaatmainiawai.
- ¹⁷ Yatsurú, shuar nusháa enentáimtuiniak Yus-shuaran akanainiak iturchat awajenawai. Nu shuar wáinkiarum kanaktiarum. Ni yajauch túramu átum péñker takastin unuimiarmena núnischaiti.
- ¹⁸ Nu shuar ii Uuntrí Jesukristunun takainiatsui. Antsu ni wakeramun uminiawai. Tura ti shiir chichasar nékachun ananñkenawai.
- ¹⁹ Átum umirma ashí shuar nékainiakur ti waraaji. Yajauch túrutsuk aya péñker túratin enentáimsarum pujustarum.
- ²⁰ Yus tuke shiir pujustinian amawa nu ti wárik uunt iwianchin nupetturmaktatui. Tura ii Uuntrí Jesukristu shiir yainmakarti.

²¹ Timiutéusha, wíjjaj takau, amikmaatmarme. Núnisañ Rúsiusha, Jasunsha, Susipatresha, mash wíishuar ainia nu amikmaatmarme.

²² Wi, Tersiu asan, Papru chichamen ju papinium áateakun Kristu náariin amikmaajrume.

²³ Káyusha amikmaatmarme. Ni jeen pujaji tura juisha ashí Yus-shuar irunainiawai. Erastusha ju pepru kuítrín wáinniiti. Niisha ii yachí Kuártujaj amikmaatmarme.

²⁴ Ii Uuntri Jesukristu ti shiir yainmakarti. Núnisañ atí.

Yus shiir awajsatai

²⁵ Watsek, Yus shiir awajsatai. Niñki nekas kakaram awajtamsamniaiti. Wi Uwempratin Chichamnum Jesukristunun étsereaj nujaj ikiantamprattawai. Nu chicham yámankamtaiknumiá nekaachmanak Yus yamaikia paant awajsaiti.

²⁶ Yaunchu Yúsnan etserin ni áarmanum nu chichaman etserkarmiayi. Tura yamaikia Yus wakerak ashí nunkanmaya shuar Nii enentáimtusar umirkarat tusa nu Chichaman yamaikia paant awajsaiti. Yus amuutsuk tuke pjuwiti.

²⁷ Yúsak Niñki ti neka asa tura Jesukristu ti penker tura asamtai Niñki tuke shiir awájnástí. Nuke atí.

Papru **KURINTIUNMAYA SHUARAN** **Emka papin aar akuptukma**

Kurintiumaya Yus-shuaran Papru áatramiania nu

¹ Wi Pápruitjai, Jesukrístu akatramu. Yus nuna wakerak, ni akatramurí atí tusa anaitiukmai. Wi, ii yachí Sústinisjaj, ju papí akupeaji.

² Ashí Yus-shuar Kurintiu péprunam iruntrumna nu ju papí akupeaji. Átumka Jesukrístujaj tsanínkiu asarum Yusna árume. Atumsha tura ashí shuar Jesukrístun enentáimtuiniana nunasha Yus ti penker awajsatniun wakerawai. Nincha incha Jesukrístu mai metek Úuntrinti.

³ Yus ii Aparí tura ii Úuntrí Jesukrístusha waitnentramainia ásar yainmakarti imiatkinchanum tuke shiir pujustinian.

Ii Uuntri Jesukristujaj tsanínkia pujustin

⁴ Yusan áujkun yumínsan atumin shiir enentáimtajrume. Jesukrístujaj tsanínkia pujakrumin Yus shiir enentáimturmawai.

⁵ Jesukrístujaj tsanínkia pujakrumin Yus atumin ti yáinmawai ashí penker ana nu enentáimtakrum tuke shiir chichastinian.

⁶ Kristu juna túramniaiti tichamkaj'. Ashí yamaikia uminkiaiyi.

⁷ Tuma asamtai ashí Yus súramna nu atsumatsrume. Nu túrakrum ii Uuntri Jesukrístu tatin tuke nákarne.

⁸ Tura iniaitsuk tuke emettamattawai ii Uuntri Jesukrístu támatai atumi tunaarín pachischatin.

⁹ Jesukrístu ii Uuntriinti. Niijjaj tsanínkia pujusúk tusa Yus achirmakmarme. Tura Nii tana nuna tuke umiktatúí.

Yus-shuar akantramu

¹⁰ Yatsuru, ii Uuntri Jesukrístu naarj pachisan, seajrume métek enentáimpratarum tusan. Nísháa nísháa enentáimprairap antsu chikichik enentáijjjaj métek enentáimsa pujustarum.

¹¹ Átum yajauch chicharnaisarum pujarme. Kruí shuarí tu ujatkarматаi tájarme.

¹² Kame júnis awai: Chikich "Wi Páprunuitjai" tuiniawai. Chikich "Apurusnaitjai" tuiniawai. Chikichcha "Wi Pítrunuitjai" tuiniawai. Chikichcha "Wi Kristu-shuaraitjai" tuiniawai.

¹³ ¿Warí, nuínkia, Kristu akantramukait. Páprusha krúsnum jarutramkamaashi. Tura Papru naarj pachisa imiaimiukaitrum?

¹⁴ Atumin untsurí imiaichu asan shiir enentáimjai. Aya Krispu Káyujaj jímiarchiniak imiaimjai.

¹⁵ Nújjajnkia shuar "Papru náarjín imiaimiuitjai" tichamniaiti.

¹⁶ Maa, nekas, Estepanasa shuaríncha imiaimjai tura chikich wi imiaimiun nékatsjai.

¹⁷ Kristu imiakrattia tusa akuptukchamai antsu uwempratin chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimprarajín tusan. Antsu yúpichuch chichaajaj Kristu krúsnum jakamuk paant atí tusan.

Kristu Yusa kakarmaríncha ni nekatairíncha paant iniakmasmiania nu

¹⁸ Kristu krúsnum jarutramkamu étsereaji. Antsu Yus-shuarchaka menkaakatniunam wéana nu, "ántraii nu chicham" tu enentáimainiawai. Antsu Yus-shuarti, uwempratniunam wéakur, "nu chichamjaj Yusa kakarmarj takusminiaiti" tu enentáimji.

¹⁹ Núnisaj tawai Yus-Chicham yaunchu aarma: "Ju nunkanmayan ti neka áiniana nuna chichamen emesrattajaj; ti unuimiararu áinianak ántar awajsattajaj" tawai Yus ni chichamen.

²⁰ Iis, ju nunkanam uwempratin chicham íruntsuk. Nu chichaman ashí mash Yus ántar awajsaiti. Ti neka áiniana nusha, jintinkartin áiniana nusha, ashí ju nunkanmayan unuimiar ti chichastinian nékana nusha, nu shuar mash "wi tájana nujaj penker pujusam uwemprattame" tu enentáimainiawai. Tura núnaka mash Yus penker ántar najanaiti.

²¹ Aya ni nékamujaj aents Yúsan nekaacharmiayi. Núnisaj atí tusa Yus túramiaiyi, timiá neka asa. Antsu ashí aentsun Yus ni chichamejjaj uwemtikratniun wakerimiayi. Chikich "ántraii" tuiniana nu chichamjjajnk' Yus Nin enentáimtuinia núnaka uwemtikratniun wakerak túramiaiyi.

²² Israer-shuar “aentsti túrachminian iniakmasta, wi nekaataj” tuiniawai. Kriaku shuarsha “ti enentáimsam, mash péñker jjikim turuttia wisha metek enentáimprataj” tuiniawai.

²³ Iikia antsu Kristu krúsnum jarutramkamuk étsereaji. Israer-shuarsha “ju chicham natsantaiti” tu enentáimiainiawai. Israer-shuarchasha “ju chicham ántraiti” tu enentáimiainiawai.

²⁴ Tura Yus achikiarma, Niiniu ajasarat tusa, Israer-shuarsha Israer-shuarchasha mai metek “Kristu krúsnum jarutramak Yusa kakarmaríncha ni nekatairíncha paant iniakmas-miayi” tu enentáimji.

²⁵ “Yusa nekatairí ántraiti” tuiniawai aents, túrasha imiá nekas péñkeraiti. “Yusa kakarmarísha jeatsui” tuiniawai aents, túrasha imiá nekas kakarmaiti.

²⁶ Enentáimtumastarum yatsuru. Yus achirmakmarme Niiniu ajastinian, tura ju nunkanam ti neka áinia núnisan atumín ti neka íruntui. Ti akupniusha ti nankaamakusha atumín íruntui.

²⁷ Antsu ju nunkanam nékachua núnis ana nuna Yus achikiuiti ti neka nuna iniatsáartinian. Tura ju nunkanam kakarmachua núnis ana nunasha Yus achikiuiti kakarma nuna iniatsáartinian.

²⁸ Pééjchachincha, nakitsamuncha, ántrachincha, Yus achikiuiti ashí nankaamantu írunna nuna amuktinian.

²⁹ Nújainkia chikichkisha Yusjaj waantu enentáimprachminiaiti.

³⁰ Tura Yus atumin Kristujaj tsanin apujtamsaiti. Tura Kristu enentáimtusar Yus nekas nekatainkia nekaattaji. Kristu enentáimtakrin Yus shiir enentáimturmaj, péñker awajtamji, tura uwentikramji.

³¹ Yus-Papinium yaunchu aarma núniskete: “Shuar nankaamantu enentáimprataj tákuñka ii Uuntrj Yus túramun wararsati.”

2

Kristu krúsnum jakamu etserkamu

¹ Wisha, yatsuru, atumíin jeamaj nuj Yus-chichaman ti neka chichainia áintsan tura íwiasanak ujakchamajrume.

² Tura atumjaj pujakun aya chikichkiniak nekaatniun enentáimpramjai. Júiti: Jesukristu, tura Jesukristu krúsnum jakamu.

³ Né kayatan kakarmachu sapíjmiashím jearmiajrume.

⁴ Yus-Chichaman ujaakun ti neka chichainia áintsan nupetkataj tu enentáimturchamajrume. Antsu Yusa kakarmaríncha tura ni Wakaníncha paant iniakmasan Yus-Chichaman ujakmajrume.

⁵ Aentsu nekatairíjjaj Yus enentáimtuschatniuiti antsu Yusa kakarmari paant nekaarum Yus enentáimtustiniaitrume. Nuni asamtai Yus-Chichaman tu ujakmajrume.

Aya Yusa Wakaníjjaj Yúsnan nekaamniaiti

⁶ Túmaitiat Yusa nekatairí átsuk. Yúsnan unuimiararujaj Yusa nekatairín áujmatji. Tura Yusa nekatairínkia aentsu nekatairí áintsachuiti. Ju nunkanam akupin ainia nuna nekatairínchuiti Yúsna. Ju nunkanam akupniuka ishichik pujus amuukachartatuak.

⁷ Yaunchu ju nunka atsaín Yus in uwentikrampratniun enentáimpramiayi ti shiir pujusarmi tusa. Ju Yusa enentáimmiari yaunchu nekanachmiayi, tura yamaikia nu nekaar áujmatji.

⁸ Ju nunkanam akupniuka nuna penké nekaacharmiayi. Né kainiakka ii Uuntrj timiá shiira nuna, krúsnum máacharu aayi.

⁹ Yaunchu Yus-Papinium áarchamakait: “Shuar Yúsan aneana nuna Yus ti shíran susattawai. Susattana nuka timiá péñker asamtai shuar wáinkiachman, antukchamuncha, enentáimtachmancha Yus susattawai” tu áarmaiti.

¹⁰ Tura Yusa Wakaní ii enentáin pujurtamuk Yus suramsattajnia nuna yamá paant jintinramji. Nu Wakancha imia Yus enentáimniancha mash nékawai.

¹¹ Shuar enentáimna nuna chíchich shuar nekaamniakait. Antsu aya ní enentáijjain nékatsuk. Núnisan aya Yusa Wakaní Yúsnan paant nékawai.

¹² Ju nunkanmaya aents enentáimiainia nujaj Yusna nekaachminiaiti. Antsu Yusa Wakanin in súrarnaj nujaj Yus shiir tsankatramajnia nu nekaamniaiti.

¹³ Yusa Wakaní jintinramji Yúsnan chichastinian Nii wakera áintsan. Ni chichamen súrarnaj. Túramtai ii nékamujaj Yúsna étsertsuji. Tuma asamtai imia Yusna nuka Yusjaj péñker wekainia nu jintajai.

¹⁴ Yus-shuarcha Yusa Wakaníniun ántatsui ántraiti tusa. Aya Yusa Wakaní jintintiamni-atikiui Yus-shuarcha nuna penké nekaachmin áiniawai.

¹⁵ Antsu Yusa Wakanj̄ takaku ashí mash iis, péñkera nuna nekaamniaiti. Nii túrana nunasha chíkich shuar súmamtikiachminiaiti.

¹⁶ Yus-Papinium yaunchu áarmaiti: “¿Yusa enentáimmiari ya neka. Tura Yúsán ya jintintiamniait?” tu áarmaiti. Tuma aijn̄ iikia Yus-shuar ájinya nu, Kristu enentáimna núnisrik enentáimji.

3

Páprusha Apurussha Yusa takatr̄j̄ mai tsan̄inkiar takainiawai

¹ Tura wikia, yatsuru, nuik aī atumj̄aj̄ pujakun Yusa Wakanj̄n umirniun chichastinia áintsanak atumj̄aj̄ chichastinian tujinkiamj̄aj̄. Antsu ayash wakeramu umirin asakrumin Kristunam katsuarcharuj̄aj̄ chichastinia áintsanak atumj̄aj̄ chichasmaj̄aj̄.

² Uchi kuírach namañ ayurachminiaiti antsu aya umuntsatniuiti. Núnisan̄ aya yúpichuchin ujakmajrume, itiurchat ana nu tujintiakrumin. Tura yamaisha itiurchat ana nu tuke tujintiarne.

³ Tuke ayash wakeramu umirniuitrume. Yajauch enentáimtunaiyakrum tura katsumnaiyakrum akantramuitrume. Nuj̄aj̄ páantaiti átum ayash wakeramu umirniuitrume. Yúsán enentáimticharuj̄aj̄ métek wekainiaitrume.

⁴ Atumj̄inkia shuar “wi Páprunuitj̄aj̄” tuiniatsuk. Chikichcha “wi Apurusnaitj̄aj̄” tuiniatsuk. Tu chichaakrum ayash wakeramu umirniuitrume.

⁵ Wátsek. Wi Papru ti péñkeraashitiaj̄. Apurussha ti péñkeraashit. Antsu iisha aya Yusa takarniur̄inj̄i. Yus-Chicham éterkurin ii Uuntr̄j̄ enentáimtuschkuram. Ii Uuntr̄j̄ takatan chíkich chíkich suramsamajnia nuke takasmaji.

⁶ Wi Yus-Chicham éterkun arakan araktinia áinis takasmaj̄aj̄. Apurussha entsan ukatramai. Tura Yus nu arakan tsakatmarmai.

⁷ Arakan araana nusha, entsan ukatna nusha ánrachukait. Antsu Yusak arakan tsakatmaru asa ashí túrachukait.

⁸ Arakan araana nusha, entsan ukatna nusha métek áiniawai. Túmaitkiusha takasmaj̄aj̄ métek Yus akiktatui. Péñker takasmatainkia péñker akiktatui.

⁹ Wisha Apurussha Yusa takatr̄j̄ mai tsan̄inkiar takaaji. Tura Yus atumí enentáin takaakuí atumsha Yusa nún̄k̄ea áintsaitrume.

Jeasha enentáimpramniaiti. Yus atumj̄aj̄ takaak jeá jeam̄tinia áintsan̄ takaawai.

¹⁰⁻¹¹ Jeá jeam̄niak, emka uunt kaya nun̄ká in̄it ikiursar kaki awaj̄satin áiniawai. Tura nuyanka nu kayanam ekeniar júkitniuiti jeá wewe atí tusa. Wikia jeá jeam̄min ti un̄iniamiarua áintsanak uunt kaya nun̄ká emka ikiustinian nekaan, núnisnak Jesukristunun emka ujakmajrume. Tura Jesukristu uunt kaya kaki ikiusma áinis asa Nín̄kiti nu j̄aj̄ jeá ekenkatin. Iis, ashí enentáimtustinia nan̄kaamas Jesukristu enentáimtustiniati. Nu asam̄tai Jesukristunun emka ujakmajrume. Yus nuna etserkatniun tsan̄katrukuiti. Wi emka, uunt kaya ikiursatniua áintsan, Jesukristunun ujakmajrume. Tura nuyanka chíkich shuar ekeniar jeam̄min áiniawai. Tura anearti péñker jeam̄tinian.

¹² Tura jeá jeam̄niak nii wakerak péñker ana nuj̄aj̄ jeam̄miniaiti. Nii péñker jeam̄tinian wakerak kurij̄j̄aj̄isha, kuítj̄aj̄isha, shírmach kayaj̄aj̄isha jeam̄miniaiti. Chíkich jeam̄kuka numij̄j̄aj̄isha, ken̄kuj̄aj̄isha, nukaj̄aj̄isha jeam̄miniaiti. Núnisan̄ shuar Yúsán takaak péñker takasm̄niati túrasha nán̄kamas takasm̄niati.

¹³ Tura amuukatin tsawant jeakuí ashí ni takatr̄j̄ paant átatui. Nu tsawantaj̄sha Yúsaiya jí átatui tura nu j̄isha ni takatr̄j̄ péñkera nunasha tura yajauchia nunasha nekapsattawai.

¹⁴ Tura shiir jeam̄kuka tura nu jeasha esaachmatainkia shiir akinkiattawai.

¹⁵ Antsu nán̄kamas jeam̄kuka imian̄in̄ki jin̄iumiã uwemprattawai, tura ni jeamma esaa pen̄ké atsuttawai.

¹⁶ Enentáimpratarum. Yusa Wakanj̄ atumj̄in̄ pujá asam̄tai Yusa J̄ej̄ ajasuram nu nékatsrumek.

¹⁷ Shuar Yusa J̄ej̄n̄ émeseakuinkia Yus nu shuaran emesrattawai. Yusa J̄ej̄n̄ka timiá shiir asam̄tai túrattawai. Nu J̄ej̄ atumketrume.

¹⁸ J̄u nun̄kanmayan̄ unuimiarua núnisrum “ti nekaitj̄aj̄” tu enentáimtusarum anañmamawairap. Antsu j̄u nun̄kanmayan̄ nékachu áinis ajas Yúsán ti shiir unuim̄iártiniati.

¹⁹ J̄u nun̄kanmayã aents nékainia nuna Yus “ántraiti” tawai. Yus-Papinium áarmaiti: “J̄u nun̄kanmayan̄ unuimiarun ni enentáimmiáj̄aj̄n̄ Yus sumantikiattawai.”

²⁰ Tura nu arantcha áarmaiti:

“Uunt Yuska “unuimiaru enentáimmiancha pen̄ké ántraiti” tawai.”

²¹ Tuma asamtai “Páprunuitjai tárumna nusha, “Apurusnaitjai”, tura “Pítrunuitjai” tárumna nusha ántar enentáimprume, nii aya aents ásarmatai. Tu enentáimprarum warasairap. Antsu nekaatarum. Ashí írúnna nu atumin yainmaktiniaiti.

²² Páprusha, Apurussha, Pítrusha, ju nunkanmayasha, iwiakmasha, jákatniusha, yamá írúnna nusha, ukunam átatna nusha, mash atumniaiti shiir yainmaktin.

²³ Atumsha Krístunuitrume, tura Krístusha Yúsnaiti.

4

Yus akatramu takatj

¹ Júnisañ ashí shuar enentáimturmastiniaitji. Iikia aya Kristu yáintrjntji. Kristu akatramurjntji Yusna yaunchu nekaachma ana nu yamá etserkatin.

² Wátsek, akatramuka tána nujaj métek umiktiniaiti.

³⁻⁴ Wi umikmancha umikchamuncha ii Uuntrj Kristu nékawai. Átum enentáimturarmena nusha tura chíkich aents enentáimturainia nusha wjiañkia ántraiti. Imia wíkisha nekamatsjai. Kame winia tunaarun penké wáintsujai tura aya nujaj “pénkeraitjai” tichamniaitjai. Niñkia Yus iirui.

⁵ Tsawant jeamtai ii Uuntrj Kristu atak tátatui. Tura ashí yamá kiritniunam uukma nuna tura shuar ashí enentáimprarma nunasha paant awajsattawai. Nu tsawant jeatsañ shuar umikiuashit tusarum enentáimtusairap. Tura nu tsawantjai Yus ashí pénker umikiarun shiir awajsattawai. Pénker umikiuncha ishichik umikiuncha takasmajaj métek Yus shiir awajsattawai.

⁶ Átum “Ju shuar pénkeraiti tura chíkich pénkerchaiti” tu akannáirarum penké tichatniutrume, yatsuru. Nuka paant atí tusan “Átum “Wi Páprunuitjai” tura “Wi Apurusnaitjai” tírap” tajai. Antsu aya Yus-Papinium áarmajaj métek enentáimsatarum.

⁷ Ámeka chíkich shuarjaj méteketme. Tura ashí takakmena nusha Yus amasmaiti. Tura Yus amasu asamtai çitiurak áminiukea áintsam nujaj nankaamantu ajai tu enentáimtumam?

⁸ Çiti kuítrinnia áintsañ tura ashí takakua áintsañ enentáimturmek. In nankaakarum uunt kapitíán ajasua áintsañ enentáimturmek? Nekas uunt kapitíán ajasrumka maak. Nuñkia iisha atumjaj akupkaintji.

⁹ Chíkich shuar mash nankaamantu áinis ániakuisha Yus in ni akatramurjñ ashí amúamunam apujtamsaitji. Tu enentáimpramniaiti. “Yajauch ániawai, máatái” tu pujurtamj shuar. Tura Yusa suntarjsha ashí juyá shuarsha in listai tusar káutramkaintji.

¹⁰ Iikia atumjaj jeatsji. Kristu shuarj asakrin nékachua áinis enentáimturmaj shuar. Átum antsu Krístunam tí nékachuashitrum. Iikia kakarmachuitji. Átum timiá kakarmaitrume. Átumka ti penkeraitrume. Antsu iikia mujtiaintji.

¹¹ Tuke yamaisha tsukamaji, kitiamaji, entsartin atsumaji. Katsumpramji. Jeasha atsumaji.

¹² Ii ewejaj takaakur ti pimpíaji. Shuar katsekramainiaji túrasha iikia shiir chichamjaj aiyaji. Itiurchat awajtamainiakuisha katsunteaji.

¹³ Tsanumprutmakrincha tuke shiir chichajaji. Tsuata áintsarik tuke yamaisha ashí yajauchia núnisañ ajapramatniun enentáimturmainiaji.

¹⁴ Atumin aya iniatsaqtajtsan juní áattsujrume. Antsu winia aneamu uchirua áintsan jintintjarme.

¹⁵ Atumin Yus-Chichaman ujaakun Yus-shuar ajastinian unuiniamjarme. Nujaj Jesukrístu enentáimtakrumin atumí aparjá áintsan ajasmajai. Chíkich shuar Krístunun jintin-trámatin timiá untsurj ákuisha aya wiki atumí aparjntai.

¹⁶ Tuma asamtai wi wekaajna áintsañ wekasatarum atumsha.

¹⁷ Nu túratarum tusan winia aneamu uchirun Timiutéun akuptukmajrume. Niisha ii Uuntrj Krístun enentáimtumam winia uchiruiti tura Krístun enentáimtak tuke shiir wekaawai. Túrasha wi Krístujaj wekaamun ataksha enentáimtikramprattawai. Núiti ashí Yus-shuarnum wena jintíajna nuka.

¹⁸ Papru yamaikia irashtatui enentáimturainiak chíkich chíkich nankaamantuitjai tu enentáimtumainiawai.

¹⁹ Antsu Yus wakerakuñkia wárik ítjam tusan wakerajai. Nuñkia nankaamantu chichameñ antukchattajai antsu wátskea, ni túramurjsha íistái.

²⁰ Yus akupeana nú shuar aya chíchainiatsui antsu Yusa kakarmarjñ iniaktuiniawai.

²¹ Wátsek, çwarí enentáimprum? Átum tuke núnisañ enentáimkiurminkia wi winin asutiátniuitjarme. Tura pénker enentáimkiurminkia, aneakun shiir chichasminiaitjarme. Çatumsa túa wakerarum?

5

Tsanirmamu ti tunaiti

¹ Atumjin shuar ti tunáa tura awai. Ju yamá ashí nekanaiti. Nu shuar ni aparí nuwé achikiuíti. Timia tunaaka nu tsanirmamu Yus-shuarchanumsha atsawai.

² ¿Nu tunaajáisha tuke nankaamantu enentáimprume? Antsu úttiniaitrum. Nu shuar tunáa túraka atumjin akankatniuiti.

³ Ayashur pujachkuisha wi nuí pujáa áintsan nuna tunaarin paant nekaamjai, tura asutiátniuiti tajai.

⁴ Tuma asamtai átum káunkakrumin ii Uuntrj Jesukristu kakarmarjjai tura wi nuí pujáa áintsanak, ii Uuntrj Jesukristu kakarmarjjai

⁵ nu shuar uunt iwianchnum surunkatniuiti ni ayashi wakeramurj amukati tusa. Nujai ni wakanj uwemprattawai ii Uuntrj Jesukristu támatai.

⁶ “Íkia pénkeraitji” tárumna nu ántrai, tunáa atumjin tuke akui. Iis, “Karíia ishichik yuminnium enketam mash karimtiktsuk” tiniu áiniawai. Núnis átatui ju tunaajai.

⁷ Tuma asamtai nu karíia ukartarum yajauch awajturmasaj tusarum. Núnisrum ju tunaanumiá kanakrum pénker átatrume. Yaunchu enentái karíia núnis amuukatniuiti. Ashí yamarmak yuminia áintsan ajasuitrume. Tanta wakapruachusha enentáimpratai. Israer-shuar paskua nampernum aya wakapruachu tantan yuu áiniawai. Atumí tunaarj atsakuí atumsha nu námper-tantaa áintsar pénker ajasuitrume. Paskua nampertincha Israer-shuar murikiun main áiniawai. Núnisan Kristu jaka ii murikria áinis ajasuíti.

⁸ Tuma asamtai iisha paskua námper nájanku pujakur tuke núnisan shiir wekasatniuitji. Tuma asamtai ashí yajauch tunaasha írunna nuka karíia yaunchu nawamua áintsankete. Nuka atsutniuiti. Antsu nekas ana nuka shiir enentáimsar wekasatniuitji. Nuka yuminia áintsankete.

⁹ Nuik papin áatramajrumna nuí “Tsanirma shuarjainkia íschatniuitrume” tímiajrum.

¹⁰ Ju nunkanam Yus-shuarchaka aya tsanirma, aya kuitniak ikiauwin, aya kasak, aya ántar-yusan tikishmatin áiniatsuk. Nú shuarjainkia penké íschatniuitkiurmeka ju nunkanmayá jíinkintrume. Núnaka tátsujai.

¹¹ Antsu wi tájana nu júiti, Shuar “Yus-shuaraitjai” tákuka tura tunáa túriniaitkuinkia nijjai íschatniuitrume. Tsanirmasha, kúitian ikiauwincha, ántar-yusan tikishmatniusha, tsanumniusha, nampencha, kasasha “Yus-shuaraitjai” tákuinkia íschatniuitrume. Penké nijjai yurumáshtiniaitrum.

¹²⁻¹³ Yus-shuarcha tunaarj pachischatniuitjai. Yus núnaka ístatui. Átumka antsu atumjin Yus-shuar ainia nuna tunaarj ístiniaitrum. Tuma asamtai nu shuar tunaarintin atumjiyá akankatarum.

6

Yus-shuar nuámtak itiurchat awajnalisarka Yus-shuarchajai nuna iwiarashtin áiniawai

¹ Yus-shuarka chíkich Yus-shuarjai itiurchat pujakka kapitianjai chichas iwiarashtiniaiti Yus-shuarcha asamtai. Antsu Yus-shuar írunna nujai iwiarati.

² Enentáimpratarum. Amuukatin tsawantaj Yus-shuarka ashí ju nunkanmayá shuara tunaarj mash nekaawartatui. Tura ashí tunáa nekaatniuitkiurmeka itiu yúpichuchia nu nekaashtatrum.

³ Nu arantcha Yusa suntarj túramurisha nekaattaji pénkerashit tusar¹. Nayaimpiniam túrawarma nekaatniuitkiurkia itiuura ju nunkanmayá nu tujinkiattaj.

⁴ Pai, itiurchat ákuinkia Yus-shuar penké tujintáiniana nujai iwiaratarum antsu.

⁵ Natsaruk tusan nuna tájarme. Warí, ¿atumjin chikichkisha atsawak ni yachí itiuurchatrji pénker iwiarannia?

⁶ ¿Urukamtai Yus-shuar ni yachjjai itiuurchat pujakka Yus-shuarchanum wea iwiaratniun?

⁷ Atumí itiuurchatrji kapitianium jukirmeka nujainkia átum tujinkiamu páantaiti. Nat-santchakait. Itiuurchat ana nusha ¿urukamtai antsu katsuintram asakáatsum? Kasamkamusha ¿urukamtai katsuintram asakáatsum?

⁸ Antsu átumka nuámtak yachjjai itiuurchat awajnáiyarme tura kasárnáiyarme.

⁹ Tunáa túrinkia Yus akupeemunam pachiinkiachmin ainia nu nékatsrumek. Ananawairap. Ashí tsanirma nusha, ántar-yusan tikishmatniusha, nuamtak áishmanjai tsanirmasha,

¹⁰ kasasha, ashí kúitian ikiauwincha, nampencha, tsanumniusha, yajauch chichainia nusha, chíkich shuaran anankawar atantin ainia nusha Yus akupeemunma nuí penké wayashtin áiniawai.

¹¹ Atumúyasha chíkich chíkich nuna túrin armai. Tura yamaikia ii Uuntri Jesusa kakarmarjijai tura ii Yusri Wakaní kakarmarjijai atumi enentái shiir ajasuiti, atumsha Yusna ajasurme, tura tuke péñker ajasurme.

Íi ayashí yajauch áchatniuiti

¹² “Ashí túramniaitjai” tiniu ániawai tura nekasaiti. Tuma aijn mash yáinkiashtatui péñker wekasatniun. Nekas ashí túramniaitjai tura náñkamas túratniujai nupetnakchattajai.

¹³ Júnasha tiniu ániawai: “Apatuk wakejainchu tura wake apatkujainchu mai ántraiiti.” Apatkujai wakesha nekas mai metek enentáimpratin ániawai tura Yus mai metek amuktatui. Núnisan ii ayashí ii Uuntri Kristunuiti tura Kristu ii ayashí nérenniuiti. Tuma asantai ii ayashíjijai tsanirmashtiniaiti.

¹⁴ Tura Yus ii Uuntri Jesusan iniantkimia núnisan ii ayashíncha nu kakarmarjijai iniantkittiwai.

¹⁵ Ashí ii ayashín Kristu ayashímkiaiti. ¿Nu átumka nékatsrumek? Winia ayashrusha Kristu ayashíyá asantai ¿itiurak nuna tsaniri ayashín najanattaj? Penké túrachminiaitjai.

¹⁶ Kame ¿jusha nékatsrumek? Áishman tsanirijijai tsaninkiar chikichik ayashinia áinis ajainiwai. Núnisan Yus-Papiniun áarmaiti: Mai chikichik ayashinia áinis ajasartatui.

¹⁷ Tura shuar ii Uuntri Kristujai tsaninkia mai chikichik wakantin ajainiwai.

¹⁸ Tuma asantai tsanirmatniunmayá yajáyan wainkiarum tsékegtiarum. Chíkich tunáa írurna nu ii ayashínkia ti yajauch awajeatsui. Túrasa shuar tsanirmakka ní ayashiniak yajauch awajeawai.

¹⁹ Yusa Wakaní ame enentáimin pujurtamu asantai, ame ayashim ni jeente. Nu Wakanínia Yus amasuiti. ¿Nuka nékatsrumek? Tuma asantai ame ayashmi nérenchaitme.

²⁰ Kristu numpejai sumakma asantai, ayashmisha wakanmisha Yusna ániawai. Yusna asantai ayashmijijai péñker túratniuitme, Yus shiir awájnásti tusam.

7

Nuatkatniusha péñkeraiti, nuatkashtincha péñkeraiti

¹ Ayu. Átum áatrurmarmena nuna yamaikia ujaktajrume. Shuar nuattechkusha péñkeraiti.

² Tura ti tsanirmatniun enentáimtuinia ásar ashí áishman ní nuwenak nuatkati tura ashí nuwá ní áishrjin iniumkati.

³ Áishmansha ní áishri asa nuwen túratniua nuna umiktiniaiti. Núnisan nuwasha ni nuwe asa ni áishrin túratniua nuna umiktiniaiti.

⁴ Núwaka níni ni ayashí nérenniuchuiti, antsu ni áishrjiniuiti. Núnisan áishmansha níni ni ayashí nérenniuchuiti, antsu ni nuwénuiti.

⁵ Ní ayashí suritnaikiashtin ániawai. Tura mai itit awajnaitsuk Yus áusatin wakeruiniak ishichik tsawant kanakmin ániawai. Tura nuínkia atak tsanin pujustin ániawai. Túracharmataínkia uunt iwianch, Satanás, tunaanum iniartinian útsukkattawai ksuntratniun tujintiaku.

⁶ Ayu. Tura nuna áarayatan nújainkia “ashí shuar páchitsuk nuatkatniuiti” tátsujai. Nuatkatniuitkiunka péñkeraiti.

⁷ Túramtai “ashí wíjjai métek nuatkachuitkiunkia maak ainti” tajai. Tura Yus ashí shuaran imi métek najanachuiti. Chikichan nuatkatniun súsaiti, tura chikichan yúpichuch ksuntratniun súsaiti.

⁸ Natsancha wajencha juna tájai, “Wíjjai métek nuattsuk pujusrumka péñkeraiti.”

⁹ Tura ksuntratniun tujinkiarka nuatkarti. Ti ksuntrachmin nekapeakum nuatkatni péñkeraiti.

¹⁰ Nuatnaikiarun antsu tájai, “Nuwá nuatkamuka ni áishrin ikiukchatniuiti” tajai. Núnaka ii Uuntri Kristu akupkaiti aya winia chichampruchuiti.

¹¹ Túramtai ni áishrin ikiukkia níni atak nuatnatsuk pujustí tura tsanin pujustinian wakerakka ataksha ni áishrin waketkiti. Núnisan áishmansha ni nuwen ajapashtiniaiti.

¹² Chíkich shuaran juna tájai wikia, ii Uuntri Kristu juna akupkachuiti. Yus-shuara nuwenka Yus-shuarchaitkiunka tura ni áishrijijai pujustinian wakerakka péñkeraiti; ajapashtiniaiti, tájai.

¹³ Núnisan Yus-shuara aishri Yus-shuarchaitkiunka tura ni nuwejai pujustinian wakerakka péñkeraiti; ikiukchatniuiti.

¹⁴ Nu nuwaka “Yus-shuarchajai tsanin pujakun Yusjai yajauch ajastatjai” tu enentáimprashtiniaiti. Antsu nii Yus-shuar asantai ni aishri níjjai pujá asa péñker ajasminiaiti Yusjai. Núnisan núwaka Yus-shuarchaitiat ni aishri Yus-shuarchaitkiunkia níjjai tsanin pujá asa péñker ajasminiaiti Yusjai. Núnisan ni uchirísha péñker ajasmin ániawai Yusjai. Núnischaitkiunkia ni uchirí Yus-shuarcha uchirja áintsar ainti.

¹⁵ Tura áishmaṅsha nuwasha Yus-shuarcha ana nu kanaktinian wakerakka túrati. Yus-shuar nujai ankantaiti. Núnisaṅ asati. Tuke máaniaktinian Yus nakitramaji.

¹⁶ ¿Núwaka ni aishri Yus-shuar ajastatna nuna nekas nékawak? Yus-shuarcha nuka wétinia wakerakka weti.

¹⁷ Wátsek. Shuarka Yus-shuar ajaska Yus nin najanama áintsan tuke átiniaiti. Pujumia áintsan pujusminiaiti. Núnaka ashí Yus-shuarnum akupeajai.

¹⁸ Iis, Yus-shuar ajasuka Israer-shuaraikunṅka tuke Israer-shuar atí. Tura Israer-shuarchaitkunṅka Israer-shuar ajastin enentáimprashstiniiaiti.

¹⁹ Israer-shuaraikiumsha tura Israer-shuarchaitkiumsha nuka enentáimtuschatniuiiti. Aya Yus tana nu umirkatin nekas enentáimustiniiaiti.

²⁰ Yus-shuar ajasuka nuik pujumia áintsan pujusminiaiti.

²¹ Chíkich shuara takarniuriṅ asam ti iturchat pujakmesha iturchat enentáimpráip. Tura ankant jínkimniaitkiumka jínkitiá.

²² Ankantaitkiumka ankantaitkiumsha ju enentáimpraté. Takarniuka Yus-shuar ajas tuke chíkich shuara takarniurṅkiusha shiir enentáimpratiuiiti Kristu nin tunaanumiá ankant awajsamtai. Tura shuar takarniuchua nu, Yus-shuar ajas Kristu takariṅ ajasuiti.

²³ Ti wáitsamiayi Kristu in ankant awajtamsatniun. Ni numpejaiṅ sumakma asarum shuar emetamu áirap.

²⁴ Tuma asamtai shuar Yus-shuar ajas nuik pujumia áintsan yamaisha pujústi tura Yusan enentáimtus wekasati.

²⁵ Nuwá natsa túratniua nuna yamaikia áujmatjai. Kristu juna akupkachmai tura Kristu anekratmariṅ ti nekapsa asamtai wi tájana nu antukminiaiti.

²⁶ Tuma asamtai juna tájai. Ti iturchatnum pujá asakrin shuar aya júnisaṅ nuattsuk pujustin péñkeraiti.

²⁷ Nuatkaitkiumka núwem ikiikip. Nátsaitkiumka nuwá eakaip.

²⁸ Tura nuatkumka tunáa túratsme. Nuwasha iniurtukka niisha tunáa túrachuiti. Túrasha nuatnaikiaru iturchatan ti wáinkiertatui ju nuṅkanam. Nú iturchatnumiá wi uwentikraintjai.

²⁹ Yatsuru, juna tájarme. Ishichik tsawant taasai. Juyanka nuatkaru ainia nuka aya ni nuariṅ enentáimprashstiniiaiti antsu Yúsna enentáimustiniiaiti.

³⁰ Núnisaṅ tuke Yúsna enentáimsar úutainia nusha utcha áintsar pujustin áiniawai. Warainia nusha warascharua áintsar pujustin áiniawai. Súmainia nusha sumakcharua áintsar pujustin áiniawai. Ju nuṅkanmayajainṅkia itit awajmamsashstiniiaiti.

³¹ Núnisaṅ aya ju nuṅkanam péñker pujustin ti takaschatniuiiti. Ashí ju nuṅkanmayanṅka amuukatniuiiti.

³² Ju nuṅkanmayajain itit ajaschak tusan wakerajrume. Nátsaka Yúsna enentáimtawai ni wakera nuna umiktinian.

³³ Túrasha nuatkaka ju nuṅkanmaṅ enentáimtawai ni nuariṅ shiir enentáimtiksa.

³⁴ Núnisaṅ nuwá nátsasha nuatkamusha niisháa enentáimiainiawai. Nuwá natsa Yúsna enentáimtawai ni ayashisha ni wakanisha tuke Yúsjai shiir atí tusa. Tura nuátkamuka ju nuṅkanmayan enentáimtawai ni áishriṅ shiir enentáimtiksa.

³⁵ Atumin yáintajtsan juna tájarme. Iturchat awajsatnsan wakeratsjai antsu shiir wekaakrum itit awajtsuk Yus shiir enentáimustarum tusan wakerajai.

³⁶ Tura shuar ni nawantriṅ natsan nuatnaikiati tákunṅka péñkeraiti. Nawantriṅ natsa tuke apujsatniun nakitiakka surukminiaiti. Nusha tunaachuiti.

³⁷ Tura chíkichka tuke natsan apujsatat tákunṅka nekas péñkeraiti. Apujsatin iturchatchaitkuiṅkia tura ni nawantriṅ nuatnakchatniuitkuiṅkia apujsatniuiiti. Apujsanṅka nekas péñker túraiti.

³⁸ Tuma asamtai nuatmamtikianṅka péñker túrayi tura apujsanṅka nu nankaamas péñker túrayi.

³⁹ Nuwá aishriṅ iwiaaku pujakuṅkia tuke niijjaiṅ tsaniṅ pujustiniiaiti. Tura ni aishriṅ jakamtai ankant ajas ni wakera nujai Yus-shuarn iis nuatnaikiamniaiti,

⁴⁰ tura tuke nuatnatskesha nu nankaamas nekas shiir pujustatui. Tú enentáimjai wikia tura Yusa Wakanisha métek tátsuash.

8

Yurumkasha namaṅsha ántar-yusnum susamu

¹ Ayu. Yamaikia yurumkasha namaṅsha ántar-yusnum susamun áujmatsattajai. Jujai túratniua nuka mash nékaji. Tura shuar “ti nékaitjai” enentáimkiunṅka nuajainṅka “neka asan nankaamantuitjai” tu enentáimui. Antsu shuar chíkich shuarn aneakka nin péñker atí tusa yayawai.

² Shuar “ti nékaitjai” tákuṅka nekas nekaatniua núnaka unuimiarchaiti.

³ Tura Yúsán aneana núnaka Yus péṅker nékawai.

⁴ Wátsek. Ántar-yus susamu yúatin junis enentáimpratiuiti. Yuska aya chikichkiiti. Tura chíkich Yus atsakui,

⁵ aentsu yusrí nayaimpinmasha nunḱasha írunna nuka peṅké ántar áiniawai. Kame aentsu yúsrísha tura úuntrísha tí írunui.

⁶ Tura iikia nékaji, aya chikichik Yus awai, nusha ii Aparínti. Ashí írunna nuna najanaiti tura ni wakera nuna umíkiat tusa najatmamji in. Ii Úuntrísha chikichkiiti, Jesukrístu. Níjjajínkia ashí najanamuiti. Tura iisha ni kakarmaríjjai iwiaaku pujaji.

⁷ Tuma asamtai ántar-yus susamu yuamniaiti tura Yus-shuar awai juna nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka ititurchat enentáimprar “enentáiruí yajauch ajasjai” tiartatui.

⁸ Wátsek, yuamujai Yus in shiir enentáimtikrampratiuni jeatsui. Yuarkia nujai péṅker áhattaji tura yúachríka yajauch áhattaji.

⁹ Anḱantaitme yúatin wakerakmeke. Tura anearta. Ame yúakmin chíkich shuar ititurchat enentáimna nusha ámin wáitmak yúañka ni enentáin tunáa ajastatui.

¹⁰ Ístá. Ámeke neka asam ántar-yusa jeen wayam tura nuí yúakminkia ame yatsum nuí wáitmakchanpiash. Tura níisha ititurchat enentáimiat ántar-yus susamun yúashtimpiash.

¹¹ Nújjajínkia ame nékamujai ame yatsum Kristu jaka uwentikramia nu yajauch ajastatui.

¹² Túramtai ame yatsum ititurchat enentáimna nu yajauch awajeakum Kristunmasha tunáa túraitme.

¹³ Nu asamtai winia yatsurun wi yúajna nujai yajauch awajeaknaka namañnaka peṅké yashtatjai ní tunáa ajasajín tusan.

9

Kristu akatramu túramnia nu

¹ Ashí Kristu akatramurí túratniua nuna wisha túramniatjai ni akatramurí asan. Iis, wisha ii Uuntrí Jesusan wáinkiaitjai tura wisha Jesukrístu takatrin takaajai. Winia takatrujain átumka Yus-shuar ajasuitrume.

² Chíkich shuar “Kristu akatramurínchuiti” túrutainiakuiasha átumka winia takatrujai Yus-shuar ajasu asakrumin nujai wi nekas Kristu akatramuríntiaj nu paant nekaamniaiti. Tura tu enentáimurtsatniuitrume.

³ Ashí shuar “Kristu akatramurínchuiti” túrutainia nuna juna tájai.

⁴ Wisha Yus-Chichaman etserkataj tusan shuárnum irakun ashí ajampruinia nuna yuamniaitjai tura umarminiaitjai.

⁵ Tura Pítrusha, Jesusa yachísha, tura chíkich akatramusha irainiak ni nuwen Yus-shuar ainia nuna jukimnia áiniawai. Wisha núnisnak túramniaitjai.

⁶ Chíkich akatramuka kuit susamujai Yus-Chichaman etserainiawai. Wisha Pirnapísha núnisrik túramniaitjai. Kame ¿aya íchikik takastiniaitjai?

⁷ Suntarka ¿ní kuítríjjaiimpiash takaa? ¿Tsanimpian aráa nu nuna nerén yúatsuk. Wáakan wainua nusha muntsurín úmatsuk? Núnisañ Yus-Chichaman étsera nusha nú takasmanu-miá yurumámniaiti.

⁸ Aya aents enentáimnian chichaatsjai. Muisais akupkamunmasha métek tawai.

⁹ Muisais akupkamunam áarmaiti:

“Turu takaak jínkiaia saepen pakartaj tusa nájakui ni nují jínkiatáshtiniaiti. Antsu ní wakerak yuati.” Tu áarmaiti.

Tura Yus aya túrunak enentáimprachmiayi jujai.

¹⁰ Antsu in jujai nekaawarat tusa tímiayi. Jínkiain araana nusha tura júukmatai saepen pakaana nusha nuna jínkiain mai yurumáin áiniawai. Paant atí tusa Yus nuna áarmiayi.

¹¹ Tuma asamtai Yus-Chicham atumíin etserkakrin nuyá átum takakrumna nujai in ajamsatniuitrume. ¿Nusha ititurchatkai?

¹² Chíkich akatramu atumíin irutainiak ajamsamun yuamniaitkuínkia iikia nekas túramniaitjai ii etserkamujai Yus-shuar ajasakrumin.

Tura wikia antsu túrachuitjai. Atsumaknasha ashí ititurchat ana nuna katsuntramjai Kristu shiir chichamen étserkui shuar ititurchat enentáimturarain tusan.

¹³ Ashí shuar ni yúsríniun tuke pujurin ainia nu, ni yusrí jeen írunna nuyán yurumáiniawai. Tura yus-sutai namañken maawar nuyá yurumáiniawai.

¹⁴ Núnisañ Yus-Chichaman etserniua nuka Yúsñan takasu asamtai péṅker ajamsatniuiti. Nuna Kristu akupkamiayi.

¹⁵ Tura wisha ajamsamun yuamniaitiatan tuke winia kuítrujai yurumámjai. Tura ya-maisha surúsúk tusan áattsujrume. Antsu nuna túrutsuk jakañka maak aínitjai.

¹⁶ Uwempratin chichaman wi étserkun aya nújain “ti penkeraitjai” enentáimtumatsjai. Kame Yus nuna túratniun surusuncha itiuurkatjak. Nuna túrachkunka ti itiuurchat pujasaintjai.

¹⁷ Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai.

¹⁸ Tura jujaj antsu nekas warasminiaitjai: Wi túramnian iniaisan chikichnan takatsuk aya winia kuítrujain uwempratin chichaman étsersjai. Nujaj waraakun akikma áintsan ketete.

¹⁹ Chíkich shuara takarniuchuitiatan ashí shuara takarniurija áintsan ketjai Kristu shuarj untsurj ajasarat tusan.

²⁰ Israer-shuarjaj pujakun niisha Yus-shuar ajasarti tusan Israer-shuara áintsan ajai. Kame Muisaisa akupkamurj umirkatin áiniakui wisha aun umirkashtiniaiatnak umirniuitjai.

²¹ Tura Israer-shuarchasha Yus-shuar ajasarti tusan, nu shuar Muisaisa akupkamurj umirkashtin áiniakui, wisha nuna umirkashtinia áintsan ajai. Tura Kristu akupeana nuna umirkatin asan nekas Yus akupkamun umirniuitjai.

²² Yusjaj katsuarchasha ti penker Yus-shuar ajasarti tusan wisha katsuarcha áintsan ajai. Chíkich chíkich shuarjaj métek ajajai ishichkisha Yus-shuar ajasarti tusan.

²³ Ashí wi túraj núnaka uwempratin chicham tuke shiir atí tusan túrajai. Tura nu chichamjaj wisha atsuntsuk shiir wekaajai.

²⁴ Shuar nekapnaisatniusha untsurj tsékeñtin átsuk tura aya chikichik awakmaksuk. Niñki, awakmakun súsatniua nú shiirmachin achiktatui. Núnisrum kakarum ajasrum awakmak shiirmachin achiktinia áintsarum Yusna takastarum.

²⁵ Shuar nakurak nekapnaisatin ainia nuka nupetmaktaj tákunka ashí itit awajea nuna ikiuniawai. Iisha núnisrik nu enentáijijaj Yusna nu takastiniaitjai. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in amatatjinsia nú tawasap tuke amuukashtatui.

²⁶ Wikia aya náñkamsan tsékeatsjai. Nasejaj maania áintsan máaniatsjai.

²⁷ Antsu winia ayashrun awatinia áitkiasnak umimtikiajai. Túrachkunka chikichan ununiariatan winiasha awakmakun súsatniua nú shiirmachin Yus surustinian nakitruirainti.

10

Ántar-Yus tikishmatrashtiniati

¹ Enentáimpratarum, yatsuru. Yus yaunchu ii úuntrjñ ashí métek yáinmiayi. Nusháa yurañmijaj jintian nekapruamiayi. Tura ashí ii untrjñ nu yurañmin apapekar wearmiayi. Ashí núnisar Kapaaku Nayaantsan Yus akankamunam wekasar katitkiarmiayi.

² Tura Muisaisan umirkar yurañminiam tura nayaantsanam ashí imiaimiu áintsan ajasarmiayi.

³ Núnisar ashí mash Yusnumjaj yurumkan yuawarmiayi.

⁴ Entsanacha ashí mash Yus susamunak umararmiayi. Kame Yus kayanmayaj entsan akupkamtai ashí umararmiayi. Kristusha, nú kaya áintsan, niijaj tuke weakui ni wakanj atsumamurjñ Kristunmayaj takusarmiayi.

⁵ Tuma ajñ Yus ti yáinmaitiat ni wakeramun umikcharmiayi. Tura ásar ni nuñkeñ jeatsuk atsamu nuñkanam ti untsurj jákarmiayi.

⁶ Iisha nujaj unuimiartiniaitjai. Iikia ni wakeriarmia áintsar^d yajauchia nu wakerukchatniuitjai.

⁷ Nu asamtai ántar-yus ni túrawarmia áintsarum tikishmatrairap. Iis, jiru yusrj shiir awajenakui Yus-Papinium áarmaiti,

“Nu shuar yurumáwar nampekar námper ti najanawarmiayi.” Tu áarmaiti.

⁸ Nii túrawarmia núnisrik iikia tsanirmashtiniaitjai. Nuna túrawar paintitres mir (23.000) chikichik tsawantaj jákarmiayi.

⁹ Iisha tunáa túrar “Yus asutiuáshtatui” tu enentáimprashhtiniaitjai. Niisha nuna túrawar napijaj esaim untsurj jákarmiayi.

¹⁰ Yussha yajauch áujmatsashtiniaiti. Nuna túrawarmatai Yus ni suntarjñ akupak untsurjñ maawarmiayi.

¹¹ Yaunchu ii úuntrijaj túrunamu in amúamu tsawantnum pujajnia nuna jintintramat tusa áarmaiti.

¹² Tuma asamtai shuar “Tunaanum iniaarchattajai” tákunka anearti. Anearchamka iniaarminiaitme.

¹³ Tura ame itiuurchatrumka aya amek nekapeatsme. Chíkich shuarsha nu itiuurchatjai métek nekapsatin áiniawai. Jusha ti enentáimpramniaiti. Ame katsuntratin tujintiamna

nuna nan̄kaamas itiuurchatan Yuska p̄nker asa tsan̄katramatsui. Antsu itiuurchat taru-trammatai, nu itiuurchatnum pujamin Yuska uwempratniun jintinramattawai. Nūjain̄kia katsuntrattame.

¹⁴ Nu asamtai aneamu yatsuru pen̄ke ishichkisha ántar-yus enentáimtusairap.

¹⁵ Atumsha nékatsrumek. Wi tájana nu nekaschakait.

¹⁶ Kristu jakamu enentáimtustin námper najanar Yus áujeaji Kristu numpen nakumea nu shiir atí tusar. Tura métek umarar nujai Kristu numpé métek enentáimtaji taji. Tura apatkusha púurar¹ tura métek yuar¹ nujai Kristu ayashí in jarutramkamu métek enentáimtaji taji.

¹⁷ Apatkusha chikichkiitiat púuram untsurí ajatsuk. Iisha núnisrik untsuríitiatar nu apatuk métek yuar¹ métek enentáimprar chikichik ayashtinia áintsar aji.

¹⁸ Israer-shuartisha enentáimpratai. Yus-sutai naman̄ken yuinia nu, métek yuawar Yusan métek enentáimtuinatsuk.

¹⁹⁻²⁰ Núnisañ Yus-shuarcha ántar-yus sutai naman̄ken suiniak nekas-Yusan suiniatsui antsu yajauch wakain suiniawai. Kame ántar-yus ániak pen̄ké ántar ániawai, iwiakuchu ániawai. Nu naman̄sha sutai naman̄ketiat p̄nker naman̄kete, yajauchichuiti. Aya junak tajai. Yus-shuarcha ántar-yus sutai naman̄ken suiniakui amesha niijai métek yuamka yajauch wakanniasha niijai métek enentáimtaji tame. Nu antsu yajauchiiti.

²¹ Kristu numpen nakumea nu úmakrum íwianch susamua nuka umarchatniuitrume. Kristu ayashin nakumea nu yúakrumka íwianch susamua nuka yúashtiniaitume.

²² ¿Warí, Yus akajkatin wakeramek. Iisha nin nupetkamniashitaij?

Aya aneakur takastinaitji

²³ “Ashí túramniatjai” tiniu ániawai. Ayu, tura mash yáintkiashtatui p̄nker wekasatniun. Nekas ashí túramniatjai tura mash yáintkiashtatui wakaniur kakaram ajastin.

²⁴ Nú arantcha chíkich yáintincha enentáimpratniuitji. Aya íniuk pachischatniuitji.

²⁵ Naman̄ súmakum inintrutsuk sumakta. Tura ántar-yusan susamusha yajauchichuashit enentáimtsuk páchitsuk yuata.

²⁶ Ashí ju nuñkasha tura ashí írunna nusha Yúsnachuk ainia. Tuma asamtai p̄nker ániawai.

²⁷ Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme.

²⁸ Tura chíkich chichaak “Juika ántar-yus susamu naman̄kete” túramkuin̄kia nuikia yuawaip. Yúakminkia nu shuar itiuurchat enentáimprattawai.

²⁹ Ame páchitsuk yuamniaitkiumnisha nii antsu yúachmin asa itiuurchat enentáimprattawai.

Tura amesha tichatameash “¿Urukamtia nii tujintiakuí wi yúachminiaitaij.

³⁰ Wi Yúsan yuminsan yúakuisha urukamtia itiuurchat enentáimturainia. Yus yu-minsachmakait?” tichatameash.

³¹ Ayu, yúakmesha úmakmesha ashí túramna nusha ashí shuar Yúsan shiir enentáimtusarti tusam túratá.

³² Tuma asamtai ii túramujai chíkich shuar tunaanum ajuashtinaitji. Israer-shuarsha, Israer-shuarchasha, Yus-shuarsha ashí yáintinaitji.

³³ Wisha ashí shuaran yáintinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintinian tuke pujurjai.

11

¹ Kristu turamia áintsan takaajai wisha. Atumsha núnisrum wi takaajna áintsarum takas-tarum.

Nuwa Yusa j̄en túratin

² Yatsuru, átum winia tuke enentáimturarum wi tímiajrumna nu umirniuitrume. Tuma asakrumin shiir enentáimtajrume.

³ Nu arantcha ujaajrume. Yus Apa Kristun akupea áintsan̄ Kristu ashí áishman̄kan akupeawai. Núnisañ áishman̄sha ni nuwen akupeawai.

⁴⁻⁵ Íjijain̄kia shuar Yus áujenak tura núnisañ Yus-Chichaman étsereinak áishman̄ et-sen̄krukchatniuiti antsu nuwa múuknum nukumaktinaiti. Tuma asamtai áishman̄ nuj etsen̄krakka natsantaiti. Tura nuwa múuknum nukumakchañka natsantaiti. Intiashin tsupimiarua áintsan̄kete.

⁶ Nuwa múuknum nukumaktinian nakitiakka intiashin tsupirtí nuikia. Watsek, nuwa ni intiashin tsupirtinian nakitiakka, tura awampratniun natsamakka múuknum nukumakti nuikia.

⁷ Áishmaṅka Yúsan nakumeawai. Yusna shiir ana nuna nakúmkaṭtsa Yus áishmaṅkan najanamiayi. Tuma asamtai áishmaṅka etsenkruchatniuiti. Antsu nuwaṅka áishmaṅna shiir ana nuna nakúmkaṭtsa Yus najanamiayi.

⁸ Iis, Yus áentsun najaneak nuwaṅmayan áishmaṅkan najanachmiayi antsu áishmaṅka ukunchijjai nuwaṅ najanamiayi.

⁹ Nuwaṅ yáinḱiát tusa áishmaṅkan najanachmiayi antsu áishmaṅkan yáinḱiát tusa nuwaṅ najanamiayi.

¹⁰ Tuma asamtai núwaka múuknum nukumaktiniaiti, nayaimpinmayá aencha ísarti tusa.

¹¹ Ayu, tura áishmaṅ nuwajainchu atsuinti tura nuwaṅsha núnisán áishmaṅjainchu atsuinti. Yus ju nuṅkan núnisán atí tusa najanaiti.

¹² Íis, Yus nuwaṅ áishmaṅnumiá najanamiayi tura áishmaṅsha nuwaṅmayá akiiniaiti. Tura Yus mai najanaiti.

¹³ Enentáimpratarum atumsha. Nuwa múuknum nukumatsuk Yus áujsatin ¿pénkerkait?

¹⁴ Íi shuartinkia áishmaṅ intiash ajakin natsantchakait.

¹⁵ Antsu núwaka intiash ajakin péñkerchakait. Múuknum nukumaktinian susamuiti.

¹⁶ Watsek, shuar tuke umiktinian nakitiakka ju na nekaati, iisha tura ashí Yus-shuartaisha aya tu enentáimji.

Kristu jakamu enentáimtustin nampernum yajauch túramu

¹⁷ Yamái áarattajrumna nujaín shiir enentáimtatsjarme. Atum irunkuram yáiniaiktiniatrum tute péñker wekasatin. Átum antsu iruntrarum yajauch awajnaiyarme.

¹⁸ Wats, Yusa jeen irunkuram atumsháa enentáimprarum kanakurme. Kame tu ujatkar-mai. Nekaschashit.

¹⁹ Tuke tupartatrumek Yúsnan ti nekana nu shuar paant nekanat tusarnea. Antsu kajernaikiar kanaktin péñkerchaiti.

²⁰ Kanakin asarum Kristu jakamu enentáimtustin nampernum atum iruntrarum yúarmena nu nekas Yúsnachuiti.

²¹ Íis, ashí ní yurumken itiaawai aj yurumátsa tura chikichan nákatsuk níá níá wari yu-atssa wakerawai. Chíkichkia ishichik itiaana nu tsukamawai tura chikichcha nampekarai.

²² Yurumkan ishichik itiaana nu iniatsáarchamek. Atum áitkiarum núnisán Yusa jeen yurumáshtiniaiti. Natsantaiti. Warí, chíkich jea átsuk aj yurumátin. ¿Warimpait. Jujai shiirash áujsatjarum? Atsá. Jujai shiir áujsachminiatjarme.

Kristu jakamu enentáimtustin námper

²³ Íi Uuntrj Kristu jintinruama núnaka ujakmajrume. Jútas tuke súratsajín, nu kashi ii Uuntrj Jesus apatkun juki

²⁴ Yusan yumínsamiayi. Nuyá puur tímiayi “Yuatarum. Jusha winia ayashruiti; atumien jarutramkatta núiti. Ju yúakrum Winia enentáimtursatarum” tímiayi.

²⁵ Núnisán yurumá umik pinínshasha achik tímiayi “Ju pinín Yamaram Chichamaiti. Tura winia numpar puármatai Yamaram Chicham nekas uminkiatstawai tawai. Ju tuke úmakrum Winia enentáimtursatarum” tímiayi.

²⁶ Tuma asamtai ju apatak yúakrum tura pinínsha úmakrum ii Uuntrj Kristu jakamurj enentáimtarme. Kristu táatsajín ju tuke túratniuitrume.

Shiir enentáijijai Kristu jakamu enentáimtustin nampernum yuatniuiti

²⁷ Tuma asamtai shuar Yusan enentáimtutsuk ju apatkun yuawar tura ju pinínnumiancha umarar Kristu ayashíncha ní numpencha yajauch enentáimta asa tunáa túraiti.

²⁸ Nu asamtai ashí shuar ju apatkun yútsuk tura ju pinínnumiancha úmutsuk ní enentáin iwiaratniuiti Yusjai.

²⁹ Kristu ayashí jakamu enentáimtutsuk yúakka tura úmakka nuna tura asa asutniáttawai.

³⁰ Atumsha tura asarum jaarme tura pimpiruítrome. Chikichcha jákaru áiniawai.

³¹ Ímia-iik íimiakrinkia Yus in asutiámachaintji.

³² Tura ii enentáin Yus yajauchia nuna wáiniuk asutiámji. Túrachkuṅka ashí Yus-shuarchajai súmamtikramawaintji.

³³ Tuma asamtai, yatsuru, iruntrar yurumátsa matsatkurmeke nákastarum métek yurumátin.

³⁴ Shuar tsukamakka ní jéeniñk' yurumáti. Nújainkia yajauchijjai irunchakrumin Yus asutiámashatrum. Ayu, chíkich áatrururmena núnaka wi aj jean iwiarattajai.

¹ Yusa Wakanj ashí ni shuarjñ súana nuna yamáí ujaktatjarne. Nekaatarum, yatsuru. Yus-shuar shiir takasarti tusa Yusa Wakanj juna súsaiti.

² Yaunchu átum Yus-shuar tuke ajatsuk chíkich shuarjaj métek ántar-yus tikishmatramarme. Niisha ántar-yus ásar áujmatramsachmin ármiai.

³ Tura jújajñ shuar Yusa Wakanj kakarmarjijaj chichaana nu nekaamniaiti. Yusa Wakanjjiainkia shuar “Jesus yajauchiiti” tíchamniaiti. Núnisan aya Yusa Wakanjjiain “Jesus winia Úuntur asa akuptuktiniiaiti” tímíniaiti.

⁴⁻⁵ Yusa takatrj íruntsuk. Tura Yusa Wakanjnk' ashí nuna takastinian súsaiti. Tura shuar Yus-shuara Uuntrj chikichik ajñ ashí Yusa takatrjñ métek takaatsui. Antsu chikichkin ashí nankaamas péñker takaawai. Yusa Wakanjsha nuna shiir takasat tusa súawai. Tura Nii wakera nuna Niñki ni shuarjñ chikichik chikichik niisháa niisháa súawai.

⁶ Yúskete ashí ni shuarjñ niisháa takamtikeana nu. Niñki ashí ni shuarj enentájn takaak takatnasha shiir takamtikeawai.

⁷ Yusak túratin súam Yusa Wakanj kakarmarj paant átatui nu takasmanum. Tura ashí shuar ní takatrjijaj yáiniaiktin ániawai.

⁸ Júnaka Yus takamtikeawai. Nékana nu shuarnasha, unuimiarua nunasha Yúsnan ujaktinian súawai. Tura mai shuaran Yusa Wakanj kakarmarjijaj nuna túratniun súsaiti.

⁹ Chikichnasha Yúsan áujeñak Yúsan ti enentáimtusar nekas ititurchat ana nuna iwiaratniun súawai. Nincha Yusa Wakanj kakarmarjijaj nuna takastinian súsaiti. Chikichnasha jaan tsuártinian súawai.

¹⁰ Chikichnasha aents niñki túrachminian túratniun súawai. Chikichnasha Yúsnan etserkatniun súawai. Chikichnasha shuar wari yajauch wakannia péñker wakanniasha apatka nekatatniun súawai. Chikichnasha niisháa chichaman chichastinian súawai. Chikichnasha niisháa chichasman jintiatniun súawai.

¹¹ Tura ashí shuara enentájn nu Wakanik takaawai. Tura Nii wakera nuna ankant ankant súawai takastinian.

Ashí Yus-shuar Kristu ayashía áintsan ajainiawai

¹² Iikia Kristu ayashía áintsar' ayashímkiatiji. Kristu ayashí muchitmarjsha írunui. Niisha túmaítat chikichik ayashiniiaiti.

¹³ Tura imianiakrin Yusa Wakanj chikichik awajtamsamji, Kristu ayashía áintsan. Israer-shuarsha, Israer-shuarchasha, ti ititurchat takaana nusha, ankant ainia nusha, ashí yamáí chikichik ajasuitiji. Tura Yusa Wakanj pimiutkamuitiji Niijjaj tsaniñkia pujakur.

¹⁴ Ayashí muchitmarj aya chikichkichiiti.

¹⁵ Tuma asantai, winia nawer uwejruchuiti tuke winia ayashrunuiti.

¹⁶ Winia kuishrusha jíruchuitiati tuke winia ayashrunuiti.

¹⁷ Wátsek winia ayashur aya jíkkitkiuin'kia ¿ititurak antukaintiaj? Winia ayashrusha aya kuishkitkiuin'kia ¿warjijajñ nekapsaintiaj?

¹⁸ Nu asantai Yus winia ayashru muchitmarj ni wakeramunam ikisuiti.

¹⁹ Chikichik muchitmajajñ ¿ayash áminkiait?

²⁰ Antsu untsurj muchitma akuisha chikichik ayashkiiti. Iisha núnisrik chíkich chíkich iisháa takayatrik métek takasar Yus wakeramu takamtsuk umíaji.

²¹ Winia jírur péñker ajñ winia uwejruncha wakerishtatjak. Winia muukarsha péñker ajñ winia nawernasha wakerishtatjak. Núnisan Yus-shuar shiir enentáimtumak ni yachin “atsumatsjame” tíchamniaiti.

²² Antsu ii muchitmarj ishichik enentáimtajnia nu atsakuin'kia ti atsumawaintiji.

²³⁻²⁴ Chíkich muchitmasha, ímiancha nu, shiir iwíarmamtaji. Tura nu muchitmaka shiir ísminia nujaj nankaamas péñker wainji. Iis, shiircha nu antsu péñker wainji. Yus ii ayashjñ núnisan atí tusa najanamíaji.

²⁵ Nujajñkia ayashí muchitmarj máanaitsuk métek yáiniainiawai.

²⁶ Chikichik muchitmaram najaimiakum ashí ayashniun wáitiatismek. Núnisan chikichik muchitmaram ayap ajakum ashí ayashniun shiir átsunek.

²⁷ Núniskete Kristu ayashjijaj ayashímkiat' nu. Tura chíkich chíkich ni muchitmarj aji.

²⁸ Ayashniun muchitma írunna áintsan Yus ni shuarjñ untsurj takatan súsaiti. Emka Yus akatramu, nuyá ni chichamen etserin, nuyá jintinkartin, nuyá aents túrachminian túrin, nuyá tsuákratin, nuyá yáin'kratin, nuyá akupin, nuyá niisháa chichamjaj chicharin, mash írunui.

²⁹ ¿Ashí Yus akatramuk ainia. Ashí Yus-Chichaman etserniuk ainia. Ashí jintinkratniuk ainia. Aents túrachminian ashí túriniak ainia.

³⁰ Ashí tsuákratniuk ainia. Ashí niisháa chichamjaj chichamtiniak ainia. Ashí niisháa chichamjaj chichasman jintin'kratniuk ainia? Atsá. Túmachuiti.

³¹ Túmaitkuĩnkia péńkera nu takastin wakeruktarum. Tura imiá péńkera nuna juĩ jintintiatjarme.

13

Aneatin

¹ Ju nuńkanmaya aentsu chichamen untsurĩ chichayatnak tura nayaimpinmaya aentsu chichamencha chichayatnak aneńkratchaknaka tampur meserua áintsanak aya ten-ten ajajai. Penké áńtranak chichaajai.

² Yus-Chichamnasha ti shiir étsersiatnak, túrasha ashí uuķmancha tura ashí nekaamniancha nékayatnak, túrasha Yúsán ti enentáimtusán murá umuchiayatnak, aneńkratchaknaka penké áńraitjai.

³ Ashí wi takakjana nuna atsumainian súayatnak tura Yus shiir awajsattsán winia ayashrúncha áesawarti tusán surumayatnak tura aneńkratchaknaka áńtranak túraitjai.

⁴ Aneńkartaka wari kajeatsui, tsánkaiti, chíkich shuaran shiir awajnuiti, péjchach asa waantu enentáimtumatsui.

⁵ Aneńkartaka natsanta nuna túrichuiti, núiniunak enentáimchaiti, kajechuiti, páchichuiti.

⁶ Chíkicha tunaarĩn wararchaiti antsu péńker shuaran wararniuiti.

⁷ Aneńkartaka aya katsunteawai. Tsanú chichamnasha nakitiawai antsu aya péńker ana nuna nákwai. Tuná shuar shiir ajastí tusa tuke nákwai.

⁸ Aneńkrattainkia tuke amuukashtiniaiti. Antsu ju nuńka amuukmataisha Yus-Chicham etserkatĩn atsuttawai, tura niisháa chichamjai unuimiatsuk chichastincha amuukattawai, tura ashí nekanamtaĩ unuimartĩncha atsuttawai.

⁹ Kame yamaikia aya ishichik nékaji. Yus-Chichamnasha amutsuk étsereaji.

¹⁰ Túra ukunam mash nekanamtaĩ yámankamtaik nekaamuka ántar átatui.

¹¹ Yaunchu wi uchich asan uchichia áintsán enentáimkiun chichasmajai. Antsu yamaikia uunt ajasan uchiniun iniaisaitjai.

¹² Núnisrik yamá ju nuńkanam Yus paant wáintsuji. Íspik kusurunam ímsatniua áintsankete. Antsu ukunam mai métek paant wainniaikiattaji. Yamaikia aya ishichik nékaji. Nuĩ antsu Yus winia nékara áintsanak nekaattajai.

¹³ Watsek, menaintiu amuukashĩn áiniawai. Ju áiniawai: Yus shiir enentáimtustĩn, shiir ana nu nákastĩn, tura aneńkrattai. Ju menaintiunmasha aneńkrattainkia ashí nanķaamakuiiti.

14

Niisháa chicham unuimiatsuk chichastin

¹ Nu asamtaĩ, aneńkratin atarum. Tura núnisrumek Yúsánan péńkera nu takastin wakeruktarum. Imiankaska Yus-Chicham etserkatĩn péńkeraiti.

² Nújainkia niisháa chichamjai unuimiatsuk chichastin péńkerchaiti. Iis, nu shuar chíkich shuarjai chichatsuk aya Yusjai chichaawai. Ni chichame penké antukchamniaiti. Yusa Wakanĩ nin chichastinian súawai túrasha tana nu nekaachminiati.

³ Antsu Yus-Chichaman étserea nuka shuaran yayawai. Shuaran ikiatsuártasa, tura ikiakártasa, túrasha atsankrattsa yayawai.

⁴ Niisháa chichamjai unuimiatsuk chichaana nuka aya nińki katsuartĩnian yáinmamui. Antsu Yus-Chichaman étserea nuka ashí Yus-shuaran ikiatsuáwai.

⁵ Atumsha ashí mash niisháa chichamjai chichastinian wakerajrume. Túrasha nuna nanķaamas Yus-Chicham etserkatniun wakerajrume. Aya chichastinjainkia ju imiá péńkerchakait. Kame chichasma jintiákmeka maak. Nujai Yus-shuar tsakarartatui.

⁶ Enentaimpratarum, yatsuru. Nuĩ irakun aya niisháa chichamjai chichaaknaka ĵitiura yáintatjarum? Antsu Yus winia jintĩntruamuncha tura wi nékajna nunasha étserkunka yáintatjarme. Yus-Chichamnasha tura ashí Yúsáncha jintĩnkũncha yáintatjarme.

⁷ Peemsha tura tumańsha wi tájana áintsán áiniawai. Péńker tuntuĩyamuka paant nekaamniaiti. Tura péńker tuntuĩyachkuĩnkia, nu tuntuĩyamu nekaachminiati.

⁸ Suntarsha mesetnum wéenakuĩ ni kapitiántrĩ ni wakeramun ujektĩnian kachun umpuawai. Paant umpuakuĩnkia suntarsha ni wakeramun nekaawartatui. Tura paant umpuachkuĩnkia suntarsha ĵitiurak mesetnum wétĩnian iwiarat?

⁹ Atumjajisha núnskete. Nekaachmin chichamjai chichaakminkia ĵtámena nuna itiu nekaawartata? Nase chichartsumeash.

¹⁰ Ju nuńkanmaya chichamka ti untsurĩ írunui. Nu chichaman nékakka ashí antukmin áiniawai.

¹¹ Tura chíkich shuara chichamen ántachkunka níjijainkia yajaya apachia áintsanak ajajai. Niisha wíjijainkia yajaya apachia áintsankete.

¹² Tuma asamtai, Yusa takatři ti wakera asarum ashí Yus-shuaran ikjarartatna nú takat nekas wakerukturum.

¹³ Nu asamtai niisháa chichamjaj chichaitkiumka chichasumna nu jintiartin Yus seata.

¹⁴ Niisháa chichamjaj Yusan áujeaknaka nekas winia wakantrujaj áujeajai tura áujajna nuna nekatsjai.

¹⁵ Antsu wikia júnisan enentáimjai. Yúsan áujeakun winia wakantrujajsha áujstajai tura enentáimtsuk áujstajaj. Kantamkuncha kantamaj nuna enentáimkiun winia wakantrujajsha kantamattajai.

¹⁶ Amesha shuar iruntramunam aya wakanmijaj niisháa chichamjaj Yus shiir yuminsakmincha nekaachmin asamtai nekachuka ámijaj métek áujstaniun jeatsui.

¹⁷ Ti shiir Yus yuminsam áujeatsmeash tura chikichka Yusjaj ikiakáatsme.

¹⁸ Ashí átum nusháa chichamjaj chicharmena nuna nankaamas wikia chichajaj. Nuna Yusan yuminsajai.

¹⁹ Túmaitiatnak untsurj chichamjaj chichasan ántumtkiashtinjainkia nankaamas Yus-shuar iruntramunmanka aya senku chichamchijajin tiintjai, paant jintintiawartaj tusan.

²⁰ Yatsuru, uchía áintsarum enentáimprairap. Kuirchia áintsarum tunáa túrashtin enentáimpratarum tura chikich irunna nujaj uunt enentáimpratniua áintsarum enentáimpratarum.

²¹ Yus-Papiniun áarmaiti:

“Yajaya shuaran akupkan niisháa chichamjaj chichastajai. Tura nújajsha anturtukchar-tatui” tawai Yus.” Tu áarmaiti.

²² Nújajnkia páantaiti, nusháa chichamjaj chichastinkia Yus-shuaran ashantikiar enentáimtkratniun Yus súsaiti. Yus-shuaran tu enentáimtkratniun súsachuiti. Antsu Yus-Chichaman etserkatniunka Yus-shuaran enentáimtktsuk Yus-shuaran yáintinian súsaiti.

²³ Tuma ajn, nekachusha tura Yus-shuarchasha Yus-shuar iruntramunam wayanķa tura ashí niisháa chichamjaj chichainianak wáinķianķa “mash waurka ajasarai” enentáimturmarchartatui.

²⁴ Tura Yus-Chicham etserkurminķia nekachusha tura Yus-shuarchasha nuj wayanķa ashí tárumna nujaj ni tunaarjn íimias enentáimturtatui.

²⁵ Nújajnkia ni enentáin úumak ana nuna paant wáiniak tikishmatar Yusan shiir awajsat-tawai. Tura “nekas Yus atumjaj pujawai” titiatui.

Ashí tuke shiir takastarum

²⁶ Ayu, júnisai, yatsuru. Átum irunkurmin shuar takastinian Yus nin susamu túratí. Kantamátniuncha, jintintiatniuncha, Yus iwiainiakman ujaktinniasha, nusháa chichamjaj chichastinniasha, nusháa chichasman jintiatniuncha, ashí Yus-shuar Yusjaj tsakararti tusar juna mash takasarti.

²⁷ Nusháa chichamjaj chichainiakka chikichik chikichik chichasarti. Tura jimiarchik menaintiuchiksha chichasarti. Tura ni timianka jintiartiniaiti.

²⁸ Jintiartin atsakuinķia nusháa chichamjaj iruntramunam chichaschatniuiti. Antsu ninķi Yusjaj chichasti.

²⁹ Núnisan jimiarchiksha menaintiuchiksha Yus-Chichaman etserkarti. Tura chikich shuar nuj iruntrar ni etserkamun enentáimprarti péņkerashit tusar.

³⁰ Tura chikichik chichaakuí Yus chikichan nuí pujana nuna yamaram chichaman súakuinķia emka chichaa nu iniáísatí.

³¹ Núnisrum Yus-Chicham etserkatniun wakerarmena nu chikichik chikichik chichasrum ashí jeattarme. Nújajsha Yus-shuar unuimiarar kakarartatui.

³² Yúsnan etserainia nuka tuke enentáimprap chichastin áiniawai. Enentáimtsuk nánkansan chichasmin áiniatsui.

³³ Yuska pachimtak chichaman nakitiak shiir chichasmanak wakerawai.

Chikich nunķanmasha ashí Yus-shuar iruntramunam túrainia áintsarum túratniuitrume atumsha.

³⁴ Yus-shuar iruntramunam nuwā chichastin surimkiamuiti. Yus akupea núnisan núwaka chichatsuk umin átin áiniawai.

³⁵ Inintrustinianian wakerakka ni jeen waketkin ni aishřin nuj aniasti. Ashí iruntramunam nuwā chichastin natsantaiti.

³⁶ Jusha enentáimpratarum. Yus-Chicham atumjaj nanķamnachmai. Núnisan aya atumjainj Yus-Chicham jeartamchaiti. Chikich nunķanmasha Yus-shuarti túrutai enentáimpratniuitrume atumsha.

³⁷ Atumjain shuar “Yus-Chichaman tuke etserniuitjai” enentáimtumatsuash. Tura chikich shuarsha “Yusa Wakanj tuke winia akuptaiti” enentáimtumatsuash. Nu shuarka wi áatjarmena nuna enentáimprap “nekas Yúsnan tniuiti” tiarti.

³⁸ Tu táchakuĩnkia niisha ánrar áiniawai.

³⁹ Nu asamtai, yatsuru, Yus-Chicham etserkatin wakeruktarum. Nusháa chichamjaj unuimiatsuk chichastincha surimkiairap.

⁴⁰ Túmaitiat antukchamin awajtsuk ashí shiir túratarum.

15

Kristu nantakmia

¹ Ataksha, yatsuru, uwempratin chichaman wi etserkamaj nuna atumin enentáimtikratsan wakerajrume. Nu chichamsha atumsha enentáimturarum tariarurme.

² Nu chichamsha átum ántar enentáimtachkurmeka uwempraitrume. Wi ujakmajrum nu tuke enentáimtaikurmeka nekas uwempraitrume.

³ Winia ujatkamunak ujakmajrume. Nu chichamsha ashí nankaamas úntaiti. Júiti nu chicham: Ii tunaarĩn asakártasa Kristu jarutrakmaji, Yus-Papinium tana núnisañ.

⁴ Tura jakamtai iwiarsarmiayi. Nuyá menaintiú tsawant tsawarmanum Yus Nin iniantkimiayi, Yus-Papinium tana núnisañ.

⁵ Nantakisha Pítrun wantintiukmiayi, nuyá ni akatramurĩn wantintiukmiayi.

⁶ Nuyanka kiniantusa (500) nankaamas Yus-shuaran wantintiukmiayi. Nú shuarnu-miasha ishichik jákaru áiniawai tura untsurĩ tuke pujuiniawai.

⁷ Nuyasha Sántiakun tura nuyá ashí ni akatramurĩn wantintiukmiayi.

⁸ Ashí amúamunmasha winiasha wantintiurkamiayi, wi yajauch wekaa añ.

⁹ Wisha Yus-shuaran ti yajauch awajsa asan chíkich Yus-akatramujaj ímianchaitjai. Nekas winia péñkerujaj ni akatramurĩntjai tichamnaitjai.

¹⁰ Antsu Yus ti shiir anentak winia enentáiruĩ pujurtus péñker najataiti. Nu asamtai winia kakarmarjaj takaschaitjai, antsu Yus, aneñkartin asa, winia enentáiruĩ takaaku ashí ni akatramurĩn nankaamas takasuitjai.

¹¹ Tura wi takaakuisha tura ni takainiakuisha mai péñkerkete. Nu chichamka mash étsereaji tura nu chichamsha átum enentáimtusmarme.

Jákaru nantakiartatui

¹² Iisha “Kristu jakamunmayá nantakniuiti” tu étsereaji. ¿Itiur nuikia shuar jakamun-mayá nantakchatniuiti tuinia?

¹³ Jakamunmayá nantakchatniuitkiuĩnkia nuikia Krístusha nantakchaiti.

¹⁴ Tura Kristu nantakchaitkiuĩnkia ii uajnia nu penké ánrtraiti, atumsha Kristu enentáimtarmenta nusha ánrtraiti.

¹⁵ Núnisaitkiuĩnkia iisha “Yus Krístun iniantkimiayi” tákur waitruamji. Iis, nekas jakamun-mayá nantakchamnaitkiuĩnkia nuikia nekas Yus Krístun iniantkichiuiti.

¹⁶ Jaka nantakchatniuitkiuĩnkia imia Krístusha iniantkichmaiti.

¹⁷ Tura Kristu iniantkichmaitkiuĩnkia átum Kristu enentáimtamusha penké ánrtraiti. Tunaarmisha asakárchamu áiniawai.

¹⁸ Núnisaitkiuĩnkia Yus-shuar jákaru ainia nu tuke menkakarú áiniawai.

¹⁹ Iikia Kristu enentáimtusar tuke Niijjaj shiir pujustin nákaji. Tura aya jú nuñkanam pujustiniaitkiurkia Kristu ántar enentáimtakrin ashí nankaamas waitnentrampratniuitji.

²⁰ Antsu imiankas Kristu jakamunmayá nantakniuiti. Ashí ukunam jakammayá tuke jákashtinian nantakiartatna nuna Nii émtukuiti.

²¹⁻²² Yaunchu Atañ tunáa túramtai ashí shuar jákatin áiniawai. Núnisañ yamaikia Krístujajñ tuke atakka jákashtinian nantakiartiniaiti. Iis, chikichik áishmanjajñ jákatin nankamnamiayi. Nuka Atañkauyayi. Núnisañ chikichik áishmanjajñ nantaktin nankamnamiayi. Nuka Krístuiti.

²³ Yus wakerana nuĩ Yusna nu mash nantakiartatui: Kristu emka-juukma áintsañ émtukim nantakniuiti tura atak jú nuñkanam tara ashí ni shuarĩn juuktinia áintsañ iniantkittiawai.

²⁴ Nuñkia mash amuukattawai. Nuj Kristu ashí kapitániasha, ashí akupniuncha, ashí núnisañ jú nuñkanam írúnna nunasha nupetak emesrattawai. Krístusha ashí mash ni Aparĩn susattawai. Tura Yus Apa ashí akupin átatui nuikia.

²⁵ Iis, júñisañ átatui. Emka Yus Apa ashí ni nemasrĩn nupetak Krístun susattawai akupin atí tusa.

²⁶ Tura ni nemasrĩn nupetak ashí amúamunam jákatniuncha nupetkattawai.

²⁷ Yus Apa ashí Krístun súsaiti ashí akupin atí tusa. Yus-Papinium tu áarmaiti. Tura “ashí Krístun súsaiti” táyat Yus Apancha susamuiti tátsui. Antsu Yus Apa ashí Nin susa asa Niñki súsachmaiti.

²⁸ Tura Yus Apa ashí mash ni Uchirín Krístun nekas susamtaí Krístu nuikia ashí akupin ajas atak ni Aparín mash awantúki núnisan surumaktatui. Nuínkia Yuska tuke ashí nankaamantu átatui.

²⁹ Ayu. Tura shuar jakan enentáimtusar imiantinniasha zurukamtia nuna túruinia? Jákaru nantakchatniuncha zurukamtai imianainia?

³⁰ Iikia zurukamtai tuke jánñkiaruitiaj? Nantakchatniuitkiuínkia ánta waítsaintji.

³¹ Atsá, penké áintsachuiti. Nu asamtaí átum ii Uuntrí Jesukrístu enentáimtakrumin wi shiir enentáimtajrume. Tura wisha tuke tsawantin ti itiurchat pujakun jákatniua áintsan pujajai.

³² Jakamunmaya nantakchatniuitkiuínkia wi ántanak kajen shuarjaj Ipiasiunam máaniakuitjai. Maa, uunt yawá áinis kajen áрмаi. Wats, núnisaitkiuínkia antsu “yurumár nampektai, kashin jákashtatjik” titiai nuikia.

³³ Ananawairap. “Pénkeraitiatam yajauch shuarjaj tsanínkia wekakmeke yajauch máatrattame” tiniu áiniawai.

³⁴ Tunáa ikiuakrum penker wekasatin shiir enentáimpratarum. Iis, shuar Yúsan nékainiach tuke awai. Atumin natsaáruk tusan tájarme.

Iniantkimiú ayash átatna nu

³⁵ Shuarsha inintruschaimpiash jákarusha itiuurak nantakiarat. Nantakiarsha warí ayashniak takusarat?

³⁶ Enentáimtsuk inintrawai. Jínkiaí araamsha jaka áintsan amúatsuk. Túrayat tsapaatsuk.

³⁷ Tsapaitniurisha araatsme antsu trikiu jínkiaichisha chíkich árika jínkiaichirisha araame.

³⁸ Nuyá tsapaakuisha Yus wakerana núnisan ní tsapaitniuríncha súawai. Tura ankant ankant tsapaitniurínkia súsaiti.

³⁹ Núnisan ashí ayash métekecha áiniawai. Áentsnaka niishaaíti. Kuntinniasha niishaaíti. Nanamtinniasha namaknasha niisháa áiniawai.

⁴⁰ Nayaimpiniam yaa írunui tura ju nunkanam írunna nujaj nusháa ímtin áiniawai. Nayaimpinmayasha nun kayasha shírmari nushaíti.

⁴¹ Etsá wincharísha nantunusha yáanusha mash nushaíti. Nuamtak yaaksha chikicha wincharínkia chikichnajaínkia nushaíti.

⁴² Núniskete jaka nantaktíncha. Káurtinnium iwiarsam jákashtinnium nantaawai.

⁴³ Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai.

⁴⁴ Juyá ayash iwiarnawai, nayaimpinmaya ayash nantaawai. Juyá ayash átsuk. Núnisan nayaimpinmaya ayashsha awai.

⁴⁵ Yus-Papinium nuni áarmaiti:

“Emka áishman ni naari Atan, aents ajas iwiaaku ajasmiayi.” Tu áarmaiti.

Ukunmanka, yamaram Atanka áintsan, Krístu, wakan asa, ashí áentsun nekas iwiaaku átinian susamniaiti.

⁴⁶ Nayaimpinmaya ayashkia émkachuiti antsu juyá ayash émkaiti tura nuyá nayaimpinmaya nu.

⁴⁷ Emka áishman nun kajaj najanamu asa nun kayaiti. Ukunmaya áishmansha ii Uuntrí Krístu asa nayaimpinmayaiti.

⁴⁸ Atanka áintsan áinia nusha juyá ayashtin áiniawai. Krístu áintsan áinia nusha nayaimpinmaya ayashtin áiniawai.

⁴⁹ Yamái juyá ániakur ukunam nayaimpinmaya ayashtin ajastatji.

⁵⁰ Juna tájarme, yatsuru. Ayash númpentin asa nayaimpiniam, Yus akupeana nu, wayachminiaiti. Iis, káutaínkia káurchatniunam wayachminiaiti.

⁵¹ Yaunchu uukma nu yamá nekaatarum. Ashí jákashtatji, túmaitiatar ashí yapajniáttaji.

⁵² Tura pusar muítsarnin ti wárik yapajniáttaji. Tura ashí amuukai tusa umpuariatui. Nú umpúamunmasha Yus-shuar jákaru áinia nu atak jákashtinian nantakiartatui. Iisha nuin yapajniáttaji.

⁵³⁻⁵⁴ Jú kautainkia yamá jákatniuitiat káurchamnia ajastiniaiti. Túrusha jákachmin átatui. Nu túrunamtaisha Yus-Papinium aarma uminkiatatawai:

“Jákatniun Yus nupetak amukuiti.

⁵⁵ ¿Itiur jákatjik yamaikia. Jákatniusha itiur nupettamkan mantamataj?” Tu áarmaiti.

⁵⁶ Yaunchu Yus akupkamu tiniu asamtaí shuar tunáa tura jákatniuiti.

⁵⁷ Yamái antsu ii Uuntrí Jesukrístu túramujaj jákatniunka Yus nupetkaiti. Tura incha nujaj uwempratniun amaakui shiir yúminkiiji.

⁵⁸ Nu asamtaí, aneamu yatsuru, kakaram ajasrum yawetsuk nankaamas Yusa takatj takastarum. Ii Uuntrí Krístujaj tsanínkia takaarum nuka penké ántrachuiti. Nu paant nékarme.

16

Yusa kuitrj irurtin

¹ Yusa kuitrj irurtinkia, Yus-shuaran Karasea nunkanam tímiaj núnisnak atumniasha tájarme.

² Ashí tumiñtin, Yus súramna áintsam akankam ikiusta. Nújainkia wi jeattaj nuj yaunchu akankamu mash irurmin átatui.

³ Nuj jeancha átum anaiyarmana nu shuaran papijijai Jerusarénum akupkattajai. Tura atumi kuitrumin aisha ii yachin sústartatui.

⁴ Wisha wéminiaitkiuñkia wijijai wéartatui.

Papru irastatna nuj

⁵ Wi Masetúnia nunkanam wétiniaitjai tura nuyá Kurintiunam jeattajai.

⁶ Nujsha untsurj tsawant pujuschatjash. Ishichik nantusha wéchanianum pujuschatjash. Tura wi atak weakui atumsha yáintkiarum shiir akuptukchattarpash.

⁷ Aya wárik nankaamaktinian nakitiajai. Antsu Yus wakerakuñkia untsurj tsawant atumjai pujustaj tajai.

⁸ Tura juin Ipiasiunam pintikustis nampernum pujustatjai.

⁹ Juinkia Yusa takatrj tí shiir takastin awai. Tura untsurj shuar wi takaamun nakitiaiini-awai.

¹⁰ Timiutéu nuj jeamtainkia, shiir awajsatarum; sapijmiakain. Niisha wijijai métek Yusa takatrj takaawiti.

¹¹ Nu asantai nakitirairap. Antsu yáinkrum wini shiir akupkatarum. Chíkich yachijijai tatí tusan nákejai.

¹² Apurusnasha chíkich yachijijai wini írmasartí tusan ti seamjai tura penkesha nakiarmai. Kame nii ankant aku nuj winishtimpiash.

Áujmamsamu

¹³ Aneara tariarum Yus nekas enentáimtustarum. Áishmañchakaitrum, kakaram ajas-tarum.

¹⁴ Anenkartamujai mash túratarum.

¹⁵ Ayu, yatsuru. Estepanasa shuarj ashí emka Akaya nunkanam Yus-shuar ajararman nékarme. Niisha Yus-shuaran yáintajtsar tuke takainiawai.

¹⁶ Niisha tura ashí nijijai métek yáinkiar takainia nú shuar seatmana nu tuke túratarum.

¹⁷ Estepanassa Jurtunátusha Akaikiusha atumíya táarmatai shiir waraajai. Átum yajá pujakrum tujintiarmena nuna túrawarmai.

¹⁸ Niisha winia shiir enentáimtkrurarai. Núnisañ shiir enentáimtkramprattarme. Nuní aents tuke shiir enentáimtustiniaiti.

¹⁹ Asia nunkanmaya Yus-shuar amikmáatmainiawai. Akirasha ni nuwe Prisirajajisha ashí Yus-shuar ni jeen Yus-Chichaman irunturarusha Jesusa náarjin amikmáatmainiawai.

²⁰ Ashí ii yachisha amikmáatmainiawai. Nuámtaksha shiir awajnaistrum amikmáaniatarum.

²¹ Wi Papru asan júchiniak winia uwejruijái áaran amikmaajrume.

²² Ii Uuntrj Jesukristun aneachuka yajauchiniam yumiñkramu atí. "Ii Úuntrj, wari tatá."

²³ Ii Uuntrj Jesukristu yainmakarti.

²⁴ Jesukristunu asakrumin atumin ashí ti aneajrume. Nu atí.

Papru KURINTIUNMAYA SHUARAN Ataksha papin aar akuptukma

Kurintiunmaya Yus-shuaran Papru áatramiania nu

¹ Wi Pápruitjai Jesukrístu akatramu. Yus nuna wakerakui ni akatramurj anaikiamuitjai. Ii yachj Timiutéujaj Yus-shuar Kurintiu péprunam íruntrumna nuna áatjarne. Kame ashí Akaya nunkanam Yusna ajasurmena nunasha áatjarne.

² Apa Yussa, ii Uuntrj Jesukristusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

Papru wáitsamurj

³ Ii Uuntrj Jesukrístu Aparj, ii Yusrj ana nuna naarj uunt awajsatai. Niisha ii Aparjnti. In waitnentramaji. Tura Niisha ii Yúsrjnti. Tuma asa in tuke atsañtamji.

⁴ Ii wáitajnia nuj Yuska in atsañtamji. Tura in atsañtamjinia nútiksarik iisha ch́kich shuar wáitainia nuna atsañkrarat tusa túrutmajj.

⁵ Warí, Kristu wáitsamurj núkap pachiiinkiaitjnia núnisrik ni atsañkramurj in núkap pachiiinkiaitji.

⁶ Tuma asamtai, wáitajnia nu, Yusa uwemtikrampratniurj tura ni atsañkratniurj atumsha takustarum tusar wáitajji. Tura Yus in atsañtampramjnia nu, Yusa uwemtikrampratniurj tura ni atsañkratniurj átum takustarum tusar atsañkramuitji. Wats, átum uwemtikramu tura atsañkramu asarum, ii wáitsajnia nútiksarmek wáitaiyatrum shiir enentáimsarum katsuntramniaitrum.

⁷ Tura “túrattawai” tu enentáimtajrume. Warí, átum iijjaj métek wáitsaitrum. Núnisan iijjaj métek Yus atsañtamtsurmek.

⁸ Yatsurtiram, iikia Asia nunkanam ti itiurchat wáinkiamjnia nu nekaatarum tusar wakeraji. Imiá itiurchat wáinkiar iikia katsuntratin jeachmajj.

⁹ Nu itiurchatnumiá “iwiaaku jíinkishtatji” tu enentáimsamji. Túrasha “iikia tujinchaitji” tu enentáimtumatsuk, antsu jakamunmayan iniannua nú Yúsan enentáimtusarat tusa nu túrunamji.

¹⁰⁻¹¹ Jakamnia itiurchatnumiá Yuska uwemtikrampramji. Tura yamaisha uwemtikrampratajtsa pujurtamji. Tura atumsha in Yus áujtakrumniñkia “Yuska tuke uwemtikramprat-taji” taji. Tura untsurj shuar Yus aujsa asakrumin, ii uwempra asakrin untsurj shuar Yúsan yuminsartatui.

Kurintiunam wau wéchatniun Papru ujakmiania nu

¹² Yatsurtiram, jü nekaatarum tusar wakeraji. Jü nunkanam pujusar tura nekaska atumjaj pujusar anañtsuk tura Yus umirkar wekaimji. Aya ii nekatairjijjaj wekaichamji. Antsu Yus in waitnentrama asa péñker wekasatniun yainmakmajj. Nu nekaar shiir enentáimji.

¹³ Áatjarmena nu páantaiti. Átum áusarum nekaatin jearmena nunak aarjai. Chikichan nekaachminian aatsjai. Péñker nekaatarum tusan wakerajrume.

¹⁴ Ishichik nékayatrumek nú núpak tuke nekaki wetarum tusan wakerajrume. Nuñkia Jesukrístu tátinia nú tsawantaj átum winia shiir enentáimtursattarme. Tura átum péñker wekasa asakrumin shiir enentáimtusattarme.

¹⁵ Tura ii shiir enentáimtunij nuna nékakun ataksha Yusá waitnenkartutairj nekapsak tusan ataksha atumjijn irastinian wakerimjai.

¹⁶ Masetúnia nunkanmaani wéakun írkuta nankaikitjarum tusan enentáimmiyajai. Tura wáketkuncha ataksha ístajrum tusan wakerimjai. Túramtai wi Jutía nunkanam weakui átum yáintkiatarum tusan atumin ístinian wakerimjai.

¹⁷ Nuñkia ¿urukamtai túrachmaj? ¿Péñker enentáimtusuke “wetajai” túmij? ¿Wi Yus-shuarcha nunisan, jimiará chichamtiniaiti, tú enentáimtusarumek?

¹⁸ Núchaiti. Yus tana nuna túmiatrusan umíana nútiksarik iikia ii chichame umiktai tusar wakeraji. Jü chichamaik, “Ee, atsa” tátsuji.

¹⁹ Wisha Serpanujaj Timiutéujaj Yusa Uchirj Jesukristunun ujakmajrume. Niisha jú chichamaik, “Ee, atsa” tíchaiti. Antsu nii tana nuna tuke umíawai.

²⁰ Niijjajisha Yus tana nu túmiatrusan uminiui. Tuma asamtai Jesukrístu enentáimtakur “nii tana nuna nekas túrattawai” tu enentáimji. Tu enentáimsar Yusa naarj shiir awajeaji.

²¹ Atumniasha incha ikiakátmajnia nu Yúsaiti. Krístunu ajasu asakrin túrutmajj. Tura anaitiamak Niiniu awajtamji.

²² Tura ukunam ii achiktatjinia nuna, nekas amastatjai tusa Yus ni Wakanjin ii enentájin apujturmají. Nujaj Níiniuitji tusar paant nékaji.

²³ Atumjin itiruchatan wáinkiajj tusan nakitiakun atumí péprurin Kurintiunam jeachmajai. Wáitrakuinkia “Yus iirsati” tajai.

²⁴ “Aya wi tájana nútiksarmek Yus enentáimtustarum” waantu enentáimtumasar nu titin nakitiaji. Yus nekas enentáimtusaaajaj kakqarme. Antsu nekas warastarum tusar wakeraji.

2

¹ Tuma asamtai, atak kúntuts awajsajrum tusan nakitiakun, “atumí tunaari íwiartsurminin jeashtatjai” tímiajai.

² Wi atumin kúntuts awajkuncha, ¿yaki winia waramtikrusat? Aya atumek, wi nuik kúntuts awajsamjarmena nuke waramtikrusminiaitume.

³ Wi jeakun atumí tunaari íwiartsurminin kúntuts enentáimsajj tusan nakitiakun, nu papin áarmaj nútiksanak áarmajai. Warí, atumketrume winia waramtikrustin.

⁴ Nekaatarum. Nu papin áarmiajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

Yajachin túrana nu tsankuratin

⁵ Túrasha kúntuts awajtusmia nu, aya wíniak kúntuts awajtuschamai. Antsu atumniaasha ishichik kúntuts awajtamsayi. Patasa chichasajj tusan “ishichik” tajai.

⁶ Kame nu áishmankan iruntra chicharkarum wáitkiasmarum nuke máakete.

⁷ Antsu yamaikia tsankuratniuitrume. Shiir enentáimtikratniuitrume. Niisha imiá kúntuts pujus nú arant ajasájn tusarum túratniuitrume.

⁸ Túrakrum nii nekas anearmena nu paant iniaktustarum tusan seajrume.

⁹ Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme.

¹⁰ Átum tsankurearmena nú shuaran wisha núnisnak tsankureajai. Tura tsankuratin ákuinkia, wi tsankurajna nu ashí atumnian enentáimtusar, Kristu íimmianum túrajai.

¹¹ Kame uunt iwianch Satanás in emestampratajtsa wakerana nusha nékaji. Tuma asamtai, túrawajn tusar tsankuratniuitji.

Trúas péprunam Papru juákchamiania nu

¹² Krístunu shiir chichaman Trúas péprunam etserkatajtsan jean, ti péjker takastinian wáinkiamjai.

¹³ Túrasha ii yachí Titiun wáinkiachu asan, shiir enentáimsatniun tujinkiamjai. Tura asamtai Trúasnumiá aentsun áusjan ikiukiaran Masetúnia nunkanam wémiajai.

Krístujai nupetkamniaitji

¹⁴ Kristu Jesusjaj Yuska incha nupetmamtikramak ewekatmasuitji. Tuma asamtai Nincha ti shiir yúminsa pujajai. Tura kukují kuñkúakui, ashí nékainia núnisan ii etserkamujaj Kristu shiir chichamen Yuska ashí aentsun nekamtikiainiawai.

¹⁵ Kristu in pujurtamu asamtai Yusjaj nekapsamka iikia kuñkúajai. Ii kuñkúajnia nuna uwentikramu ainia nusha tura uwentikrachma ainia nusha nekapramnia ainiaawai.

¹⁶ Menkakatniunam weena nuka ii kuñkúajnia nuna jakamnia mejea nekapramji. Tura iwiaaku átinnum weena nuka iwiaaku átin kuñkúa nekapramji. Maa, nu túratniuncha ¿yaki jeá?

¹⁷ Kame untsurj aents kuitian achiktaj tusar Yusa chichamen yapajinia núniskechuitji. Antsu Krístunu ajasu asar, Yus akupkamu asar, Yus íimmianum anantsuk esetsar étsereaji.

3

Yamaram chícham najanamu

¹ ¿Nu tákurninkia, “ataksha niníki waantu enentáimtumainiawai,” tu enentáimsarmek? ¿Chíkich túrúnia núnisrik, “Ju áishman nekas Yus-Chichaman etserin áiniawai” tusa papí arma atumin iniaktustinkiaitaij? ¿Chíkich iniaktustin nú papí atumin seatniukaitaij?

² Atsá. Átumka ii papirja núniskechukaitrum. Ii enentájn nu papí áarmaiti. Tura nú papí áusatniua núnisan ashí aents atumí túramurj wáinkiar ii etserkamaj nu, Papru nekas Yusa takatrin takaawai tusa nekaamnia áiniawai.

³ Iis, tátsujak. Papí arma núnisketrume. Nu papí Kristu áarmaiti tura iisha nú papí atumin súaji. Tintiajainchu antsu iwiaaku Yusa Wakanjijaj áarmaiti. Kayanmasha áarchamuiti; antsu shuara enentájn, auka, áarmaiti.

⁴ Kame Krístunu asar, Yus enentáimta asar, nusha tímiaitai, tají.

⁵ Ju nékaji; imia iik penké tujinkiaitji. Antsu ii túrajnia nu Yus ni kakarmarjín súrámkurin túraji.

⁶ Yamaram chichaman Yus najanamia nuna, incha pépker etserkatniun suramsaitji. Yaunchu aarma chichamnum, ashí takamtsuk umirkachrikia tuke jakamniuyaji. Antsu yamaram chichamnum, Yuska ni Wakanjijai yamaram wekasatniun súrámji. Yusa kakarmarjijai nu chicham étserji.

⁷ Yaunchu chichamnaka kayanam aar Yus Muisaisan susamiayi. Susamia nuj, Muisaisa yapi ti wincha ajasmiayi. Túrunamtaí Israer-shuar ni yapin ístinian tujinkiarimiayi. (Túrasha nu wincha mushatmaki wémiayi.) Túrasha nu chichaman shuar umirkatniun tujintiakui, nu chichamsha aya tuke jákatniunam shuáran ejemiayi. Túmayatan winchajai susamuyayi.

⁸ Tura yamaram chichaman Yusa Wakaní súrámna nu, nujai nankaamas shíiraiti.

⁹ Kame mesertinnium ejeana nú chicham winchajai susamuyayi. Tura nujai nankaamas Yúsnum ejeana nú chichamka Yus ímmianum pépkeraiti.

¹⁰ Iista; yamaram ana nu imiá shiir asa, yaunchu wincha amia núnaka mushatmamtekiui.

¹¹ Núkap arur pujuschamnia nu wincha áchamkia. Kame tuke átinia nuke nujai nankaamas shíiraiti.

¹² Nu nékakur ti paant étserji.

¹³ Muisais túramia nútiksarik túratsji. Ii uuntri Israer-shuar ni yapin wincha ajas menkaan wáinkiarajin tusa tarachjai ni yapin Muisaiska nukumakmiayi.

¹⁴ Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarimiayi. Tura yamaisha núnisan yaunchu aarma chichaman áujsam antukar nekaatniun tujintiainiawai. Kristu enentáimtuschatin ni enentáin nukukma nu yapajíáhmaiti. Aya Kristujai nuka yapajíáhmaiti.

¹⁵ Yamaisha Muisaisa áarmarjín áujsar nékainiatsui, ni enentáimmiarij nukurkamu asa.

¹⁶ Tura aencha ni enentáin yapajíá Uuntna ajasmataikia ni enentáimmiarij nukurkamu ana nu jusamuiti.

¹⁷ “Uunt” tájina nu, Yusa Wakaníiti. Uunt Yusa Wakaní pujana nuj ankant ajastiniaiti.

¹⁸ Nuke asamtaí, iisha ii yapí tarachjai nukukchamu asar íspikia núnisketji. Uunt Kristu pépkerj iniakmaji. Kristu pépkerj nú núkap takaki wéakur, Kristujai métek ajastasa pujaji. Yusa Wakaníkia nuna túrawai.

4

¹ Yus in waitnentrana asa ni chichamen etserkatniun ataktamsaitji. Tuma asamtaí yawetsuk takaaji.

² Ujka túratin ana nuyá tura natsanmaj ana nuyasha kanakmiaji. Ananjkatai tusar wekaatsuji. Tura Yus-Chichamjai nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túraji. Wi tájana nuna Yus nékawai.

³ Uwempratin Chicham ii étserjinia nu páantaiti. Áyatik menkakatniunam weena nu “páantchaiti” tuíniawai.

⁴ Uunt iwianch, ju nunká uuntri ana nu, nu aentsu enentáin ukusturuíti. Uunt Kristunu shiir chichaman ii étsermajai tsáapnin enentáimprarajin tusa ukustawai. Nu Kristu Yúsán ímatrusaj nakumui.

⁵ Iisha étserkur, Jesukristu ii Úuntriinti tu étserajaji. Iikia atumí únuntriintji tátsuji. Antsu, Jesus ii uuntri asamtaí, atumj yáintriintji, taji.

⁶ Yaunchu kiritin aan Yus tsáapin ati tusa tsáapnin awajsachmakia. Nú Yúsaiti ii enentáin tsáapnin awajatsamamia nu. Nu tsáapnijai ni shiirmarjín, Jesukristu iniakmia nuna, ashí aents nekaawarat tusar Jesukristunun étserajaji.

Yusak enentáimtusar wekasatin

⁷ Nu tsáapin imiá pépker ana nuna ii ayashjin Yus ikiusuiti. Tura ii ayashj kakarmachu, nuwe najanamua áanin asamtaí, warí, kakaram ájinia nu Yúsnumiáchukait. Ii aj nuna nekaawarat tusa Yuska ni tsáapnintrin ii ayashjin ikiusuiti.

⁸ Tuma asamtaí ii itiurchatrij árentmaku árinij tuke jinikimniaitji. “Itiurkatjik” taji, túrasha Yus yáinmaji.

⁹ Aents pataaturmainiakrincha Yus ikiurmatsji. Emesrataj tukamá tujintiainiawai.

¹⁰ Kame Kristun máataj tusa tuke wakermia núnisan incha tuke mantamataj turamaini-aji. Túrasha jákachu asar Kristu kakarmarj ii ayashjin iniakmaji.

¹¹ Iisha Jesusna ajasu asar wekaajnia nuj tuke tsawant tsúumainium jasattuk ajaji. Túrar ii ayashj jakamniaitiat nu ayashniun Jesusa iwiaakmarj paant iniakmaji.

¹² Iisha Yus-Chicham étserkur ii ayashjin jasattuk ajaji, tuma ajin atumsha umikiu asarum nekas iwiaaku atin wáinkiarne.

¹³ Yus-Papinium yaunchu áarmanum: “Yúsan enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étsjerji.

¹⁴ Yus kakarmaiti. Uunt Jesusan jakamunmayan iniantkimiaji. Incha núnisan Jesujai iniantamkittiaji. Tura atumjai métek ni pujamunam juramkittiaji. Nusha paant nékaji.

¹⁵ Atumsha untsurj aencha Yus-Chicham antukakrumin, Yus yáinmakurme. Tuma asamtai atumsha nútiksarmek Yus yumingsarum pujarme. Nujai Yusa naarij uunt awajsamuiti. Nu nekaar wáitsatin ashamsatsji.

¹⁶ Tura yaweatsji. Ii ayashj amuiki wéakuisha ii enentáinikia yamaram ajaki wéawai.

¹⁷ Warí, ukunam tuke shiir pujustatinia nu enentáimtakrikia, ju nunkanam wáitajnia nu, ti iturchataitai, aya yamaiaj asa tiikia iturchatchaiti, tura wárik nankaamawai. Túrasa ii iturchatrijjai Yuska ti shiir ana nuna amuukachmin ana nuna núkap suramsattaji.

¹⁸ Tuma asamtai wáinjinia nu ti enentáimtsatsji. Antsu wáintsujnia nu nekas enentáimtai. Wáinjinia nusha aya yamaiajaiti. Antsu wáintsujnia nuka tuke amuukachminiaiti.

5

¹ Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitji. Aents najanachmaiti nu. Tuma asamtai ii ayashj emesnakuisha warí iturtamajia. Nuka aaka núnisan amuukamniaiti.

² Ju ayashnium pujusar wáitiaji, taji. Yamaram ayash nayaimpiniam pujana nu achiktai tusar wakeraji.

³ Ayashnichu ajasajj tusar, yamaram ayashin ajastaisar wakeraji. Pushia núnik yamaram ayash in nukurmaktai tusar wakeraji.

⁴ Tura juj ayashjai pujusar wáitsar pujakur shiir enentáimtsuji. Arut pushi áiktinia núnisrik ju ayash ikiuktaitsar tátsuji. Antsu yamaram pushi entsartinia núnisrik yamaram ayashnium tuke pujusmí tusar taji. Iista, ju ayash amuukachminkiaiti. Yamaram ayashnium pujusar tuke iwiaaku pujustaji.

⁵ Yamaram ayashintin ajastinian iwiaarturmaruitjinia nu Yúsaiti. Tura nekas túrattajai tusa ni Wakanin suramsaitji.

⁶⁻⁷ Ju nékaji. Ju ayashnium pujajnia juinikia Uunt Jesujai pujatsji. Tuma asamtai, wáinjinia nu ti enentáimtusuk Yus enentáimtusar tuke shiir enentáimsar wekaaji.

⁸ Tura ju ayashniumiaj jínkir Uunt Jesujai tuke pujustaisar wakeraji. Tura túrattajai tu nékaji.

⁹ Tuma asamtai ju ayashnium pujakrishia tura ju ayash ikiukrishia Uunt Jesus tuke waramtiksatat taji.

¹⁰ Warí, ju ayashjai ii túramajnia nu ujakam, “pénkeraiti”, “yajauchiiti” Kristu turutit tusar, ashí iisha Uunt Kristuj jeatniuitji. Tura ii túramujai métek akirmaktatji.

Kristun waramtiksatat taji

¹¹ Tuma asamtai ju nékaji: Uunt umirkashtin ti tsúumainti. Nu nekaar ashí shuar Yushuaran awajsatat tusar ti takaaji. Tura incha Yus nékarmajai. Tura ii túramurj átumka atumí enentáin paant nékarme, taji.

¹² Ataksha, “wi pénkeraitjai” tusar nu tátsuji. Antsu, ii túramu nekáa asakrumin enentáiniam ana nuna enentáimtusuk aya pátatkea nujai warainia nú shuar tsanumprut-mainiakui yaintkiatarum tusar taji.

¹³ “Wáurkaiti” turamainiajash. Nusha warí, iturtamajia. Ashí túrajnia nu, Yus aneakur tura atumin yáinjai tusar túrajni.

¹⁴ Kame ashí ii túrajnia nu Kristu anenkrattairijjai túrajni. Kame ju nékaji: Kristu ashí shuaran jaruku asamtai, Yus ímmianum ashí iisha jaka núnisaitji.

¹⁵ Kristu ashí shuaran jaruk nantarkimiaji. Tuma asamtai Kristunam iisha iwiaaku pujajnia jui, iik wararmamsuk, Kristu umirkatniuitji.

¹⁶ Tura yamaisha aya ni ayashj írsar, “nu shuar pénkeraiti” tura “nu shuar yajauchiiti,” titin tujintiaji. Kame yaunchu aya ni ayashj írsar “Kristu yajauchiiti” nu enentáimsamijai. Tura yamaikia yapajjar, etsesar enentáimkiur “Kristu Yusa Uchirínti” taji.

Kristujai yamarmaitji

¹⁷ Tuma asamtai, Kristunu ajasúka yamaram najanamuiti. Yaunchu enentáimtaij menkakayi. Antsu núnaka íkias ni enentáimtaij nekas yamarmaiti yamaikia.

¹⁸ Nunasha Yus túrait. In nawampramkattsa Kristun akupturmakuitji. Tura nu etserkatnien incha ataktamsaitji.

¹⁹ Yuska in tunaarinniutin asutiámatniun nakitiaj Kristujai nawampramkamajai. Tura incha Yus-shuartin nu ujaktinian ataktamsaitji.

²⁰ Kristunu ataksamu asar, Yuska “winia Uchirjai nawamnaikiatarum” tusa ii wenejai atumin seatmarme. Tuma asakrin, Kristu náarjin “túratarum” tájarne.

²¹ Kristuka tunaan penké túrachmiayi. Túmanak ii tunaarijn Yus Krístun makuumiayi. Nuna tura Krístunam makuuchmin awajtamsamijai.

6

¹⁻² Ni Papirijn Yus yaunchu Isayasan juna tímiayi:

Tsawant jeamtaí, ame seatmena nuna anturkamjame. Uwempratin tsawant jeamtaisha yaínmajme.

Wats yamaikia Yus seatin jeayi. Yamái Yúsnum uwempratin jeayi. Tuma asamtaí, iikia Yusa takatrín pachitkiajnía nu, Yusa anenkrattairj péñker achiktarum tusar seajrume.

³ Tura “Papru etserkamurj áñtraiti” tírañ tusar chikich yajauch enentáimtiktsuk péñker wekaaji.

⁴ Nekas Yusa takarniuríntji nuna paant nekaawarat tusar wáitíayatrik, atsumayatrik, itiuurchatnum pujayatrik shiir katsunteaji.

⁵ Ju itiuurchat wáinkiamji: katsumpramkarmaji; sepunam enketmáwarmiaji; charáa-charáa awajtamiarmiaji; takatcha ti itiuurchat takasmiaji; kanutsuk pujumiaji; tura tsukasha ti tsukammiaji.

⁶ Tunáa nakitrar wekaaji; Yus-Chicham unuimíatraitji; shiir enentáijjaj katsuntrar wekaaji. Chikich shuar péñker awajeaji; Yusa Wakanj pujurtamkurin shuar nekas aneaji;

⁷ nekas chicham ana nu étseraeaji; tura Yusa kakarmarísha nú paant iniakmaji. Tura ni nemasrín nupettukajñ tusa suntar ni tantarín júnana núnisrik iisha ii nemasrj íwianch nupettamkajñ tusar ii Yusrj tuke umirkar wekaaji.

⁸ Shuar shiir enentáimturmainiakrincha, yajauch enentáimturmainiakrincha, péñker chichartamainiakrincha, yajauch chichartamainiakrincha tuke Yusjaj shiir wekaaji. “Wáitruiniawai” turamainiakrincha tuke nekas chichaaaji.

⁹ “Nu aents nékatsji” turamainiakrincha Yusnumka nékanji; jákatin tsúumainium wekayatrik tuke iwiaaku pujaji; asutiámuitiatrik mantamnatsji. Yusa takarniuríntiaj nu ashí nujaj paant nekaamniaiti.

¹⁰ Kúntuts pujayatrik ii enentáinkia waraaji; kuítrinchaitriatrik chikich shuar kuítrintin awajeaji; penké takakchiatrik ashí wáinj.

¹¹ Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme.

¹² Wikia atumin paant chichastajtsan wakerajrume; antsu átumka anenttsuk paant chichastin nakitrarme.

¹³ Winia uchiurua núnisnak chichaaajrume; wi tuke paant chichaarjarmena núnisrumek atumsha atumí enentájn ana nu, paant ujatkatatum tusan seajrume.

Yusa jeentji

¹⁴ Yus-shuar Yus-shuarchajaj tsaniñktinian enentáimsashtiniaiti. Warí, ¿Yusan umirna nú shuar, iwianchin umirna nú shuarjaj métek enentáimiainiawak? ¿Tsáapnisha kiritjaj máimtek áminkiait?

¹⁵ ¿Kristuka uunt iwianchjaj nawamnaikiamniakait? ¿Yus-shuar Yus-shuarchajaj tsanin shiir pujusminkiait?

¹⁶ ¿Iwiaaku Yusa jeencha ántar-yus pujustinkiait? Tura atumsha iwiaaku Yusa jéentrume. Yus Nínki ni Papirijn juna tíchamka:

Niijjaj tsaniñkia pujusan, niijjaj wekasartatjai tura ni Yusrj átatjai; tura niisha Wí aents ajasartatui.

¹⁷ Tuma asamtaí junasha tímiayi:

Nii matsatainia nuyá jíinkitarum, tura niijja kanaktiarum, tawai Uunt Yus; tura yajauch ana nu antinckiairap. Túrakrumninkia awayattajrume.

¹⁸ Tura atumí Aparj átatjai; átumka winia uchiur átatrume. Nuna Wi imía kakaram uunt Yus asan tajai. Tu áarmaiti.

7

¹ Tuma asamtaí aneamur yatsurtiram, nusha, Yus tímia nu, in túramji. Nu tuma asamtaí ii ayashj tura ii enentáisha yajauch ajasajñ tusar, ashí tunáa ana nuyá kanaktiniaitji. Túrar “Yusak nekas ii úntrínti” takur, ii ayashjsha, ii enentáisha takamtsuk tuke tsawant Yus íktustiniaitji.

Kurintiunmaya shuar enentáimprarmatai Papru warasmiayi

² Ataksha nawamnaikiatai. Iikia shuar yajauch awajsachmaji; yajauch jintinrachmaji; anankachmaji.

³ Makuutai tusan nuna tátsujai. Antsu nuik tíchamkajrum, iwiaaku pujakrishá jakarsha átumka ii enentájn áchitkiarme.

⁴ Araantutsuk áatjarne; shiir enentáimjai. Itiurchatnum pujayatnak, atumin enentáimtusan enentáiruú kakaram enentáimsan waraajai.

⁵ Juí Masetúnianum penké ayamprachmaji. Antsu ti wáitsamji. Áentsnumiá itiuurchat wáinkiamji, tura ii enentáijjainkia ashankamji.

⁶ Tura kúntuts pujakrincha Yus ikiakátmartinian nékawai. Tuma asantai Titiún akupturkamai. Nujai winia enentáirun ikiakármajai.

⁷ Tura átum nii ikiakármarmna nuna Titiu ujatkamajai. Nuna antukan ti warasmajajai. Titiuka átum írsatin wakerarmena nuna ujatkamajai; túrunamia nuna kúntuts enentáimmarumna nusha, tura winia anentu asarum enentáimturumna nuna ujatkamajai. Nuna antukan nú nankaamas warasmajajai.

⁸ Papi nuik akupkamaj nu áusarum kúntuts enentáimprarme; núnaka nékajai. Túrasa ii akupmainchu túraitjai tátsujai. Eta, nuikka tímiajai, túrasa yamaikia tátsujai. Papi áusarum ishichik kúntuts enentáimprarmna nuna nekaan waraajai.

⁹ Kame kúntuts enentáimprakrumin waraatsjai. Antsu atumí tunaari nekaarum kúntuts enentáimprarm atumí enentáí Yusjai yapajjá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asantai iikia nu papijjai yajauach awajsachji.

¹⁰ Nekaatarum. Yus wakerana nútiksar kúntuts katsunteakka ni enentáí Yúsnum yapajjáwai. Nuínkia ni tunaariya uwempraiti. Nuka “túruminchu túraitjai” tíchamniati. Antsu Yusan enentáimtutsuk kúntuts pujakka ni enentáí yapajjáshtatui; yapajjitsuk ni tunaariya uwemtsuk jakattawai.

¹¹ Tura iistarum; Yus wakerana nútiksarmek atumí kúntutsrj katsuntearme. Tuma asarum wi áatjarmena nu esetsarum enentáimturme. Atumí túramurj ujakatajtsa wakerimiarne. Tura nu tunáa nakitramarme; tura ashankarmarme. Tura yajauchin túramia nu asutiámarme. Tura winia anentu asarum wi timia tímiatrusrumek túratatui tusarum ti wakerimiarne. Nu tura asakrumin pénger túrarmena nu, paant iniakmarme.

¹² Kame yajauchin túramia nuna ni tunaarin iniaiasat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarne. Tura nú nankaamas átum Yúsnum in anearmena nu nekamarum tusan áatramjarne.

¹³ Átum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujakamtai nú nankaamas shiir waraajai.

¹⁴ Atumin shiir enentáimtajrumna nuna Titiu ujakmajai. Tura nuna nekas aan Titiu nekaamai. Tuma asantai atumin natsantrachmajrume. Kame atumin tuke nekas ana nuna tímiajrume. Núnisan atumnian Titiu tímiaj nusha nekasauyi.

¹⁵ Tura Titiuka atumin enentáimturmas ti waraawai. “Jiatmaktajtsa winiatsush” tusarum ti ashankachurme. Túmayatrum, nii pénger tati tusarum pachischarme. Tura nii taa seatarmna nu umikiurme. Titiuka nuna enentáimias waraawai.

¹⁶ Tura wikia, átum pénger túramurmin nekaan tura pénger túrawartatui tu enentáimsan waraajai.

8

Yus-shuarti ii kuítri súsatin

¹ Yatsurtiram, Masetúnia núnkanmaja Yus-shuaran Yus waitnentainia nuna yamá ujakatjarne.

² Ti itiuurchatnum nekapsamu ainiawai. Túmayatan warainiawai. Tura ti kuítrincha ániayatan emeentutsuk kuítrinnia núnisan súniawai.

³ Juna wi paant nekaan ujaajrume. Niisha wakeramujai súsatniun jeinia nuna súniawai; tura nú nankaamassa súniawai.

⁴ Yus-shuaran kuítrinchan súsartaisa ti wakeruiniak, nu túratniun ti seatmarmaji.

⁵ Tura ii enentáimmiáj nú nankaamas túrawarmiayi. Emka Yúsnum niñki sumamawarmiayi. Tura Yusa wakeramurj túratatui tusar incha “yáintajrume” turammiajai.

⁶ Tuma asantai, “Masetúnia nuñkanam kuít júuktin nankamamamna nu, Kurintiu peprunmasha amukta” tusar Titiu seamiajai.

⁷ Atumsha ashí pénger túratin ti nékarme. Yus enentáimtustincha, unuiniartincha, ju nunkanmaja nekaatniusha, in aneatniusha nuka ashí nékarme. Wats, jusha túratatum. Yus-shuar kuítrincha ainia nu achikiarat tusarum Titiu támatai núkap susatarum.

⁸ Kame atumí úntrja núnisnak akupeatsjarne, túratniutrum tusan. Antsu chikich shuar ni kuítrin susartasa ti wakeruinia nuna atumin ujakan, atumí anenkrattairj nekaspashi tusan nekapsatajtsa pujajai.

⁹ Ii uuntri Jesukristu waitnenkartutairi nékarme. Ashí takakuyayi, tura atumin anenma asa kuítríncha núnisan ajasmiaiyi. Ju nunkanam kuítríncha núnis ajasmatai átum nayaimpiniam kuítriniak tusa túramiaiyi.

¹⁰ Juna enentáimjai. Nuik uwitin, “yáintatji” tíchamkarum. Tura nu túratin ti wakerimiarme.

¹¹ Nankamamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum.

¹² Iistarum. Ni kuítrín Yúsán nekas susatajtsa wakerakuíngkia, nii jeana nuna susat tusa Yus wakerawai. “Jeana nú nankaamas susati” tátsui Yus.

¹³ Chíkich ti núkap susarum atumnia táasat tusan tátsujai.

¹⁴ Antsu ashí métek takusarat tusan tajai. Iis atumsha yamaikia ti nukap takakrume; nujaj atuma nu súsatniutrumé. Ukunam chíkich tsawantaj átum atumashtarmeash. Nuíngkia niisha atumin suramsarti. Nu túratin ákuíngkia ashí métek takustin átatui.

¹⁵ Yusa Papirijn yaunchu áarman núnis tátsuk:

Núkap takusmia nu ampirchamiayi; tura ishichik takusmia nu atsumachmiayi.

Titiu chíkich Yus-shuarjaj Kurintianum wetin ármiaiyi

¹⁶ Tura wi aneajrumna núnisan atumin aneatniun Yus Titiun susamiayi. Tuma asamtai Yúsán yuminsan pujajai.

¹⁷ Iis, wi takui wétinian wakerimiayi. Tura nú nankaamas, atumin anenma asa, ni enentáijjain wéawai.

¹⁸ Tura chíkich Yus-shuar Titiujaj akupkatajtsa pujaji. Nu shuar Yusa Chichamen ti penker etserainakuí, ashí Yus-shuar iruntramunam nin pénger áujmatainiawai.

¹⁹ Tura nú shuarnaka ii tsaniakmarj atí tusar ashí Yus-shuar iruntramunam nuna anaikiarmiayi. Iijjaj kuitian jukiarti tusar anaikiarmiayi. Iis Yusa náarín ashí aents uunt najanawarat tusar tura ashí shuar atumí tsanjarín nekaawarat tusar nu takat túratsjik.

²⁰ Iis, ju kuit ii julkittiajnía nu, núkap asamtai, aents tsanumprutmawarajj tusar, Titiujaj tura ju shuarjaisha wéajai.

²¹ Yus ímmianumsha, aents ímmianumsha ii naka wekaajnia nuna nekaawarat tusar túrajai.

²² Nu jimiara shuarjaj chíkich Yus-shuar akupeaji. Yusa takatrín takastasa ti wakerana nu nekas nékaji. Tura átum yáintin ti wakerarmena nuna nekáa niisha atumjin jeataj tusa ti wakerawai. Nuna túmak Yusa takatrín takastinian wakerana nuna paant iniakmawai.

²³ Tura ajsha chíkich shuar Titiun nekaataitsar anintruiniakuisha, “Titiu Papru tsaniakmarjinti. Incha yáinmaktajtsa Páprujaj takaawai” titiarum. Chíkich Yus-shuaran nekaataitsar anintruiniakuisha, “Yus-shuar akupkamu ániawai, tura Kristu náarín shiir awajin ániawai” titiarum.

²⁴ Tura atumí anekrattairj ashí Yus-shuar nekaawarat tusarum, nu shuar pénger itiaatarum. Nu túrakrum, atumnia ii shiir tímiaj nu nekasaiti tu iniaktustatrumé.

9

Yus-shuaran kuítrínchan súsarmia nu

¹⁻² Kame átum Yus-shuar kuítríncha súsatin wakerarme; nuna nékajai. Tuma asan núnaka áatrachminiaitjarme. Atumsha súsatin wakera asakrumin wi nunasha shiir enentáimsan, “Akaya nunkanmaja shuar nuik uwitinia wakerusmatak yáintinian wakeruiniawai” tusan Masetúnianmaja shuáran ujaajai.

³ Tura “kúitniasha súsatniun ti wakeruiniawai” tímiaj nuna, “wáitaiiti” tíarain tusan naktiajai. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajai.

⁴ Wi ukunam Masetúnianmaja shuarjaj atumjin jean, kuit súsatin tímiarmena nuna iwiarachman wáinkian natsarajj tusan, tura atumsha natsarairum tusan túrajai. Warí, “súsatniun ti wakeruiniawai” tuke tu wéatsjak.

⁵ Nu tuma asamtai, au takui súarme tu enentáimsarain tusan ju Yus-shuaran emka akupenajai. Niisha nu kúitian iwiaratniun yáinmakarti, tajai. Nuíngkia wisha Masetúnianmaja shuarjaj ukunam jeawakrin, nu kuit atumsha nekas atumí enentáijjaink' súsatin wakerarmena nu nekaamnia átatui.

⁶ Tura junasha paant tájarme: ishichik araana nu ishichik júuktatui. Núkap araana nusha núkap júuktatui. Kuit súsatniusha núniskete.

⁷ Tura ashí shuar ni enentáin enentáimsana nunak susati. “Nakitiyatnak susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtawai.

⁸ Ashí pénger ana nuna suramsatniun Yus tujintiatsui. Nujaj átum atumashtatrumé. Tura chikichan yáintin núkap takustatrumé.

⁹ Yus-Papinium ju aarma awai:

Kuítrinchan núkap susayi;
nuna tura, tuke túratin átatui.

¹⁰ Arakmaun araakan súana nusha Yúsaiti. Tura yurumkan súana nusha Yúsaiti. Niisha átum péñker araatiun suramsattarme. Tura araarumna nujaj péñker túratarum tusa araakrumin ipiampartatui.

¹¹ Tuma asamtai núkap juukma takaku asarum, núkap súsatín jeattarme. Nuñkia súarmena nuna ii uwejeñan chíkich Yus-shuar achikiar Yúsán yumiñsartatui.

¹² Warí, ju kúit Yus-shuar kuítrincha súakrin ní atsumamuríncha atsumachartatui. Tura nú nankaamas Yúsán ti yumiñsartatui.

¹³ Nu shuar yáñtai tusarum tura ashí Yus-shuar yañtai tusarum súatsrumek. Nujaj Kristu shiir chichamen umiarmena nuna nekainiawai. Tura kuítrum emeentutsuk sua asakrumin niisha Yusa náarín uunt awajñsartatui.

¹⁴ Kame Yus atumín ti waitnentramainiakui kuítrum súatsrumek. Sua asakrumin nu shuar atumín ti anenmainiak Yúsán áujturmasartatui.

¹⁵ ¡Tura ashí iisha ii Yusrj ti yumiñsatniuitji! ¿In súramjinia nuna yaki jintiartínia jaé?

10

Papru nekas jintintiamniati

¹ Wats, “Papru iijjai pujak péjchach ajawai, tura yajá pujak kakaram chichaawai” chíkich shuar turutainiatsuk. Kame imia wiki Papru Kristu anenkartutairijjai juna seatjarum tusan pujajai.

² Atumí weatkamuriya shuar chichainiak “Papru ní tsaniakmarijjai ju nunkanam akupín ajastai tusar wakeruiniak jintintiañiawai” turutainia nuna kíshumaktajtsan enentáimjai. Wisha atumín jean kakaram chichaschataj tusan, nu antukairap tu seajrume.

³ Áentstanka nunkanmaya áentsuitji, túrasha jú áents maania aintsar máaniatsji.

⁴ Ju nunkanmaya nanñkijjai máaniatsji antsu ii nanñkirj Yusa kakarmarñti. Nujaj iwianchi kakarmarj núpeteaji.

⁵ Ju nunkanmaya aentsu jintiamurínkia tura waantu enentáimtumamurínkia, Yus nekaatiun itit awajea nuka, nu nanñkijjai núpeteaji. Tura ashí ju nunkanmaya enentáimsatin yapajniak, emetamu áintsan, Kristun umirkarat tusar nu nanñkijjai núpeteaji.

⁶ Nekas umirkatin átum jeawakrumññkia nuñkia umirkatniun tuke nakitiainia nu, Yusa kakarmarjñjai asutiáttaji, tajai.

⁷ Atumsha aya pátatek ana nu iiyarme. Wats, shuar nekas Krístunu ajasman nekamaka, núnisan winiasha Krístunuiti tu enentáimtursatniuiti.

⁸ Yusa kakarmarjñjai akupeaji tuke tákuncha natsaamatsjai. Nu kakarman atumín péñker jintintiatarum tusa Kristu suramsaitji. Kame atumín emesratniun suramsachuitji.

⁹ “Ní áarmarjñjai awaktamkatajtsa wakerutmaji” tátsurpash. Núchaiti.

¹⁰ “Papru áarmarj ti kakaram áiniawai, tura juj pujak kakarmachuiti; tura etserkatniuncha nekatsui” turutainiawai.

¹¹ Wats, tuinia nuka junasha nekaawarti. Yajá pujakur kakaram áajinia núñsrik atumjai pujakriña kakaram túrattaji.

¹² “Wiki imiá péñkeraitjai” tuinia nujaj méteketji tátsuji. Ní shuaraitji tátsuji. Warí, niisha imia niñki nekampamainiawai. Tura ní aj íisar “nu nankaamas péñkeraitjai” tu wéenawai. Nuna túruiniak netse túruiniawai.

¹³ Antsu iikia, ii nekamatin jeajnia nú nankaamas waantu ajaschattaji. Ii takasatjínia nuj Yus Niñki jintinramji. Nu arant wéatsji. Kame atumín takastinian Yus tsankatramkaitji.

¹⁴ Tuma asamtai, tájinia nu Yus tsankatramka nú iniañkas túratsji. Warí, iisha emka Kristu chichamejaj atumín jeachmakaj. “Emka jeamji” tájinia nu áñtrar tátsuji. Kame Yus tsankatramakrin jeamji.

¹⁵ Chíkich takasmanum iikia waantu enentáimtumasar, “ii takatñti” tátsuji. Antsu yamá enentáimtarmana nú nankaamas Yus enentáimtustarum tusan wakeraji. Nu túrakrumninkia atumín tuke takasminiaitji.

¹⁶ Nuyasha chíkich takaana nuj takatsuk átum pujarmena nú arant pujuinia nusha Yus-Chicham ujaktaj tusar wakeraji. Nu túrar chíkich shuar takasma “íñiuiti” tíchattaji.

¹⁷ Tura péñker enentáimtumastaj tusa wakerakka, Yúsñitjai tusa péñker enentáimtumasti.

¹⁸ Warí, niñki “péñkeraitjai” tumamna nuka anturkachminiaiti. Antsu Uunt “péñkeraiti” tana nú shuar nekas péñkeraiti.

11

Ántar etserniun Papru áujmateawai

1 Waurua núnisnak chichastatjana nu anturtukaintrumeash. Ee, anturtuktarum tusan seajrume.

2 Atumniasha Kristunak anajmamtikrajrume. Tura nuwá chíkich áishmañkan nékatsuk ni áishrijáink' nuatnaiya núnisrumek átum chíkicha chichame umirtsuk aya ni chichamenk' umiakrumin Kristuí ejetaj tusan wakerajrume. Nuna túrataj tusan atumin akasmataj rume. Nu akasmaktinian Yus surusuiti.

3 Túrasha íwianch ni nekatairijjai emka nuwá Epan anañkamia nútiksañ atumniasha Yusa jintiyyá awajimtikramar Kristu aneashtinian enentáimtikramprarmatai anañkamu ajrum tusan tsuutajrume.

4 Warí, chíkich shuar Jesusnan nusháa étserkamujai táiniakuisha péñker ántarme. Tura nusháa wakan achikiam, nusháa chichamjai uwempramniati tu etserainiakuisha, nekasapitia tárume.

5 Kame “Yúsnumiá akatramu asar etserkatin imiá nékaitji” tuinia nujai nankaamas nékaitjai, tu enentáimjai.

6 Ti péñker chichastinian nékachiatnak winia nekaatairsha taamtui. Núnaka ii túramurijjai tuke paant iniakmaji.

7 “Akirkata” tútsuk Yus-Chichaman atumin ujakmajrumna nuj ztunáa túrajak? Átum ankant ajastarum tusan wikia péechach ajasu asan, “etserkamunam akirkata” tíchamjarne.

8 Antsu atumin yáintaj tusan pujakun chíkich Yus-shuarnumiá kuítian suruiniakui achikmiajai. Nuna túran ni kuítrín emeentukmiajai.

9 Tura atumjai pujusan atumaknasha atumniaka seachjarne. Masetúnianmayá Yus-shuar taar, wi atsummiajna nuna surusarmiayi. Nu tuma asantai tájarne, seachjarne tura seashtatjarne.

10 Ashí Akaya nunkanam nuna ujaktinian suritrukchartatui. Nuna tákun Kristu nekasrijjai tajai.

11 ¿Urukamtai nuna taja? ¿Atumin aneachu asanak taja? Atsá. Anejrumna nuna Yus nékawai.

12 Túrasha wi túrajna nuna tuke turu wétatjai. “Papru túrana núnisrik túrají” tuinia nuna tíarain tusan túrattajai.

13 Warí, niisha Yúsnumiá akatrachma áiniawai. Anañkartin áiniawai. “Kristu akatramurintji” tumá átaj tusar wekainiawai.

14 Nusha urukaku túmait tíchamniati. Warí, imia Satanáskesha “nayaimpinmayá akatramuitjai” tumá átaj tusa wekaatsuk.

15 Nuñkia imia ni suntarjsha péñkeran túrawai tumá atai tusar wekasachartinkiait; túrasha ni amuamurinkia tunáa túriarma nujai métek nekapmá asutiátin átatui.

Papru wátsamia nu

16 Ataksha tájarne “wáurkaiti” tu enentáimtursacharti. Kame “wáurkaiti” tu enentáimturiumek, chichastin tsañkatruktratum. Ishichik waantu enentáimtumastaj tusan wakerajai.

17 Tura waantu enentáimtumastaj tájana nu, Uunta tsañkatramurijjai tátsujai. Antsu waurka núnisnak chichaajai.

18 Untsurí ju nunkanam uunt ajasar ti waantu enentáimtumainiakui wisha ishichik waantu enentáimtumastatjai.

19 Imiá nékayatrum waurka ainia nu shiir enentáimtusrum ánturearme.

20 Niisha atumin takamtikramainiakuisha, kasartamainiakuisha, atumí nérenniurj ajainiakuisha, yajauch chichartamainiakuisha, yapimin awattamainiakuisha ashí nu katsuntearme.

21 Natsamayatnak tájarne jikia nu túratin kakarmachuuji! Wats, niisha araanainiatsna nuna wisha araantatsjai. (Waurka núnisnak chichaajai.)

22 Niisha Ipríu-shuar áiniakuisha wisha núnisnak Ipríu-shuaraitjai. Israer-shuar áiniakuisha wisha núnisnak Israer-shuaraitjai. Apraáma weeatrj áiniakuisha pai, wisha núnisnak.

23 Kristu takarniurintji, tuiniawai. Wikia aujai nankaamasaitjai. Kame nuna tákun waurka núnisnak chichaajai. Kame nijjai nankaamas takasuitjai; nijjai nankaamas asutiámuitjai; nijjai nankaamas sepunam enkeamuitjai; ti núkap jániñkiamjai.

24 Israer-shuar chíkichkí achirkacharmai. Antsu tímiajni senku jea achirkarmai. Tura emka achirkarmia nuj awa-awatatkuja trainta nuiwi ejeyarmiayi. Tura nu tímiajni senku jea achirkarmia nujsha nútiksañ nujai métek awatturarmiayi.

²⁵ Numijijai menaintiú awatturarmai. Kayajajsha mantuatai tusar chikichkí tukurarmai, kanusha menaintiú wayamai wi enkempran wekaimiaj nuj. Tura nayaantsanam ajapén chikichik kashi nuj pujusan tsawarmajai tura nu tsawantcha tuke pujusmajai.

²⁶ Ti nukap wekasaitjai. Tura entsá wekasan tsúmainian wáinkiaitjai. Tura kasa shuarjajsha, wíi shuarjajsha tura yajaya shuarjajsha tsúmainian wáinkiaitjai. Péprunmasha, kampuniunmasha, nayaantsanmasha tsúmainian wáinkiaitjai. Wait Yus-shuarsha yajauch awajtustaj tusar wakeriarmai.

²⁷ Itiurchatnasha ti wáinkiaitjai; takatnasha ti takasuitjai. Ti untsurj kánusuk pujusuitjai. Tsukamaknasha, kitiamaknasha wáitsaitjai. Ti ijiaimaitjai. Pushir táasmatai tsetsekrú wáitsaitjai.

²⁸ Tura nuna nankaamas, kaarka kijin júkitniua núnisnak Yus-shuar pénger wekaini-awash tusan ashí tsawant ti enentáimsan pujajai.

²⁹ Chikichik Yus-shuar kakarmachu pujakuí wisha kakarmachu nekapeajai. Shuar chikichan tunaanum ajawarmatainkia wisha natsamakon kajekan wáitajai.

³⁰ Maa, waantu chichastin ákuinǵkia, antsu winia kakarmachu awajtuinia nuna ujakan waantu ajasaintjai.

³¹ Yus, ii Uuntrj Jesukristu Aparj ana nu (ni naarj tuke shiir awajsamu ati) wi wáitratsjana nuna nékawai.

³² Tamasku péprunam pujaj nu nunǵkanmaya akupin winia jinkia juruktiaj tusa wakerak pepu tanish téntakma wáitirj in suntaran apujusamiayi. Aretas uunt kapitian pujaj túramiayi.

³³ Túrasha uunt chankinnium enketawar pepu aa tanishrj áanǵkamunam jiki itiararmi-ayi. Tu uwempramijai.

12

Papru wáinkiamia nu

¹ Kame wiki shiir chicharmamsatniun nakitiajai. Túmayatnak íimiarjana nuna tura uunt Yus iniaktursamia nuna ujaktiniaitjarme.

² Kristun umirin ana nú áishmanǵkan nékajai. Nu áishman jimiara nayaimpin nanǵkaikin menaintiú nayaimpiniam junakniuiti. Nusha katurse uwí nankaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai.

³ Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai.

⁴ Yus-shuara wakaní shiir pujutainium junakmiayi. Nujsa paant awajsachmin ana nuna antukmiayi. Nii antukmia nú chicham paant awajsatniun suritkiamuiti.

⁵ Nu áishmanǵka túrunamurj nanǵkaamakuiti tajai. Tura wikia nanǵkaamakuitjai túmamtsuk, kakarmachuitjiana nuna paant ujaajai.

⁶ Nanǵkaamakuitjai túmamtiaj tusan wakeraknaka nekas tímianiaitjai, ántan tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujaj métek enentáimursatarum tusan wakerajai.

⁷ Wi nayaimpiniam wáinkiamajna nu timia pénger asamtai ántar waantu enentáimtaschatniun, janǵki mesertinia núnisan winia ayashruj najaimiatniun sunasmiajai. Nuka wi wáitsatin Satanásnumia akupkamuiti.

⁸ Nuka jurutkia tusan Úuntan menaintiú seamjai.

⁹ Tuma ain Uunt winia turutmiayi “Atsá. Jaa pujayatmek winia waitnenkartutairjai shiir pujame. Shuar kakarmachun winia kakarmarun Wi suakuí ashí aents nu shuara ayashjin winia kakarmarun wáiniainiawai.” Tuma asamtai, Kristu kakarmarj winia ayashruj paant ati tusan kakarmachuitiatnak araantatsjai.

¹⁰ Tuma asamtai, wi Kristun aneakuí shuar katsekruiakuisha, kajertuiniakuisha, winia kuítrusha, kakarmarsha atsajin waraajai. Kame ashí itiuurchat ana nuj kakarmachuitiatnak kakaram nekapeajai.

¹¹ Wi “pénkeraitjai” túmamkun waurua núnisnak chichaaajai. Tura atumsha winia pénger chichartusminiaitiatrumek, túrachu asakrumin tu chichasjai. Warí, wi penǵké ántraitiatnak, “ti pénger akatramuitji” tumamainia nú nunǵkaachichuitjai.

¹² Atumjai pujumiaj nuj, itiuurchat ámanmanǵ katsuntran takasmiajai. Yuska ni kakarmarj iniaimastaj tusa ti uuntan aents tujintiamun túratniun surusmiayi. Nujaj “Papru nekas winia akatramuruiti” tusa paant iniaikmasmiayi.

¹³ Warí, chikich Yus-shuaran yáinǵmiaj núnisnak atumniasha yáinǵmajrume. Áyatik atumin “kuit surusta” tíchamjarme. ¡Nu yajauchiitkuinǵkia tsanǵkurturtarum!

Papru atak tátinrj in ujakmiania nu

¹⁴ Jújainǵkia menaintiú iwiarnarjai atumin íistaj tusan. Tura jeaknaka, “etserkamun akirkatarum” tíchattajrume. Atumí kuítrj in wakeratsjai. Antsu atumin wakerajrume. Warí,

winia uchirchakaitrum. Uchisha aparín kuítian ikiauntukchatniuiti. Antsu aparí ni uchirín kuítian ikiauntuktiniaiti.

¹⁵ Atumniasha yáintaj tusan ashí takakjana juna ajapawaintjai, tura winia kakarmar-nasha ashí emenkáakaintjai. Wi ti wakeramaitiatrum átumka ishichik wakerutarminín túrawaintjai.

¹⁶ Túrasha chíkich shuar chichainiak “Nekasaiti; Papru níñki ii kuítrín juruttramkichmaji. Túrasha anan̄kartuatniun neka asa in anan̄kramachmiashia” turutainiatsuk.

¹⁷ ¿Nusha itíura? ¿Shuáran wi akupkamaj nujai kuítrumin achikjak?

¹⁸ Atumin íirmasat tusan Titíun “wetá” tímiajai. Tura nin atampřit tusan chíkich Yus-shuaran akupkamjai. ¿Titíusha kuítrumin juruttramkimkiarum? ¿Wisha niisha mai metek enentáimsar métek takaschamkaj?

¹⁹ ¿Warí enentáimsarum? ¿Átum péñker áiniawai turutik tusar nu tájik? Antsu, aneamu yatsurtiram, ii tájnia nu atumin Yúsnum ikiakártajrum tusar taji.

²⁰ Wi atumín jeaknasha, wi wáitkiataj tusan wakeraj nuna wáinkiashtatjai, tu enentáimsan itíurchat enentáimjai. Tura atumsha wakerarena núnisrumek wáinkiashtatrume, tu enentáimjai. Yajauch chicharnaikiatniuncha, yajauch enentáimtunaistinniasha, kajernaikiatniuncha, níñki enentáimtumastinniasha, tsanumpratniuncha, mái-tunai ajatniuncha, waantu enentáimtumastinniasha, yajauch wekasatniuncha, ashí nuna wáinkiashtajash tusan itíurchat enentáimjai.

²¹ Tura wi jeaknasha, átum yajauch túratniusha, tsanirmatniusha tura yajauch ti wakerarmena nu, yaunchu túriniarmena nu, untsurí shuártiram iniaisashurmena nuna nekash-tajash. Tura enentáim yapajítsuk tuke tura asakrumin úutchatjash tajai. Kame wi átum umikchamun nekaamtai Yus winia iniatsátrattawai tusan tsúumajai.

13

¹ Jujai menaintiú íistajrum tusan winiajai. Ashí iwiaratin ana nu, jimirá tura menaintiú shuara chichamejai iwiarnartatui.

² Wi atumjai pujachiatnak, atumjai pujáa núnisnak áatjarne. Yaunchu tunáa túrimiarmena nuna tura ashí shuártirmin wi nuik tímiajrumna nuna ataksha tájarne, wi atak tana tunaarum iwiareachkurminkia iniaisashatjarne.

³ Nuínkia wi Kristu kakarmaríjjai chichaaajna nu nekaattarme. Nu nekaataj tusarum wakeratsrumek. Tura Kristuka kakarmachuchiiti. Antsu atumí enentáin kakaram takaawai.

⁴ Kristu nekas kakarmachua nútkisañ krúsnum máamuitai, Yusa kakarmaríjjai iwiaakuiti. Ayashnium Kristu kakarmachu nekapmia núnisrik iikia kakarmachuitji. Túrasha Yusa kakarmaríjjai ni takatíj takaaji. Nu atumin iniakmastatji.

⁵ “Nekas Yúsan umirniushaitaj” tusarum nekamatarum. Íimiastarum. Ántar Yus-shuarchaitkiurmeka Jesukrístu atumí enentáin pujurtama nu nekaattarme.

⁶ Tura iikia ántar Yus-shuarchaitji nu nekaatarum tusan wakerajai.

⁷ Tura átum tunáa túrawájrurum tusar Yus seaji. Aents in péñker enentáimtikramprat tusar tátsuji. “Ántar áiniawai” túrampriniñ, átum péñker wekasatarum tusar wakerajai.

⁸ Warí, Yusa nekas chichame emesratin tujintiaji. Antsu ii túrajnia nu Yusa nekas chichamejai túrajai.

⁹ Tuma asamtai, átum kakarmaitkiurminkia iikia kakarmachuitiatar shiir enentáimjai. Atumsha nekas kakaram ajasúk tusar Yus tuke seaji.

¹⁰ Atumin emesratin Yuska winia akuptatsui. Antsu Yus akuptukuiti atumin iki-akártinian. Tuma asamtai, wi atumín jeaknaka kakaram chicharkajjrum tusan winítsuk ju papin áatjarne.

Amikmaawai

¹¹ Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramparti. Chikichík enentáik enentáimsatarum. Shiir awajnaisarum pujustarum. Tura Yus anenmarmena nu, shiir enentáimtikramna nu atumjai pujurtamsattarme.

¹² Yúsnum shiir enentáimtunaisrum amikmaanaisarum.

¹³ Ashí Yus-shuar ainia nu amikmaatmarme.

¹⁴ Uunt Jesukrístu waitnenkartutairí, Yusa anenkraattairísha atumín pujurtamsati. Tura Yusa Wakanísha tuke nemartamsarti. Nu atí.

Papru **KARASEANMAYA SHUARAN** **Papí aar akuptukma**

Karaseamaya Yus-shuaran Papru áatramiania nu

¹ Wi Pápruitjai, Yus akatramu. Yúsak winia akatturuuti. Shuarka akatturchamai. Yussha chíkich shuáran akupturak akatturchamai, antsu Nunki, Yus Apa, Jesusan jakamunmaya iniantkimia nu, tura Jesussha winia akatturarmai Yusa shiir chichamen etserkatniun.

² Wisha, ashí Yus-shuar wijíají pujuinia nusha, jú papí akupeaji. Ashí Yus-shuar Karasea nunkanam pujarmena nu áusatarum tusan jú papín akuptajrume.

³ Yus Apa tura ii Uuntrj Jesukristusha waitnentramainia ásar yainmakarti imiatkinchanum tuke shiir pujustinian.

⁴ Yus ii Aparí nuna wakera asamtai, Jesus ni ayashín surumak wáitsamiayi ii tunaarí asakártinian. Nuna tura ashí tunáa jú nunkanam ana nuyá ankant awajtamsatai tusa in yáinmaji.

⁵ Tuma asamtai tuke Yus shiir atí. Ayu.

Chíkich uwempratin chichamka atsawai

⁶ Maa, nekasaash timiá wárik Yus ikiukmiarum. Kristu in ti anenma asamtai Yus ni shuarí ajastinian in anaitiamkamji. Urukamtaitasuk nuikia imiá wárik ni chichame inaisamarum nusháa chicham umikrum uwemprataj tusarum.

⁷ Wátsek, nekas chíkich chicham penké atsawai shuar umikiar uwempratin. Antsu yajaya shuar atumúní tar pépkercha awajtamainiawai. Tura nusháa chichaman etserkar Yusa shiir chichamen yapajilatniun wakeruinaiwai.

⁸ Tuma asamtai Yus nin yajauchiniam yumínkrattawai. Wisha Yus-Chicham yapajámun etserkamtaínkia Yus winia yumínkrurtatui. Nayaimpinmaya suntarsha nusháa chichaman wi etserkachmaj nuna étserkuínkia nunsha yumínkrattawai.

⁹ Paant ujakjarme túmaitiatnak ataksha ujaajrume: Nánkamas shuar niisháa uwempratin chichaman, wi etserkachmaj nuna étserkuínkia Yus yumínkrattawai.

¹⁰ Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

Papru júnis Yus akatramu ajasmiai

¹¹ Antsu nekaatarum, yatsuru. Uwempratin chichaman wi étserjana nuka áentsnumianchuiti.

¹² Aentska ujakkachmai. Unuitiutnasha unuitiurchamai. Antsu Jesukristuk winia paant jintintruamai.

¹³ Tura wi yáunchu ti yajauchin túramiaj nuka antukchakaitrum. Israer-shuar Yúsnan takainia nútiksanak wisha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme.

¹⁴ Tura kakaram ajasan, ii uuntrj yaunchu tiarmia nuna yawetsuk umiktinian ti enentáimpramjai. Tura untsurí shuaran wijíají métek uunt armia nuna nankaamas Yúsnan takasmajai. Túmaitiatan aya winia únuntron chichamen ti umirmiuyajai.

¹⁵ Túrasha wikia akiintsajín Yus winia achirkamiayi, tura ti anenkratmaríjjají winia anaitiukmiayi.

¹⁶ Nuikia shiir enentáimiuk ni Uchirín paant nekamtikruamai. Tura Israer-shuaranchanum ni shiir chichamen etserkat tusa akuptukmiayi. Tuma asamtai chíkich shuaran aniaschamjai.

¹⁷ Uunt péprunmasha, Jerusarénumka, wéchamjai winí emkaru Yus akatramujají chichastinian. Antsu wárik Arapia nunkanam wémajai. Tura nuí Yúsán enentáimtasuan atak Tamasku péprunam waketkimjai.

¹⁸ Tura menaintiú wí nankaasmatai, nuyá Pítrujají áujmattsataj tusan Jerusarénum jeamjai. Tura jimiará semanachik pujusmajai Pítrujají.

¹⁹ Tura Jakupuncha, ii Uuntrj Jesusa yachia nuna, wáinkiamjai. Nú arantka chikichnaka Yus akatramunka wáinkiachmajai.

²⁰ Yus iiruí. Wí tájana nu nekasaiti, wáitchaiti.

²¹ Nú ukunmasha Siria nunkanmasha, Sirisia nunkanmasha wémajai.

²² Tuma asamtai ashí Yus-shuar Jutía nunkanam pujuarmia nu winia nekaracharmai.

²³ Aya antukarmai. “Yaunchu in ti áinrammiaj nu yamaikia Yus-Chichaman étseruk wekaawai. Yáunchuka in amutmaktinian wakeriniaiat yamaikia iniaisaiti” tiarmai.

²⁴ Túrawar winia enentáimtursar Yúsan shiir yumiñsarmai.

2

Chíkich Yus akatramu Paprun shiir enentáimtuiniawai

¹ Tura katurse uwí nankaamasmatai wisha Pírnápíjiaí Jerusarénnun wémaji. Titiuncha jukimjai wíjiaí.

² Yus akupta asamtai Jerusarénnun wémaji. Tura nuí jean aya Yus-shuara úuntriíjiaí áujmattsamjai. “Júnisnak ashí Israer-shuarchan Yus-Chichaman ujainiajai” tímiajai. Takas-majna nusha tura tuke takastin enentáimjiana nusha ántar aín tusan tu áujmattsamjai.

³ Niisha Yus-shuara úuntriíntiat itiuarchat enentáimpracharmai. Antsu chíkich shuarka Titiu Israer-shuarchaitiat wíjiaí pujakui niisha Israer-shuar ajastí tusa tsupimiamtikiatniun wakeriarmai. Túrusha tujinkiarmai.

⁴ Tura nu shuar ántar yachi ániak antuktai tusar wayawarmai. Tura ii chichamen antukar itiuarchat awájtámsatai tusar wakeriarmai. Iis, Kristu Jesus in uwemtikrampra asamtai ti shiir iisha Yus yúpichuch umíaji. Tura nuna nekaawar, atakka, aya yáunchu akupkamu itiuarchat ana nuíjiaí uwemtikrampratniun wakerutnakarmaji.

⁵ Túrusha penké ishichkisha umikchamji. Antsu atumíin Yus-Chicham yapajniátsuk métek jeartamat tusar ni chichame penké anturkachmaji.

⁶ Nu arantsha Yus akatramu uuntriínia yamaram túratniunka suruscharmaji. Nincha ashí aents ti neka ainiaawai tu enentáimtuiniawai. Kame nu shuar ti nékainiakuisa ti enentáimtatsjai. Yus ashí shuaran mash métek iyatsuk.

⁷ Yus akatramu uuntriísha Yus winia Israer-shuarchan Yus-chicham ujaktinian akup-tukma nuna nekarawarmai. Tura Pítruncha akupkamai Israer-shuaran Yus-Chicham ujaktinian.

⁸ Pítrun Israer-shuaranum akupkama nú Yusak winiasha akuptukmai Israer-shuarchanum.

⁹ Tuma asamtai Jakupusha, Pítrusha, Juañsha, Yus akatramu uuntrií ásar, Yus winia ti paant akuptan nekaawar, winiasha Pírnápínsha, “Ayu, átum, Israer-shuarchanum Yus-Chicham etserkatarum, tiarmai. Iisha Israer-shuaranum Yus-Chicham etserkattaji” tiarmai. Túrawarmatai shiir áujnaisar ii uwejejaí achirnaikiamji métek enentáimji tusar¹.

¹⁰ Áyatik “Kuítrincha enentáimtusrum tuke yáigtarum” tiarmai. Wisha núnaka ti wakerakun tuke túriniaitjai.

Papru Pítrun chicharkamaji

¹¹ Tura nú ukunam wi Antiukía péprunam pujainí Pítiur tamai. Tura nuí yajauch túramtai, Yus-shuara úuntriíniak chicharkamjai.

¹² Iis, Israer-shuar tuiniawai, “Israer-shuarcha Muisais timia núnisan tsupirnakcha asamtai, nu shuarjiaí yurumáshtiniaiti” tuiniawai. Túmaitiat Pítiur yurumámnian nékaí, emka Sántiak shuar táatsajin Israer-shuarachajai yurumámai. Tura nuyá Sántiak shuar Jerusarénnunimí Antiukíanam jeawarmatai Pítiur ashamak tsupirnakcha shuarnumia kanakin yurumáchmai. “Tsupirnaktiniaitme” tiniu ainia nuna ashamak túramai.

¹³ Tuma asamtai chíkich Yus-shuar, Israer-shuar armia nu, Pítrujiaí métek emka yurumáwaru ániayat jímíará enentai takusar ukunam iniaisarmai. Pírnápísha neka áyat nútiksaj nupetnakmai.

¹⁴ Tura nuna ísan ashí ímiainiaíin Pítrun chicharkamjai. Yus Shiir Chicham tana nuíjiaí métek wekasachu ásamatai tímiajai “Ame Israer-shuaraitiatam Israer-shuarti ikiukim tsupirnakchajai yurumám Israer-shuaracha áintsamek túrame, tímiajai. Nuikia “Israer-shuaracha Israer-shuaritijiaí métek wekasatin áiniawai” tíip” tímiajai.

Israer-shuarsha Israer-shuarchasha mai métek Yúsan enentáimtursar uwemprattatui

¹⁵ Íikia nekas Israer-shuaraitji. Israer-shuarcha, tuná ainia ániuchuitji.

¹⁶ Túmaitiatar ju nékaji. Akupkamu umíamujiaí uwemprachminiaitji antsu Jesukrístu nekas enentáimtakum uwemprattame. Nu nekaar iisha Jesukrístu nekas enentáimtusmaji tunaajainchu atai tusar. Aya Kristu nekas enentáimtursar pénger átatji. Akupkamu takasar umirkarsha tuke nuíjiaí pénger ajaschattaji. Akupkamunka shuar umiktaj táyat, chikichkí shuarkesha nuíjiaí pénger ajaschamniaiti. Nu nekaar antsu Jesukrístu nekas enentáimtusmaji pénger ajastai tusar.

¹⁷ Tura Israer-shuar enentáimprashimpiash, “Wátsek, núnisaitkiuñkia wisha Kóstun enentáimtustaj tákunka, emka tuná shuaraitjai tu enentáimtustastiniaitjai” tíchanpiash.

Nuka nekasaiti tura nuyá “Nu asamtai Kristu winia tunáa shuaran najataiti” penké tu enentáimprashiniaiti.

¹⁸ Antsu yaunchu, wí túrashtiniaitjai tímiaj nuna awainkin túratniuitjai tákunka nuikia nekas tunaitjai.

¹⁹ Iista, akupeamun umiktaj tukaman penké tujinkiamjai. Umiktinian tujinkian jaka ántsanak ajasmajai akupeamunam. Antsu Yusjaj iwiaaku pujajai ni wakera nuna umiktinian.

²⁰ Wisha Krístujaj krúsnum jákaitjai. Tuma asamtai yamaikia wikia iwiaaksujaj wi wakeraj nuna túratniun antsu Kristu winí iwiaakui ni wakera nuna túratniun. Tura ju ayashniun pujayatan aya Kristu enentáimtakun iwiaakjai. Krístusha Yusa Uchiríntiat winia ti anentuk jarutkamiayi.

²¹ Yus ti péñker asamtai ituirak “Kristu ántar jakamiayi” títaj. Iis, aya akupkamun umirkan péñker ajasminiaitkiuñkia, nuikia Kristu ántar jákaayi.

3

Yus akupkamu tura Yus enentáimtustin

¹ ¿Warin aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsnum máamun ti paant étserkun atumin iniaktuschkamkajrum?

² Wátsek, aniastatjarne, enentáimpratarum. ¿Warijajin Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusurum ni Wakaní achikchamkuram?

³ ¿Tuke nétskaitrum. Yusa Wakaní emka atumí enentáin wayá takasmatai atumek yamaikia nu takat aya ayashí kakarmarjijaj umiktin enentáimprarmek.

⁴ Penké ántarmek wáitsamarum tura antsu ishichkisha unuimiarchamkarum?

⁵ Naka enentáimpratarum. Yus ni Wakanin súrantsuk tura aents túrachminian atumün ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túrait.

⁶ Yaunchu ii uuntri Apraám enentáimpratai. Yus-Chicham nin tawai:

“Apraám Yúsan enentáimtusmatai Yus “Ayu, péñkeraitme” tímiayi” tawai.

⁷ Iis, nujaj páantchakait. Ashí shuar Yúsan enentáimtuinia nuka Apraámjaj métek enentáimpraru ásar, ni uchirjá ántsan ajasaru ániawai.

⁸ Yamái páantaiti. Yus ashí Israer-shuarchancha tawai “Aya winia enentáimtursarum péñker átratume”. Israer-shuarchasha nujaj péñker ajastinia nuna ti yaunchu neka asa, Apraáman ujakmiayi,

“Ámijaj ashí aents ti shiir ajasartatui.”

Tu ujakmiayi.

⁹ Tuma asamtai ashí shuar Yúsan enentáimtuinia nuke Apraámjaj métek péñker ajasar shiir warasartatui.

¹⁰ Antsu ashí shuar “akupkamun umirkan uwemprattajai” tuinia nuka yajauchiniam yuminkramu ániawai. Yus-Papinium áarchamukait

“Ashí shuar Yus akupkamun ashí aarma nuna takamtsuk umirkachka yajauchiniam yuminkramu ániawai.” Tu áarmaiti.

¹¹ Nújajinikia páantaiti. Akupkamu umirkatniujaj péñker ajaschamniaiiti Yusjaj, antsu aya Yus enentáimtusam péñker ajasam uwemprattame.

¹² Shuar akupkamu umirkatniun enentáimna nuka aya nujaj péñker ajastinian enentáimiui; Yúsan enentáimtak péñker ajastinian enentáimtsui.

¹³ Tura Kristu yamaikia uwemtikrampramji. Akupkamun umirkachu yuminkramuiti tana nuka in túramtsuji. Antsu Kristu in yainmaktin krúsnum jaka yuminkramu ajasmiayi. Kame áarmaiti:

Shuar jakati tusa numiniam nenasma yuminkramuiti.

¹⁴ Tuma asamtai Jesukrístu jakamujaj ashí Israer-shuarchasha Apraámjaj métek péñker shiir warasartatui. Iisha núnisrik nu shuarjaj Yusa Wakaní, Yus akupkataj tímia nusha, achiktatjai Yus enentáimtusar.

Yus akupkamu tura Yus túratnana nu anajmarma

¹⁵⁻¹⁶ Iis, yatsuru, Yus Apraáman Chichaman najana anajmatuk,

“Ámijaj tura amée weeá akiinkiatnana nujajsha ashí aents ti shiir ajasartatui” tímiayi.

Kame “amée weeá akiinkiatnana nujaj” tíchamiayi, antsu “akiintiatta nujaj” tímiayi. Nuna taku chikichik átnia nuna enentáimpramiayi. Nusha Krístuiti. Aentstisha enentáimpratai. Shuar chichaman najana tura papinium aar nuyá ni naarj apujas nuikia nekas yapajítsuk umiktiniaiti. Umitsuk iniaisachminiaiti. Patattasha patattsachminiaiti.

17 Wátsek, Yus núnisan Chichaman Apráámjají najana, ukunam umitsuk iniaiasachmini-aiti. Tura Chichaman najanamia nú ukunam, kuaru siañtu nuyá trainta (430) uwi nankaasmatai, Yus ni akupkamurjín Muisaisan susamiayi. Túramaitiatí nujají Yusa yaunchu Chichamen yapajjáächmiayi iniaiasatniun.

18 Tuma asamtai Yus timia nuka tuke uminkiattawai, Yus yaunchu Apráámjají Chichaman najana asamtai. Nújajínkia páantaiti, péñker ajastajtsar akupkamu umirikria shiir pujuschartatji antsu Yus timia nujají iikia takatsuk shiir pujustatji. Nuna tsanekatkamiayi Yus Apráámjají Chichaman najaneak.

19 “¿Nuikia Yus urukamtai akupkamun susamia?” tíchaintmeash. Ayu, Apráám weean, Kristu táatsajín Yus timia nu uminkiachminiuyayi. Tuma asamtai níi táatsajín ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntarj jü akupkamun ashí iwiarar Muisaisan susar akatramiayi Israer-shuaran susárti tusar.

20 Antsu chikichik shuar níñki takastinian enentáimkiunka chikichan atsumatsui. Tura Yus aya chikichkiiti. Níñki chikichan akattsuk ashí aentsun Apráámjají péñker awajsatniun Apráama anajmatar níjjají Chichaman najanamiayi.

Yus akupkamu itiuirkátin

21 “¿Tura Yus jimiará chichamjají chichaawak, tíchaintmeash. Emka Apráaman “Jujají uwemprattame” tíchamkia, nuyá Muisaisan ni akupkamurjín túsachmakia?” tíchaintmeash. Tura áintsachuiiti. Nekaata, akupkamu umirkatniujají Yusjají tuke péñker pujusminiaitki-umka nuyá aya akupkamujají uwempram tunaajajínchu ajasaintme.

22 Tura Yus-Chicham paant “Ashí tunáa áiniawai” tawai. Nu asamtai yamaikia ashí Jesukristu enentáimtuinia nú shuar, aya Yus timiá asamtai, uwempratatuí.

23 Tura Kristu táatsajín Nin enentáimtusachamniauyayi. Tuma asamtai Nii táatsajín akupkamuka in emettama pujurtamjijí aya akupkamu tana nu umirkatin. Tura ukunam jü nekanayi: Kristu enentáimtusar uwempratniuitji.

24 Akupkamu, nuika, in waitmakmaji uchin kuírchin wainnia áintsajín. Kristu tatí tusa waitmakmaji. Tura Kristu támatai ashí nekas Nin enentáimtuinia nuka Yúsají péñker áiniawai.

25 Yamái Kristu nekas enentáimtustiniaiti tuma asamtai yamaikia akupkamu kuirchia áintsajín wáitmatsji.

26 Antsu Jesukristu enentáimtusar, nujají Yusa uchirj úuntmaru ajasuitji.

27 Ashí Kristu náarjín imiaimiutirmeka Kristu áintsajín ajasuitrumé.

28 Jesukristujají tsaniñkiu asarí imiá métek aji. Israer-shuar, Israer-shuaracha, ankant ainia nu, ankantcha ainia nu, áishman, nuwá, ashí mash Jesukristunuitkiunkia yamaikia “níshaaiti” tu enentáimprashiniaiti. Ni shuarj mash chikichik áiniaji.

29 Tura Kristunuitkiurmeka Apráám weeá áintsajín ajasurme atumsha. Tuma asarum, Yus Apráaman anajmatramia nu atumsha jurumkitniuitrumé.

4

1 Kuítrinniu uchirj ashí ni aparj takakna nuna niiniu áhattawak ukunam. Tura uchichitkiunka ni aparj takarniurjya núkete.

2 Tuke uunt ajatsuk ni wáinnia nuna umirkatniuiti. Tura uunt ajasmatai tura ni aparj “Ayu” takui nuyá níi antsu ni aparjñiu ashí wáinkiatniuiti.

3 Núnisrik iisha úchichik asarkia ashí aentsu akupkamurj umirkatniují.

4 Tura tsawant jeamtai, Yus ni Uchirjín akupkamiayi jü nuñkanam. Niisha Yúsaitiat nuwanam akiiniamiayi. Tura aents ajasmiayi. Tura aents ajas yaunchu akupkamuncha umirkatniuyayi.

5 Nujají ashí aents akupkamun umirkatin armia nuna uwemtikrata tusa támiayi. Tura iisha yamaikia nujají ni uchirj uunt ajasminiaitji.

6 Atumsha nekas ni uchirj ajasakrumin Yus ni Uchirj Wakanjín atumi enentáin akupturmakuiti. Tura nu Wakan atumí enentáiyá Yúsán “Aparú” tawai.

7 Tuma asamtai yamaikia aya takarniuchuitme antsu Yus ni uchirjín najatmaiti ámin. Tura ni uchirjín asakmin ashí Yus takakna nuna amastatuí Kristuiyán.

Papru nu Yus-shuaran yáintinian wakerawai

8 Yaunchu átum nekas Yus nékachkuram, ántar-yus írúnna nu umirkarmme nekascha yúsak.

9 Tura yamaikia nekas Yus nékarme, kame Yus atumin nekarmarme. Núnis asamtai itiuirt-suk atak aentsu akupkamurj umirkatin enentáimprum. Nujají kakaram ajaschamniaitme tura umikmesha yainmakchattawai uwempratín.

10 Átumka jisat ti najanearme. Yaunchu jisat najanatin amia nú tsawantcha, nantusha, uwisha, jisat tuke najanearme Yus shiir enentáimtursati tusarum.

¹¹ Ashamajai, atumin ántrankeash takasmaj tusan.

¹² Yatsuru, wi atumea áintsanak ajaschamkaj; atumsha yamaikia wi wekaajna áintsarmek wekasatarum. Wi nuj pujakui ishichkisha yajauch awajtuscharmarme.

¹³ Antsu nekamarme ayashrui ititurchat pujayatan Yusa shiir chichamen emka ujakma-jrume.

¹⁴ Tura winia sunkur ti yajauch awajtajn atum winia nakitrurum mujrukchamarme, antsu Yusa suntaria áintsarmek itiamarmarme. Jesukristu anturkatniua áintsarum anturtuk-marmarme.

¹⁵ Maa, wi nekajai, nuik atumi jimi ukuinkiarum surusaarmarme, túramniaitkiurmeka. Tura shiir enentáimpramarmena nusha iturtsukait yamaisha.

¹⁶ Yamaikia nekas chichaman éterkun zatumi nemasri ajasjak?

¹⁷ Chikich yajaya taaru ti shiir awajtamainiawai tura atumin yainmaktasa áitkiarmainiatsui. Aya winiya akantamkitiai tusa wakerutmainiawai, winia antsu shiir enentáimtusar tusar.

¹⁸ Niisha nekas yainmaktinian wakerutmainiakka atumin shiir awajtamsatin tuke pénker ainti, wi atumjai pujajnsha tura pujatsajnsha.

¹⁹ Uchirú, nuwa jurertaj tana núnisnak ataksha wáitijai Kristu atumin paant atí tusan.

²⁰ Atumjai pujaknaka maak aintjai. Yamái pujaknaka nekas nusháa chichasaintjarne. Itiurkatjarmetsuk nékatsjai.

Akarsha, Sarasha jimiara Chichaman nakumainiawai

²¹ Ayu, “akupkamu umirkatniuiti” támena nu nekaata; akupkamuka júnisaiti.

²²⁻²³ Aarma awai: Apraám jimiara uchirtiniuyayi. Emka ni takarniurj jurermiayi Ismaeran. Nuyá Apraáma nuwe jurermiayi Isakan. Ismaera nukurj Apraáma takarni-urjyayi. Tura Apraám Yusan enentáimtusuk niijai kanarmatai, ni takarniurj jurermiayi. Tura antsu Isaka nukurinkia takarniurinchuyayi, antsu nekas ni nuwe áuyayi. Niisha ti úntchiniak, Yus “jurertatme” timiayi. Tuma asantai Yus timiajai Isakan jurermiayi.

²⁴ Ayu. Yamái tájana nuka Yusa Chichamen jimiaran nakumui. Ismaera nukurj Akar chikichik Chichaman nakumui. Yaunchu Senái muranam Yus ni akupkamurin áarmiyai Israer-shuar, takarniua áintsan, umirkarti tusa.

²⁵ Senái murasha Akara nunke Arapianam wajaawai. Akarsha Senái muran nakumak, ashí Israer-shuaran “Akupkamujai uwempramniaiti” tuinia nuna nakumui. Yamaisha Israer-shuara uuntrj Jerusarénnum pujuinia nuka tu chichainiawai. Tuma asantai Akarsha, ashí nu shuarsha núnisar, akupkamu umirkatin ásar, ti takarniu áintsan wáitsar takainiawai.

²⁶ Antsu ashí Yus-shuarti uwempra asar imiankas ankant pujaji. Nayaimpinmaya Jerusarénnumiá áentsuitji. Nuyá áentsti tuke ankant pujuinijai. Nuyá aents asakrin, nu yakiyá Jerusarénka ii nukuria áintsan enentáimpramniaiti.

²⁷ júnis áarmaiti:

Warasta, misurma, uchi takakchiatmek;
Ti shiir warasta, uchi najawe nékachiatmek.

Nuwa ajapamu uchin jurertatui;

Nuwa áishrinnia núnaka nankaamas uchirtin átatui.

²⁸ Iisha, yatsuru, Isaka áintsarⁱ, Yus timiajai akiiniaitji.

²⁹ Yaunchu Ismaer Isakan kajerak ititurchat awajsamiayi. Núnisan yamaisha Ismaera áintsan aya ayashnumiá ainia nú aents Yusa Wakanya akiinia nuna yajauch awajenawai.

³⁰ Tura Yus-Papinium áarmaiti:

“Takarniusha, ni uchirijai, ajapam awemata. Nekas pénker nuwa uchirijai tsanin pujuschamniaiti. Apari kuitrincha achikchamniaiti.” tawai Yus-Papi.

³¹ Ayu, yatsuru, nekaatarum. Takarniu uchirinchuitji antsu ankant pujaji nekas pénker nuwa uchiri asarⁱ.

5

Yusjai tuke ankant atarum

¹ Kristu uwemtikrampramiayi tuke ankant átinian. Tuma asantai kakaram ajasam tuke ankant pujustá. Ataksha nu ititurchatnum waketkip.

² Wi Papru asan ujaajrume. Átum Muisais timia núnisrumek tsupirnakrumninkia zKristu nuikia warí itiurtamkamniat?

³ Ataksha tájarne, ashí tsupirnakua nu shuar ashí Muisais timia nuna takamtsuk umirkatniuiti.

⁴ Atum “Akupkamu umiakmin Yus shiir enentáimturmastatui” tárumna nu, nu shuartiram Kristuiyá tupanniuitrume. Yusa anenkrattairjya kanakniurme.

⁵ Iikia, antsu, Yusa Wakanjijai tura Yus enentáimtakrin Yus shiir enentáimturmastatji, tu enentáimji.

⁶ Nekas Krístunuitkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

⁷ Atumsha Krístujai péñker wekaimiarme. ¿Urukantai nekas Yus timia nu iniaisatin enentáimprum ataksha akupkamunam waketkitin?

⁸ Nú enentai Yúsaiyanchuiti. Niijjai wekasatniunka Yus achirmakuitrume.

⁹ Ju enentáimpratarum: Karia ishichik yuminnium enketam mash' karimtiktsuk. An-eartarum atumsha.

¹⁰ Ayu, Yus yáinmakrumin wi tájana nu nusháa enentáimprashtatrume, nékajai. Tura atumin yajauch áujmatramainia nuna Yus asutiáttawai páchitsuk.

¹¹ Wíkia, yatsuru, yamaisha “tsupirnaktiniaiti” tuke tákuñkia Israer-shuar yajauch awajtsucharainti. Antsu Kristu jakamun étsereatnak “tsupirnaktiniaiti” tákuñkia kajer-tukharainti.

¹² Atumin yajauch awajtamsatin wakeruiniana nú shuar antsu niñki tsupimiakar yajauch awajmamsarti.

¹³ Atumniasha, yatsuru, Kristu tuke ankant awajtamsarme. Tura ankant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktarum.

¹⁴ Ju chichamjai ashí akupkamu mash uminkiatstawai: Ame ayashim aneamna áintsamek chikich shuarsha aneata.

¹⁵ Tura aneartarum. Aneniachkurmeka, antsu esanaairum mai yunai ajakrumka nuámtak amunaiktatrum.

Ayash wakeramu tura Yusa Wakanj wakeramu

¹⁶ Juna tájarme: Atumí ayashj wakerana nu umikjajj tusarum Yusa Wakanj kakarmarijjai wekasatarum.

¹⁷ Yusa Wakanj wakera nuna ame ayashim nakitiawai. Tura ame ayashim wakerana núnaka Yusa Wakanj nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait.

¹⁸ Tura Yusa Wakanj jintinramkuñkia, aentsu akupkamurijjai itit áchattame.

¹⁹ Wats, ayash túramu ti paant áiniawai. Ju áiniawai: tsanirmatin, wapik túratin, yajauch túratin,

²⁰ ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, wari kajektin, nankaamantu enentáimtumastin, aya niisháa niisháa enentáimsartin, níniunak íistin,

²¹ yajauch enentáimtunaistin, mañkartuatin, nampektin, nampernum aya ti yurumin, tura ti nampen átin. Chikich nujai métek áiniawai. Nuik ujakmajrumna núnisnak ataksha tájarme: Shuar nuna túrakka Yusaj pujustinian penké tujinkiattawai.

²² Ayu, yamaikia Yusa Wakanj kakarmarijjai túratin enentáimsatai. Yusa Wakanj ii enentáin pujak, péñker túratniun nerektinia áintsan neremtikramji. Ju áiniawai: aneatin, shiir enentáimsatin, Yusjai tura shuarjai nawamnaikiar wekasatin, shiir enentáijjai katsun-tratin, chikich shuar shiir awajsatin, tsanika átin, tana nuna túmiatrusan umiktin,

²³ péejchach ajastin, iik íimiasar tunáa túrashtin. ¿Ju túratniuncha yaki surimia?

²⁴ Shuar Jesukrístunu ainia nu, ni ayashj wakeramurjncha tura nunisan ni túramurjncha surimiak wekaawai. Ni ayashj krúsnum maatniua áintsan túraiti.

²⁵ Yusa Wakanj kakarmarijjai Yus-shuar ajasu asar, núnisrik Yusa Wakanj kakarmarijjai wekasatai.

²⁶ “Wats, nekapanisatai. Wi imiá péñkeraitjai” nuámtak túnaitasuk, yajauch enentáimtunáischatniuiti.

6

Yáiniáiktarum

¹ Túrasha, yatsuru, Yus-shuar tunáa túrashtimpiash. Atumsha nekas Yusjai wekaarumna nu, nu wáinkurmeka, yátsum Yusjai iwíarat tusarum yáintárum. Tura nankaamantu enentáimtumatsuk túratarum. Tura amesha nekamata. Tunaanum iniarajj tusam aneam wekasata.

² Káarak kijin akui nuámtak yáiniaiktin átsuk. Núnisrumek atumsha, itirchatrj akui nuámtak yáiniáiktarum. Túrakrumka Kristu akupeamurj umiarme.

³ Shuar tujintiayat “nankaamantuitjai” tákuñka ananmamui.

⁴ Shuar ní túramurjniak enentáimtumastiniaiti. Níniunak enentáimtumakuñkia tura péñkeraitkuñkia chikicha túramurj iirtsuk, antsu níniun péñker iis wararsattawai.

⁵ Iis, ashí ní káarkariniak júkishtinkiait.

⁶ Shuar Yus-Chichaman unuimiatna nu, nu shuar nin jintíana nuna ashí takakna nujaj yáin^{ti}.

⁷ Ananmamawairap. Shuar Yúsán anan^{kat}niun tujintiawai. Ame araa^{mna} nuna neren^{je} júktatme. Chíkich neren^{je} áhattawai. Atumi enentáin^{cha} núniskete.

⁸ Iista. Shuar ni ayash^{je} wakeramunak tuke enentáim^{takka}, jataj neren^{je} áintsan^{je} araaiti. Nerekmataj jákatniun júktatui. Tura Yusa Wakan^{je} wakera nuna tuke enentáim^{takka} Yusjaj tuke shiir pujustinian júktatui.

⁹ Nu asam^{ta} pén^{ker} túratin yawetkishtiniaiti. Tura pimpitsuk takasar júuktin tsawant jeam^{ta}, páchitsuk júktatji.

¹⁰ Tuma asam^{ta} yáin^{min} ákuin^{kia} ii jeajnia nu túratniuitji nekaska ii yach^{je} yáin^{kiartin}, Yus-shuar ainia nu. Tura ashí shuarsha yáin^{tinaiti}.

Jesukristunu ajasar yamaram akiiniatin nekas pénkeraiti

¹¹ Íimsakua, winia uwejr^{ujaj} urutá uuntna áatjarum.

¹² “Nekas tuke tsupirnaktiniaitme” tuinia nuka áyatik shuar shiir enentáim^{tursarti} tusa tuiniawai. Kristu krúsnum jakamun étsereakuin^{kia} itiurchat awaj^{tusarin} tusar “tsupirnaktiniaitme” tuiniawai. Shuar “ashí akupkamun umiktajai” tusa, Muisais timia núnisan^{je} tsupirnaktiniaiti.

¹³ Pai. Tura nú shuar tsupirnaku áiniayat ashí akupkamun umiiniatsui. Muisais timia nuna ajapén ikiuiniawai. Túmaitiat tsupirnaku^k tusa wakerutmainiawai. Áyatik atumin “Pai, niisha tsupimiatiakji” titiai tusar wakerutmainiawai.

¹⁴ Wikia, antsu, aya ii uuntr^{je} Jesukristu krúsnum jakamunak wararsatniun enentáim^{jai}. Tu enentáim^{kiun} Kristu krúsnum jakamia áintsanak ju nun^{kanmaya} ana nuna jaka áintsan páchiatsjai; tunaanum winia útsutkatin atsawai.

¹⁵ Kristunu ajasri^{kia} tsupirnaktin^{cha} tsupirnakchaitkiursha mai ántrai^t antsu yamaram akiiniatin nekas pénkeraiti.

¹⁶ Ashí nekas Yus-shuaran, wi tájana nujaj métek wekainia nuna, Yus shiir enentáim^{ias} yáin^{ti} tuke shiir pujustinian.

¹⁷ Yamaik^{ia} itiurchat najatawar^{ain}. Jesusa takatr^{je} takaakui asutiuawarma paant ayashru^{je} chimikma írunui.

¹⁸ Yatsuru, ii uuntr^{je} Jesukristu atumin shiir yainmakarti. Nuke atí.

Papru IPISIUNMAYA SHUARAN papí akuptukma

Ipisiunmayq Yus-shuaran Papru áatramiania nu

¹ Yus nuna wakerakui Jesukrístu akatramuitjai. Jesukrístu nekas enentáimtusrum Yus-shuar ajasrum Ipisiunam pujarmena nuna ju papin áatjarne.

² Yus ii Aparísha tura ii Uuntrj Jesukrístusha waitnentramainia ásar imiatkinchanum shiir pujustinian yainmakarti.

Krístujai tsaniñkiu asakrin Yus ti shiira nuna tsan̄katramji

³ Ii Uuntrj Jesukrístu Aparj Yus nekas shiir awajtustiniaiti. Iisha Krístujai tsaniñkiu asar ii enentáin ashí nayaimpinmayq ana nujaj warasminiaitji. Túmaitkiui Yus nu waratain ashí suramsaitji.

⁴ Krístujai uwemprar ti shiir tunaajainchu Niijaj pujusarat tusa Yus, ju nun̄ka atsajsha, anaitiamkamiaji.

⁵ Yámankamtaiksha incha ti anenmak Jesukrístu túrunamujaj ni uchirj ajasat tusa wakerut-makmiaji.

⁶ Ni aneamu Uchirijaj tsaniñkiu asakrin nekas ti anenmaji. Nu enentáimsar ti shiir awajsatniuitji.

⁷ Yus ti anenmakrin ni aneamu Uchirj numpé puarmatai, nu jakamujaj ii tunaarj in akikmatramak uwentikrampraitji.

⁸ Tura ti anenmak ni enentáimtairin tura nekatairincha suramsamiaji.

⁹ Nujaj shiir enentáimturmak in uwentikrampratniun wakerutmakmiaj nuna, yaunchu nekaachman, yamá paant awajturmaj.

¹⁰ Ashí ju nun̄kanam írúnna nunasha tura nayaimpiniam írúnna nunasha Kristu ashí akupin ati tusa Yus tsan̄katkattawai. Nunasha Yus yaunchu enentáimturú asamtai tsawant jekupin ashí uminkiáttawai.

¹¹ Iisha Krístujaj tsaniñkiu asakrin Yus yaunchu achirmakmiaji ashí Niiniu ana nuna tsan̄katramkatniun. Nunasha, ashí Nii túrana núnisan, aya Nii wakera asa túramiaji.

¹² Iikia Israer-shuar asar Kristu emka umirkakrin in imía péñker túrutmamun nekaawar ashí shuar Yúsán ti shiir awajsamín áiniawai.

¹³ Núnisan atumsha nekas uwempratín chicham antukrum Kristu nekas enentáimtusurme. Túrarum Kristu-shuar ajasakrumín Yus ni shiir Wakanj akuptuktaj timia nuna akupturmakmai. Nuna tura “nekas Wíi shuaraitrume” tawai.

¹⁴ Yamái Yusa Wakanj ii enentáin pujuruk tuke uwentikramji. Tura takas umik nu tsawantaj ashí tsan̄katramkattaji. Tura ii enentáin pujá asamtai Yus ukunam Niijajisha ashí tsan̄katramkattaj nu paant nékaji. Maa, Yus ti péñker asamtai Nin ashí ti shiir awajsarti.

Papru Yus-shuaran áujtustmiania nu

¹⁵ Átum ii Uuntrj Jesukrístu nekas enentáimtamuncha tura ashí Yus-shuarjaj shiir awaj-nayamuncha antukjai.

¹⁶ Túran shiir enentáimkiun Yúsán áujkun tuke yúminkiajai.

¹⁷ Ii Uuntrj Jesukrístu Aparj Yus ti shiir asamtai Nin áujeakun ni Wakanj ni nekatairin suramas ashí jintinramawarti tusan seajai. Nujaj nuna nan̄kaamas Yus nekaattarme.

¹⁸ Tura enentáimíncha paant enentáimtikramprarti tusan seajai. Nujaj shiir túrutmataj tusa achirmakuitrum nu nekaattarme. Nu arantcha imía shiira nu, Yus ni shuarj in ashí tsan̄katkattana nusha nekaattarme.

¹⁹ Nu arantcha Yus umirkurin ti kakaram tujincha asa in yáinmaj nu nekaattarme. Tura nu kakaram ti kakaram asamtai

²⁰ Nujaj Krístun jakamunmayq iniantkimiayi. Tura nayaimpiniam juki ni untsuurinj akupin pujutainium apujsamiaji.

²¹ Tura ashí ju nun̄kanam akupin ainia nújajisha tura ukunam nun̄ka átatna nu akupin áminia nújajisha tura ashí akupin ainia nújajisha tura ashí naarj nékamu ainia nujajisha Yus Krístun ashí nan̄kaamas akupin najanamiaji.

²² Tura ashí írúnna nu, Krístun umirkartin áiniawai. Tura Yuska Krístunak ashí Yus-shuara Akupniurj awajsamiaji. Túramtai Kristu ni shuarj muuké áintsan̄kete.

²³ Tura ashí nun̄kanam Yus-shuar ainia nu Kristu ayashj najanainiawai. Tura Kristu ashí ni ayashj in pimiutkaiti tura nu arantcha ashí írúnna nunasha pimiutkaiti.

2

Yus anenma asa uwemtikramji

¹ Átum yajauch túrakrum tunaanum tuke wekaakrum Yúsnumiá kanakin asarum jákauyarme.

² Nu tunaanum jú nunkanam pujuinia nujaj métek tuke wekainiuyarme. Túrarum uunt iwianchi wakeramurj umirniuyarme. Uunt iwianch ashí Yúsam umirainiatsna nuna akatenawai.

³ Ashí iisha núnisrik yaunchu nu shuarjaj métek ii ayashj wakerakmu umirniuyaji. Tura fi enentáj wakeramusha umirniuyaji. Tuma asar tura tunaajaj akiinia asar chikich shuarjaj métek ti kajernakmijaji.

⁴ Antsu Yus ti waitnenkartin asa in ti anenmamijaji.

⁵ Tuma asa ii tunaanum tuke jaka pujarnin Krístujaj métek iwiaaku awajtamsamijaji. Aya ti anenkartin asa uwemtikrampramijaji.

⁶ Tura Krístujaj métek iniantamkimiijaji. Nuyá Jesukrístujaj métek, akupin pujutanium yamaisha apujtamas tuke nupetkatniun tsanekatramkaitji.

⁷ Nujaj ni ti anenkratmarincha tura Kristu túrunamujaj waitnentrampramuncha tuke iniaktusmin átatui.

⁸ Jesukrístu nekas enentáimta asakrumin Yus waitnentramar uwemtikrampraiti. Juka átumkeka túrunachuitrume. Antsu Yuska Niniki kuitchajaj suramsaitrume.

⁹ Shuar ni takatríjjaj uwempratniuitkiunka nankaamantu enentáimsainti winia kakarmarjaj uwemprajaj tusa. Nu enentáimsatniuka atsutí tusa Yuska átumka takaatsrumnin uwempratniun suramsamiarme.

¹⁰ Yus najanamuitji. Kame Jesukrístujaj tsaniákrin yamaram iwiaakman suramas tuke penker túratniun najatmamji. Yáunchuk nuna enentáimturmasmijaji.

Krístujaj tsaniñkiu asar shiir nawamnaikiar pujaji

¹¹ Nuik ámarum nu enentáimpratarum. Ashí Israer-shuar ni ayashjín tsupirnaku ásar ashí Israer-shuarchan, tsupirnakcha ániakui, penké Yúsnachua núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme.

¹² Nuik Krísturtinchauyarme. Israer-shuarcha asarum ashí ni túrutairisha tura ashí Yus nin tsanekatmasha nekaachuyarme. Tura jú nunkanmaya asarum nekas Yusa nu enentáimtichuyarme tura shiir pujustin nápkamsarum enentáimpramarme.

¹³ Antsu yamaikia Krístujaj tsaniñkiu asarum, yaunchu Yusaíya yajá pujuwitiatrum, yamaikia Kristu numpé puármatai ni jarutramkamujaj tántaitrume.

¹⁴ Israer-shuarjaj Israer-shuarchajaj nemasmanaikiar ajapén péenkramu ámiyai. Tura Kristu nuna sáaki nawamnaiktikramkamijaji. Tura chikichik shuar najatmamijaji.

¹⁵ Nuik aya Israer-shuar Muisais akupkamu untsurj armia nuna umirkatin ániak nujaj chikich shuarjaj nemasmanainiarmiayi. Tura Kristu jaka nu akupkamu ántar awajas chikichik shuar yamaram awajtamsamijaji.

¹⁶ Núnisan ámiyai. Kristu krúsnum jaka nemasjaj mai apattamak chikichik awajtamas Yusjajsha nawamnaiktikramkamijaji.

¹⁷ Kristu taa nawamnaikiatniun chichaman Israer-shuaran ujakmiayi. Tura nu chichamnak atumin Yus nékachuyarmena nunasha ujaktinian akupkamiayi.

¹⁸ Yamaikia Israer-shuartisha tura Israer-shuarchasha mai metek Kristu túrunamujaj tura Yusa Wakanj takaku asar Yusaj jeatniuitji.

¹⁹ Tuma asantai yamaikia chikich shuarchaitrume, antsu ashí Yus-shuarjaj métek ajasuitrume. Nekas Yusa shuarinrume.

²⁰ Átum uunt jea jeamma núnisaitrume. Uunt jea jeamtin, emka kaya apujtuktiniaiti jea ti wewe atí tusa. Núnisan yaunchu Yúsna etserniusha tura Kristu akatramurjisha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujaj nankaamas Jesukrístu enentáimtustiniati.

²¹ Jea apujtukmarj Kristu asantai Nij ti penker ekeniar jea jeamnaki wéawai. Tura ii Uuntrj Krístujaj Yusa Jee ti shiir átatui.

²² Núnisrumek atumsha Krístujaj tsaniñkiu asarum átum ashí Yus-shuarjaj Yusa Jeeya áintsan ajasuitrume. Tura Yusa Wakanj ashí Yus-shuara enentáin pujú asantai nekas Yusa Jeeente.

3

Papru Israer-shuarchanum Yus-chichaman etserkatniuya nu

¹ Nu asantai atumin Israer-shuarchatirmin yáintaj tusan Jesukrístunu étserkun sepunam pujajai.

² Yus anentak Yus-Chichaman atumin etserkatniun akatar akuptukuiti. Nu nékatsrumek.

³ Yus nuna túrutak yaunchu nekaachmancha paant awajtursamiayi. Núnaka ishichik áatraitjarme.

⁴ Nu áujsarum Krístunu yaunchu nekaachman yamaikia paant nékajna nu nekaattarme.

⁵ Nú chichaman yáunchusha chikichinkesha ujankachmiayi. Túrasha yamaikia Yusa Wakanj Krístu akatramurjncha etserniurjncha nu chichaman paant awajtusarai.

⁶ Nu chicham juiti: Uwempratin chichaman umirkar Israer-shuarcha Israer-shuarjaj métek Krístujaj tsanñkiaru ásar chikichik shuar ajasartatui. Tura nu arantcha Yus ni shuarjn ashí shíiran tsanñkatkatniun anajmatrama nuj métek pachiiñkiartatui.

⁷ Yus ni kakarmarjijaj winia yáintiuk tura ti anentu asa nu uwempratin chichaman etserkat tusa akatturmiayi.

⁸ Ashí Yus-shuarjaj nankaamas wi péñkercha ajñ Israer-shuarchanum shiir chichaman etserkat tusa Yus tsanñkatrukmiayi. Krístujajñkia kuitjaj nankaamas péñker, enentáimustin jeatsjinia nu, takakji. Nusha ti shiir chichamaiti.

⁹ Yuska, ashí najana nu, nu enentáimmian yáunchusha etsertsuk yamaikia ashí shuar nu chichaman nekaawarat tusa winia akatturmiayi.

¹⁰ Yamaikia ashí nayaimpiniam pujuinia nuka Yus ni shuarjñn túrunamun íisar Yuska imiá neka asa ashí enentáimniua nuna paant nékainiawai.

¹¹ Yus júnis túratniun yáunchuk enentáimpramiayi. Tura ii Uuntrj Jesukrístujaj mash uminkiamiayi.

¹² Tura Krístujaj Yusaj yúpichuch jeaji. Tura Nin nekas enentáimtusar sapijmiatsuk Njñ tantamniaitji.

¹³ Tuma asamtai tájarme, atumin yáingtaj tusan sepunam pujakui kúntuts enentáimprairap. Anstu nujaj Yus atumin ti shiir awajtamkurmin átum warasuk tusan wakerajrume.

Kristu ti anenkratniuiti

¹⁴ Nu asamtai ii Uuntrj Jesukrístu Aparñ tikishmatran áujtajrume.

¹⁵ Ashí nayaimpinmasha tura nuñkasha Yus-shuar ájnia nu nekas ni shuarj ájniaji.

¹⁶ Yus ti kakaram asa ni Wakanjijaj atumí enentájn pujureak ashí ni kakarmariyan atumin suramsarat tusan áujtajrume.

¹⁷ Yus nekas enentáimtakrumin Krístu atumí enentájn pujusat tusan áujtajrume. Tuke yapajtsuk anenkratñn átarum tusan áujtajrume.

¹⁸ Túrakrum ashí Yus-shuarjaj Krístu anenkrattairj nekaattarme. Imiá uunt asa nanantsuk tuke amuukachminiati.

¹⁹ Nu anenkrattai ashí takamtsuk nekaachmin ajñ nekaatarum tusan áujtajrume. Nujaj Yus takamtsuk pimiutramkattarme.

²⁰ Nekas Yus shiir awajnasti. Ni ti kakaram asa ii seajnia nuna nankaamas tura enentáimprachminia nunasha nankaamas jñn pujurtamuk ashí túramniaiti.

²¹ Ashí Yus-shuarjajsha tura Krístujajsha Yusa péñkerj tuke paant wantinin atí. Yus tuke iniaitsuk shiir awajnasti. Núnisan atí.

4

Yusa Wakanjijaj tsanñkiar pujakur túratin

¹ Atumsha ni shuarj ajastin Yus achikma asarum péñker wekasatarum tájarme. Ii Úuntrinun etserkun sepunam pujakun seajrume.

² Nekasmancha ajasrum aneniakrum katsunnairatarum.

³ Yusa Wakanj chikichik shuar awajtamkurmin shiir awajñaisarum pujustarum.

⁴ Yusa Wakanñkia chikichkiiti. Tura ashí métek Yus achikma asar métek Nijjaj shiir pujustin enentáimji. Iisha Krístu ayashí ayashímkia asar chikichik ayashkiitji.

⁵ Ii Uuntrj chikichkiiti. Niñki nekas enentáimtusar métek imiantiniaitji.

⁶ Chikichkiiti Yus, ashí Yus-shuarti ii Aparñti. Ashí akuptamniuitji. Ashí ni shuarjñn pujak ii enentájn pujurtamji. Ti nekas ashí mash, Israer-shuartisha Israer-shuarchasha, imiá chikichik ajasuitji.

⁷ Tura chikichik chikichik niisháa shiir takastinian suramsaitji. Tura Krístu wakerimia núnisan suramsaji.

⁸ Nu asamtai Yus-Papiniumsha tawai:

“Achikman jukí nayaimpiniam wakamiayi. Tura shuáran shíiran susamiayi.”
Tu áarmaiti.

⁹ Tura “wakamiayi” tana nu ¿warintuia? Krístu nayaimpiniam pujá asa yakí wákañka emka tárashntinkiait. Nekas nuñká taramiayi.

¹⁰ Niñki ataksha nekas nayaimpiniam wakamiayi. Nuna tura asa ashí ni shuarjñn pimiutkarmiayi.

¹¹ Tura nujaj chikichan akatramun awajsamiayi. Chikichnasha Yúsnan etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wáinnium awajsamiayi. Tura chikichnasha unuikiartinian awajsamiayi.

¹² Túramtai ashí Yus-shuar ni takatrijajai yáiniaikiar ti penker shuar ajainiakui Kristu ayashj takamtsuk katsuarartatui.

¹³ Nujaj Yus nekas enentáimtamunam Yusa Uchirj ashí métekrak penker nekaattaji. Nu túrakur katsukir Kristujajai métek penker ajastatji.

¹⁴ Tura uchía áintsar áchattaji. Úchikia ashí yamaram chichaman antukar wari yapajjiniawai. Tura anankartinia chichamen antukar waaku áiniawai. Kame nu anankartini shuar ti paant chichayatanj ni shiir chichamejaj anankatniun pujurenawai.

¹⁵ Antsu nekas aneniakur nekas chicham ujanaiktiniatji. Túrar Kristujaj tsaninikiar tuke tsakakir ashí penker túratnuijaj Niijjajai métek ajastatji. Kristuka ashí ni shuari muuké áintsankete.

¹⁶ Tuma asa ni ayashjn wáinkiu ashí nuna muchitmarj penker yáiniaikiar ashí ni túratniurjn shiir takasartatui. Nujaj nu ayashnium muchitmarj chikich chikich penker takainiak métekrak shiir tsakartatui. Tura anenainiakui nu ayashsha penker úntmartatui.

Kristujaj tsaninkiu asar yamaram iwiaakmanum wekaaji

¹⁷ Ii Uuntrj Kristu íimmianum juna akatjarne: Chikich aents Yúsán nekachu ásar ántar ni enentáimmiyajaj wekainia núnisrum wekasairap.

¹⁸ Ni enentáin kusuru ániak Yusna nuna nekaatniun wakeruiniatsui. Tuma ásar shiir wekasatniun, Yus amaana nuna, nekainiatsui.

¹⁹ Nu arantcha, ni túramurijajai natsamtichu ásar ti yajauchiniam surumakar ashí tunaan wararainiak túrin áiniawai.

²⁰ Antsu átumka núnisrum enentáimtustin unuimiarchamarme.

²¹ Nekas Nii anturkaikturmeka tura Jesus nekas tama Kristu unuiniarmaitkiurmeka Nin shiir enentáimtustin unuimiarmarme.

²² Yaunchu enentáimtairmeka ayash wakeramu anankramin ainia nujaj piaku asa imiá yajauchiiti. Nu enentáimtaimesha yaunchu túrutairmesha ajapa iniaisatarum.

²³ Túrarum penker enentáimsarum wakannium yapajjatarum.

²⁴ Tura yamaram enentáimtairam emetatarum. Nuka Yusjajai métek najanamu asa nekas penker tura shiira nuna tuke túriniaiti.

²⁵ Nu asamtai chikichik ayashi muchitmarj asarum wáitrutsuk nekas chicham chichar-naisatarum.

²⁶ Kajeakrum tunáa túrawarap. Tura nu kajejmasha tsawant takamtsuk áchatniuiti.

²⁷ Uunt iwianch yajauch awajtamsatin tsankatkaip.

²⁸ Kasasha kasamtsuk kakaram takakmasí. Tura ni uwejejjaj penker takaak atsumainia nú shuurnasha susati.

²⁹ Mujiimiai chicham chichasairap. Antsu chichastin akui penker chicham, chikich shuar penker awajsamnia nu chichastarum. Anturtuinia nuna yáintaj tusarum nu chicham ujaktarum.

³⁰ Yusa Shiir Wakanj kúntuts awajsairap. Warí, Yúsnaiti tusa pujurtamji. Tura pujurtamuk takamtsuk uwemtikramprattaji.

³¹ Ashí yajauch ana nuyá kanaktiarum. Nakitratniusha, kajernaikiatniusha, tura kakantrar charáa charáa ajatniusha, katsekmaktincha, tsanumpratniusha mash atsutí.

³² Antsu shiir awajkartin ajasrum waitnennairarum, Kristu jakamujaj Yus atumí tunaarjn tsankurtampra nútiksarmek tsankurnairatarum.

5

Yus-shuar túratin

¹ Nekas Yusa Uchirj aneamu asarum Nii tura núnis túratin wakerukturum.

² Kristu in anenmaj núnisrum anenaitiarum. Kame ii tunaarjn akikmaktaj tusa jákatniunam surumakniayi. Túramtai Yus shiir enentáimtusmiayi.

³ Yusna asarum tsanirmatniusha yajauch túratniusha tura jú nunkanmayajni iki-aunkatniusha ishichkisha enentáimtuschatniuitrume.

⁴ Natsanmaincha, ántar chichamsha yainmakchamnia asamtai chichaschatniuitrume. Antsu Yus shiir yumisatniuiti.

⁵ Shuar chikich nuwajaj tsanirmakka tura ashí yajauchin wakerakka tura jú nunkanmayajni ikiaunkatniun wakerakka Yusaj Kristu akupea nuj penké pachiinkiachminiaiti. Kame jú nunkanmayajni ikiaunkatin ántar-yus tikishmatratniua nujaj méteketete.

⁶ Nu túramniaiti tusar ántar chichamjají anan̄kramacharti. Warí, nuna túruiniakui Yúsan umirainiachun Yus ti asutiáwartatui.

⁷ Tuma asamtai nu shuar pen̄ké pachischatniuitrume.

⁸ Yáunchuka atumsha kiritniunam wekainiuyarme. Tura yamaikia Krístujají tsan̄ñkiu asarum pen̄ker tsáapninium wekaarme. Shuar tsáapninium wekainia nujají métek wekasatarum.

⁹ Tsáapninium wekainiaka shiir awajkartincha tura nekas chichamtincha tura pen̄ker túrin ániawai.

¹⁰ Ii Uuntrj Krístu wakeramu nekaatin wakeruktarum.

¹¹ Kiritniunam wekainia nu túramu pachisairap. Antsu nu shuar tsáapninium en̄keatarum.

¹² Ni uūk túruinia nu áujmatsatin natsan̄majniaiti.

¹³ Tura ashí tsáapninium itiamu ashí paant awajeatsuk.

¹⁴ Nu asamtai Yus-Papinium tawai:

“Kanaruítme nu shintiártá. Jakamunmayá nantáktiá. Tura Krístu tsáapin awajturmastatui.”

Tu áarmaiti.

¹⁵ Nu asamtai átum túramu ímiastarum. Nékachu áintsarum pujusairap. Antsu pen̄ker enentáimprarum wekasatarum.

¹⁶ Pen̄ker túratin tsawant wasúrkaíp. Tunáa ti pampaatsuk.

¹⁷ Enentáincha áirap. Ii Uuntrj Krístu warinia wakera nu enentáimtustarum.

¹⁸ Nampekairap. Nampeakmeka aya yajauch ajame. Antsu Yusa Wakanj winia enentáirūj takamtsuk pujurtusti, tu enentáimsatarum.

¹⁹ Túrarum Yus shiir enentáimtakrum Yus-kanta kantamkirum shiir áujnaisatarum.

²⁰ Ii Uuntrj Jesukrístu náarjijají ashí irunna nu Yus Apa tuke yumin̄satarum.

Yus-shuar túratin

²¹ Yus-shuar asarum nuámtak umirnaikiatarum. Túrakrum Krístu shiir awajsattarme.

²² Núwaka Krístun umirna núnisañ ni áishrin̄cha umirkatniuiti.

²³ Krístu ni shuarj̄n akupeana núnisañ áishman̄sha ni nuwen akupkatniuiti. Krístu ni shuarj̄n ayashimiak ni muuké áintsan̄kete. Tura nin uwemtikiartiniaiti.

²⁴ Nu asamtai Yus-shuar Krístun umirin ániawai. Núnisañ ashí ana nujají nuwá ni áishrin̄ umirkatniuiti.

²⁵ Krístu ni shuarj̄n ti aneak nin yáingtaj tusa jákatniun surumakmiayi. Núnisrumek áishman̄tirmesha atumi nuwé aneatniuitrume.

²⁶ Krístu ashí ni shuarj̄n ni Chichamejají tura entsajají nijjar ní shuar pen̄ker árat tusa jakamiayi.

²⁷ Nujají ashí ni shuarj̄n tunaarinniuchu tura yajauch máatrachu antsu ti pen̄ker shiir awajas Niinī ejetaj tusa túramiayi.

²⁸ Núnisañ áishman̄ ni ayash̄in̄ anea núnisañ ni nuwen aneatniuiti. Shuar ni nuwen aneak nujají ni ayash̄in̄cha aneawai.

²⁹ ¿Yaki ni ayash̄in̄ nakitniuit? Antsu pen̄ker wáiniuk áyueatsuk. Krístu núnisañ ni shuarj̄n wainiui

³⁰ ni ayash̄í asamtai. Kame ni ayash̄í muchitmarintji.

³¹ “Tuma asamtai áishman̄ ni apar̄incha nukur̄incha ikiukin ni nuwejají tsan̄ñkiar chikichik ayash̄tin ajainiawai.” Tu áarmaiti.

³² Nusha Krístu ni shuarjijají tsan̄ñmán tawai. Nuka yaunchu nekaachma yamaikia nekanaiti, tura ti enentáimturiniaiti.

³³ Tura núnisañ ashí áishman̄tiram atumí nuwé atumí ayash̄ía nútiksarmek aneatniuitrume. Nuwásha ni áishrin̄ umirkatniuiti.

6

¹ Uchitirmesha, Yus-shuar asarum apasha nukusha umirkatarum. Nuka ti pen̄keraiti.

² Emka akupkamu “umirkam nekas shiir átatme” tana nu j̄úiti:

“Apasha nukusha umirkata.

³ Túrakmeka shiir átatme tura j̄ú nuñkanam untsur̄í tsawant pujustatme” tawai.

⁴ Atumsha, uchirtintirmesha, atumí uchirj̄ ántrarum akajkairap. Antsu Yúsan shiir enentáimtusarat tusarum ti pen̄ker jintinkirum tsakatmartarum.

⁵ Takakmautirmesha, atumí uuntrj̄ j̄ú nuñkanam pujuinia nu ti pen̄ker umirkatarum. Krístu umirkatniua áintsarum wishiktsuk ashamakrum tuke enentáijjají takarsatarum.

⁶ Aya wáitmakui shiir enentáimtursat tusarum pen̄ker takarsairap. Antsu Krístu takarnirja núnisrum ashí ame enentáimjají Yus wakera nu túratarum.

⁷ Aya shuárnak yayá nútiksarum takasairap. Antsu ii Uuntrj Kristu takarsatniua nútiksarmek ásump enentájjaj takastarum.

⁸ Kame chíkich chíkich ní takasmajaj métek akinkiertatui. Ii Uuntrj Kristu nu shuar péñker túramujaj métek akiktatui.

⁹ Tura atumsha, iniamniutirmesha, atumí takartamu wakanj mántutsuk shiir enentájjaj iniartarum. Nekas enentáimpratarum. Ii Uuntrj nayaimpiniam pujana nuna niisha atumjjaj métek umirainiawai. Tura Yuska ashí shuaran akantsuk métek iyawai.

Yusa kakarmarjjaj íwianch taritratarum

¹⁰ Wátsek, yatsuru, ii Uuntrj Yusjaj tsaniñkiu asarum ni ti kakarmarjjaj íwianchjaj máanaiktin kakaram ajastarum.

¹¹ Apach máanainiak jiru entsarua núnisrum Yus susamujaj entsartarum. Nujaj íwianch nupettamkui tariartatme.

¹² Kame Yusna takáa asar penké áentsjaj máaniatsji antsu yajauch wakan kakaram írúna nujaj máaniaji. Niisha ju nuñkanam, kiritniunma áintsaj, tunaanum wekainia nuna akupin áiniawai.

¹³ Jiru entsartinia áintsarum Yus súramna nu entsartarum. Nu entsarmajaj itiurchat tsawant taritra nupetkarum tuke tariarum wajastatrum.

¹⁴ Wats, nekas tariartin nekas chicham emenmamatarum. Tura péñker túratniujaj jatairum ajaktarum.

¹⁵ Santar iwiarnak sapatan aweá áintsarum Yusa shiir chichame etserkatin iwiarnatarum.

¹⁶ Nuyasha ashí nankaamas, tantar takustinia áintsaj, Yus tuke nekas enentáimtustarum. Nujaj íwianch eketrámkamusha uwemturtatme.

¹⁷ Múukem ajaktincha Kristu uwentikrampramu múukmjín etsenkrukturum. Tura Yus-Chicham puniáa áintsaj achiktarum. Nuka nekas Yusa Wakanj puniarjinti.

¹⁸ Yusa Wakanjjaj Yus áujeakrum tuke seatniuitrume. Tura tuke aneara pujustarum wake mesetsuk, tura ashí Yus-shuar ainia nusha Yus áujtustarum.

¹⁹ Núnisaj winiasha áujtursatarum. Wi sepunam pujayatan Yus winia chichastinian surusat tusarum seatritiarum. Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtursatarum.

²⁰ Yus nu chichaman etserkatniun akuptukuiti. Nuna túrakun sepunam pujajai. Sapijmiatsuk etserkat tusarum Yus áujtursatarum.

Amikmaamu

²¹ Ii aneamu yachj, Tíkikiu, ashí wi túramun ujatmaktatui. Niisha Ii Uuntrj Kóstunu etserkatniun ti penker yáinniuiti.

²² Tuma asantai ii juj pujamun ujatmak ikiantamprarat tusan akuptajrume.

²³ Yus Apasha tura ii Uuntrj Jesukrístusha ashí Yus-shuartermin anenmak shiir imiatkinchanum pujustinian suramsarti. Tura Nin tuke nekas enentáimtustinian suramsarti.

²⁴ Ashí ii Uuntrj Jesukrístun tuke enentájjaj aneana nuna Yus shiir yáinjti. Nuke atí.

Papru JIRIPIUSNUMIA SHUARAN papi akuptukma

Papru sepunam pujus Jiripiusnumia Yus-shuaran áatramiania nu

¹ Wi Papru Timiutéujai Jesuskristu takarín asar ashí Yus-shuar Jiripius pérunam pujar-mena nu ju papi akuptaji. Yus-shuaran wainin árumna nusha tura Yus-shuaran yain árumna nusha ashí Yus-shuarsha nunisañ Yusna asarum tura Jesukristujai tsaniñkiu asakrumin ju papi áateajrume.

² Yus ii Aparísha Jesukristu ii Úntrísha atumin waitnentramainia ásar imiatkinchanum tuke shiir pujustinian yainmakarti.

Papru Yus-shuaran Yúsan áujtawai

³ Ashí tsawant atumin enentáimtakun Yúsan tuke shiir yúmiñkiajai.

⁴ Yúsan áujeaknasha ti warasan seatjarne.

⁵ Kame iikia yámankamtaiknumia Yus-Chicham métek yáiniáikiar iniaitsuk takasuitji.

⁶ Yus atumíin ti péñker awajsatniun nan̄kama asa núnisañ Jesuskristu táatsañ tuke shiir awájtámki nekas péñker najatnattarme. Nuka ti nekasaiti.

⁷ Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakuí átum yáintiarme. Yus ti aneñkartin asa nu túratniun mai metek tsañkatrámkaitji. Tuma asamtai atumin júnisan enentáimtustin ti penkeraiti.

⁸ Jesukristu aneñkrattairíjjai wi atumin aneamun Yussha paant nékarui.

⁹ Yúsan áujeakun anearmena nú nan̄kaamas aneak tusan seatjarne. Tura nújajsha ti neka ajasrum

¹⁰ ashí péñkera nu achikiuk tusan Yúsan áujtajrume. Atumin nu túrunamtañkia yamaisha tunáajainchu pujustatrume tura Kristu támatai sumamashtatrume.

¹¹ Núnisañ Jesukristu kakarmaríjjai ashí péñker túrin áatrume. Tura nújai ashí shuar Yúsan ti shiir enentáimturartatui.

Wi ju nunkanam aya Krístunak enentáimtakun pujajai

¹² Winin túrunamu itirchat añ nujai uwempratin chicham nekas pampaawai. Nu nekaatarum tusan wakerajrume, yatsuru.

¹³ Iis, uunt akupniú suntarísha tura ashí shuarsha wi Krístunun etseru asan sepunam pujamun paant nékainiawai.

¹⁴ Ti untsurí Yus-shuar wi sepunam enketman nekaawar ii Uuntri Jesusan nekas enentáimtusar sapijmiatsuk Yus-Chichaman etserainiawai.

¹⁵ Kame shuar awai winia kajertuiniak tura nan̄kaamantu enentáimtumainiak Krístun páchiniawai. Antsu chíkich shuarka nekas enentáijjai Krístun etserainiawai.

¹⁶ Yajauch shuarka Krístun shiir enentáimtutsuk antsu ashí shuar ní chichamenak anturkar wí shuar ajararat tusar etserainiawai. Túruiniak wisha sepunam pujakuí nu arant itit awajtustinian wakerutainiawai.

¹⁷ Antsu péñker shuar Krístun nekas aneenak etserainiawai. Nu uwempratin chicham imiá penkeraiti wi titin asamtai winiasha anentainiak shiir etserainiawai.

¹⁸ Wats, mai metek chíkich yajauch enentáijjai tura chíkich shiir enentáijjai Krístun etserainiakui shiir enentáimjai.

Tura nuna nan̄kaamas shiir enentáimprattajai.

¹⁹ Kame Yus áujtursa asakrumin tura Jesukristu Wakanísha yaintiu asamtai ti péñker uwempran jinkittajjai.

²⁰ Nekas júna wakerajai: Natsámstusuk uunt akupniun Jesukristun paant ujakartinian wakerajai. Nujai wini Kristu kakarmarí pujamu ti paant nekanattawai. Mántuiniakuisha tura mántuiniachkuisha ashamatsjai. Aya Kristu kakarmarín wini nan̄kaamas nekaawarat tusan wakerajai.

²¹ Wíjjainkia ju nunkanam iwiaaku pujakun aya Krístunak enentáimtakun pujajai. Tura jákatniusha juí pujajnia nuna nan̄kaamas péñkeraiti.

²² Ju nunkanam pujakun Uunt Jesusnan takasminiaitjai. Nu asamtai tunatsuk achiktaj nékatsjai.

²³ Wíjjainkia itirchataiti mai achiktin. Jákatniuncha wakerajai Krístujai tsaniñkian pujustaj tusan. Wíjjainkia nu imiá péñkeraiti.

²⁴ Túrasha atumin yáñtaj tusan tuke ju nunkanam iwiaaku pujusminiaitjai.

²⁵ Kame tuke pujustatjai nékajai. Núnisnak atumjai pujakun Yus nekas enentáimtakrum nankaamas waraakrum tuke katsuaruk tusan yáintatjarne.

²⁶ Nu asamtai wi atumjai pujakui Jesukrístu yumínsarum shiir warastatrum.

²⁷ Kristu chichame ti penker asamtai atumsha aya péñkera nuke túratarum. Wi atumjai pujaknasha tura yajá pujaknasha átum ti shiir túrarmena nuna antuktinian wakerajai. Ashí shuar uwempratín chichaman nekaawar umirkarat tusarum chikichik enentáijjai kakaram ajastarum.

²⁸ Atumí nemasrjsha ishichkisha sapijmiamtikramkarajñ. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisan atí tusa Yus túraiti.

²⁹ Krístunu asarum Nii nekas enentáimtustinniasha tura Niiniu asarum wáitsatniusha Yus anenma asa tsankratramkaitrume.

³⁰ Yus-Chicham pamparat tusar maimetek ti takáa asar wáitijai. Wi nuik ti takasmaj nu nekamarne. Tura yamá tuke takaaj nusha ántarme.

2

Kristu péjchach ajasmatai Yus ti uunt awajsamiayi

¹ Kristu ikiantamkuisha, ni anenkrattairi atsantamkuisha, ni Wakanj atumjai pujakuisha, anenkratniuitkiurmesha, waitnenkratniuitkiurmesha

² waramtikrustarum. Métekrak takastarum. Mai metek anenaitiarum. Yusa Wakanj atumí enentáin pujá asamtai chikichik enentáik enentáimsatarum.

³ Átum wakeramuk túrawairap. Nankaamantu ajastaj tírap. Antsu péjchach ajasrum chíkich shuar atumjai nankaamas péñker enentáimtusta.

⁴ Aya níniak péñker átatna nunak shuar túrashti. Antsu chíkich shuar yáinminia nuna túrati.

⁵ Kristu Jesus enentáimpramia núnisrum enentáimpratarum.

⁶ Niisha Yúsaitiat ju nunkanam winiak tuke Yusjai métek átinian emettsuk

⁷⁻⁸ antsu nuna ikiuak aents ajas péjchach asa ashí aentsu takarñ ajasmiayi. Tura aentsu ayashñ ayashimiak tura Yúsán umireak jákatniuncha surimiakchamiayi. Maa, imiá tunaarinnia ántsñ krúsnum natsanmainium jakamiayi.

⁹ Túramtai Yus nekas nankaamantu awajsamiayi. Ni náarñcha ashí paant awajsamiayi.

¹⁰ Tuma asamtai ashí nayaimpiniam írúnna nusha, nunjá írúnna nusha, tura iwiansamusha Jesusa náarñ antukar tikishmatrartatui.

¹¹ Tura ashí shuar Jesukrístu ashí akupin ajasman paant nekaawartatui. Nújainkia Yus Apá kakarmarjsha paant nekanattawai.

Yus-shuar kiritniunam keeák tsápin awajeana ántsñ ániawai

¹²⁻¹³ Nu asamtai, aneamu yatsuru, wi atumjai pujakuí umirtukmarmena nuna nankaamas yamaikia arant pujakuisha umirtuktarum. Iis, Yus atumí enentáin takaak ni shiir wakeramu wakeruktinniasha tura umiktinniasha pujurtamprume. Nu asamtai atumsha kakaram ajastarum Yus ti penker awajtamsatniun wakera nu túrunati tusarum. Tura péjchach enentáimprarum awajirminiaitjai tusarum aneara wekasatarum.

¹⁴ Ashí yajauch tunaitsuk tura jianaitsuk wekasatarum.

¹⁵ Túrakrum makuumatsuk tunaajainchu átatrume. Antsu Yusa uchirí átatrume. Ju nunkanmasha shuar imiá tunaan túrinjajsha máatrachu asarum kiritniunam ji keeá ántsñketrume

¹⁶ iwiaaku pujustin chicham paant awajeakrum. Nújai Kristu támatai atumjñ ántran takascha asan ti shiir wararsattajrume.

¹⁷ Winia takatrujai Yus-shuar ajasakrumin wi jákatniuitkiuncha nújajsha warasaintjai. Atumsha wi waraajna juí núnisrumek warastarum tusan wakerajrume.

¹⁸ Atumsha waraakrumin métek wararnaisatai.

Timiutéuncha Epaprutíiuncha Papru ujatkamiania nu

¹⁹ Ji Uuntrj Jesus wakerakuñkia Timiutéun írmainiarat tusan ti warik akuptuktatjarne. Tura átum shiir pujamu ujateakuí warastatjai.

²⁰ Kame Timiutéu wijjai métek enentáimna áinis chíkich shuar atsawai. Niisha átum shiir pujusuk tusa ti nekas enentáimturmarne.

²¹ Chíkichka Kristu wakeramun iniaisar ní wakeramunak páchiniawai.

²² Túrasha átumka Timiutéu tuke péñker túramu nékarme. Uchi ni aparjñjai takaana áinis Yusa shiir chichame etserkatniun yáinktiai.

²³ Winia itiurtukartñ nuna nekaan Timiutéu írmainiarat tusan akuptuktatjarne.

²⁴ Kame Kristu yáinktui wíkisha wárik ímniaitjarne.

²⁵ Wi atsumaj nuna firsati tusarum Epaprutítu akupturkamarme. Wijjaj métek tsanin takasuiti. Tura métek wáitsaitji. Áunkesha akupkamnia enentáimjai.

²⁶ Nii jaawai taman átum antukman nekáa, firmaitniun ti wakerutmarme.

²⁷ Maa, nekas ti janiñkiamai. Túrasha Yus nin waitnentramai. Kame winiasha wi juu wáitiakun nii jakamtaí nu arant ti kuntuts pujuschatniun waitnentrurmai.

²⁸ Tuma asamtai akuptuktiniam wakerajrume. Tura atumsha ataksha wáinkiarum waraakrumin wisha ti kuntuts enentáimchakun akuptuktatjarume.

²⁹ Kristu yuminсарum ti shiir warasrum wáinkiarum. Chikich shuar niijjaj métek péñker Yus-shuar ainia nusha shiir enentáimtustarum.

³⁰ Kristu takatrin takaak ti janiñkiamai. Átum yáintkiachminia nuna winia yáintkiataj tusa pujus janiñkiamai.

3

Kristu nekaatin ashí nankaamas péñkeraiti

¹ Ayu. Warastarum, yatsuriram, ii Uuntrj Kristu ti péñker asamtai nuik áatramajrum nuna ataksha títiatjarume. Ataksha ujam yainmakminiaitkiuñkia wíjjajñkia itiurchatchaiti atak enentáimtikratin.

² Yajauch shuarjaj aneartarum. Nu shuar Muisais timia núnis tuke yamaisha tsupirnak-tiniaitrum tuiniawai.

³ Antsu iikia ayash tsupirnakmajaj péñker átiniaitji tu enentáimtsatsji. Iikia antsu ii wakanjijaj Yus shiir awajeaji tura Jesukristunu asar Niñki shiir wararji. Nu túrakur Muisais timia nu umintikia iitji.

⁴ Ju nunkanam írunna nujaj waantu enentáimpramniaitkiuñkia ashí shuarjaj nankaamas wikia waantu enentáimtumaraintjai.

⁵⁻⁶ Israer-shuar asan Muisais timia núnisan wi akiiniamtai uchu (8) tsawant nankaasmatai tsupirtukarmiayi. Israer-shuarnum Pinjamín weeaitjai. Winia aparsha nukursha mai Israer-shuar ániakui wi imiá Israer-shuaraitjai. Wisha Pariséu tuinia núnisan Muisais akupkamun ti umirin asamtai chikichka winia sumamtikiatniun tujintrin ármiai. Tura Pariséu asan Kristu-shuarin ti kajerkan áinframjai.

⁷ Ashí nujajñkia waantu enentáimtumayujaj. Antsu yamaikia Krístujajñkia penké ántar ániawai tajai.

⁸ Ashí enentáimpramnia ákuisha winia Úuntur Jesukristu shiir enentáimtustin nekas péñkeraiti. Nu asamtai Krístunu ajakun wi takusmaj nu muijmiai ajasmatai núnaka iniaisamjai.

⁹ Nuna túran Niijjaj tsaniñkian pujajaj. Tura akupkamu umirkatniujaj péñker ajaschait-jaj antsu Krístun enentáimtakui Yus “péñkeraitme” túrutui.

¹⁰ Tuma asamtai ashí nankaamas wakeraj nu júiti. Krístun péñker nekaan nekas enentáimtustinniasha tura ni iniantkimiú kakarman takustinniasha wakerajaj. Tura Niijjaj métek ajastinian wakerakun ni wáitkiamunam tsaniñtinniasha tura Nii jakamia núnisan jákatniuncha wakerajaj.

¹¹ Túraknaka Krístujaj métek jakamunmayá nantaktiaj tusan wakerajaj.

Papru kakaram ajasmiai Kristu wakeramun umiktinian

¹² Kame wakerukuitjia nuna mash umirkachuitjai. Krístujaj métek nekas péñker shuar ajaschaitjai. Túrasha Kristu Jesus “nuj ejetajam” emka túrutkui, wisha nuj jeataj tusan kakaram ajasan pimpitsuk takaajaj.

¹³ Yatsuru, wisha nuj jeajaj tátsujaj. Antsu yaunchu túrutain kajinmatkin kakaram ajasan Kristu wakeramunam jeatniun takaajaj.

¹⁴ Tura nuna umikmatai nayaimpiniam Jesukrístujaj tsaniñkian shiir pujustinian Yus surustatui.

¹⁵ Ashí shuar Yusjaj katsuaru ájina nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak enentáimtikramprattarme.

¹⁶ Tura aneartarum. Naki pujutsuk jeajnia nujaj métek umirkatin pimpitsuk takastini-aitji.

¹⁷ Yatsuru, wisha tura chikichcha wíjjaj métek péñker túrajnia nu wáinkiarum atumsha núnisrumek túrarum.

¹⁸ Tura yajauch shuarsha írunui. Wi nuiksha ti ujakmajrume tura ataksha úutkun ujaajrume, nu shuar Kristu krúsnum jakamun mujjiainiawai.

¹⁹ Tuma ásar emesratniunam akupnakartatui. Ni ayashí wakeramun, ni yusrjá áintsaj, tuke umirainiawai. Natsanmainian túruiniayat wararainiawai. Tura ju nunkanmayanek enentáimtuiniawai.

²⁰ Antsu iikia nayaimpinmaya shuar asar ii Uuntrj Jesukristu in uwentikrampra asamtai nayaimpinmaya tatí tusar nákJai.

²¹ Nii taa, ii yajauch ayashin yapajjá ni ayashújjai métek ti shiir awajsattawai. Ashí uunt akupin ajas nu kakarmajai túrutmattaji.

4

Krístujai tsaniñkia wekáa asarum warastarum

¹ Nu asamtai, aneamu yatsuru, ii Uuntrj Krístujai tsaniñkiu asarum kakaram ajastarum. Maa, ti aneakun atumin enentáimtakun ti waraajai tura íistajrum tusan wakerajrume. Tawasap achikiar shiir enentáimsatniua núnisnak shiir enentáimtajrume.

² Ewautiancha tura Séntikincha, ii Uuntrj Kristu shuarj ásar, mai metek enentáimsarat tusan seajai.

³ Amincha, winia ajrú, nu nuwá yáinpta tusan seajme. Niisha wi iwiaaku chichaman étsereaku wijjai métek takasarmai. Tura Krimintisha tura chikichcha wijjai métek takasarmai. Yus náarin iwaaku átinium Yus áatraití.

⁴ Nu asamtai Uunt Jesusjai tsaniñkia pujá asarum warastarum. Ataksha “warastarum” tájarme.

⁵ Uunt Jesus tátin ishichik ajasai. Tuma asamtai tsanka enentái takakrum nu paant nekanati.

⁶ Itiurchat enentáimsatin atumjai penké atsutí. Antsu tuke Yus áujkum ashí itiurchatrum ujakta. Atsumamuram Yus seata. Túram Yus yuminsata.

⁷ Nuiñkia atumí enentáj ankant átinian, áentstikia penké nekaachminia nuna, Yus amasatuu. Yus atumin ankant awajtamsa asa atumí enentáin tura atumí enentáimsamuríncha yajauch wayawajin tusa shiir waitmaktatrume Jesukrístujai tsaniñkiu asakrumin.

Ashí péñker ana nu enentáimsatarum

⁸ Yamaisha yatsuru, júchiniak titiatjai. Yus-shuarti enentáimsatniun chichastatjai yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chikich shuarnasha péñker enentáimtusminia nusha, kame ashí péñker ana nu enentáimsatarum. Nuyásha chikich shiir anturkamnia ana nusha enentáimsatarum.

⁹ Wi unuiniarmajrumna nu umiktarum. Tura wi túramur íisurmena nu tura antukurmena nusha umiktarum. Túrakrumniñkia Yuska ankant átinian amastaj tusa pujurtamsattarme.

Jiripiusnumiá Yus-shuar Páprun kuítian akuptukarmiania nu

¹⁰ Ii Uuntrj Kristu anea asarum winiasha ataksha enentáimtururu asakrumin ti waraajai. Kame kajinmatrukmiarme tátsujai antsu kuítrum atsaku yáintkiatin tujinkiamarme.

¹¹ Tura kuítian atsumakun tátsujai. Antsu wi takakjana nujain warastinian unuimáruitjai.

¹² Kuítrinchatí pujustinia nuna nékajai tura ti nukap takustinia nunasha nékajai. Tsukamknasha jéemarnasha, itiarar takustinniasha tura penké takutsuk pujustinniasha unuimáruitjai.

¹³ Kristu ni kakarmarjín surakui ashí túramniaitjai.

¹⁴ Tuma ajn atumsha wi atsumamu akupturkarum ti péñker túramarme.

¹⁵ Jiripiusnumiá shuartiram, jú ti péñker nékarme. Masetunia nunkanam Yus-Chichaman etserumtai aya atumek kuit akupturkamiarme. Wi etserkamujai atumí wakanjín yáinma asamtai yuminsarum akupturkamiarme.

¹⁶ Atumek wi Tisarúnika nunkanam atsumakun pujajsha kuit akupturkamiarme.

¹⁷ Aya kuit akupturkakrumin tu enentáimtsujai. Antsu nu kuit Yusaj kawentramkaku tusan wakerajrume.

¹⁸ Epaprutíitujai akupturkamarum nujajsha atsumamaj nuna nankaamas tiaruncha wáinkiajai. Akupturkamarum nusha ti kuñkuin Yus susamua áinis ti shiir auyi.

¹⁹ Winia Yúsrusha ti pépkeran núkap takakui. Atumsha Jesukristunu ajasu asarum Yus seamniaitrum. Tura Yuska ti takakna nujai ashí atsumarmena nuna suramsattarme.

²⁰ Ii Aparj Yus tuke shiir atí. Nuke atí.

Amikmaamu

²¹ Winia náaruisha tura Jesukristu náarincha ashí Yus-shuar ainia nu chícham ujatruk-tarum. Niisha shiir pujusarti. Wi írutramusha núnisan shiir pujusarti tusa akupturmainiawai.

²² Tura ashí akupin Sésaraj pujuinia nuyá Yusna ajasaruka tura chikich Yus-shuarsha shiir pujusarti tusa chichaman akupturmainiawai.

²³ Ii Uuntrj Jesukristu atumniasha ti shiir yainmakarti. Nuke atí.

Papru KURUSENMAYA SHUARAN papí akuptukma

Kurusenmayq Yus-shuaran Papru áatramiania nu

¹ Wi Pápruitjai. Yus wakerutak Jesukristunun etserkat tusa akatra akupkamuitjai. Wisha ii yachi Timiutéujai

² ju papí áarar nuí Kuruse péprunam Kristu péñker umirkarum Yusna ajasuitrumna nu akuptaji. Yus ii Aparj atumin wáitnentaimturma asa yainmakarti imiatkinchanum tuke shiir pujustinian.

Papru Yus-shuaran Yúsan áujtusmianis nu

³ Iisha atumin Yus áujtakur ii Uuntrj Jesukristu Aparj Yus ashí tsawant yúmiñkiaji.

⁴ Atumsha Jesukristu ti shiir enentáimamusha tura ashí Yus-shuar aneamusha antukji.

⁵ Uwempratin chicham nekasa nu antukrum atumsha nayaimpiniam atumnian Yus ti shiir ikiusman wáinkiatái tusarum nákarne.

⁶ Nu chicham ashí nunkanam pampaakui shuara enentáin nereá áinis nusháa ajasar yamaikia péñker túrin áiniawai. Núnisañ atumjíncha túrunaiti. Yus ti nekas anenkartiniaiti tu etserkamu ántakrumin nu chicham atumí enentáincha nerekmiaji.

⁷ Nu chichaman Épapras ujatmakmarme. Niisha iijjai métek takasu asantai ti aneamuiti. Atumniasha Kristu takatrj ti shiir takartamsaiti.

⁸ Niisha átum Yus-shuar asarum mai anenai ajamun ujatmakmaji.

⁹ Iisha nu antukar Yus ashí tsawant áujtajrume. Yus ni wakeramun ti paant nekaprut-mawarat tusar seaji. Ashí Yúsnan ni enentáimtajrijjai ashí Níiniun paant nekaatniun Yus jintinramat tusar seaji.

¹⁰ Atumsha Kristunu ainia núnisrum péñker túrutak tusar seaji. Tura ashí ni wakerana nu umiakrum ashí péñker ana nu, nerektinia áintsarmek, túrattarme. Núnis túrarum Yus unuimiatki wéakrum Nin ti penker nekaak tusar seaji.

¹¹ Yus ti kakaram asa ikiantamprat tusar seaji. Nujai ashí itiurchat ákuisha páchitsuk ti shiir warasrum katsuntrattarme.

¹² Yus ni shuarj tsáapninia nuí ashí péñkeran susattawai. Tura incha nuí pachiinkiat-niun tsankatramka asakrin Yus Apa yumiñsarniaitrum.

¹³ Yus iwianchin nupetak iwianch akupeana nú kiritniunmaya uwemtikramar ni aneamu Uchirj akupeana nuí wearmakmiaji.

¹⁴ Ni Uchirj krúsnun jaka ii tunaarj nijiar tsankurtamar uwemtikrampramajai.

Kristu jakamujai Yusjai nawamnaikiar shiir pujustin

¹⁵ Yus wáinkiachminiaitiat ni Uchirj akiiniamai tura ayashimkiamiyai. Túmaitiat ashí najanamua nuna yaunchu pujú asa ashí akupniuiti.

¹⁶ Niiijjai Yus ashí nayaimpiniam írunna nunasha nunká írunna nunasha, ashí wáiniaj nunasha núnisañ wáintsuj nunasha mashi najanamiaji. Nu arantcha ashí akupin ju nunkanam írunna nusha, nayaimpiniam írunna nusha, iwianchnium írunna nusha, ashí Niiijjai najanamua áiniak Nin umirkarti tusa najanamua áiniawai.

¹⁷ Ashí najanamua nuna yaunchu, Kristuka tuke pjuwiti. Ashí najanamua írunna nuna emestsuk wáinniuiti.

¹⁸ Ashí Yus-shuar métekrak chikichik ayashstinia áinis enentáimkiumka nuna muuke Kristuiti. Tura nu ayashjñ ni iwiaakmarjjai iwiaaku átinian súsaiti. Niisha ashí jakamun-maya nantakniujai imiá nankaamantuiti. Nújajñkia ashí enentáimpramnia írunna nunasha akupniuiti.

¹⁹ Yus ashí takamtsuk Kristuj shiir pujumiyai.

²⁰ Núnisañ Yus Kristu krúsnun jakamujai ashí nayaimpinmasha tura ju nunkanmasha írunna nuna Niiijjai nawamnaikiar shiir pujusarat tusa wakerukmiaji.

²¹⁻²² Atumsha nuik tunáa túrin asarum atumí enentáin Yusa nemasrj ámarne. Tuma asarum yajá wekaimiarme. Antsu Kristu, aentsu ayashjñ ayashimiak, krúsnun wáitias jakamujai ii tunaarj asakármatai yamaikia Yusjai nawamnaikiar shiir pujaji. Nujai Kristu in péñker ajasuncha tunaan máatrachmancha tura sumamachuncha Yúsaj etejamtatji.

²³ Tuma asantai Jesukristu shiir enentáimtusrum kakaram ajasrum katsuartiniatrum. Tura uwempratin chicham antukuitrum nuyá kanakchatniuitrum. Ju uwempratin chicham ashí nunkanam etsernakuiti. Wisha, Papru asan, etserkatniun yaimjai.

Papru ashí Yus-shuaran yáinkratniuiti

²⁴ Atumin wáitiaknasha ti shiir waraajai. Kristu ni shuarin nekas pénger awajsat tusa wáitiana nuǵ pachiinkia asan waraajai. Ashí Yus-shuar Kristu ayashí áintsan ániakui Yus-shuaran yáintajtsan ayashrujai wáitiakun shiir enentáimjai.

²⁵ Atumin yáinkiai tusa Yus akattur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáintrintjai.

²⁶ Yámankamtaiknumia nekaachman Yus yamaikia ni shuarin paant awajsaiti. Nu chichamnasha ujakarai tusa winia akatar akuptukuiti.

²⁷ Nu chichamsha júiti: Kristu atumí enentáin pujak Niijijai métek ti shíiram awajtamsat-tawai. Nu imiá shiir chichamnum Israer-shuarchasha pachiiniainian Yus ashí ni shuari nekawaarat tusa wakerimiayi.

²⁸ Iisha Kristu étsereaji. Túrar ashí enentáimtikrar pénger nekaawarat tusar jintintiainiai. Nujai Kristujai tsaninkiar ashí pénger tsakararatatu.

²⁹ Tuma asamtai Kristu ni kakarmarin tí surakui nekas kakaram takaajai.

2

¹ Nekaatarum, yatsuru. Yus-shuaran yáintaj tusan ti takaajai. Tura atumíncha, Rautiséanmaya shuarnasha, tura ashí winia waitcha ainia nunasha yáintaj tusan ti takaitjai.

² Ashí shiir enentáimtikratniun ti takaajai. Núnisan aneniarum chikichuk enentáijjai métekrak wekasatarum tusan wakerajrume. Nu arantcha, ashí Yusna ti pénger nekaarum tuke katsuaruk tusan takaajai. Nujai Kristu ti pénger nekaattarme. Tura yaunchu nekaachman Yus yamá paant awajsaiti. Nuka Kristuiti. Tura Nii nekaatin nekas shíiraiti.

³ Tura kakaram ajasam Kristu pénger nekaam ashí shiir enentáimpramnia nusha tura ashí Yusna nekaamnia nusha nekaattarme.

⁴ Atumin chikich shuar niisháa chichamjai shiir chichartamas anañkramawarain tusan nuna tájarne.

⁵ Wi nuǵ atumjai pujachkuncha nuǵ pujajna áintsanak enentáimtajrume. Tuma asan átum métek enentáimprarum tura kakaram ajasrum Kristu nekas enentáimturumena nuna ísnaka shiir enentáimjai.

⁶⁻⁷ Nu asamtai átum ii Uuntrj Jesukristu nekas enentáimtusrum Yus-shuar ajasmarmena núnisrum yamaisha Nii nekas enentáimtusrum Niijjai tsaninkrum ashí túratarum. Nu túrakrum Nii enentáimtakrum tuke tsakaki wétatrume. Tura te tariara wajasrum Yusjai kanakchattarme. Yus-Chicham núnisan etsernakmatai nekamarme. Tuma asarum Yus tuke yumiñsarum, núnisan pénger wekasatarum.

Kristujai yamaram iwiaakma takakji

⁸ Aneartarum atumsha. Shuar aentsti enentáimmijain ashí ju nuñkanmayan enentáimprar tura Kristun enentáimtutsuk niisháa chichaman áujtamainiak nekaschajai anañkramataj tusa wakerutmainiawai.

⁹ Kristunam Yus ashí takamtsuk pujuwiti.

¹⁰ Túmakui atumsha Kristujai tsaninkiu asarum ni iwiaakmarj takamtsuk takakuitrume. Kristusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írunna nuna akupniuiti.

¹¹ Nu arant átum ayashniun tsupirnatskesha Kristu shuari ajasakrumin ashí ayash wakeramun, tsupirkatniua áintsan, Kristu ajapamiayi.

¹² Tura atumsha Yus ni kakarmarjijai Kristu jakan iniantkimia nu enentáimtusrum imianmiarme. Túrarum Kristujai métek iwiarnasmarme. Tura núnisrumek Kristujai métek nantakmiarme.

¹³ Nuikkia átumsha tsupirnatsuk atumí tunaari tuke akui atumí wakanjin jákauyarme. Tura yamaikia Jesukristujai tsaninkiu asakrumin Yuska atumí tunaari tsankur yamaram iwiaakman suramsaitrume.

¹⁴ Tura ashí ii tumashrin sumamtikramatin amia nuna japiruiti. Kristu krúsnun jakam-tai ashí akupkamujai sumamtikramamun tsankurtampramiai.

¹⁵ Núnisan Kristu krúsnun jaka, iwianchnium ashí akupin ainia nuna nupetak ashí ímiainain iniatgararmiayi.

Nayaimpiniam írunna nu enentáimtusarum

¹⁶ Akupkamunmaya Yus ankant awajtamsamtaí chikich shuar ame túramujai yajach enentáimturmarain. Yúamna nujai, úmamna nujai, uwitíncha, nantutíncha, tura tsawantíncha nampermam nujai chikich shuar yajach áujmatramkuisha çwarí urukatin?

¹⁷ Nu nampernum Israer-shuar Kristu túrattana nuna nakumainiak túrin ármiayi. Tura Kristu taa imia Niñki pujá asamtai nakumkamuka ántraiti.

¹⁸ Tura shuar “Péejchach ajasam Yus áujtsuk aya Yusa suntari shiir awajatsniuiti” túramkuñkia anturkairap. Nu shuar mesekranam wáinkiamun áujmatenak ántar nankaamantu enentáimtumainiawai. Aya aentsti enentáimian chichainiawai.

¹⁹ Tuma ásar Krístujaj tsaniñkiar wekainiatsui. Kristu ashí akupin asa ni shuarin Yúsnan jintintia shiir tsakarar tusa péñker wáiniui. Nu arantcha ashí ápateak Yus wakerana áintsan chikichik awajeawai.

²⁰ Atumsha Krístujaj jaka asarum aya aentsti enentáimtai ikiukniuutrume. Nuikia çurukamtai ju nunñkanmaya ana nu tuke páchiarum? Nii tuinia nu umirkashтиниiaiti.

²¹ “Ju antinchatniuiti, tuiniawai. Ju yúashtiniiaiti. Tura ju achikchatniuiti” tuiniawai.

²² Nusha çwarí, takasam amuukashatuak? Kame áyatik aents akupkamu ániawai.

²³ Shuar nu akupkamu umiiniak Yúsnan ti nékaitjai tura Yus shiir enentáimturui tu enentáimtumainiawai. Nu arantcha péejchach ajasan winia ayashrun ti asutiájai tu enentáimtumainiawai. Túrasha ayash wakeramunka nupeteatsui.

3

¹ Nuikia Krístujaj nantakin asarum nayaimpinmaya írrunna nu wakeruktarum. Nuñ Krístu pujawai Yusa untsuuríñi.

² Ju nunñkanam ana nu enentáimsuk aya nayaimpinmaya ana nu enentáimtustarum.

³ Atumsha Krístujaj tsaniñkrum jakamarme. Tuma asarum Krístujaj tsaniñkrum Yusjaj iwiaaku pujarme.

⁴ Krístukete ii iwiaakmarj. Nii nayaimpinmaya wantinkiuisha atumsha Niijjaj métek wantinkiatarme. Tura Niijjaj métek ti penker átarume.

Yaunchu iwiaakmasha tura yamaram iwiaakmasha

⁵ Tuma asamtai ju nunñkanmaya ana nu ajakratniua áintsarum iniaisatarum. Tsanir-matniusha, tunáa wakeruktincha, tura takakna nujaj nankaamas wakeruktincha ántar-yus tikishmatratniua áintsan asamtai iniaisatarum.

⁶ Shuar Yúsan umirtsuk aya nuna túrin ásarmatai Yus nin kajerak ti asutiáttawai.

⁷ Atumsha núnisrumek túrinuyarme.

⁸ Tura yamaikia jusha iniaisatarum: kajektincha, yajauch wakeruktincha, yajauch túratniusha, katsekmaktincha, yajauch chicham chichastincha, mash iniaisatarum.

⁹ Yus-shuar ajasum yaunchu enentáimtairam iniaisamarume. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruawairap.

¹⁰ Yaunchu enentai, pushí mamuru áiktinia áintsarum, iniaisaitrume. Núnisrum yamaram enentái, shiir pushi entsartinia áintsarmek, wekasaitrume. Tura Yus nu yamaram enentáin najana asa ashí tsawant pujurtawai nuna nankaamas Niijjaj métek shiir atí tusa. Túramtai Yus ti penker nekaki wéjai.

¹¹ Krístuka ashí írrunna nujaj nankaamas ashiyaiti. Niiniun pujurui. Tuma asamtai ashí ni shuarj enentáin pujá asamtai nusháa enentáimtuairchatin ániawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarj ainia nusha tura ankant ainia nusha, Krístu ashí ni enentáin pujakuí nusháa enentáimtuairchatniuiti.

¹² Yus atumin anenmak Niiniu arti tusa achirmakmarume. Túrutma asamtai jujaj shiir iwiampratniua áintsarum tuke túrin atarum: waitnenkartin, shiir awajkartin, péejchach átin, émtin áchatin, tura katsuntin átin.

¹³ Krístu atumí tunaarj tsançuramia núnisrumek nuamtak tsançukúnáiratarum. Chíkich yajauch awajtamkuisha shiir katsuntram yapajniaitsuk tsançukúnáiratarum.

¹⁴ Tura ashí nankaamas anenaitarum. Túrakumka chikichik ajasrum mash péñker túratarme.

¹⁵ Kame chikichik ayashtinia áintsarum ajastarum tusa Yus ni shuarj ajasat tusa achirmakmarume. Tuma asamtai Yusa shiirj atumí enentáin pujurtamsati. Nujaj Yus yuminsatarum.

¹⁶ Krístu shiir chichame atumí enentáin piakti. Nekas naka enentáimprarum jintinniaiyarum mai ikiakánai ajatarum. Yus kanta kantamárume tuke enentáijjaj Yus yuminsarum shiir awajatsarum.

¹⁷ Tura takaakmesha, chichaakmesha, kame ashí túramna nuka Jesukrístu shiir awajatsataj tusam ni kakarmarjjañ túrata. Túrakum Krístujaj Yus Apa yuminsata.

Yus-shuar túratniua nu

¹⁸ Nuwáitiram, atumí aishri umirkatarum Uunt Yus nuna wakerakui.

¹⁹ Áishmagtiram, atumí nuwé aneatarum. Atumí nuwejjaj kajernaikiairap.

²⁰ Uchitiram, ame apa nukusha tuke umirkatarum. Nu túrakum Yus shiir enentáimtiksattarme.

²¹ Uchirtintiram, atumí uchirĭ ti kakantrairap. Ti kakanteamka uchisha ti kuntus pujus péŋker wekasatniun nakitchanpiash. Nu túrunawajĭn tusarum ánrarum atumí uchirĭ kakantrairap.

²² Takarniutiram, atumí uuntrĭ shiir umirkatarum. Ju nuŋkanmayá uuntrĭ aĭn aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke péŋker takastiniaitrum.

²³ Ashí túramna nu asump enentáijĭaj takakmasta. Aya aentsuk yáigŋinia áintsachu antsu nayaimpinmayá Uuntrum yayá áitkiasrum takastarum.

²⁴ Ame Uuntrum Kristu asa nayaimpiniam ashí shiir takustinian tsankatramkattawai.

²⁵ Antsu tunáa túrin ni yajauch túramujĭj métek akinkíattawai. Yus ashí áentsun métek iyawai.

4

¹ Úunttirmesha, atumí Uuntrĭ atumin wáiniuk nayaimpiniam pujatsuk. Tuma asamtai atumí yáimma jiatsuk péŋker iniartiniaitrum.

² Yus áujkuram Nii yumĩsarum asummiarum iniaitsuk áujsatarum.

³ Incha Yus áujtustarum. Kristu-chicham yaunchu nekaachman yamá étserkun sepunam pujajai. Tuma asamtai nuna shiir aŋkant etserkat tusarum áujtursatarum.

⁴ Tura wi paant etserkatniuitĭaj núnisan etserkat tusarum áujtursatarum.

⁵ Yus-shuarhajĭj shiir túratarum Yus-Chichaman yajauch enentáimturarajĭn. Kakaram ajasrum tsawant ánrarum iniaŋkasairap.

⁶ Ti shiir chichamtin átiniaitrum tura anturújamin átiniaitrum. Núnisrum chíkich chíkich Yus-chicham paant ujaktin nekaattarme.

Amikmaamu

⁷ Ii aneamu yachĭ Tikikiu ashí wínian ujatmaktatrum. Niisha wijĭj métek Yúsnan pimpitsuk ti péŋker takasuiti.

⁸ Nu asamtai ii juĭ pujajnia nuna ujatmak ikiantamprarat tusan akuptajrume.

⁹ Núnisaŋ ii aneamu yachĭ Unisemu niĭjĭj winiawai. Niisha atum wééaiti, tura Yusjĭj shiir wekaawai. Nu shuar ashí juĭ túrunamun ujatmaktatrum.

¹⁰ Aristarku wi sepunam tsaniŋkia pujamur amikmaatmarme. Núnisaŋ Markus, Pirnapí kaná yachĭa nu, amikmaatmawai. Niisha nuj jeamtai antukmarum núnisrum péŋker wáinkiatarum.

¹¹ Justu Jesus náartin amikmaatmarme. Júchik áiniawai Rúmanmayá Israer-shuar winia Yúsnan etserkatĭn atutkaru ainia nu. Túmainiak ti shiir ayamtikruiniawai.

¹² Épaprassha, atum weeá, Krístunun etserin asa atumin amikmaatmarme. Niisha ashí tsawant Yúsán áujeak Yusjĭj kakaarum tuke shiir Yus wakera nu túrak tusa seatramprume.

¹³ Wisha Épapras atumin ti enentáimturman nékajai. Núnisaŋ Rautiséanmayá shuarnasha tura Irapurísnumiá shuarnasha ti páchiniawai.

¹⁴ Rukas, aneamu tsuákratin, núnisaŋ Témassha amikmaatmarme.

¹⁵ Tura Rautiséanam pujuinia nú Yus-shuarsha amikmaatruatarum. Núnisaŋ Nímpiassha tura ni jeen irunainia nú Yus-shuarsha amikmaatruatarum.

¹⁶ Átum juĭ papí áujsarum umikrum Rautiséanmasha nuyá Yus-shuar áujsarti tusarum akupkatarum. Tura atumsha núnisaŋ Rautiséanmayá papí támatai atumsha áujsatarum.

¹⁷ Tura juĭ Arkipiui titiarum: “Ii Uuntrĭ Jesus ni takatrĭn suramsa nu péŋker umikta” tawai, titiarum.

¹⁸ Wi, Papru, winia uwejrújĭj júchiniak áatkun amikmaajrume. Sepunam pujajna juĭ enentáimturatarum. Yus shiir yainmakarti.

Nuke atí.

Papru

TISARÚNIKIANMAYA SHUARAN

Emka papín aar akuptukma

Papru ni tsaniakmarijjaj Yus-shuaran áatramiania nu

¹ Wikia Pápruitjai. Wisha Serpanujaj tura Timiutéujaj Tisarúnikianmaya Yus-shuar aja-suitrumna nuna áatjarme. Atumsha Yus-shuar asarum Apa Yúsnaitrume, tura Uunt Jesukrístunuitrume. Ii Aparj Yus, tura ii Uuntrj Jesukrístu waitnentrana ásarmatai, ti shiir imiatkinchanum pujustarum, tu wakerajrume.

Tisarúnikianmaya shuar Yus nekas enentáimtusar umirkatniun jintintiarmania nu

² Iisha Yus áujkurkia atumniasha tuke enentáimtusar Yus shiir yumiñsaji.

³ Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukrístu tatí tusarum tuke tsawant nákarne. Nu neka asar, ii Aparj Yus áujkui, nusha ashí enentáimsar áujtajrume.

⁴ Yatsurú, Yus anenmarme. Anenma asa Winia arti tusa achirmakurmena nusha nékaji.

⁵ Enentáimpratarum. Iisha Yúsaj Uwempratin Chicham atumin ujakmajnia nusha aya chíchamjain tíchamji. Antsu nú arant, nu chicham nekasaiti tusar Yusa Wakanj kakarmarjjaj tímiaji. Tura átum péñker matsamsarat tusar atumjaj pujusar shiir iruntrar wekasarmiaji. Nusha paant nékarne.

⁶ Atumsha yamaikia íksarmek ii túramiaj nu, tura ii Uuntrj Jesukrístu túramia nu túrarme. Itiurchat aijn Yus-Chicham umikiurme. Tura wáitiatatrumek Yusa Wakanj shiir enentáimtikramkui warasrum pujarme.

⁷ Nu túrakrum ashí Masetúnia tura Akaya nuñkanmaya Yus-shuarsha shiir wekasatin jintintiarne.

⁸ Tuma asarum Uunt Yusa chichame ti ipiamparurme. Tuma asamtai Masetúnia tura Akaya nuñkanmaya shuar nuna nékainiawai. Tura nú nankaamas Yus nekas umirkarmena nuna ashí aents nékainiawai. Nuna nékainia ásar ii étserman atumainiatsui.

⁹ Antsu átum in péñker itiaamun nii íksañ ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusarum umirkarumna nunasha ujatmainiaji.

¹⁰ Tura nuyasha Yusa Uchirj Jesus jakamunmayan Yus iniantkimia nu, nayaimpinimaya tatí tusarum átum nákamuncha ujatmainiaji. Iis, Jesus Niñkiti Yusa kajetáirj tsawantrj jeattana nuyá uwentikrampratin.

2

Yus-chichaman paant ujakarmiania nu

¹ Atumsha nékarne, yatsurú, iisha ántar atumjain jeachmaji.

² Antsu itiurchat wáinkiaitiatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitiatan Yus yáintkiui Yusa chichamen ujakmajrume. Nuka atumsha ti penker nékarne.

³ Warí, iisha Yus-Chicham atumin ujakmiaj nu nekasauyi. Tura yajauch enentáimsan, anañkatjarum tusan tíchamjarme.

⁴ Antsu Yus in péñker enentaimturmas Uwempratin Chicham etserkatarum tusa akatrampramiaji. Tuma asamtai núnisrik étsereaji. Túrasha aya aents waramtiksatit tusar étsertsuji. Antsu Niñki Yúsak ii enentáin nekartamin asamtai, shiir enentáimtiksatitsar túraji.

⁵ Átumka nékarne, penkesha shírmach chichasan anañkachjarme. Nuyasha, kuit achiktai tusar ántar chichaschamji. Núnaka Yus nékawai.

⁶ Iisha Kristu akatramurjntji. Tuma asar ni kakarmarjjaj akupkatin takakuji. Páchitsuk túramniauji. Túrasha waantu ajastaj tíchamji. Nuyá atumsha tura chikichcha in waantu awajtamsataj tákuisha iikia nakitmiaji.

⁷ Antsu uchi kufrchin ni nukurj péñker iis tsakatmana áintsarik iikia atumniaka shiir ísmajrume.

⁸ Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisachaaji, atumín ti anea asar¹.

⁹ Yatsurú, ii atsumaj nu sumarmaktai tusar kakaram takakmasmaj nu çkajinmatkintrumek? Átsá. Nékarne. Iis, Yus-Chicham étserkur, tsawajsha káshisha takasmiaji. Nusha, akirkata, tíj tusar takakmasmiaji.

¹⁰ Yatsurú, atumjai pujumiaj nuj iisha Yus wakerana nu túrimiaji, tura yajauch túrutsuk shiir wekasamiaji. Nujai incha çhíkíchisha yajauch chichartamkatniusha atsumiaji. Nuka atumsha nékarne tura nú arant Yus nékawai.

¹¹ Tura atumniasha ankant ankant Yúsnum ikiakármajrumna nu nékarne. Tura uchin ni aparj átsankeana nútiksarik shiir enentáimtikramajrumna nusha nékarne.

¹² Tura Yúsjai shiir wekasatarum tímiajrumne. Yus nankaamas uunt asa ashí aku-peawai. Tura Yus-shuarairumna nuna, Winin pachiinkiarat tusa, Yus untsurmarme. Yus untsurma asamtai Níniuitrume. Niiniu asarum Yusa uchirja núnisrumek wekasatniuitrume.

¹³ Yus-Chicham ii étserma antukrum, aya áentsnumiançhaiti tímiarme. Yúsnumiaiti tímiarme. Nu tiniu asarum umirkarmarme. Kame nekas tárume. Ii étserjinia nu nekas Yusa chichamente. Átum nu chicham umirka asakrumin, atumí enentájn kakaram ajastinia amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúmiñkíaji.

¹⁴ Yatsurú, ju nekaatarum. Aya atumek wáitiatsrumne. Ashí Jutía nunkanam Israer-shuar, ni shuarínketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásarmatai wáitkiasarmiaji. Yamaikia atumniasha atumí shuarín wáitkiarmainiawai. Nujai Jutía nunkanmaja Yus-shuarjai métekrak ajasurme.

¹⁵ Niisha Israer-shuaraitaunt Yus-Chichaman etserin armia nuna nuamtaketiat máawarmiaji. Tura nú weaká Uunt Jesunasha máawarmiaji. Tura incha aa jíiki akuptamkarmiaji. Maaj, niisha Yúsán shiir enentáimtikiainiatsui. Tura núnisan ashí áentsun kajerainiawai.

¹⁶ Warí, Israer-shuarcha Uwempratin Chicham ujaktaj tákurnisha niisha suritramainiaji. Nuna túruiniak yaunchu tunaan túriarmia nújainkia nankaamas yamaikia túrawarai. Pai, túrasha yamaikia Yusa kajetairíi imía tsumaj ana nuj pujusarai.

Papru ataksha Tisarúnikianam irautajtsa wakerimiania nu

¹⁷ Iisha, yatsuru, ishichik tsawant atumíyja kanakir jeachat pujayatrik, atumjajsha wáimniayachiatrik tuke ii enentáinkia enentáimtimjarme. Tuma asar ataksha atumin íistai tusar ti wakerimji.

¹⁸ Nekas winitiaisar wakerimji. Imia wíkisha winitniun ti nukap enentáimsamjai. Tura iwianchi uuntri Satanás tuke nuna suritrammiaji.

¹⁹⁻²⁰ Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukristu tátintri shiir enentáimsar nákaji. Nii támatai imía warastatji. Atumin Yus-shuar awajsa asar, Nii támatai atumsha íjjai Jesus shiir inkiuntatji. Tuma asamtai nu enentáimsar tawasap achiktinia áintsar waraaji.

3

¹⁻² Iisha ataksha atumin íistaisar ti wakerimji. Tura tujintiatur iikia Atenas péprunam juákur ii yachi Timiutéu atumin íirmainiarat tusar akupkatai, timiaji. Iisha Kristuj Uwempratin Chicham etsermiaj nuj, Timiutéuka íjjai métek takasuiti. Tuma asa niisha Yusa takatrin takáa asa atumniasha Yusaj kakartarum turamarti tusar akupkamji.

³ Tura nú arant, itirchatan wáiniuk iniaisarain tusa ikiakátmararti tusar Timiutéu akupkamji. Yatsurú, átumka nékarne, ashí Yus-shuaraitjinia nuka páchitsuk wáitsatniuitji. Iis, tuma asamtai atumsha ti nekas itirchatnum pujarme, Yus-Chicham umirka asarum.

⁴ Imiatarum, atumjai nuik tuke pujumjinia nuj “iisha wáitsartatji” tíchamkajrum. Iis, túrunachaik. Nuka nékarne.

⁵ Tura atumin íwianch tunaanum ajunmarchariash tusan, wisha kúntuts enentáimsamiajai. Tura ántar takaschajiash tu enentáimsamiajai. Tuma asamtai nekaataj tusan ti wakerakun, wisha ti nukap tsawant nákaschamiajai. Antsu wárik Timiutéun akupkamiajai. Yúsjai péñkerash wekainia tusan, “nu ininirusam ikiuuta” timiajai.

⁶ Tura yamaikia Timiutéu Tisarúnikianmaja wakетки tayi. Niisha taa, átum Yus aneakrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin íistaisar wakerajnia núnisrumek atumsha incha íirmaitai tusarum wakeramuncha Timiutéu ujatmaji.

⁷ Tuma asamtai, yatsuru, ashí itirchat tura wáitsatin wáiniatrik átum Yus shiir enentáimta asakrumin iisha shiir enentáimji.

⁸ Atumsha Yúsjai tariara weká asakrumin, shuar jaa péñker ajas enentái chinkiana áintsarik enentáimji.

⁹ Yus péⁿker umirka asakrumin, iisha shiir waraaji. Warasu asar ii Yusrj ti yúmiⁿkiaji.

¹⁰ Incha Yus akuptamkurniⁿkia atumiⁿin tímiajaik jeartiai tusar wakeraji. Túrar Yusna nekaatin mash nékatsrum nu jintintiatai tusar tuke ti seaji.

¹¹ Atumiⁿin weri ístinian ii Aparj Yussha tura ii Uuntrj Jesukrístusha in yáinmaktai tusar wakeraji.

¹² Atumin ii aneajnia núnisaj Yus atumniasha mai anenai ajatniun tura chikichcha aneastinian enentáimtikramprati. Tura nú nukap aneⁿkrattain Yus amasarti tusar wakeraji.

¹³ Yus ikiakátmakui átum tunáa túrutsuk Yus umirkarum wekasatarum tusar ii Aparj Yus seaji. Ii Uuntrj Jesus Níiniurijjai winiak péⁿker wekaarmin tati tusar taji.

4

Péⁿker túratniun Yus wakerana nu

¹ Iikia Uunt Jesus akupkamuitji. Tuma asar nu kakarmajaj atumniasha ju túratarum tusan akupeajrume. Atumsha iwiaaku pujarmena nuj Yus shiir waramtiksataram tura tuke péⁿker túrukum wetarum tusar seajrume. Iisha nuik atumin unuiniarmajrumna nútiksarmek túratarum.

² Uunt Jesusa akupeamurijjai tura nu kakarmajaj atumniasha nuik unuiniarmajrumna nu átumka nékarme.

³ Atumin Yus wakerutmarmena nu júiti: “Shuar aya Winin sumama pujusat tusan chikichkinesha shuar tsanirmaashti”.

⁴⁻⁵ Yus-shuarcha ainia nu, Yúsan nékainiachu ásar, aya niⁿki enentáimtumasar aya ni ayashj wakeramunak umiktinian wakeruiniak nuwan enentáimtuiniawai. Atumsha núnisrumek túrawairap. Antsu atumsha atumi nuarj péⁿker enentáimtusrum shiir aneasrum ayastarum.

⁶ Nú arant, amesha ame yatsum ananⁿkam ni nuarj yajauch awajtusaip. Nu túrakrumniⁿkia ii tímiajrumna nútiksaj Uunt Yus ti kakaram asutiámawartatui.

⁷ Warí, Yus incha péⁿkercha yajauch túratarum turamchaitji. Antsu aya péⁿkerak túratarum turamji.

⁸ Tuma asamtai shuar ju chichaman nakitiakka áentsun nakitiatsui, antsu Yúsan naki-traiti. Tura nu Yussha ni Wakanin amaawiti tunaan túrashtinian.

⁹ Tura yamaikia nuamtak Yus-shuar aneniastin ana nuna ti neka asakrumin áatrashtatjarme. Warí, imia Niⁿki Yus atumin mai anenai ajatniun jintinramawarmatai nékarme.

¹⁰ Iis nútiksarmek aneniatsrumek ashí Masetúnianam matsatainia nujai. Túrasha, yatsuru, atumi aneⁿkrattairj nú nukap ajasti tusan, seajrume.

¹¹ Yamaikia tímiaj nútiksarmek, yayauchin túruinia nuj wekatsuk, chikich shuarna pachittsuk, atumi takatrjⁿ shiir ankant pujusrum atumi uwejejaⁿ takakmá pujutarum.

¹² Átum táasajrum tusan tájarme. Túrakrumniⁿkia atumniasha chikich shuar péⁿker enentáimturmasartatui.

Kristu tátintri

¹³ Yatsuru, Yus-shuarcha ni shuarj jakamtai “atakka wáinkiashtatjai” tusa ti kuntuts enentáimainiawai. Tuma asamtai atumsha nútiksarmek kúntuts enentáimsajrum tusan júna tájarme. Jákaru ainia nu urukawartinkit paant nekaatarum.

¹⁴ Jesus jákayat nantakchamkia. Núnisaj Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha.

¹⁵ Tuma asamtai Yus-Chicham nekaprutamnia nuna atumniasha jintintiajrum. Iisha tuke iwiaaku pujarin Kristu táakuisha jákaru ainia nuka ikiuakur émkiⁿshatjai.

¹⁶ Antsu Yus akupeakui, Yusa suntarj uuntrj unsumkui tura Yusa kachurj unpuar-matai Uunt Jesukrístu unsumuk Yus pujamunmayá tarattawai. Nuiⁿkia Kústunu ajasar jákaru áiniana nu iwiansumunmayá nantakiartatui emka.

¹⁷ Tura nuyá iisha Yus-shuar tuke iwiaaku pujajnia nu Kristujai yuranminiam ajapén inkiunaikiartatjai. Nuní ashí nayaimpiniam ii Uuntrj Jesukrístujaj tuke iwiaaku pujusar-tatjai.

¹⁸ Tuma asamtai ju shiir chicham atumin ujakjana jujai mai ikiakánai ajatarum.

5

¹ Túrasha, yatsuru, ni tátintri waritiⁿ tura warí tsawantaj, nuka áatratin atsumatsrum.

² Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiaiti. Núnisaj nákatsuk pujuiniaj Uunt Kristu tsawantrj jeattawai.

³ Ashí shuar “Pai, yamaikia ti nekas shiir péŋker pujuiniaji” tu matsatainiaj, aya aneachma nuŋka mesertin tsawant jeattawai. Nuwa ajantin aya aneachma jatema áintsan, nékachmanum átatui. Túmakui pisartin penké atsuttawai.

⁴ Túrasha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsan tarutrámashatui.

⁵ Enta, átumka tsáapninium wekáa asarum Yus-shuairmeka nékaitrume. Iikia kiritniumianchuitji.

⁶ Nu tuma asar, chíkich uruka núnisrik, ii enentáin kanartinia núnisrik “Warí, winia itiurtawa” tíchami. Antsu naka enentáimsar anearmi.

⁷ Iis, kashi kanarchatniukait. Tura nampeena nu kashi nampeenawai.

⁸ Túrasha iikia shiir tsáapninium wekáiniaj nuka naka enentáimprar tuke nampetsuk pujustiniaitji. Suntar ni nemasri anan̄kruawain tusa anear wekasatniuiti. Tura iisha núnisrik íwianch yajauch awajtamsajj tusar anearmi. Yus enentáimtusar aneetnuiitji. Tura núnisrik iisha, ju nun̄kanmaya uwemprar Yúsaj tuke pujustatji, tu enentáimprar wetái.

⁹ Páantchakait. “Jinium wéchatnuiutrume” Yus incha túramji. Antsu ii Uuntri Jesukristujaj uwempratniun tsan̄katramkaitji.

¹⁰ Niijjaj métekrak iwiaaku ami tusa Jesukristu in jarutramkamiaji. Nu tuma asamtai iisha ii ayashijjaj iwiaaku pujakrishá Niijjaj iwiaakji, tura ii ayashijjaj jáakrishá Niijjaj tuke iwiaakji.

¹¹ Tuma asamtai tuke túrarmena núnisrumek, shiir enentáimtiknaisarum mai ikiakánai ajatarum.

Papru Yus-shuaran jintintiamiania nu

¹² Yatsurú, juna seajrume. Atumjaj pujuinia nú shuar Yúsnan takakmainiakui shiir enentáimtustarum. Jintinramuk chichartamainiakui umirkatarum.

¹³ Yúsnan takainia ásarmatai ti péŋker enentáimtusurum aneestarum. Tura yajauch awajnaitsuk ti shiir nawamnaikiarum matsamsatarum.

¹⁴ Tura junasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum ikiakártaum. Kakarmachu ana nusha yáintarum. Tura ashí shuarjaj kajetsuk katsuntrarum wekasatarum.

¹⁵ Aneartarum, yatsuru. Chíkich yajauch túrutmamtai amesha nútiksamek yapajki-aip. Antsu nuka túrutsuk átumka mai péŋker awajnai ajatarum. Tura nú arant, ashí nun̄kanmasha ashí shuarsha nútiksarmek túratarum.

¹⁶ Tuke shiir warasrum pujustarum.

¹⁷ Tuke tsawant iniaitsuk Yus áujtsatarum.

¹⁸ Péŋker pujakmesha, itiuŋchat pujakmesha ashí warí wáiniam nujsa Yus shiir yu-minsatarum. Kristu Jesusaj Yus-shuar ajasutiram nu túratniun Yus wakerawai.

¹⁹ Ji ikiajniaktinia núnisan̄ Yusa Wakaní enentáimin keana nuka tunaajaj téenmantikiarum ikiajniakairap.

²⁰ Yus jintinrar akupkamu asa péŋker chichaman etserainia nu nakitirairap.

²¹ Ashí etserkamu ana nu nekasashit tusarum nekaatarum. Túrarum aya péŋker ana nuke achiktaram.

²² Ashí yajauch ana nuyanka kanaktiarum.

²³ Yuska, imiatkinchanum wekasatin amaana nu, atumin takamtsuk shiir awajtamsartí. Tura ii Uuntri Jesukristu táatsain̄, atumí wakaní atumí enentaj tura atumí ayashísha mash métek tunaajain̄chu awajtamsati.

²⁴ Yus atumin untsurmakmarumna nu tímianak uminiaiti. Nii tana nuna yawetsuk túrattawai.

Amuamunam amikmaatin

²⁵ Ashí yatsurtiram winiasha Yus áujtursatarum.

²⁶ Ashí Yus-shuar árum nu, amikmaaniatarum.

²⁷ Winia Uuntru Jesukristu chichamejaj juna tájarme. Ju papí ashí Yus-shuar antukarti tusarum ashí iruntramunam áujtsatarum.

²⁸ Ii Uuntri Jesukristu atumin yáinmákartí. Nu atí.

Papru

TISARÚNIKIANMAYA SHUARAN

Ataksha papin aar akuptukma

Papru ni tsaniakmarjijai Yus-shuaran áatramania nu

¹ Wikia Pápruitjai. Wisha Serpanujai tura Timiutéujai iruntran atumin Tisarúnikianmaya Yus-shuar árumna nuna ju papin áatjarne. Atumsha ii Aparj Yusna tura Uunt Jesukristunu ajasuitrume.

² Tuma asakrumin ii Aparj Yus tura ii Uuntrj Jesukristusha waitnentrama ásar matai yáinmakar péñker awajtamsarat tusan wakerajrume.

Kristu támatai tunáa shuáran Yus asutiáttawai

³ Yatsuru, átum péñker matsatu asakrumin iisha Yus tuke yúmiñkajai. Átumka Yus nekas enentáimustin nú núkap nekaakrum wéarme. Tura nuamtak aneniastincha nú núkap nékarme. Nu tuma asamtai Yus yumiñsatniuitji.

⁴ Átum Yus-shuar asakrumin chíkich shuar atumin yajauch awajtamainiawai. Tura itiurchat wainiu asarum ti wáitiarme. Nu tuma ajñ átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainiaji.

⁵ “Yusa akupeamurjñ pachiinkiamniaitrume” Yus túramprume. Nuñ pachiinkiataj tau asarum ju nuñkanam wáitiarme. Tura wáitiakrumsha nuna nañkaamas iwiarnaruitrume nuñ pachiinkiatin. Kame nújajñkia Yus atumin achirmak péñker túrait, nuka páantaiti.

⁶ Núnisaj atumin wáitkiarmainia nunasha Yus tímiatrusaj wáitkiasartincha nekas péñkeraiti.

⁷ Tura wáitiarmena nusha Yus íijijajsha ayamtikramprartin péñkeraiti. Ii Uuntrj Jesukristu ji keana ímianisaj kakaram suntarjijai nayaimpinmaya tara wantinkiamtai, nu tsawantaj Yus ayampratniun suramsartatji.

⁸ Tura nú tsawantajsha Yúsan nékainiatsna núnaka ii Uuntrj Jesukristu ti asutiátajtsa tátatui.

⁹ Taa, nincha menkakatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nuñ akupeajrume, átum winia umirtukcha asakrumin” nin tiartatui.

¹⁰ Kame Uunt Jesukristu tátin tsawantrj jeamtai, ni shuarj, ni enentáj péñker awajsaru áinia nu, ni náarjñ shiir pachisartatui. Tura Yúsan umikiaru ásar, ti shiir enentáimsar Jesukristun ísartatui. Ii ujakmajrumna nu antukrum umirka asarum atumsha nuñ pachiinkiatarme.

¹¹ Nu tuma asamtai ii Yusrjñ atumin tuke áujtajrume. Yus atumin achirmakuitrume. Nuñkia Yuska atumí enentáin takas Nii wakera nuñaj métek awajtamsati, taji. Yus umirka asarum péñker wekasataj tusarum wakerarme. Túrarum Yus enentáimtusum péñker túratin wakerarme. Tura wakerarmena nu umiktin Yuska ni kakarmarjijai yáñti, tu áujtaji.

¹² Átum péñker wekas asakrumin chíkich shuarsha ii Uuntrj Jesukristu náarjñ nañkaamantu enentáimtusartatui. Nusha auka ii Yusrj tura ii Uuntrj Jesukristu waitnentáimturmasar péñker wekasatniun yáinmakui túrarme. Túramtai chíkich shuar shiir enentáimturmasartatui.

2

Tuke Tunaarintin wantinkiattana nu

¹ Tura, yatsuru, ii Uuntrj Jesukristu tátatna nuna tura Niijjai inkiunaiktatjinia nunasha ujaktinian wakerajrume.

² Chíkich shuar anankramawar “Uunt Jesukristu tsawantrj jeayi” tu ujatmaktaj tusar wakeruiniawai. “Ímiarmaj nuñaj nékajai” turamainiakuiasha, “chícham étserman antukmaj nuñaj nékajai” turamainiakuiasha, tura “Papru papí áarmarj nuna takui nékajai” turamainiakuiasha, páchim enentáimprairap. Tura sapijmiakairap tusan seajrume.

³ Péñké anañnawairap. Nekaaturum. Nu tsawant jeatsajñ Yúsnumiá kanaktin átatui. Tura nú arant, Tuke Tunaarintin, emesnartatna nu wantinkiattawai.

⁴ Niisha aya wíniak enentáimtursarat tusa wakerak, ántar-yusnasha tura nekas Yúsnasha shuar tikishmatrarajñ tusa ti nakitrattawai. Niñki ti nañkaamantu enentáimtumás, Yusa nuke ajas, Uunt Yusa Jeen wayáa pujustatui. “Júiti Yus” shuar turutiarat tusa mash túrittiawai.

⁵ Yatsurtiram, wi atumñaj pujakun nuna ashí ujakmajrume. ¿Nuka kajinmakniurmek?

⁶ Yámaikikia, ni tsawantrj jeatsajñ, Tuke Tunaarintin wantinkiañ tusa surimia nu nékarme.

⁷ Tunaasha yamaisha awai, tura paantcha. Túrasha tunaan surimia nu juramkitniuk taasai nu tunaaka paant átin.

⁸ Nujñkia nu Tuke Tunaarintin wantinkiattawai. Tura Uunt Jesus ni wenejaj umpui aun máattawai. Tara ni wincharjjaj nuna amuktatui.

⁹ Nu Tuke Tunaarintin, iwianchi uuntrj Satanás akupkam tátatui. Ni kakarmarj iniak-mastaj tusa, aentsti túrachminian túrak anañkawartatui.

¹⁰ Jinium wémin ainia nú shuaran ashí tunáa ana nujaj anañkawartatui. Nu shuar Yus-Chichaman nekas ana núnaka nakitraru ásar uwemprachmin áiniawai.

¹¹ Iis, nekas ana nuna nakitia ásarmatai, ti anañmamawar wait-chichaman umirkarat tusa Yuska tsanñkattawai.

¹² Warí, niisha ni tunaarjñ wararainiak, nekas ana nuna nakitraru ásarmatai, Yuska “jiniium wétatrume” tiartatui nuna.

Uwempramin ainia nu

¹³ Tura, yatsuru, Uunt Jesus aneamu árumna nu, iisha atumin enentáimtusar ii Yusrj yumñsaji. Átum nekas ana nuka umikiurme. Tuma asakrumin Yusa Wakanj atumí enentáin pēñker awajtamsaitrume. Nu tuma asamtai yámankamtaikniumiá Yuska “átum uwempramniaitrume” túramprume.

¹⁴ Nu túrunat tusa Yus wakerutmarme. Krístujaj Uwempratín Chicham ii ujakjinia nujaj Yus untsurmakmarme. II Uuntrj Jesukrístu ti pēñker pujana nuj pachiinkiamniuram tusan ujakmajrume, nú chichaman.

¹⁵ Wátsek, yatsuru, Yusjaj katsuartarum. Yus-Chicham etserkamu antukurmena nu, tura wisha áaran akuptukjarmena nusha kajinmatkiirap.

¹⁶ Ii Uuntrj Jesukrístusha tura ii Aparj Yussha ti pēñker ásar incha anenmatsjik. Tura waitnentrama ásar incha shiir enentáimtikramji. Tura nú nañkaamas ii tuke pēñker pujustinian ikiurtamsaitji.

¹⁷ Nu tuma asamtai, pēñker chichastarum tusa, tura pēñker takastarum tusa Jesukrístuka shiir enentáimtikramar ikiakátmarartí.

3

Papru “ájutursatarum” tímiania nu

¹ Nuyá, yatsurú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsañ ashí nunñkanam wakerukartí tusarum Yus seatarum.

² Tura yajauch shuar, pēñker ana nuna ti nakitiainia nu, incha yajauch awajtamsachartí tusarum Yus áujkartustarum. Kame chikich aents Yúsan umirkacharu áiniawai.

³ Túrasha Uunt Jesusak atumin iniaitsuk wáitmaktatrume. Tura atumin ikiakátmartatrume. Tura iwianch anañkramataj takui kíishturmaktatrume.

⁴ Kame Yus atumin yainmaktatrume, taji. Ii tájinya nu yamáí umiarme. Tura tuke umirkattarme. Nusha nekaar shiir enentáimji.

⁵ Uunt Yus yainmakartí ni aneñkrattairjñ nekaatniun. Krístu itirchatan katsuntramia núnisañ atumniasha katsuntratniun Yus yainmaktí.

Takastinaitji

⁶ Yatsurtiram, antukturum. Ii Uuntrj Jesukrístu chichamejaj ju taji: “Nuyá Yus-shuar wi jintinramun nakitiak aya wékana nu ikiuktiarum.”

⁷⁻⁸ Ii túrajnia núnisrumek túratin nékarme. Júiti: atumjaj pujusmaj nuj tuke takakmasmijai. Atumí yurumkarj iisha akikmakar yurummijai. Atumjaj itirchat áchatí tusar tsawajsha káshisha tuke takakmasmijai.

⁹ Kame iisha, Krístu akatramu asar “yáintkiatarum” tíminiuji; túrasha nu tútsuk, ii túrajnia núnisrumek túratin nekaatarum tusar, iisha tuke tsawant takaamijai.

¹⁰ Warí, atumjaj pujumijaj nuj “Takastinian nakitiana nuka yurumáshti” tichamkajj.

¹¹ Iis, atumjiniá weeá, nañkamas enentáimiainiak tura nañkamas túruiniak penké takatsuk pujuiniawai, túramainijai.

¹² Nú shuaran ii Uuntrj Jesukrístu chichamejaj “Tákamtak shiir takakmasartí” taji.

¹³ Yatsurtiram, yawetsuk shiir túratarum.

¹⁴ Ju papiniun ii tájinya nuna, shuar umiktinian nakitiakuñkia “umichuiti” tákuram, ni natsarat tusarum ikiuktiarum.

¹⁵ Túrasha “Yus-shuara nemasrjntí” tiip. Áyatik jintintrata, tura Yúsaj enentáimtikrata, ame nekas yatsumeá áitkiasmek.

Papru aujsua ikiuamu

¹⁶ Uunt Yuska, imiatkichu enentáí susamniaiti. Jú Yus, itirchatnum pujarminin atumin tuke imiatkichu enentáimtikramsartí. Uunt Yuska atumin pujurtamsartí, taji.

¹⁷ Jui wi Papru juna aajai. Wi papin akupeaj nuí júnisnak winia náarun áaran apujeajai, wíniaiti tusan.

¹⁸ Ii Uuntrj Jesukrístu atumin ashí yainmakarat tusan wakerajrume. Nu atí.

Papru TIMIUTÉUN Emka papin aar akuptukma

¹ Wi Papru Jesukristu akatramurintjai. In uwentikkiartin Yussha tura ii Uuntrj Jesukristusha winia akuptuku áiniawai. Jesukristujaj métek ti shiir ajastai tusar nákaji.

² Timiutéu, ju papin áateajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntrj Jesukristusha ti anenma ásar waitnen-tramainiak imiatkinchanum ti shiir pujustinian yainmakarti.

Wait chichamjaj anearta

³ Masetúnia nunkanam wéakun “Ipisiu péprunam pujuuta” timiaj núnisnak tájame. Shuar nuuj wait-chichaman jintin ainia nu suritkiarta.

⁴ Niisha Israer-shuara weatrin áujmatsamunak tura ni weatrin naarj ti untsurj irurtinniak Yus-Chichamjaj nankaamas enentáimtuiniawai. Nunak áujmatsar tuke ántar tuiniawai. Nu túramuka Yus enentáimtusar Nin shiir umirkatniun yáinmatsji. Tuma asamtai nusha suritkiatá.

⁵ Yus-shuar tuke enentáijijaj Yúsán shiir enentáimtusar tura tunáa túrutsuk aya péñkera nuna wakerukar anenkartin ajastin áiniawai. Núnisan péñker ajasat tusar Yus-Chicham étsereaji.

⁶ Chikich shuar juna iniaisar ántar chichaman áujmatainiawai.

⁷ Yúsán nekachiat “jintinniuitjai” tuiniawai. Tura unuiniainia nuna nékainiatsui.

⁸ Yus wakeramun nekaatin tura tunaan suritkiatin akupkamuka nekas péñkeraiti. Nu paant nékaji.

⁹ Kame akupniuka péñker shuaran itit awajsatniun akupenatsui. Antsu yajauch shuar juna túrin ainia nuna itit awajsatniun akupenawai: Tunáa shuarnasha, umichuncha, Yúsánsha tura ashí Yúsáncha nakitiainia nunasha, aparin máinniaasha, nukurin máinniaasha, kame mankartinniasha,

¹⁰ nuwáncha tura áishmanasha tsanirma áinia nunasha, shuaran kasamak juu ainia nunasha, wáitrinniasha, tsanumniuncha, ashí nuna itit awajsatniun akupenawai. Kame ashí péñkercha nuna iwiaratniun akupenawai.

¹¹ Núnisan tawai ti shiir uwempratin chicham Yus suramsamajnia nu. Nu chichamnaka etserkatniun Yus péñker asa tsankatrukuiti.

Yus waitnenkartin asamtai Papru yuminsamiayi

¹² Ii Uuntrj Jesukristu shiir enentáimturu asa Níiniun etsertukat tusa kakarman surusuiti. Túruta asamtai yúmingkajaj.

¹³ Wi Yúsán imiá yajauch chicharniuyajaj. Yus-shuarnasha áintrarmiajai. Yúsánsha katseknuyajaj. Túrin ajn Yus winia waitnentrurmiayi. Kame Jesuska Yus Anaikiamun nékachu asan wi túramu yajauchiiti tu enentáimchauyajaj.

¹⁴ Tura ii Uuntrj Jesukristu ti nekas waitnentrurmiayi. Tura Jesukristujaj tsaninkia pujakuí Yus nekas enentáimtustinniasha tura anenkartin ajastinniasha surusuiti.

¹⁵ Ju chicham ti nekasaiti. Tunáa shuáran uwentikrataj tusa Jesukristu ju nunkanam taramiayi. Nunasha ashí shuar nekaatin áiniawai. Tura wikia ashí shuarjaj nankaamas tunáan túriniaitjai.

¹⁶ Ti tunáa ajn Jesukristu ti anenkartin ana nu paant nekanati tusa Yus winia waitnentrurmiayi Tuma asamtai chikich shuar, wijijaj métek, Yúsán nekas enentáimtusar Niijijaj tuke iwiaaku pujusartatui.

¹⁷ Yus tuke jacha asa tuke iniaitsuk akupniuiti. Wáinchataiatit imiá nankaamas nékaiti. imia Niñki Yúsaiti. Tuma asamtai imia Niñki tuke iniaitsuk ti shiir awajsatniuiti. Núnisan tuke atí.

¹⁸ Uchiru, Timiutéu, yáunchuya Yus-shuar ámin “Ju shuar péñkeran túrattawai” túramarmia nútksam yamaikia kakaram ajástá. Nii timia enentáimsam suntara áintsam Yúsna kakaram takastin asumpurta. Nuna tájame. Tura Yus tuke nekas enentáimtusam tura tunaan túrawaj tusam anearam túrata.

¹⁹ Chikich shuar tunaajaj anearcharu ásar Yúsán ikiukiarmai.

²⁰ Iminúsha tura Arejántrusha núnisan Yúsán ikiukiarmatai uunt iwianchnium surukar-majaj. Nujaj Yúsán ti yajauch chicharsacharat tusan túraitjai.

2

Yus áujساتin

¹ Wátsek, emka seajrume Yus áujeakum Yus yuminsam ashí shuar yainkíat tusam áujtusarta.

² Imiatkinchanum pujusar Yusjajsha tura áentsjajsha shiir túratai tusar tura ashí akupin ainia nusha péñker akupkarat tusar Yus áujtustiniaitji.

³ Áitkiasar seatin péñker asamtai, uwemtikramajnia nú Yus wakerawai.

⁴ Ashí shuar nekas chichaman nekaawar uwemprarat tusar wakerawai Yus.

⁵ Aya chikichik Yus awai. Tura Jesukrístu aents ajas Yusjaj áentsun nawamnaitkiartini-aiti.

⁶ Ashí shuara tunaarín akikmatkataj tusa jákatniunam Jesukrístu surumakmiayi. Tura tsawant jeamtai nu chicham ashí shuarnum etsernaktiniuyi.

⁷ Nuna túratniun Yus winia akatar akuptukuiti. Israer-shuarcha nekas chichaman enentáimtusarti tusa Yus akuptukmiayi. Krístunu asan wáitrusuk nekas tajai.

⁸ Nu asamtai áishmanġka kajetsuk yajauch tunaitsuk antsu péñker enentáijjaj uweje takuniar Yúsán áujsarti.

⁹⁻¹⁰ Núnisan núwaka iwiarmamuk nekasmiancha péñker enentáijjaj entsararti. Chíkich shuar nu nuwán iis temashmarmaríncha, sháukríncha, kurimkiamuncha, iwiarmam-pramuríncha núnaka enentáimtutsuk antsu ni péñker túrunamun enentáimtusarti. Núnisan áchatniukait nuwá Yús-shuar ainia nujaj. Ni péñker túramujaj nekas shiir awajmamsashtinkíait.

¹¹ Núwaka takamtak pujusar umiiniak unuimiararti.

¹² Nuwanka ashí iruntramunam unuiniartinniasha tura ni áishrín akupkatniuncha suritijajai. Antsu takamtak pujustiniaiti.

¹³ Yus emka áishmanġkan Atanġkan najanamiayi. Nuyá nuwán Épan najanamiayi.

¹⁴ Tura Yus timian umirkach Atanġka anañnachmiayi. Antsu Épa anañna asa tunaan túramiyai.

¹⁵ Túmaitiat jurertin asa, emesartinniumiá uwempraíti. Tura Yúsán nekas enentáimtak aneñkartiniaitiuk tura esetar enentáimiuk péñker wekasatniuiti.

3

Yus-shuaran wáinin

¹ Shuar Yus-shuaran wáinkiatniun wakerakka péñker takatan achikiuiti. Nuka nekasaiti.

² Tura Yus-shuaran wáinin ajastinian wakerakka chíkich shuar nin yajauch áujmatsachmin átiniaiti. Nuwá apatka áchatniuiti. Niisha péñker esetar enentáimin naka wekasatniuiti. Íraran ni jeen ti shiir itiaatniuiti. Péñker jintinkratin átiniaiti.

³ Nampechusha tura suiir enentáimtichusha átiniaiti. Aya kuítian ikiañkatniun enentáimtuschatniuiti. Antsu tsanġka átiniaiti. Kajechusha átiniaiti. Chikichnancha wakerutkashtiniaiti.

⁴ Ni shuarín shiir akupeakui ni uchirísha umin tura shiir awajkartin ártiniaiti.

⁵ Kame ni shuarín akupkachminiaitkiunġka ġitiurak Yus-shuaran wáinkiat?

⁶ Yus-shuaran wáinniuka yama Yus-shuar ajasu áchatniuiti. Túmaitkiunġka ti nanġkaamantu enentáimtumak iwianchajaj méték tunaan túrak sumamattawai.

⁷ Yus-shuarchasha nin shiir enentáimtustin ániawai. Núnischaitkiunġka nin yajauch chicharainiakui íwianch wárik tunaanum ajuartatui.

Yus-shuaran yain

⁸ Núnisan Yus-shuaran yaincha péñker asamtai ashí shuar nin shiir enentáimtusatin ániawai. Nii tana nuna tímatusaġ umin átiniaiti. Nampechu átiniaiti. Aya kuítian ikiañkatniun enentáimtuschatniuiti.

⁹ Yúsnan ti penker nekaatniuiti. Tura esetar enentáimsatniuiti.

¹⁰ Emka péñker ístiniaiti nuyá péñker wekaakka Yus-shuaran yain átiniaiti.

¹¹ Nuwasha péñker asamtai ashí shuarsha nin shiir enentáimtustin ániawai. Tsanumni-uchu antsu esetar enentáimiar nii chichaa ímiatrusaġ umin átiniaiti.

¹² Yus-shuaran yainkia nuwán apatkachu átiniaiti. Tura ni uchiríncha ni shuaríncha ashí shiir akupin átiniaiti.

¹³ Yus-shuaran yayaġ nekas péñker takaakka shiir enentáimtusamin asa páchitsuk Krístu Jesus enentáimtamun arantsuk etserkamniaiti.

Yusna ana nu imiá nanġkaamas péñkeraiti

¹⁴⁻¹⁵ Wárik ítniun wakerajme. Túmaitiatak sétaknasha Yus-shuarjaj takastin nekaak tusan juna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmatainiawai.

¹⁶ Maa, imiá nekasaiti, Yus iwiainturmakma ashí nankaamas ti penkeraiti. Tura júiti: Yuska aents ajas jú nuñkanam paant wantinkiamiyi. Yus Wakancha “ti shiiraiti” Nin túmiayi. Yusa suntarjsha Nin wáinkiamiyi. Ashí nuñkanam nu etsernakmiayi. Túramtai ashí nuñkanmaya shuar umirkarmiayi. Tura nayaimpiniam waketkimiayi.

4

Amuukatin tsawantin

¹ Yusa Wakanj ti paant tawai, amuukatin tsawant jeaakuí untsurj aents Yus enentáimtustinian iniaisar antsu yajauch wakanin nemarsar íwianch jintíamun anturkartatui.

² Yajauch shuaran anturkartatui. Nu shuar ni enentáj narúa áinin ásar ni tunáa túramun penké enentáimtichu ániawai. Tuma asa shiir chichainiayatan wáitrin ániawai.

³ Nu shuar nuatnaikiatniun suritiainiawai. Núnisan chíkich chíkich yurumak yúatniuncha suritiainiawai. Warí, Yus ashí yurumkan najana asamtai Yus-shuar nekas chichaman nékainia ásar Yúsan yuminsar páchitsuk yuámin ániawai.

⁴ Ashí Yus najanamu penker asamtai nakittsuk antsu Yusan yuminsar yúatniuiti.

⁵ Yus-Chicham tana nújajsha tura yuuniak Yúsan yuminkias áusamujaj ashí péñker aja-suiti.

Jesukrístu péñker takarín

⁶ Wi tájamna nu chíkich Yus-shuar jintintiakmeke Jesukrístu péñker takarín átatme. Tura ashí Yus-Chicham péñker jintíamu unuimiaru asam nujaj kakaram ajastatme.

⁷ Antar chichamsha tura netse chichamsha enentáimtutsuk nekas Yusna ana nu túratin kakaram ajasta.

⁸ Kame ayash kakaram awajsatniusha ishichik péñkeraiti. Antsu Yusna nu túratin kakaram ajastinkia imiá péñkeraiti. Yamái ju nuñkanmasha yáinmaji tura ukunmasha Yusjaj pujustin asakrin nankaamas péñkeraiti.

⁹ Nu imiá nekas asamtai ashí shuar nuna enentáimtustiniaiti.

¹⁰ Nekas iwiaaku Yus shuaran uwemtikramniaiti, tura ashí Nin enentáimtuinia nú shuaran nekas uwemtikratniuiti. Nu chicham imiá nekasaiti tu enentáimtakur katsekramainiakrincha kakaram takaaji.

¹¹ Nuka ashí ame jintíakum akupkatniuitme.

¹² Ti úuntchaítkiumnisha nakitrampraraj. Antsu péñker túrakum Yus-shuar unuiniarta. Chichammijajsha, túramurmijajsha, aneñkratmarmijajsha, nekas Yus enentáimtamujajsha, tura esetra enentáimsam Yusna péñker túramujajsha niisha túrawarat tusan iniaktusarta.

¹³ Wi jeatsajj Yus-Chicham áujeakum shuar jintintiata. Túram Yus-shuar ikiakárarta.

¹⁴ Yus-shuara uuntrj Yúsnan takastin anaitiamak uwején awantramsarmai. Nuna túramainiak “Ju shuar kakarman Yúsnunjan takustatui” túramarmia nu, kakaram ajasam tímatrusam túratá.

¹⁵ Tuke enentáimjaj wi tájamna nu enentáimtakmin ame péñker túruki wéamun nekaawartatui.

¹⁶ Túramna nusha tura unuiniamna nusha péñker wáinmankata. Nu túratin pimpikiip. Nu túrakmeke uwemprattame amesha tura ujainiam nusha uwemtikrattame.

5

Yus-shuarjaj itiur túratniuit

¹ Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumeame nútiksamek shiir awajsarta.

² Nuwá úuntchisha nekas ame núkua nútiksamek shiir awajsarta. Nuwá nátsasha nekas ame umaimia nútiksam shiir enentáimjaj péñker awajsarta.

³ Wajé nekas atsumin ainia nusha yáñkiarta.

⁴ Tura wajé uchirtiniatkiuñkia tura tirankrinniuitkiuñkia, nu shuar wajen wáinkiariti. Emka ni shuarin péñker wáinkiatniun unuimiarati. Ni aparj anemia núnis awañtuiniak shiir wáinkiariti. Núnaka Yus ti shiir enentáimtawai.

⁵ Nekas waje niñki pujana nu Yúsan enentáimtak tsawaisha káshisha iniaitsuk Yúsan áujeawai.

⁶ Antsu aya wárastiniak wakera nuka iwiaakiat jaka áintsankete.

⁷ Tura wajenka ni shuarj wáinkiarí. Yus-shuaran yajauch chicharnaktin atsutí tusam wi tájamna nu ashí Yus-shuar ujakarta.

⁸ Shuar ni jeen pujuinia nuna nekaska wáinkiatniuiti. Tura nuyá chíkich shuárnasha yáinginiati. Túrachkuñka Yus tana nuna umiatsui, tura Yus-shuarcha nujaj nankaamas yajauchiiti.

⁹ Yusa kúitrijjaj yáinniaiktiniatkiunka waje sesenta (60) uwi nankaamas takustiniati. Tura chikichik aishriniak takusu átiniaiti.

¹⁰ Ti paant péñker túrin átiniaiti. Ni uchirín péñker tsakatmaashit, írran péñker táata tiniushit, nekasmiancha enentáimtumar Yus-shuaran yáiniaashit, wáitainia nuna waitnen-niushit, tura chikichnasha péñker túriniaitkiunka maak.

¹¹ Tura sesenta (60) uwi takakchaka chíkich wajejaj iruraip. Ni ayashj wakeramurj Kristuyaj kanamtikiainiwai tura ataksha nuatnaikiatniun wakeruiniawai.

¹² Tura emka enentáimtiarmia nuna iniaisar sumamainiwai.

¹³ Nu arantcha nakimiainiak ántar irauwear chikicha itiruchatrín áujmatsachminia nunasha áujmatin áiniawai.

¹⁴ Nu asantai waje úchipiak ainia nuka uyurtukar uchin takusarti. Tura nuwá nuatkamu takastinia nuna túrawartí. Tura ni túrunamurjijaj in kajertamainiaj nú shuar yajauch enentáimturmarcharti.

¹⁵ Kame nuik chíkich chíkich waje Kristuyaj kanakiar iwianchin nemarsaru ásarmatai nuna tájai.

¹⁶ Áishmansha nuwasha Yus-shuar ainia nu ni shuarjin waje ákuinikia Yusa kúitrin seatsuk nii yaiñtí. Nujaj chíkich wajén nekas atsumainia nuna Yusa kúitri yáintatui.

¹⁷ Yus-shuara uuntrj Yus-shuaran péñker wáinkiarua nu, nekas shiir enentáimtustin áiniawai. Tura akinkiamniasha áiniawai. Nekaska Yus-Chichaman etserkatniuncha tura unuiniartinniaasha tuke takaaka imiá shiir enentáimtustinaiti.

¹⁸ Yus-Papiniumsha núnisañ áarmaiti:

Jinikiaia saepen pakartaj tusa turu takaak nájakui ni nuj jinkiatáshtiniati. Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

¹⁹ Chikichik shuarak Yus-shuara uuntrj tunaarín etsertukmatainikia anturkaip. Antsu jímiaasha menaintiusha tsanumtsuk métek tuiniakui anturkata.

²⁰ Chíkich shuarsha ni tunaarín ikiuktinian nakitiainia nu, ashí iruntramunam chicharkarta. Chikichcha, nuna íisar, ashamkarti.

²¹ Yussha ii Uuntrj Jesukristusha tura nayaimpinmayá suntarsha íimiamunam “túrata” tájame. Ashí shuarjaj niisháa enentáimtutsuk métekrak túrata.

²² Yus-shuara uuntrj atí tusam wárik anaikiaip. Wárik túramka chikicha tunaarín sumamattame. Ashí tunaanum penké pachiinkiaip.

²³ Wakemjaj jau asam aya éntsak úmutsuk karía ishichik pachimpram umarta.

²⁴ Chíkich shuara tunaarj wáitsatin imiá paant áiniawai wáitsatin tsawant jeatsaj. Tura chíkich shuara tunaarínkia paantcha áiniawai antsu ukunam paant nekanawartatui.

²⁵ Núnisañ péñker túramusha ti paant áiniawai. Tura yamá páantchaitiat tuke paantcha áchamniaiti. Páchitsuk nekanattawai.

6

¹ Takarniutirmesha, atumí uuntrj ti shiir umirkatarum. Túrachkunñkia chíkich shuar Yusnasha ii unuiniamuncha yajauch áujmattsartatui.

² Atumí uuntrj Yus-shuar ániakka aya Yusjaj yatsum asamtai nakiarchatniuitrume. Antsu nuna nankaamas péñker takarsatniuitrume. Warí, ame yayamna nu Yus-shuarachak ainia, tura ame aneamu yatsumchak ainia. Ame, Timiutéu, tu jintintiata.

Yusna wakeruktincha tura kuit wakeruktincha

³ Shuar ti shiir naka chichaman ii Uuntrj Jesukristunu ana nuna nakitiak antsu niisháa chichaman étserkuñka

⁴ nu shuar nankaamantu enentáimtumayat ántraiti. Ni enentáimmianak chichaak aya ántar chichaman antumtiknaikiatniun chichaawai. Tura nu chichamjaj nupetmaktaj tusar nankaamas áujmatainiak kajernaikiar tura katseknaiikiar péñker enentáimtuatsuk

⁵ tuke kakanniniawai. Tura tu aujmatnaisatniun wakeruiniana nú shuar nekas-chichaman nékachu ásar aya tunaan enentáimtin ániawai. “Yusna ana nujají kuítrintin ajasminiaiti” tuiniawai. Nu shuar pachisaip.

⁶ Shuar takakna nujajín waraakka Yusna ana nujajisha waraak jú nuñkanmasha tura nayaimpinmasha nekas kuítrinniuiti.

⁷ Iis, jú nuñkanam misuk támaji; núnisar misuk jiinkittiaji.

⁸ Tuma asamtai yurumkasha tura entsataisha takakkurkia nujajín warasa pujustiniaitji.

⁹ Antsu kuítrintin ajastaj tuinia nu, tunaanum awañkemkar iniainiawai. Tura antra nuna wakerukar itiurchatan wáiniainiawai. Nujají emesratniunmasha jeainiawai.

¹⁰ Kame kuit aneatniuka ashí tunáanum útsutmakminiaitji. Chíkich shuar nuna wakerukar Yus enentáimtustinian iniaisar ti itiurchatjají yajauch awajmamsarai.

Yusna nu túrunat tusam kakaram ajástá

¹¹ Antsu ame Yus-shuar asam nuyá pisarta. Yus nekas enentáimtakum péñker túrata. Waantu enentáimsuk Yus péñker umirkata. Aneakum katsuntrata.

¹² Yusna nu túrunat tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamun untsurj shuar iruntramun emserkaitme.

¹³ Yuska ashí iwiaaku átinian súwiti. Jesukrístusha Punsiu Piratuí nekasa nuna ti paant ujakmiayi. Tuma asamtai Yussha Jesukrístusha írainiamunam nuna tájame.

¹⁴ Ii Uuntri Jesukrístu táatsajín wi tájamma nu yapajítsuk tura yajauch chicharnakchamnia péñker umiktá, tájame.

¹⁵ Tsawant jeamtai Jesukrístu tatí tusa Uunt Yus, imiá péñker asa, akupkattawai. Nínkiti Yus. Akupniuncha Akupniuiti. Uuntjají nankaamas Úuntaiti.

¹⁶ Iwiaaku átinia nérenniurj Nínkiti. Ti tsáapninnium pujakui nuntuntuachminiaiti. Wáinchatai asamtai shuar péñké wáinkiacharu ániawai. Nínki ashí shiir awajsatniuiti tura Nínki tuke ashí akupin atí. Núnisaj atí.

¹⁷ Jú nuñkanam kuítrintin ainia nusha nankaamantu enentáimtuscharti. Kuitcha yúpichuch menkakamnia asamtai kuítniak enentáimtusar pujuscharti. Antsu iwiaaku Yus ashí in ti péñkeran núkap súramaj nuna nekas enentáimtusarti.

¹⁸ “Péñker túratarum” tiarta. Tákumin niisha shiir enentáijají ni takakman ajamsarti. Nuyá nú péñker túramujají Yusaj ikiáunkartí.

¹⁹ Nuna túruiniak kuítriniawartatui. Núnisaj tuke iwiaaku átinian wáinkiertatui.

Amuak Timiutéun akatramu

²⁰ Timiutéu, ashí ame túratniua nu tuke enentáimturta. Jú nuñkanmayá ántar chichainia nu anturkaip. Tura wáitruiniak “wi imiá nékajai” tuinia nusha anturkaip.

²¹ Chíkich shuar nuna umirkar Yusajiyá kanakiarai.

Wátsek, Timiutéu, Yus shiir yainmakti.

Nuke atí.

Papru TIMIUTÉUN Ataksha papin aar akuptukma

Papru Timiutéun áatramiania nu

¹ Wi Pápruitjai. Yus wakerakui Jesukristu akatramuri ajasuitjai. Ashí Jesukristujai tsaniñkiarun “Nekas iwiaaku átinian susattajai” tñiuiti Yus. Tuma asa nuna etserkat tusa akuptukuiti.

² Aneamu uchiru, Timiutéu, ju papín áateajme. Yus Apasha tura ii Uuntri Jesukristusha ti anenma ásar waitnentrainiak imiatkinchanum shiir pujustinian yainmakarti.

Kristunu takastiniaitjinia nu

³ Tsawajsha káshisha Yúsan áujeakun ámin tuke enentáimtusan ti shiir Yúsan yúmiñkijajai. Winia weatur túrawarmia nútiksanak Yúsan enentáimtakun ti shiir awajeajai.

⁴ Kanakmiaj nuñ eantramiam nuna tuke enentáimtajme. Ataksha wararnaisatai tusan lítiniun wakerajme.

⁵ Yus nekas shiir enentáimtiniaitmena nuna nékajai. Nukuchrum Ruítiasha tura ame nuku Eunisiasha emka Yúsan nekas enentáimtin ármiai. Amesha núnisketme.

⁶ Tuma asakmin tájame; Yusna takasái tusan winia uwejrún ámin awanteakui Yus kakarman suramsamia nujaj atak kakaram takasta.

⁷ Yus sápij enentáin suramsachuitji. Antsu kakaram ajastinniasha anenaitniuncha péñker wekasatniuncha suramsaitji.

⁸ Ii Uuntri Jesukristunu etserkatin natsantraip. Níiniun étserkun sepunam pujamusha étserkun natsantruraip. Antsu Yus kakaram awajtamkui ame étseream nujaj shuar yajach túramainiakui surimiamtsuk wáitsatin enentáimtumarta.

⁹ Ii péñker túrichu árinij Yus in anenma asa uwentikramar péñker túratniunam apujtam-saitji. Iisha Jesukristujai tsaniñkiaru asakrin tura Yus nuna túratniun wakerak túramiai. Yaunchu ju nuñka atsañsha in tuke waitnentrampromiaji.

¹⁰ Turá yamá in Uwentikkiartin Jesukristu támatai nu anenmam paant ajasuiti. Niisha jákatniun nupetak emesramiayi. Tura uwempratin chichamjai jáchatai iwiaakman paant awajturmajai.

¹¹ Nuna etserkat tusa Yus anaitiukmiayi. Tura akattur Israer-shuarchanum akuptukmi-ayi.

¹² Túruta asamtai ti wáitijajai. Túrasha Yúsan nekas enentáimta asan natsamatsjai. Imiá kakaram asa amuukatin tsawant jeatsajin ashí winian susamaj nuna ti péñker waitruktatui.

¹³ Shiir chichaman jintintiamajmena nuke emetata. Jesukristujai tsaniñkiu asar Yus nekas enentáimtajai tura nujaj anekratniuitji. Tuke núnismek túrata.

¹⁴ Yus ámin takasat tusa suramsamu shiir takasta. Tura Yusa Wakanj in pujurtamaj nuna kakarmarjijaj túrata.

¹⁵ Asia nuñkanmayá shuar mash iniaitiusarmai. Nu nekaachmaashum. Nu shuarnumia Pijirusha Ermujenessha armai.

¹⁶ Antsu Unisépuru niisháa shuar amai. Ti nukap shiir enentáimtikurmai. Tura wi sepunam pujamuncha natsantruchamai. Ii Uuntri Kristu ni shuarincha waitnentrati.

¹⁷ Rúmanam taasha natsantrutsuk eatak wáittsuk iniaitíuschamiai.

¹⁸ Ipiñsu péprunam pujarin ti yainmakmiaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

2

Kakarame ajasta

¹ Amesha, uchirú, Jesukristujaj tsaniñkiu asam nu kakarmajaj kakaram ajasta.

² Untsurj ántuiniamunam wí etserkamaj nu, shuar umikmin ainia nu jintintiiawaram chikichnasha jintintiiawarat tusam akupkarta.

³ Ame ti péñker Jesukristu suntarj asam wáitsatin katsuntrata.

⁴ Suntarka ni uuntri tana nunak umiktin asa chíkich takatan pachintiukchatniuiti.

⁵ Núnisañ nakurincha nakurustinia nujaj métek nakurachkuñka nekas péñkeran awak-makun súsatniua nuna achikchamniaiti.

⁶ Ataksha núnisañ shuar ajan takaana nu, ashí shuara nañkaamas nuyañ yúashtinkiait.

⁷ Wats, ju menaintiu métek-taku chicham áiniawai. Péñker enentáimtakmin ii Uuntri Kristu paant awajturmastatui.

⁸ Jesukristu jaka nantakmia nu enentáimprata. Tura Uunt akupin Tawit ni weatrj asamtai Jessusha uunt akupin átiniaiti. Núiti wi uwempratin chichaman étseorej nu.

⁹ Nuna étseoreakun sepunam jirujaj jinjkiamu pujakun wáitajaj. Túrasha Yus-Chicham jinjkiaminiiaiti.

¹⁰ Ashí shuar ni shuarj arti tusa Yus achikiarua nuna yaíntajtsan ashí itiurchatan katsunteajaj. Nujaj Jesukristujaj tsaninjkiau ásar uwemprar tuke shiir pujusartatui Yusjaj.

¹¹ Ju imiá nekasaiti:
Jesukristujaj jákaiikiurkia Níjijajisha tuke iwiaaku pujustajj.

¹² Wáitiakrishana Níjjaj akupkattajj.

Natsantakrinkia Niisha natsantramprattajj.

¹³ Umichuikurniisha Ninjia tuke uminiaiti. Warí, Yuska nu enentáimmiajajin yapajniátsuk tuke umiktiniaiti.

Yusaj natsaqraj tusam ashi túrata

¹⁴ Shuar jintintiakum ju enentáimtikrata. Ii Uuntrj Yus ímmianum chichamjaj yajauch tunayarajin tusam chicharkarta. Nu tunaitin penké áantraiitsu ántuiniana nuna yajauch awajenawai.

¹⁵ Yus-Chicham tuke enentáimjaj pénger unuimiátram shiir jintintiwarta. Túrakum Yus pénger íirsat tusam pénger takarin atá. Túramka Yusaj natsaarchattame.

¹⁶ Jú nuñkanmayanak ántar áujmatin ainia nujaj kanaktia. Shuar nuna áujmatainiak tunaanum nuna nankaamas wáiniawai.

¹⁷ Ni jintiniamusha sunkurjaj métek pampaawai. Iminíusha tura Piritiusha nu shuar áiniawai.

¹⁸ Niisha nekas chichaman iniaisar tura ashí Yus-shuar nantaktincha nankaamasai tuíniaku chíkich chíkich shuar Yúsan naka enentáimtuiniatsui yamaikía.

¹⁹ Túrasha Yus ashí nankaamas enentáimtustinia nuna paant awajsaiti. Júnisaiti: “Uunt Yus ni shuarin nékainiawai,” tura nuyá “Ashí Kristu shuarj ainia nu tunaanumiá kanakiarti.”

²⁰ Kuítrinniu jéen kurijaj najanamusha kuitjaj najanamusha írunui. Nújajinjia ti shiira nu takastin áiniawai. Tura numijaj najanamusha nuwejaj najanamusha írunui. Antsu nújajinjia nekasmanincha ainia nu takastin áiniawai.

²¹ Núniskete Yusa takatrjaj. Ashí tunaanumiá kanakir pénger wekasar shiira nu takasmin átatj. Kame ashí péngera nu takasmin asakrin ii Uuntrj Jesukristu wakerak pénger takata nu pujatamsamniaitj.

²² Natsá wakerutai iniaisar esetram pénger wekasata. Amesha ashí shuar shiir enentáimjaj Yúsan áujena nujaj Yus nekas enentáimtakum aneniakum ti shiir pujustá.

²³ Enentáimtsuk chichainiak aya ántar tunaitinian chichainia nu pachisáirap. Nusha aya némasmaniniawai.

²⁴ Ii uuntrj Jesukristu takarniuka chíkich shuarjaj nemasmanaikiashtiniaiti, antsu ashí shuarjaj pénger nawannaikiatniuiti. Tura waitnentáimturar pénger jintintiatniuiti.

²⁵ Tura umircha shuarnasha Yus ni enentáin yapajtiaku nekas chichaman shiir enentáimturarat tusa pénger enentáimjaj jintintiatniuiti.

²⁶ Nujaj íwianch ni wakeramu túrawarat tusa achikmaitatan uwemprartatui.

3

Amuukatin tsawant jeatemamtai aents ti tunaan túrawartatui

¹ Amuukatin tsawant jeaku ti itiurchat átatui.

² Shuar aya ninjki enentáimtusartatui. Kuítian ti wakeriartatui. Nankaamantu enentáimtumartatui. Yúsnasha yajauch chicharsartatui. Aparincha umirkachartatui. Yumiñsatniuncha nékachu ártatui. Ashí Yúsnanacha enentáimtuschartatui.

³ Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí pénger túrinia nuna nemasrj ártatui.

⁴ Amikrincha surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui.

⁵ Yusa kakarmarj “ántrai” tuíniak pénger umirkachartatui. Túrasha Yúsan umirua núnisar túrawartatui.

Nu shuar penké pachisáip.

⁶ Nu shuarsha shiir chichayatan anankawar jeá wáiniawai. Tura nuwá esetar enentáimchan nekas tunaarinnun anankainiawai. Nu nuwá ashí yajauch wakeramujaj ananainiawai.

⁷ Tuma ásar ashí shuara chichamen tuke ántuinayatán nekas-chichaman nekaatniun tujintiainiawai.

⁸ Yaunchu Ejiptu nunġanam Muisais uunt akupniujaj chichaakui jimiara iwishin, Janissha Jamprissha, Muisaisan kajerainiak “antar tawai” tiarmiayi. Nunisañ ju shuar nekas-chichaman nakitiainiawai. Naka enentáimiaiachu ásar Yúsnañ naka jintiatniun penġé tujintiainiawai.

⁹ Túrasha nuna nanġaamas kuakchartatui. Shuar ti paant ni netse túruiniamurġin nekarawartatui. Nunisañ nu jimiara iwishniujaj túrunamiayi.

Amúak Papru Timiutéun akatramiania nu

¹⁰⁻¹¹ Tura ámeke wi tímiaj nu umireame. Wi Yusjaj shiir wekaamusha métek túriniaitme. Wi enentáimmiasha nékaitme. Áintruiniakui wáitsamaj nu nékame. Tura Yúsnañ enentáimtakun tura aneġkratkun shiir enentáijajjaj katsuntramjai. Antiukía péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntri uwentikrurmiayi.

¹² Nekasaiti, shuar Jesukristujaj shiir túratuj tákunka ni nemasrġ ántiam ti wáitsatniuiti.

¹³ Tura ashí ananġartin ainia nusha kame ashí yajauch shuarsha nú yajauch túrukiañ wétatui. Iwianchjaj ananġamu ásar chikichnasha ananġiar weartatui.

¹⁴ Antsu ámeke unuimiam nu imiá nekasaiti tu enentáimtakum tuke emetata. Jintintra-mawarmia nú shuarsha wáitrichua nu nékame.

¹⁵ Úchichinmayan Yus-Chicham nékame. Yus-Chichamka uwempratniun jintintra-mamni-aiti. Nusha “Jesukristu nekas enentáimtakum uwempratme” tawai.

¹⁶⁻¹⁷ Ni Papiġin áarat tusa Yus ni shuarġin áamtikramiayi. Ashí shuar ni Chichamen nekaawar péñker túrawarat tusa túramiayi. Tuma asamtai Yus-Papġi shuartin unuiniakartin asa imiá penġeraiti. Tunáa túrajnia nu Yus-Papijaj nekamatniuiti. Tura awajiakrincha Yus-Papġi núnaka paant jintintra-maji. Nuyá naka wekasatniun jintintra-maji.

4

¹ Ii Uuntri Jesukristu amuukatin tsawantaj Uunt Akupin ajas iwiaakuncha tura jákaruncha ashí péñker túramuncha tura yajauch túramuncha nekaattawai. Tuma asamtai Niissha tura Yus Apasha íimiainiamunam juna akateajme.

² Uwempratġin chicham etserkata. Yúpichuchia nuissha tura itirchata nuissha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuiniararta.

³ Ukunmanġa péñker chichaman nakitrar ii wakeraj núchik nekaatai tusar, shuar tere-mak péñker pujuschamnia nekapea ántsañ, nanġaamas unuimiaru atai tusar, nanġkamas unuikiartiniñ ti untsurġ eġkartatui.

⁴ Nekas shiir chichaman iniaisar ikiuniak ántar áujmatsamun enentáimtusartatui.

⁵ Antsu ámeke tuke péñker túratġin wakerakum ashí itirchat katsunrata. Uwempratġin chicham étserkum takatrum péñker umikta.

⁶ Ishichik ajasai winia iwiaakmar Yusaj surumaktin. Mantamnan nayimpiniñ wétin jeatimiai.

⁷ Shuar kakaram maanainia núnisnak tuke kakaram takasmajai. Tséken péñker tseka ántsanak yawetsuk takasmajai. Tura Yus-Chichaman nekas akasmatkun péñker wáinkiaitjai.

⁸ Tuma asamtai tawasap nukajaj najanamu tsékena susamua ántsañ wisha péñker túramunam akinkiatataj. Tura aya wíniak akirkashtatui. Antsu ashí ni tátiniñ shiir enentáijajjaj nákaniañ nunasha nekas péñkera nuna akikiartatui.

Timiutéu túratġin akatmamturma

⁹ Wárik iiraitġin enentáimturata.

¹⁰ Témas aya jŷ nunġanmayanak wakerak ajapa ikiuruk Tisarúnika péprunam weyi. Tura Kresentisha Karasea nunġanam weyi. Nunisañ Títiusha Tarmasia nunġanam weyi.

¹¹ Túrawarmatai aya Rúkas wijajjaj pujawai. Márkus eġka wáinkiam ame itartitia. Juġi ti penġer yainkiamniaiti.

¹² Tura Tikikiunġa Ipiisu péprunam akupkamjai.

¹³ Tura wíniakum nuparam pushġi Trúas péprunam Karpu jeen ikiukmiaj nu takurtuktia. Nunisañ nuparam papisha tura nekaska penġé papġi takurtuktia.

¹⁴ Arejántruka jirujaj takawa nu ti yajauch awajtusuiti. Túrutaitkiuissha ni túramujaj métek Yus akiktí.

¹⁵ Nu amesha péñker wáinkiatá. Ii étsereamun penġé nakitiawai.

¹⁶ Emka akupniunam ayamprumaktaj tusan chichaakui chikichkisha yáintkiacharmiayi. Antsu sapijmiainiak ikiurkiarmiayi. Yus nu shuaran yajauch enentáimturcharka maak.

¹⁷ Tura ii Uuntri Jesukrístu ni kakarmarín surus yaintkiamiayi. Nujai uwempratin chichaman ashí nunkanam Israer-shuarcha antukarti tusan etserkamjai. Tura núnisaj akupniunmayasha ii Uuntri uwemtikrurmiayi.

¹⁸ Tura núnisaj ashí yajauchia nuyá uwemtikrurmatai Nii akupeana nuñ nayaimpiniam jeattajai. Niñki tuke shiir awajnasti. Núnisaj atí.

Amikmaamiania nu

¹⁹ Piriskancha ni áishri Akirancha amikmainiajai. Núnisnak Unisépuru shuaríncha amikmainiajai.

²⁰ Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai.

²¹ Michá nantu jeatsaj iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

²² Ii Uuntri Jesukrístu ámijiai tsaniñ pujustí. Tura Yus ashí péñker waitmakarti. Nuke atí.

Papru TITIUN papi áatramu

Papru Titiun áatramiania nu

¹ Wikia Pápruitjai Yusa takarniurj. Tura Jesukrístu akatramurjntjai. Yus achikma ainia nú shuar niisha antukar Yúsan umirkarat tusan akatramuitjai. Shuar nuna nekaawar péñker wekasartatui.

² Tura nú arant, nú shuarsha tuke iwiaaku pujusarat tusan étsereajai. Nú shuarnasha, nunñan najantsuk, “uwentikrattajai” Yus tímiayi. Tura Niisha wáitruatniun tujintiawai.

³ Tura yamaikia, tsawant jeamtai, nuna nekaawarat tusa ii Yusrj uwentikkiartinia nu, winia chichamur ujakarta tusa, winia akatturmiayi.

⁴ Titiu, wi Yusna étserma umikiu asakmin winia uchirua áitkiasnak papin áateajme. Iis, iijjai métek Yus nekas enentáimtatsjik. Yus waitnentrama asa shiir awajtamsati tusan wakerajme. Tura ii Aparj Yussha, ii Uuntrj Jesukrístusha, Uwentikkiartin ana nu, enentáimin imiatkincha awajtamsati, tajai.

⁵ Wats, wi iwiarachmajna nu ame iwiarata tusan Kreta nunñanam ikiukchamkajam. Tura “ashí péprunam Yus-shuar írunmanum, Yus-shuaran wáinkiarat tusam shuar anaikiarta” tíchamkajam.

Yus-shuaran wáinin

⁶ Yus-shuaran wáinin júnis atí. Niisha makuuchmin ti péñker wekasatí. Tura chikichik nuwentin átiniaiti. Tura ni uchirjsha Yusna ártiniaiti. Tura shuar yajauch chicharsachmin niisha tutupnisañ wekain ártiniaiti.

⁷ Enentáimprata. Yus-shuaran wáinin Yusna ana nuna wáinkiat tusa anaikiamuiti. Tuma asamtai nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chikichan waitkiau áchatniuiti. Tura anañma kuítrintin ajastaj tusa wakerukchatniuiti.

⁸ Antsu shuar ni jeen írar winiana nuna itiaatniuiti. Tura ashí péñker ana nuna wakerin, esetas enentáimin átiniaiti. Tura jú nunñanamaya akupeamuncha, núnisañ Yús akupeamuncha umirkatniuiti. Tura niñki ímiastiniaiti.

⁹ Tura nú arantcha, chikich shuáran péñker jintintrataj tusa tura Yus-Chichaman nakitin áinia nuna nupetkataj tusa, Yúsnumia nekas chichaman, nii unuimiátramiania nuyá kanakchatniuiti.

¹⁰ Nekaata. Umichu ti irunui. Niisha ántar chichau ásar anañmau ániawai. Israer-shuar weeanam ti irunui nú shuar.

¹¹ Niisha kuítian achiktaj tusar wakeruiniak, yajauch unuiniarchatniua nuna unuiniainiawai. Nuna túruiniak untsurj shuáran, ni írutkamurijjai yajauch enentáimtikiainiawai. Tuma asamtai auka, ni wené epetkatniuiti, ántar chichainiakui.

¹² Warí, imia Krétanmaja chichaman etserin júna tíchamka: “Krétanmaja aentska tuke wáitrin ániawai. Tura nákitiat ti yurumin ániawai. Yajasma núnisañ ániawai.” Nuna tíchamka.

¹³⁻¹⁴ Maa, niisha nékasañ tímiayi. Nu tuma asamtai, Titiu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurjñ umirkachartí tusam, antsu Yúsan nekas umirkarat tusam, umichu shuar kakaram chicharkarta.

¹⁵ Enentáimprata. Yus-shuarka, ni enentáj chamir ajasu ana nuka, ashí ni wainnia nuna péñkernak enentáimtawai. Tura chikich shuar, Yúsan umirkachu asa, ni enentáj wapik asa, péñker ana nuna enentáimustinian tujintiawai. Achapai enentáimiuk, péñkercha ana nuna “péñkeraiti” tawai.

¹⁶ Tura niisha “Yus-shuaraitjai” tuíniayatan, Yúsan umirtsuk niisháa túruiniawai. Tuma ásar mujimiai ániawai niisha. Umichu ásar péñkeran túratniun péñké tujintiainiawai.

2

Péñker jintintiatin

¹ Tura amesha, Titiu, péñker chicham etserkata. Yus-Chicham tátsuna nu etserkaip.

² Antsu áishmañ katsunt Yusna ainia nu, jú jintintrata. Nampechu, náñkamas enentáimcha, esetas enentáimin arti. Yus tana nuna umirin tura anenain arti. Ni ititurcharjñ Yúsan enentáimtusar katsuntin arti.

³ Tura núnismek nuwá katsunt Yusna ainia nusha ju jintintrata. Niisha núnisarañ Yus-shuarti túramnia nuna péñker túrawartí. Tsanumin tura nampen áchartí. Antsu péñker wekasatniun unuinin artí.

⁴ Niisha yama nuatnakua nuna ni áshrin ni uchiríncha nekas aneetniun unuinartí.

⁵ Júnasha jintintrartí. Esetas enentáimin, péñker wekain ártiniati. Ni takatrín péñker takastin áiniawai. Ni áshrin umirin ártiniati. Tura waitnentin ártiniati. Yus-shuarcha Yus-Chichaman yajauch chicharkarain tusar túrawartiniati. “Tu jintintrarta” titiá.

⁶ Nuyá, Titiu, natsa áinia nu “náñkamsar enentáimsarum wekasairap” titiá.

⁷⁻⁸ Tura amesha, Titiu, ashí tsawant péñker wekasatá. Nu natsa wi túramun júkiar nunak túrawarmi tusam, nu túrata. Tura anturtamna nu “nekaschapitia” tijn tusam, esetsam enentáimsam, Yus-Chicham tana nu ímiatrusmek jintintiata. Nú túrakmínkia, Yus-Chichaman nakitiana nu shuar “Titiu náñkamas chichaawai” titiaj tukamá, natsaamak tujintramkattawai.

⁹ Takarin ainia nu, ni takartairín umirkarat tusam jintintrarta. “Shiir enentáimsarum, yajauch áimtsuk shiir umirkatarum” titiá.

¹⁰ “Kasamkairap, tura anañkawairap. Iis, péñker túrakrumka, takarniuitiatrum, shiir tura asarum ii Uwentikramin Yusrj chichamen shíiraiti, tu enentáimtikrattarme” titiá.

¹¹ Yus in waitnentrana asa ashí áentstin uwentikramprataj tusa wakerutmaji.

¹² Kame Yus waitnentrana asamtai, tunáa ana nu iniaiatniuitji, nu nékaji. Tura ju nunkanmaya yajauch ana nu wakerukchatniuitji. Tura antsu ju nunkanam pujayatrik esetsar enentáimsar anañma wekatsuk tuke tsawant Yus anear wekasatniuitji.

¹³ Túrar ii Yusrj Jesukristu, uwentikramajnia nu, imiá shiir iwiarnar tatí tusar nákastiniuitji.

¹⁴ Jesukristuka in jarutramkamiaji, ii tunaariniá uwentikrampratajtsa. Tura, Winia ajarar tuke enentáijjai péñker túrawarat tusa, ii tunaarín japirtampramijai.

¹⁵ Titiu, anaikiamu asam arantusuk nu jintintrata. Yajauch ana nuna túrawarain tusam chicharkarta. Péñkeran túruinia nu ikiakárta. Tura yajauch chichartukarain tusam tuke péñker wekasata.

3

Yus-shuarti túratin

¹ Titiu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. “Péñkeran túratin ana nuna páchitsuk túratataj” titiniaitrum” titiá.

² “Tsanumprairap, kajernaikiairap, antsu shiir enentáimtunaistarum” titiá. Nañkaamantu enentáimtumatsuk ashí shuar péñker awajsatarum tusam tu jintintrarta.

³ Warí, iisha núnisrik Yus-shuar ajatsuk náñkamsar wekaimji, Yuska umirtsuk. Tura íwianch emetamu pempée wekaimji. Tura ii ayashí wakeramu tuke túrinuiyaji. Tunaasha túrinuiyaji. Chikich atankittsar wakerinuiyaji. Chikich shuar kajerkar tura nuamtaksha kajernainuiyaji.

⁴ Túrasha Yus in uwentikkiartin ana nu, anenkratin asa, ni anenkrattairín ashí áentsun iniaktus in uwentikrampramijai.

⁵ Yus in waitnentrana asa, iikia júkesha péñker túrachma aijn uwentikrampramijai. ¿Itiurak uwentikrampramijaj? Ii tunaarín asakátrampramijai, nijiaiktinia áintsan. Tura Yusa Wakanj pujurtamkurin, ii iwiaakmarín yamarman amasmaji.

⁶ Jesukristu jakamujai Yus in emeenturmatsuk ni Wakanj suramsamijai.

⁷ In anenma asa nuna túramiyai. Nuñkia iisha yamaram awajsamu asar tuke iwiaaku átin, ti wakerimij nu íniuiti.

⁸ Nuka ti nekasaiti. Tuma asamtai Yúsan umirkarmia nu, péñker túratniun tuke wakerukarat tusam tuke jintinki wetá. Wi tímiajna nu, péñker asamtai, ashí aents nuna nekaatniun atsumainiawai.

⁹ Shuar netse áujmatainiakui ajeja pachisaip. Tura “aya winia úntruk péñker áiniawai” tu chichasaip. Tura Israer-shuara akupkamurj itirkit tusa shuar ti áujmatainiakui nusha pachisaip. Ántrai ti nuka. Péñker wekasatniun yayatsui.

¹⁰ Shuar tsanumprur yajauch enentáimtainimtikiana nu chicharkata. Ántachkuñkia ataksha chicharkata. Tura penké tujinkiamka jilki akupkata.

¹¹ Nujai juna nekaamniaitme: nuna tura asa awajiruiti. Tura ni tunaariniñ jakattui.

Papru wakerana nu

¹² Wisha Artemasan akatran akuptukchatjameash. Nin akupeachkunka Tíkikiun akuptuktatjame. Nii jeamtai amesha wari winitritia Nekapuris péprunam. Juí Nekapurisnum yumi nantu asamtai seturan pujuttajai.

¹³ Senas, chichaman ti unuimiaru pujana nu, amikiur Apurusjaj jeamtai, nii atsumtsuk shiir weartí tusam, ame túratin jeamna nu yaiṅta.

¹⁴ Iini Yus-shuar ainia nusha péṅker túratniun tura atsumainia nunasha yáṅtinian nekaawartí. Antar pujusarajin tusan nuna tajai.

¹⁵ Ashí wijjai pujuinia nu amikmaatmainiawai. Tura ii amikri Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.

Papru JIRIMÍŪŅKAN papí áatramu

Papru JirimiŭŅkan papin áatramiania nu

¹ Wi Papru ju papin áaran akuptajme ámin, JirimiŭŅká. Ii yachi Timiutéusha juna akupturmai. Wi Jesukristu takaru asan sepunam pujajai. Ame iijjai tsaniŅkia takáa asakmin ju papin akuptajme.

² Núnisan ame jeemiŭn Yus-shuar irunainia nunasha tura ii umaĵ Apiancha tura Arkipi-uncha iijjai ti kakaram takasu asamtai ju papin akuptajrume.

³ Yus ii Aparĵ tura ii Uuntrĵ Jesukristu shiir enentáimturma ásar yainmakarti imiatkinchanum tuke shiir pujustinian.

JirimiŭŅ pėŅker Yus-shuar ámiayi

⁴⁻⁵ Ame Uunt Jesus shiir enentáimtakum ashí Yus-shuar ainia nusha aneamun antukjai. Nuna antukan ámin ti shiir enentáimtakun Yúsan áujeakun yumiŅkiajai.

⁶ Áujeakun chíkich shuarsha ámijjai métek Yúsan nekas enentáimtuiniak ashí pėŅker ana nuna ti paant nekaawarat tusan seajai. Ashí pėŅker ana nuka Jesukristu shiir awajsamujai takakji.

⁷ Wisha ame anenkratmajai ti shiir enentáimtakun waraajai. Yatsurú, ámijjai ashí Yus-shuarsha shiir enentáimiainiawai.

Papru Unisemun waitnentratniun JirimiŭŅkan seamiania nu

⁸ Nu asamtai kakaram tátsujme. Kame wakeraknaka Kristu akatramu asan “Ju túrata” tíminiaitjame.

⁹ Antsu aneakun aya júnisan tájame. Wi Papru úuntach asan tura Kristun takarkun sepunam pujakun

¹⁰ Unisemu waitnentratniun tusan seajme. Niisha wi ujakmajai Yus-shuar ajasu asa winia uchrúa áintsanĵete. Sepunam pujayatan ni aparĵya áintsanak ajasjai.

¹¹ Nuikĵia Unisemu ántrauyi antsu yamaikĵia aminiisha winiisha yáimniuiti.

¹² Ataksha awantajme. Wi ti pėŅker aneamu asamtai pėŅker itiaata.

¹³ Wi Yus-Chichaman étserkun sepunam pujajai. Túmakun ame yajá pujakun yáintkiatin tujintiakmin nii antsu wijiĵai pujus yáintkiat tusan wakerimjai.

¹⁴ Túrasha ámin uĵatsuk túrachmin enentáimpramjai. Kame ame wakerakun útsukchamujai “puĵusti” tákumniŅkia maak.

¹⁵ Júnissha enentáimpramniaiti. Unisemu ishichik tsawant menĵakamamai tura yamaikĵia waketĵi ámijjai tuke puĵustatui.

¹⁶ Kame yamaikĵia emetachma antsu ame aneamu yátsumeá áinis átatui. Nuka ti pėŅkerchakait. Wisha nin ti aneajai. Tura yainmakmin asamtai tura Kristunam ame yatsum ajasu asamtai winia iniankattsam aneashtapash.

¹⁷ Wisha ti pėŅker amikrumchakaitĵaj. Tuma asam winia itiaarua nútĵksam shiir awayáta.

¹⁸ Yajauch awajtamĵaitkiuŅkia tura ámijjai tumashitkiuisha wi akĵtatjai.

¹⁹ Wi Papru nekas winia uweĵruĵai juna áaran ti nekas akĵtatĵame tájame. Túrasha winia tumashitmena nuna páchittsujme. Kame wi uĵakam Yus-shuar ajaschamkum.

²⁰ Wátsek, yatsurú, amesha Yus-shuar asam wi seajme jú túrutata. Kristu enentáimtakum shiir enentáimtikurta.

²¹ Ti pėŅker uminiaitme nuna nékakun júnisan áatĵame. Tura wi seajmena nuna nanĵkaamas túrattamna nuna nékajai.

²² Ayu. Átum Yus áuĵturkurmin Yus winia tsanĵkatruktatui atumĵin iiraitniun. Tuma asamtai wi nuĵ jean puĵustin iwiarturata.

Amikmaamiania nu

²³ Épaprassha niisha Jesukristunu étserek sepunam wijiĵai pujus amikmaatmarme.

²⁴ Núnisan Márĵussha Aristárĵkusha Témassha tura Rúkassha Yus-Chichaman etserkatniun yáintiainia nusha amikmaatmainiawai.

²⁵ Ii Uuntrĵ Jesukristu atumniasha ti shiir yainmakarti.

Nuke atí.

ISRAER-SHUARAN papi akuptukma

Yus ni Uchiríjaj ni chichamen ujatmakji

¹ Yáunchuka Yúsnan etserniujaj chichas Yus ni enentáimmian ii úuntrin ujakmiayi. Tura untsurí nunkanmasha tura untsurí uwitíncha niisháa niisháa chichas ujakmiayi.

² Antsu jú amúamu tsawantáikia ni Uchirj Jesukristujaj ashí Niiniu ana nuna ujatmakji. Yus Niijjaj ashí írúnna nuna najana asa mash Nin súsaiti.

³ Niyaiti Yúsan imiá métek nakumeana nu. Tura Niyaiti Yus nankaamas shiira nuna paant awajeana nu. Niisha aya ni chichamejaj kakarma nujaj ashí írúnna nuna wáiniuk emeta pujurui. Tura ii tunaarín nijiatramak akupin pujutainium, Yusa untsuuriní, pujusmiayi.

Nayaimpinmaya suntarjaj Kristu nankaamantuiti

⁴ Yusa Uchirj nayaimpinmaya suntarjaj imiá nankaamantu awajnasuiti. Tura ti nankaamantu asamtai Yus nayaimpinmaya suntar nankaamas Nin ti shiir awajtawai.

⁵ Wátsek, nayaimpinmaya suntaran chikichkinkesha juna tútsuk Kristun tímiayi: “Ame winia Uchiruitme. Túmaitkiui yamáikia winia kakarmarun átakeajme.”

Tura núnisan tímiayi:

“Wi ni aparí átatjai, tura Nii winia uchir átatui.”

⁶ Tura jú nunkanam ni Iwiajrin akupeak tímiayi:

“Ashí Yusa suntarj tikishmatrarti.”

⁷ Nayaimpinmaya suntarnan júnis chicharui:

“Nayaimpinmaya suntarín takartursarat tusa nasea áintsan awajsaiti. Ni suntarín chárpia áinis akupeawai.”

⁸ Antsu ni Uchirjiniun tímiayi:

“Ame, Yusá, tuke akupniuitme. Ame akuptairmesha aya péñkeraiti.

⁹ Péñkera nu anenaitme, tura yajauchia nu muñniuitme. Tuma asamtai ashí shuar shiir warartamu asamtai Yus, ame Yúsrum, ashí akupniujaj nankaamas uunt awajtamsaiti.”

¹⁰ Nu arantcha tawai:

“Uuntá, yámankamtaik Ame jú nunka najanamiamme. Túram ame uwejmijjaj nayaimpisha najanaitme.

¹¹ Nusha mai amuukarmataisha Ame tuke pujuttame. Tarachjaj métek mamurartatui.

¹² Tura ipijram ikiustatme. Pushiya áintsam yapajíáttame. Túrasha Ámeka núnismek átatme. Játsuk tuke pujuttame.”

¹³ Ataksha tímiayi:

“Akupin pujutainium, winia untsuuruini, pujusam nákarsatá. Ame nemasrumin nupetkan Ámin umirtamkarti tusan amastatjai.”

Núnisan nayaimpinmaya suntaran penké tíchamiayi.

¹⁴ Antsu Yusa suntarj wakan áiniak ashí shuar uwemprartatna nuna yáiníkiarat tusar Yus akupkamu áiniawai.

2

Anearta. Uwempratin Chicham nakitrashtiniaiti.

¹ Nuikia Kristu ti uunt asamtai ashí Niiniu antukajnia nujaj kanakchatin ti enentáimtustiniaitji.

² Yaunchu nayaimpinmaya suntar Muisaisan súsarmia nú akupkamu nekas uminkiatni-uyayi. Shuar umítsuk tunaan túramtai ti kakaram asutniáwarmiayi.

³ Antsu ii Uuntrj Kristuka Uwempratin Chichaman emka itiamiayi. Tura imiá nekas tuíniak Nin anturkaru in ujatmakarmaji. Tuma asamtai Uwempratin Chicham nakiti-akrikia nuna nankaamas uwemtsuk asutniáttaji.

⁴ Kame nu arantcha, Uwempratin Chicham ujatmainiakrin imiá nekas tuíniawai tusa aents túrachminian kakarman Yus iniakmasmiayi. Núnisan ni Shiir Wakanj ni waker-ana núnisan niisháa niisháa kakermajaj takamtikeawai. Nujaj Yus-Chichama nu paant nekanamniaiti.

Jesukristu aents ajasmiania nu

⁵ Ayu. Nuik áujmatkur “jú nunka amuukattawai” taji. Tura yamaram nunkanam nayaimpinmaya suntar akupkachartatui.

⁶ Antsu ii akupkattajnia nu, Yus-Papinium áarmaiti:

“¿Shuarti warimpiaitiaj ame imiá enentáimtitniusha? Kame, ¿shuar warí asamtai pujursataj tamea?

⁷ Ishichik tsawant nayaimpinmaya suntarjai péechach awajsamiame. Túram ti shiir nankaamas uunt awajsattame. Ame najanamun ashí akupkati tusam tsankatkattame.

⁸ Ashí nin umirkarti tusam susattame.” Tu áarmaiti.

Yus “ashí nin umirkarti” takui nin umirkashtinkia atsawai. Túrasha yamaikia ashí umirainiaka wáintsuji.

⁹ Tura wáinjinia nu Kristuiti. Niisha aents ajas ishichik tsawant nayaimpinmaya suntarjai péechach ajasmiayi. Yus ni shuarin ti aneak jarukarti tusa wakerimiayi. Tura ni wáitias jakamujaj yamaikia ti shiir nankaamas Uunt awajsamuiti.

¹⁰ Ashí írumba nu Yus najanamu ásar ni wakeramun umiktin ainiawai. Tura ashí ni uchirisha ni shíirmarín pachiinkiarat tusa wakerawai. Tuma asa Yuska Jesukristun, nu shuaran Uwemtiknia nuna, ni waitsmujaj nekas Uwemtikmartin awajsamiayi.

¹¹ Yusna atí tusa shiir awajsamuncha tura Kristu nin shiir awajea Yuska mai metek ni Aparínti. Nu asamtai Yusa Uchirí nu shuaran “yatsur” títinian natsantsuí.

¹² Yus-Papinium núnisanj tawai:

“Ame náarmin winia yatsurun ujakartatjai. Ashí iruntramunam kantampruattajme.”

¹³ Ataksha ni shuarijajj métek enentáimtamun tawai:

“Yúsan ti shiir enentáimtustatjai.”

Tura ataksha:

“Yus surusmia nú uchirjai Yúsan umirkun pujajai” tawai.

¹⁴ Tura nu uchi aents ásarmatai núnisanj Jesussha aents ajasmiayi. Tura aents ajas jaka, iwianchin, jatai nérenniurín, ashí emesramiayi.

¹⁵ Tura ti untsurí shuaran uwemtikrarmiayi. Nu shuar yaunchu jákatniun ashamainiak tuke wáitin árimiayi. Antsu ni jakamujaj yamá ankant áiniawai.

¹⁶ Maa, imiá nekasaiti, nayaimpinmaya suntaran yáintaj tusa táchamiayi. Antsu ashí Apraám weean, ashí Yus-shuar ainia nuna yáintajtsa támiayi.

¹⁷ Túratin asa penké métek ni yachía áinis ajasmiayi. Nujaj in tuke waitnentramparniaitji. Tuma asa Yúsnan pujurniu uuntrj ajas Yúsan tuke penker chichartamsaniaitji. Núnisanj murikiun maa Yus súsatniua áintsan ni jakamujaj ashí shuara tunaarín tsankurniuiti.

¹⁸ Tura imia niniki waitsa asa tura íwianch nekapsamu asa yamaikia iisha wáitiakrincha tura íwianch nekaprakurnisha yainmakminiaitji.

3

Jesus Muisaisjajisha nankaamantuiti

¹ Tuma asamtai, penker yatsuru, atumniasha Niiniu atí tusa Yus achirmakuitrume. Tuma asarum Kristu Jesus penker enentáimtarum. Niisha Yus nekas Akatramuyayi. Tura ashí Yus-shuar ajasarua nujaj Yúsnan pujurniu uuntrja núnisaiti.

² Nu atí tusa Yus anaikiamiayi. Túramtai Kristu nuna ti penker takasuiti. Núnisanj Muisais ashí Yusa aentsrjn, Israer-shuar armia nuna ti shiir wainkiamiayi.

³ Túrasha Muisaisjaj nankaamas Kristu ti shiir awajnasuiti. Jējaj nankaamas jēj jeamniuka nekas penkerchakait. Núnisanj Kristu Muisaisjaj nankaamas penkeraiti.

⁴ Kame ashí jēj shuar jeamtsuk. Tura Yus ashí írumba nuna najanaiti.

⁵ Wats. Muisais Israer-shuaran wáiniuk Yusa Jēen takastinia áintsan penker takarniuyayi. Tura ni takaak ukunam Yus títiatna nuna etserkatniuyayi.

⁶ Túrasha Kristu Yusa Jēen takarniuchu asa antsu Yusa Uchirí asa nuj ashí akupeawai. Nu jējasha iitji. Tura tuke iniaitsuk kakaram ajasar Yus suramsattaj nu wararsar nákastiniaitji.

Yusa shuarij shiir pujustin

⁷ Nu asamtai, Yusa Shiir Wakanj Yus-Papinium tawai:

“Yamaikia, Yus tana nu ántakrumka

⁸ nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yúsan nekapsar akajkarmiayi.

⁹ Túramtai Yus tímiayi “Nuj atumí uuntrj nekaprusar akajtukarmiayi. Kuarenta (40) uwitin wi kakaram túramun ísarsha nakitrurarmiayi.

¹⁰ Tuma ásarmatai nu shuaran kajerkan tiarmajai “Nu shuar ni enentáin tuke awajiniawai. Tura Wi taman umirkatniun nakitiainiawai” tímiajai.

¹¹ Tura kajerkan nekas tákun “Wijaj shiir pujustinian penké tsankatkachartatjai” tímiajai” tímiayi Yús.”

Tu áarmaiti.

¹² Anearta, yatsuru. Yajauch enentáimsarum tuke iwiaaku Yus enentáimtutsuk kanakirap.

¹³ Kame kashinkia tunaajaj anannam enentáimin Yúsna nakitrashtapash. Tuma asamtai yamaik tura ashí tsawant ikiakánairatarum.

¹⁴ Yámankamtaik Kristu shiir enentáimtusmaj núnisrik tuke iniaitsuk émeteakrikia Kristujaj shiir tsaniñkiar pujustatji.

¹⁵ Nu asamtai Yus-Papí tawai:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap.”

¹⁶ Muisais Ejiptu nunñanmaya jikkimia nú shuar Yusa chichamen anturkariat nakitrarmi-ayí.

¹⁷ Tura umiiniachkui kuarenta uwí kajerarmiayi. Tunaan túrawaru ásar untsurí shuar aents atsamunam kajñkiarmiayi.

¹⁸ Kame umirkacharunka Yus “Wijjaj shiir pujustinian penké tsañkatkachartatjai” tímiayi.

¹⁹ Iis, Yúsán enentáimtachu ásar Niijjaj shiir pujustinnium wayatniun tujinkiararmiayi.

4

¹ Nu asamtai, ii wayatin tsañkatkamu áyatar Yusjaj shiir pujustinnium páchitkiachu ajj tusar aneartiniaitji.

² Yaunchu nu shuaran ujakarmia núnisan incha Uwempratin Chichaman ujatmakuitji. Nu shuar Yúsán enentáimtutsuk antukaru ásmatai nu chicham yañcharmiai.

³ Antsu iikia ni chichame enentáimta asar Yusjaj shiir pujustinnium nekas wayaji. Tura chikichan Yus tímiayi:

“Nu asamtai kajerkan nekas takun “Wijjaj shiir pujustinian penké tsañkatkachartatjai” tímiajai” tímiayi. Kame Yus jú nunñan najana umik nuyá shiir pujus ayampramiayi.

⁴ Yus-Chichamnum ayampramun júnis tawai.

“Yus sais tsawant takakmas nuyá tsawantaj ayampramiayi.”

⁵ Tura ataksha tawai:

“Wijjaj shiir pujustinnium wayá ayamprashtatui.”

⁶ Shuar nuj wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi.

⁷ Nu asamtai ataksha Yus wayatin tsawantan áanturmaiditji. Nusha yamá tsawantaiti. Wats, Israer-shuar ni nunké Yus susamunam wayáwarmiai. Tura nuna ukunam Uunt Tawit timiajai Yus ni chichamen ujatmaj:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap” tímiayi.

⁸ Kame ni kapitántri Jusué Israer-shuaran ni nunñen awayá ayamtikraitkiunñkia Yus ukunam ataksha tsawantan áanturmachajji.

⁹ Nujaj páantaiti, ashí Yus-shuar Yusjaj shiir pujusar ayampratin tuke awai.

¹⁰ Yusjaj ayampra nu, ni kakarmarjijaj takastinian ayampraiti Yus ni takatrjijaj ayampramia núnisan.

¹¹ Nu asamtai iisha Yusjaj shiir pujustinnium pachiinkiachajj tusar Yus shiir enentáimtusar kakaram ajastiniaitji. Israer-shuar yaunchu Yus taman nakitrarua núnis ajaschatniuitji.

¹² Yusa chichame iwiaaku chichamaiti, imiá kakarmaiti. Puniá mai érea núniniait. Tuma asa shuara enentáin inít wayá ashí ni enentáimmian tura wakeramurñ ti paant awajtawai.

¹³ Yus najanamuka penké Nin umprukchamniait. Ashí írunka nu Yus íimmianum misúa áintsan paant áiniawai. Tura ii túramu ashí paant ujakartatji.

Jesus nekas Yúsán pujurniu úuntriñti

¹⁴ Jesus Yusa Uchirj nekas Yúsán pujurniu uuntriñ ajas Yusaj wayá iiniun chichartamji. Nu asamtai iniaitsuk tuke nekas enentáimtustiniaitji.

¹⁵ Niiisha iijjaj métek ashí tunaanum nekapsamuiti. Túrusha tunaan túrachmiayi. Tuma asa ii tujintiaj nuna paant nékak ii iturchatrñ waitnentrarniuitji. Tura Yúsán pujurniu uuntriñ asamtai

¹⁶ Yús-akuptainium shiir enentáijjaj sapijmiatsuk jeamniaitji. Tura Yus in anenma asa waitnentrarnak iturchat pujajnia nuj yainmaktatji.

5

¹ Tura Yúsán pujurniu úuntriñkia shuar anaikiamuiti tura ni takatrj jímaraiti. Yusaj shuárnan chicharsatniuiti. Nuyasha Yus súniarnum súsatniuiti tura núnisan namañken maa Yúsán súsatniuiti shuara tunaarñ asakátratniun.

² Tura Yúsnan pujurniu uuntri niisha shuar asa ni tujintiamun nékachuncha tura waak yujainia nunasha waitnentramniaiti.

³ Tura niisha tujintia asa ni tunaaríncha chikichnajaí métek tsankurnarat namañken maa Yúsán súsatniuiti.

⁴ Shuar ni enentájjiaínkia Yúsnan pujurniu uuntri ajaschamniaiti. Antsu Yus nu shuaran anaikiatniuiti. Núnisañ Arunkan anaikiamiayi.

⁵ Núniskete Krístujai. Niisha ni enentájjiaí Yúsnan pujurniu uuntri ajaschamiayi. Antsu Yus Nin anaik nujai shiir awajsamiayi. Tura tímiayi:

“Ame winia Uchiruitme. Túmaitkui yamaikia winia kakarmarun átakeajme.”

⁶ Tura ataksha Yus-Papinium júnis tawai:

“Mirkisetéka Yúsnan pujurin amia núnismek Amesha tuke Yúsnan pujurin átatme.”

⁷ Kristu jú nuñkanam pujak kakantar útuk Yúsán ti seamiayi. Nin jákatniunmayá uwemtikramnia asamtai seamiayi. Tura Yusa wakeramurín tuke enentájjiaí enentáimtakui Yus anturak ti yáinmiayi.

⁸ Nujai Kristu Yusa Uchiríntiat ni wáitsatniujai umirkatniun unuimiarmiayi.

⁹ Nujai ti nekas Uwemtikin ajasmiayi. Tura shuar umirainia nuna tuke uwem ataksha Yus-Papinium júnis tawai:

“Mirkisetéka Yúsnantikrarminiaiti.

¹⁰ Túramtai Yus Nin Yúsnan pujurniu uuntri Mirkisetékaí métek awajsamiayi.

Anearta. Yusjai kanakchatniuiti.

¹¹ Ju ti nukap áujmatsatin awai. Túrasha ántichu asakrumin mashi ujakchamniaitjarme.

¹² Átumka yaunchu mash nekaamaintrume. Túmaitiatrum ataksha yaitiás Yúsnan jintin-truat tusarum atsumarme. Warí, kuirchia núniniaitrum. Kátsuram yútsuk muntsu muntsúatniuitrum.

¹³ Kuírchia Uwempratin Chichaman áujenak péñker unuimiainiatsui. Tiníamnumiaí ásar tujintiainiawai.

¹⁴ Apatuk kátsurman aya uunt yuámniaiti. Uunt ainia nuka péñkernasha tura yajauchincha apatkar paant nékainiawai.

6

¹ Uunt ajastai. Krístunu ana nuyá aya yúpichuchia nuke enentáimtutsuk nu arantcha unuimiartai. Kame emka unuimiartinia nu ju áiniawai: shuar ni tunaarín jákatniunam júana nuna kúntuts enentáimtur Yúsán shiir enentáimtustincha,

² imiantinnium nekaatniuswai:

“Mirkisetéka Yúsnanha, Yus-shuar yainmanum uweje awantsatniusha, jakamunmayá nantaktincha, tura sumamtikiatin tsawanta nu nekaatniusha.

³ Tura Yus yáinmakrin nuna nankaamas nekaattaji.

⁴ Shuar Yusna nuna nekaañka tura Yus susamun takakkunka tura Yusa Shiir Wakaní kakarmarín nekapsaitkiunka

⁵ tura Yusa chichamencha péñkeraiti nekaañka tura Yusa kakarmari ukunam nunka yamarmanum takastatna nuna yamáí nekapeakka,

⁶ nu shuar nuna nakitiak kanakniaka atak ni tunaarín enentáimtak ikiuktinian wakerachuk tujinkiattawai. Warí, ní enentájjiaí Yusa Uchirín krúsnum máiniaiti túrak ashí ímiainiaí natsanmain awajeawai.

⁷ Nu shuar yajauch nunka áintsan áiniawai. Yumi yútakui péñker nunka arakan péñker tsapatmakka arakmaun yayawai. Túramtai Yus shiir enentáimui.

⁸ Antsu janí nupan tsapatmakka nu nunka yajauchiiti. Yus áeseak emesrattawai.

Yus tsankatramkattajnia nu enentáimtakur kakaram ajaji

⁹ Aneamu yatsurú, tu chicharkursha, nú shuarchaitrum nu nékaji. Antsu uwempra asarum nú péñker túrattarme.

¹⁰ Yus ti péñker asa átum takasmancha tura ni aneakrum Yus-shuar yainmancha kajinmatkishtatui. Tura yamaisha tuke túrarme.

¹¹ Tura nuik túrarmena núnisrumek tuke iniaitsuk kakaram takasrum ashí Yus tsankatramkatta nu wáinkiattarme. Núnisañ atí tusar wakeraji.

¹² Nakimsuk kakaram ajastarum. Niiniua nuna Yus ni shuarín susattawai. Tura shuar Yúsán enentáimtak shiir enentájjiaí nákkaka nuna wainkiattawai. Tu takastarum tusar wakeraji.

¹³⁻¹⁴ Yus yaunchu Apraámjai chichaak “Ti nekas shiir awajsattajme tura ti nukap pam-pamtikrattajme” tímiayi. Nuna taku imiá nekas tajai tusa tura chikich Niijjai nankaamas uunt atsakui imia Niñki pachiiimias tumammiai.

¹⁵ Tutai Apraám yáitmataik nákas Yus timia nuna wáinkiamiayi.

¹⁶ Shuar “nekas tajai Yus íirui” tákuŋka chíkich níijjaj nanŋkaamas úntan páchiawai. Tura tu chichasmataĩnkia nuyánka imiá nekas tana nu nekaamniai.

¹⁷ Tuma asamtai Yuska “ti nekasana yapájítsuk túrattajai” tusa imia Niŋki pachiiimias tumammiaiyi. Nujaj ni tsanŋkatkamun júkiartatna nu shuar Yus ti nekas umiktatna nuna nékainiawai.

¹⁸ Yus penké wáitruachmin asa áyatik ni tamajaj nekasaiti. Nuna arant nuikia imia Niŋki pachiiimias ti ikiakátmajai in. Nujaj iisha uwempratai tusar Niini weamkatikia tsanŋkatramkattajnia nu ti shiir enentáimsar wáinkiatin nákaji.

¹⁹ Nu enentáimsar kakaram ajaji. Yusajya in umuchtiamakamnia penké atsawai. Yusaj áchitkia asakrin ti kakaram emettamji.

²⁰ Jesussha emka Yusaj wayá mash iwiarturmaji. Tura Mirkiseték amia núnisan Niisha yamá tuke amuukashтинian Yúsnan pujurniu uuntri ajasuiti.

7

Mirkiseték amia núnisan Jesussha Yúsnan pujurniu uuntri ajasuiti

¹ Nu Mirkisetéksha Sarem nunŋkanam akupniuyayi. Tura ashí nanŋkamas kakaram Yúsnan pujurniuyayi. Apraám chíkich akupniun mesetjaj awakak támatai Mirkiseték jüintiuki inkiun ti shiir awájsamiayi.

² Túramtai Apraám nupetmakar kuit jukimiun tias (10) akantuk susamiayi. Mirkisetéka naarí tana júka “ti penker uunt akupin” tawai. Tura Saremka “ti shiir imiatkincha” tawai. Tura Mirkiseték Sarena akupniurí asa “ti shiir imiatkinchanum akupin” tawai.

³ Nukurísha aparísha Yus-Chichamnum atsawai. Núnisan ni uuntriísha atsawai. Ni akiiniamuríncha ni jakamuríncha ujaatsui. Tuma asamtai Yusa Uchiríja áintsan tuke iniannakchatniun Yúsnan pujurniu uuntri ajasuiti.

⁴ Mirkiseték timiá uuntauya nu enentáimprata. Ii uuntri Apraámsha nupetmakar kuit jukimiun tias akantuk susamiayi.

⁵ Tuma asamtai Apraám nanŋkaamas úntaiti. Muisais akupkamujaj Riwi weeáka Yúsnan pujurin ániawai. Niisha ashí Israer-shuarjaj métek Apraám weeá ániawai. Túmaitiat penké Israer-shuar ni warirín tias akantuk Riwi shuaran suu ármiaiyi. Muisais tu akupkamiayi.

⁶ Túrasha Mirkiseték Riwi weeachunak Apraám tiásan akantuk nin susamiayi. Apraám Yus shiira nuna tsanŋkatkamuitiat Mirkisetékan níijjaj uunt asamtai susamiayi. Túram Mirkiseték Apraáman shiir awajsamiaiyi.

⁷ Imiá nekas Mirkiseték Apraáma nanŋkaamas páantin asa Apraáman shiir awajsamiaiyi.

⁸ Israer-shuarti tias akankamun súajnia nú shuar aya aents ásar tuke pujuschamin ániawai. Antsu Mirkiseték jakamun Yus-Chicham penké ujaatsui.

⁹ Yamái Riwi weeá shuar kuit akankamun achiktin ániawai. Túrasha Apraám Mirkisetékan súaku Riwi weeá nujaj susa ániawai.

¹⁰ Apraám weeá ániak ni ayashía ánis enentáimtusmin ániawai.

¹¹ Muisais akupkamunam Riwi-shuarnumiá aya Arun weeá shuar Yúsnan pujurin ármiaiyi. Niisha Muisais akupkamu timiá nujaj métek penké shuarjaj takasarmiaiyi. Tura Riwi-shuarnumiá Yúsnan pujurniu takatríjjaj tunáa nekas asakárminiaitkiunŋkia Yúsnan pujurin yamarmak, Arun weeachu, anaikiashtin ainti. Túrasha Yus Jesusan, Mirkiseték amia ánis, Yúsnan pujurniu anaikiaiti. Nusha Arun weeachuiti.

¹² Tura Yúsnan pujurin yapajnjámtai Muisais akupkamusha yapajnjátniuiti.

¹³⁻¹⁴ Nu arantcha, ii Uuntri Jesukristu Riwi-shuarcha antsu Jutá-shuarauyayi. Tura Muisais akupkamujaj Jutá-shuarnumiá Yúsnan pujurin atsutniuiti. Antsu nuna takatrín penké túrashiniuyi. Tuma asamtai nújasha Muisais akupkamu yapajnjátniuiti.

¹⁵ Nú páantcha awajsamniaiti. Wats, Yúsnan pujurin yamarma nuka Mirkisetékajaj méteketete.

¹⁶ Niŋkia Riwi shuar asa Yúsnan pujurin ajaschamiayi, antsu jákashtin asa nu kakarmajaj Yúsnan pujurin ajasmiaiyi.

¹⁷ Tuma asamtai júna Yus Jesusan áujmatui:

“Mirkisetékka Yúsnan pujurin amia núnismek Amesha iniannatsuk Yúsnan tuke pujurin átatme.”

¹⁸ Nujaj yaunchu akupkamu penkercha ajasmatai japirmaiti.

¹⁹ Muisais akupkamuka shuáran penker awajschaminiuyayi. Antsu Yus in ti shiir awajtam-sattajnia nu nákaji. Nujaj Yusaj ti shiir jeeáitji.

²⁰ Nunasha Yus “nekas tajai” tusa Niŋki pachiiimias tumammiaiyi.

²¹ Riwi-shuarnumiá Yúsnan pujurin Yusa naarí pachitsuk anaikiamu ármiaiyi. Antsu jú Yúsnan pujurniunka Yus imia Niŋki pachiiimias anaikiamiaiyi. Tura Nin júnis tímiaiyi:

“Uuntka imia Niñki pachiimias tiniu asa penké yapajáshtatui. Niisha “Mirkisetékka Yúsnan pujurin amia núnismek Amesha tuke Yúsnan pujurin átatme” tímiayi.”

²² Tuma asamtai Jesuska nekas uwentikrattajai tusa yaunchu amia nujaj nankaamas péñker Chichaman iwiarturuiti.

²³ Yaunchu Yúsnan pujurin untsurí ármiai. Chíkich jakamtai chíkich tuke takaarmiai.

²⁴ Antsu Jesus tuke jákashtin asa chikichan ikiurkishtatui.

²⁵ Tuma asa tuke iwiaaku pujak ni shuarjín tuke Yúsán áujtusminiaiti. Tuma asa shuar Nin enentáimtusar Yusaj weankarun tuke uwentikramniaiti.

²⁶ Tuma asa Jesus Yúsnan péñker pujurin asa ii atsumajnia núkete niisha. Niisha ti shiir asa penké tunaarinchaiti. Ashí tunaariniunmayá kanakniuiti. Tura Yusjaj métek Uunt ajasuiti.

²⁷ Niisha yaunchu Yúsnan pujurniu uuntrj armia núnichaiti. Yaunchua nuka murikiun máawar ashí tsawant Yúsán suu ármiai. Nujaj emka ni tunaarjín nuyá ashí shuara tunaarjín asakátin ármiai. Tura Jesuska jákatniunam chikichkí surumak ashí shuara tunaarjín asakátramiai.

²⁸ Muisais akupkamuka penké shuarnak tuke péñkercha ajín Yúsnan pujurniu úuntrjín anaikiaiiti. Tura nu ukunmañka Yus, nekas niñki pachiimias, ni Uchirjín, tuke péñkera nuna, Yúsnan pujurniu úuntrjín anaikiaiiti.

8

Nankaamas péñker Chichaman Jesus takartamji

¹ Nekas juna tájame: Yúsnan pujurniu uuntrj Jesus in ti shiir yainma asa akupin pujutainium Yusa untsuurinjí nayaimpiniam pujusuiti.

² Nekas Yusa Jee nayaimpinma nu aents najanachma antsu Yus najanamuiti. Nuj Jesus Yúsnan pujurui.

³ Ashí Yúsnan pujurniu uuntrj ainia nu, shuar Yúsnan susamuncha tura namañ maar Yus sútaincha Yúsán ashí súsatin ániawai. Núnisan Jesukristusha Yúsán súsatniuiti.

⁴ Juyá Yúsnan pujurin Muisais timia nuna Yúsán yamaisha susamin akui Jesus ju nunkanam pujakka Yúsnan pujurin áchainti. Antsu nayaimpiniam takaawai.

⁵ Yus yaunchu Muisaisan nayaimpiniam írúnna nuna iniaktus tímiayi “Ame wáinkiamna nujaj métek ashí najanata.” Túramu asamtai ashí yaunchu Yúsnan pujurin Muisais najanamujaj takainia nu aya nayaimpiniam ana nuna nakumkamujajín takainiawai.

⁶ Antsu Jesus ti nekas nujaj nayaimpiniam takaawai. Muisais akupkamuka shuáran péñker awajsachminiaiti. Antsu Yus in ti péñker awajtamsattajai. Kame Yamaram Chichamnum Yus ashí túrutmattajnia nu Muisais akupkamunam ana nuna nankaamas ti péñker ániawai. Tuma asamtai nankaamas péñker Chichaman Jesus takartamji.

⁷ Kame Emka Chicham, Yus Muisaisjaj yaunchu najanamia nu, nekas péñkeraitkiuinikia Yamaram Chichaman najanachajai.

⁸ Antsu péñkercha ániakui Israer-shuaran tímiayi:

“Uunt Yus tawai: “Tsawant jeamtai ashí Israer-shuarjaj Yamaram Chichaman najanattajai.

⁹ Yaunchu ju shuara uuntrjín Ejiptunmayá yaruakmiaj nuj Emka Chichaman najanamjai. Tura Yamaram Chichaman najanattaj nu núnischa átatui. Emka nuna uminiachkui ajapan iniaismajai.” Núnis tawai Uunt Yus.

¹⁰ Tura nu arantcha tawai: “Tsawant jeamtai Israer-shuarjaj Yamaram Chichaman najanattaj nuka júnis átatui. Wi akupeajna nuna enentáin paant enentáimtikrattajai. Nuyá ni Yusrj ártatjai tura niisha Wíi shuar ártatui.

¹¹ Nujsha Yúsán nekaat tusa jintinnaiyachartatui. Kame ni ajsha ni yachjsha kame ashí shuar, uchisha uuntcha, ashí nekarawartatui.

¹² Tura ashí ni tunaarjíncha tsañkuraran ni yajauchirjín atak penké enentáimtuschartatjai” tímiayi!” Tu áarmaiti.

¹³ Wats, Emka Chicham yajauch ajakui Yus Yamaram Chichaman nájaneak pujurui. Tura yajauch ajasua nuka wárik ajapnattawai.

9

Yusa Jee nayaimpinmasha tura ju nunkanmasha

¹ Ayu. Yus shiir awajsatniuka Emka Chicham timia nujaj métek túratniuyayi. Tura ju nunkanmayá Yusa Jeeñ weriar Yús shiir awajsatniuyayi.

² Nu Jeejsha júnis tesakmauyayi. Nékatka Shiir Tesaamu tutainti. Nuj asuitin ekeemakar tsáapin awajtaisha tura misasha Yus iniaktusma tantajaj pujuyayi.

³ Nuyá-tesaamuka Imiá Shiir Tesaamu tutainti.

⁴ Nuj̄ kuṅkuin ekeemataisha kurij̄j̄i kuerna tura Chícham Aarma Chumpitaiasha pu-yuyayi. Nusha ashí kurij̄j̄i kuérmauyayi. Tura inít kurij̄j̄i najanamu ichínkian maná yurumak enkemniuyayi. Nuyá Yúsnaṅ pujurniu uuntr̄j̄ Aruṅka ushukrutair̄j̄ yaunchu tsapaak jaṅkukmia nusha enkemniuyayi. Nuyá Yus najanamu Chícham Muisais kayanam aarmasha enkemniuyayi.

⁵ Nuna úkurin Kirupín, nayaimpinmaya suntara nu, kurij̄j̄i nakumkamu wajarmiyai. Nusha Yusa shúfirmarín nakumkarmiyai. Tura ni nanapéj̄j̄i shuara tunaarín ayamprutain nukúakuyayi. Nuna arantka yamá etserkatin atsumatsji.

⁶ Núnis aa asamtai Shiir Tesaamunam ashí Yúsnaṅ pujurin tuke wáiniak Yúsnaṅ takasarmiyai.

⁷ Tura Imiá Shiir Tesaamunman̄ka aya ni uuntr̄j̄n wáiniayuyayi. Tura niisha ashí uwitín aya chikichik tsawant wayamiayi. Wayak ni tunaar̄isha tura ashí shuara tunaar̄i tsan̄kurnarat tusa Yus súsatniun naman̄ké numpen juu ámiayi.

⁸ Yusa Wakan̄j̄ núnis atí tusa nuna mash iwiaramiayi. Tura asa juna paant awajturmaj̄i. J̄j̄ nuṅkanmaya Yusa J̄j̄e pujakui tura aya nuin̄ Yus shiir awajsamniaitkiuin̄kia nekas Imiá Shiira nuj̄ Yus pujamunam wayatín tuke ititurchat ainti.

⁹ Nusha yamá pujuiniaj̄ nuna enentáimtikrampratniuit̄j̄i. Shuar Yus shiir enentáimtikratniun naman̄ken maa suániaksha nu shuar ni tunaar̄ij̄j̄i tuke itit enentáimtumainiawai.

¹⁰ Warí, aya yurumátniusha umartincha nijartincha tura ashí núnisaṅ túratniuj̄j̄i aya pátatek asamtai enentáiniam ana nuna iwiarachmin ániawai. Antsu Yus nú túratniunka yapaj̄iatniuyayi. Tuma asamtai yapaj̄niátsain̄ túratin ániawai.

¹¹ Tura yamaikia Kristu táwiti tura Yúsnaṅ pujurniu uuntr̄j̄j̄i ajas Yamaram Chichamnum Yus ti penkeran túrutmatniua nuna pujurturmaj̄i. Niisha ti shiir Yus J̄j̄e aents najanach-manum takaawai. Nu J̄j̄e j̄j̄ nuṅkanmayanchuít̄i.

¹² Tura Kristu Imiá Shiir Tesaamunam naman̄ke numpéj̄j̄i wayachuiti antsu ni numpej̄ain̄k' wayaiti. Tura aya chikichkí wayá ii tunaar̄in asakturmar tuke uwentikram-pramiayi.

¹³ Nekas naman̄ké numpesha tura áisamu yun̄kunmir̄isha tunáa shuarnum pátatek ukatkam aya pátatek shiir awajsamniuyi.

¹⁴ Túrasha Kristu numpé ii tunaar̄in penké asakárui. Túramtai yamaikia tunáa jákatniunam júana nuj̄j̄i itit enentáimtumatsuk nekas iwaaku Yus shiir umirkamniait̄j̄i. Kristu penké tunaar̄incha asa tuke jákashtin Wakan̄j̄ kakarmar̄ij̄j̄i jákatniunam Yusaj̄ surumakmiayi.

¹⁵ Nu asamtai Jesukristu Yamaram Chichaman shiir takarniuiti. Yaunchu Chichamj̄j̄i tunáa nekas tsan̄kurachma asamtai Kristu jaka nu tunaan̄cha tsan̄kurarmiayi. Nuj̄j̄i ashí Yus-shuarti Yus achikma asar Yus tsan̄katramaj̄nia nu wáinkiar tuke wararsattaj̄i.

¹⁶⁻¹⁷ Shuar ni kuitr̄in akantrattak chichaman najanatniuiti. Tura jáatsain̄ nu kuit akantrashtiniaiti. Aya nii jakamtai nu chícham najanamu uminkiatniuiti.

¹⁸ Nu asamtai Emka Chicham Muisaisj̄j̄i najanamusha maamu numpé ukatramuj̄j̄i akupkamuyayi. Nuj̄j̄ish̄a naman̄ máatniuyayi.

¹⁹ Muisais nu akupkamun ashí shuáran ujakarmiayi. Nuyá ure kapaq̄kuj̄j̄i tura nupaj̄j̄ish̄a naman̄ké numpé entsaj̄j̄i pachimpramuj̄j̄i ayak akupkamu papincha ashí shuarnasha ukatkarmiayi.

²⁰ Tura tiarmiayi “J̄j̄ numpaj̄j̄i “Chícham Yus akupturmarmena nu nekas umiktiniaiti” tawai.”

²¹ Nuyá nu numpaj̄j̄i Yusa J̄j̄encha ashí nuj̄ takastin irunmia nunasha ukatkarmiayi.

²² Nu akupkamuj̄j̄i penké ishichik numpaj̄j̄in̄chu shiir awajsamniaiti. Túrasha numpaj̄j̄in̄chu tunáa penké asakárchamniaiti.

Kristu jakamuj̄j̄i tunáa asakárminiaiti

²³ Tuma asamtai Muisais najanamu nayaimpiniam ana nuna aya nakumkamu ásar naman̄ké numpej̄j̄i shiir awajsamu ármiai. Antsu nayaimpiniam nekas íranna nu, nan̄kaamas kakaram numpaj̄j̄i shiir awajsatín ániawai.

²⁴ Kristuka yaunchu Yusa J̄j̄en aents najanamunam takastaj̄ tusa wayachmiayi. Nuka nayaimpinmayan̄ aya nakumkamuiti. Antsu nekas nayaimpiniam Yus pujamunam wayá asa in̄ áujturmaj̄i.

²⁵ Yaunchu Yúsnaṅ pujurniu uuntr̄j̄j̄i ni numpej̄j̄in̄chu ashí uwitín Imiá Shiir Tesaamu-nam wain̄ ármiai. Tura Kristuka untsur̄j̄ wayachuiti.

²⁶ Kame untsur̄j̄ wayatniuitkiuin̄kia ni numpej̄j̄ain̄k' wayá asa yáman̄kamtaiknumiá untsur̄j̄ ják̄ayai. Antsu yamaikia j̄j̄ nuṅka amúamunam Kristu chikichkí jákatniunam suru-mak tunaan ashí asakárui.

²⁷ Ashí shuar chikichkí jakar nuyá ni túramun Yusaj nekamatniun nantaktin áiniawai.

²⁸ Núnisan Kristu chikichkí jákatniunam surumak shuara tunaarín asakáruiti. Tura atakka tunaan asakártinian wantinkiashtatui. Antsu ni tátintriñ nákainia nuna uwentikkratsa wantinkiattawai.

10

¹ Muisais akupkamuka ukunam ti penker átatna núchaiti. Antsu nuna aya nakumeawai. Tuma asa ashí uwitin namañ maar Yus sítaijjaijasha shuara tunaarín asakátrachminiaiti.

² Kame asakátraka shuar nekas shiir awajsamniaitkiuñkia Yus namañ maar súsatniun atsumachuk iniaisaraayí. Iis, mash tsankuramuitkiunka ni tunaaríjjai itit enentáimtumasarainti. Túrawar namañ maar Yus súsatniun iniaisarainti.

³ Antsu namañken maar ashí uwitin tuke suñiak nujai ni tunaarín tuke enentáimtuiniawai.

⁴ Wari, namañké numpejai ii tunaarj penké asakárchamniaiti.

⁵ Nu asamtai Kristu jú nunkanam taa Yúsán chicharuk tímiayi:

“Namañ maar sítaijasha penké nakitráme. Antsu ayash iwíaram surusuitme.

⁶ Namañ áesamusha tura tunaan asakártin namañ susamusha wakeratsme.

⁷ Tuma asamtai “Yusrú, tímiyai. Winia áaturma núnisnak ame wakeramurmin umiktajtsan táwitjai” tímiyai.”

⁸ Emka, Muisais akupkamu aijn, namañ susamuncha, tunaan asakárat tusa namañ maar susamuncha, namañ áesamuncha Yus ashí nakitraiti tawai Kristu.

⁹ Nuyá “Yusrú, ame wakeramurmin umiktajtsan táwitjai” tawai. Nuna taku namañ maar sítain “Asakáiniaiti” tawai. Tura chikichan ikuawai.

¹⁰ Jesukristu Yúsán umiruk jákatniun chikichkí surumakmatai Yus in tunaaríncha shiir awajtamsaitji.

¹¹ Tura Israer-shuarnumiá Yúsán pujurin ashí tsawantaj nú namañnak máawar tunaan asakáchunak Yúsán ti suu áiniawai.

¹² Antsu Jesukristuka jákatniunam chikichkí surumak ashí shuara tunaarín asakár atakka penké jákashtiniaiti. Nuna tura Yusa untsuuriní nekas akupin pujutainium pujusuiti.

¹³ Tura Yus ni nemasrín nupetak nin umirkarti tusa súsartatna nuna nákwai.

¹⁴ Chikichkí jakamujai ni shuarín tuke tunaaríncha awajsaruiti.

¹⁵ Yusa Wakanjsha núnisan tawai. Emka tímiayi:

¹⁶ “Yamaram Chichaman najanattaj nuka júnisán átatui: Wi akupeaj nuna ni enentáin paant enentáimtikrartatjai.”

¹⁷ Nuyásha tawai: “Ni yajauch tunáa túramurín penké enentáimtuschartatai.”

¹⁸ Tuma asamtai, ii tunaarj tsankuramu asamtai atak in jarutramkatin atsumatsji.

Yus tuke shiir enentáimtusar Yusaj jeartai

¹⁹ Tuma asamtai, yatsurú, Jesukristu numpejai péñker awajsamu asar sapijmiatsuk shiir enentájjai Imiá Shiira nuj, nekas Yus pujamunam wayamniaitji.

²⁰ Nuñ wayatniuka Kristu jaka Yusa Jeen tesaamun júsatniua áintsan ánturmamijai. Yamaisha tura tuke wayamnia átatui.

²¹ Jesus Yúsán pujurniu uuntri asa ashí Yus-shuartin wáitmak pujurtamji.

²² Tuma asamtai, tuke enentájjai Yus imiá nekas enentáimtusar Yusaj jeartai. Ii enentáí Kristu numpejai nijiarma asamtai nekas enentáimtakur ii tunaaríjjai itit enentáimtumasarhatniuitji. Tura ii ayashjasha péñker entsajai imianniuitji.

²³ Yus tsankatramkattajnia nu shiir enentáimtamun iniaitsuk kakaram ajasar tuke emetatniuitji. Yus tsankatramkaitji nuna umiktatui.

²⁴ Péñker anenain tura péñker túrin ajasartai tusar mai yainiaikiartiniaitji.

²⁵ Yusa Jeen Yus-shuarjai tuke iruntratin iniaisashiniaitji. Chíkich iniainiakuiasha iikia tuke iruntratinuiitji. Nuñ irunkurkia ikiakánairtiniaitji. Tura Kristu tátin tsawantri ishichik ajasu asamtai nú nukap túratniuitji.

Anearta. Ti tsúumainti iwiaaku Yusa kakarmaríjjai asutniátin.

²⁶ Túrasa shuar nekas chichaman nékayat wakeramuríjjaiñ tunaanum wekaakka Kristu jakamun nakitia asamtai chíkich atsawai ni tunaarín asakátratniun.

²⁷ Áyatik ashamak ti tsuumai sumamatin tsawantan nákasminiaiti. Nu tsawantaj Yus ni nemasrín ti kajerak asutiak mash emesrattawai.

²⁸ Shuar Muisais akupkamun umikchamtai tura jímiar shuar menaintiusha etserkarmatai waitnentsuk máatniuyayi.

²⁹ Núnisaitkiuñkia shuar Yusa Uchirín wishikiainiakka ni numpencha nakitiainiakka tura Yus nin anea nuna Wakanjcha katsekainiakka nuna nankaamas asutniáchartatuak.

Warí, nii nakitiana nu numpajaj Yamaram nekas umirkatin awajsamuyayi. Tura nújaisha nii ti péñker awajnostiniuyayi.

³⁰ Ii Uuntrj Yus júnis tímiayi “Wi asutiátniuitjai. Wi yapajkiattajai.” Nuyásha tímiayi “Wí shuara tunaarjn ti paant nekarattajai.”

³¹ Ti tsúmainiti iwiaaku Yusa kakarmarjjaj asutniátin.

³² Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajasrum ashí itiurchat katsuntramarme.

³³ Chíkichtirmeke katseknakmarme tura ashí ímiainiamunam yajauch awajnasmarme. Chikichcha nu shuarnum pachitkia asarum itit awajnasmarme.

³⁴ Atumsha sepunam pujuinia nusha waitnentramarme. Tura shiir warasrum kuítrumin atantramainiakui sha katsuntramarme. Nayaimpiniam tuke amuukashtin kuit pachiktin asarum túramarme.

³⁵ Tuma asarum yawetsuk Yus tuke enentáimtusurum kakaram ajastarum. Túrakrum nankaamas akinkiatarme.

³⁶ Atumsha esetra enentáimsarum Yus wakera nu túrakrum Yus atumin amastinia nu wainkiattarme.

³⁷ Kame Yus-Chichamnum áarmaiti:

“Tátinia nu ishichik ajasai. Wárik tátatui.

³⁸ Shuar Yúsan nekas enentáimtak péñker wekaak uwemprattawai. Tura iniaiyakuñkia nin wararsashtajai.”

³⁹ Tura iikia iniaisar mesena nú shuarchaitji. Antsu Yus shiir enentáimtusar uwempraitji.

11

Yus nekas enentáimtustin

¹ Yus nekas enentáimtakur “nákajnia nuna, Yus nekas suramsattaji” taji. Tura wáinchaitiatar “nekas wáinkiatattaji” taji.

² Yaunchu ii uuntrj Yúsan nekas enentáimtuiniakui Yus “péñkeraitme” tiarmiayi.

³ Aya Yus enentáimtakur jú nékaji: Yus aya ni chichamejaj ashí nunñkan najanamiai. Túramtai ashí wáiniainiaj nu wáinchatajjaj najanamu áiniawai.

⁴ Apir Yúsan nekas enentáimtak Kañjaj nankaamas péñkera nuna Yúsan susamiai. Túramtai Yus “péñkeraitme” taku shiir yumñsamiai. Tuma asamtai Apir jákaitai tuke enentáimtikramji.

⁵ E nuksha Yúsan nekas enentáimtak iwiaakuk nayaimpiniam junakmiayi. Yus jukimiu asamtai wáinkicharmiayi. Tura Yus-Chichamnum aarma “E nuk júnsatuk Yúsan ti shiir enentáimtikniuyayi” tawai.

⁶ Tura Yus nekas enentáimtachkumka çitiurak Nii shiir enentáimtiksatam? Nekas enentáimjaj Yúsan weantuktaj tusam wakerakmeke, emka, Yus iwiaaku pujawai, tu enentáimpratniuitme. Nuyásha, Wi Yúsan eakuñkia Yuska winia yáintkiattawai, tu enentáimsatniuitme.

⁷ Yus, ‘amaarkatniun akupkattajai’ tiniu asamtai, Nuaisha Yúsan nekas enentáimtak, amaarun wáinchaitiat, “túrunattawai” tímiayi. Túrak Yus timiajjaj métek uunt kanun najana ni shuarincha uwentikramiai. Tura Yúsan nekas enentáimta asamtai Yus “péñkeraitme” tímiayi. Tura ni umirkamujaj chíkich shuar Yúsan enentáimtachun súmantikiawarmiayi.

⁸ Tura Apraámsha Yúsan nekas enentáimtak Yus “núñkem ikiukim wetá” tutai shiir umikmiayi. Yus tuke nin súsanua nú nunñkanam wémiayi. Turasha ni nunñken ikiuak ni jeatniun nékatsuk jñinkimiayi.

⁹ Yúsan shiir enentáimtak nú nunñkanam Yus nin tsankatkamuiat irara áinis pujusmiayi. Nuap jeanam pujuyayi. Núnisaj ni uchirj Isaksha tura ni tiranjí Jakupsha nuñ tsankatkamuiatjan irara núnisar pujuarmiayi.

¹⁰ Kame Apraámka nayaimpinmayaj ashirchamin péprunam pujustinian nákasmiayi. Yus nu pepru péñker iwiar jeamka asamtai umuchkiachminiati.

¹¹ Apraáma nuwé Sarasha Yúsan shiir enentáimta asa úntach áyat ajaprukmiayi. Yus timia nuna umiktatui tau asa uchin takusmiayi.

¹² Tura nujaj Apraám ti úntchitiat ti pampanmiayi. Nii chikichkitiat ni pampanmarj ti untsurj ajasar yaajaj métek tura náikmijaj métek nekapmarchamnia ajasarmiayi.

¹³ Ashí nu shuar Yus tsankatkamun wáintsuk jákarmiayi. Túrasha Yúsan nekas enentáimtuiniak arantjaj wáinkiar warasar shiir enentáimtiarmiayi. Túrawar “jú nunñkanam nekas aya iraraitji” tiarmiayi.

¹⁴ Iraraitji” tu chichainiak chíkich nunña eamun páant awajainiawai.

¹⁵ Niisha matsatu winíarmia nuñ atak waketkitniun wakeruiniakka páchitsuk waketkiarajayi.

¹⁶ Tura antsu niisha nuna nankaamas péñker nuñkan nayaimpinmaya nuna enentáimtiarmiayi. Túmainiakui Yuska péprun iwiartur susa asa “wi ni Yusrjntjai” títinian natsantatsui.

¹⁷ Ataksha Apraám Yúsan nekas enentáimtak “chikichik uchi amasmaj nu, namankea áitkiasmek maam surusta” takui Apraám Isakan ni uchirjñ Yus susatniun peñké suritkiachmiayi.

¹⁸ Kame Yus “Isakjai ti pampañtatme” tau asamtai

¹⁹ Apraám “máamtaisha Yus iniantkittiawai” tu enentáimpramiayi. Tura Yus ukunam máatiun suritkiamtai Isakan máachiat nekas jákatniunmaya uwempran nantakniua áintsañ wáinkiamiayi.

²⁰ Isaksha Yúsan nekas enentáimtak ni uchirjñ Jakupnasha Esauncha ukunam ni túrunattana nuna ujakarmiayi.

²¹ Núnisan Jakup Yúsan nekas enentáimtak jatsuk ni tirañkin, Jusé uchirjñ, shiir túrunattana nuna ujakarmiayi. Tura ti uuntach asa máshtuñkrjñ ushukruma Yúsan shiir awajsamiayi.

²² Tura Jusesha jákatniurj ishichik ajatesmatai Yúsan nekas enentáimtak Yus ukunam Israer-shuaran Ejiptu nuñkanmaya júkiartatna nuna ujakarmiayi. Tura jñiniainiak ni ukunchjñ júkiar Yus tsañkatkamu nuñkanam iwiarsarat tusa akupkamiayi.

²³ Muisaisa aparjisha nukurjsha Yúsan nekas enentáimtuiniak Muisais ti shiirmach asamtai suntar máawarajñ tusa akiiniamunmaya menaintiu nantu úukarmiayi. Tura uunt akupin akupkamun ashamkacharmiayi.

²⁴ Muisaissha Yúsan shiir enentáimtak uunt ajas Ejiptunmaya uunt akupniu nawantrj uchirjñ ajastinian nakitramiayi.

²⁵ Antsu Ejiptu nuñkanam ishichkisha tunaan warartsuk Yusa shuarjñjai métek wáitsatniun nankaamas wakerukmiayi.

²⁶ Nujaj Krístun yajauch awajsarmiia núnisan niisha wáitsatniuyui. Túrusha ashí Ejiptu nuñkanam péñker irunmia nuna nankaamas Yus nin ukunam tsañkatkatta nuna shiir enentáimtusmiayi.

²⁷ Niisha Yúsan shiir enentáimtak uunt akupin kajeramu ajñ ashamtsuk Ejiptu nunkanmaya jñinki wémiayi. Yúsan wáinchiat shiir enentáimtamujaj wainiua áinis kakaram ajas ashí katsuntramiayi.

²⁸ Muisais Yúsan shiir enentáimtak yámankamtaik paskua namperan najaneak ashí Israer-shuaran numpajaj ni wáitirjñ kuérat tusa akupkarmiayi. Nujaj Yus timia núnisan nayaimpinmaya suntar nuna iis nu jeañam iwiarjñ máatsuk nankaikit tusa tímiayi.

²⁹ Israer-shuarsha Yúsan shiir enentáimtuinia ásar Kapañantñ Entsa nakaakamtai ajapén ti peñker kukarnum katñkiarmiayi. Ejiptunmaya suntarsha núnisan katñtñai tukamá jakerarmiayi.

³⁰ Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmatai aq tanish sáanákmiai. Nujaj ti yúpichuch nupetkarmiayi.

³¹ Raapsha nu péprunam pujak, Yúsan nekas enentáimtak tsanirmataj áyat Israera suntarjñ mamikmak wekaan ti peñker itiáa asa chíkich shuar Jerikiúnam matsatua nujaj jákachmiayi.

³² Nu arantcha Yúsan shiir enentáimtin ti írui. Jeteúñsha, Paraksha, Sansunsha, Jiptísha, Tawitcha, Samuersha, Yúsnan etserniusha nu shuar ármiai. Mash ujaktinian jeatsjai.

³³ Niisha ashí Yúsan nekas enentáimtuinia ásar Yusa kakarmarjñ niisháa niisháa iniaktusarmiayi. Nuna túruiniak chíkich chíkich nuñkanmaya aentsun nupetkarmiayi, nujsha péñker akupkarmiayi, tura Yussha ni timia núnisan yainkiarmiayi. Uunt yawañcha kajechu awajsarmiayi,

³⁴ uunt jiniasha ikiajniakarmiayi, puniajaj mantamnatniuncha uwemprarmiayi. Kakarmachusha kakaram ajasar mesetnumsha ni nemasrñcha nupetkarmiayi.

³⁵ Nuwásha ni uchirjñ jakan iniantkimiun wáinkarmiayi.

Chikichcha wáitias mantamnowarmiayi. Ti shiir pujustinnium nantaktiai tusar nú tsawantaj uwempratniun nakitrarmiayi.

³⁶ Chikichcha katseknakarmiayi, asutniáwarmiayi, jirujaj jñkiawar sepunam enkenawarmiayi.

³⁷ Kayajaj tukú mantamnowarmiayi, jimiapetek tsupinkarmiayi, Yúsan iniaisarat tusa nekapnasarmiayi, puniajaj mantamnowarmiayi. Aya wékainarmiayi, kuítrinchá ásar nupen entsararmiayi, shuar nincha áintrar wáitnenmai awajarmiayi.

³⁸ Atsamunmasha, naincha, wañmasha, ashí nuñkanam wekain ármiai. Nu shuarjññkia ju nuñkanmaya shuar imiá yajauch ásar niñjaj pujumainchu áiniawai.

³⁹ Nu shuar Yúsan shiir enentáimtuiniakui Yus “péñkeraitrume” tiarmiayi. Túmaitiat ni tsañkatkamun wáinkiacharmiayi.

⁴⁰ Yuska nuna nan̄kaamas péñkeran iwiarturaru asa tura in yamá pujajnia juna enentáimturma asa niisha iisha mai metek tsaniñkiar ti pen̄ker ajasarti tu enentáimsamiayi.

12

Jesus tuke enentáimtusar tsékentiai

¹ Ashí j̄y nuñkanam túrajnia nuka shuar nakuruiniak tsékena nujaj nakumkamniati. Ashí shuar yaunchu Yúsan shiir enentáimtusaruka téntakar írmainiayi. Tuma asamtai ashí kijin ana nusha tura ashí tunaaka itit awajtamaj nusha ajapa iniaisar tura katsuntrar tsékénkir jeatai.

² Túmakur Jesus tuke enentáimtusar tsékentiai. Ashí shuarjaj nan̄kaamas Jesus Yúsan ti nekas enentáimtak aya péñkernak túramiayi. Tuke nekas awakmakmiayi. Imiá tunáa shuáran krusnum máatin āñ núnisañ natsanmainium jákatniun surimiakchamiayi. Antsu ukunam ti shiir warastin átatna nuna enentáimtak nuna ashí katsuntramiayi tura nuyá Yusa untsuurinj̄ akupin pujutainium pujusuiti.

³ Tunáa shuar Jesusan wáitkiasarmia nu enentáimpratarum. Túrarum pimpitsuk katsuntratarum.

⁴ Átum tunaajaj máaniakrum Jesus túramia áintsarum numpemsha puárchaitrume tura jákachuitrume. Nuisha katsuntrarum jeatniuitrume.

⁵⁻⁶ Yus nekas ni uchir̄in chicharkatniua áinis túramprum nu kajinmatkichmashuram. Júnis tawai:

“Uchirú, wí jintinramajmena nu kajinmatkip. Asutiámkuisha kúntuts pujusaip. Kame Uuntka Nii aneana nuna jintintiawai. Tura ni uchir̄j̄ ajasat tusa achána nuna asutiawai.”

⁷ Tuma asamtai Yus ni uchir̄ja áinis asutiámkuisha katsuntratarum. Warí, ashí apa ni uchir̄in chicharkashtatuak.

⁸ Tura ashí uchin chicharkatniua núnis Yus atumin chichartamchakrumniñkia nekas ni uchir̄inchuitrume. Antsu chikichnaitrume.

⁹ Nu arantcha ii apar̄j̄ uchich árin̄in chichartamkurin umirniuyaji. Nu arant nuikia nekas ii Apar̄j̄ nayaimpiniam pujana nu shiir umirkar tuke shiir pujustin wakerishtatjik.

¹⁰ Íi apar̄j̄ ishichik ni enentáij̄ij̄ wakeramu chichartamniuyaji. Antsu Yuska ti pen̄ker awajtamsataj tusa nekas atsumajnia nujaj métek chichartamji.

¹¹ Kame nekasaiti, ashí asutiámu yamaikikia waraschamniati, antsu kúntuts enentáimtikramji. Túrasha ukunam nu asutiámujaj unuimij̄ nuka péñker túratniun tura shiir pujustinian yáinmaji.

Anearta. Yus tana nu nekas antuktiniati.

¹² Nujaj pimpirarusha tura kakarmachu ainia nusha ikiakártarum.

¹³ Túrarum péñker esettsa enentáimsarum wekasatarum. Túrarum tujintiainia nusha shiir wekasatin yañtarum.

¹⁴ Ashí péñker túrakrum ashí shuarjaj nawamnaikiarum péñker wekasatarum. Tunaan túrinkia Yusaj̄ pen̄ké jeashtatui.

¹⁵ Aneartarum. Shuar nakitiakuñkia Yus nu shuáran shiir yáingtinian tujinkiattawai. Nu shuar yajauch enentáimik chikich shuárnasha itit awajas tunaanum útsukartatui.

¹⁶ Tsanirmawairap.

Yusna nusha nakitirairap. Isaka uchir̄j̄ Esau péñkera nuna nakitramiayi. Yus “iwiáj̄rin núkap súsatniuiti” timia nuna enentáimtuschamiayi. Tura asa aya ishichik yurumkajaj̄ yapajj̄ámiai.

¹⁷ Tura nuyá ni apar̄j̄ ukunam túrunattana nuna takui Esau ti pen̄keran wakerimiayi. Tura ti útkuisha ni apar̄j̄ nin nakitramiayi tura ni chichasman yapajj̄átniun tujinkiamiayi.

¹⁸ Átumjaj̄ñkia Yusna enentáimtusminia nuka yaunchu Israer-shuarjaj̄ ashammain amia núnischaiti. Yáunchuka Yus ni akupkamur̄in Israer-shuuran súakui Senai muranam jeeármiai. Muranam uunt jisha kiritniusha teesha naseha ajamiayi.

¹⁹ Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiayi.

²⁰ Kame Yus chichaak “Shuarsha tan̄kusha ishichkisha nú muranam najarmatai nuka kayajaj̄ tukurar tura nan̄kij̄j̄aish̄a máatniuiti” tímiayi. Nu akupkamu ti ashammai asamtai “chichaschati” tiarmiayi.

²¹ Wáinkiarumia nu ti tsumai asamtai imia Muisaissha “Ashamakun kuraj̄aj̄” tímiayi.

²² Antsu átumjaj̄ñkia Yusna enentáimtustin nujaj̄ nan̄kaamas péñkeraiti. Átumka nayaimpinmayá Seun̄ náinnium, Jerusarén̄ iwiaaku Yus pujutai péprun nakumeana nu jeeáitrume. Nuisha ti untsur̄j̄ nayaimpinmayá suntarsha

²³ ashí Yus-shuarsha shiir iruntrarú áiniawai. Yus-shuarka ashí nayaimpiniam ni naari anujuktma ásar ni uchiri áiniawai. Nujsa Yus, ashí shuaran ti nékana nu, pujawai. Niisha shuáran ti penker awajsamtaí nu shuar jákar ni wakaní nuí shiir pujuiniawai.

²⁴ Nujsa Yamaram Chichaman in takartamajnia nu, Jesus, pujawai. Nuna numpe ukatramujai ashí shiir awajsaiti. Nu numpasha Apira numpējai nankaamas péñkeraiti. Kame Apir ántar máamu asamtaí yapajmiatrukta titinia áintsan enentáimtaji. Antsu Jesus tunáa shuáran péñker awajsartaj tusa jakamiayi.

²⁵ Nuka ti penker asamtaí Yus chichartamprumna nu nekas anturkatniuitrume. Yaunchu Yus jú nunkanam murá chichaamun anturkachar asutniátniunam uwempracharmiayi. Nuikia Yus nayaimpinmaya chichartamkurin ántachkurkia ishichkisha uwemprashtaji.

²⁶ Yaunchu Yus chichamejai nunkan úrmamtikarmiayi. Tura yamaisha tawai “Ataksha aya núñkankechu antsu nayaimpinmasha úrmamtikiaitajai.”

²⁷ “Ataksha” tana nujai “ashí muchitrámnia nu amuukartatui” tawai. Tura muchitrachminia nu juakartatui.

²⁸ Yus in akupkatniun tsankatramaj nuka umuchnakhattawai. Tuma asamtaí Yus yumínsatniuitji. Yus wakerana núnisrik wishiksuk shiir enentáimtusar Yus shiir awajsatniuitji.

²⁹ Maa, ii Yúsriñkia kajerkan̄ka uunt jáa nuke áesaa mash emesramniaiti.

13

Yus shiir enentáimtiksatín

¹ Nuamtak yachia núnisrum tuke mai anenai ajatarum.

² Tuke írar shiir itiaatarum. Nuna túruiniak shuar nékachminiak nayaimpinmaya suntuaran itiaawaruiti.

³ Sepunam pujuinia nusha atumsha niijjai pujáa núnisrumek waitnentrarta. Wáitkiasarma nusha wisha núnisnak wáitsamniapitjia tusarum waitnentratarum.

⁴ Nuatnaikiatín péñkeraiti. Shuar ni nuwejai tsaniñ pujustin péñkeraiti. Tura nuatkamu ainia nusha chikichan eakchatniuiti. Tsanirmana núnaka Yus asutiáttawai.

⁵ Aya kuftiak enentáimtusam pujusaip. Yuska “Kanakchattajai tura penké ikiukchattajme” túramui. Tuma asamtaí ame takakmena nujai shiir enentáimsam “maakete” titiá.

⁶ Tiniu asamtaí arantutsuk jú tíminiatiji: “Winia yainnia nuka Uunt Yúsaiti. Nu asamtaí shuar túrutamnia nuna ashamkashtajai.”

⁷ Atumin Yus-Chichaman jintinramawarmia nu enentáimtustarum. Yúsan shiir enentáimtuiniak péñker wekasarmia núnisrumek atumsha túratatum.

⁸ Jesukrístuka tuke yapajtsuk nuikiya núnisan yamaisha tura ukunmasha tuke núnisan átatui.

⁹ Chíkich chicham niisháa írurna nu anturkairap. Yus in anenma asakrin kakaram ajasartai. Shuar niisháa yurumkajai enentáiruí kakaram ajastaj táyat penké yáinchaíti. Yurumeaj nújainchu antsu Yusa aneñkrattairjijai ii enentáin kakaram ajasminiaitji.

¹⁰ Yáunchu Yúsnan pujurin namañ maar Yus susamunmagan yuu ármiayi. Tura iikia Yus-sutaj nusháa ana nu súaji. Nusha Kristu jakamu asamtaí yaunchua nu Yúsnan pujurin nuí pachiinkiachmin áiniawai.

¹¹ Israer-shuarnumia Yúsnan pujurniu uuntri tunaan asakártaj tusa namañké numpen júkiar Imaí Shíir Tesaamunam wain ármiayi. Tura nu namañ arant áesatniuyayi.

¹² Núnisan Jesússha péprunam arant wáitkianas mantamnamiayi. Nujaí ashí shuara tunaarin ni numpejai niijatkaiti.

¹³ Núnisrik iisha péprunmaya arant wétinia núnisrik Jesusai weri Niijjai métek wishikmain katsuntutai.

¹⁴ Kame jú nunkanam amuukachmin pepru atsawai. Antsu ukunam ti shiir pepru áatna nu nákaji.

¹⁵ Tuma asar namañ maar Yus sútsuk antsu shiir chicham súakur tuke Yus shiir yúmiñkijai. Tuke núnisar túratatai.

¹⁶ Péñker túrakrum takakrum nu ajamnaisatin kajinmatnaikiirap. Nusha ti shiir Yus sútainti.

¹⁷ Yus-shuaran akupin ainia nu umirkarum shiir enentáimtikratarum. Ni takatrin Yúsan ujaktin ásar atumí wakanin shiir wainiainiawai. Niisha itiruchatcha antsu wakerumainian túrawarat tusarum shiir yáinatarum. Nu túrachkumka çitiurak yainmakarat?

¹⁸ Incha Yus áujsatatum. Iisha ashí péñker túratin wakeraji. Túrajai enentáimji.

¹⁹ Tura Yus áujkuram Yus ataksha atumjai wainniaikiatniun wari tsankatrukut tusarum seatriitarum.

Amúak shiir chichaawai

²⁰⁻²¹ Imiatkinchanum apujkartinia nú Yus, Jesukrístun jakamunmaya iniantkimia nuka, ni numpé kakarmarjijai ashí péñker ana nuna suramsarti. Nujai ni wakeramu túrattarme. Tura Jesukrístu kakarmarjijai ashí ni wakeramun in pujurtamas takasti. Ii Uuntrí Jesukrístu ashí Yus-shuaran ti penker Wáinniuiti. Tura ni numpejai Yamaram Chichaman kakaram awajsamiayi. Nu Chichamsha tuke menkakashtatui. Aya Kristu tuke shiir awajnasti. Núnisan atí.

²² Yatsurú, kakaram chicharkajrumna ju shiir enentáimjai anturkatarum. Kame ti wárik áatrajrume.

²³ Yamaikia ii yachi Timiutéu sepunmaya jiinki ankant ajasai. Nuna ujaajrume. Wárik támataingia atumin lítiaj tusan winiakun niijjai winittiajai.

²⁴ Atumí úuntrísha tura ashí Yus-shuarsha amikmaatarum. Itiaria nunkanmaya shuarsha amikmatmainiawai.

²⁵ Ashí Yus ti shiir yainmakarti. Nuke atí.

SÁNTIAK papin árar akuptukma

Sántiak aarmiania nu

¹ Wi Sántiak Uunt Yúsán tura núnisan̄ ii Uuntr̄i Jesukrístun umirin asan̄ ju papin aajai. Ashí Yus-shuartermin ashí nun̄kanam tsakin̄makarum matsatrumna nuna amikmaajrume.

Nekataĩkia Yúsnumiḡiti

² Yatsuru, ashí itiuurchat wáinkiuurmesha tuke warastarum.

³ Iis, itiuurchatnum pujakrum nekas Yus enentáim̄taikiurmeka katsuntrat̄in unuimiarta-trume.

⁴ Tura tuke páchiachkuram, tuke katsunteakrum, nuikia Yús̄jai ti pen̄ker katsuár̄tatrume. Pen̄ké atumashtatrume.

⁵ Átum náj̄kamsarmek nekaatin̄ tujintiakrumka Yusa nekatair̄i seata. Shuar seakuj̄ Yuska kajetsuk tura ementutsuk antsu patatas súawai. Tuma asamtai seakminkia suram-sattawai.

⁶ Túrasha Yus nekas enentáim̄tusam, “túratpiash” tútsuk seata. “Cha, nékats̄jai surustimpiash” tu seakmeka ánt̄ram seame. Nayaantsa tsukatur̄i jun̄i taa, atúu waketki ajatsuk. Amesha áintsamek túmame.

⁷ Enentáim̄jin̄ núnisketkuĩḡkia, seamna nuna Yus pen̄ké suramsashtatui.

⁸ Shuar jimiará enentáim̄na nuka shiir wekasatniun̄ tujintiawai.

⁹ Yus-shuar, ju nun̄kanam kuĩtrinch̄a ainia nu, Yus shiir awajsamu nuj̄ai warasti.

¹⁰⁻¹¹ Tura Yus-shuar kuĩtrinniuitkuisha péejchach enentáim̄tikramsha warasti. Iis, nupa kuápkam tura nantu ti sukam kaar miniatsuk. Kuĩtrinniuka ántska ánt̄ram seame. Nayaantsa tsukatur̄i jun̄i taa, atúu waketki ajatsuk. Amesha áintsamek tá̄nkete. Tuke súr̄tnak pujurkusha itiuurchat wáiniuk wárik amuukattawai.

Ii itiuurchat̄ri ana nu

¹² Shírait̄i shuar ni itiuurchat̄rin̄ nekas katsunteana nuka. Nekapsam̄ jíinkiuŋka akinkiatniun̄ wáinkiat̄tawai. Iwiaaku átinian, tawasap achikt̄inia núnisan, wáinkiat̄tawai Yus ni aneam tsan̄katka nuna.

¹³ Shuar tunáa túramnia nekapeakka “Yus nuna útsutrutui” tu enentáim̄prash̄tiniait̄i. Yuska yajauch túramnia enentáim̄tsui túrasha Niisha pen̄ké chikichkinkesha tunaanum útsuchuit̄i.

¹⁴ Antsu ni wakeramur̄ij̄j̄aīn̄ aents tunaan̄ nin̄ki ikiatmamkaīti yajauch túratniun. Núj̄aīn̄kia tunaanum útsukmait̄i.

¹⁵ Nu yajauch wakeramunm̄aya tunáa akiiniui. Tura nu tunáa mash amuukam̄tai jákatin akiiniui.

¹⁶ Yatsuru, aneakun tájarme, anan̄mamawairap.

¹⁷ Ashí pen̄ker ana nu, ashí shiir ana nusha nayaimpinm̄aya Yusak amasūiti. Yus ashí tsáap̄ninia nuna najanāit̄i. Tura Niin̄ kiritin̄ atsain̄ yapaj̄tsuk tuke tsáap̄nīiti.

¹⁸ Nii wakera asa ni nekas chichamea nuj̄aī ni uchir̄i najatmam̄ji. Tura ashí ukunam át̄atna nuj̄aī ii ém̄kait̄ji.

Yus nekas shiir awajsatin

¹⁹ Tuma asamtai aneamu yatsuru, wárik chichastin̄ enentáim̄prairap antsu antuktin̄ emka enentáim̄prata. Núnisan̄ wárik kajekaip.

²⁰ Kajena nuka Yus pen̄ker wakeramun̄ túratsui.

²¹ Nu asamtai, ashí pen̄kercha nu tura ashí yajauch írunna nusha iniaisata. Tura tuke enentáij̄j̄aī Yus-Chicham ame enentáim̄in̄ araamu anturkata. Tura nu Chicham kakarmait̄i uwem̄tikrampr̄atniun.

²² Yus-Chicham umikta. Aya ántukaip. Aya ántakmeka amek anan̄mamattame.

²³⁻²⁴ Shuar íspikia ímiak̄ ni yapin̄ wapik̄ian wáiniak̄ tura nuyá jáupmitsuk we, ni urukuit nuna wárik kajinmatk̄ishtimpiash. Shuar Yus-Chicham umitsuk aya ántana nuka nuj̄aī méteket̄e.

²⁵ Yus tana nuj̄aī an̄kant̄ ajasminiait̄i. Shuar íspikia íimia áintsan̄ nekas Yus pen̄ker táman̄ tuke iniāitsuk enentáim̄tus, nu shuar kajinmattsuk aya antukchattawai antsu tuke umiktatui. Tura ti shiir waras pujustatui.

²⁶ “Nekas Yúsán shiir umir̄jaī” tana nu tura eseer chichaachkuŋka imia nin̄ki anan̄mamui tura “Yúsán shiir umir̄jaī” tana nuna ántar tawai.

²⁷ Nekas Yus Apa awajitsuk shiir umir̄kat̄in̄ j̄úiti: mitiaikiasha wajesha itiuurchatnum pujuiniakuisha yáin̄tiniait̄i tura ju nun̄kanam ashí tunáa ana núj̄aīsha máat̄r̄ash̄tiniait̄i.

2

Shuar antra akantrashtin

¹ Yatsuru, ii Uuntrj Jesukrístu ti shiir nankaamantua nu enentaimtairmeka shuar akantratin enentáimsairap. Shuara enentá*í* enentáimtsuk antsu aya pátatke wáinmena nujá*í* aents akantram niisháa enentáimturairap.

² Iis, iruntrumna nu*í* shuar kuítrintin kurí aniyu aweera tura pé*ñ*ker iwiarmampra wayashimpiash. Tura nú*n*isa*ñ* chikich kuítríncha aruta entsaru wayashimpiash.

³ Tura kuítrinnia nu “Pé*ñ*kerá jui pujusta” tichatameash. Tura kuítrínchaka “Atu wajauta, túrachkumsha ju*í* nu*n*ka*n*sha pujusta” tichatameash.

⁴ Nu tákumka yajauch enentáimpram jimiará enentáij*í* aents enentáimtame.

⁵ Aneamu yatsuru, antuktarum. Ju nu*n*kanam kuítríncha ainia nuna Yus achikiuiti Ní shuar ajasar Nin nekas enentaimtin ajasartinian. Tura ashí nayaimpiniam írúnna nunasha Yus nin tsan*ñ*katkattawai. Ashí shuar Yús*an* aneena nuna anajmatra asa nin tsan*ñ*katkattawai.

⁶ Átum antsu kuítríncha natsant awajearme. Iista, kuítrinnia nuka timiá itirchat awajtamainiatsuk. ¿Nui*ñ*ka níchuk ainia achirmak kapitiánnium japiki júramprumna nu?

⁷ ¿Ní*ñ*chukich ainia Kristu naarj shiira nuna ántar pachikiar pé*ñ*ké yajauch áujmatainia nu? Tura átumka nuna naarj tuke shiir awajkurmin, ashí shuar “Kristu shuari” túramainiawai.

⁸ Yus-Chichamnum ju*í* akupeamu nekas pé*ñ*keraiti:

“Ame ayashim aneamna nú*n*ismek ame írútramuram aneeta.”

Nu nekas umirniuitkiurmeka maak.

⁹ Nú enentáij*í* kuítrinniu*í* chichasminiaiti. Tura nuyá kuítrínchaj*í* shiir chichaachkumka, niisháa enentáimta asam, nu akupkamu umirkachuitme. Tunáa túrame. Nú*n*ismek Yusa akupeamurij*í* amek sumamame.

¹⁰ Chikich akupkamu írúnna nu ashí umikiam tura aya chikichik akupkamu umikchamka nuikia ashí akupkamu umircha ajasume.

¹¹ Iis, Ní*ñ*ki Yúsak chichaak tichamka “tsanirmawaip.” Tura chikichnasha “man*ñ*kartuawaip” timiayi. Nu asamtai, shuar tsanirmatsuk túrasha man*ñ*kartakka ni wakeramun umirtsui.

¹² Kristu an*ñ*kant awajtamasmantai ii yamá ni akupeamurj yú*í*chuch umirkamniaitji. Nu asamtai nu akupkamuj*í* métek wekakurni*ñ*ka Yus “pé*ñ*ker túraitme” turamat*í*ji. Tura umikchakri*ñ*ka “pé*ñ*ker umikchaitme” turamat*í*ji. Tura nu enentáimsar pé*ñ*ker chichasar takasar wekasatniuitji.

¹³ Chikichan waitnentachku*ñ*ka waitnennatsuk asutniáttawai. Tura waitnen*ñ*kratniuitkiurni*ñ*ka tsawant jeamtai Yus in waitnentramprattaji.

Yus enentáimtustin tura umirkatniusha

¹⁴ Yatsuru, shuar “Yusa shiir enentáimtajai” táyat tura pé*ñ*ker túrachku*ñ*ka pé*ñ*kerashit. Nujá*í* uwemprattawak.

¹⁵ Wátskea, Yus-shuar, áishmansha nuwasha, entsátáir*ñ* tura yurum*ñ* atumashtimpiash.

¹⁶ Tura ame nékayatmek ayash*í* atumana nu sútsuk tichatapash “Pé*ñ*ker wetá, entsatai entsaram túram pé*ñ*ker yurumáta.” ¿Nu sútsuk tákum pé*ñ*kerkai*í*?

¹⁷ Nú*n*isa*ñ* takatsuk Yus enentáimtustin ántrait*í*.

¹⁸ Tura shuar tichanpiash, “Chikich takaawai tura chikichcha Yús*an* shiir enentáimtaiwai. Maí pé*ñ*kerchakait” tichanpiash. Wats, ame Yus enentáimtamun takatsuk paant inaktusmiashitiam. Tura w*í* antsu pé*ñ*ker takatruj*í* Yus enentáimtamun paant inaktustatj*í*.

¹⁹ Nekas Yus chikichkiiti nu enentáimtame. Nuka pé*ñ*ker túrame. Túrasha iwianchcha nunasha nékainiawai. Tura umircha ásar ashainiawai.

²⁰ Netse enentáimpraip. Ashí Yus wakera nu takaachkumka, Yus enentáimtustin ántrait*í*. ¿Nu nekaatin wakeramek*í*? Iista.

²¹ Apráaman Yus chicharuk “Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Pé*ñ*keraitme” timiayi Apráaman.

²² Páantchakait. Apráam Yusa shiir enentáimtak umirkamiayi. Umirtsuk Yús*an* enentáimtakka nuikia ántar enentáimtiay*í*. Tura umirak Yus enentáimtamun umikmiayi.

²³ Nujá*í* Yus-Chicham aarma nu uminkiamiayi. Juiti:

Apráam Yús*an* shiir enentáimtusmiayi tura Yus chicharuk timiayi “Máakete. Núj*í*nkia tuke pé*ñ*ker túraitme Wijá*í*” timiayi. Apráamsha nekas “Yusa Amikr*í*” tu náamkamiayi.

²⁴ Páantchakait. Shuar aya Yús*an* shiir enentáimtamujá*ñ*chuk tura pé*ñ*ker takasmajáisha Yus nin shiir enentáimtaiwai.

²⁵ Núnisan Raap tsanirmataiyayi. Túmaitiat Israeran suntarín mamikmauta tusar akup-kupamun ni jeen itiaawar tura úukar chíkich jintianam akupak uwentikrarmiayi. Nuna túramtai Yus “pénkeraitme” tímiayi nincha.

²⁶ Ayash wakantichuka jákachukait. Núnisan Yus enentáimtustin tura ni wakeramu takaachkurkia, jaka áintsan ánráitji.

3

Ii iniaí

¹ Atum untsurí jintínkiartin ajastin wakerukairap. Yus in, jintínkiartin ájinia núnaka, nankaamas neka asar, awajiakrin nankaamas Yus asutiámattaji.

² Iis, ashí mash ti awajiatsjik. Tura shuar chichaak, aya pénkernak chichaakka, nu shuar tuke eeser enentáimniuiti. Tura ayashúsha tuke pénker ana nuna túriniaiti.

³ Kawaisha enentáimpratai. Jiru wenuchiniam ikiursam ni ayashí ashí ayantaatsuk.

⁴ Kanusha ti úuntaitiat tura kakaram wéayat ishitiapach wiantaijiaí shuar wakera nuí ayantarminiati.

⁵ Núniskete ii iniaí. Timiá ishitiapchitiat awakmaktinia tímianu chichaatsuk. Ji ishichik kapaajai ashí numi tsaruaku ekeemakchamniakait.

⁶ Ii iniaísha jijaí métekete. Ashí tunáa piákuiti. Tura ii ayashúin tunáa túratniun útsutmaji. Túnkuruanmaya jijaí ikiapármaiti tura ashí ii wekajnia nuí émesewai.

⁷ Shuar ashí yajasmañ nawamkamin áiniawai. Ashí kajen írrunna nunasha, nanamtincha, napincha, tura entsayanča ashí nawamkaruiti.

⁸ Tura iniaikia penké nawamkachminiati. Ti yajauch asa penké nupetkachminiati. Iniaikia ti taráa tseasaiti.

⁹ Nu iniaijiaí Yus Apa shiir awajeaji tura nu iniaijiaín aentsti yajauch chichárnaiyaji. Áentsun Yus Niiijai métek-taku najanamaitiatar yajauch chicharnaiyaji.

¹⁰ Nu iniaijiaín pénkersha tura yajauchisha chichaaji. Yatsuru, nuka penké atsutniuiti.

¹¹ ¿Púkununmaya entsa sáawijiaí kusuku júnkimniakait?

¹² Yatsuru, ¿Kushinikiap shuinian nereawak. Munchisha kushinikiapen nerektatuak? Núnisan púkununmaya entsa sáawijiaí kusuku júnkichminiati. Ii iniaijiaí núnisan aya pénkera nu chichastiniati.

Yusa nekatairi

¹³ Shuar ti neka enentái takakna nu, pénker túrattawai. Nekas nékaitkiunka péechachia núnis tuke pénker ana nuna túrattawai.

¹⁴ Atum atumí enentáijiaí penké yajauch enentáimtunairum tura atumek pénker pu-justin enentáimtumarum, nékaitiatam pénker túrachiatam “pénkeraitjai” tiip. Nuka wáitrame. Nekaska núchaiti.

¹⁵ Nú enentaikia Yúsaiyanchuiti. Atsu ju nunkanmayaiti, shuara enentáiyaiti, núnisan iwianchnumiáiti nú enentaikia.

¹⁶ Shuarsha yajauch enentáimtunairar tura niñki enentáimtumainiakui, nujai ashí meseawai tura ashí yajauch ti awai.

¹⁷ Atsu Yusaiya enentái takakua nu júnisaiti: ashí nankaamas emka eeseratin, nuyá nawamkartin, shiir ajá, pénker anturnain, waitnenkratin, ashí pénker takáa tura anañtsuk naka chichamtin.

¹⁸ Eseera enentáimsatniusha shiir takawai ashí shuar pénker ana nuna túrawarti tusa.

4

Ju nunkanam írrunna nu aneashtin

¹ ¿Urukamtatsuk tuke kajernaikiarum ti máanaistrum pujarum. Mesetnumsha urukamtai wéarum? Júnisaiti: Atumin yajauch enentái katsuñtrachmin útsutmakrumin tuke máaniarme.

² Wakerarmena nu takustin wakerarme tura nu wakeramu takustin jeachkuram nérentin maarme juruktiaj tusam. Chíkich takakna nujai itit enentáimtuñiarme tura atáitin tujinkiam máanaistrume. Wakerarmena nusha Yus seachu asarum wáintsurme.

³ Tura seakrumsha yajauch searme. Atumí péñkerijiaí warastin enentáimiu asarum searmena nusha wáintsurme.

⁴ Jú nunkanmaya wakerakum Yusa nemasrijiaí tsanirma áintsanketrume. Nékatrumek atumsha. Ju nunkanmayañ wakerakrikia Yusa nemasrintji. Shuar ju nunkanmayañ wakerakka Yusa nemasri ajawai.

⁵ Yus-Chicham juna tawai:

Yus ni Wakaní ii enentáin apujturmasuitji. Nu Wakan in anenma asa ti akasmatramaji, táwai.

Tura nuna çántrankeash ta?

⁶ Tura anenma asa ti yáinmaji. Tuma asamtai Yus-Chicham tawai:

Kajemtinian Yus ístatui tura péechachin Yus nin aneak ti shiir yáintatui, tawai.

⁷ Yusaj ikiumastarum, tura íwianch taritratarum. Túrakrumin íwianch ikiurmaktiatui.

⁸ Yúsáini weamkata tura Nii atumin wearmaktatrum. Tunáa shuartiram Kristu numpejai nijiamartarum. Tura átum, Yusha tura ju nuñkanmayasha mai métek wakerarmena nu, atumí enentái naka eseeratarum.

⁹ Atumí tunaari enentáimsarum kúntuts enentáimpratarum. Nu kúntutsjai ti úuttiarum. Nuik shiir enentáimprarum wishikmiarumna nuka iniaisarum kúntuts enentáimprarum úuttiarum.

¹⁰ Yusjai péechach ajasta, túrakmin shiir awajtamsattawai.

“Yajauchiitme” tunaichatin

¹¹ Yatsuru, yajauch áujmatnaisairap. Yus-shuar ni yachin yajauch áujmatas tura yachi tunaari tuke áujmatuk Yus “aneniatarum” tana nuna umichuítí. Antsu umichu asa “nu akupkamu ántrai, umirkashiniái” tawai nu shuar. Nujai nu shuar umirtsuk Yus akupkamu nankaamas enentáimtumawai.

¹² Yus Niñki akupkamu najana asa Niñki nu akupkamu umirkamun nekas nekaamniái tunaashit tusa. Niñkiti uwentikratniun tura emesratniunam akupkatin jea nu. Amesha yáitiam chikicha tunaari ístincha.

Kashin átatna nuna Yusak nékawai

¹³ Watsek, átum áujmateakrum “Arumsha kashincha nu péprunam weri nuí chikichik uwi takasar kuit achiktatji” tíchattarpash.

¹⁴ Ishichkisha penké nékatsrume kashin átatna nu. Ju nuñkanam ii iwiaakmarí wárik amúatsuk. Yuraním utsanar tura nantu sukuam mash wárik menkaatsuk. Núnisketji.

¹⁵ Antsu júnis tíminiaitrum: “Yus wakerakuñkia iwiaaku pujakriki nusha túrattaji” titiarum.

¹⁶ Túrachkurmeka átumka Yusjai nankaamantu enentáimprume. Tura ashí nu enentáikia yajauchiiti.

¹⁷ Shuar péñker túratniun nékayat, túrachkuñkia, nuka tunaiti.

5

Kuítrintin enentáimpratniua nu

¹ Kuítrinniutiram ju antuktarum. Ti úuttiarum. Ti wáitsatin asarum ti kakantra úuttiarum.

² Kuítrum mash mamukarai tura iwíarmampramurmesha mash tiñkishap yúkayi.

³ Kurirmesha tura kuítrumsha ashí ijiakmamkarai. Ijiakmampramurísha ame péñkercha túram nuna paant iniakmawai. Tura jiniun áesamua áintsan ame kuítrum yajauch awajtam-sattawai ayashmjin. Amuukatin tsawant jeamunam anearchamame antsu ame kuítrum ikiaunkamame.

⁴ Ame takat iniararam ementushim akirarmamna nu “akirkati” turamainiawai. An-earta. Yakiyá Yus, nayaimpinmaya suntara uuntri, nu takartamni chichamen antukai.

⁵ Ashí ju nuñkanam írúnna nu wararsaruítrome. Tuma asarum kapunka nuke macharame tura yamaikia máatin tsawant jeayi.

⁶ “Nu shuar tunaiti” tírum tunaachu tsanumprurum máamarme, tura niñkia surimi-akcharmai.

Yawetsuk takastin tura Yus ájsatin

⁷ Nu asamtai, yatsuru, nu páchitsuk ii Uuntri Kristu tatin nákastarum. Arakmausha ni arakri péñker tsapaiti tusa yumi yutuktinian shiir enentajjai nákatsuk. Yútasua unirmatai esatrurmatai júuktatjai tusa nákatsuk. Tura júurmaksha ti waraatsuk.

⁸ Núnisañ atumsha katsuntsatarum tura yawekiarap. Kristu tatin yuntumtemayi.

⁹ Yatsuru, nuámtak “ju yajauch túrutui” tunainirap. Tákurminkia Yus írmastatrum. Niñkichukait nuna ístin tura anearta nu Yúsak tíjiuch wajatramui.

¹⁰ Yatsuru, yaunchu Yúsnan etserin enentáimpratarum. Tuke ii Uuntri Yus timia nuna shiir etserkarmiayi. Túmaitat wáitsarmiayi túrasha pachischarmiayi. Núnisrumek enentáimsatarum.

¹¹ Itiurchatan katsuntainia nuka nekas shíiraiti, tu enentáimji. Shuar itiurchatan ti katsuntin ámiayi, ni naari Jup. Tura ni itiurchatri nankaamasmatai Yus ti nukap kuítrin susamiayi. Nu nékatsrumek. Ii Uuntri Yus ti waitneñkratchakait.

¹² Ju ashí nankaamas enentáimtustiniái, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chicham chichaachkumniñkia Yus írmastatui. Nu asamtai nayaimsha nuñkasha ashí írúnna nusha páchitsuk, aya támena nu tuke nekas atí.

¹³ Wáitakmeka Yus ájsata. Waraakmeka, warasam kantamám Yus shiir awajjata.

¹⁴ Yus-shuartiram, shuar jáakka, Yus-shuara úuntrin untsukti. Tura niisha taarti. Tura Jesusa naarj pachikiar asuitijjaj jaa shuaran ishichik kuerarti. Túrawar Yúsan áujtusarti nu shuaran.

¹⁵ Tura “Yus nuna nekas anturtamkattaji” tu enentáimsar áujtsarti. Túrawarmatai jaa shuar péñker ajastatui. Yus nin tsuártatui. Tura tunaan tura asa jáakuñkia Yus nu tunaan tsankurattawai.

¹⁶ Nu asamtai, atumí tunaarj paant etsertunaiktarum. Túrarum Yus áujtunaistarum atumí tunaarj tsankurnarat tusarum. Péñker shuar Yúsan tuke enentáijjaj áujeamuriñkia ti kakarmaiti.

¹⁷ Yaunchu Yus-Chichaman etserin ámiayi, ni naarj Eriás. Niisha ijjaj méteketiat yumi yutukaj tusa Yusa áujtsamtai menaintiu uwí nuyá nankaamas yutukchamiayi.

¹⁸ Ataksha yutukti tu áujtsamtai ataksha yutukmiayi tura araksha ataksha tsapainiarmi-ayi.

¹⁹ Yatsuru, shuar eseera wekatinmayá kanaakuñkia chíkich nin waketkitniun yainti.

²⁰ Shuar tunáa shuaran yajauch wekaan awakeakka jákatniunmayá uwentikrattawai tura ti untsurj tunaarj tsankurnartatui.

PÍTIUR Emka papin aar akupkamu

Pítiur Yus-shuaran áatramiania nu

¹ Wisha ju papin aajna nu Pítruitjai. Wisha Jesukrístu akatramurintjai. Israer-shuar Yus-shuar árum nuna atumin ankant ankant tsakinmakarum chikich chikich nunkanam matsatrumna nuna áatjarme. Puntu nunkanmasha, Karasea nunkanmasha, Kapatúsea nunkanmasha, Asia nunkanmasha, Pitinia nunkanmasha pujarmena nuna áatjarme.

² Yaunchu Apa Yus, “uwemtikrataj” tímia núnisan achikmaitrume. Tura, Winia ajasat tusa ni Wakanijjai akantamkamiarme. Umirtukat tusa nuna túramiayi. Tura Jesukrístu numpejajsha atumí enentáin atsajkir chamir awajturmasmiarme. Wats, Yus tuke waitnentramar ti shiir awajtamsarat tusan wakerajrume.

Shiir enentáimsar pujustin

³ Wats, Yus, ii Uuntri Jesukrístu Aparj ana nuna naarj shiir awajsatai. Yussha ti waitnentrama asa, atak akiiniatniun suramsaitji. Jesukrístu jakamunmayá nantakin asamtai, iikia atak akiiniar tuke iwiaaku pujustiniaitiajnia nu arutramji.

⁴ Tura nayaimpiniam ikiurtamsamu ana nuna achikmintrum tusa Yus wakerawai. Nu ikiurtamsamu meserchamnia amuukachminiaiiti. Tura nusha yajauchichuiti.

⁵ Yus nekas enentáimta asakrumin ni kakarmarijjai wearmarme. Tura tuke uwemtikrampratniun, nunka amuuamunam paant iniakmstatna nu achikmintrum tusa tuke tsawant ni kakarmarijjai wáitmarme.

⁶ Nu enentáimsarum wararme. Kame ju nunkanam pujakrum itiurchat wáinkiashtarameash. Tura ju nunkanam pujustin ishichkchukait. Ukunam péñker pujustaj tu enentáimsarum wararme.

⁷ Enentáimsatarum. Shuar kurin wakerana núnisan atumniasha umirtukat tusa Yus wakerutmarme. Aents kurin jinium áesainiawai, aya kurik juakat tusar. Kurin ti wakerunia ásar, amuukamnia aijn túruiniawai. Atumsha, itiurchat wáinkiarmenta nujai, Yusan nekas enentáimtusarimpiash tusa nekapsamuitrume. Nu enentáimtamú kurijjai nankaamas péñkeraiti. Ukunam, Jesukrístu támatai, Yuska atumin “péñker túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajsarat” tusa túrutmattarme. Nu tuma asamtai ju nunkanam nekapsamuitrume, itiurchat wáintrumna nujai.

⁸ Jesukrístu wáinchaiatrum anearme. Tura yamá wáinchaiatrumek nekas enentáimtarme. Tuma asarum ti wararme. Nu warastin nayaimpiniam warastatjnia núniskete; nuka paant titin jeatsji.

⁹ Íimiatarum. Uwemtikrurat tusarum Yus umirkachurmek. Nu uwempratniun wainiu asarum waraarme.

Krístujai ii uwempratniun yaunchu etserkarmiayi

¹⁰⁻¹¹ Yus áentsun waitnenta asa, uwemtikrataj tusa tuke wakerimiayi. Núnaka Yúsnan etserin etseriarmiayi. Kristu Wakanj ni enentáin pujuriarmia nu, túruntsain Kristu wáitsatniurjn jintiarmiayi. Tura ukunam ni ti shiir pujustintrincha etseriarmiayi. Túrasa “tuu áishmankait Kristu tutai, tura urutiák túrunat” tusar nu etserin émamkesar anintrusarmiayi.

¹² Tura nii pujuiniainkia túrunashtinian, antsu ti ukunam, ii pujajnia juj túrunatniun Yus nekaamtikiamiayi. Núnaka Yusa shiir chichamen ujatmakarmia nú shuar nekaprutmarme. Nú shuar Yusa Wakanj, nayaimpinmayá akupkamu ana nuna nekatairijjai ujatmakurme. Maa, nu uwempratniun tájana nuna, nayaimpinmayá suntar nekaatai tusar wakeruniawai, túrasa tujintiaiawai.

Péñker wekasatin

¹³ Tuma asamtai, péñker enentáimsarum tura péñker íimiasrum wekasatarum. Tura Jesukrístu ukunam wantiniak waitnentramp Prattana nu yawetsuk nákastarum.

¹⁴ Umin uchi áintsarmek yaunchu nékachu asarum wakerimiarmena nu iniaisarum Yus umirin atarum.

¹⁵ Ashí túramurmijjai timiá penker wekasatarum. Yus, untsurmakuana nu, péñker asamtai, átumka ni shuarj asarum péñker wekasatarum.

¹⁶ “Wí péñker asamtai atumsha péñker wekasatarum” Yus tana nu ni Papirijn áarchamukait.

¹⁷ “Yus winia Aparuítí” tárurna nu aneartarum. Ashí aentsu túrutairín námete Yus nekaattawai. Nu neka asarum, ju nunkanam pujarmena juí Yus ashamkatarum.

¹⁸ Warí, ánta wekasatniun atumí uuntri jintinramena nuyá Yus uwentikram-parme. Túrasha kurisha kuitcha amuukamnia ainia nujai uwentikrachmaitrume.

¹⁹ Antsu Kristu numpé ti shiira nujai uwentikramuitrume. Nu nékarme. Yaunchu, shuar tunáa túrakui, Yus tímiayi, “murik yajauchichu tunamarcha maarum, Yus sútianiam ikiustarum. Nuna numpen wáinkian, atumí tunaarín tsankurattajai” tíniuyayi. Núnisan Kristu in jarutrampa asa ii tunaaríniá uwentikrampraitji.

²⁰ Nunkan nájantsuk áentsun jaruktinian Krístun anaikiamiayi Yus. Tura wárik akup-kachmiayi. Antsu yamáí tsawantin, átum pujarmin, péñker pujusúk tusa wakerak, atumin jarutrampkat tusa Krístun akupkamiayi.

²¹ Nijijai átumka Yus umiirume. Yuska Krístun jakamunmayan iniantki nankaamantu awajsamiayi. Yus nekas enentáimtakrum, aya péñkernak túrawai titiarum tusa túraiti.

²² Yus nekas tana nuna, Yusa Wakanj yainmakui, umirka asarum atumí wakanjin péñker ajasuitrume. Yus-shuarjai yajauch enentáimtunaisuk mai anenai ajatai tusarum tura asarum, nekas shiir enentáimtunaisrum mai anenai ajatarum.

²³ Nekaatarum. Yusa chichame umirka asarum atak akiiniaitrum nuka ju nunkanmayanchuítí. Antsu Yusa chichame iwiaaku tuke amuukachmin ana nú chichamjai tuke iwiaaku átiniaitrum.

²⁴ Ju ayash tuke pujuschamniaiti. Yusa Papiriin junis áarmaiti: Ashí aentsti nupáa áaniuitji. Ii péñkerjsha kukujja áaniuiti. Nupa wárik kaawai. Kukujsha núnisan wárik iniaawai.

²⁵ Tura Yusa chichamesha tuke amuukachminiaiti. Nu Chichamjai uwempramnia asamtai atumin etsernakuiti.

2

¹ Tuma asamtai, ashí yajauch ana nu iniaisatarum. Anañkatin, ántar-chichamtin átin, chikichna wakeruktin, ashí tsanumpratniusha iniaisatarum.

²⁻³ Antsu, Uunt Jesukrístu waitnenkartutairi nekapsa asarum, uchi yama akiinia muntsun ti wakeruinia áintsarmek, Yusa chichame aya penkerkea nu ti wakeruktarum. Yusa chichamejai tuke tsawant tsakakrum tuke uwemprami tusarum túratarum.

Iwiaaku kaya

⁴ Ii Uuntri Kristu kayáa áantsankete. Tura shuar kayan yajauchin nakitiainia núnisan Jesukristun nakitrarmiaiyi. Tura kayan ti penkeran wakeruinia núnisan, Yuska, “winia Uchir ti penkeraiti” tusa Jesukristun achikmiayi. Atumsha Jesukristu weantuktarum. Nii iwiaaku kayaiti.

⁵ Atumsha iwiaaku kaya áantsanketrume. Tuma asarum Yus wijjai ni jeen jeamti tusarum tsankamaktarum. Tura nútiksarmek Jesukristui atumí iwiaakmari tsankamaktarum, Yus wakra nuna túrutati tusarum. Jesukristujai tura asarum Yus shiir enentáimtikrume.

⁶ Jesukristunun Yusa Papiriin junis áarmaiti: “Iistarum. Kayan ti penkeran achikjai” Yus tímiayi. Jeen emka apujtuamuri atí tusan Seunnum apujejai.

Nin enentáimtana nu ántar enentáimtatsui. Aarma ana nu penké kayan chichaatsui. Antsu Jesukristun tawai.

⁷ Yus umirkaitrumna nu, “kaya ti penkeraiti” tarume. Tura Yúsan umirainiatsna nuka Yusa Papiriin tana nujai métek áiniawai. Ju áarmaiti:

Jeen jeamin nakitrarmia nú kaya jeen emka apujtuamuri atí tusa apujamuiti.

⁸ Tura jusha aarma awai:

Tukumak iniaartin kayaiti.

Kame shuar Jesukristunun etserkamun nakitiakka, ¿enentáinium itiu péñker wekasat?

Wats, nú shuar, Krístun umirainiachu ásar, tuke túrunatin asamtai tukumainiawai.

Yusna ajasaru ainia nu

⁹ Tura átumka Yus achikmaitrume. Tura, winian pujurtursarat tusa yajauchinmaya Uunt Yus akantamkaitrume. Yusna asarum péñker enentáimin ajasurme. Tura Yus sumakmaitrume. Niisha winia péñkerun etserturkarat tusa túraiti. Kame kiritniummaya jíinkirum ni tsáapnintrin wekasatniun achirmakurme.

¹⁰ Yaunchu nusháa shuar áuyarme. Tura antsu yamaikia Yus-shuar ajasrum, Niiniu ajasurme. Yus-shuar ajatsrumnin, ¿ya waitnentrampromia? Antsu yamaikia Yus waitnentramuitrume.

“Yúsnaitjai” tu enentáimsatin

¹¹ Yatsurtirmin tájarme, Yusna ajasrum, ju nuŋkanam írar matsatu asarum, atumí ayashí wakerana nu tsan̄katkairap. Ayashim wakerana nu túrakmiŋkia ame enentáim nujai yajauch ajastatui.

¹² Yus-shuarchanum péŋker wekasatarum. Túrakrumiŋkia niisha yamá “Yus-shuar yajauch túruiniawai” ántar tuíniyataŋ, ukunmaŋka, Yusjai iŋkiunaiktin tsawant jeamtai, péŋker wekarena nuna enentáimturmasar, nú shuarsha Yúsan shiir awajsartatui.

¹³ Kristu atumí Uuntri asamtai, ju nuŋkanam akupin áiniana nusha umirkatniutrum. Uunt akupin ashí akupin asamtai umirkatarum.

¹⁴ Tura ni akupeamuri ainia nusha tunaan túruinia núna asutiáti tura péŋkeran túruinia núna shiir awajsi tusa uunt akupin akupkamu ásaratai umirkatarum.

¹⁵ Nekas péŋker wekaamurmijai enentáimcha ainia nu netse chichaamuri itiatmamtikatarum tusa Yus wakerawai.

¹⁶ Tunaanumiá an̄kant ajasu asarum péŋker wekasatarum. Túrasha wi an̄kant ajaschajak tusarum nánksarum yajauch túrawairap. Antsu Yusna asarum, ni wakerana nuna umirkatai tusarum anearum wekasatarum.

¹⁷ Chikichcha shiir enentáimturstarum. Yus-shuar ainia nusha aneetarum. Yus péŋker asamtai ashankatarum. Uunt akupin shiir awajsataram.

Yus-shuarti katsuntratin

¹⁸ Takarniutirmesha ame úntrum péŋker shiir enentáimturmakuiasha tura yajauchitkuisha umirkatarum.

¹⁹ Nekaatarum. Ántar wáitkiarmainia nuí, “Yus iirui” tu enentáimsa katsunteakrumka, ti penkeraiti.

²⁰ Yajauch túrawakmin asutiámamtai katsunteakmekka nuísha wariŋ ati. Antsu péŋker túrawakmin asutiámamtai katsunteakmekka juka ti penker túrame Yusai.

²¹ Núnisaŋ túrunatin achikmaitrum. Kristu waitrutmasmiarme nuí, Wi túraj núnisaŋ túrawarmi tusar wáitsamiayi.

²² Kristuka tunaan penké túrachmiayi. Tura chikichkinkesha penké anan̄kachmiayi.

²³ Kátsekeamsha Niŋkia katsekachmiayi. Wáitkiamsha “yapajmiaktaj” tíchamiayi. Antsu “winia Apar Yus iisti’ túmiayi, Yus péŋker túrin asamtai.

²⁴ Kristu Niŋki ni ayashin ii tunaariŋ entsaki krúsnum jarutramkamiaji. Tunáa enentáimtusairum tusa, antsu Yusai péŋker wekasamniuram tusa jarutramkamiaji. Atumí enentáin tsuártaj tusa Kristu asutniámiai.

²⁵ Murik ni pujutairin waketitniun nékatsna ántsarmek atumsha men̄kaka wekaimiarme. Tura yamaikia atumí wáitmauriŋ waketinrum. Atumí wáitmau Krístuiti, atumí enentáin wáinnia nu.

3

Nuatnaikiaru itiu túratniuit

¹⁻² Tuma asamtai, nuwátiram atumí áishri umirkatarum. Amesha péŋker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámekka chichaatsminin, niisha Yus-shuar ajastinian wakerittiawai.

³ Nu asamtai aya pátatek iwiarmampratniusha ti enentáimtusairap. Intiash ti péŋker iwiaratniusha, kurijai iwiarmampratniusha, pushí ti kuitjai entsartincha ti enentáimtusairap.

⁴ Antsu, “nekas shiirmach ajastaj” tákumka, enentáimin “shiir kajeche átajai” tu enentáimsatarum. Nuka sakarchattawai. Tura nuka Yúsnuka ti penkeraiti.

⁵ Yaunchu núnisaŋ nuwá Yúsan enentáimtusarmia nu, tura Yúsan shiir enentáimtikratniun wakerarmia nu, ni áishrin umirkar nujai ni enentáin shiirmach ajasar pujuarmiayi.

⁶ Atumí weatri Sara ni áishrin Apráman umirmiayi. Umirin asa, “winia uuntru” túniuyayi nin. Atumsha péŋker túrakrumka tura sapijmiatsuk wekaakrumka, Sarajai métek átratume.

⁷ Tura áishman̄tirmesha Yus wakerana nu nekaarum atumí nuwé shiir enentáimtusarum tsan̄tarum. Nuwémsha, nuwá asa, áishman̄jai métek katsuntrachminiaiti. Tura niisha, ámijai métek Yusa waitnenkartutairijai tuke iwiaaku átinian takusminiaiti. Tu enentáimta asam ame núwem shiir enentáimtustá. Yus áujukuram itiuurchat atsuti tusarum túrataram.

Yúsnuk péŋker wekasatin

⁸ Nuyasha ashí Yús-shuairtirmin tájarme, aya chikichik enentaik ati. Waitnennairatarum. Nekas yatsum aneam núnisrumek anenaitiarum. Aya áminiuk enentáimtusuk chikichan yáintaj tu enentáimsatarum.

⁹ Yajauch turamainiakuiasha “yapajkiataj” tíirap. Katsekramainiakuiasha “iikkiataj” tíirap. Antsu “Yus winia shiir awajtusuiti” tu enentáimsarum, yajauch turamainiana nu péŋker awajsataram.

¹⁰⁻¹² Yus-Chichamnum júnis aarma asamtai nu túratarum:

Uunt Yus péñker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiir pujustaj tákuŋka tura tuke tsawant warastinian wakerana nu, péñker ímiasiť, yajauch chichakaj tusa tura wáitruawaj tusa. Tunaanumiá kanaki péñkeran túratí. Tuke enentáijjai shiir átinian eakti.

Tu áarmaiti.

Itiurchat aŋ péñker túratin

¹³ ¿Yaki yajauch túrutmat péñker turamnisha?

¹⁴ Túrasa péñker túrayatmek wáitiakminkia Yus shiir enentáimtikramprattarme. Tuma asamtai ashamkartutsuk, sapijmiatsuk wekasatniuitrume.

¹⁵ Tura “Kristu winia Úntruiti” tu enentáimtustarum. Tura “¿urukamtia Yus-shuar aja-suitiam?” turamainiakuiša, péñker áimkiamnium iwiarnarum pujustarum. Waantu enentáimtumatsuk, nin péñker enentáimtikrataj tusam túrata.

¹⁶ “Yúsaj péñker wekasataj” tu enentáimsarum wekasatarum. Yus-shuar asakrumin chíkich shuar ántar áujmatramainia nu ni ántar áujmatramsamun nekaawar natsárarat tusarum Yusaj péñker wekasatarum.

¹⁷ Yajauch túrakur wáitsatniujajńkia nankaamas, Yus wakerakuńkia péñker túrakur wáitsatniuka ti peñkeraiti.

¹⁸ Kristu ii tunaarń asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan penké túrichuitiat, ii tunáa asakrin wáitrutmasmiaji, Yúnum ejetamtai tusa. Ayashńńkia jakayat ni wakanńńaj ni ayashń ataksha iwiaaku ajasmiaji.

¹⁹ Ni wakanńńaj jakáa wakanń emetamu armia nuna etserkataj tusa wémiyai.

²⁰ Nusha yaunchu Nuai uunt kanun nájanuk siantu painti (120) uwi pujurmia nuj Yuska umirtukarat tusa ti nákamaitiat Nuai étserman umikcharmiyai. Nú kanunmasha ishichik, uchu, aents kanunam pujuinian yumńńaj uwemtikrarmiayi.

²¹ Nu yumi Yus-shuarti imiantinian nakumui. Ii ayashń chamir awajsatai tusar imi-antsuji. Antsu ii enentáj péñker atí tusar Yus sear imianji. Nujaj iisha uwemji. Jesukristu nantakin asamtai, nujaj uwempraitji.

²² Tura Niisha nayaimpiniam we akupin pujutajńium Yusa untsuurńńi apujsamuiti. Túramtai nayaimpinimayá suntarsha, tura ashí kakaram akupin áiniana nusha Jesukristun umirainiawai.

4

Ju nunkanam wáitsatin

¹ Kristu ni ayashńńin wáitsa asamtai atumsha núnisrumek wáitsatin ákuisha, katsuntratjai titiarum. Ni ayashńńin wáitiana nú shuar yajauchin páchiatsui.

² Antsu “iwiaakjana nuńkia Yusa wakeramurńin tuke umirkatjai” tu enentáimui. Ni ayashń wakerana nuna yamaikia páchiatsui.

³ Warí, Yúsan nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekum ti yurumárum, enentáincha ajasrum charaatum ajatniusha, ántar-yusa namperńńin yajauch ana nu najanatniusha nusha ashí wakerimiarme.

⁴ Tura surimiatsuk yajauch túrimiarmena nu iniaisa asakrumin, yaunchu atumjaj nuna túrin armia nu, “urukamtai iniaisara?” tusar yajauch áujmatramprume.

⁵ Túrasa ukunam nu aents ni túramurńin etserkatatui. Iwiaaku ainia nunasha tura jákaru ainia nunasha Neka awai. Nii nu enentsun sumamtikiawartatui.

⁶ Túrasa jaka armia nu Yusa shiir chichame ujankarmiayi. Ni ayashńńin ashí shuarjaj métek jakamniaitiatń Yus iwiaaku pujana núnisanń ni wakanń iwiaaku pujusarat tusa ujankarmiayi.

Shuar yáintniatji

⁷ Ashí amuukatin jeatemayi. Tuma asamtai péñker enentáimsatarum; túrarum anearum Yus ajuj pujutarum.

⁸ Aneniamujaj untsurń tunaasha tsanńkuratin awai. Tuma asamtai ashí nankaamas namtak anenaistarum.

⁹ Kajé-kajejajńchu atumi jeen itiaaniátarum.

¹⁰ In anńant anńant shiir awajtamatsniun Yus ti núkap takaku. Tura in shiir awaj-tamsamujaj chíkich shuarsha shiir awajsatarum tusa chíkich chíkich túratniun suramsaitji. Tuma asamtai péñker takaawa áintsarmek Yus amasmania nujaj ame írutramuram yáintá.

¹¹ Etserkatniun Yus amasuitkiuńkia ame tamena nu, Yus tana nujaj métek atí. Chíkich shuar yáintniaitkiumka Yus amaana nú kakarmajaj túrata. Ashí túramna nu Yusa naarj

shiiir atí tusam Jesukrístu náarjijai túrata. Jesukrístun ashí aents shiir enentáimtusartí. Tura ashí áentsnum ni kakarmarj tuke atí. Nuna tajai.

Yus-shuarti wáitsatin

¹² Aneamu yatsurtiram, ti waitsatin nekapramsartin jeartampramna nu nusháa enentáimprairap. Wáitsatin támatái, “¿urukamtaí waitsa pujaj?” tu enentáimsairap. Kame túrunamniati.

¹³ Tuma ajñ shiir enentáimsatarum. “Kristu wáitsamurjñ métek-taku wáitiakun péñkeraiti” tu enentáimsatarum. Ukunam Kristu wincharj wáinkiarum timiá warasmi tusarum túratarum.

¹⁴ Krístunu asakrumin katsekkramkachartimpiash. Túmaitkiuisha Yusa Wakanj shiir ana nu atumjñ pujurtamkui shiir awajsamuitrume. Katsekkramainia nú shuar imia Yusa Wakanjñ yajauch áujmatainiawai. Tura átumka Yusa Wakanj shiir awajearme.

¹⁵ Túra atumsha yajauch túrawairum aneartarum. Mankartana nu, kasamkana nu, tunáa túrana nu, tura chikichna páchiana nusha ni wáitsatniurjñkete. Atumjajñkia nu wáitsatniuka atsutí.

¹⁶ Tura antsu Krístunuiti tusar wishikramuk wáitkiarmainiakui natsaqrairap. Krístunu asam wáitiayatmek, natsamtsuk Kristu naarj shiir awajсата.

¹⁷ Yuska ni shuarjñ nekapсатаajtsa nan̄kamatniuiti. Tura nu tsawantcha jeayi. Yus imia in nekapramkuisha Yus-Chíchaman umirainiatsna nú shuarsha urukawartñ. Ti asutniáwartatui.

¹⁸ Imia Yus umirjinia nu uwempratniurjñ itiuurchataitkiuisha tunaan túruiniana nusha urukawartñ.

¹⁹ Tuma asamtaí Yus wakeramujai wáitiainia nu, niisha Yus najanamu asa Yus iirsatí tusa tuke péñker túratí. Wari, Yuska tuke péñker túrichukai.

5

Yus-shuara uuntri túratin

¹ Yamaikia Yus-shuara úuntritiram, jintintjiarme. Wisha núnisnak Yus-shuara úuntritñjai. Kristu wáitsamurjñ wáinkiaitjai wisha. Tura ukunam ti shiir átatna nuj chikich Yus-shuara uuntri núnisnak wisha pachiinkiaitajai.

² Yus-shuar ame iistiniaitmena nu, péñker iistá, murikiu wáinin ni murikrñ wainnia áintsamek. Nakittsuk, shiir enentáimsam túrata, Yus wakerana nuke. “Chikich akupta asamtaí túratñjai” tútsuk tura nujajñ kuítrintin ajastin enentáimsuk nekas wakeritia, Yusa takatñ asamtaí.

³ Turasha, “Yús-shuara uuntri ajasan, Yus-shuaran akuptiaj” tu enentáimsaip. Antsu shiir túramurmijai Yusa murikrñ jintintiata.

⁴ Nuñkia murikiu wainniu Uuntri taa wantiniak iwiarmamtaí tawasap ti shíirmachia núninian suramsattawai. Aents súana nú shíirmach wari mamurtiniati. Tura Úuntrum ámin suramsattana nuka penké mamurchattawai.

Yus-shuarti umirnaikiatin

⁵ Tura natsatirmesha atumí uuntri umirkatarum. Kame yaunchu Yús-Papinium aarma asamtaí ashí Yus-shuartiram nan̄kaamantu enentáimtumatsuk umirnaikiatarum.

Waantu enentáimtuma núnaka Yus nakittiawai. Antsu nan̄kaamantuchu enentáimtuma nuna Yus waitnentak yayawai. Tu aarmaiti.

⁶ Wats, Yus timiá kakaram asamtaí, amek nekamam, péejchach enentáijjai enentáimtumasta. Nuñkia tsawant jeamtaí ni wakerak Yus ámin penkerjñ awajtamsattawai.

⁷ Yus ámin ti enentáimturmakui ame itiuurchatrum ainia nu Yus ashí iiktusta.

⁸ Aneartarum tura ímiastarum. Íwianch atumí nemasrj ana nu, uunt yawáa nuke, yanak emesraitiaj tusa eəəə tentaa wekaawai.

⁹ Tura tuke Yus nekas enentáimtusurum surimiaktarum. Ashí nun̄kanam Yusnum atumí yachj ainia nu átum wáitiarmena núnisarañ wáitiainiawai. Nusha kajinmakchatniuitrume.

¹⁰ Wats, ishichik tsawant wáitsarmena nu nan̄kaasmataí Yus ataksha péñker awajtamsattarme. Tura numi wewe wajana núnisan ikiakátmartatrume. Tura Yus ikiakárma asarum ni jintñin tuke péñker wekasattarme. Ju Yus tuke in waitnentramtsujik. Tura iisha Jesukrístunu asakrin Nijijai métek Yus ni shiir pujutainium tuke shiir pujusmintrum tusa achirmakuitji.

¹¹ Nú Yúsnasha ashí aents shiir enentáimtusartí. Tura ashí áentsnum ni kakarmarj tuke atí. Nuke ati.

¹² Serpanujaj ju papin ishichik áarmaj nuna akupeajai. Serpanu Yusjaj péñker wekaak Yusnum winia yatsur ajasuiti; núnaka nékajai. Yus waitnentrama asa ti yainmakmania nuna enentáimtikeajrume ju papijiai. Tura tuke ni waitnenkartutairjin wekasatarum tájarme.

¹³ Papirúnianmaya atumjaj métek Yus achikma áinia nu amikmaatmarme. Winia uchir Markus núnisañ amikmaatmawai.

¹⁴ Yusaj yachj ajasu asarum anenaisrum shiir awajnalisatarum. Jesukristunu ajasuit-rumna nuna Yus imiatkinchanum pujustinian suramsarat tusan wakerajai.

Nu atí.

PÍTIUR Ataksha papin áarar akupkamu

Pítuur Yus-shuaran áatramiania nu

¹ Wikia ju papin aajna ju Semuñ Pítruitjai. Jesukrístu akatramu asan ni takarniurintjai. Ii Yusri tura in Uwentikramin Jesukrístu umirumna nuna atumniasha juna áatjarme. Niisha ashí áentsun métekrak enentáimtin asamtai atumsha iijjai métek Niiniu ajasurme. Nuka ti penkeraiti.

² Yus, tura ii Uuntri Jesussha nékarmena nú nukap nekaki wéakrumin, Yuska atumin ti nukap yáinmaktatrumé tura ti nekas imiatkinchanum pujustinian suramsattarme. Nuna nekaan tuke núnisañ atí tusan wakerajrume.

Yusaj páchitkia atin

³ Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji.

⁴ Niisha uunt asa tura tujinkiachu asa ni chichamen suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashí yajauch wakerana nuyá uwemprarum, Yusaj páchitkia átinian suramsaitrumé.

⁵ Yus umirkarme. Yamaikia juna túratj tusarum kakartiniaitrumé. Ti penker wekasatniuitrumé. Nuyá Yusna nekaatniuitrumé.

⁶ Nuyá yayauch túrashtin ímiastiniaitrumé. Nuyá katsuntratniuitrumé. Nuyá Yus shiir enentáimtusrum wekasatniuitrumé.

⁷ Tura nuyá ashí shuar shiir enentáimtustiniaitrumé. Tura nu nankaamas ashí shuar aneatniuitrumé.

⁸ Ashí nu túrakrumka, tura tuke túrukum wéakrumka, nakiarchattarme. Túrarum ni takatri émamkesrum takastatrumé. Tura ii Uuntri Jesukrístu nekas nekaattarme.

⁹ Tura nuna túruiniatsna nuka, kusurua áanin áiniawai. Jesukrístu wakeramurin enentáimtuiniatsui. Ni tunaarjya uwemprarmia nuna kajinmatainiawai.

¹⁰ Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniarchattarme.

¹¹ Tura ii Uuntri Jesukrístu uwentikramprajnia nu, Nii tuke akupeana nu, nakittsuk shiir awantiamattarme.

¹² Tuma asamtai nékarminin tura Yusna nekas ana nuyá kanaatsrumnin tuke enentáimtikratjarme.

¹³⁻¹⁴ Nekaatarum. Winia jákatniurun jeatema nuna ii Uuntri Jesukrístu ujat kayi. Tuma asamtai iwiaaku pujajna juik atumin tuke enentáimpratarum tusan jintinratniuitjarme, tu enentáimsajai.

¹⁵ Tura wi jakamtai, wi aajna juna tuke kajinmatkijirum tusan, wi jeajna nuna túratattjai.

Kristu waantu ajasun wáinkiamnia nu

¹⁶ Ii Uuntri Jesukrístu kakarmari tura ni tátatniuri etserkamajnia nu, aya áentsnumia ántar chichamchayui. Antsu imia ii jijjai Uunt Jesukrístu waantu ajasu wáinkia asar ujakmajrume.

¹⁷ Tura Apa Yus Jesukristun shiir waantu awajsamía nu, ni imiá shiir pujutairiya chichaak tímiayi, “Juka winia ti aneamur Uchiruiti. Nin ti wararjai.”

¹⁸ Iisha naint “Yusna” tájinia nu Nijjai pujá asar nu nayaimpinmayá chichaamu paant antukmaji.

¹⁹ Tura nuna nankaamas ti nekasa nu, Yúsnan etserin yaunchu etserkarmia nusha nékaji. Ju éterma jusha, tsawant tsawaatsain kiritniunam ji keak tsáapin awajeana áintsañ asamtai, penker enentáimta asarum penker túarme. Tura Kristu taa, yanquam etsantea núnisañ atumí enentáin ashí paant awajsattawai. Tura nu tsawant jeatsain nu éterma tuke penker enentáimtustarum.

²⁰ Tura ju emka nekaatarum. Shuar aya ni enentáimmiarjijain, Yusa Wakanjijainchu, Yus-Chicham urukamtai tu chicháa nuna nekaatniun jeatsui.

²¹ Wari, Yúsnan etserin yaunchu etserkarmia nu, aya ni wakeramurijijain tícharmiayi. Nu áishmankan enentáin Yus pujursarmiayi. Tuma asa ni tiarmia nuna Yusa Wakanj jintintiam tiarmiayi.

2

*Wait chichaman unuiniainia nu
(Jútas 4-13)*

¹ Tura Israer-shuarnum wait chichaman etserniusha páchtikiarmiayi. Atumijncha wait chichaman unuinau páchtikia ártatui. Niisha awajimtikrampratniun wakeruiniak wáitian ti yajauchin uúkar unuiniarartatui. Tura “Uunt Jesus uwemtikrurmia nusha ántraiti” tiartatui. Nuna takui ni amuukatniurjsha wárik jeartiatui.

² Tura untsurí shuar ni yajauch túruiniamurin írsar métek túrawartatui. Iis, “Yus-Chichaman unuiniaitjai” tuíniayatan imiá yajauch túruiniakui untsurí aents “Yus-Chicham ántraiti” tiartatui.

³ Kuítian ti wakeruinia ásar, wait chichaman unuitiamprar akíam kuítriniawartatui. Tura nú shuar yaunchu Yus jákatniunam sumamtikiawarma ásar, ni amuukatin tsawantri jeatemayi.

⁴ ¿Wari? Yuska ni suntarí nayaimpiniam pujuarmia nunasha penké tsankurachmiayi. Antsu nayaimpinmaya jinium akupkarmiayi. Tura nekapsatin tsawant jeatsan kiritniunam jinkiamu emetamu pujuiniawai.

⁵ Yáunchuya shuarnasha Yus tsankurachmiayi. Antsu amuukarat tusa amaarkatniun akuptukarmiayi. Antsu aya Nuain, Yusjai wekasatniun etserin asamtai ni shuarí siati armia nujai uwemtikramiayi.

⁶ Enentáimpratarum. Sutuma pépruncha tura Kumura pépruncha nayaimpinmaya jin akuptuk Yus mash amukmiayi. Aya yúnkunmik awajsamiayi. Ukunam nu túrunamun nekaawar, shuar tunáa túratin tsúumainian nekaawarat tusa túramiayi.

⁷ Tura Yus Ráutan uwemtikramiayi. Pénker shuar asa, Sutumanmaya shuar imiá yajauch ásar tunáa túruiniakui, Raut kúntuts enentáimsamiayi.

⁸ Pénker áishman asa, nuyá shuara yajauchirin wáitianiak, ni enentáí pénker asamtai tuke tsawant kúntuts enentáimik wáitmiayi.

⁹ Tura incha tunaan iniakturmakrin, nu tunaanum nupetnakchati tusa Uunt Yus uwemtikrampramniatí, ni umirka asakrin. Túrasha yajauch shuárnaka nekapsatin tsawant jeakui ti asutniáwarat tusa Yus yámaikikia apujeawai.

¹⁰ Tura Yus akupeana nuna umirkatniun nakitrar ni yajauch wakeramurin túruinia nunasha Yuska nekas asutiáttawai. Enentáimcha áiniawai. Tura ni wakeramuriniak wakeruiniawai. Niijai nankaamas akupin ainia nuna yajauch áujmatainiawai.

¹¹ Warí, imia Yusa suntarí Yusaj matsatainia nu, nuna túratniun tsúumainiawai. Nankaamas kakaram tura nankaamas uunt áiniayat nu akupniun katsekainiatsui.

¹² Nu áishmansha enentáimcha yajasma núnin áiniawai. Achikiar mantamnatniuk akiinia áiniawai. Enentáimsuk nánkamsar yajauchin chichainiawai. Tuma ásar yajasma núnisan jákartatui.

¹³ Chikichan wáitkiamia áintsan wáitsartatui. Tuke tsawant ni wakeramunak túruiniak “waraajai” tuiniawai. Tura atumjai irunar yurumáiniayatan atumin anankramawar warainiawai. Nuka natsantaiti.

¹⁴ Nuwan wakerutskeka íniatsui. Tunaan yawetainiatsui. Yúpichuch ainia nú shuaran netse túratniun wakerumtikianiawai. Kuítian wakeruktinniasha ti nékainiawai. Jákatniunam sumamawaru áiniawai.

¹⁵ Yúsnumani naka wétsuk awajirarai. Peura uchirí Paraam Yúsnan etserniuitiat yaunchu awajimia núnisaran awajiniawai ju shuar. Paraamka tunaan tura, kuítian achikitian ti wakerukmiayi.

¹⁶ Tura niisha tunáa túratajtsa weaj Yuska umpuurun chichachun aents chichaana nujai métek chichamtikiamiayi. Nuinkia umpuuru timia nujai Yúsnan etserin ni netse túratniurin enentáimiar iniaisamiayi.

¹⁷ Nu áishmansha yumirmat kuyua núnis áiniawai. Tura núnisan yuranmisha káariat nase umpuim menkaana nu, yumi ajuarcha ásar, penké ántar áiniawai. Warí, Yus-Chichamjai áentsun yainiainiatsui. Niisha imiá kirit ámanum tuke pujustin áiniawai.

¹⁸ Niisha ti chichainiayat ántar chichainiawai. Yajauch túratniujai tura ayash wakera nújaisha páchim túriarmia nuyá kanakiarua nú shuaran ataksha tunaanum ajuartajtsa wakeruiniawai.

¹⁹ “Iiya núnis túrakrumka annkant átatrume” tu wénawai. Túrasha imia ninki ni tunaarin emetamu áiniawai. Páantchakait. Shuar warí tunaajim nupetnaka, nuna emetamurinti.

²⁰ Kame shuar, uunt Jesukrístu uwemtikartin ana nuna chichamen nékainiak ju nunkanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nujainkia nankaamas yamá imiá yajauch pujuiniawai.

²¹ Yusa akupkamurjín imiá péñkera nuna Yus nú shuarnasha súsarmaiya. Túrasha nékainiyat tunaanum waketkiaru ásar ti asutniáwartatui. Tuma asamtai, nekas jintia nekaachuitkiunka maak árainti.

²² Tichamukait, “yawá iyak ataksha yúawai,” tura, “kuchisha imiainiuiat ataksha tsakusnum maajkimui.” Nu áishmansha núnisan yajauchiniam ataksha wáketainiawai.

3

Uunta tátintri

¹ Aneamu yatsurtiram ju papin jimiara áatjarne. Mai papinium winia jintintiamurjai atumi chamir enentáin enentáimtikratjarum tusan wakerajrume.

² Yúsnan etserin, péñker wekain armia nuna etserkamurj enentáimturarum. Tura ii Uuntri akupkamurjín ni akatramurjijai ujatmakarmia nusha enentáimpratarum. Jesukristu uwemtikrampramaj nuna chichamen tajai.

³ Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakeramurjín túrusar wekasartatui.

⁴ Tura juña tiartatui. “¿Kístuka “wi atak tátatjai” timia nusha urukuit? Warí, ii uuntri yaunchu kajinikarmia nuyá yapajiáchmaiti. Yus yaunchu ju nunkan najanamia nuyá yamaisha tuke núniskete” tiartatui.

⁵ Túrasha nunkan nayaimpincha Yus yaunchu najanamia nuna nekaatniun nakitiainiawai. Yusa chichamejai nunka entsaya jinkimiayi tura nunkasha entsá nanatrawai, Yus timia nujai métek.

⁶ Tura ukunam nu nunkan amaarkamujai Yus emesramiayi. Ashí nuna nekaatniun nakitiainiawai.

⁷ Tura Yus tiniu asamtai nayaimpisha nunkasha yamáya nuka jijjai emesnarat tusa ikiusma áiniawai. Yus áentsun nekapsattana nu tsawantaj yajauch aents emesnartatui; tura jisha nu tsawantaj nunkan nayaimpincha áesattawai.

⁸ Tura jusha, aneamu yatsurtiram, enentáimsatarum. Uunt Kristujainkia chikichik tsawant mir uwiya núniskete; mir uwisha chikichik tsawanta núniskete.

⁹ Uunt Kristu, “atak tátatjai” tana nuna umitsuk menkakashtatui. Áyatik áentsti “wau taatsui” taji. ¿Urukamtai wau taatsua? In áentstin nákmaji. Shuar chikichiksha menkakain tusa nakitiawai. Antsu ashí shuar enentáin yapajiáwarat tusa wakerawai.

¹⁰ Túrasha Uunta tsawantri aya aneachma jeattawai. Kasa aya aneachma kiritniunam taana núnisan tátatui. Nu tsawantin nayaimpisha ipiamta núnis charáa timitai menkakattawai. Tura nuj ashí íranna núurtiuk esaawartatui. Tura nunkasha tura ashí íranna nusha esaawartatui.

¹¹ Ashí nu emesnartin neka asarum atumsha imiá nekas Yus tuke enentáimtusrum, takamsuk umirkarum wekasatniuitrume.

¹² Yusa tsawantri wárik tati tusar, jintiá ímprusar nákastiniaitji. Nu tsawantaj nayaimpisha esa emesnartatui, tura ashí íranna núurtiuk ti tsuer ajas entsamnattawai.

¹³ Tura iikia yamaram nayaimpisha, yamaram nunkasha ati tusar nákaji. Nu átatui, tímiayi Yus. Tura nujsha aya péñkerak átatui.

¹⁴ Nu tuma asamtai, aneamu yatsurtiram, ju túrunati tusarum nákmarena nuj, imiatkinchanum wekasam chamir enentáimjai makuuchmin Yus wáitkiati tusarum wekasatarum.

¹⁵ Ju nekaatarum. In uwemtikramprataj tusa Yus ti nákmaji. Ii aneamu yachi Páprusha núnisan Yus ni nekatairjín susamia tímiatrusan áatrampramarme.

¹⁶ Ashí papí aarmia nuj Pápruka wi tajana nuna chichaawai. Kame ni áarmarj chikichka ishikich nekaachminiusha áiniawai. Nékachu ainia nú shuarsha, tura Yúsnum tariarcha ainia nusha Papru áarman yapajiáwar nusháa jintintiainiawai. Tura chikich chichamsha Yus-Chichamnumia ana nuna núnisan túruiniawai. Túmainiakka niniki emesmamainiawai.

¹⁷ Wátsek, aneamu yatsurtiram, túruntsain ujakjarmena nu neka asarum, yajauch shuar anankramattsa wakerutmainiak awajimtikrurain tusarum, tura Yusaj tariarurmena nuyá iniarajj tusarum anearum wekasatarum.

¹⁸ Tura ii Uuntri Jesukristu in Uwemtikiartin ana nu, yamá nékmarena nú nankaamas nekaatarum. Tura enentáimin nú nankaamas tariarum wetarum. Yamaisha tura tuke, ii Uuntri Jesukristu náarjín uunt awájsartí. Nu atí.

JUAN

Emka papin áarar akupkamu

Tuke iwaaku átinia nérentin Chicham ana nu

¹ Ashí nan̄kamamia nú yaunchu Yusa Uchir̄j tuke pujuuyayi. Nusha iisha anturkaitji. Nekas ii j̄ij̄ij̄ai wáinkiaitji. Wáinkiarsha ii uwejēj̄aisha ant̄in̄kiuitji. Niisha Yúsán ti paant awajeak, Chicham t̄im̄iniaiti. Tura tuke iwaaku átinia nérennuiti. Nuna áateajrume.

² Iwiaaku átinia nérenniusha paant nekanamiayi, nusha Jesukristuiti. Iisha Nii wáinkia asar nu étsereaji. Tura tuke iwiaaku átinia nérenniur̄j asa tuke Yus Apaj̄ai pujuyayi. Tura yamaikia īini paant ajatramsakrin atumniasha ujaajrume.

³ Ii Yus Apaj̄aisha ni Uchir̄j Jesukristuj̄aisha tsan̄in̄kiar nekas chikich̄k ajaji. Tura atumsha núnisrumek īij̄ij̄ai chikich̄k ajasuk tusar wáinkiamajnia nuna anturkamajnia nunasha ujaajrume.

⁴ Ti shiir warastarum tusan j̄una áatjarme.

Yus tsáapniniati

⁵ Yus imiá tsáapnin asamtai kiritin N̄inkia pen̄ké atsawai. Nu chichaman Jesukristu in nuuitiamprakin nuna atumniasha ujaajrume.

⁶ “Niij̄ij̄ai tsan̄in̄kia pujaji” táyatar kiritniunam pujustinia áintsar tunaanum pujakrikia wáit̄raji tura nekas pen̄ker ana nu túratsji.

⁷ Yuska tuke tsáapninium pujuwiti. Iisha núnisrik tuke tsáapninium pujakrikia nuámtak nawamnaikiar pujuiniaji. Túrakrin Yus ni Uchir̄j Jesukristu numpéj̄ai ashí ii tunaar̄j japirtamji.

⁸ “Wi tunaan túrichuitjai” tákurkia ímia iik anañmamaji. Nekas ana nu nékatsji.

⁹ Antsu ii tunar̄j Yus paant ujakrinkia Yuska tsan̄kurtamprattaji. Tura ii tunaar̄in asakátramprattaji. Yuska ti pen̄ker asa Nii tana nuna t̄im̄iatrusan̄ umikmin asa túrattawai.

¹⁰ Kame “Tunaan túrichuitjai” tákurkia nuj̄ai “Yus wáit̄riniati” taji. Ni chichamesha ii enentájn pujurtamsuji.

2

Jesukristu in Yúsán áujturmaidji

¹ Yus-shuartiram, tunaanum iniaar̄jrum tusan ju papí áateajrume. Túrasha Yus-shuar tunáa túramt̄in̄kia Apa Yusan ii áujturmau awai. Nuka Jesukristuiti. Niisha ti pen̄keraiti. Niisha Yúsán áujturmakui Yusj̄ai ataksha iwiaarar pujustatji.

² Jesukristu ii tunaar̄in asakártaj tusa jarutramkamaiji. Túrasha aya íiniunkechu antsu ashí shuara tunaar̄in asakártaj tusa jarukmiayi.

³ Yus tana nu umirkurkita nuikia Yus nekas nékaitji.

⁴ Tura shuar “Yúsán nékaitji” tayat Yus tana nuna umirchakka wáit̄rawai. Nekasa nuka ni enentájn atsawai.

⁵ Antsu shuar Yus tana nuna umireakka Yúsán ti shiir aneawai. Túrakur Niij̄ij̄ai tsan̄in̄kiar pujamu nékaji.

⁶ “Yusj̄ai tsan̄in̄kia wekaajai” tana nú shuar Jesukristu wekasamia núnisan̄ wekasatniuiti.

Yamaram akupkamu

⁷ Yatsuru, yamaram akupkamun áattsujrume. Áyatik yámankamtaiknumiá antukmiarum nunak tájarme. Ashí atumin jintintiamu yaunchu akupkamuiti.

⁸ Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atum̄in̄cha nu akupkamu nekas paant awajsamuiti. Nuj̄ai kiritin men̄kaatemka asamtai tura nekas tsaapn̄in̄kia paant tsaapnirtasa pujakui nu akupkamun ataksháa áateajrume.

⁹ Shuar “tsáapninium pujajai” táyat ch̄ikich Yus-shuaran nakitiakka tuke kiritniunam wekaawai.

¹⁰ Yus-shuaran aneana nu nekas tsáapninium pujawai. Niisha iniaatsuk chikichnasha tunaanum ajuarchamniati.

¹¹ Tura shuar ch̄ikich Yus-shuaran nakitiakka kiritniunam tuke wekaawai. Tura kiritniunam iimiu asa itiraani wea nuna nékatsui.

¹² Uchitirmincha, Jesukristu jakamuj̄ai atumí tunaar̄j tsan̄kurnaru asakrumin j̄una áateajrume.

¹³ Úntirmincha yámankamtaiknumiá tuke pujuuya nu nekáa asakrumin j̄una áateajrume. Únmarutirmincha uunt iwianch nupetka asakrumin j̄una áateajrume.

Uchitirmincha, Yus Apa nekáa asakrumin áateajrume.

¹⁴ Úuntirmincha yámankamtaiknumiá tuke pujuuya nu nekáa asakrumin juna áatjarne. Úunmarutirmincha atumí enentájjají Yus-Chicham umirkarum kakaram asarum íwianch nupetka asakrumin juna áatjarne.

¹⁵⁻¹⁷ Aya áentsnumiá ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame ísam takustaj támena nusha, tura nankaamantu ajastin. Nuka ju nunkanmayá áiniawai. Shuar aya nunak wakerak Yúsaka aneatsui. Kame ju nunkasha amuukattawai. Ashí nu wakeruktincha ti nekas amuukattawai. Túrasha shuar Yusa wakeramurín umiána nu tuke iwiaaku pujustatui Yusjái. Nu asamtai atumsha ju nunkanam ana nu pachikiairap. Tura aya juyá ana nu aya tákustin enentáimsáip.

Nekas chicham tura wait chicham

¹⁸ Uchirú, amuukatin tsawant jeatemayi. Atumsha Kristu nemasrj tátin antukuitrume. Yamaikia untsurj Kristu nemasrj waintinkirmatai amuukatin tsawant jeatemayi.

¹⁹ Nusha ii weeak ármayi. Túmaitiat nekas Yus-shuar ácharmayi. Nekas Yus-shuar ániakka tuke ijjíají irunar pujuarajayi. Tura jíinkirmatai nekas Yus-shuarcha ainia nu paant nekanamniaiti.

²⁰ Antsu atumniaka Yusa Shiir Wakanjín Kristu suramsamtaí ashí paant nékarme.

²¹ Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarne. Wáit-chichamsha nekas-chichamsha penké nushaachuk ainia.

²² Wáitrin júiti: Jesusan “Yus anaikiamuka Kristuchuiti” tana núiti. Núiti nekas Kristu nemasrj. Yus Apancha ni Uchiríncha nakitia asa Kristu nemasrjinti.

²³ Yusa Uchirín nakitiainia nu Yus Apajajísha tsanín pujatsui. Tura Yusa Uchirín shiir awajewa nu, Yus Apajajísha tsanín pujawai.

²⁴ Yámankamtaiknumiá antukmiarum nu atumí enentájin pujurtamsati. Nu túrakrum atumsha Yusa Uchiríjjíajísha Yus Apajajísha tuke tsanínkrum pujustarume.

²⁵ Jesukristusha Niijjíají tuke iwiaaku pujustinian tsanínkrumkaitji.

²⁶ Anan Martín írunkui juna áatjarne.

²⁷ Atumniasha Jesukristu Yusa Shiir Wakanjín suramsakrumin, nu Wakan tuke pujurtamkurmin shuar jintintramatin atumatsrume. Antsu Yusa Wakanj ashí jintintramprume. Ni jintintrammasha imiá nekas asa wáitchaiti. Tuma asamtaí Nii jintintramna áintsarum Kristujái tuke tsanínkrum pujustarum.

²⁸ Yamaikia, uchiru, Kristujái tuke tsanínkrum wekasatarum. Nu túrakrikia Nii támatai natsamtsuk ti shiir inkiunaiktatji.

²⁹ Atumsha Jesukristu ti penkera nu nékarme. Núnisan ashí shuar péñkeran túruinia nuka Yusa uchirj áiniawai. Nusha nekaatarum.

3

Yusa uchirj áiniana nu

¹ Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirjntji. Tuma asakrin jú nunkanmayá Yús-shuarcha nekarmainiatsji. Kame Yusnasha nékainiatsui.

² Aneamu yatsurtirmea, juna tájarne: nekas Yusa uchirj ajasuitji. Kame ukunam urukuk átají nusha nékatsji. Túrasha ju paant nékaji: Jesukristu támatai imia Nii paant wáinkiar Niijjíají métek ajastatji.

³ Tura shuar shiir enentájjíají nuna nákakka imia ninji shiir awajmamui Jesukristujái métek shiir atajai tusa.

⁴ Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin.

⁵ Jesukristu ii tunaarj asakártaj tusa ju nunkanam támia nu nékarme. Tura Niñkia tunaan túrichuyayi.

⁶ Tuma asamtaí shuar Niijjíají tsanín wekáa nuka tunaanum wekaatsui. Antsu shuar tunaanum wekaakka nu shuar Kristun wáinchaiti, núnisan nékachuiti.

⁷ Uchiru, shuar anan kramawairap. Péñker túrinkia Kristu ti penker asamtaí niisha péñkeraiti.

⁸ Antsu shuar tunaanum wekaana nu iwianchnaiti íwianch tuke tunaan túrin asamtaí. Yusa Uchirj ju nunkanam táwiti ashí íwianch túramun emesrataj tusa.

⁹ Shuar nekas Yusjái akiinia nu tunaanum wekaatsui. Yusa uchirj asa Yusa iwiaakmaríjjíají wekaawai. Tuma asa tunaanum tuke wekaatsui.

¹⁰ Shuar péñker túratsna nuka tura Yus-shuarcha kajera nuka Yus-shuarchaiti. Nujái Yusa uchirj ainia nusha tura iwianchi uchirj ainia nusha paant nekaamniaiti.

Mai anenai ajatin

- ¹¹ Atumsha yámankamtaikniumiá chicham antukmiarum nu júiti: mai anenai ajartin.
- ¹² Iisha Kaiñkia áanin áchatniuitji. Íwianch-shuar asa ni yachin máamiayi. Tura çurukamtai maamia? Enentaimprata. Nii yajauch asa tura ni yachi péñker asamtai máamiayi.
- ¹³ Yatsurtiram, ju nunñanmayá shuar nakitramainiakui ti enentáimsairap.
- ¹⁴ Iikia jákatniunmayá uwempra asarⁱ nekas iwiaaku pujaji. Túmakur Yus-shuar ainia nu aneaji. Nujai yamaram iwiaakma takakjinia nu imiá páantaíti. Shuar Yus-shuaran aneachkunka tuke jákatniunam wekaawai.
- ¹⁵ Shuar Yus-shuaran nakitiakka mañkartinia núnisaiti. Tura mañkartinkia tuke amucha iwiaakmanum pujuiniatsui. Nuka nékaji.
- ¹⁶ Jesukristu in jarutramka asakrin nujai nekas in anenmaj nu nékaji. Iisha núnisrik Yus-shuar ainia nu ti aneakur ni yaintai tusar jarukmin átiniaitji.
- ¹⁷ Túrasha shuar chikich Yus-shuar atsumana nuna takakiat waitnentachkunka nekas ni enentáijjai Yúsán aneawash.
- ¹⁸ Uchiru, aya chíchamjain anenain áchatniuitji antsu nekas aneniakur péñker túrar yáiniaiktiniaitji.
- Yusaj natsamtsuk jeamniaitji*
- ¹⁹ Jujai ii Yúsaj sapijmiatsuk jeatniusha tura nekas Yus-shuaraitji nu nekaatniusha nekappampramniaitji.
- ²⁰ Ii enentái yajauch túramun enentáimtikramkurnisha Yus iijjai nankaamas ashí mash nékatsuk.
- ²¹ Tura, aneamu yatsurtiram, ii enentái yajauch túramun enentáimtikramchakrinkia Yúsaj sapijmiatsuk jeamniaitji.
- ²² Tura ni wakeramu túrakrikia tura ni chichamesha umiru asakrin ashí ii seaj nuna suramsattaji.
- ²³ Júiti Yus akupkamu: ni Uchirj Jesukristu nekas enentáimtustin tura Kristu timia áintsarik shuurtisha mai anenai ajartin.
- ²⁴ Shuar ni chichamen umía nuka Yusjaj tsanin wekaawai tura Yus niijjai tsanin wekaawai. Mai chikichik ajasu ániawai. Tura Yusa Wakanj ii enentáin pujá asamtai nujai Yus iijjai tsanin wekaana nu nékaji.

4*Yusa Wakanjsha tura Kristu nemasrj wakancha*

- ¹ Aneamu yatsuru, untsurj shuar wáitruiniak “wi Yúsán etserniuitjai” tuiniawai. Tuma asamtai ashí shuar “wi Yusa Wakanj takakkun chichaajai” tuinia nu péñker nekapsuk enentáimtusairap. Antsu ísrum nekas Yusa Wakanjmpiashit tura chikich wakaniashit nu nekaatarum.
- ² Jujai nekapsarum ya nekas Yusa Wakanj takaka nu nekaattarme: Shuar “Jesus Yusa Uchirj Kristuitiat nekas aents ajas ayashimkiamiayi” tana nu Yusa Wakanj nekas takakui.
- ³ Tura Jesusan tu enentáimtatsna nuka Yusa Wakanj takaktsui antsu Kristu nemasrj wakanj takakui. Kame Kristu nemasrj wakan tátin tama ántichukaitrum. Nu wakan yamaikia ju nunñanam táwiti.
- ⁴ Uchiru, átumka Yusna asarum Yus atumí enentáin pujawai. Tura ju nunñanmayá shuara enentáin íwianch pujawai. Atumjin pujana nuka niijjai nankaamas kakaram asamtai wáitrin ainia nu nupetkaitrum.
- ⁵ Niisha ju nunñanmayá ásar aya ju nunñanmayan áujmatainiawai. Túmainiakui ju nunñanmayá shuar ti penker anturainiawai.
- ⁶ Antsu iikia Yúsaitji. Tuma asakrin Yúsán nékainia nu anturtamainiaji. Tura Yúsachu ainia nu anturtamainiatsji. Nujai nekas Wakanin takakusha tura wáitrin wakanin takakusha nekaamniaiti.
- Yus tuke anenkratniuiti*
- ⁷ Aneamu yatsuru, anenaitin Yúsnumiá asamtai mai anenai ajartai. Shuar anenkratniua nuka Yusa uchirj asa Yúsáncha nékawai.
- ⁸ Shuar anenkratcha nuka Yúsánka nékatsui. Kame Yuska tuke anenkratniuiti.
- ⁹ Tuma asa ni Uchirj chikichkiniak ju nunñanam akupturmakmiaji. Iisha ni túrunamujai nekas iwiaaku pujaji. Nujai Yus in yáinmak ni anenkrattain paant iniakturmasmiaji.
- ¹⁰ Jujai nekas anenkrattainkia paant nekanamniaiti: ii Yus aneaj núchaiti. Antsu ii ti tunáa árinin Nii aneachmaitiatan Yuska ti anenma asa ni Uchirin ii tunaarin asakarat tusa akupturmakmiaj nujai nekas nekanamniaiti.
- ¹¹ Aneamu yatsuru, Yus núnis anenma asakrin iisha núnisrik mai anenai ajartai.

¹² Chikichkisha Yúsan wáinkiahuiti. Túmaitiat mai anenai ajakrikia Yus ii enentáin pujurtamkui Niijjaj métek anenkratin ajaji.

¹³ Yus ni Wakanin suramsa asakrin Yus iijjaj tsanin wekaana nusha tura ii Niijjaj tsaninkia wekaajnia nusha, nujaj nékaji.

¹⁴ Yus Apa ni Uchirin ashí shuaran uwentikrerat tusa ju nunkanam akupkamia nu wáinkia asar¹ étsereaji.

¹⁵ “Jesus Yusa Uchirinti” tana nu shuarjaj Yus tsanin wekaawai tura niisha Yusjaj tsanin wekaawai. Mai chikichik ajasu ániawai.

¹⁶ Yus in anenmajnia nu ti nekas nékaji. Yus tuke anenkratniuiti. Tuma asamtai shuar anenkartakka Yusjaj tsanin wekaawai tura Yussa niijjaj tsanin wekaawai. Mai chikichik ajasu ániawai.

¹⁷ Núnisar ti penker anenkartin ajaji. Túrar¹ súmamtikiatin tsawantaj natsamtsuk wajasatjai. Kame ju nunkanam pujayatrik Jesukristujaj méteketji.

¹⁸ Nekas anenaiyamunam sápij atsawai. Antsu nekas anenaiyamunam sápij menkaawai. Aya asutiátin akui sapijmiaiktinaiti. Tuma asamtai ántar sapijmiana nu nekas anenkratchaiti.

¹⁹ Yus emka in anenma asakrin iisha Nii aneaji.

²⁰ Tura shuar “wi Yúsan aneajai” táyat chikich Yus-shuaran nakitiakka nuka wáitriinaiiti. Kame Yus-shuaran tuke wainnia nuna aneachkunka çitiurak Yusan wáinchasha aneat?

²¹ Yus incha juna turammiaji: Yúsan anea nu shuar chikich Yus-shuarnasha aneatniuiti.

5

Ju nunkanmaya íranna nu núpeteaji

¹ Ashí “Jesus Yusa Uchirj Kristiiti” tu enentáimtana nú shuar Yusa uchirinti. Tura aparj aneakrikia ni uchirjsha aneattaji.

² Yus Apa aneakur tura Nii wakera nu umirkur Yusa uchirjsha ashí aneattaji.

³⁻⁴ Yus aneakur Nii tana nu umiktatjai. Ashí Yusa uchirjya nu Yúsan nekas enentáimta asa, ashí ju nunkanmaya íranna nuna núpeteawai. Nu asamtai Yus tana nu umirkatin itiuurchatchaiti.

⁵ Aya “Jesus Yusa Uchirinti” tu enentáimtana nú shuar ju nunkanmaya ana nuna awakkamniaiti.

Jesukristu “Yusa Uchirinti” tu etserainia nu

⁶ Jesukristu ju nunkanam taa entsajaj imiankui Yus nayaimpinmaya chichaak “Juka winia aneamu Uchiruiti” tímiaji. Tura nuyá Jesus jakamtai ni numpé puarmiayi. Entsajaj imianin ni takatrin nankamamiayi túrasha in jarutramak ni takatrin amukmiayi ju nunkanam. Chikichinkia túrutsuk mai metek túra asamtai Yusa Uchirjya nu paant nekanamniaiti. Yusa Wakanjsha tuke nekas tiniua nu métek tawai.

⁷⁻⁸ Nu asamtai menaint “Yusa Uchirinti” Jesusan tuiniawai: Nayaimpiniam Yus Apa tura Jesukristu, Chícham aa nu, tura Yus Wakancha; nunkanmasha Yus Wakancha, entsasha tura numpasha. Mash métekrak tuiniawai.

⁹ Aents étsereainiakui ántureaji. Nuna nankaamas Yus ni Uchirin tana nu nekas anturkatniuitji.

¹⁰ Yusa Uchirin enentáimtana nú shuar ni enentáincha nékawai. Antsu Yus ni Uchirin timian enentáimtatsna nú shuar Yúsan enentáimtachu asa Yúsan “wáitriinaiiti” tawai.

¹¹ Yus ni Uchirin timia júiti: Tuke iwiaaku pujutai nérenniuiti tura nu iwiaakmancha in suramsaitji.

¹² Yusa Uchirijjaj tsanin wekaana nú shuar, nu iwiaakmajaj iwiaaku pujuiniawai. Tura Yusa Uchirijjaj tsanin wekaatsna nú shuar, nu iwiaaku átinnium pujatsui.

Amuak Yus nekas enentáimtustinian áarmiania nu

¹³ Yusa Uchirj nekas enentáimtakrum tuke amuicha iwiaakmajaj iwiaaku pujarme. Nu nekaatarum tusan juna áatjarne.

¹⁴⁻¹⁵ Yus wakeramujaj métek seakrinkia anturtamaji. Tura anturtamkurin ii seamaj nu nekas takusua nu enentáimpramniaitji. Nu neka asar Yus ti shiir enentáimtajai.

¹⁶ Tunáa awai jákatniunam júana nu. Shuar nu tunaan túramtaipnkia Yus áujtustin ántraitai. Tura shuar chikich tunaan túraukinkia nuka nekas Yus áujtustiniaiti. Nekas jákatniunam júatsna nú tunaan túraitkiunkia iwiaaku átinian Yus susattawai.

¹⁷ Ashí yajauch¹ ana nuka tunaiti. Tura jákatniunam júatsna nú tunaasha awai.

¹⁸ Nekas Yusjaj akiinia nú shuar tunaanum tuke wekaatsui. Antsu Yusa Uchirj nin ti penker wainkiui íwianch antinchiachminiaiti.

¹⁹ Iikia nekas Yúsnaitji tura ashí ju nunkanmaya shuar iwianchnia ániawai.

²⁰ Yusa Uchirj ju nun^ukanam taa nekas-Yus aa nuna paant jintin^utramji. Yusa Uchirj Jesukristujaj tsani^uñkia wekaakur nekas-Yusa nujaj^usha tsani^uñkiar wekaaji. Nekas-Yus asa tuke iwiaaku átinia nuna nérenni^uiti.

²¹ Uchirú, ántar-yus írunna nu^uj pachiin^ukiarap. Antsu nujaj^u aneartarum.
Nuke atí.

JUAN

Ataksha papin aar akupkamu

Nekasa nunasha tura anenaitniuncha ujaawai

¹ Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekasan atumin aneajrume. Tura aya wíkichu antsu ashí Yus-shuar ainia nusha nekas chichaman nekaawaru ásar atumin anenmarme.

² Nekas-chicham tuke amuutsuk ii enentáin pujá asamtai aneajrume.

³ Yus ii Aparisha tura ii Uuntri Jesukristusha, Yus Apa Uchiri asa, atumin anenmak imiatkinchanum shiir pujustinian waitnentramak yainmakarti. Nujai nekas-chicham nekaarum anenaitiarme.

⁴ Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin ániawai.

⁵ Yamaikia, umaru, tájame: mai anenai ajartai. Yamaram akupkamun áattsujme antsu yamañkamtaik antukmiaj nunak tájame.

⁶ Nekas aneñkartinia nú shuar Yus akupkamun uminiaiti. Tura Yus akupkamuka “aneñkartin tuke atarum” tawai. Nusha yamañkamtaiknumia antukuitrume.

Anañkartincha írunui

⁷ Ju nunkanam anañkartincha ti írunui. Jesukristu nekas aents ajas akiiniamia nuna enentáimtuiniatsui. Nu shuar anañkartin ásar Kristu nemasri ániawai.

⁸ Nu shuarjai aneartarum. Yajauch shuar ántar yayañkrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

⁹ Ashí shuar Kristu jintiamun iniais “nañkaamas nékajai” tana nu, Yúsnachuiti. Antsu Kristu jintiamun umiana nu shuar Yus Apajajsha tura ni Uchirijjajsha mai tsanin pujawai.

¹⁰ Shuar Kristu chichamen jintiachu atumí jeen írmástaj tusa jeakui awayáwairap tura “shiir taume” tiirap.

¹¹ Kame nu shuar “shiir taume” tákumka nu shuar yajauch jintiamu jímiareame.

Umíamu chicham

¹² Ti nukap atumjai áujmatsatniun wakerajai. Túrasha ju papinium mashi áatrashtatjarne. Antsu imia wiki atumin iyakun jeátjai. Nuyá naka chichasar ti shiir warastatji.

¹³ Ame kaim Yus achikma nuna uchiri amikmaatmainiawai.

Nuke atí.

JUAN

Nuyá Ukunam papin aar akupkamu

Kayu ti penker shuaraiti

¹ Wi Juan Yus-shuara uuntri asan winia amikrun Kayun ju papin áateajai. Wisha ti nekas aneajme.

² Aneamu yatsurú, Yusjai penker wekaakum ame wakanim penker pujana núnisan ame ayashmisha penker atí tusan Yúsan áujtajme.

³ Ame nekas chicham umirman shuar ju taar ujatkarmai. Tura nuna antukan ti warasmajai.

⁴ Yus-shuar nekas chichaman umiiniakui imiá shiir enentáimtuiniajai.

⁵ Aneamu yatsurú, chíchich Yus-shuar ti penker yayame. Kame yajaya yujainia nusha nekas yayame. Nu penkeraiti.

⁶ Nu shuar ame nekas anenamun ju taar Yus-shuar iruntramunam etserkarai. Ataksha irauwenakui atsumainiana nu súsam shiir akupkarta. Penker wáinkiumka Yus shiir enentáimtikrattame.

⁷ Nu shuar Jesukristun takarsatai tusar wekainiawai. Túrawar Yus-shuarcha ainia nuna kuítrijjai yurumatniun nakitrarmatai

⁸ ii Yus-shuartikia nii atsumainia nu ajamsatniuitji. Nekas chichaman etserainia nu, yañkiartai tusar túratniuitji.

Tiútrepes yajauch túriniaiti

⁹ Ashí Yus-shuar árumna nuna papin akuptukmajrume. Kame nékajai, Tiútrepes nankaamantu enentáimtumak ii tájinia nuna umiktinian nakitiawai.

¹⁰ Nu asamtai nuí jean ni yajauch túramun etsertuktatjai. Nii ántar ti áujmatuk tsanumprutmaji. Tura nu arantcha Yúsnan takainia nu irainiakui awayáiniatsui. Tura chíchich awayátaj tákuisha suritiawai. Tura nuyá Yus-shuarjai iruntratniun surimiawai.

¹¹ Aneamu yatsurú, nu yajauch túramu jumamkiirap antsu penker túratarum. Penker túrinia nuka Yúsnaiti. Antsu tunáa túrinia nuka Yúsan nékachuiti.

Timitriu penker túriniaiti

¹² Imiá nekas penker shuar asamtai ashí shuar Timitriun penker áujmatainiawai. Iisha núnisrik penker shuaraiti tákurin nekas tájinia nusha nékarme.

Umíamu chicham

¹³ Wi ti nukap titinian wakerajme. Túrasha ju papinium mashi áatrashtatjame

¹⁴ wárik ítin asan. Nuí jean chichasmi.

¹⁵ Shiir pujustá. Juyá amikrum amikmaatmainiawai. Ii amikrishá chikichik chikichik amikmaatruata.

JÚTAS papin áarar akuptukma

Jútas Yus-shuaran papin áateawai

¹ Wi Jútas Jakupu yachintjai. Jesukrístu takarin asan ashí Yus Apa ni shuari átinian achikma ainia nuna ju papin áateajai. Jesukrístujai tsaninkiaru áarmatai Yus nin wainiaini-awai niijjai kanakchatniun.

² Yus ti waitnentramak imiatkinchanum tuke shiir pujustinian yainmakarti. Ti anenma asa túrati.

*Ti tunáa shuar írunui
(2 Pítur 2.1-17)*

³⁻⁴ Aneamu yatsurú, iikia mai metek Yus-shuar asar ju uwempratin chichaman áatratniun wakerukjarme. Túrasha ti yajauch shuar anankramawar atumín pachiinkiarmai. Niisha “Yus ti anenkartin asamtai páchitsuk tunáa túramnaitji” tuiniawai. Nu arantcha Yus in Akuptamniuncha tura ii Uuntrj Jesukrístuncha nakitin áiniawai. Nu asamtai nu shuaran “yaunchu sumamawaruiti” tímiayi Yus. Tuma asamtai tájarne “Tuke Yus-Chicham yajjáshinian ashí Yus-shuar akasmatkarat tusar susamuiti. Wátsek, kakaram ajastarum” tájarne.

⁵ Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nuñkanmaya júkiar Nin umirkacharua nuna máawarmiyai.

⁶ Nayaimpinmaya suntarsha ni pujutairin ajapa ikiukiar Yus susamun umitsuk iniais-armiyai. Túrawarmatai Yus kiritniunam jirujai tuke jinjá sepunam apujas pujurainiawai. Tura Uunt Tsawant jeamtai súmamtikiawartatui.

⁷ Núnisar Sutura péprusha Kumura péprusha tura tíjiuch péprusha áishmanjajisha nuwajajisha ti yajauch nuamtak tsanirmanainiakui ti tunaan penké túrachmin ana nunasha túrin ármiyai. Túmainiakui ashí shuar ashamkarat tusa Yus amuicha jinium asutiáwarmiyai.

⁸ Ayu. Atumín yajauch shuar ainia nu, yaunchu túrunamun enentáimtsuk tuke yajauch enentáimiaiainiak ni ayashin yajauch awajmamainiawai, Yusnasha nakitainiawai, tura ashí akupin ainia nunasha yajauch áujmatainiawai.

⁹ Antsu Mikiar, nayaimpinmaya suntara kapitántrintiat, iwianchjai máaniak Muisaisa ayashin akasmatak “áaniumsha” tu chicharkachmiayi. Antsu áyatik “Yus írmastí” tímiayi.

¹⁰ Túrasha ju shuarka nékainiatsna nuna náñkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújajisha imia niñki yajauch emesmamainiawai.

¹¹ Maa, anearartí. Kaín yajauchin túramia núnis tura ásar jákartatui. Tura Parama áinis kuítian ti wakeruiniak imia niñki tunaanum tsankamakaru áiniawai. Tura Kurea áinis ashí akupniun nakitin áiniak kajinikiartatui.

¹² Átum nuamtak anenaitiai-jisat nájankurmin nu shuar chikichan enentáimtutsuk Yus-nasha ashamtsuk imia niñki enentáimtumainiawai. Penké ántar áiniak yumi kiár tee ajasua núnin áiniawai. Tura nase umpuin yútutsuk nañkamainiawai. Árak nerektin nantutin nerechua ánin áiniawai. Tuma ásar uwemu penké jaka ánin áiniawai.

¹³ Entsa nujan Krak saurin ajekeawai. Nu shuarsha núnisar ni natsantrjin natsamtsuk ajekenawai. Tura yaa waakua ánin áiniawai. Tuma ásar nekas kiritniunam tuke menkakatin áiniawai.

¹⁴ Atan ka tiran kiyayi Eruk. Ti penker Yúsnan etserin asa juna tímiayi “Uunt Yus ti untsurj ni shuarjijai winittiwai.

¹⁵ Nuyá ashí shuar túrawarman nekaattawai. Tura ashí yajauch shuarnasha ti tunáa túrawarua nujai tura Yúsán yajauch áujmatsarua nújajisha súmamtikiawartatui” tímiayi Eruk.

¹⁶ Nu shuarka péñkera nujai waratsuk “yajauchiiti” tuiniawai. Aya ni ayashí waker- amunak wakeruiniawai. Nan kaamantu enentáimtumainiak chichainiawai. Tura chikich shuaran shiir chicharainiaksha aya ní wakera nuna túrutati tusa péñker chichainiawai.

Yus-shuar enentáimtikratin

¹⁷ Tura atumsha, aneamu yatsurú, ii Uuntrj Jesukrístu akatramurj yáunchu “aneartarum” tiarmiania nusha enentáimtustarum.

¹⁸ “Amúamu tsawant ishichik ajatesmatai shuar Yúsnan wishikrar nakitrartatui. Tura ni yajauch wakeramurjniak umí pujuartatui” tiarmiyai.

¹⁹ Nu yajauch shuar atumín akantamenawai. Ju nuñkanmayanak páchiniak Yusa Wakanj takakainiatsui.

²⁰ Tura átumka, aneamu yatsurú, tuke Yus nekas enentáimtusrum kakaram ajastarum. Yusa Wakanj kakarmarjjijai ashí Yus seatarum.

²¹ Yus ti anenmakui nii wakera nu wakeruktarum atumsha. Túrarum ni anenmamu shiir nekaattarme. Tsawant winiawai, ii Uuntrj Jesukrístu in waitnentrana asa tuke shiir Nijjjai pujustinian amastatji. Nu tsawant naká pujutarum.

²² Mai yapajj ajá ainia nu naka enentáimtikratarum.

²³ Chíkich shuarsha jiniumiá júsatniua áitkiasrum uwentikratarum. Tura chikichcha ti yajauch ásarmatai anearum waitnentratarum. Tura ni pushirjsha ni tunaarjjijai maatra asamtai mujkiatniuiti.

Yúsan shiir awajeawai

²⁴⁻²⁵ Yus chikichkiiti. Ti nekaiti. In uwentikkiartin asa ni kakarmarjjijai yainmakmini-aiti tunaanum iniarchatniun. Tuma asa tunaajají máatrachu awajtamás ni ti shíirmarjín ejetamtatrum. Túrutma ti waramtikramsattarme. Ii Uuntrj Jesukrístu túrunamujají Yuska Niñki shiir awajsatniuiti tura nankaamantu enentáimtustiniaiti. Yáunchusha, yamaisha, tura tuke ashí akupin atí.

Núkete.

APUKARÍPSIS Jesukristu Juánkan paant iniaktusma

Jesukristu paant awajsamu

¹ Jú áarman Jesukristun Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asamtai Jesukristu ni suntarin akupak ashí winia paant awajtursamai. Wisha Juánkaitjai.

² Yus timia nunasha tura Jesukristu ujatkamia nunasha tura wi ísmaj nunasha ti paant aya nekasa nuna tájai. Penké wáitratsjai.

³ Jú papin áujea nu shuarsha tura núnisan juna ántana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

Juan siati péprunam Yus-shuar írunun juna áateawai

⁴ Wi, Juan, Asia nunkanam siati (7) péprunam Yus-shuar írunun ju papin áateajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyai. Núnisan yamaisha pujawai. Tura nuke winittiwai. Akupin pujutainium Yusa Wakanj siati naka pujurainia nusha shiir yainmakarti.

⁵ Núnisan Jesukristu shiir yainmakarti. Nii tana nu imiá nekasaiti. Niisha emka jakamunmaya yamaram iwiaakmajai nantakniuiti. Tura ju nunkanmaya akupniu Uuntriní. In anenma asa ni numpejai ii tunaarin nijiatramkaitji.

⁶ Túrutma akupin awajtamsaitji. Tura ni Aparí Yúsnan pujursarat tusa anaitiamkaitji. Nii ti kakaram asa tuke shiir awajnasti. Núnisan atí.

⁷ Wats, Kristuka yurañmijjai winittiwai. Tura íjiuarmia nusha tura ashí shuarsha nuna wáinkíratatui. Túrawar ashí sapijmiainiak útiartatui. Maa, nekas núnis átatui.

⁸ Kristuka “yámankamtaiknumiá amúamunmasha ashí nérenniuitjai, tawai. Wisha A rétranmaya Y rétranam ashí retra áintsaitjai” tawai ti kakaram Uunt Kristu. Tuke yaunchu pujuyai. Núnisan yamaisha pujawai. Tura nuke ataksha winittiwai.

Kristu ti shiir wincha ajasun Juan wainkiamiania nu

⁹ Wi Juan atumjai métek waitia asan atumí yachintjai. Núnisan nayaimpiniam, Yus akupeana nuí, métek jeattaji. Tura ksuntrar nákastinian Jesukristu mái métek súrampi. Yus-Chichamnasha tura Jesukristu timiancha étsereakun nayaqantsa ajapén atentanunam Pátmus nunkanam sepunam apujsamua núnisan pujumjai.

¹⁰ Tumai tumin tsawantaji Yusa Wakanj pujurtakui winia úkuruinj kakantar untsunman antukmajai. Kachu umpúama núnis ti kakarmauyai.

¹¹ Tura turutmiái “Wiítjai. Yámankamtaiknumiá amúamunam ashí nérenniuitjai. Wisha A rétranmaya Y rétranam ashí retra áintsaitjai, timiai. Tuma asamtai wáinmena ju, papinium áaram Asia nunkanam siati péprunam Yus-shuar írunna nuí akuptukarta. Ju peprunam akupkarta: Ipisiusha, Ismirnasha, Pírkamusha, Tiatirasha, Sártissha, Piratírpiasha, tura Rautiséasha.” Tu turutmiái.

¹² Túrutkui yaki túruta tusan apajasan íkman siati shirikip ikiutain kurijjai najanamun wainkiamjai.

¹³ Tura nuí ajapén Aents Ajasua núninan wajan wáinkiamjai. Tura pushirísha naweja timiai nuntuaru entsaruyi. Emenmamqesha kúrinia netsepnun emenmamauyi.

¹⁴ Tura ni muuke intiashísha murikiu uré nijiamua núnisan tura mícha núnisan ti puju chírauyi. Tura ni jiiísha jiya núniskeyi.

¹⁵ Ni nawesha ti wincha asa jiru yanikutaku jiamua áinis néwar ajarmiayi. Ni chichamesha ti kakaram asa uunt entsa téter ajá áintsauyi.

¹⁶ Ni untsuurinj siati yaan takakuyi. Tura ni weneniasha puniá áinis tsakatskat mai ere awajsamu jijnmiai. Ni yapísha etsa ti etsantuk íischammia núnisauyi.

¹⁷ Nuna wáinkian jaka áintsanak nawejen iniaarmajai. Túrusha ni untsuurí uwejen awaqrus turutmiayi, “Ashamkaip. Wiítjai. Yámankamtaiknumiá amúamunmasha tuke pujuwitjai, timiai.

¹⁸ Wikia tuke iwiaakuitjai. Jakamijai tura nantakin jákastinian tuke iwiaaku pujajai. Jákatniuncha tura jaka pujuinia nuna yawirín takakkun nérenniuitjai, timiai.

¹⁹ Tuma asamtai wáinkiamna jusha, yamá wáinmena nusha, tura ukunam átatna nusha aartá, timiai.

²⁰ Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írunun nakumeawai. Tura winia untsuurujinj siati yaa wainkiam nu, siati péprunmaya Yus-shuaran wáinniun nakumenawai, turutmiái.

2

Ipsiunam chícham áatramu

¹ Nuyá turutmiai 'Ipsiunmaya Yús-shuaran wáinin ju áatratá: Siatí yaan untsuurnum takakna nu tura núnisanj siati shirikip-ikiutai kúrinman ajapén atenta wekáa nu, tawai:

² "Ashí ame túram nuna nékajai. Ti kakaram takaakum katsunteamuncha nékajai. Yajauch shuar nawamtsuk awemaitrume. Shuar "Yús akatramuitjai" ántar tuinia nu nekaamarme. Wáitrinia nusha nékaitme.

³ Ti wáitiatmek katsuntram yawetsuk Winia ti takartusuitme.

⁴ Túrin ámininj juna títiatjame. Yús aneakum yámankamtaik ti penker wekainiuyam núnisam túratsme.

⁵ Tuma asam ikiuknium nu enentáimpram yaunchu túriniuyam núnismek ataksha túrata. Túrachakminkia ame shirikpirmin wari jurustatjame.

⁶ Tura ju penker túriniaitme. Nikiurás shuar nakitniuitrume. Nu shuar "ayash wakeramu páchitsuk túramniaiti" tuiniakui Wisha núnisnak nakitiajai.

⁷ Kuíshtinia nu shuar Yusa Wakanj ashí Yús-shuaran timian antukti: Nupetmakunka tuke iwiaaku pujutai numi neren yúatniun tsankatkattajai. Nu numi Yús pujana nuj wajaawai." Tu áartá' turutmiai.

Ismiranam chícham áatramu

⁸ Nuyá turutmiai 'Ismiranmaya Yús-shuaran wáinin ju áatratá: Yámankamtaiknumia amúamunam tuke pujuwa nu tura núnisanj jaka nantakmia nu, tawai:

⁹ "Ashí ame túram nuna nékajai. Ti wáitiam nunasha tura kuítrinchaitema nunasha nékajai. Antsu Yusañkia ti kuítrinniuiteme. Tura shuar uunt iwianch Satanás shuari áiniayat "Israer-shuaraitjai" tuiniak yajauch áujmatramena nuna nékajai.

¹⁰ Ti wáitsattamna nu ashamkaip. Íwianch ashí nekaprimsataj tusa atumiññan sepunam enkeattawai. Nuñ tias tsawant wáitsattarme. Jáakmesha tuke Yús shiir enentáimtusakminkia tawaspan nakurin susatniua nútiksanak nekas iwiaakman tuke shiir pujustinian amastatjai.

¹¹ Kuíshtinia nu shuar Yusa Wakanj ashí Yús-shuaran timian antukti: Nupetmakuka jimirá jákatniuka waitsashtatui." Tu aartá' turutmiai.

Pirkamunam chícham áatramu

¹² Nuyá turutmiai 'Pirkamunmaya Yús-shuaran wáinin ju áatratá: Puniá áinis tsakatskat mai ere awajsamun takakna nu, tawai:

¹³ "Ashí ame túram nuna nékajai. Uunt iwianch Satanás akupea nuñ pujayatmek tuke shiir enentáimturmena nuna nékajai. Winia shiir umirtínian Ántipasan máawarmataisha Winia enentáimtursatin ishichkisha iniaitiuschamame. Nusha íwianch pujutainium pujakrumin túrunamai.

¹⁴ Túrin ámininj juna títiatjame. Atumiññia shuar yaunchu Yúsnan etserin Param yajauch jintíamun tuke emetainiawai. Niisha Israer-shuaran tuná awajsat tusa kapitían Parakan unuiniarmiayi. Nuyá Parak Yús-sutai namanken maar yúatniun Israer-shuaran jintintiamiayi. Núnisanj ti tsanirmatniun jintintiamiayi.

¹⁵ Atumiññia shuarsha Nikiurás jintíamuncha, Wi nakitiaj nuna, iniaisatniun nakitiainiawai.

¹⁶ Wats, enentáimpram iniaisata. Túrachakminkia Wi wari winin winia wenuruñya puniá jinia nujai máaniaktajai.

¹⁷ Kuíshtinia nu shuar Yusa Wakanj ashí Yús-shuaran timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naari aarma átatui. Nunasha chíkich shuarka penké nékatsañ aya achia nuke nekaattawai." Tu aartá' turutmiai.

Tiatiranam chícham áatramu

¹⁸ Nuyá turutmiai 'Tiatiranmaya Yús-shuaran wáinin ju áatratá: Yusa Uchirj jii jijijai métek keena nu tura núnisanj nawe jiru yanikutaku jiamua núnis néwar ajawa nu, tawai:

¹⁹ "Ashí ame túram nuna nékajai. Yús shiir enentáimtakum aneam nuna nékajai. Tura katsuntram penker takaamna nuna nékajai. Yáunchujai nankaamas penker túrame yamaikia.

²⁰ Túrin ámininj juna títiatjame. Nu nuwa Jesapir awematsme. "Yúsnan unuiniajai" tinia Wí shuaran ti anankenawai. Tura ti tsanirmatniuncha tura ántar-yús-sutai namanken maar yúatniun jintintiainiawai.

²¹ Niisha ni tunaarñ enentáimiar iniaisat tusan nákasuitjai. Tura nakitiawai.

²² Wátsek, sunkurmatkiakan peaknum áepsattajai. Tura chíkichcha niññai tsanirma ainia nunasha niññai métek ti wáitkiastatjai. Ni tunaarñ enentáimiar iniaisacharmatainñkia túratajai.

²³ Ni uchiríncha mantúattajai. Nujaj ashí Yus-shuar Wi nekas shuara enentáin nékaitjia nuna nekaawartatui. Atumniasha chikichik chikichik takasmajaj métek akiktatjarme.

²⁴ Tura chikich shuar Tiatiranmayatiram, nú chicham enentáimtuscharmena nu, “nekas iwianchnia yúkma” tútajya nu nékachu asakrumin atakka túratniun patatkashtatjarme.

²⁵ Tura Wi jeatsain takakrum nu emetatarum.

²⁶ Nupetmakunka Wi wakeraj nunak tuke initsuk túrana nuna untsurí nunkanam akupkatniun tsankatkattajai.

²⁷ Winia Apar tsankatrukmiá núnisnak akupkatniun tsankatkattajai. Tura nuwé najanamu jirujaj awati ijjakratniua áinis ti kakarmajaj akupkattawai.

²⁸ Yáñkuam káshik jjiinia nuna susattajai.

²⁹ Kuíshtinia nu shuar Yusa Wakanj ashí Yus-shuaran timian antukti.” Tu aartá” turutmiai.

3

Sártisnum chícham áatramu

¹ Nuyá turutmiai ‘Sártisnumiá Yus-shuaran wáinin ju áatratá: Siati Yusa Wakanj takakna nu tura núnisaj siati yaan takakna nu, tawai: “Ashí ame túram nuna nékajai. Iwiaakua áintsaj wekayatmek Wíjjainkia jákaitme.

² Shintiarta. Kajinia nu umpuim ekeemakta. Kame Yusjaj ísam péñker túrichuitme.

³ Yus-Chicham ti shiir enentáijjaj emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkunniñkia kasa núnisnak nékatsmin jeartiatjame.

⁴ Tura Sártisnum shuar ishichik pushirj wapik máacharu pujuiniawai. Nusha ti penker áiniak pushí pújun entsasar Wíjjaj wekasartatui.

⁵ Nupetmakuka pushí pújun entsartatui. Tura iwiaaku átinia nu papiniumiá ni naari áarman japirashtajai. Antsu winia Apar tura ashí nayaimpinmayá suntar ímmianum shiir áujmattsattajai.

⁶ Kuíshtinia nu shuar Yusa Wakanj ashí Yus-shuaran timian antukti.” Tu aartá,” turutmiai.

Piratírpianam chícham áatramu

⁷ Nuyá turutmiai ‘Piratírpianmayá Yus-shuaran wáinin ju áatratá: Ti shiir túrin tuke nekasan tana nu, uunt akupin Tawitia yawirj takaku asa uraimtai chikich penké epenchamniati. Tura epenmiatai chikich penké uraichminiati. Juna tawai:

⁸ “Ashí ame túram nuna nékajai. Kakarmachuitatmek winia chichamur shiir enentáimtakum Winia initieschaitme. Tuma asakmin wáitin uratjame. Nuna chikich penké epenchamniati.

⁹ Wátsek. Shuar wáitruiniak ‘Israer-shuaritjai” tuñiyat uunt iwianch Satanás-shuar áiniawai. Nu shuáran, nekas ámin aneajna nuna nekaawarat tusan amjini tikishmatkiarattajai.

¹⁰ Katsuntrata tímiaj nu, shiir umirka asakmin Wisha ti wáitsatin ashí nunkanam átatna nuyá uwentikrattajme. Nu wáitsatniujaj ashí nunkanmayá shuar nekapnasartatui.

¹¹ Wárik winittajai. Takakmena nu emetata. Akinkiatniuitmena nuna chikich shuar atantramkiaraj.

¹² Nupetmakunka winia Yusru jee tankirin awajsattajai. Tura nuyá penké jijnichartatui. Tura njin winia Yusru náarin áatrattajai. Tura winia Yusru pépruri náarincha áatrattajai. Nu pépruka nayaimpinmayá yamaram Jerusarénka Yúsumiá tara núiti. Núnisaj winia yamaram náarun njin áatrattajai.

¹³ Kuíshtinia nu shuar Yusa Wakanj ashí Yus-shuaran timian antukti.” Tu aartá,” turutmiai.

Rautiséanam chícham áatramu

¹⁴ Nuyá turutmiai ‘Rautiséanmayá Yus-shuaran wáinin ju áatratá: Wáitrusuk nekasa nunak tiniua nu tura núnisaj ashí Yus najanamun Úuntriya nu, tawai:

¹⁵ “Ashí ame túram nuna nékajai. Tura michaash míchachuitme. Núnisaj tsuérsha tsuérchaitme. Míchaitkiumsha tura tsuéraitkiumsha maak.

¹⁶ Kame míchachu tsuércha antsu aya tsuétuetak asakmin imiutkattajme.

¹⁷ Iis, “Kuíttrinuitjai, ti irumprattaj, warinkisha atsumatsjai” tame. Túrasa ashí yajauch, wáitnenmai, kuíttrincha, kusuru, tura misú iyajme.

¹⁸ Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Péñker ímprataj tusam jiniun enketai enkeeta.

¹⁹ Aneajna nuna chichareajai. Nu asantai kakaram ajasam tunaarum enentáimpram iniaisata.

²⁰ Enentáimprata. Shuar wáitiniam wajas untsumna áintsanak Wi ámin untsúajme. Winia anturtukam ame enentáimin awaintiakhminkia Wi wáintiuaattajme. Tura wayan ámijjái yurumáttajai. Tura amesha Wijjái yurumáttame.

²¹ Nupetmakuka akupin pujutainium Wijjái pujustatui. Wisha núnisnak nupetmaku asan winia Aparjái akupin pujutainium pujusuitjai.

²² Kuíshtinia nu shuar Yusa Wakanj ashí Yus-shuaran timian antukti.” Tu áartá,” turutmiai.

4

Nayaimpiniam Yúsan shiir awajenawai

¹ Nu nankaasmatai nayaimpiniam waiti uranniun wainkiamjai. Tura nuyá kakaram untsumman antukmajai. Nuik kachujái métek kakaram chichartukma nu turutmiai “Juí yakí wakatá. Ukunam átatna nuna iniaktustatjame” turutmiai.

² Nu chichamaik Yusa Wakanj akantukmiai. Túrutantai nayaimpiniam akupin pujutainium pujan wainkiamjai.

³ Niisha jaspi kayasha tura kurnarínia kayasha nujái métek ti wínchauyi. Akupin pujutain tuntiak téntakuyi. Nusha ismirarta kayajái métekeyi.

⁴ Chíkich paintikuatru (24) akupin pujutain nu pujutain téntakarun wainkiamjai. Tura paintikuatru uunt púju entsarainian tura kurin etsenkrakainian, nuj pujuinian wainkiamjai.

⁵ Akuptainiumiá peemsha ipiamtasha untsummasha jíiniarmai. Tura nu pujutainium naka siati shirikip kearmai. Nusha siati Yusa Wakanjnti.

⁶ Núnisanu nu pujutainium naka nayaantsa áanin ti saar amai.

Nu pujutainium wakenmaanisha niisháa tañku kuaru téntakar áarmiayi. Ukurjñsha tura eemsha jíi irunmiai.

⁷ Emka tañku úunt yawáa áanniuyi. Chíkichka turu uchichia áanniuyi. Tura chikichcha shuara yapia áanniuyi. Tura chíkichka churuwia nanamua áanniuyi.

⁸ Nusha sais nanamtin áрмаi. Tura jíisha ti irunainiak ashí wainmarmai. Káshisha tsawaisha tuke iniaitsuk juna tiniu armai:

“Ti nekas péñkeraiti Uunt Yus. Ashí nankaamas kakarmaiti. Tuke yaunchu pujuyayi. Núnisanu yamaisha pujawai. Tura ataksha juke winittiwai” tiniu armai.

⁹ Tura uunt pujutainium pujana nu tuke iwiaaku pujú asamtai nu tanku ti shiir awajsar yúmiñkiak pujuriarmai.

¹⁰ Túruiniakui paintikuatru uunt tuke iwiaaku pujun tikishmatainiak ni etsenkrutairin naka áepruiniak tuiniawai:

¹¹ “Úuntá, ii Yúsrinme. Tuke shiir awajmainme. Ashí nankaamas kakarmaitme. Amek ashí irunna nu najanaitme. Tura aya wakerakum najanamame. Ame wakerakmin irunainiwai” tuiniawai.

5

Murikkia papin urakminiaiti

¹ Nuyá akupin pujutainium pujuya nuna untsuurin papí penuarma áanniun wainkiamjai. Nu papisha initiaanisha tura pátatkesha áarmauyi. Tura urakchamnia atí tusa siati anujtukmajai kaki peekmauyi.

² Tura nayaimpinmaya suntar ti kakarma nu, ti kakantar inintran wainkiamjai. Niisha tímiai “¿Ya akupniuk ju papin kaki anujkamun jaak urakminiait?”

³ Tura nayaimpinmayasha nunkanmayasha tura jakamunmayasha chikichkisha nu papin urakmin atsumiyi. Áujtsuk íistinnishasha tujinkiarmai. Tímanu akupin atsumai.

⁴ Nu papin uraktincha tura áujsatniusha, kame íistincha atsakuí ti úutmiajai.

⁵ Nuyá chikichik uunt turutmiai “Ti úutíp. Israer-shuarnumiá Úunt-yawá, Jutá weeá awai. Niisha uunt akupin Tawit weeaiti. Nupetmaku asa nu papí siati anujtukman jaak urakminiaiti.”

⁶ Nuyá uunt pujutaiya nuj tura kuaru tañkunam ajapén tura úuntnum ajapén Murik wajan wainkiamjai. Maamua áintsanketiat iwiaakuyi. Kachurisha siátiyi. Ni jíisha siátiyi. Nusha Yusa Wakanj siati ashí nunkanam akupramua nuuyi.

⁷ Nu Murik we nekas uunt Akupniun untsuurinian nu papin achikmiayi.

⁸ Tura papin achikmatai kuaru tañkusha tura paintikuatru uunt arma nusha Murikiun tikishmatrarmiyi. Ashí uunt arpa tuntuítaiin takaku armai. Tura ashí kuñkuin enketain kuri najanamun takaku armai. Nu kuñkuin Yus-shuar áujsamuiti.

⁹ Ju yamaram kantanha kantampriarmai:

“Amek imiá nankaamas akupniuitme. Amek papí achikiam anujtukmarj jáakminiaitme. Yus-sutai namankea áinis mantamna asam túramniaitme. Ashí nunkanmaya shuarnumiasha Yusna árat tusam ame numpemjaj in sumakmiame.

¹⁰ Turam akupin awajkartusuitme tura núnisan ii Yúsriniun pujurin awajkartusuitme. Tuma asakmin akupin ajaras jü nunkanam akupkattaji.” Tu kantamainiawai.

¹¹ Tura untsurj nayaimpinmaya suntar uunt pujutaincha tanquncha tura úuntnasha énekawarun wainkiamjai. Nusha nekapmarchamnia ti untsurj armia nu

¹² kakantar tiarmai:

“Murik mantamnamia nu akupin ajaras ashí kakarmancha, kuítniasha, nekaatniuncha Nínki achikminiati. Tura nupetmaku asamtai yuminsar Nin ti shiir awajsatin áiniawai.” Tu tiarmai.

¹³ Núnisan ashí Yus najanamu, nayaimpiniam írunna nusha, nunkanam írunna nusha, nunká inít írunna nusha, nayaantsanam írunna nusha, tuínian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

¹⁴ Tura kuaru tanqusha “Tuke núnisan ati” tiarmai. Tura paintikuaru uuntka nekas tuke iwiaku pujá nuna tikishmatar shiir awajsarmai.

6

Murikkia siati anujtukman jáakmai

¹ Wi iyakui Murikkia chikichik anujtukman jáakmai. Túramtai chikichik tanqu ipiamtajaj métek kakantar untsunum antukmajai. “Winim íitiá” turutmiai.

² Túrutkui kaway pújun wainkiamjai. Nuñ ekeemia nu tishimkiun takakuyi. Akuptai tawaspasha susamuyi. Tura tuke nupetmaktinian jíinkimiai.

³ Nuyá Murik anujtukma jíimiaran jáakmatai tanqu jíimiaru nu “Winim íitiá” turutmiai.

⁴ Túrutkui chikich kawai kapaakun wainkiamjai. Nuñ ekeemia nuna puniá úuntan susamuyi. Nusha shiir pujuscharat tusa ashí jü nunkanmaya shuaran máanaimtikiatniun akupkamuyi.

⁵ Nuyá Murik anujtukma menaintiun jáakmatai tanqu menaintiua nu “Winim íitiá” turutmiai. Túrutkui kaway mukusan wainkiamjai. Nuñ ekeemia nusha kijin nekapmatain takakuyi.

⁶ Tura kuaru tanqu ajapénia chichaamun antukmajai. “Tsawant takamtsuk takaakmasha apatkuka penké ishichik sumakmin átatme. Tura núnisan machasha nijiamchisha amuukacharat tusam pénger wáinkiaata.” Tu timiai.

⁷ Nuyá Murik anujtukma kuátrun jáakmatai tanqu kuarua nu “Winim íitiá” turutmiai.

⁸ Túrutkui kaway yanqun wainkiamjai. Nuñ ekeemia nusha Jákatín náartiniuyi. Tura nuna úkurin Jatai nemark winimiai. Nusha ashí nunkanmaya shuar kuaru akankamunmaya chikichkin máatniun akupkarmauyi. Nusha mesetjaisa tsukajajaisa sunkurjajaisa tura yajasmajaj máawarmai.

⁹ Nuyá Murik anujtukma séngkun jáakmatai Yus-sutai kunquín ekemtai wakenmaanji íismajai. Túran Yus-Chichaman etserainiakui máawarma wakanin wainkiamjai.

¹⁰ Nusha kakantar untsunainiak tiarmai “Uuntá, ti pénger asam támena nu umiatsmek. ¿Urutiak nunká pujuinia nú shuar ii mantamnamunam yapajmiátruktam?” tiarmai.

¹¹ Tuíniakui pushí pújun susar tiarmai “Chikichcha Krístunun etserainiakui mantamnatín áiniawai. Nu náakakrum ishichik ayampratarum” tiarmai.

¹² Nuyásha Murik anujtukma saísan jáakmatai ti úurun wainkiamjai. Tsawai-nantusha itirchat ajaras áintsan mukusa ajasmai. Kashí-nantusha numpá áintsan ajasmai.

¹³ Tura yaasha wampú nere nase umpuin ti majua áintsan kákekarmai.

¹⁴ Nayaimpisha papí penuara júamua áintsan menkakamai. Tura naintcha yajá apujnasarmai. Tura nunkasha nayaantsanam ajapén atentrainia nusha yajá apujnasarmai.

¹⁵ Tura jü nunkanam akupin ainia nusha náinnium wear kayá wáanam uumkarmai. Nijjajaisa ashí shuar, uuntcha, kuítriniusha, suntara kapitíántrisha, ashí kakaram ainia nusha, tura takarniusha ankant ainia nuñ náinnium wearmai.

¹⁶⁻¹⁷ Túrawar náinnisha kayancha tiarmai “Asutniátin tsawant jeayi. ¿Yaki aun katsuntrat? Nu asamtai saanakim in yutukratata. Túrarum Murik ti asutiámatay nuyásha tura akupin pujana nuyásha uukratkatá” tiarmai.

7

¹ Nu naŋkaasmatai kuaru nayaimpinmaya suntuar, nunkaa kuaru yantamén wajan wainkiamjai. Nusha kuaru nase kukarsha, nayaantsanmasha tura kampunniunmasha nasenkacharat tusar wajariarmai.

² Kame kukarsha tura nayaantsanmasha yajauch awajsatniun akupkamu armai. Tura chíkich suntuarnasha nantu tátainmaaniá winian wainkiamjai. Tuke iwiaaku Yusa anujtutairin takakaui. Nusha kuaru suntuaran kakantar untsuak tímiai,

³ “Ti Yusrj takarj ainia nu nijaínium árar anujtatsriniŋ kukarsha, nayaantsasha, tura kampunniusha nasejaj yajauch awajsaipap” tímiai.

⁴ Tura tímiajini untsurj aara anujtukman antukmajai. Ashí Israer-shuar tuse (12) shuar weeá ainia nuyá chikichik siantu kuarenta kuaru mir (144.000) armai.

⁵ Jutá weeanmaya tuse mir (12.000) anujtukma armai. Rupin weeanmayasha tuse mir anujtukma armai. Kat weeanmayasha tuse mir anujtukma armai.

⁶ Aser weeanmayasha tuse mir anujtukma armai. Niptari weeanmayasha tuse mir anujtukma armai. Manasé weeanmayasha tuse mir anujtukma armai.

⁷ Semeuŋ weeanmayasha tuse mir anujtukma armai. Riwi weeanmayasha tuse mir anujtukma armai. Ísakar weeanmayasha tuse mir anujtukma armai.

⁸ Sapuruŋ weeanmayasha tuse mir anujtukma armai. Jusé weeanmayasha tuse mir anujtukma armai. Piŋjamjŋ weeanmayasha tuse mir anujtukma armai.

Ti untsurj shuar pújun entsararu

⁹ Nuyá ti untsurj shuaran wainkiamjai. Ashí nunkanmaya nusháa shuaraim iruntraru ásar nekapmarchamnia armai. Tura nusha uunt akupin pujutainium tura Murikniun naka wajaarmai. Tintiuki nukea áaniun takaku armai. Tura ashí pújun entsaru armai.

¹⁰ Ashí kakantar untsumainiak tiarmai:

“Ti Yusrj uunt akupin pujutainium eketna au tura Muriksha imia Niŋki Uwemtikin áiniawai” tiarmai.

¹¹ Tura nayaimpinmaya suntuarsha uunt akupin pujutaincha, kuaru taŋkuncha, tura úntnasha téntatkar armia nu piniakum nunká tepersar Yúsan shiir awajsar

¹² tiarmai
“Nekasaiti. Tuke iniaitsuk ii Yusrj ti shiir awajsatniuiti. Niŋki ti neka, ti kakaram, ti akupin, tura ti penker asantai tuke yuminsatniuiti. Núnisan atí.”

¹³ Nuyá chikichik uunt inintsamai “Pújun entsaru ainia jusha zy ainia tura tuyá ainia?”

¹⁴ Túrutkui “Uuntá, amek nékame” tímiajai.

Tutai nii túrutmiai “Ju shuar ti waitsaru áiniawai. Túrawar Murikiu numpéjaj ni pushiri nijiamawar puju awajсар áiniawai.

¹⁵ Nuna túrawaru ásar yamaikia Yusaj naka pujusar tsawajsha káshisha Yúsnan ni Jeeŋ takainiawai. Tura akupin pujutainium eketna au tuke wainkiartatui.

¹⁶ Yamaikia tsukajajsha kitiakajajsha wáitsachartatui. Tura etsasha sukuiniak yajauch awajsaichartatui.

¹⁷ Murik, akupin pujutainium naka wajana au, ni murikrin wáiniuk áyureak ti penker púkuni entsa waana nuj apusartatui. Tura Yus ni neajkincha ukujtiurartatui.” Tu túrutmiai.

8

Anujtukma siati nu jaakma tura kunkuin ekeemataijaj túrunamu

¹ Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai.

² Nuyá siati suntuar Yusaj naka wajainia nuna wainkiamjai. Nusha siati kachun susamu armai.

³ Nuyá chíkich suntuar kunkuin enketain kurijaj najanamun itiamai. Tura Yus-sútainium ayamas wajasmatai núkap kunkuin sunasmai. Nu kunkuin ashí Yus-shuar áujsamujaj métek kunkuin ekeematainium ekeemaktiniuyi. Nu ekeematai kurijaj najanamuyi tura uunt akupin pujutainium naka pujumai.

⁴ Tura suntuar ekeemakmatai kunkuinia mukuintiurj Yus-shuar áujsamujaj métek Yúsan amainkiamai.

⁵ Nuyá nu kunkuin enketain suntuar achik ekeematainmaya ji kapaan káirin áimiak ju nunkanam ukaamai. Túramtai ipiamtasha untsummasha, peemsha, tura uusha armai.

Kachu umpuarma

⁶ Nuyá siati suntuar kachun takakainia nu umpuarta tusar iwianararmai.

⁷ Emka suntuar kachun umpuarmatai micha kákekamai. Nunasha ji numpajaj pachimpramuncha nunkanam ajapawarmai. Túmakui menaintiu nakakma jeeán numincha tura ashí írúnna nuj ekeemakmai. Tura ashí nunkanam chírichrin takamtsuk ekeemakmai.

⁸ Nuyá suntar jímíara nu kachun umpuarmatai uunt naintia áanin kean nayaantsanam ajunmai. Túramtai menaintiu nakakma jeeá nayaants numpa ajasmai.

⁹ Núnisañ menaint jeeá nayaantsanam matsatainia jákarmai. Tura menaint jeeá uunt kanua nu emesnararmai.

¹⁰ Nuyá suntar menaintiua nu kachun umpuarmatai ti uunt yaa nayaimpinmaya kapaa kákekamai. Tura entsasha tura púkununmasha menaint nakakam jeeánum kákekamai.

¹¹ Nu yaasha Yapá-numi náartiniuyi. Tura menaintiu nakakam jeeá entsa yapá ajasarmai. Túrunamtai ti untsurí shuar nu entsa yapá ajasmájai jákarmai.

¹² Nuyá suntar kuarua nu kachun umpuarmatai menaintiu nakakam jeeá tsawai-nantusha kashí-nantusha tura yaasha emesnarar ajapén tee ajasarmai. Túrunawar tsawaijsha káshisha menaintiu nakakam jeeánum tsáapnircharmai.

¹³ Nuyá chíkich suntar nayaimpiniam nanamun wainkiamjai. Nusha kakantar untsumuk timiai “Maa, chíkich menaintiu suntar umpuiniakui nunkanam pujuinia nu ti wáitsartatui.” Tu timiai.

9

¹ Nuyá suntar senkua nu, kachun umpuarmatai yaan nayaimpinmaya nunká kákeran wainkiamjai. Tura nu yaan tunáa shuar jákaru matsamtai yawirín susamuyi.

² Tura uraimtai nu nápkatkachu wáanmaya ti mukuint jinmiai uunt jiniumiá áintsañ. Tura etsancha tee awajsamai, yuranmincha tee awajsamai.

³ Nuyá nu mukuintiumaya manchi jíntrar nunká ti yujaarmai. Tura ju nunkanmaya titínkia áinis najamin ajastinian susamu armai.

⁴ Chíríchrincha ashí arakmancha ashí numincha yajauch awajsatin suritkiamuyi. Antsu áyatik shuar nijiajnium Yusa naari áarar anujtukchamunak yajauch awajsatin armai.

⁵ Túrasha ajaksuk senku (5) nántutin wáitkiasin susamu armai. Kame titin, shuaran ijiú, najawea núnis najawéatin susamu armai.

⁶ Nuí shuar wari jakataj tuínayatán jákachartatui. Ti wakeruiniayatán jákatniun tujinkiar-tatui.

⁷ Manchisha ísam mesetnum weena nu kawaiya áinis armai. Kurí tawaspa áinis et-senkraku armai. Yapjsha shuarna áinis armai.

⁸ Intiashísha nuwana núnis armai. Najsha úunt yawá najya núnis armai.

⁹ Netsepén namaka saepea áinis jiru péeramu armai. Tura nanamenaksha kaway karu japiiniak mesetnum tsékeena núnisañ téter ajarmai.

¹⁰ Ujukésha titínki ujukeá áinis asa janí ajakin armai. Nujai tuke senku nantu yujarsar shuaran ijuar wáitkiasin armai.

¹¹ Ni uuntrísha nápkatkachu waa uraimia nuyáiti. Nusha Israer-chichamjai Apatún tutainti. Tura Kriaku-chichamjainkia Apuriún tutainti. Nuka Yajauch Awajkartin tawai.

¹² Jujai emka wáitsatin nankaamasai. Túrasha tuke jímíar taasai.

¹³ Nuyá suntar saisa nu kachun umpuarmatai chichaman antukmajai. Yusaj naka kunkuin ekeemaka Yus-sutai kurimpramu amai. Tura ni kuaru yantame kachu jinmiai. Tura nuyá chichaak

¹⁴ suntar kachu takakun saisa nuna timiai “Kuaru suntar Eupratis kanusá pujuinia nu atiram akupkarta.”

¹⁵ Túramtai nu kuaru suntar wear menaintiu nakakam untsurí shuaran maatai tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atáatin ikiusma armai.

¹⁶ Tura suntarnasha kawainium eketainian wainkiamjai. Tura timiá untsurí nekapmarchamnia asamtai aya númirurín antukmajai. Nusha jimíará siañtu miyun (200.000.000) armai.

¹⁷ Tura íimiamunam suntarnasha kawaincha júnisan wainkiamjai: Eketainiaka netsep-num jirun entsaru armai. Nusha kapaaaku wiñkia tura yanjú armai. Tura kawaijsha úunt yawáa muuke áinin armai. Tura ni weneyasha jisha, mukuintiusha, asuprisha ti tsuér keá nu jiniarmai.

¹⁸ Nu menaintiu ti yajauch wáitsamujai menaintiu nakakam shuar untsurí jákarmai. Jijiaisha, mukuintiujaisha, asuprijaisha jákarmai.

¹⁹ Nujai nu kaway ni wenejai shuáran wáitkiasarmai. Tura ni ujuké napí múukeya áinin áрмаi. Nujajsha shuaran wáitkiasarmai.

²⁰ Tura nujajsha jákacharmia nú shuar tuke tunáa túratniun iniaisacharmai. Tura yajauch wakanniasha tura ántar-yusnasha tikishmatratniun iniaisacharmai. Nu ántar-yus kurijjaisha, kuitjaisha, jiru yanikutakujaisha, kayajajsha, numijjaisha najanamú ásar wainmaktinniasha, antuktinniasha, tura wekasatniuncha tujintiainiawai.

²¹ Núnisaṅ mankartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

10

Papichin suntar takusmia nu

¹ Nuyá chikich kakaram suntar nayaimpinmaya táarun wainkiamjai. Nusha yuraṅkim amúamu tura múuknum tuntiak téntakmauyi. Yapisha etsajaj métek winchaui. Tura kujapéscha ji keá áintsankeyi.

² Nusha papin urak takakauyi. Tura imiá uunt asamtai ni nawé untsuurnumanj nayaantsanam tura menarinj kukar tarimias wajasmai.

³ Tura uunt yawá kakar shiniak chicháa áinis ti kakaram untsumkamai. Nujaj siati (7) ipiamtasha chichasarmai.

⁴ Nii chichasarmatai ni chichamen áartiniujai tura nayaimpinmaya chichartak “Áaráip, túrutmiai. Juḷka nekanashti” túrutmiai.

⁵ Tura nuyá, suntar nayaantsanmasha tura kukarsha tarimias wajama nu ni uweje untsuurin nayaimpinmaanj takuimiai.

⁶⁻⁷ Tura timiai “Peṅké ishichik ajasai. Suntar siatia nu umpúakuinjia Yus ashí yaunchu enentáimpramia nu uminkiattawai. Emka ujatsuk ukunam ni shuarin Yúsna etserniua nuna ujakmiayi.” Tu timiai. Nuyá chichaak:

“Yus tuke iwiaaku pujawai. Tura imiá kakaram asa nayaimpincha, nunḷkancha, nayaantsancha, tura ashí nuj íranna nunasha najanaiti” timiai.

⁸ Nayaimpinmaya “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsuurinj papin urak takakna nu achiktá” turutmiai.

⁹ Nuyá túrutkui werin papichin seamjai.

Tura surak turutmiai “Papá. Yuátá. Tura yúamka ti yumin átatui. Tura antsu wakeminkia yapamprattame” túrutmiai.

¹⁰ Nuyá papichin suntar numia jukin yuamjai. Tura nii turutmia núnisaṅ wenuruinjia ti yumin nekapramjai. Tura antsu yuan wakeruinjia yapampramjai.

¹¹ Tura nuyá turutiarmai “Waketkim ataksha ashí nunḷkanmaya shuaran tura ni kapi-tiántrinja Yus tana nu ujakartiainitme.” Tu túrutmiai.

11

Jimiará shuar Yusaiaḷa akupkamu

¹ Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram namaṅ-maa-Yus-sutaisha nekapmartá. Tura nuj Yúsna shiir awajeena nusha nekapmartá.

² Antsu jeá áarinjia yajaya shuar susamu asamtai nekapmatsuk ikiuktiá. Nu shuar ti shiir péprun Jerusareṅkan kuarentitús (42) nantu nuj akupeenak mash yajauch awajsartatui.

³ Túruiniakui Wikia Wii-shuaran jímieran akatran akupkattajai. Nusha chikichik mir jimiará siaṅtu sesenta (1.260) tsawant pujusar Winian etserkartatui. Nuka maintiu uwi nanḷkaamasaiti. Úutkur-entsatai pushin entsaru ártatui.” Tu turutiarmai.

⁴ Nu jímier shuarsha nayaimpiniam nakumkamu áiniawai. Uriwiu numisha jímier tura shirikip ekeemataisha jímier nayaimpiniam awai. Nusha ju nunḷka Uuntri Yusaj wajainiak, jímier akatramua nú shuaran nakumainiawai.

⁵ Shuar nin yajauch awajsataj tutai ni weneniá jinia jijiiki nemasrj ashí áesatniuiti. Núnisaṅ nin yajauch awajsatniun wakera nuka jákartatui.

⁶ Nu aentska Yúsna áujmatainiak yumi yutukajp titinian kakarman takakainiawai. Núnisaṅ entsancha numpa awajsatniun kakarman takakainiawai. Tura ashí yajauchia nujaj aentsun wáitkiasinian takakainiawai. Nuna ashí ni wakeruinia nuj páchitsuk túramin áiniawai.

⁷ Tura ni takatrin unikiarmatai Ti Kajen Yajasma nanḷkatkachu waṅṅnmaya jijnia nu mesetan najata nupetak máawartatui.

⁸ Tura iwiarnatsuk ni ayashí uunt pepru jintijn ajapén tepeartatui. Nu péprunmasha ii Uuntri Jesukristuncha máawarmiayi. Nu péprunmaya shuar tuke tunaan túrin ásarmatai Ejiptu tuiniak tura núnisaṅ Sutuma tuiniak nu péprun páchiiniawai.

⁹ Tura maintiu tsawant nuyá nanḷkaamas ashí nunḷkanmaya shuar jaka tepan íisar iwiarnascharti tiártatui.

¹⁰ Nu jákarmatai ashí nunkanam pujuinia nú shuar ni jakamun ti wararainiak mai sunai ajartatui. Kame nu jimiará aents Yúsnan áujmatenak ashí shuaran wáitkiasaru ásar matai ti warasarmai.

¹¹ Nuyá menaintiú tsawant nuyá nankaamas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashamkarmai.

¹² Nuyá nu nantakiaru nayaimpinmaya kakaram untsumman antukarmai: “Jui yaki wakatarum.” Tu untsummiai. Tutaí ashí ni nemasrj íimiainiajn yurankim amuam nayaimpiniam wákarmai.

¹³ Túmainiaj ti úurkamtai tias nakakam jeeá pepru saanakmiai. Tura siati mir (7.000) shuar jákarmai nu uujaj. Chíkichkia sapijmiainiak Yus nayaimpiniam pujana nuna shiir awajsarmai.

¹⁴ Jímiar wáitsatin nankaamasai. Chikichik ajasua nu túrunatin ishichik ajasai.

Suntar siatia nu kachun umpuarmai

¹⁵ Nuyá suntar siatia nu, kachun umpuarmatai chícham kakaram chichainian nayaimpinmayan antunkamai. Juna túmiayi:

“Yamaikia ii Uuntrj Yus tura ni Anaikiamu Kristu ashí shuaran akupin ajasaraí. Niisha tuke amutsuk akupkartatui.”

¹⁶ Nuyá paintikuatru uuntka akupin pujutainium Yusaj naka pujuarmia nu piniakum tepersar Yúsan shiir awajenak tiarmai:

¹⁷ “Uunt Yusá, ti kakaram asam Ámijjaj tujinkiatin atsawai. Yáunchusha, yamaisha, tura tuke amuutsuk iwiaaku pujuwitme. Ame ti kakarmarmijjaj nekas akupkatin juarme yamaikia. Tuma asakmin yumiñsajme, tiarmai.

¹⁸ Ashí shuar kajertamkaru ajn yamaikia amesha kajerkatin tsawant jeayi. Jákarusha iniantkim ni túramurj íisartatme. Turam amée shuarka shiir etserturmakua nusha, tura Aminiak enentáimturmasarua nusha, tura Ámin shiir awajtamsarua nusha ashí mash ti shiira nuna súakum akiktatme. Antsu ju nunkan emesniuka ashí emesratniunam akupkattame.” Tu tiarmai.

¹⁹ Túniakui Yusa Uunt Jee nayaimpiniam ana nu uranmiatai wakenmaanj Chícham Aarma Chumpitai paant amai. Túrunamtai peemsha, ipiamtasha, cháarpisha, uusha amai tura michasha ti kakekamai.

12

Nuwasha tura Ti Kajen Yajasmasha

¹ Nuyá nakumkamu ti enentáimpramnia nayaimpiniam wantinkiamai. Nuwá etsajaj penuarma wantinkiamai. Nawesha nantunam ekeemai. Tura múuknum tuse yaan etsenkrakuyi.

² Nu nuwá ajamtin asa jurertaj tusa wáitiak ti kakantar uutmiai.

³ Tumaí ataksha ti enentáimpramnia nayaimpiniam wantinkiamai. Ti Kajen Yajasma kapaaku wantinkiamai. Muukeshsa siati asa siati akuptai tawaspan etsenkraku áрмаi. Tura kachurjisha tíasaui.

⁴ Menaintiu nakakam jeeán yaan ni ujukéjaj japiki akakermai. Tura nunká utsamai. Nu Ti Kajen Yajasma nu nuwá jatema nuí wajasmai. Júrer mataik yuruataj tusa wajattsamai.

⁵ Tura nuwasha áishman kan jurermai. Nu uchi uunt ajas ashí nunkanam ti kakaram akupkatin asa, nu uchi akupin pujutainium Yus pujana nuí junakmiai.

⁶ Tura núwaka atsamunam pisarmai. Nuí pujustinian Yus iwiarturmai. Tura chikichik mir jimiará siañtu sesenta (1.260) tsawant ayurnat tusa akupkamai. Nuka menaintiu uwi nankaamasaiti.

⁷ Nuyá nayaimpiniam meset amai. Nayaimpinmaya suntara kapitiantrj Mikiar ni suntarjijaj Ti Kajen Yajasmajaj máanaikiarmai. Ti Kajen Yajasmasha ni suntarjijaj ti máanaikiarsha

⁸ nupetmakcharmai. Túramtai nayaimpinmaya jiki akupkamuyi.

⁹ Núnisañ Ti Kajen Yajasma ashí ni suntarjijaj nunká akupnakmai. Nu Yajasmasha iwianchi kapitiantrj Satanás tutainti. Yáunchuya-napiiti niisha. Ashí nunkanmaya shuáran ananñiuti.

¹⁰ Nuyá nayaimpinmaya kakaram untsumman antukmajai. Tura timiai:

“Uunt iwianch ii yachin yajauch áujmatin jiki akupkamu samtai yamaikia ii Yusrj uwentikratniusha tura ni kakarmarjn iniakmastincha tura akupkatniusha jeayi. Anaikiamu Kristusha ashí akupin ajastincha jeayi. Tura uunt iwianch ii yachin tsawajsha káshisha iniaitsuk Yusaj yajauch áujmatniua nuna

11 *Íksan* ii yachj nupetmakarai. Yus-susamu murikiu numpea áinis Jesukrístu numpejai nupetmakarai. Niisha jákatniuitkiusha surimiatsuk nekas-chichaman páchitsuk etserkarmai. Nujajsha uunt iwianchin nupetkarmai.

12 Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmaratai, maa, waitnentajrume. Ni tsawantrj ishichik ajatesman nekáa ti kajekuiti." Tu tímiai.

13 Nuyá Ti Kajen Yajasma nunká ajapna nuwá áishmañkan jurerma nuna áintramai.

14 Turakui nuwan uunt nanapen churuwia nanapea áinis sunasmai. Nujaj nanamuk yáunchuya-napiya pisar atsamunam wemai. Tura ni ayuratniunam menaintiu uwi nuyá sais nantu pujusmai.

15 Nuyá nu napi ni weneya entsá jiki nujankrumamai nuwan ajekrataj tusa.

16 Túrasha nunka nuwan yayak nakaak nu entsan mash ukuyámai.

17-18 Túramtai nuwan ti kajerak ni weea chikich írunka nujaj máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakui, niijjai máaniaktaj tawai.

13

Nuyá Yajasma jímíara nu

1 Nuyá nayaantsa káanmatkarjñ wajasan nayaantsanmayá Yajasmañ jiniun wainkiamjai. Muukeshá siátitiat kachurj tias tura akuptai tawaspasha tias armai. Ashí muuken Yúsan yajauch chicharin tu áarmauyi.

2 Nu j wáinkiamaj nu Yajasma nekas uunt yawáa áinniuitiat nawenka chay nawea áinniuyi. Weneshá nekas kajen yawáa áinniuyi. Tura Ti Kajen Yajasma Entsaya Yajasmañ ni kakarmarjñcha tura ni akupkatniurjñcha susamai nujaj ti kakaram akupkati tusa.

3 Entsaya Yajasma muuké chikichkin jakamnia awatmian wainkiamjai. Túrasha penker awajnasmai. Túramtai ashí nunkanmayá shuar nuna ísar ti enentáimturar nemarsarmai.

4 Túrawar nin tikishmatrar shiir awajsar "¿Yaki jujajsha jeá. Imiá kakaram asamtai yaki niijjai máanaikminiat?" tiarmai. Tura Ti Kajen Yajasma ni kakarmarjñ Entsaya Yajasmañ susa asamtai ashí shuar nincha tikishmatrarmai.

5 Núnisan nu Entsaya Yajasma waantu enentáimtumak Yúsan yajauch chicharkatniusha tsankatnakmai. Tura kuarentitús (42) nantutin kakaram akupkatniun sunasmai.

6 Núnisan túrak Yúsan yajauch áujmatuk ni náarjñcha ni jeencha tura ashí ni shuarj nayaimpiniam pujuinia nunausha katsekkarmai.

7 Tura Yusna ainia nujaj mesetan najana nupetkatniun tsankatnakmai. Tura ashí nunkanmayá shuaran akupkatniun tsankatnakmai.

8 Túramtai ashí shuar tuke iwiaaku átinia nu papinium ni naari yámankamtaiknumiá anujkamu atsuarma nuka nu Yajasmañ tikishmatrarmai. Nu papincha Murik jaka nantakmia nu takakui.

9 Shuar juna ántakka enentáimprati:

10 "Shuaran emetá juinia nusha emetnattawai.

Núnisan shuaran nanjijaj mainia nusha nanjijaj mantamnattawai."

Tuma asamtai Yajasma mesetan najanamtai Yus-shuar Yus iisti tusar tuke enentáimtusar katsuntar pujustin áiniawai.

11 Nuyá chikich Yajasmañ kukariá wáakun wainkiamjai. Nusha murikiu áanin jimíará kachurtiniuyi. Tura Ti Kajen Yajasma áinis kakaram chichaakuyi.

12 Niisha Entsaya Yajasma kakarmarjñ súam akupniuyi. Tura ashí nunkanmayá shuaran "Entsaya Yajasma penké jaa tsuarma nu, shiir awajnasti" tímiai.

13 Núnisan shuarí túrachminian ti turin asa ashí shuar íimíainajñ nayaimpinmayá jinia nunká ajuarmai.

14 Tura Entsaya Yajasma súam aents túrachminian ti turak ashí nunkanmayá shuaran anankawarmai. Túrak Entsaya Yajasma nakumkamurjñ najanawarat tusa akupkamai. Túramtai puniajai penké jakamnia awatmia penker ajasma nuna nakumkamurjñ najanawarmai.

15 Kukariá Yajasma kakaram sunasmai. Nujaj Entsaya Yajasma najanamun iwiaaku awajsatniua áintsan ichachkiamai. Túram ashí níniak shiir awajeacham máatniun susamai.

16 Nu arantcha ashí shuar anujmamprarat tusa akupkamai. Uuntcha uchisha kuítrinniusha kuítrinchasha ankantcha ankantchasha ashí ni nijjaincha tura wakerakka untsuurjñcha anujtuktiniuyi.

17 Entsaya Yajasma náarjñ tura wakerakka ni náari númerurjñ anujtuktiniuyi. Túrachuka sumatnasha sumakchamniuyi, surutnasha surukchamniuyi.

¹⁸ Wats, wi tájana ju nekaatniuka ti nekas enentáimtustiniiaiti: Entsaya Yajasma númirurí áishmañka númirurí asa sais siañtu seséntisáisaiti (666). Ashí ti neka ainia nú shuar Entsaya Yajasma númirurín nekapmar nin nekaati.

14

144.000 shuar Yúsan kantampruawarma

¹ Nuyá Murikiun Seun náinnium wajan wainkiamjai. Níjijaisha siañtu kuaréntikuátru mir (144.000) shuar wajaarmai. Nusha níjiaí Murikiu náarincha tura ni Aparí náarincha anujtukma aarmai.

² Ti untsurí árpan nayaimpiniam túntuiniak teer awajenak kanusa uuntri nujanrak téter ajá núnisan antukmajai. Ti kakaram ipiamta núnis amai.

³ Nu tuntuiyamujá siañtu kuaréntikuátru mir shuar akupin pujutainium naka wajasar yamaram kántan kantamáwarmai. Niisha kuaru tanñunmasha tura paintikuátru uunt-numsha naka wajasar kantamáwarmai. Nu kántanka chíkichka nekaachmin armai. Aya nu siañtu kuaréntikuátru mir shuar ka ju núnkanmaya shuarnumiá uwempraru ásar nu kántan kantamiarmai.

⁴ Nu shuarsha nuwajaj yajauch ajascharu ásar ti shiir áiniawai. Túrawar Murik weana nu namarainiawai. Ju núnkanmaya shuarnumiá uwempraru ásar matai Yussa tura Muriksha ti shiir enentáimtiarmai. Niisha emka juukma ti shiira núnisan armai.

⁵ Nu shuar penké wáitruachu ásar Yúsajsha ti shiir tunáa máatrachu armai.

Menaintiu suntar chichaman etserainiawai

⁶ Nuyá nayaimpiniam suntar nanamun wainkiamjai. Nusha uwempratin chicham tuke amuukashitínia nuna ashí núnkanam pujuinia nú shuaran ujakartiniuyi.

⁷ Nusha ti kakantar untsukum timiai: “Yus ashamkatarum. Niñki shiir awajsa-tarum. Yamaikia ashí shuaran súmamtikiawartin tsawant jeayi. Nayaimpincha núnkancha nayaantsan cha ashí entsan cha najana asamtai shiir awajstarum.”

⁸ Nuyá chíkich suntar, jímiara nu, taa timiai: “Pai, Uunt Papirúnia pépruka penké meserai. Niisha tuke tsanirmau núnisan ashí shuaran anampratniua núnisan utsuurmai. Tuma asa niisha nú shuarjaj nupetnak tuke emesnarai.”

⁹ Nuyá chíkich suntar, menaintiua nu, taa timiai: “Shuar Entsaya Yajasma ncha tura ni nakumkamuríncha shiir awajeakuñkia tura níjiañniumsha uweñnumsha ni naarj anuj-tukma itkuñkia

¹⁰ Yus nin kajerak ti asutiáttawai. Yapá pachimprachman áartinia áintsan ti kajerakatawai. Túramtai asupri ti tsúr kea nu jaj jiniun wáitsartatui. Yusa suntarj tura Murik íimianum apenáwar jiniun wáitsartatui.

¹¹ Ni wáitsatniurí jí esaak kajintsuk tuke mukuintia nuniskete. Entsaya yajasma n tura ni nakumkamurín shiir awajeenak ni naarj anujmamainia nuka tsawajsha káshisha ayamtsuk wáitsartatui.

¹² Nu asamtai ni chichamen umirainiak Yusna ainia nuka Kristun ti shiir namarainia ásar nu tsawantaj iturchatnum pujuiniak katsuntratin áiniawai.”

¹³ Nuyá nayaimpinmaya chichaman antukmajai. Nusha turutmiai “Ju áatratá: “Uunt Jesusan umirainia nu yamá jakarusha tura ukunam jakarusha ti shiir pujusartatui.” Tu aartá” timiai.

“Núnisan Yusa Wakaní tawai. “Eta, ti takasaru ásar jakar yawerman ayamprartatui. Tura ti penker túrawar akinkartatui” tawai” turutmiai.

Jú núnkanam arakma juukma

¹⁴ Nuyá yurañkim pújun wainkiamjai. Tura yurañminiam Aents Ajasua nuna eketun wainkiamjai. Akuptai tawaspan kurijaj najanamun etsenkrakuyi. Tura machitian éren takakuyi.

¹⁵ Tura chíkich suntar Yusa Uunt Jeñia jíinki yurañminiam eketun kakantar chicharuk timiai “Árak júuktin tsawant jeayi. Machitrumjaj tsupiram juuktá.”

¹⁶ Tutai yurañminiam eketu ni machitrijaj núnka arakman tsupir juukmai.

¹⁷ Nuyá chíkich suntar Yusa Uunt Jeñ nayaimpiniam ana nuyá jíinkimiai. Niisha ni machitri éren takakuyi.

¹⁸ Tura chíkich suntar naman maar Yus-sútainmaya jíinkimiai. Niisha jinia wáinniuyi. Tura máchit ti éren takakun kakantar chicharuk timiai “Machitrum ti érea nujaj uwa núnka arakma nu tsupiram juuktá. Mash tsamakarai.”

¹⁹ Tutai suntar ni machitrijaj ashí núnkanmaya uwa neren tsupir juukmai. Tura neke-tainiam chumpiamai. Nu neketai Yus ti kajerak shuaran ti asutiáta nuna nakumeawai.

²⁰ Tura uunt péprunmaya arantach ijiurarmai. Tura neketainmaya numpa jíinkimiai. Nu numpa tres siañtu (300) kirumitrua nuñ pajamar kawayu nujjijai métek ajasmai.

15

Nayaimpinmaya suntar amúamunam wáitkiastinia nuna pininnumiñ ukainiawai

¹ Nuyá ashammain ti enentáimprannian nayaimpiniam wainkiamjai. Siati suntar amúamunam wáitkiastinia nuna takusarmai. Nujai ju nuñkanam yajauch shuáran ti wáitkiasar Yus kajeamun umirtatui.

² Nuyá antumiañka áiv 20 Tura uunt péprunmaya aranntsñ ti saar jijiai pachimpramun wainkiamjai. Ni káanmatkarincha Entsaya Yajasmañ tura ni nakumkamurincha nupetkarma nu nuñ wajaarmai. Tura nin arpa tuntuítaiñ Yus súsarmai.

³ Túramtai kantamáwarmai. Yusa yaintrj Muisaisa kantarincha tura Murikiu kantarincha kantamainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme. Ashí Uunt Akupin asam ashí nekasa nu túrasha péñkera nu túriniaitme.

⁴ Uuntá, *zyaki* ashampromkachat! Tura yaki ti shiir awajtamsachat? Aya Amek ti shiir tunaarinchaitme. Ashí nuñkanmaya shuar ame ti shiir túramun wáinkiar Aminiak jeartamar ti shiir awajtamsartatui.”

Tu kantamáwarmai.

⁵ Nuyá atak Yusa Uunt Jeeñ íisan, Ti Shiir Tesaamun uranniun wainkiamjai.

⁶ Tura Ti Shiir Tesaamunmaya siati suntar siati wáitkiastinjai jíinkiarmai. Niisha ti shiir pújun entsaru armai. Netsepnumsha kurin emenmama armai.

⁷ Nuyá kuaru tañkunmaya chikichik kuri pininñian súsarmai. Nu pininñ tuke iwiaaku Yusa kajetairjjai piaku armai.

⁸ Tura Yusa kakarmarj ti ashammai Ti Shiir Tesaamunam mukuintuia núnis piakmai. Túramtai nu siati suntar wáitkiastinian ukarar amuniatsañ Yusa Jeeñ wayachminiuyi.

16

Wáitkiastin pinin ukararma

¹ Nuyá Imiá Shiir Tesaamunmaya ti kakaram chichaamun antukmajai. Nusha siati suntaran tiarmai “Nuñká werum Yusa kajetairj siati pininnum ana nu ashí ukartarum.”

² Tutai emka suntar we, pininnumiñ kukar ukarmai. Túramtai ashí shuar Entsaya Yajasma náarñ anujmamprar ni nakumkamurin shiir awajiarma nuna ti najamin kuchap jíintiurarmai.

³ Nuyá chíkich suntar jíimiaru nu, we Yusa kajetairin nayaantsanam ukarmai. Túramtai nayaants jakáa numpéa áinis ajasmai. Tura ashí nuñ pujuinia nu kajinñkarmai.

⁴ Nuyá suntar menaintuia nu, entsanam tura púkuninmasha ukarmai. Túramtai ashí numpa ajasarmai.

⁵ Nuyá suntar entsá wáinnia nuna chichamen antukmajai. “Uuntá, amek ti penker Yus asam jíítikiame. Yáunchusha tuke pujú asam ti shíiraitme.

⁶ Iis, nu shuar amée shuárunincha tura ame chichammin etserniuncha máawar ni numpen ukatraru ásaratai Amesha núnisemek numpa áarume. Maa, páchitsuk áitkianatin áiniawai.”

⁷ Tutai namañ-maa-Yus-sútainmaya chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti penker túrin asam nu shuar túramujai métek akiruitme, timiai.”

⁸ Nuyá suntar kuaru nu, tsawai nantunam ukarmai. Túramtai jijiai shuáran esaamujai wáitkiastin kakaram sunasmai.

⁹ Tura shuar ti sukuám wáitiamia nu, nu wáitkiastinian nérenniun Yusan yajauch chicharkarmai. Tura ni tunaarñ enentáimtsuk Nin shiir awajsatniuncha penké nakitrarmai.

¹⁰ Nuyá suntar senkua nu, Entsaya Yajasma akupin pujutairin ukarmai. Túramtai ni nuñkeñ ashí kashi ajasmai. Tura shuar ti najaimiainiak iniañcha esamiarmai.

¹¹ Tura nújaisa yajauch túratniuncha iniaisacharmai. Antsu kuchapríjiañ tura ti najaimiainiak wáitiamiañ nayaimpinmaya Yusan ti yajauch chicharkarmai.

¹² Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaaniñ akupin taarti tusa jintiamnamai.

¹³ Tura nuyá juna wainkiamjai. Ti Kajeñ Yajasma weneyasha, Entsaya Yajasma weneyasha tura núnisañ penké Kukariñ Yajasma ántar yúsñan etserniua nuna weneyasha puachia núnin yajauch wakan menaint jíiniarmai.

¹⁴ Íwianch ániak aents tujintiamun túruiniak ashí nunñanmaya akupniun irurarmai. Ti Tujincha-Yusaj ni uunt tsawantrj jeamtai mesetan najanatai tusar weriarmai.

¹⁵ (Yamá Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairjn pênker wáinia nú shuar ti shiir átatui. Misuchu asa natsaarchattawai.” Tu tawai.)

¹⁶ Tura yajauch wakan uunt akupin ánian Armajetún nunñanam irurarmai. Israer-chichamnum nu nunña tu anaikiamuiti.

¹⁷ Nuyá suntar siatia nu, nasenam ukarmai. Túramtai nayaimpinmaya Yusa Uunt Jeeñia ti kakaram chicham Yus akupin pujutainmaya chichaak “Mash uminkiai” timiai.

¹⁸ Tura nuyañka peemsha, chárpisha, ipiamtasha ajamai. Tura nunñasha ti kakaram úrkamai. Maa, aents jú nunñanam yámankamtaik pujuarmia nuyá júnis úrkamuka atsuwiti.

¹⁹ Ti Uunt Péprusha menaint nakantramai. Ashí nunñanmaya péprusha saanakiarmai. Nuñsha Yus ti kajerak Papirúnia pépruncha kajinmattsuk ni kajetairjn yapá umutaia áintsan aarmai.

²⁰ Entsá ajapén atentrasha tura murasha menkaramai.

²¹ Núnisan nayaimpinmaya uunt kaya núnisan mícha kákeramai. Ti uunt ániak kintiarjaj métek kijin armai. Shuarsha nujaj ti wáitainiayatán áyatik Yúsan yajauch chicharkarmai.

17

Tsanirmatai nuwá asutiámu

¹ Nuyá siati suntarnumiá chikichik taruti turutmiai “Winitá. Tsanirmatai nuwá ti asutiátniun iniaktustatjame. Nu nuwá nayaantsanam uku eketui.

² Ashí jú nunñanmaya akupin niijjaj tsanirmawaru ániawai. Núnisan ashí jú nunñanmaya shuar, nu nuwá tsanirmatniun tsankateam, nijiamanch umartinia áintsar niijjaj ti yajauch túrawar nampekarmai.” Nuna taku Yusnumiá kanaktinian nakumkamai.

³ Nuyá mesekranam kampuntin atsamunam jurukmiai. Tura nuñ Yajasma kapaakunam nuwá eketun wainkiamjai. Nu Yajasma nasha ashí Yúsan yajauch chichareamu áatramuyi. Muuke siátitiat kachurj tiásauyi.

⁴ Nu nuwasha tarachin yamakai kapaakujajisha ti shiir iwiarmamar entsaruyi. Kurijajisha, shúrmach kayajajisha, ti shiir sháukjajisha iwiarmamprauyi. Kurí pinñkian muñmiainnasha tura ashí ni tsanirmatairj imiá yajauch armia nunasha piakun ajaamak takakaui.

⁵ Nijjainiumsha ni naarja áintsan yúpchuch nekaachminia nu júnis áarmauyi: UUNT PAPIRÚNIA, Ashí Tsanirmauncha tura Ashí Jú Nunñanam Muñmiainian Túrinia Nunasha Nurjinti.

⁶ Nu nuwasha Yus-shuar Kristunun etserkar máawarma ainia nuna numpen nampekuyi.

Nuna wáinkian ti enentáimturmajai.

⁷ Túrunamtai nayaimpinmaya suntar túrutmiai “¿Urukamtai imiá enentáimtam? Wats, ashí nuwanun paant ujaktatjame. Núnisan yajasma ekenak júana nunasha paant ujaktatjame. Muuke sha siátichukait tura kachurjisha tiáschak áinia.

⁸ Nu yajasma wáinkiam nuka yaunchu pujuwiti tura yamaikia juñ pujachiat amúamunam tuke játsuk nánkatkachu wáanmaya jínkítiawai. Shuar nuna wáinkiar ni naarj tuke iwiaaku pujutai papinium yámankamtaiknumiá anujtukchamua nuka nu yajasma ashamakartatui. Nu yajasma yaunchu puñ yamaikia atsayat atak wantinkiatatawai’ turutmiai.

⁹ ‘Nekas neka ainia nu júna enentáimturarti: Siati muukenka siati náintian nakumui. Nu nuwá nuñ eketui.

¹⁰ Núnisan ni siati muuke siati akupniun nakumui. Kame senku akupniuka nankaamasaru ainiawai. Chikichik tuke akupniuiti tura chikichka tuke taatsui. Nii taasha núkap tsawant akupkashtatui.

¹¹ Nuyá ashí ukunmanñka yaunchu amia nú yajasma wantiniak nujaj uchu akupin ajastatui. Túmaitiat chikich siati akupniujaj iruram métek enentáimpramniati. Tura nu yajasma yamaikia atsayat wantiniak akupak umik tuke emesnartinnium wétatui’ turutmiai.

¹² ‘Tias kachurj wáinkiam nuka tias akupin tuke akupeenatsna núiti. Niisha nu yajasmajaj métek penké ishichik tsawant akupin ajasartatui.

¹³ Jú tias akupniusha métekrak enentáimniainiak ni kakarmarjn yajasma sústartatui nújajisha akupkat tusar.

¹⁴ Murikjajisha mesetan najanawartatui. Túrasha Murik nupetkartatui. Niisha uuntjaj nankaamas Uunt asa tura núnisan akupniujaj nankaamas Akupin asa nupetmaktatui. Tura Niijjaj írutraa nu, Yus Winia atí tusa achikma ásar tura Nin tuke umirin ásar Niijjaj nupetmakartatui.’

¹⁵ Suntar tuke chichartak turutmiai ‘Tsanirmatai nuwá nayaantsanam uku eketu wáinkiachumek. Nu nayaantsaka ashí nuñkanmáya shuáran nakumeawai.

¹⁶ Tura tias káchuka yajasmanum wáinkiam nu, tsanirmatai nuwan nakitrar ajapawar misú ikiukiartatui. Ni ayashíncha yuawartatui tura áesawartatui.

¹⁷ Nu akupniun enentáin Yuska ni wakeramurín apujsaiti. Nii timia nu umintsáin akupniusha métekrak enentáimprar ni kakarmarín takamtsuk yajasman súsatniun enentáimtikramai.

¹⁸ Nuwá wáinkiam nuka ashí nuñkanmáya akupniun akupeana nu pépruiti.”

18

Papirúnia emesramuiti

¹ Nuyá nayaimpinmáya suntar táarun wainkiamjai. Ti kakaram akupin asa nuñkancha tsáapin awajsamai.

² Tura ti kakantar chichaak timiai “Pai, Uunt Papirúnia penké meserai. Tura yamaikia íwianch matsamtaisha ashí yajauch wakaní pujutairjsha ajasai. Mujjmiai nanamtincha tura ashí yajauch nanamtin ainia nusha nuñ pasunmainiawai.

³ Nu péprunmáya shuar tuke tsanirmau núnisañ ashí nuñkanmáya shuaran anampratniua núnisañ ni ti yajauch turamujai utsuurmai. Núnisañ ashí jú nuñkanmáya akupin Yúsan iniaisar níijjai tsanirmawaruá áinis áiniawai. Tura shuarsha ni yajauch waramajai ti kuítrintin ajasaruiti.” Tu timiai.

⁴ Nuyá nayaimpinmáya ti kakantar chichaman antukmajai. “Wí shuaraitrumna nuka nú peprunmáya jíinkitiarum. Túrachkurmeka ni tunaarj jumamkirum ni wáitsatniuríncha pachíinkiatarme.

⁵ Ni tunaarjsha ti piak nayaimpiniam jeastatuk ajasai. Tuma asamtai Yus ni tunaarjñ kajinmatkichuiti.

⁶ Ni tunáa túramujai métek akikiam ataksha nuna nankaamas métek patattsata. Ni yajauch túramu níijiamchin ashí áararma núnisañ nuna nankaamas ti wáitsatin níijiamanch pachimpruram susata.

⁷ Waantu enentáimtumak yajauchin wararsama nujai métek ti wáitkiastá yamaikia. Tunáan ti túriniaitai ni enentáinkia enentáimias “Uunt Akupniuitjai. Wajechu asan penké wáitsashtiniatjai” tu enentáimtumawai.

⁸ Tuma asamtai ti wárik chikichik tsawantaj ni wáitsatniurj tarittiwai. Jákatniusha ti wáitsatniusha tura tsukasha tarí ashí jíijjai ekeemankattawai. Uunt Yus ashí Tujincha nu kajerkamu asa nujai asutniáttawai.” Tu timiai.

⁹ Ashí nuñkanmáya akupin níijjai tsanirmawaru ainia nu ashí yajauchin níijjai wararsaru ásar nu pepru esaak múkuint ajakui eárramai.

¹⁰ Ti esaak wáitakiui nuñ pachiinkiar wáitsatniun ashamainiak arant wajasar tiartatui “Maa, Papirúnia ti uunt pépruitiat nekas wáitnenmai ajawai. Imiá wárik ni wáitsatniurj tarini.”

¹¹ Núnisañ ashí nuñkanam súrin ainia nusha nu péprun ti kuntuts enentáimturar eárratatu. Ni surutain itiamun zyaki sumarkat?

¹² Kame júna itiaru áiniawai: kurincha, kuítniasha, kaya shíirmachincha, ti shiir sháuknasha, ti péñker tarachniasha, akupin entsatai shíirmachin yamakaincha kapaáñniuncha, sétancha, itiaru áiniawai. Núnisañ ashí kuñkuin numincha, ti shiir awara najanamuncha, ti shííram numincha, yanjú jiruncha, penké jiruncha, mármur kayancha itiaru áiniawai.

¹³ Núnisañ ishpiñnasha, nusháa kuñkuinniasha, mira kuñkuinniasha, umutaincha, asuitincha, trikiu nerencha, tura trikiu ti péñker nekenmancha itiaru áiniawai. Núnisañ áintstai tanñkuncha, murikniasha, kawaincha ni kárurijjai, tura nú arantka shuárnasha suruktinian itiaru áiniawai.

¹⁴ Tura nu péprun tiarmai “Numí neren ti wakeruk súmauya nu yamaikia nuñ atsawai. Ashí ni kuítrjsha tura ashí ni péñkerjsha tuke penké amuukayi.” Tu tiarmai.

¹⁵ Ashí nuna súrin armia nu, nuna surukar kuítrintin ajasaru ásar, ti wáitsamun ashamkar arant wajasar eárratatu.

¹⁶ Túrawar tiartatui “Maa, uunt pépruitiat ti wáitnenmai ajakai. Nuwá ti penker iwiarmampira áinis nuyá shuar akuptai tarachin yamakajjai kapaáku entsarmai. Kurijjaisha kaya ti shíírmachijjaisha tura ti penker sháukjaisha ti shiir iwiarmampraruyi.

¹⁷ Ti wárik ashí ju kuit amukaiti.” Tu tiarmai.

Ashí uunt kanú kapitáintrijsa, ashí nayaantsanam katiinia nusha, ashí kanú wiánniusha, tura ashí kanú nérennurjsha árantak wajasarmai.

¹⁸ Tura pepru esaak múkuint ajan wáinkiar ti kakantar útainiak tiarmai “Timiá shiir pepru atsuwiti.”

¹⁹ Tiar ti kuntuts pujuiniak awatnamar kakantar útainiak tiarmai “Maa, ti uunt pépruitiat ti wáitnenmai ajakai. Ashí uunt kanu nérentin nayaantsanam níijjaj takasar kuítrintin ajasarmai. Tura ti wárik mash emesnarai.” Tu tiarmai.

²⁰ Antsu nayaimpiniam pujarumna nu, ashí Yus akatramutirmesha, ashí Yusna etserniutirmesha, tura ashí Yus-shuar árumna nu ni wáitsamujaj warastarum. Nu wáitsamujaj atumin yajauch awajtamsarmena nuna yapajtiurmakurme.

²¹ Nuyá ti kakaram nayaimpinmaya suntar ti uunt neketai kayan jukí nayaantsanam ajun timiai “Júnisan uunt pepru Papirúnia emesnar atakka wainniakchatin tuke menkakattawai.

²² Tura atakka jantsemma pinquiusha tampursha shakapsha antunkashtatui. Nu arantcha nuñkia shuar penké takakmaschartatui. Túramtai nekeamusha antunkashtatui. Ashí mitia átatui.

²³ Shiripkincha ekeemakchartatui. Nuatma nampersha antunkashtatui. Nuikkia ni shuarj súrin arma nu ashí nuñkanam nankaamantu armai. Tura ashí nuñkanmaya shuarañ waweatiua áintsan níya núnis ajasarat tusa anan kawarmai. Túrasha núnisan ti kakarmaitiat ju mash túrunayi.” Tu timiai.

²⁴ Kame ni akupkamujaj penker shuar ti mantamnawaru asamtai nu péprunam ashí yaunchu Yusna etserniu numpesha, ashí Yus-shuara numpesha tura penker shuar ashí nuñkanam maamu ainia nuna numpesha nu paant wáinkiamniati.

19

¹ Nuyá nayaimpinmaya ti untsurj aents kakantar untsumainian antukmajai.

“Ju ti shiir enentáimtumainti. Yuska uwempratniuncha, nekas shiir átinniasha, nankaamaku átinniasha, tura ashí kakarmancha nekas nérenniuiti.

² Niisha aya nekas penker túratniua nuna túrin asa ti nukap tsanirmaun ashí shuarañ tsanirijjaj utsuun ti asutiáyi. Nin ti wáitkias ashí ni shuarj máawarman yapajmiátkaiti” tiarmai.

³ Ataksha kakantar untsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.” Tu tiarmai.

⁴ Túniakui paintikuatru uunta nu tura kuaru tan kusha nuñká piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai.

⁵ Akupin pujutainmaya chícham júnkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapi-tiánitkiurmesha péejchachitkiurmesha, ii Yusrj tuke shiir awajsatarum.” Tu timiai.

Murik nuatnaikiatin namperi

⁶ Nuyá ti untsurj aents chichainiak kanusa uuntri nujan Krak téter ajá núnisan antukmajai. Ti kakaram ipiamta núnis amai.

“Ti shiiraiti, tiarmai. Ii Uuntri Yus ashí tujincha asa ashí akupkatniun nankaamayi.

⁷ Tuma asamtai shiir enentáimsartai. Murikiu anajmarmarj shiir iwiarnarmatai ni nuatnaikiatin tsawantri jeayi. Tuma asamtai ti shiir warasar nincha shiir awajsatai.

⁸ Murikiu anajmarmarjñkia iwiarnarti tusa ti shiir pushi sunasmai. Nusha yamaram máatrachu asa ti pújuiti.” Tu tiarmai.

Nu pushi Yus-shuar penker túramun nakumeawai.

⁹ Nuyá nayaimpinmaya suntar turutmiai “Ju áatrarta: “Murik nuatma námpernam ipi-aamu ainia nuka ti shiir warasarti.” Tu aarta, turutmiai. Ju ka Yus timia asa imiá nekasaiti.”

¹⁰ Takui nu suntaran shiir awajsataj tusan tikishmatramjai. Túramtai turutmiai “Penke ánkiaip. Wisha Yusa yáintriñtaj ámjijaj métek tura yatsumjaj métek Kristu nekas chichamen tuke umirin ainia nu. Yúsak shiir awajsatniuiti.” Tu turutmiai.

Kame Kristu imiá nekas timia nuna ashí Yúsnañ etserainia nú shuar paant awajkartin ániawai.

Kaway píjunam eketna nu

¹¹ Nuyá nayaimp uranniun wainkiamjai. Nu j kaway puju wantinkiamiai. Nu kawaynium ekeema nuna naari Ti Penker Umin tutajyi. Núnisan Ti Nekas Turin tutajyi. Ti penker Akupin asa aya nekas penker túrak mesetan najanaiti.

¹²⁻¹³ Ni jishaj jijaj métek keearmai. Múuknumsha akuptai tawaspan untsurj etsenkrakuyi. Nu j ni naari Yus Chícham áarmauyi. Túrasha tana nuna Niñki takamsuk nekaamai. Numpajaj enkerman entsaruyi.

¹⁴ Ti untsurj nayaimpinmaya suntar mesetnum weena áintsar kawainium ekemkar ti shiir píjun entsaru Nin nemariarmai.

¹⁵ Nu suntara Uuntri weneęya, ashí nuńkanmąya yajauch shuaran máatin, puniá mai ere tsakatskatin jįinmiai. Tura jirujaj asutiátniua áintsan ti kakaram akupkattawai. Túrak Ashí Tujincha Yusa kajetairi ti kakarma nujaj shuáran asutiáttawai. Uwa nekenkar ijiuratniua áitkiasan wáitkiasartatui.

¹⁶ Ni pushirįncha makuįncha ni naari áarmauyi: Ashí Akupniun Akupin tura Ashí Uunta Uuntri.

¹⁷ Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperįn yurumáitiarum.

¹⁸ Akupniun namanęksha yuítiarum. Suntara kapitántri namanęksha, kakaram suntara namanęksha, kaway namanęksha tura eketainia nuna namanęksha, kame ashí shuara namanęksha nanękaamantu ainia núnasha tura penęké shuar ainia núnasha yuítiarum.” Tu untsukmai.

¹⁹ Tura nuyá Entsaya Yajasmacha tura jú nuńkanam akupin ainia nunasha ashí ni suntarįįaj wainkiamjai. Niisha kawainium eketka nujaj tura nuna suntarįįaj mesetan najanatai tusar iruntrarmai.

²⁰ Tura nu mesetnum Yajasmasha tura Kukarią Yajasmasha, penęké ántar yúsnan etserniua nu, mai achinkiarmai. Nuikkia Entsaya Yajasma ni kakarmarįn súam nu Kukarią Yajasmaka aents tujintiamun ti turak shuáran ananękawarmai. Túramtai nu shuar Entsaya Yajasma náarin apujmansar ni nakumkamurįn shiir awajsarmai. Tuma asamtai Entsaya Yajasmacha tura Kukarią Yajasmacha íwiakuk asupriįaj ti kea nu ji-antumiannum apeáwarmai.

²¹ Chíkichka kawainium eketkanumią puniá tsakatskatin weneęya jįinmia nujaj mantam-nawarmai. Túramtai nanamtin ni ayashįn yuawar ejemakarmai.

20

Kristu mir uwi jú nuńkanam akupkattawai

¹ Nuyá nayaimpinmąya suntar táarun wainkiamjai. Nusha náńkatkachu wąą yawirįn tura jįinkiatu jirun kampurman takakuyi.

² Nu suntarsha Ti Kajen Yajasma jiru kampurmajaj jįinkiamjai. Nu Yajasma iwianchi kapitántri Satanas tutainti. Yáunchuyá-napiti niisha. Tura nu iwianchin jįinkia mir uwi pujusat tusa

³ náńkatkachu wąąnam epeńmiai. Tura waiti uraichminian anujtukmai. Mir uwi nanękaamatsajį ashí nuńkanmąya shuaran ananękwarajįn tusa túramai. Antsu mir uwi nanękaasmatai ishichik tsawant anękant akupnaktiniaiti.

⁴⁻⁵ Nuyá akupin pujutainium pujuinian wainkiamjai. Tura shuara túramurįn írsarat tusa kakaram sunasarmai. Tura núnisan muuke tsupirka maamu wakanįncha wainkiamjai. Nusha Yusa chichamen etserainiak tura Kristu chichamencha etserin ásar maamu armai. Niisha Entsaya Yajasmacha ni nakumkamurįncha tikishmatracharu armai. Núnisan náarincha nijaińiumsha tura uweįnumsha anujmampracharu armai. Nu shuar ataksha nantakiar emka nantaktin tsawantnum pachiinkiarmai. Túmainiak Krįstujaj métek mir uwi akupeamun wainkiamjai. Antsu chíkich jákaruka mir uwi nanękaamatsajįn nantakcharmai.

⁶ Antsu emka nantaktin tsawantnum pachiinkiarua nú shuar, ti penęké áimák, ti shiir warasmin ániawai. Nu shuarka jimiará jákatniunam pachiintsuk Yusna tuke takarin tura núnisan Krįstunu tuke takarin ártatui. Tura Krįstujaj métek mir uwi akupkartatui.

⁷ Tura mir uwi nanękaasmatai uunt iwianch urani akupnaktatui.

⁸ Túram ashí nuńkanmąya shuáran ananękawartaj tusa jįinkittiwai. Kuk nuńkanmasha tura Makuk nuńkanmasha ashí pujuinia nuna ananękawartatui. Tura mesetan najanataj tusa ni suntarįn nekapmarchamnia ti untsurį irurtatui.

⁹ Tura ashí nuńkan enetak Yus-shuar matsamtaincha tura Yus ti aneamu pépruncha mash éńkekarmai. Túramtai Yus nayaimpinmąya jįinia akuptuk mash áesawarmai.

¹⁰ Tura iwianchi kapitántri, nin ananękawarmia nu, asupriįaj keá ji-antumiannum apenámai. Nu yaunchusha Entsaya Yajasmasha tura Kukarią Yajasmasha, penęké ántar yusan etserniua nu, nuį apenáwarmai. Nuįsha tsawajsha káshisha iniannatsuk ti wáitsartatui.

Ashí amúamunam sůmamtiatiin tsawant

¹¹ Nuyá akupin pujutain úntan tura ti pújun wainkiamjai. Tura nuį pujancha wainkiamjai. Niisha ti kakaram asamtai nuńkasha nayaimpisha aya menękarar tuke atsúarmai.

¹²⁻¹³ Tura túrunatsajįn nayaantsanam jákarua nusha jįinkiarmai. Núnisan iwiansamunam jaka pujuinia nusha jįinkiarmai. Tura jákaruncha, nanękaamantu arma nunasha tura penęké shuar arma nunasha, ashí wainkiamjai. Tura Yusaj naka wajaarmai. Nuyá ashí shuar túramu aakma papí urantrarmai. Tura nu papinium aarna nujaj métek ashí ni turamurį

paant nékaneakui súmamtiknawarmai. Tura chíkich papisha tuke iwiaaku pujustin papí urankamai.

¹⁴ Nuyá jákatin amuukati tusa ji-antumiannum apenámai. Nu ji-antumiannum wétin jimiara jákatin tútainti.

¹⁵ Tura ashí shuar ni naarj tuke iwiaaku pujustin papinium atsúarma nusha nuj apenáwarmai.

21

Nayaim yamaram tura yamá nuñka

¹ Nuyá nayaimpisha tura nuñkasha menkaramtai nayaim yamarman tura yamá nuñkancha wainkiamjai. Tura nayaantsasha atsumai.

² Wi, Juan, ti shiir péprun, Yusnumia yamaram Jerusareñkan nayaimpinmaya táarun, wainkiamjai. Anajmarma ni áshirjn inkiuntaj tusa ti shiir iwiamampra áintsan ti penker iwiamamuyi.

³ Nayaimpinmaya ti kakantar chichaamun antukmajai. “Iisiá, Yus yamaikia aentsjai pujawai. Tuke niijjai pujakui ashí ni shuarj ártatui. Tura niijjai tuke pujak nekas tuke ni Yusrj ártatui.

⁴ Yus ni neajkin ujujturartatui. Tura nuik amia nuka ashí amuukarmatai jákatniusha, úttincha, wáitsatniusha, tura najaimiatniusha atsuttawai.”

⁵ Tura akupin pujutainium ekema nu “Iistá, Wi ashí penké yamarman nájanjai” timiai. Nuyá nu arantcha turutmiai “Juka imiá nekas asamtai aartá. Nekas enentáimtustiniati.”

⁶ Ataksha turutmiai “Yamaikia mash uminkiyai. Wiitjai. Yámankamtaiknumia amúanmasha tuke pujuwitjai. Wisha A rétranmaya Y rétranam ashí retra áintsaitjai. Ashí kitiama núnaka tuke iwiaaku pujutai entsan penké kuitchajai áartatjai.

⁷ Nupetmakunka ashí yamarma juna mash susattajai. Wisha ni Yusrj ártatjai. Núnisan niisha winia uchir ártatui.

⁸ Antsu sápijka, Yúsan enentáimtichusha, yajauchin máatrasha, mankartincha, tsanirmanat pujerniusha, wawekratniusha, ántar-yusan tikishmatniusha, tura ashí wáitrincha asuprijai keá ji-antumiannum apenáwartatui. Nuka jimiara jákatin tútainti.”

Yamaram Jerusareñ

⁹ Nuyá siati suntar pinin amúamunam wáitkianjinjai piakun takakua nuyá chikichik taruti túrutmiai “Winitia. Murikiu anajmarmarjn iniaktustatjame.”

¹⁰ Taku mesekranam naint yakí juruki Yusnumia ti shiir Jerusareñ pepru nayaimpinmaya táarun iniaktursamai.

¹¹ Nu péprusha Yusa wincharijjai tsáapniniuyi. Nu tsáapnincha kaya ti shíirmachia núnis jaspí kaya nuni saar asa ti tsáapniniuyi.

¹² Pepru yantamesha ti yakí péñkramuyi tura wáitirj tuse amai. Tura nu wáitinium suntar wajatiarmai. Nu wáitinmasha Israer-shuara uuntrj tuse armia nuna naarj áarmauyi.

¹³ Nantu tátainmaanj menaintiu waiti amai. Nantu akatainmaanisha menaintiu waiti amai. Nuñkaanisha menaintiu waiti amai. Arakaanisha menaintiu waiti amai.

¹⁴ Ti uunt kaya tuse apujsamu armai. Tura nuj ekenir péñkramuyi. Nu tuse kayanam Murikiu akatramurj tuse armia nuna naarj áarmauyi.

¹⁵ Suntar wijijai chichau nu, nekapmatain kurin takakuyi. Nujai pépruncha, wáitirincha, tura péñkramurincha nekapmartiniuyi.

¹⁶ Pepru esantisha wançantisha yakirisha mash métekrak armai. Suntarsha péprun nekapmataijjai nekapmaram esantisha wançantisha tura núnisan jeamkamuyi yakirisha jimiara mir jimiara siantu (2.200) kirúmitru amai.

¹⁷ Nuyá péñkrincha nekapmarmai. Suntar aents nekapmataijjai nekapmaram sesentikuatru (64) mitru amai.

¹⁸ Nu péñkramusha jaspí kayajai najanamuyi. Péprusha aya kúrikiyi. Nu kuri ti penker sáarauyi.

¹⁹ Peñ apujtukma kayasha ti shiir kaya ainia nujai najanamu asa ti shiir iwiamamuyi. Emka nu jaspí káyauyi. Jímiara nusha sapiru káyauyi. Menaintia nusha ákata káyauyi. Kwatrua nusha ismirártauyi.

²⁰ Senkua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatista káyauyi. Ti kayaim apujsamu asamtai ti shíirmachiuyi.

²¹ Pepru wáitirj tuse ainia nu, ti shiir nayaantsanmaya shaukjai chikichik najanamu armai. Pepru jintisha aya kúrikiyi. Nu kuri ti penker sáarauyi.

²² Yusa Uunt Jeencha wainkiachmajai. Antsu nu peprunam Uunt Yus ashí tujincha nu tura núnsan Muriksha nu péprun pímiutkui takamtsuk Níniyui.

²³ Nu péprunmasha tsawai-nantusha kashí-nantusha atsumchamai. Antsu Yusa winchari tsáapin awajmiai. Núnisan Muriksha tsáapin awajmiai.

²⁴ Nu tsáapnijaisha ashí nunkanmayá shuar wekasartatui. Tura ashí nunkanam akupin ainia nusha nuyujainiak ni pénkerjjiai nuna shiir awajuiniawai.

²⁵ Tura kashí atsá asamtai tuke tsawaiti. Tuma asamtai wáitiri tuke epenchamu ártatui.

²⁶ Tura ashí nunkanam pénker ana nuna nuy itiaartatui.

²⁷ Tura yajauchikia pénké wayashatatui. Mujmiainian túrincha tura anankartincha pénké wayachartatui. Antsu áyatik shuar tuke iwiaaku pujutai papinium naari aarma ainia nuke wayawartatui. Nu papincha Murik takakui.

22

¹ Nuyá suntar tuke iwiaaku pujutai entsan ti sáaran iniaktursamai. Nusha uunt akupin pujutainmayá ti saawi jiinmiai. Nu pujutaisha Yusna tura Muriknauyi.

² Pepru jintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nukésha ashí nunkanmayá shuar tsuámatainti.

³⁻⁴ Ashí yajauchia nuka atsuttawai. Uunt akupin pujutai, Yúsnasha Murikniasha, nuyin aa asamtai ni shuari ti paant wainiainiak tikishmatrartatui. Tura njijaincha ni naari anujmankartatui.

⁵ Tura káshisha atsuttawai. Nuy pujuinia nuka shiripkincha etsancha atsumchartatui. Uunt Yúsak tuke tsáapin awajtiatui. Tura ni shuari tuke iniannatsuk akupkartatui.

Jesukrístu tátintri pénké nuntumsai

⁶ Nuyá suntar turutmiai “Ju chicham ti nekas asa nekas enentáimtusminiaiti. Uunt Yus yaunchu níniun etserniun ni chichamen enentáimtikramia núnisan yamaikia ni suntarin akuptuk wárik túrunatta nuna ashí ni shuarin ujakuiti.”

⁷ “Ti wárik winittiajai” tawai Murikkia.

Shuar ju papinium Yusa Chichame áarman umirna nuka shiir warasminiaiti.

⁸ Wi, Juan, juna mash ísan mash antukmajai. Tura mash ísan antukan nayaimpinmayá suntar iniaktursama nuna shiir awajsatat tusan tikishmatramjai.

⁹ Túram turutmiai “Pénke áinkiaip. Wisha Yusa yáintrntjai ámijai métek tura yatsumjjiai métek. Yúsnan etserin ásar tura ju papinium áarma nuna umirainiak Yusa yáintr ániawai niisha. Yúsak shiir awajsatniuiti.”

¹⁰ Nuyá ataksha turutmiai “Ju papinium aarma Yusna asamtai úukam ikusaip. Ashí túrunatin tsawant ishichik ajatesai.

¹¹ Nu jeatsajnkia yajauch shuarka tuke yajauch túruki wetí. Núnisan mujmiainian túraka tuke túruki wetí. Antsu pénkeran túraka pénkeran túruki wetí. Núnisan esetar enentáimniusha tuke esetar Yusjai wekasati.”

¹² Muriksha tawai “Eta, ti wárik winittiajai. Túran ti shíirmachin ashí pénker túramujai métek súsatniua nuna takukin winittiajai.

¹³ Wiitjai. Yámankamtaiknumiá amúanmasha tuke pujuwitjai. Wisha A rétranmayá Y rétranam ashí retra áintsaitjai.” Tu tawai.

¹⁴ Ni pushiri pénker nijiamatniua núnisan pénker túrinia nú shuar shiir warasminiaiti. Nu shuar nu pepru wáitirincha wayamniaiti. Túrar tuke iwiaaku pujutai numinmayá yuamniaiti.

¹⁵ Tura antsu Yúsán enentáimtachuka, wawekratniuka, tsanirmatan pujurainia nuka, mankartinkia, ántar-yata tikishmatniuka, tura ashí shuar wáitian wararainiak tuke túrin ainia nuka áa matsataniak pénké wayachmin ániawai.

¹⁶ “Wi, Jesus, ashí Yus-shuaran ujakarar tusan winia suntarun akupkajai. Wikia Tawit Weeaitjai. Túrasha Tawitia Úuntrntjai. Wikia ti tsáapin yaa, yánkuamia áintsanketjai.” Tu tawai.

¹⁷ Yusa Shiir Wakanisha tura Murik anajmarmasha “Winitiarum” tuiniawai.

Tura juna ántana nusha “Winitiarum” tití. Tura ashí kitiama nuka winití. Wakerakka tuke iwiaaku pujutai entsan pénké kuítchajai umartí.

¹⁸ Ashí shuar ju papinium Yus-Chicham aarma nuna antukarun juna ujaajai: Shuar jui áarman chichan pataakka Yus nin ti wáitsatin jui aarma nuna patattsattawai.

¹⁹ Núnisan shuar jui áarman emeneakunkia Yus ni naarin iwiaaku pujutai papiniumiá japirattawai. Tura ti shiir péprunam wayatniun suritkiattawai. Nu péprusha tura nu papisha jui paant ukama ániawai.

²⁰ Jú papi áanratniun ukaua nu tawai “Eta, ti wari winittiajai.”

Pai, núnisan atí. Wari winitia, Uunt Jesusá.

²¹ Ii Uuntri Jesukristu atumniasha shiir yainmakarti.
Nuke atí.